

قرون خلدك تاريخ

برنجی جلد

استانبول فتحندن قارلوچه معاهده سنه قدر
تاریخ عثمانی و ۱۶، ۱۷ نجی عصر لرده اوروپا تاریخی

مطاب سلطانیه نك فتوره و ادبیات شعبه لری اورتبی صنفه مخصوصه

علی رشاد

دارالفنون ادبیات فاکولته سی تاریخ و جغرافیا شعبه سی
قرون وسطی و جدیدہ تاریخی مدرسی

استانبول — مطبعه عامره

۱۳۳۲

علی رشاد بک مکاتب سلطانیہ مخصوص اولہ رق
یازدینی تاریخ کلیاتی

مکاتب سلطانیہ نك ایکنجی صنفه مخصوص : جو جملہ تاریخ دوسری

»	اوچنجی	»	: تاریخ عثمانی
»	دردنجی	»	: تاریخ عمومی
»	بشنجی	»	: قرون جدیدہ تاریخی
»	آلتنجی	»	: تاریخ عمومی ، برنجی جلد
»	یدنجی	»	: تاریخ عمومی ، ایکنجی جلد
»	سکزنجی	»	: تاریخ عمومی ، اوچنجی جلد
»	طقوزنجی	»	: تاریخ عمومی ، دردنجی جلد
»	اونجی ادبیات	:	تاریخ قدیم ، اقوام قدیمہ شرقیہ و یونانیلر
»	اونجی فنون		
»	و ادبیات	:	قرون جدیدہ تاریخی ، برنجی جلد
»	اون برنجی ادبیات	:	تاریخ قدیم ، رومالیر ، بیزانسلیلر ، اسلاولر ، ترکلر ، ایرانیلر

[مکاتب سلطانیہ نك دورہ ثانیہ ادبیات اون ایکنجی صنفه مخصوص

تاریخ اسلام ایلہ قرون جدیدہ تاریخنك فنون و ادبیات ۱۱نجی و ۱۲نجی
صنفلرینه مخصوص دیگر ایکی جلدی دردست طبعدر]

برنجی قسم

استانبولك فتحندن قارلوفچه معاهده سنه قدر

تاریخ عثمانی

۱

استانبولك فتحنه قدر تشکیلات ملکیه

پادشاه دولت عثمانیه نك تشکیلات اصلیه سی ایجابجه طرز اداره حکومت پادشاهلرک احوال ذاتیه لرینه تابع ایدی. بناء علیه شان وشوکت اونلرک همت شخصیه لری اثری اولدیغی کبی مؤاخذه ومسئولیتک دخی اونلره عائد اولسی لازم کلیر. مثلاً، ییلدیرم سلطان بایزید زماننده کوریلن فساد اخلاق ارکان دولتک پادشاهک مشربنه اتباعاً ذوق وصفایه، حشمت وداراته میل ایتلمی اوزرینه ظهور ایتشدی. فاتح سلطان محمد دورنده هرکس ینه پادشاهه امثالاً غزا و جهاد وادیسنه سالک اولمشدی. بایزید ثانی عصرنده قوای دولته طاری اولان فتور ورخاوت، شبهه سزکه، پادشاهک طبع و مشربنی نتیجه سی ایدی. سلطان سلیم اول و سلطان سلیمان قانونی ایله جهانگیرلکک یکیدن میدانه چیقمسنه، اسکی شوق وغیرتک او یانمسنه سبب مستقل بوایکی پادشاهک سجه لری ایدی.

دولت سلجوقیه نك انقراضی اوزرینه آناطولیده تشکل ایدن امارتلرک ملک ونفوس اعتباریله اک کوچکی عثمانلی امارتی ایدی. بویله اولدیغی حالده ایلك درت پادشاهک ۱۰۶ سنه قدر امتداد ایدن مدت سلطنتلرنده

ممالك سلجوقیہ کاملاً عثمانیلرک زیر اداره سنہ کیرمش و طونه ساحلرینہ قدر همان بتون روم ایلی قطعہ سی ضبط اولمشدی . عثمان غازینک قومانداسی آلتندہ طوبلانمش بر کوچک جمعیتک بر عصر ظرفندہ بودرجہ بیومسی مادی، معنوی بعض اسبابک برلشمسیلہ ممکن اولمشدی :

اولاً؛ دولت سلجوقیہ نک انقراضیلہ آناطولیڈہ متعدد امارتلر تشکل ایتدیکی کی بیزانس ایمپراطورلغنک عجز وضعفی سببیلہ اونک والی وقوماندانلری دخی ملوک طوائف شکنہ کیرمش اولدقلرندن عثمان غازینک درت طرفندہ قوتلر بر حکومت قالماش ایدی . بناءً علیہ آناطولی قطعہ سندنہ کی ممالك عیسویہ قولایحجہ ضبط ایدلدی .

ثانیاً؛ عثمانیلر ممالك اسلامیہ نک سرحدندہ ساکن ایدیلر . دائماً غزا و جهاد ایلہ مشغول اولہرق یکی یکی فتوحاتہ ، اموال غنائمہ نائل اولدقلرندن شان و شهرتلی ہر طرفہ یایلمش ایدی . اطرافدہ ، ممالك سائرمدہ بولنان مسلمان محاربلیا مٹوبات غزایہ ویا اموال غنیمت واسرایہ نائیت املیلہ آقین آقین عثمان غازی یہ التحاق ایتدکلرندن امارت عثمانیہ کسب قوت ایتدی .

ثالثاً؛ پادشاہلرک شریعت اسلامیہ احکامنہ رعایت وبتون شہر و قصبہ لرہ تعین ایتدکلری قاضیلر واسطہ سیلہ اجرای عدالتہ اہتمام ایتلری سلطنت عثمانیہ نک ظہورینہ سبب اولدی .

رابعاً؛ پادشاہلر ارباب فضل و معارفی حمایہ ایتدیلر ؛ دولتہ خدمت ایدنلرہ تیمار صورتیلہ اراضی ویرہ رک اونلری منافع دوتندن حصہ مند ایدیلر ؛ توسیع ممالک ، نفوس اسلامیہ نک تزیدینہ ، اعمار بلادہ ، سائر امارتلردہ امثالی کورلین قوانین و نظامات تأسیسیلہ حکومتلرینی تقویہ یہ چالیشدیلر .

عثمان غازي بعد الاستقلال توسيع ممالكه باشلار باشلاماز مركز حكومتي يکشهره نقل ايتدی. اواخر عمرنده اوغلی اورخان بك بروسه يي آلدی. اورخان بك حكومه ككدكن صكره بروسه ، ازמיד ، قره سی سنجاقلری فتوحاتی اكمال ایتدكدن ماعدا شهزاده سلیمان پاشا روم ایلی یاقه سنه كچدی. دیگر طرفدن علاءالدین پاشا عساکر موظفه ترتیبی ، البسه و قیافتك تعیینی ، سكه ضربی كبی تشكيلات و نظاماتی وجوده كتیردی. روم ایلیده بولنان خریستان حكومتلر شمدی یه قدر اهمیت ویرمدكلری عثمانیلرک اوروپایه آیاق باصملرندن قورقیدیلر ؛ مدافعه یه قیام ایتدیلر ؛ فقط صرب صندیغنده ، قوصوه محاربه سنده مغلوب اولدیلر . ممالك عثمانیه طونه ساحل لرینه ، صرب حدودینه قدر توسیع ایدلدی . بوندن صكره عثمانیلر ایچون اك زیاده منفعت تأمین ایدن محاربات روم ایلیده وقوعه كله چكندن ادرنه روم ایلی پایتختی اولدی. آناتولیده آنقره و بیغاسنجاقلری حرباً ، اسپارته سنجانغی مبايعه صورتیه ، کوتاهیة سنجاغك بر قسمی جهاز طریقیه الحاق ایدلدی. آناتولی امارت لرینك الكیوکی اولان قره مان اوغلی حكومتي خداوندكار غازینك همتیله مغلوب اولدی. سلطنت عثمانیه بریوك دولت هیئته كیردی. مصرده بولنان خلیفه عباسی مراد خداوندكاره « سلطان روم » عنوانیه برلكده تنفیذ حكومت شرعیه ایچون بر اجازت نامه كوندردی. بوندن صكره پادشاهه « سلطان مراد » ، دولت لرینه « دولت عثمانیه » ، تبعه سنه « عثمانلی » نامی ویرلدی . روم ایلیده کی حكومات عیسویه ویركو اعطاسنه ، لدی الايجاب عسکر لر یله خدمت دولته بولمغه مجبور اولدیلر .

عثمانیلر بوموفقیاتی بالطبع قومشولرینك كندن دها مكمل ، دها قوتلی براردویه مالکیترلری سایه سنده الده ایتمشلدی. عثمان غازي دورنده قلعه

ضبطی ایچون لازم کلن آلات و ادوات حربیہ مفقود ایدی . بروسہ وازنیق کبی او وقته کوره مستحکم اولان قلعه لرك فتحی ایچون اوزون مدت محاصره دن بشقه برچاره بولنه مدیغدن بونلرك جوارینه استحکاملر بنا ، ایچلرینه عسکر وضع اولنهرق اوزر ، اون بشر سنه تحت محاصره ده طوتولمش وبالا خره ویره ایله آلمش ایدی . بالا خره ارباب هنرو معرفتک همیتله یکی منتشر اولمقده بولنان اسلحه ناریه تدارك ایدلدى . قوصوه محاربه سنده طوپ و تفك استعمال اولندی .

ییلدیرم سلطان بایزید نیکبولى ، سلائیك محاربه لرنده غلبه ایده ررك سلائیك ، یکیشهر و آتیه نی فتح و آنا طولیده کی امارت لری برر بر مغلوب ایدنجه عثمانی مملکتی طونه دن سیواسه قدر توسع ایتدی . بیزانس ایمپراطوری ، صرب ، بوسنه و افلاق حکمدار لری سطوت عثمانیه قارشیسینده لرزان و استانبولک ییلدیرم اله دوشه جکی همان بر امر محقق ایکن آنقره وقعہ سی دولتک باشنه بر بیوک فلاکت کتیردی .

اورخان ، خداوندکار و ییلدیرم خانلر روم ایمپراطور لرندن قیز آدق لری کبی کرمان و قره مان اوغللری و سائر بکلرایله قیز آلوب ویره ررك صهریت حاصل ایتدیلر . فقط بو ، دولت عثمانیه نك مستعد اولدینی توسع ممالکه حائل اولدی . بلکه صهریت اساسی توسیع ممالکی مستلزم اولمق مقصدینه مبنی ایدی . فی الحقیقه خداوندکار غازی اوغلی ییلدیرم بایزیده کرمان اوغلنک قیزی آلدینی زمان جهاز اوله رق کوتاهیه سنجاغنک برقاج قضاسی حکومت عثمانیه یه تسلیم اولندی ؛ بالعکس کریمه لری نفیسه سلطانی قره مان اوغلی علی بکه تزویج ایلدیکی وقت قره مان مملکتندن آقسرای ، آقشهر ، ایلغین قصبه لری سلطانه تملیک ایتدیرلدى . ییلدیرم بایزیدک کرمان اوغلی

قايين پدرى ، قره مان اوغلى انشته سى ايكن توسيع ممالكده مصاهرتهك
هيچ تاثيرى كورلمدى .

آنقره محاربه سنك جسم دولته آچدينى ياره لريك آغير ايدى . تيمورلنك
آيدىن ، قونيه ، قسطنطينى و كوتاهيه يى سابق حكمدارلرينه ويرمش
اولديغندن آناطوليدنه ممالك عثمانيه ازمير ، بروسه ، باليكسرى ، آنقره
و آماسيه سنجاقلرينه منحصر قالمشدى . آناطولى بكلىرى ، روم ايمراطورى
عثمانلى اوجاغنى سوندورمك ايجون شهزادكان غوغالرينه قاريشديلر ؛
قولاً و فعلاً هر درلوفنالى ياپديلر . روم ايلي آناطولينك معاونتدن محروم
قالديغندن سلانيك و صربستانك بعض يرلى الدن چيقدى . روم ايليدنه كى
خرستياڻ حكومتلر اعلان خصومت ايتديلر . فقط قوصوه و صرب
صندينى محاربه لرى كې اهل صليب شككنده اتفاق عمومى ايله هجومه قدرت
بوله مديلر . او عصر لرده دولترك بويه پريشانقلرى زماننده قوتلى واليرك ،
قوماندانلرك استقلاله تصديلىرى مودا ايكن روم ايليدنه بولنان اورنوس
و ميخال خاندانلرى كې حشمت و قوت صاحبي امرا ولى نعمت زاده لرينه
صداقتدن آيرلمديلر . الحاصل ، چلبى سلطان محمد بى نهايه مشكلات و موانعى
اقتحام ايدرك آنقره محاربه سى نتايجنى ازاله يه موفق و « مجدد دولت »
لقبه نائل اولدى .

چلبى سلطان محمد دور فترته نهايت ويردكدن و سلطان مراد ثانى
ضايعات ملكيه نك اكثرينى استرداد ايتدكدن صكره و ارنه و ايكسجى قوصوه
محاربه لرى كې ايكي بيوك ميدان جنككنده غلبه ايتك صورتيله عثمانلى
قليجك اسكى هيبتنى غائب ايتديكنى دوست و دشمنه كوستردى .

فاتح اولو استانبولى ، صكره صربستان ، هر سك و بوسنه يى ، مورده نك
بعض طرفلريه طربزون ، قريم و مدلى يى الحاق ، قونيه نك ضبطيله

آناطولیئنک وحدتی تأمین ، اوزون حسی تنکیل ایدرک سلطنت عثمانیہ نك
شان و شهرتی آرتیردی .

عثمان غازینک پدرندن قالمہ برطاقم امرا وارکانی واردی .
ادارہ مرکزہ فقط بو ارکان ایچون برسلسلہ مناصب وضع و تعیین
اولنامشدی . عثمان غازینک بیوک اوغلی علاء الدین پاشا تحصیل علم و عرفانہ
سالک ، کوچک اوغلی اورخان بک حرب و ضربه مائل اولمقلہ علاء الدین
پاشا پدری یانندہ بولنور ؛ اورخان بک سردارلق وظیفہ سنی ایفا ایلر
ایدی .

اورخان غازی زمانندہ علاء الدین پاشا وزیر تعیین اولندی ؛ نظامات
عسکریہ و سائرہ بی تنظیم ایتدی . مؤخرآ اورخان غازینک اوغلی سلیمان
پاشا دخی دیوان هایونندہ وزیر اولمقلہ برابر کافہ عساکرہ سردارنصب اولندی .
سلطان مراد اول دورندہ قاضی عسکر اولان چندرہلی قرہ خلیل
خیرالدین پاشا نامیلہ وزیر اولدی . بونک وفاتندہ قاضی عسکر لک ایلہ وزارت
اوغلی علی پاشادہ جمع ایدلدی .

ترک لربینندہ بیوک اولادہ پاشا دینک عادت اولدیغندن علاء الدین
وسلیمان پاشالرہ بو عنوانک ویرلمسی طبیعی ایدی . قرہ خلیلہ خیرالدین
پاشا دنیلمسی دہ اولاد مقامنہ قائم اولدیغنی تلمیحاً اولسہ کرکدر . روم
ایلینک فتحندن صکرہ لالا شاہین ، دہا صکرہ تیمور طاش بکلر روم ایل
بکلر بکیسی تعیین اولنہ رق بولنردہ پاشالق نامی ویرلدی . بونک ایچون
علی پاشانک عنوانی وزیر اعظم اولدی .

ممالک عثمانیہ سنجاقلرہ ، ہر سنجاق قضالرہ تقسیم ایدلمشدی .
ہر سنجاقدہ ہر سنجاق بکی [میرلوا] ، ہر قصادہ برقاضی بولنوردی . آناطولی
بکلر بکیسی آنقرہ دہ اوطور یردی . پاتخت قاضیلری سفر وقوعندہ اردوی

هميون ايله كيدرلردى . سلطان مراد اولك اوائل سلطنتده چنדרهلى قره خليل بروسه قاضيلغندن قاضيعسكرلكه تعيين اولندى .

شهزاده لر آناطولیده برر سنجاقده سنجاق بكي صفتيله بولنورلر ، اجراي حكومت وامور سياسيه ده كسب مهارت ايدرلردى . وزيراعظم ، قاضيعسكر ، ضابطان عسكريه ، دفتردار ، بعض امرا و خدمه مخصوصه نزد پادشاهيدن آيرمازلردى .

وزير اعظمق طقسان سنه قدر چنדרهلى عالمه سنه منحصر قالدی ؛ پدردن اولاده انتقا ايتدی . خيرالدين ، على ، ابراهيم و خليل پاشالر صره سيله صدر اعظم اولدیلر . خليل پاشانك قتلندن صكره بو عالمه دن - سلطان بايزيد ثانی دورنده كي ابراهيم پاشا مستنا اولمق اوزره - صدر اعظم گمدي . روم ايلي بکالر بكي و صدر اعظم صفتيله خليل پاشايه خلف اولان محمود پاشانك قتلى متعاقب خدمت صدارت ديوان هايونده بولنان وزرايه تفويض اولمغه باشلادی .

قاضيعسكرلك فاتح دورنده آناطولى و روم ايلي قاضيعسكرلكي ناميله ايكيه آيرلدى . ديوان هايونده وزيراعظم ، برقاق وزير ، ايكي قاضيعسكر ، استانبول قاضيسى ، نشانجي ، دفتردار ، يكيچرى آغاسى ، بلوك آغالري ، خواجكان ديوان هميون بولنوردى .

نشانچينك وظيفه سي ديوان هايوندىن صادر اولان اوامره نظارت ايتك ، تيماروزعامت توجهاتى - كه توجهات عسكريه ديمكدر - قانون دائره سنده جريان ايتديرمك ، ممالك مفتوحه نك تحريرينه اعتنا ايتك ايدى . بداية رئيس و دفترامينلري بونك معيتمده ايدى . بالاخره رئيسلك و دفتر اماتى منصبلى كسب اهميت ايتدى .

بلوك آغالري ، يكيچرى ، سپاه ، سلحدار ، علوفچيان يمين ويسار

[اورتہ بلوکلر]، غربای یمین ویسار [آشانی بلوکلر] اوجاقلرینک اغالری ایدی .

دیوان هایون خواجکانی بوبلوکلرک کاتبلی، بکلکجیلک، مکتوبجلیق، واردات و مصارفات محاسبه جیلکلری مقامنده اولان ضابطان اقلام ایدی . بو مأمورلرک صورت تعین وترقیلرینه کلنجه ؛ دوشیرمه ایله اسرا چوجقلرینک کزیده لری ادرنه ، بروسه ، کلیولی، غلطه سرایلرنده آداب اسلامیہ دائرہ سنده تربیه ایدلدکن صکره سرای پادشاهی یه آلینرلردی . بر مدت خدمت پادشاهیده بولندقدن صکره بلوک آغالقرلندن ، یاخود میر علم ، میراخور اول و ثانی ، قوجی باشی دنیلن اوزنکی آغالقرلندن برینه تعین اولنورلردی . بو خدمتلرده اثبات لیاقت ایتدکن صکره سنجاچ بکلکی ویا بکلر بکیلک ایله طشره یه کوندریلرلر ؛ اداره ملکیه یه واردولر معیتده احوال حربیه یه کسب وقوف ایدرلردی . بعده وزیر اولورلر و دیوان هایونده بولنورلردی . نشانچی ، دفتر دارکی ارباب قلمدن ، طریق علمیه دن ، رؤسای عسکریه دن وزیر اولانلرده بولنوردی . فقط وزرانک قسم اعظمی اداره ملکیده خدمت ایدنلردن یتیشیردی .

وزرانک معیتده ایکیشر اوچر بیک ، بعضاً دها زیاده دائره لری خلقی بولنوردی . بونلرک بر قسمی استانبولده وزیرک قوناغنده اوطوریرلر ، بر قسمی استانبول خارجنده کی چیفتاکلرده حیوانلر ، چادیر و سائر لوازم سفریه ایله برابر حاضر بولنورلردی . محاربه ظهورنده وزرادن بری سردار تعین ایدیلیر ؛ یکچیری اورته لرندن ، سواری بلوکلرندن لزومی قدری معیته ویریلیر ؛ کیدیله جک محل جوارنده کی بکلر بکی و سنجاچ بکلری معیت عسکرلریله برابر سرداره التحاق ایدرلر ؛ بوصورتله قولایجه بر اردو تشکیل اولنوردی .

سفره صدر اعظم كيدرسه وزرادن بری صدر اعظم قائم مقامی اولوردی .
 بالذات پادشاه سفره کیتدیکی زمان وزرادن بری استانبول محافظه سنده ،
 سفر روم ایلی طرفنده ایسه بر وزیر دخی آناطولی ، عکس تقدیرده
 روم ایلی محافظه سنده قالیر ؛ دیگرلری موکب هایون ایله کیدرک اردوده
 استخدام قلنیرلردی .

بعض وزرا عزل ایدلرکلی زمان بکلر بکیک ایله طشره یه کوندریلیرلر ؛
 یاخود سنجاق بکلکی ایله تقاعد ایدیلیرلردی .

خلفای عباسیه زماننده جاری اولان عاده توفیقاً وزیر اعظم لره
 وکالت سلطنتده استقلاله دلیل اولمق اوزره مهر هایون ویریلردی .
 و قتيله بو مهر یوزوک اوزرینه محکوک اولوب پارمغه طاقیلیرکن بالا خره
 آلتوندن اورمه کیسه ایچنده حفظ ایدلک عادت اولمشدر .

دیوان هایون شوصورتله اجتماع ایدردی : پادشاه ایام تعطیلیه دن ماعدا
 هر کون علی السحر دیوانخانه یه چقار ؛ وزرا ایله دیوانه داخل اولان
 دیگر مأمورلر مواقع مخصوصه لرنده طوریرلر ؛ اولا مهترخانه هایون
 [نوبت پادشاهی] چالینیر ، قائماً استماع اولنوردی . سلطان علاءالدین
 سلجوقی طرفندن عثمان غازی یه طبل و علم کلدیکی زمان مهترخانه چالینمش ،
 عثمان غازی تعظیماً آیاقده طورمش ایدی . دیگر پادشاهلر دخی بوقاعده یه
 رعایت ایتشلر ایکن سلطان محمد ثانی زماننده بوعادت ترک اولندی .

پادشاهلر فاتح زمانه قدر وزرا ایله برلکده اوطوریرلردی . فاتح
 زماننده پادشاهلر ایچون وزرانک اوطوردقلری محله ناظر بریر اقامت
 هایونه تخصیص ایدلدی و اوکنه قفس وضع اولندی .

یوقاریده بیان اولنان نوبت پادشاهی چالندقدن صکره امور مهمه
 دولته متعلق اوراق رئیس الکتاب افندی طرفندن اوقونور ، خواجکان

دیوان ہایون طرفندن ایجابی تحریر ایدیلردی . بعدہ چاوش و متفرقہ دنیلن مأمورلر ایله چاوش باشی مهم دعوالری اولان ارباب مصالحی دیوان ہایونہ کتیرلردی . بونلرک محاکماتی اجرا و عائدیتہ کورہ قاضی عسکرلر ویا استانبول قاضیسی طرفندن حکم شرعی ایفا اولنوردی . بعدہ وزیر اعظم منفردآ، صکرہ وزرا مجتمعا، دھا صکرہ ایام معینہ سندہ قاضی عسکرلر ویکیکجری آغاسی حضور ہایونہ کیرہ رک امور مأموریتلرینہ عائد خصوصاتی عرض ایدرلردی . بونی متعاقب منصب ویریلہ جک امرا و علمایہ خلعتلر کیدیریلہ رک مأموریتلری اعلان اولنوردی . بواجرا آتک جملہ سی اوکلہ وقتندہ ختام بولدقدن صکرہ دیوان ہایونہ داخل اولان ارکان محل مأموریتلرینہ کیدرلردی .

وزیر اعظم دخی کندی قوناغندہ ایکندی وقتندن صکرہ دیوانہ چیقار؛ تذکرہ جی، دائرہ سندہ بولنان متحیزان ، چاوش باشی ، چاوش و متفرقہ لر بودیواندہ حاضر بولنورلردی . صدر اعظمک دیوانندہ دیوان ہایونہ رؤیت ایدلمسی لازم کلین مصالح رؤیت اولنور؛ تذکرہ جیلر وزیر اعظمندن صادر اولان امرلری آیاق اوزرنده یازارلردی .

ادارہ ایالات ممالک عثمانیہ من القدیم بر طاقم ولایت ، لوا و قضالہ و اراضی منقسم ایدی . قضالرک اداره شرعیہ سیلہ اداره ملکیمسی قاضیلرہ محول و ضبط و ربطی تیمار و زعامت صاحب لرینہ مودوع ایدی .

سنجاقلر آلائی بکی و میرلوا دنیلن بر طوغلی امرا ، ولایات بکلر بکی ویا میرمیران نامی ویریلن ایکی طوغلی پاشالر طرفندن اداره اولنوردی . بونلرک فوقندہ بر روم ایلی بکلر بکی و برده آناتولی بکلر بکی واردی . دولت عثمانیہ بدایتندہ صرف عسکرلک اوزرینہ مؤسس اولدیغندن بویوک

مأمور لر یالکز اداره ملكیه به مأمور اولوب بلكه تیمار صاحب لری، دائره لری خلقی ایله برلکده لدی الایجاب حربه کیدر لردی. اداره ولایات استانبولك فتحندن صکره پیدرپی اکمال ایدلمش اولدیغندن بوبابده کی تفصیلات ایلریده، محل مخصوصنده ویرلمشدر.

اراضینك صورت اداره سنه كلنجه : ممالك عثمانیه اراضیسی تیمار و خاص نامیله ایکی به آیرلمشدی. مثلاً، بش یوز کویدن مرکب برسنجاقك ایکی اوچ یوز قریه سی هر بری ایکیشر اوچر کویدن مرکب اوله رق سکان طقسان تیماره تفریق ایدیلر، غازیله ویریلردی ؛ متبایسنك بر فسمی خاص اعتبار ایدیلر كه شهزادكانه ، وزیریه ، بککریکی و سنجاك بککرینه ، سائر امرایه توجیه اولنوردی ؛ قسم دیکری خاص همایون نامیله خزینه دولته ترك ایدیلردی . خاص و تیمارلرک حاوی اولدیغی اراضی افرادك تصرف ایتدکری ترلاردن عبارتدی . ترلا صاحب لری زراعت ایدرلر ؛ عشر شرعی یی ، فراغ وانتقال اراضیده معین اولان خرجی خاص ویا تیمار صاحبنه ویررلردی. خزینه دولته عائد بو حقوقه متصرف اولان خاص و تیمار اصحابنه صاحب ارض دنیلردی .

پادشاه بعض اراضینك حقوقی فاتح لری اولان وزرا و امرایه تمليك ایدرردی . بونلرده اراضینك حاصلاتی خیرات و مبراتنه وقف و تخصیص ایدرلردی . پادشاهلر دخی انشا ایتدیردکری جامع ، مدرسه ، عمارت کی مؤسسانه مقدار کافی اراضی وقف ایلرلردی .

تیمار صاحب لری ، اراضینك حسن اداره سنندن وزراعتك تزایدندن حصه دار منافع اولدقلری جهته ضبط وربطه ، تزید زراعته چالیشیرلردی . سفر وقوعنده سلاح لری ، حیوانلری ، معیت لری ایله برلکده تابع اولدقلری سنجاك بکنك قومانداسی آلتنه کیررلردی . بوبابده کی نظامات

سلطان سلیمان قانونی زماننده استکمال ایدلمش اولدیغندن تفصیلات لازمه فصل مخصوصنده ویرلمشدر .

عثمان غازی زماننده حرب و ضربه قادر اولان اهالی
اردو اسلامیة ایجاب ایتدکجه عموماً سفره کیدردی . عثمانلی
اردوسی منتظم بر اردو دکلدی ؛ محاربه اثناسنده طویلانان و محاربه نك
ختامنده کندی ایش و کوجلریله مشغول اولمق اوزره عودت ایلین بر
طاقم کوکلورلدن عبارتدی . یعنی هر عثمانلی کندی خواهش و آرزوسيله
محاربه یه کیدردی .

عثمان غازی نك شهرت فاتحانه سی اطرافه یاییلدقجه ، ممالك عثمانیه بیودکجه
بو کوکلورلرک عددی ده آرتدی ؛ عثمانلیلرک رایت ظفری آلتنده بولمق
آرزوسيله اوزاق یرلردن بيله کوکلو مردلر ، شجیع ارلر کلیردی .
خدمت عسکریه حیوان اوستنده ایفا اولندیغندن عساکر عثمانیه
جملة سواری و « آقینچی » ناميله مسمی ایدی . هرکس ایستدیکی کبی
البسه کیردی . بو باده بر قانون یوقدی . فقط عثمانلی کوکلورلی ملکه
ومهارت صاحبی محاربیلر اولدقلری ایچون البسه جه عدم انتظامک مضرتی
کورلر ؛ سواریلر یورویشلرنده ، محاربه لرنده ، هجوملرنده یکوچود کبی
حرکت ایدرلردی .

عثمان غازی سفره کیده چکی زمان عثمانلیلری بر قاچ کون اول حرب
اوله جغندن خبردار ایدر ؛ کوی وقصبه لرده غزا وجهاده کلمک ایستین
یکیتلرک حاضر اولوب وقت معینده قرارکاهه کللری منادیلر واسطه سيله
اعلان اولنوردی . حرکات حربیه خفی اجرا اولنه جق ایسه کوندریلن
خبرلر دخی آکا کوره اجانبدن مستور طوتیلور ایدی . مع مافیه بو کوکلو

عسكردن ماعدا بالذات محافظ وخدمه خاصه اوله رق مقدار كافى عسكر وامرا مركز حكومتده دائماً موجود ايدى .

اورخان غازى جلوس ايتديكى زمان ممالك عثمانيه بيومش ، اهالى چوغالمشدى . عسكر ك تنظيم و توظيفى لازم كلشدى . بولزومى ايلك اوكجه علاءالدين پاشا آكلادى و پادشاهه بعض اخطاراتده بولندى . بونك اوزرينه عقد ايديلن مجلس مشورته چندره لى قره خليلك راييله تركلردن قوى البنيه مردلر انتخاب اولنه رق عساكر عثمانيه نك تزويدى تنسيب وبولنره كافى مقدار علوفه تخصيص ايدلى . مولانا قره خليل بو خصوصك اجراسنه مأمور اولدى .

چندره لى كمال سعى و اهتمام ايله برچوق عسكر طويلادى و هر بيرينه ربع درهم شرعى قيمتمده اولان بر آچه وظيفه تعيين ايتدى . آنجق قانون موجبجه سفرك ختامنده عسكرلر يرلرينه عودت ايدرك علوفه كسيليردى . مملكترلينه دونن عسكر زراعت ايله مشغول ، فقط رسوم ديوانيه دن معفو اولوردى . شو حالده بونلر دخی دائى و موظف بر عسكر دكلدى .

عسكره ويريلن علوفه يوميه آلتون ايله كموشك او وقتكى قيمته و ارزاقك فيأت جزئيسنه نظراً پك يوكسك ايدى . عساكر مذكوره يه « يايا » ويا « بياده » دنيلمشدى . اون ، يوز و بيك باشى ناميله ضابطلر تعيين ايدلمش ؛ نظامات عسكريه لرى اصلاح و اكالمشدى . مقدارلرى كيتدجه آرتشمشدى . لكن وظيفه لر ينك چوقلنى بو عسكر ك حرصنى آرتيردى ؛ شيرازه انتظاملرينى بوزدى . وقت سفر و حضرده انواع فساد ارتكابنه باشلاديلر . بونك اوزرينه پادشاه يايالردن بشقه بر عسكر ك تأسيسنه قرار و يردى ؛ يكيچرى احداث اولدى .

یایالرك ایشہ یاراماسی تماماً موظف اولملارندن ، محاربہ زمانی کلوب وقت صلحدہ کیدن بر نوع اجرتلی عسکر اولملارندن نشأت ایتدیکی آکلاشیلمش ایدی . ارکان دولت ایله مذاکرہ ایدلدی ؛ مولانا قرہ خلیل بر پروژہ تقدیم ایتدی . بو پروژہ نك اساسی « روم ایللرنده آقینجیلیق ایدن ترکمن واولجہ احداث اولنان یایالره آل عثمانک پایدار اولسی مشکل اولدیغندن قبول رعیت ایدن خرستیانلرك دینج وکنجلرندن بر قاچ ییلده بر بیک نفر قدر ار آلنوب وظائف حضریه وسفریه نامیلہ تعینات وعلوفہ کافیہ ویرلمسی » ایدی .

فی الحقیقہ فتح اولنان ممالکک اکثر اہالیسی خرستیان ایدی ؛ نفوس اسلامیہ نك تکثیرینہ چالیشمق پک مهم ایدی . چندرہ لینک پروژہ سی ہم مسلمانلرك تکثیری ، ہم دہ قوہ حربیہ نك تزییدی کبی ایکی منفعتی جالب ایدی ؛ بونک ایچون قبول ایدلدی و دوشیرمہ قانونی وضع اولندی .

بو قانون موجبہ لزومی اولدجہ خرستیان چو حقلرندن ایجابی قدری آلنوب شرائط اسلامیہ دائرہ سندہ تربیہ وتعلیم ایدلدکن صکرہ پایتختہ قشله نشین اولمق اوزرہ یومیہ بر آچہ وظیفہ وتعینات سائرہ تخصیص اولندی . بو وظیفہ محدود اولیوب یارارلق کوسترنلرك « ترقی » نامیلہ وظیفہ لرینہ ضم اولنمسی دہ امر ایدلدی .

ایشہ ، دولت عثمانیہ بو صورتلہ یکیکچری بی تأسیس ایتدیکی صر دہ اوروپادہ هنوز موظف عسکر تأسیس اولنامشدی . حتی فرانسه دہ پیادہ بی اک اول یدنجی شارل ۱۴۴۷ سنہ سندہ احداث و Franc-archer نامیلہ تسمیہ ایتدیکی حالده عثمانیلر یکیکچری بی ۱۳۲۶ دہ تأسیس ایلشلردی .

مراد خداوندکار زمانندہ علمادان قرہ رستمک اخطاری اوزرینہ اسرادن آلان خمس شرعی ایله یکیکچری اورتہ لرینک نقصانی اکال ایدلدی .

بونلر كفايت ايتديكي حالد تبعه دن اولان خرستيان چوجو قلدن لزو مى قدرى دوشيرمه اصوليله آليردى . كرك اسرادن ، كرك تبعه دن اولان خرستيان اطفالدن آلانلر « عجمى اوغلانى » ناميله ياد ايديلرلردى .

ابتدالرى پاپاسلرك تشويقيه خرستيانلر عسكرلكه كيرمك ايسته مديلر . فقط صكره لرى عسكرلكه كيرمش اولانلرك تفيض ايدرك مهم مأموريتلرده استخدام اولندقلرى [*] ايشيدلجكه ، دولتك خرستيان و مسلمان تبعه سنك جمله سنى يكنسق اداره ايلديكي كورلدجكه هر كس دولتك دوشيرمسنه حاجت براقيه جق وجهله اولادىنى عسكره ويرمكه مسارعت ايلديلر . بو صورته دوشيرمه دن بشقه برده كوكلو صنفى ظهور ايتدى .

عسا كر موظفه و داتمه احداثى شرفى سلطان اورخانه عائد اولمقله برابر يكيچرينك نظاماتى اكالم ويكي باشدن تنسيق و تعديل ايدن سلطان مراد اولدر . عجمى نفرات ديمك اولان عجمى اوغلانلرك قشله لر ايله اما كن و محال سائرده برخيلي سنه لر تعليم ايله مشغول اوله رق يكيچرى او جاغنه دخول ايچون معلومات لازمه و اوصاف مخصوصه يى اكتساب ايتدكه يكيچرى اوله ماملرى قانوننى مراد خداوندكار وضع ايتدى . سلطان مراد ادرنه نك ضبطدن صكره يكيدن بيوك بيوك قشله لرى ياپيردى . اسرا آلندجكه كندى حصه سنه دوشن خمسى سراى ايله بو قشله لره كوندردى . قشله لر او زمانلر ايچون برر مكتب عسكرى ايدى . زيرا اسرادن و خرستيان چوجو قلدن آلان كيمسه لر بورالرده يدى سنه قاله رق موظف و معلم استادلر واسطه سيله متاعب و مشاق عسكريه يه آلشديريلير و بر عسكره لزو مى اولان صفات ، اخلاق ، هنر و معرفت او كره ديلير ايدى . خداوندكارك

[*] دوشيرمه چوجو قلدن بك چوق امرا و وزرا يقشمشدر . بوباده يالكز وزير اعظم محمود ، رستم و صقولى محمد باشلرك اسملرني ذكر ايتك كافيدر .

وضع ایتدیکی قانون موجبجه عجمی اوغلانلغه کنج و دینج اولانلر قبول ایدلکلرندن اوزون مدت دوام ایدن تعلیم وادمان سایه‌سنده اوجاغه چیقان افراد مکمل بر عسکر اولور ایدی . بو اعتنا یکچیرلرک بیوک برنام و شهرت قازانلرینه سبب اولدی .

عجمی اوغلانلر یا سرای هایون ویا عجمی اوغلانلر قشله‌لرینه ، یاخود طشره ولایاتی والیرلی خدماتنه ، یاخود بکلک چیقتلکلره کوندیریلرلردی . بدایه قشله‌لرک کفایت ایتمه‌سنه مبنی بر طاقی سپاهی و چیقتلک صاحبی غازیله تقسیم ایدیلوب اولنره موفقیتله وظائف عسکریه اوکره‌دیلریدی . فقط صکره‌دن بوکا حاجت قالمدی .

عجمی اوغلانلری یدی سنه تعلیم مدتی اکمال ایتدکدن صکره « یکچیری قپوسی » ویا « چیقمه » تعیرلریله و اوجاقده وفات ایدنلرک یرلرینه حکمک اوزره لزومی قدری اوجاغه آلدینی کبی بالآخره احداث ایدیلن طوپچی ، خیمه‌چی ، جبه‌چی ، طوپ آراهه‌جیسی اوجاقلرینه‌ده لزومی قدری ویریلر ایدی .

دوشیرمه قانونی موجبجه هر خرسیتیان چوجوغی عجمی اوغلانی اوله‌مازدی . بلکه بونلرک آرناوود ، بوشناق ، روم ، بلغار ، ارمنی ملتلرینک روم ایلیده ساکن اولانلرندن آلمسی مشروط وغیریسندن اولق ممنوع ایدی . لزومی اولدجه اقوام مذکورهدن طورنه‌چی باشیلر دلائله طوپلانیردی . بونلکده سببی بدایت تأسسندن اعتباراً یاریم عصر همان بلا انقطاع محاربه ایله مشغول اولان آناتولی خلقنه مساعده ایتمک وروم ایلیده عنصر اسلامی تزید ایلک اولسه کرکدر .

اوروپالی مورخلر خرسیتیان چوجقلرک زور ایله مسلمان ایدلمسی بحثده بزه تعریضدن کری طورمازلر . فقط بو بابده شوجهتی نظر دقته

آلمازلر: دولت عثمانيه اوزمانلر خرستيان و مسلمان بتون تبعه سني بروطن اولادي اعتبار ايدردى . فاتحك استانبوله كيردكدن صكره روم بطريقى كمال تعظيم ايله قبول ايدرك ماشيا تشيع ايلك كبي اووقلرده هيچ بريده امثالى كورلمين عدالتله قاريسيق بر نزاكت كوسترديكى ، روملره سربستى دين و آيينى آمر فرمان ويرديكى ، دها اول سلطان اورخان ازنيقده كندى ايله فقرايه چوريا طاغيتمق كبي غرينوازقلر كوسترديكى عصرلرده خرستيانلر اكثري كندى كنديلرينه مسلمان اولورلردى . بوكون بيله بعض دول متمدنه نك ملل محكوميه ي رتب عسكريه يه نائل ايتمك امرنده كنديلرينك منسوب اولدقلرى قوم حقنده مرعى اولان مكافادن محروم ايتدكلرينى ، مثلاً يوزباشيلقدن يوقارى يه ترفيع ايتديرمه مك كبي عدالتسزلكلر كوستردكلرينى كورييورز . حال بوكه عثمانلى پادشاهلرى روم ، بلغار ، بوشناق ، خروات ، آرناوود خرستيان ملتلرندن محمود پاشالى ، ابراهيم پاشالى ، صفوللىلى ، سان پاشالى يتيشديرديلر ؛ بونلرى منتهاي مراتب عثمانيه اولان صدارته قدر چيقارديلر ؛ بعضيلرينى صهريت شرفه نائل ايتديلر . بونى كورن خرستيانلر ك چوغى كندى كنديلرينه مسلمان اولورلردى . عثمانلى پادشاهلرى خلقى جبراً مسلمان ايتمك جهتنى التزام ايتمش اوليديلر بوكون بالقان شبه جزيره سنده كى اقوام موجود اولمازدى . عثمانليرك خرستيان چوجق واسيرلرينى زورله مسلمان ايتدكلرى قبول ايدلسه بيله فاتحك روملره سربستى آيين حقى ويرديكى عصرده ردوس شواله لرينك قلعه لرينى محاصره يه كلن وضبط ايدمه يه رك دونوب كيدن عثمانليرك ميدان حربده برادقلرى اون ايكي بيك يكيچرى شهيديني ياقق كبي بر اثر تعصب كوستردكلرى دوشونباير ايسه معذور كوريله بيليرلر .

ممالك عثمانیه توسع ایتدجکه تیمار چوغالمقده ، تیمار تکثر ایتدجکه سواری عسکری آرتمقده ایدی . فقط تیمارلی سپاهیسی تیمارلری داخلنده اوتوردقلرندن مرکز سلطنتده یکچیری کبی وظیفه یومیه ایله موظف بر سواری عسکری ترتیبی دخی لازم کلدی . سلطان مراد خداوندکار زماننده روم ایلی بکلبیکسی تیمورطاش پاشا « ابنای سپاهیان » بلوکنی ترتیب ایتدی . بونلرده دوشیرمه چوجقلرینک کزیده لرندن ومحارباتده آلنوب سرای پادشاهیده ، وزرا خدمتلرنده تربیه اولمش اسرادن ایدیلر . بو حالدده تیمارلی سپاهیسی ایالات عسکری ، یکچیری وسپاه اوجاقلری عساکر خاصه مقامنده ایدیلر . مرکزده مقیم عساکرک هیئت عمومیه سنه « قپو قولی » دنیلیر ایدی .

بالاخره یکچیریلره طوبجی ، خبره جی ، لغمجی ، جبه جی بلوکلری ؛ سپاه وسلحدار دنیلن سوارییه دخی علوفچیان یمین ویسار ، غربای یمین ویسار نامیله دوت بلوک علاوه ایدلادی . دیگر طرفدن ایالاتده کی تیمارلی سپاهیسی ده آرتدیغندن دولت عثمانیه نه طرفه اولورسه اولسون یوز بیك منتظم عسکر سوق ایده بیله جک حاله کلدی .

مسلمانلرک قدرت بدنیه صاحبلری جهاد ایله مکلفدی . روم ایلیده اسکان ایدیلن ترک وتاتار قبیله لری ، آرنانودلق کبی بعض قطعهلرک اهالیسی زراعت وصنایع ایله مشغول اولمدقلرندن یاوزرا وامرا دائره لرنده آبلقله خدمت عسکریه ده بولنورلر ، یاخود سرحدلرده آقینجی بکلری معیتلرنده خدمت ایدرلردی . بناء علیه اهل اسلامک قسم کلیسی عسکرایدی . مراد ثانی زماننده اهمیت ویرلمکه باشلانان دونما فاتح دورنده ودها صکره محاربات عظیمه بحریده بولنه جق حاله کلش وعساکر عثمانیه آره سنده عزب طائفه سی دنیلن عساکر بحریه صنفی دخی احداث ایدلمشدر .

بالآخره قالیون وقالیونچیلر ظهور ایدرک بحریه عسکرینه عموماً قالیونچی دنیلیدی .

یکچیرلرک بدایت تأسیسندن فاتحک برنجی جلوسنه قدر کچن وقتده [۷۳۰ - ۸۴۶] اختلال وعصیانلری کورلمدی . هر نه قدر آنقره وقعه سندن صکره یکچیرلرک نظام وانتظاملرینه خلل عارض اولدیغی مروی ایسه ده عثمانلی تاریخلرینک اکثری بوندن بحث ایتمدکلرندن واقع اولسه بیله حائر اهمیت برقاریش قلق وقوعه کلمه مش اولسه کرکدر .

سلطان مراد ثانی ترک سلطنت ایدرک سلطان محمد ثانی جلوس ایتدکدن صکره وکلای دولت حکومتک فاتح کبی عزم وثبات صاحبی بر پادشاهک ید غالبه کچدیکنی کورنجه اهل صلیب اردوسنک تجاوزینی وسیله اتخاذ ایدرک سلطان مرادی عودته اجبار ایتدیلر . سلطان مراد وارنه مظفریتندن صکره ینه مغنیسایه چکیلیدی . وکلا وباخصوص خلیل پاشا فاتحک سلطنتدن فراغت سبب اولدقلرندن بودفعه کی جلوسنده پادشاهک غضبندن قورقورق عسکری ال آلتندن تحریک واختلاله تشویق ایتدیلر . یکچیرلر خلیل پاشانک خلافکیری وفاتحک طرفداری اولان شهاب الدین پاشانک قوناغنی باصدیلر وبوجق تپه سنه چیقوب اعلان عصیان ایلدیلر . وکلا ایسه ال آلتندن سلطان مرادی تکرار دعوت ایتدیلر . سلطان مراد مغنیسادن ادرنه یه کلدی ؛ بوجق تپه سنه کیتدی ؛ آوبهانه سیله اطرافی کزدی ؛ یکچیرینک آرزوسنی وکلانک اشعارینه موافق بولدقن صکره فاتحی تکرار مغنیسایه اعزام ایتدی . ایشته خلیل واسحق پاشالره اوغورلو اوغلی کبی اوچ کشینک اتفاق ایدوب اغراض شخصیه لرینک ترویجنه عسکری توسط ایتلمری یکچیرلرک مؤخرآ وقوعه کتیردکلری بیوک بیوک عصیان واختلالره مقدمه اولدی .

اموال مالہ واردات دولت بروجہ آتی ایدی : جزیہ شرعیہ ،
 قومشوخرستیان حکومتلرندن آلتان مقطوع ویرکولر ،
 خواص هایون اعشاری ، کمرک و مملحہ حاصلاتی ، اموال غنائمک خمس
 شرعیسی . صوک قلم جملہ سندن مهم ایدی .

وارداتہ نسبتلہ مصارف جزئی ایدی . چونکہ عسا کر عثمانیہ نک قسم
 اعظمی اولان تیمارلی سوارسی ایلہ وزرا ، امرا وارکان دولتک اکثری
 کندیلرینہ تخصیص اولتان خاص و تیمارلرک حاصلات عشریہ سیلہ موظف
 ایدیلر . بناء علیہ خزینہ دولتن ویریلن مصارف قپو قولی یومیہ لرلہ
 بعض علما و ساداتہ مخصص وظائفدن عبارتدی .

فضلہ واردات جامع ، مدرسه ، کوپری ، خان ، حمام کبی مہمانیہ
 صرف اولئوردی . ییلدیرم زمانہ قدر پادشاہلر تزیینات و احتشاماتہ
 رغبت ایتہ مشلردی . حتی عثمان غازی نک محلفاتی براق سلاح ایلہ بش اون
 آت و اوچ بش سوری قیوندن عبارتدی . عثمان غازی دہا زیادہ مال جمعہ
 مقتدر اولہ مامشدی ، دنیلہ مز . چونکہ یکریمی اوتوز سنہ مستقلاً بر
 مملکتہ صاحب اولان بر حکمدار آرزو ایتیش اولسہ خیلی ثروت
 طوپلایہ بیلیردی .

خداوندکار غازی دوکون مناسبتیلہ اورنوس بک طرفدن یوز کولہ
 و یوز جاریہ نک اللرنده کی آلتون و کموش تبسیلر ایچندہ تقدیم ایدیلن
 آلتون و کموش اواینک جملہ سنی مصر سلطانہ اہدا ایتیش ، مصر سلطانی
 وسائر حکمداران و امرا طرفدن وارد اولان ہدایانک ہیچ برینی نفسی
 ایچون آلیقویمبوب علما ، شرفا و غزاتہ تقسیم ایلشدی .

ییلدیرم بایزیدک وزیر اعظمی ودارات و زارتک مخترعی اولان علی پاشا
 حمزین و ملبس ایچ اوغلانلری ، حرم آغلاری استخدام و آلتون و کموش

اوانی استعمال ایتک یوللرینی آچدی . ذاتاً دولت بیودکجه ترفه واحتشام آرزوسنک حصولی طبعی ایدی . ییلدیرم بایزید آلتون دوکمه‌لی ، آلتون تلبلرله نسج ایدلمش اثوابلرکییمکه ، آلتون وکوشدن معول اوانی استعمالنه باشلادی . سائر تزیینات دخی بو مقیاس اوزره آرتدی . پادشاه اواخر سلطنتده وظائف عسکریه‌نی تقلیله مجبور اولدی . فقط مصارف دولتک الکبویک قسمی اولمق لازم کلن وزرا ، امراء ، مأمورین و تیمارلی سپاهیسی معاشلری خاص و تیمار صورتیه حاصلات عشریه‌دن محول بولندیغدن خزینه دولتک مضایقه‌سی تاممیه میدانه چیقمدی .

حکام شرعیه بدایه خزینه دولتدن وظیفه یومیه ایله موظف ایکن ییلدیرم بایزید زماننده وظیفه معینه‌لری جزئی اولمسندن طولانی ترکه و حجت کبی موافیق شرعیه رسم معین تخصیص ایدلدی .

اوتنجی عصر هجری اوائلنه قدر کچن مدت ظرفنده دولت عثمانیه‌نک واردات و مصارفاته دائر شایان اعتماد قیود و دفاتر یوقدر . واردات دولت شمدیکی کبی خزینه‌یه کلوب اورادن صرف ایدلمک قاعده‌سی دخی موجود دکلدی . بنابرین خزینه دولتک وسعت ویا مضایقه‌سی آنجق روش اداره‌دن استدلال ایدیه بیلیر .

یوقاریده بیان ایدلدیکی اوزره اعشار حاصلاتی معاش مقابلی اوله‌رق خاص ، زعامت و تیمار صورتیه وزرا ، امراء ، مأمورین و تیمارلی سپاهیسنه و اوقافه مخصص ایدی . بعض یرلرده « عوارض » نامیه جزئی برویرکو واردی . فقط اوده مصارف ضروریه محلیه‌یه ویریلیر ایدی . خزینه دولته عائد واردات معدن و ملحه‌لر حاصلاتیه قومشو حکومتلردن آلتان مقطوع ویرکولردن عبارتدی . کرک خزینه دولتی ، کرک وزرا ، امراء وافرادی

اغنایدن اموال غنائم ایدی . فقط بوده هر سنه نهیه بالغ اوله جفی بللی اولمیان غیر معین بر منبع واردات ایدی .

مصارفات وارداتہ نسبتہ جزئیاتدن اولدینی جهتہ دولتی پکده دوشوندیرمز ایدی . فی الحقیقہ تیمور وقعه سندن صکره اون سندن زیاده بر زمان ممالک عثمانیہ محاربات داخلیدن قورتیلہ مامش ایکن چلی سلطان محمدک بروسه وادرندده صرف غزا مالی ایله بر جوق ابنیہ خیریه وجوده کتیرمه سی خزینہ دولتک وسعتہ دلالت ایدر . فاتح اوزون حسن اوزرینه کیدرکن طوائف عسکریه یه یوز یوک آچه اقراض ایتش ، احراز مظفریتی متعاقب بوپارہ یی هبه ایلشدر . او زمانک بر آچہ سی شمدی بر غروشدن فضلہ دیمک اولدیغندن علوفه ومعیناتدن بشقه بو قدر پاره نک اقراض وهبه ایدلمسی اقتدار مالی یی اثبات ایلر . فاتح زمانه قدر مسکوکات عثمانیہ کموش پاره یه منحصر ایکن مشارالیه مجار آلتونی عیارنده آلتون قطع ایتدیرمشدر . مضایقه مالیه آنجق سلطان بایزید ثانیکن اواخر سلطنتده ظهور ایدهرک استانبول وبعض شهرلر اهاالیسنه ویرکو طرح ایدلمک ایسته نیلمش ایسه ده بو حال موقت وسوء اداره دن منبعث ایدی .

استانبولک فتحیله دولت عثمانیہ مرکز استقرارینی بولدی .
استانبولک فتحی بوشهر پایتخت اتخاذاولنه رق اولاسکی سرای ، صکره یکی سرای اعمار وانشا ایدلدی . جامعلر ، مدرسه لر ، حماملر ، مکتبلر ، قشله لر پیدرپی وجوده کلدی . قونیه دن ، آناطولینک سائر موقعلرندن خیلی نفوس نقل ایدلایکندن شهرک معموریتی آرتدی .

روم مورخلرینه کوره قبل الفتح استانبولک نفوسی یوز اللی ، یوز آلتمش بیک قدردی ؛ سور داخلنده ۱۴ قصبه و او قدر اداره بلدیه موجود

فرانسه دہ (والووا) خاندانندن یدنجی شارل قرال ایدی . یوز سنہ محاربہ سی ختام بولمشدی . انکلتزہ دہ آلتنجی ہانزی بولنقدہ ایدی . شمدیکی فرانسنک برقاچ ایالتی انکلتزہ نک ایدی . انکلتزہ دہ (لانقاستر) و (یورق) خاندانلری آره سندنہ کی چیفتہ کل محاربہ سی باشلامشدی . اسوچ ، نوروچ ، دانیمارقه حکومتلری (قالمار) اتحادیلہ برلشمشلردی . فقط اسوچ قطعہ سی بو اتحاددن آیرلمق ایستورودی . آلمانیا حکومتلری برلشہرک آلمانیا ایمپراطورلغی تشکل ایتمشدی . ہابسبورغ خاندانندن اوچنجی فرہدریق آلمانیا ایمپراطوری ایدی . آوستریا آرشیدوقہ لق ایدی . روسیہ دہ بولٹان موسقوف پرنسلکی تاتار خانلری آره سندنہ کی اختلافاتدن بالاسفادہ بولنرہ ویردکلی ویرکودن قورتولمشلردی . اوزمان نہ اوروپا ایلہ ، نہ دہ دولت عثمانیہ ایلہ هنوز پیدای مناسبات ایتین موسقوف پرنسلکنندہ (کور واسیل) بولنقدہ ایدی . لہستاندہ (یا کھلون) اسمندہ برسالالہ حکمداری موجود اولوب پروسینک نصفی بو حکومتہ تابع ایدی . بوہمیہ قرالی آلبر آلمانیا ایمپراطورلغنک نفوذی آلتندہ ایدی . مجارستاندہ ژان ہونیاد قراللق قائمقامی ایدی . اسپانیادہ تشکل ایدن سالف الذکر حکومتلر اسلاملری کاملاً اندلسدن چیقارمق اوزرہ ایدیلر .

آسیادہ طربزون ایمپراطورلغی ، مرعش وملاطیہ طرفلرنندہ ذوالقدریہ ، آطنہ دہ رمضان اوغلی حکومتلری واردی . ایران جہتلرنندہ دولت صفویہ تشکل ایتمکدہ ایدی . قرہ قیونلی دینلن ترکلر ایرانہ حاکم ایدیلر . آق قیونلی دینلن ترکلر ایلہ قرہ مان اوغللرینک حکومتلری دوام ایدیوردی . کرجستاندہ اوچ حکومت بولنقدہ ایدی . یمندہ (بنو حمزہ) حکومتی تشکل ایتمشدی . حجازدہ (بنی قتادہ) سلالہ سندن ایک شریف مشترکاً

امیر مکہ ایدیلر . آسیای وسطی ، چین و هند احوالی حقندہ اوزمان پک
از معلومات واردی .

شمالی آفریقادہ (برقوق) نامندہ برچرکس سرکردہ طرفدن تأسیس
ایدیلن چرکس کولہ منلری حکومتی بولنمقدہ ایدی . تونسده کی (بنی حفصہ)
حکومت اسلامیہ سی حال انقراضده ایدی . عرب قورصانلری بو حکومتی
ایتالیانلرہ واوروپالیلرہ قارشى مدافعه ایدیورلردی .

۲

فاتح دوری

فاتح استانبولک فتحندن صکرہ ادرنہ یہ عودت ایتدیکی
صربستانک قسمی زمان صربستان ایله بر اختلاف چیقدی . صرب قرالی
(یورکی برانقوویچ) وقتیلہ عثمانیلر طرفدن ضبط ایدلمش ایکن بالاخرہ
ینہ صربلرک الہ کچن قلعه لردن بعضلرینک آناختارلرینی پادشاهہ کوندرہ رک
بقیہ ممالکنی محافظہ ایتک عزمنہ دوشمش ایسده سلطان محمد صربستانک
قرال (لازار) دن صکرہ ارثاً (استفان) ہ انتقال ایتسی ، صکرہ کندی
اوکی والدہ سی پرنسس (مارا) یہ کچمہ سی ایجاب ایدوب یورکینک بو
حکومتده حق اولہ میہ جغنی ، کندیسنه یالکز صوفیہ شہری وچوالیسنی
ترک ایدہ بیلہ جکنی بیان ایتدی .

قرال یورکی بونی خبر آلتجہ مجارستانہ ، (ژان ہونیاد) ک یانہ
قاچدی . صکرہ ، ہونیاد ایله برلکدہ بلغارستانہ داخل اولہ رق ہرطرفی
یغمایہ باشلا دقلرندن پادشاه اردوی صوفیہ دہ براقہ رق خفیف سواری ایله
صربستانہ کیردی . برچوق اسیر آلتدی ؛ ضبط ایدیلن قلعه لر تعمیر

اولندی؛ سمندرہ نك فتحہ موفقیت حاصل اولمازدن اول ادرنہ یہ عودت ایدلدی . بر مدت صکرہ ہونیاد مجارستانہ عسکر طوپلایہ رقصربستانہ هجوم و او تونزینک عسکرلہ مجارلر و صربلرہ قارشی (خرسوه) دہ بر اقلمش اولان فیروز بکی اسیر ایتدیکندن پادشاہ شہر کوبینہ طوغری یکیدن سفرہ چیقدی . فقط ہونیاد مجارستانہ عودت ایتدی . صرب قرالی دولتہ ۳۰,۰۰۰ دوقہ ویرکو ویرمک شہر طیلہ عقد مصالحہ اولندی [۸۵۹] . صربستان ایلہ مصالحہدن بر قاج آی صکرہ سرحد بکلری صربستانک فتحی قولای اولہ جغنی بیان وادما ایتدکلرندن پادشاہ ینہ تدارکات سفریہ یہ باشلادی . دیگر طرفدن ژان ہونیاد دخی محاربہ یہ حاضر لنقده ایکن عثمانلی اردوسی بلغرادی محاصرہ ایتدی . اردودہ جسم طوپلر موجود ایدی . بلغراد اوروپا نظرندہ عثمانیلرہ قارشی اوروپایی مدافعہ ایدن بر موقع مہم اولدینی ایچون پاپا اوچنجی (قالیقست) کدعوتیلہ ہونیادک جمع ایتدیکی آلمش بیک کشیک بر اہل صلیب اردوسی قلعہ نك امدادینہ کلدی . طونہ نہرندہ بولنان کیلر من دشمن سفینہ لرینہ مغلوب اولدی . عثمانیلر غایت شدتلی بر هجوم ایلہ بلغراد شہرینک بر طرفدن کیردکلری صرہ دہ دیگر طرفدن ہونیاد دخی کیرمشدی . وقوعہ کلن محاربہ دہ عثمانلی عسکرینک بر قسمی شہردن رجعت ایتدیکندن دشمن اردوکاہہ هجوم ایتدی . پادشاہ بالذات محاربہ ایدرک یارہ لندی . اہل صلیب اردوکاہدن اخراج ایدلدی ایسہ دہ عثمانلی اردوسی دہ طاغیلدیغندن صوفیہ رجعت ایدلدی [۸۶۰] .

بوموفیتسزک (ہونیاد) ک شہرتی آتیردی . فقط کندیسلی محاربہ دہ مجروح دوشدیکندن براز صکرہ وفات ایتدی . قرال یورکی برانقوویچ دخی چوق یشامدی . وفاتی متعاقب وارثلری آرہ سندنہ منازل باش

کوستردی. یورکی غره غوار، استفان ولازار اسمنده اوچ اوغل برامقشدی. لازار، و قتیله کوزلرینه میل چکدیرلمش اولان بیوک برادرلرینی مجارستانه طرد، والدہ سنی تسمیم ایتدیرہ رک حکومتی ضبط ایتدی. دولت علیہ یہ ۲۰,۰۰۰ دوقہ ویرکو اعطاسنی تکلیف ایله تأیید حکومتہ چالیشدی. فقط براز صکرہ وفات ایتدی.

دیگر طرفدن پرنسس (مارا) برادری وعمجہ سی ایله فاتح نزدینہ التجا ایتمش، صربستان حکومتندہ کی حقارینک محافظہ ایدیله جکی طرف پادشاهیدن وعد ایدلمشدی. لکن لازارک زوجہ سی (الہنا) صربستانی عثمانلیرک لندن قورتارمق مقصدیلہ قیزی بوسنہ حکمدارینک ولی عہدینہ تزویج ایتدکدن ماعدا صربستانی پاپانک حمایہ سی آلتنہ وضع ایلشدی. پاپادخی بونی قبول ایدرک قاردینال (آنجلو) نی وکالہ صربستانہ کوندرمشدی. پاپانک حمایہ سی اورتودوقس اولان صربستاندہ قتولیک مذہبنک انشری دیمک اولدیغندن صرب معتبرانی، بویارلری غلیانہ کلدیلم؛ پاپانک حاکمیتی آلتندہ یشامقدن ایسہ پادشاهہ تابع اولمقی ترجیح ایتدیلم. ایشته صدراعظم محمود پاشا بو غلیاندن استفادہ ایدرک پرنسس مارایہ طرفدار قزانیدردی؛ صربلر آرسنہ تفرقہ قویدی. صربلر قتولیکلرہ تابع اولمق ایستہ میہ رک (میخائیل آبوغوویچ) اسمندہ بر سر کردہ نی رئیس انتخاب ایتدیلم. بو ذات صدراعظم محمود پاشانک برادری ایدی.

الہنا بر مدت صکرہ (میخائیل آبوغوویچ) ی دسیسہ ایله قلعه یہ جلب ایدرک محبوساً مجارستانہ کوندردی. فقط صدراعظم صربستاندہ حکومت عثمانیہ نی تأسیسہ چالیشدیغی کبی اردوی هایون پرزرین جہتندن کلہ رک سمندره نی ودیکر مهم قلعه لری ضبط ایتدیکندن صربستان دولت عثمانیہ نک بر ایالتی حکمنہ کیردی واوچ عصری متجاوز بر زمان ساحہ

تاریخدن غائب اولدی . یالکز (بلغراد) قلعه سی مجارلرک النده قالمشدی [۱۸۶۳]

استانبولک فتحی زماننده مورہ جهتندہ ایمپراطورک
مورہ نك قفقی برادرلری (طوماس) ایله (دیمتریوس) مستقلاً اجرای
 حکومت ایدیورلردی . بونلر بدایهٔ اوروپایه قاجق ایسته مشلر ، فقط
 دولته ۱۲,۰۰۰ آلتون ویرکو ویرمک شرطیله حکومتلرنده ابقایدمشلردی .
 او وقت مورہ قطعہ سی غایت قاریشیق بر حالده ایدی . چونکہ کرک
 سالف الذکر ایکی برادر ، کرک رؤسای سائرہ بربرلیله اوغراشیورلردی .
 مورہ نك غرب طرفندہ برقاج لیان وندیکیلرده ایدی . آتنه ایله جواروی
 آتنه دوقه لغی نامیله بر ایتالیان خاندانی النده ایدی . آطه لر وندیک ،
 جنویز حکومتلری ایله ردوس شوالیه لری طرفندن ضبط اولمشدی .
 دیمتریوس اسپارته ده ، طوماس پاتراسده اجرای حکومت ایتکده ایدی .
 استانبولک فتحندن صکره روملر یونانستانده دیمتریوسی قیصراعلان
 ایتک ایستدکلری حالده طوماس بوکا مانع اولدیغندن نهایت مورہ
 ایکسی آره سنده تقسیم ایدلدی . لکن طوماس حواردہ کی کوچک دره
 بکلکلری ، بعده برادرینی اورتہ دن قالدیرمق فکرنده بولندیغندن تأمین
 مقصد ایچون درلو ظلملر اجرا ایدیوردی . مورہ اھالیسی بو ظلملردن
 قورتولمق ایچون پادشاهه بیله مراجعت ایتدیلر .

دیگر طرفدن آتنه دوقه لغی داخلندہ ظهور ایکن منازعات داخلیدہ
 تاج و تخت غوغاسنده بولسان رقیبلر طرفندن فاتحه مراجعت ایدلمش ،
 آتنه شہری ترخان بک زاده عمر بک طرفندن ضبط اولمشدی .

فاتح مورہ نك ضبطہ دخی قرار ویرمش اولدیغندن صدراعظم صربستانہ
 کیدرکن کندیسی دخی مورہ یه کتدی . اول امرده مورہ نك شمالی عثمانیلرده
 جنوبی ایکی برادرده قالمق اوزره متارکہ عقد ایدلدی ایسہ ده طوماس

و دیمتریوس ینه بر برلریله محاربه یه باشلاملری اوزرینه یکیدن مداخله اولندی.
 دیمتریوس قیزینی پادشاهه تقدیم ایدرک عرض اطاعت ایتدی؛ (اینوز)
 قلعه سی کندیسنه ویرلدی. طوماس اولادلریله برابر اوروپایه، پاپانک یاننه
 قاجدی.

غرب ساحلنده وندیکیلر النده بولنان برقاچ لیمان [قورون، مودون،
 پیلوس، آرغوس] مستئنا اولق اوزره بتون موره و یونانستان ممالک
 عثمانیه الحاق ایدلدی [۸۶۲]. موره نك جنوبنده اسپارطه جوارنده
 (مانیا) دینلن غایت صرپ طاعه قاچان موره لیلر اوراده چته لر تشکیل
 ایدرک فرصت بولدقچه اطرافه تجاوزه باشلادیلر. طاعک صرپلغندن طولانی
 اوزررینه وارلمدیغندن عصر لرجه زمان اوراده قالان بو اشقیا چته لری
 - که مانیوتلر نامیله معروفدرلر - بالاخره یونان استقلالندن اولکی عصیان
 چیقارمشلردر.

استانبولک فتحندن صکره پادشاه آطه لرک ضبطنه لزوم
 آطه لرک ضبطی کورمش؛ ردوس شوالیه لرینک آناطولی ساحلی ایله
 سربستجه تجارت ایتملرینه قارشى کندیلرندن طلب اولنان ویرکوی ویرمک
 ایسته مه، ملری اوزرینه دونمای هایون آق دکره چیقمش؛ فقط ردوس،
 ساقز کبی بیوک آطه لر ضبط اولنه میه رق دیگر آطه لره عسکر چیقارمق
 ویغما ایدلمک ایله اکتفا ایدلمشدی. آطه لرک ضبطی خیلی اوزون مدت
 دوام ایتمشدر. روم ایلی سواحلنه یاقین ایمروز، طاشوز، سمارک آطه لرندن
 صکره لیمنی ۸۵۹، مدلی ۸۶۶، آغریبوز ۸۷۳ سنه لرنده ضبط ایدیله بیلدی.
 موره نك فتحی تقرر ایتدیکی صرده سلطان مراد ثانی
 آرنارودای و قایعی زماننده دولتی خیلی اشغال ایتمش و شمالی آرنارودلقد
 اجرای حکومت ایتکده بولنش اولان اسکندر بکی تأدیپ ایلمک ایچون

عسکر کوندرلمشدی . فقط عثمانی عسکری طاع محاربہ لرینہ آلیشہامش اولدقلندن بعضاً مغلوب ، بعضاً غالب اولورلردی . اسکندر بک ونیدکدن ، ناپولیدن امداد آلیردی . ناپولی حکومتیله آرمسی بک اییدی . فرانسه قرالی سکزنجی شارل ناپولی یه هجوم ایتدیکی زمان اسکندر بک اسپانیا قرالی فردیناند قتولیکه امداد ایچون ایتالیا یه کیتمشدی . عثمانیلر ایله وقوعه کلن محاربہ لره برنده مغلوب اولدیغدن و پادشاه دخی بشقه ایشلرله مشغول اوله رق آرناوودلق محاربانه نهایت ویرمک ایستدیکندن پادشاهی طانیق ، اوغلنی درگاه هایونه کوندرمک شرطیله شمالی آرناوودلغه سنجاق بکی تعیین ایدلدی ، مصالحه عقد اولندی [۱۸۶۵] .

بو مصالحه آنجق اوچ سنه دوام ایتدی . ونیدک ایله محاربہ باشلادیغی زمان مورده بر عصیان ظهور ایتش ، اسکندر بک ینه آیاقلانمشدی . پادشاه اوصرده قره مان سفرنده بولندیغدن روم ایلی آتش ایچنده قالمشدی . پاپا ایکنجی (پی) عثمانیلر علیه اهل صلیب اردوسی ترتیبه چالیشوردی . ایتالیا حکومتلرینک معاونته نائل اولان اسکندر بک ، اوزرینه سوق ایدیلن عسکره کاه غالب ، کاه مغلوب اولمقده ایدی . پادشاه بو غائله یه نهایت ویرمک ایچون یوز بیک کشیک بر اردو ایله بالذات آرناوودلغه کیردی ؛ قرویایی [آچه حصاری] محاصره ایتدی . فقط ضبط ایدمه دی . آرناوودلغک ایلبصان کبی محللرنده قلعه لر انشا ایتدیره رک حربہ دوام ایتدی . نهایت ، اسکندر بک وفات ایدرک [۱۸۷۸] آرناوودلق پادشاه ، ونیدک و قبائل رؤسای آرمسندہ منازع فیه قالدی .

روم ایلیده تأیید وتوسیع حکومتہ چالیشان فاتح سلطان محمدک آناتولی جهتنده عطف نظر اهمیت ایده جکی
 قره دکز سوا ملنک
 ضبطی
 شہسز ایدی . او وقت قره دکز ساحلندہ ارکلی ،
 آماصره ایله جوار ی جنویز لردہ ایدی . طربزون قیصر خاندانندن قومینوس

عائله سنك زیر اداره سنده بر حکومت مستقله ایدی. طربزون ایله آماسره نك آره سنده کی محللر واز جمله سینوب قلعه سی اسفندیار امارت نك النده ایدی . صربستان سفرندن صکره صدر اعظم محمود پاشا دونما ایله، پادشاه قره دن عسکرله آماسره نی محاصره ایدرك شهر ضبط اولندی [۸۶۳] اسفندیار زاده لر دخی سینوبی تسلیم ایتدیلر [۸۶۴].

بوندن صکره پادشاه اردو ایله آناطولیدن ، صدر اعظم دونما ایله دکزدن طربزونه کیتدیلر . آق قیونلی امیری اوزون حسن بك طربزون ایمپراطوری (داوید قومنینوس) ك انشته سی ایدی . قاینی حمایه قالدیشدی . فقط روم ایلی بکلربیکی حمزه بك مقدار کافی عسکرله ایلری یه کوندریله رك اوزون حسنك ضبط ایتدیکی قویله حصار استرداد اولندی . اوزون حسن تدارکسز ایدی . والده سی ساره خاتونی پادشاهه رجاچی کوندردی . ساره خانون بلغار طاغنده پادشاه ایله کوروشدی . فاتح بالطبع طربزونك ضبطی تشبثدن واز کچمدی . اوزون حسن طربزونه قارشی وقوعه کله جك حرکاته مداخله ایتیه چکنی تعهد ایتدی .

نهایت قیصر سیروزده افراد عائله سیله برلکده اوطور مق شرطیه طربزون قلعه سی تسلیم ایتدی . آرتق اناطولی داخلنده قره مان امارتندن بشقه عثمانیلر ك دشمنی قالماسدی [۸۶۵] .

فاتح اسکی حکمدار لر ایله سلاله لرندن کیمسه نی حیاته بر اقامق مسلکنی اختیار ایتدیکندن داوید قومنینوس و عائله سیه منسوب ارککلر اوزون حسن ایله مخابره ده بولمق تهمتیه بالا آخره سیروزده اعدام ایدلملر در .

افلاک و برادرانه
سفری

آناتولی فتوحاتندن صکره فاتح افلاق وویووده سی
اوزرینه سفر آچدی . افلاق بکلکی دوتنه سنوی
۱۰,۰۰۰ آلتون ویرکو ویرمک ، ایجابنده معاونت

ایتمک ، بکک حین تعییننده واحوال فوق العاده ده نزد پادشاهی به کلنه رک
عرض عبودیت ایدمک ، بکک قارداشی ویا اوغلی درگاه هایونده بولندیرلق
کبی روابط ایله دولت عثمانیه تابع ایدی .

اوزمان (ولاد) افلاق بکی ایدی . بونک برادری (رادول) نزد
پادشاهیده ایدی . مجارلرجه دراقول ، یعنی شیطان ، اولاحلرجه جلاد ،
مسلمانلرجه (قازیقلی وویووده) نامیله معروف اولان ولاد وحشتلریله
مشهور برآمددر . اک زیاده خوشه کیدن اشکنجه یوزلرجه کیمسه لری
قازیققره اوروب بونلرک اورته سنده ضیافت ویرمکدی . ذکور وانات
یکرمی بیک کشی بی بو صورتله اولدیرمشدی . (ولاد) ایکی سنه دن
بری ویرکوسنی ویرمیور ؛ عثمانلیرله حربه حاضر لانیوردی . بونک
ایچونده بغداد بکی استفان ایله خوش کچینوردی . مجارقرالنک اقرباسندن
برقری تزوج ایدرک مجارلرک معاونت لری تأمین ایتمک ایسته یوردی .
ویرکوسی حقنده اخطار اتده بولمق وبلکده کنیدیسی خلع ایله یرینه برادرینی
تعیین ایتمک اوزره ویدین والیسی حمزه پاشا ۲,۰۰۰ کشی ایله افلاقه
کوندردی . ولاد حمزه پاشا ایله دفقاسنک ال وایاقلرینی کسیدرکدن
صکره جمله سنی قازیغه اوردیردی . پادشاه اوچایلچی کوندردی . بونلر
وویورده نک حضورینه باشی آچیق کیرمک خصوصنده کی تکلیفی عادات
اسلامیه به مغایر کوره رک رد ایتدیلر . ولاد ایلچیلرک صاریققرینی باشلرینه
چیوی ایله میخلاتدی .

بونک اوزرینه پادشاه سفره قرار ویری . وزیراعظم محمود پاشا برآ

افلاقه کوندرلدی . سلطان محمد ثانی ایکی یوز قدر کمی ایله بحرأ طونه یه داخل اولدی . میخال اوغللری ، مالقوچ ، ترخان واورنوس زاده لر بی روم ایلی امراسی پادشاهك معیتده ایدیلر . اردو بکرشه تقرب ایتدیکی زمان بر وادیده ایکی بیك قازیق و بونلر اوزرنده تلف اولان حمزه پاشا ورفقاسنك کمیکلری کورلدی .

افلاق سفری ولادك مجارستانه فراری ایله نتیجه لندی . افلاق بکلکی ایالت ممتازه شکلنده نزد پادشاهیده بولان (رادول) و ویرلدی [۱۸۶۶] . بغداد پرنسی استفان - که « بیوک » عنوانیله معروفدر - مجارستان قرالانی ایله حال خصوصتده بولندی صرهدده مجارلرله اولاحلرك مشترکأ تصرف ایتدکلری کیلی یه هجوم و بو شهری ضبط ایتشدی . افلاق دولت عثمانیه نك بر ایالت ممتازه سی حکمنه کیرمش اولدیغندن بوتجاوزك عثمانیلرجه سبب حرب عد ایدیه جکینی بیلن استفان پادشاهه مراجعت و تابعیتی قبول ایتدی ؛ افلاق و بغداد بکلرینك ایکسی ده دولت عثمانیه نك تابعی اولدقلری ایچون (کیلی) نك بری ویا دیکری النده بولمسنك اهمیتی اوله میه جغنی آکلاتدی .

استفان بغدادنه تجاوز ایدن مجارستان قرالنی مغلوب ایتدیکی کبی اوصرهدده تاتارلرك بر تجاوزینی ده دفعه موفق اولدی ؛ حتی تاتار خاننك اوغلنی اسیر ایتدی . خان اوغلنك تخلیه سنی طلب ایتك اوزره یوز کشیلك بر هیئت سفارت کوندردی . استفان خانزاده ایله طقسان طقوز کشی یی اولدیردی ؛ صوک ایلچینك برون وقولاقلرینی کسهرک کیفیتی اخبار ایچون خانه اعاده ایلدی .

بر مدت صوکره استفان افلاقه هجومه باشلادی . رادولی مغلوب و خلع ایدرك پرینه کندیسنه صادق بو یارلردن برینی بك تعیین ایتدی .

بوحرکتک نتیجہ سی بالطبع عثمانیلرلہ حرب اولہ جقدی . استفان عثمانلی اردولرینہ مقاومت ایچون متفقلر آرامقدہ ایدی . او صرمدہ ونڈیکلیر دولت عثمانیہ ایلہ حال حربدہ بواندقلرندن اوزون حسن نزدینہ برسفر کوندرمشلردی . اوزون حسن ونڈیک سفیرینی مملکتہ عودت ایدرکن بغدادنہ کیدرک عثمانیلرہ قارشی ملوک عیسویہ آرہ سندہ بر اتفاق عقدینہ تثبیت ایتسنی استفاندن رجاہ مأمور ایتمشدی . استفان دہ ایلچی یی خرستیان دولترلی بویلہ بر اتفاقہ دعوت ایچون پایاہ کوندردی . فقط ایلچی هنوز یولده ایکن خادم سایمان پاشانک قومانداسندہ کی عثمانلی اردوسی افلاقہ داخل اولدی .

خادم سلیمان پاشا اسقودرہ قلعه سنی محاصرہ ایتمکدہ ایکن آلدیغی امر اوزرینہ افلاقہ کیتمشدی . اسقودرہ دن افلاقہ قدر اوزون بر یولی قطع ایتسندن طولای یورغون درشن عثمانلی اردوسی بحارستان ولہستاندن کلن قوای امدادیہ ایلہ اللی بیک کشیہ بالغ اولان استفانک عسکرلرینہ مغلوب اولدی . محاربہ (برلاد) ایرماغی غربندہ (راقووا) دہ وقوعہ کلدی . استفان هیچ امید ایتدیکی مظفریتی شرفہ بر کلیسا یاپدیردی ، قرق کون اوروج طوتولسنی امر ایتدی ، بتون اسیرلری قازیغہ اوردیردی ؛ ونڈیکدن ، پاپالق مقامندن تبریکنامہ لر آلدی .

فاتح سلطان محمد ایکی سنہ صکرہ بالذات بغدادنہ کیتدی [۸۸۱] . بوسفردہ قریم خانیلہ افلاق وویوودہ سی معیت پادشاهیدہ بولندی . استفان عثمانیلرک طونہ یی کچمہ لرینہ مانع اولمق ایستہ دی . فقط معیتندہ کی عسکرلر قورقولرندن قاچدیلر . استفان بغدادنک شمالندہ کی اورمانلردہ تحصن ایتدی . براز صکرہ بورادہ دخی مغلوب اولدی . (خوتین) و (زوچاوا) قلعه لری مستنا اولمق اوزرہ بغدادنک ہرطرفی ضبط ویغما ایدلدی .

بوسنه وهرسك
نقى

صربستان سفرى اناسنده بوسنه قرالى آردهده کی
صهریتدن طولای صربلرک ایشلرینه مداخله ایتش ،
فقط بو مملکتک بر عثمانلی ایالتی حاله افرانغی اوزرینه
مایوس قالمش ، دولت عثمانیه یه ویرکو اعطاسنه مجبور اولمشدی . ایفای
تعهدده کوشک طاورانوردی . دیگر طرفدن ونیکلیلرک کوستردکلی
اطوار خصمانه یه نظراً ایلریده ونیک ایله حرب ظهوری محقق اولدیغندن
بو حکومت قارشى موفقیته حرب ایتک ایچون بوسنه نك ضبطی لازم کلیوردی .
دولت عثمانیه ایچون سواحل عثمانیه ایله آطه لر دن ونیکلیلری ، جنویرلری
چیقارمق تحت وجوبده ایدی . بونک ایچون ایه قوتلی بر دونمادن بشقه
آق دکر بوغازینک ترصینی لازم ایدی . پادشاه افلاق سفرندن عودتندن
سکره سفائن حربیه اناسانه ، بوغازده استحکامات بناسنه اعتلا یتدی .
ونیک بوتدارکاته واقف اولدیغندن پاپای عثمانیلر علیهنده اهل صلیب
اردولری ترتینه تشویق ، اسکندر بکه معاونت ایدیوردی . آرناوودلق
ساحلنده کی بر چوق یرلردن بشقه اشقودره ونیکلیلر النده ایدی . الحاصل
اسباب حرب هر زمان موجود ایدی .

پادشاه ونیک ایله محاربه یه باشلامازدن اول بوسنه وهرسکی الحاق
ایتمک قرار ویرمشدی . بوسنه قرالی ده اوروپادن استمداد ایلوردی .
فاتح دولته ویرکو ویرمک ، اطاعت ایتک شرطیله مقامنده قاله جنغی قراله
تبلیغ ایتدی . قرال سفیرمزه حقارت آمیز بر جواب ویردیکندن سفر
هایون تدارکاته باشلاندی . پادشاه ۸۶۷ سنه سنده اسکوبدن وولچترینه
واوردن (یاخجه) یه یوریدی . قلوچ قلعه سنه قاچمش اولان بوسنه قرالی
تعقیب ایتک اوزره صدراعظم محمود پاشای کوندردی . محمود پاشا قرالی
(قلوچ) قلعه سنده محاصره ایتدی . صدراعظم ، قرالک جاننه قصد

ایدلمه مك شرطيله قلعهك تسليمه دائر بر مقاوله نامه امضالادی . قرال وحفیدینی احترامات لازمه ایله پادشاهك نزدینه کوندردی .

پادشاه یا قرالك صاغ بر اقله مسنده بر تهلكه کوردی کندن ، یا خود - اغلب احتمال - صدراعظمك کندیسندن استیدان ایتمکسزین بر مقاوله نامه امضا ایلمسه جانی صیقلدیغندن قرالی وبوسنه پرنس لرندن بر قاجانی اردوی هایونده بولمان امام فخرالدین رازی سلاله سندن مصنفك نامیه مشهور شیخ علی بسطامی قنواسیله قتل ایتدیردی .

بو صورتله بوسنه قطعه سی ضبط ایدلدی . فقط بر مدت صکره مجارستان قرالی (ماتیاس قوروین) بوسنه یی المق ایستدی ؛ حتی (یا بجه) قلعه سنی ضبطه موفق اولدی . قلعه محافظی خرم بك ایله کزیده عسکر اسیر ایدله رك مجارستانه کوتورلدیلر ، (ماتیاس) ك رسم تتوجنده تشهیر ایدلدیلر . بونك اوزرینه تکرار سفرهایون وقوع بوله رق (ماتیاس) ك اردوسی مغلوب اولدی [۸۷۰]

اوصره ده هر سك بکی (استقان قوساریچ) نزد پادشاهی یه کلوب عرض اطاعت ایتدی کندن مقامنده ابقا ایدلمشدی . بالآخره وفات ایتدی کی زمان ایکی اوغلی (هر سك) ی تقیم ایتمك ایستدیلر ؛ بوسنه بکله - بکیسی ایشه مداخله ایتدی ؛ (هر سك) دخی مملاك عثمانیه یه الحاق ایدلدی . هر سك حاکم زاده سی پادشاهه دخالت ایتدی ، که بو ذات مؤخرأ اهتدا ایدن ودرت دفعه صدارته کچن هر سك زاده احمد پاشادر .

بوسنه سفرلری اثناسنده [۸۶۸] ونديك محاربه سی ونديك محاربه سی باشلادی . بو محاربه قره ده ود کزده اون آلتی سنه سوردی . ونديك بیوک اردولره مالک بر حکومت اولمیدینی ایچون مورده ده بر عصیان چیقارمقدن ، آرن اوودلقده اسکندربکه یارديم ایتمکدن بشقه

برشی پایه مدی ؛ لکن دونماسیله سواحل عثمانیه یی اوردی ، دشمنلر مزه معاونت ایتدی . حرب بتون شرق سواحله ، جزائرینه انتقال ایتدکن ماعدا پاپانک عثمانیلر علینده اهل صلیب سفرلری ترتینه تشبث ایتسی ، اسکندر بکک وموره اھالیسنک عصیانہ ضمیمہ ناپولی ، مجارستان ، ترانسیلوانیا ، قره مان بکک رینک مداخلہ لری احوالی بستون قاریشدیردی . بوقدر غوائلہ مقابل دولت عثمانیه هم عصیان واختلاللری ازالہ ایتدی ؛ همده ونديکيلردن آغریبوزی ، اسکندر بکک وفاتندن صکره بتون آرناوودلنی ، هر سکک سنجاغنی آلدی ؛ ونديک ولايتلرینی ، ونديک یاقین آوستریا ومجار مملکتلرینی یغما ایلدی ؛ کندی ساحللرینی ده محافظه یه مقتدر اولدی ؛ نتیجه ده خیلی زده لن ونديکيلر مصالحه طلبنده مضطر قالدیلر . محاربه ، اولاً ، موره ده باشلادی . سبب ظاهری شو ایدی : آتیه محافظتک کوله سی افندیسنک پاره سنی چالهرق قاقچش ، ونديکيلرک اداره - سنده کی (قورون) قلعه سنه التجا ایتشدی . ونديکيلر کوله یی - خرستیانلنی قبول ایتدیکی بهانه سیله - اعاده ایتمه مشلردی .

ونديکيلر موره اھالیسنی عصیان ایتدیردیلر ؛ قلعه لره عسکرو مهمات کوندردیلر . محاربه پک شدتلی اولدی . (آرغوس) برقاچ دفعه عثمانیلرک ، ونديکيلرک الله کچدی . نہایت ، موره اختلالی تسکین اولندی . فقط پاپانک تشویقیله ایتالیا حکومتلری ایشه قاریشیور ، اسکندر بکک هر زماندن زیاده شدت کوسترییور ، برطرفندن ده پادشاه قره مان ممالککنک ، ضبطی ایلہ مشغول اولیوردی . اونک ایچون روم ایلی قطعہ سی خیلی زمان قاریشیقلى ایچنده بولندی .

۸۷۲ ده پادشاه اسکندر بکک اوزرینه یوریدی ؛ قرویایی محاصره ایتدی . برقاچ سنه صکره اسکندر بکک وفات ایلدی ؛ ممالکتی ونديکيلره

براقدی . اوصردده هرسك سنجاغی ده فتح اولندی . وزیر اعظم محمود پاشا آغریبوز آطه سنی ضبطه موفق اولدی [۸۷۳] .

پادشاه قره مان امارتی میدانن قالدیرمقله مشغول اولدینی صرده قره مان اوغللری ایچ ایل طرفلرینه قاجشیر ، اوراده مقاومت چالیشورلر ایدی . وندیکیلر ایله متقلری اولان پاپا ، ناپولی حکومتی ، ردوس شواله لری آنطالیه و سلف که ساحلرینه دونما کوندر دیلر . قره مان اوغلرینه یاردیم ایتیمک ایستدیلر . سواحلی یغما حتی بر آراق از میری ضبط ایتدیلر . پادشاه شمال و غرب حدود لرنده استحکامات انشا ایتدیر مکده ، سرحد بکلری مجارستان ، خرواستان و آوستریا طرفلرنده حرکات تعرضه لرینه دوام ایلمکده ایدی . خادم سلیمان پاشا وندیکیلرک کمال شدته مدافعه ایتدکلری اشقودره نک فیحنه مأمور اولدی . قلعه محاصره ایدلدی؛ سورده رخنه لر آچیلدی . فقط قلعه ده کی وندیکیلرله اهالی شدته مقاومت ایتدکلری ایچون ضبطی ممکن اوله مدی . مع مافیه بر مدت دها محاصره یه دوام ایدلسه قلعه نک فتحی محقق ایکن سلیمان پاشا پادشاه دن آلدینی امر اوزرینه محاصره یی رفع ایدره ک بغداد سفرینه عزیمت ایتدی .

وندیک حکومتی بر قاج دفعه صلحه طالب اولدینی حالده دولت عثمانیه طرفدن بیان ایدیلن شرائطی قبول ایتهمسی اوزرینه محاربه یه دوام اولندی . فاتح اشقودره نک تسلیمنی ایسته یور ؛ وندیک ایسه بوکا راضی اولموردی . نهایت ، پادشاه بالذات آرناوودلغه کیتدی .

بو سفرک باش قوماندانلغنه بدایه قره مان و کفه فاتحی کدک احمد پاشا تعیین ایدلدی ایسه ده آرناوودلق کبی طاعلق بر مملکتده حربک مشکلاتنه دائر عرض ایلدیکی مطالعات اوزرینه عزک اولندی . عسکر لکدن زیاده قانونه آشنا اولق صفتیله مشهور اولان نشانچی قره مانلی محمد پاشا

مقام صدارتہ کجی . پادشاہ باش قوماندانلی بالذات درعہدہ ایتدی .
 قرویا ذاتاً محاصرہ آلتندہ ایدی . پادشاہک عزیمتی اوزرینہ محصورین
 قلعه‌ی تسلیم ایتدیلر . بعدہ ، اشقودرہ ایکنجی دفعہ اولہرق محاصرہ
 ایدلدی . سلطان محمد ہرنہیہ مال اولورسہ اولسون اشقودرہ‌نک فتحہ
 عزم ایتیش اولدیغندن محاصرہ پک شدتلی ایدی . فقط قلعه محافظلوی دہ
 او نسبتدہ معذانہ مقاومت کوستردیلر . پادشاہ قلعه‌یہ حاکم یرلردہ جسیم
 طویلر دوکیردی ؛ هجوملر اجرا ایدلدی ؛ لکن مناعت موقعہ دن
 طولای اشقودرہ آلنہمدی . اشقودرہ‌نک قارشیسندہ بر قلعه انشا اولنہرق
 اردو استانبولہ عودت ایتدی . آلتی آی صکرہ اشقودرہ لیلرک مقاومتہ
 محاللری قالمدیغندن محافظلرک وندیکہ عزیمتلرینہ مساعده ایدلمک اوزرہ
 قلعه‌نک تسلیمی شرطی قبول ایدلدی .

اشقودرہ محاصرہ سی اٹناسندہ عثمانلی آقینجیلری طرخان زادہ عمر
 بیک قومانداسی آلتندہ وندیکہ طوغری آقینلر اجرا ایتدیلر . (ایزوزو)
 نہری اوزرندہ غوریچ کوپرسندن کجیلر ؛ (تاغلیامہ نتو) کچیدندن مرور
 ایدرک وندیکہ برقاج ساعت مسافہ سی اولان کویلری یاقدیلر .
 بونک اوزرینہ ناپولی و مجارستان کبی متفقلری طرفندن ترک ایدلمش
 اولان وندیک صلحہ راضی اولدی [۱۴۷۹ - ۸۸۳] . مصالحہ نامہ
 موجبہ وندیک جمہوریتی لینی ، اشقودرہ و قرویا قلعه لریلہ جوارینی
 دولت عثمانیہ ترک و محاربہ اٹناسندہ وندیک طرفندن ضبط ایدیلن بتون
 قلعه لری اعادہ ایتدی . یوزبیک آلتون تضمینات حربیہ ایلہ سنوی
 اون بیک آلتون ویرکو اعطاسی تعہد ایتدی . بو ویرکو وندیک
 تجارینک اموالندن آلنہ حق کمرک رسمی معاہدتک بدلی ایدی . کذلک
 مصالحہ موجبہ ہانکی ملتک کیسی اولورسہ اولسون وندیک بایراغی

آئندہ ہونسان سفائن ونديك كيسي عد ايديلهرك تجاوزدن مصون اوله حق ، استانبولده برونديك باليونري اقامت ايدرك ونديكليلر اوزرنده مسائل حقوقيه جه حق قضايي حائر بولنه حق ایدی . ایونیہن آطہلری (لئوناردو) اسمندہ بردہ بکنک زیر اداره سندنہ اولوب مصالحہ نامہ یہ داخل اولمديغندن پادشاہ اوصرہ دہ آیاماورا وزانطہ آطہلری دہ الحاق ایتدی .

بوسنہ وونديك محاربہلری ظهور ایتدیکی صرہ دہ [۸۶۸]

قره مانك قتمی قره مان اوغلی ابراهیم بك وفات ایتمشدی . قره مان

اوغللری یوزاللی سندنہ بری عثمانلی خاندانہ مخاطرہ لی بررقیب اولمشلر وپادشاہلر هر نه وقت بشقه بر طرفدہ سفرلہ مشغول اولدیلر ایسہ بوبکلر درحال حرب آچمشلردی . سلطان مراد اول زمانندہ قره مان بکی علی بك مغلوب واسیر ایدلمشدی . ییلدیرم بایزید قره مانلیلرلہ ایکی دفعہ حرب ایتیش ؛ برنجی حرب چهارشنبه صویندن حدود کسيلمسی ، ایکنجیسی مملکتک کاملاً تسخیری ایلہ نتیجہ لشمشدی . لکن قره مان اوغللری آنقرہ محاربہ سندن صکرہ اعادہ حکومت ایتمشلردی . سلطان محمد اول زمانندہ قره مان بکلریلہ بر ، مراد ثانی زمانندہ اوچ محاربہ اولمشدی . سلطان محمد ثانی دخی جلوسنی متعاقب قره مان اوغلی ابراهیم بکی تحت اطاعتہ آلمشدی . اخیراً وفات ایدن بو ابراهیم بك ایدی .

ابراہیم بکک یدی اولادی واردی . اسحاق بك اسمندہ کی اوغلی جاریہ دن دنیاہ کمشدی . اک بیوکلری پیر احمد بك اولان دیگر آلتیسی . سلطان محمدک خالہ سندن تولد ایتمشلردی . اسحاق بك باباسنک سوکیللی اولدیغندن وارث حکومت اعلان اولنمشدی . ابراهیم بك حال حیاتندہ خزینہ لریلہ ایچ ایل قضاسنی بو اوغلنہ ویرہ رک سلفکہ شہرینی اقامتکام کوسترمشدی . ابراهیم بکک دیگر آلتی اوغلی بدرلرینک اسحاق بك

حقنہ کی توجہنی چکہ میوب اعلان خصومت ایتشلر ؛ پدرلرینی قونیہ دہ محاصرہ واورادن اخراج ایلشلردی . ابراہیم بک دہ قونیہ دن قاچارکن وفات ایتشدی .

بونک اوزرینہ پیر احمد بک قونیہ ایلہ حکومتک شمال طرفلرینی ضبط ایدرک قرداشی اسحاق بکہ طاش ایلمنی بر اقدی . اسحاق بک آق قیونلی حکمداری اوزون حسندن استمداد ایتدی . اوزون حسن مراجعت واقعہی قبولہ مسارعت وبالذات ارزنجاندن سیواسہ عزیمت ایلدی . فقط ترکمن حکمدارینک عسکرلری مملکتی یغما و تخریب ایتدکرندن اہالی نومید اولدی . پیر احمد بک قونیہ دن چیقدی .

اوزون حسنک عسکری چکیلد کدن صکرہ پیر احمد بک کنڈیسنہ امداد اولہرق کوندربیلن قوۂ عثمانیہ سایہ سندہ اعادۂ حکومتہ موفق اولدی . اسحاق بک مغلوباً قاچدی ؛ سلفکہ قلعہ سنہ قیاندی .

قرہ مان بکلرینک اوتہ دن بری عثمانلی دولتنک دشمنلریلہ مناسبتلرینہ و آناطوللی فتوحاتنک اکمالی لزومہ بناءً قونیہ وحوالیسنک ، فاتح طرفندن ضبط ایدیلہ جکی شہہ سز ایدی . پادشاہک معاوتی سایہ سندہ نائل حکومت اولان پیر احمد بک ذوالقدر اوغلی شہسوار ایلہ برلکدہ دولت عثمانیہ اعلان خصومت ایتسی پادشاہک بالذات قرہ مان سفرینہ عزیمتہ سبب اولدی . قونیہ ضبط ایدلدی . پادشاہ وزیر اعظم محمود پاشای اسحاق بک التجا ایتش اولدیغی لارندہ ی ، یعنی شیمدیکی قرہ مان ضبطہ مأمور ایتدی . بو شہرک سورلری آلتندہ وقوعہ کلن قانلی بر محاربہ دہ اسحاق بک مغلوب اولدی ؛ فرار ایتدی .

محمود پاشا تیمورک آناطولیدن عودتندن صکرہ قرہ مان طرفلرندہ یرلشوب قالمش اولان وقرہ مان اوغللریلہ برلکدہ حرکت ایدن طورغود

تاتارلری بقایاسنی تحری وافنایہ مأمور اولدی ؛ طرسوسہ قدر کیتدی .
 اله کچن طور غودلر اعدام ایتدیرلدی . محمود پاشا قونیه ولارنده شهرلرنده کی
 عمله و ارباب صنایعک کاملاً استانبوله اعزامی ایچون امر آلدی .
 عشائر مغلوبه حقنده حلم و سماحت کوسترمش اولان محمود پاشا مجرد بر
 حس انسانیتپروری ایله وطنلرندن آیریله جق اشخاصک برطاقنی یرلرنده
 بر اقدی . وزیر اعظمک رقیبی اولان روم محمدپاشا پک چوق زماندن بری
 مقام صدارته حریص ایدی . محمود پاشای ارتکاب و کوشکلک ایله اتهام
 ایتدی . پادشاه عمله و ارباب صنایعک نقلی ایشنی روم محمد پاشایه تودیع
 ایلدی . اوده مفرطانه حرکت ایدرک معتبران اهالی یی ده عمله صرہ سنه
 قاندى ؛ مملکتلرندن آیردی .

محمود پاشا پادشاهک توجهسزلکنی جلب ایتش واسحاق بکک
 فراریله قونیه ولارنده اہالیسی حقنده کوستردیکی مسامحه فاتحک
 خشنودسزلغنی تزئید ایلش اولدیغندن سلطان محمد اجرای مجازات ایچون
 ختام حربہ انتظار ایدیوردی . اردونک عودتندہ ، قرہ حصارده چادیرلرک
 قورولش اولدینی بر کونده پادشاه صدر اعظمی بر معاملہ مخصوصہ
 ایله عزل ایتدی . محمود پاشانک اوتاغنه کیرمسى اوزرینہ چادیرک ایپلری
 کسیلدی ، اوتاغ وزیر اعظمک باشنه ییقدیرلدی . تاتارلردن قلمش اولسی
 محتمل اولان بو عادت او زمان عثمانیلرده برنجی دفعہ اولہرق اجرا
 ایدلدی واوندن صکرہده تکرار اولندی . محمد پاشا محمود پاشایه خلف
 اولدی [۸۷۲] .

اوچنجی شہزادہ سلطان مصطفی فتح ایدیلن ممالکہ والی تعیین اولندی .
 قرہ مان سلالہ سی ۱۶۶ سنہ اجرای حکومتدن صکرہ پریشان اولدی .
 اوزون حسنک یانہ قاچان اسحاق بک وفات ایتدی .

مع مافیه بو مظفریات قره‌مان اهاالینک اسکی بکترینه ارتباطلرینی
 تمامیه محو ایدمه‌مشدی . سلفکه اسحاق بکک اوغلیله والده‌سنک النده
 ایدی . دیگر طرفدن پیر احمد بکک برادری قاسم بکک اوزون حسنک
 یاردیمیه اهاالینک اسکی خاندانه محبتدن استفاده ایدیوردی . طورغود
 تاتارلری تنکیل ایدلمش ایسه‌ده ینه تاتارلردن وارساق دنیلن و تیمورک
 استیلا‌سندن بری اورالرده قالمش اولان عشیرته ایلشیلمه‌مشدی . علائیه
 اراضیه‌ده سلجوقی خاندانندن قلیچ آرسلا‌نک ادارهٔ مستقلسی آلتنده
 ایدی . الحاصل قره‌مان جهتده دولت‌ایچون ته‌لکه هنوز من‌دفع اولما‌مشدی .
 وزیر اعظم روم محمد پاشا آناطولی‌یه مأمور اولدی . حریص مال
 وجاه ، ایش بیلمز بر آدم اولدینی ایچون قره‌مان بلده‌لرینی انواع مظالم
 ایله تخریب ایتدی . وارساق عشیرتی تأدب ایتدیکی صرعه‌ده طاش ایلنده
 بر دربنده دوشدی ؛ مغلوب اولدی . یاننده‌کی عسکرک یاریسی تلف
 اوله‌رق بر حقوق مال میدان حربده قالدی . پادشاه بو هزیمت ایله
 حیثیتی غائب ایدن محمد پاشایی عزل ایله یرینه اولجه بوسنه والیک‌کنده
 بولنش اولان اسحاق پاشایی تعین ایتدی [۸۷۵] .

یکی وزیر اعظم ، روم محمد پاشانک بوزغونلغندن صکره بتون
 ملکیتی اسکی بکترینک لهنه قیام ایتدیرمش اولان قاسم بکی تنکیل ایچون
 همان قره‌مانه کیتدی . موط قلعه‌سنده قاسم بکی مغلوب ایتدی . بعض
 قلعه‌لری تعمیر ایتدیردی . آقسرای اهاالینه استانبوله نقل ایلدی ، که
 بونلر الیوم آقسرای دنیلن محله‌ده اسکان ایدلمشلردر [۸۷۶] .

ایرتسی سنه کدک احمد پاشا علائیه‌نک ضبطنه مأمور اولدی . سلجوقی
 سلطان علاءالدین کیقباد طرفندن قیالقلر اوزرنده انشا ایدلمش اولان بو

شہر تسلیم اولدی . قلیج آرسلانہ کو ملجنہ سنجانی تخصیص ایدلدی .
فقط آرسلان بك بر مدت صكره مصره قاچدی .

كديك احمد پاشا اسحاق بكك حرميله اوغلى الله بولنان سلفكه يي
وديك ر قلعه لری دخی آلدی . فقط اوزون حسنك بيوك بر اردو ايله
تقریبی شایع اولدیغندن قونیہ طرفه چکیلمكه مجبور اولدی .

اوزون حسن سلطان محمد قارشی قره مان بکلرینك

اوزون حسن
حقوقنی مدافعه یه قرار ویرمش ، حدود عثمانیه یی

تجاوز ايله توقاده طوغری ایلریله مشدی . پیر احمد وقاسم بکلر معیتده
بولنیوردی . اردو اوزون حسنك وزیرى عمر بك ايله یکنی یوسفجه
میرزانك قوماندالری آلتنده ایدی . ترکمنلر توقاد شهرینی یاقدیلر ، ییقدیلر ؛
اهالی یه بيك درلو اشکنجه یابدیلر . بوندن صكره قره مان ممالکینی خرابه
زاره چویردیلر .

سلطان محمد ثانی توقادده ، قره مانده اجرا ایدیلن وحشتلری ، تخریباتی
خبر آنجه چادرینك هان اسکداره کچیرلمسنى امر ایتدی . بتون پاشالره ،
بکلره بر امرنامه کوندره رك آناتولی ساحلنده ومعیتده اجتماع ایتك
اوزون سیر سریع ايله کللرینی تبلیغ ایلدی . فی الحقیقه تهلكه بك یاقین
ایدی . دشمن بر قاج مرحله دهاکش اولسه آناتولینك تا قلبکاهنده
بولنه جق ایدی . وزیر اعظم اسحاق پاشا ايله قره مان والیسی شهزاده سلطان
مصطفی بتون ایران اردولرینك هجومه معروض ایدیلر . معیتلرنده کی عسکر
بك آز اولدیغی ایچون كدك احمد پاشا فرقه سنك یوسفجه میرزایه مغلوبیتندن
صكره هر ديقه دشمنك الله كچمك تهلكه سنده بولنیورلر ایدی .

سلطان محمد بو مشكل زمانده قبودان پاشانك مقر معتادی اولان
کلیبولیده اقامت ایدن محمود پاشانی ایکنجی دفعه اوله رق مقام صدارته

گنبدی. محمود پاشا اسکنداره کلدی. یاشمدی به قدر اجرا اولنان تدارکاتک قیش کلزدن اول اوزون حسنک قوتلی اردوسیه محاربه به کیریشمه کافی اولدیغنه حکم ایتمسندن، یاخود سلطان مصطفایه اولان غرض شخصیه سی حسیله بالذات پادشاهک معیتده اولدقجه سفر مخاطرات و شرفی شهزاده ایله مقاسمه به راضی اولمامسندن واونک امری التنده خدمت ایتمک ایسته مه مسندن طولای موسم پک ایلیله مش اولدیغنی، قره مانده قیشک پک شدتله حکم سوردیکنی، اردونک لوازم و مهماتی هنوز اکمال ایدلمه مش بولندیغنی پادشاهه عرض ایتدی. و مملکتک باشلیجه موقعلرینه امداد و ترکمن عشیرت لرینک تجاوزلرینی منع ایلمک اوزره آناطولی بکلربکی داود پاشانک ایلری به کوند رلمسنی توصیه ایلدی. پادشاه بوکا موافقت ایتدی. یوسفجه میرزا قره مان اوغللریله برلکده کذرکاهنی یغما ایده ایده حمید ایله قدر ایلیله مشدی. قیر ایلنده شهزاده سلطان مصطفی ایله داود پاشانک قومانداسنده کی عثمانلی اردوسنه تصادف ایتدی. قانلی بر محاربه وقوع بولدی. یوسفجه میرزا اسیر دوشدی؛ اردوسی تمامیه بوزیه رق اوزون حسنک ممالکنه عودت ایتدی. پیر احمد بک اوزون حسنک یانه قاجدی؛ قاسم بک سلفک قلعه سنه التجا ایلدی.

سلطان محمد ایله اوزون حسن محاربه سنی نقل ایتمزدن اول آق قیونلی ترکمن حکومتی حقنده برآز تفصیلات ویرمک ایجاب ایدر: هجرتک سکننجی، میلادک اون دردنجی عصری نهایته طوغری جنکیز سلاله مسندن مغول حکمدازی آرغونک زمان حکومتنده آق قیونلی وقره قیونلی نامنده ایکی ترکمن عشیرتی بولندقلری چوللاری ترک ایله شرقدن غربه طوغری کلشیر؛ اولکیلر سیواسک شمال طرفلرنده، ایکنجیلر دیاربکرک جنوب جهتلرنده یرلشمشیر ایدی. بر عصر صکره بو ایکی عشیرت ایلمک دفعه

خاندان حکمداری اوله رق کورونیورلز . قره قیونلیلردن ۹۷ سنه ده ۴ ، آق قیونلیلردن ۹۹ سنه ده ۹ حکمدار کلمشدر . قره قیونلیلرک حکمداری قره یوسف تیمور طرفدن ممدکتدن اخراج اولنمسی اوزرینه ییلدیرم بایزیده التجا و پادشاهی تاتار جهانگیریه محاربه یه تشویق ایتمشدی . بو خاندانک اک قوتلی حکمداری اولان جهانشاه - که قره یوسفک حفیدی وایکنجی خلفی ایدی - عراق عرب وعجمی ، آذربایجانی حرباً ضبط ایتمشدی . تبریزده اقامت ایدردی .

آق قیونلی خاندانی ریاستده بولنان قره یول [قره یولوق] توسیع مالکه چالیشهرق قومشورلیله محاربه دن خالی قالمامشدی . توقات و سیواس حکمداری قاضی برهان الدینی ، مصر حکومتک اوامر کذاری اولان شام وماردین حاکم لرنی مغلوب و قتل ایتمشدی . ایشته ، اوزون حسن قره یولک طورونی و اوچنجی خلفیدر .

اوزون حسن برادری جهانگیردن حکومتی ضبط ایدر ایتمز حدود عثمانیه ته تجاوز ایدرک دو ملی حصار قلعه سنی ضبط ایلمشدی . آنجق فاتح طربزونک فتحه کتدیکی وقت پادشاهدن طلب صلحه شتاب ایدرک والده سی ساره خاتون معرفتیه بر معاهده نامه عقد ایتدی ، که اونک حکمنجه فاتحک طربزون ایمراطوریه محاربه سنده بیطرف قالغی تعهد ایدیوردی . صکره ، قره قیونلی حکمداری جهانشاه ایله محاربه ایتدی . جهانشاه سلطان محمدن استمداد ایتمشدی . لکن پادشاه اوزمان اسکندر بک محاربه سیله مشغول اولدیغندن جهانشاهک رجاسنی اسعاف ایده مدی . جهانشاه شجیعانه محاربه یه دوام ایلدیسده نتیجه ده اسیر دوشهرک اعدام ایلدی . خصمک سلطان محمدن استعانه ایتمش اولدیغنی بیلن اوزون حسن پادشاه برظفر نامه یازهرق قره قیونلی ارکان حکومتدن اوچنک باشی ده

برلکده کوندردی . مکتوبنک نهایتده آرهلرنده منعقد اتفاقك حقانیت
وصمیمتله محافظه سنی توصیه ایتمکه برابر پادشاهی آق قیونلی خانداننك
اقبالی وممالکینك توسعی ایچون دعاخوان اولمغه دعوت ایدیوردی .
اوزون حسن تیمورك طورونی اولوب ماورایالنهرده سلطنت ایتمکه
اولان ابو سعید بهادر خان ایله ده محاربه ایتدی . ابوسعیدك پدری
میرانشاه آذربایجان حکومتی تیمورك میراثی اوله رق آلمش اولدیغی حالده
اوزون حسن جهانشاهك وفاتندن صکره بو قطعه یی کندی ممالکینه الحاق
ایتمک ایسته یوردی . ابوسعید باباسندن و بیوک باباسندن قالان ممالکی
استرداد ایچون بالذات حرکت ایلدی . فقط اوزون حسنك قوردیغی
پوصویه دوشه رك اردوسیله برلکده محو اولدی . آق قیونلی حکمداری
ابوسعیدك باشنی کسه رك تهدید آمیز برظفرنامه ایله مصرسلطانه کوندردی .
بعده اوزون حسن تیمورك احفادندن سلطان حسین بایقرا یی ده
خراسان تختندن طرد ایدرك ممالکینی ماورایالنهر دن قره مان حدودینه
قدر توسیعه موفق اولدی .

بو موفقیتلر اوزون حسنه او قدر غرور و یردی ، که کندیسینی شرک
آمر مطلق نظریله کورمکه باشلادی . اوزماندن اعتباراً - وقتيله تیمورك
ییلدیرم بایزید ایله جنک ایتدیکی کبی - اوده سلطان محمد ثانی ایله حرب
ایده بیلیم صاندی . تیمورك کوستردیکی مثاله امثالاً عثمانیلرک تختلرندن
طرد ایتدکلری بکلرک دخالتی قبول ایله مملکتلرینی استرداد ایتلمی
ایچون معاونت ایلدی . قسطنونی حاکمی قزل احمد ایله قره مان بکلری
اونك سراینده التجاکاه بولمشلردی . بو حرکت ، فاتحک جلب انفعالی
مقصدیه یاپیلمشدی . لکن پادشاهك زیاده حميته طوقانان شی -
سلطان محمد ایله دائماً مناسبات دوستانه ده بولنش اولان - جهانشاهك

بوزولدیغنی واولدیرلدیکنی متضمن اوزون حسنک کوندرمش اولدیغی
ظفرنامه در . اوزون حسن دیگر بر مکتوبندهده پادشاه سلطان عنوانی
ویرمیه رک ساده جه « محمد بک » تسمیه ایدیوردی . بو صوک مکتوبده
اوزون حسن بتون اقلیم فارسی فتح ایله هپ دشمنلرینی هزیمته اوغراشمش
و شیرازی پایتخت اتخاذاشمش اولدیغنی ، حسین بایقرانک کندیسنی متبوع
طایبقده بولدیغنی ، اونک نالککنده هپ خطبه لرده یالکز کندی نامنک
ذکر و سککنک کندی اسمنه ضرب ایدلمکده بولدیغنی بیان ایدرک لطف
حق ایله آرتق قورقه حق دشمنی قالمدیغنی ایراد ایلوردی . سلطان محمدک
حسین بایقرا ایله مناسباتی جهانشاه ایله اولدیغی قدر دوستانه بولدیغندن
شو مکتوب دهها زیاده انفعالی موجب اولدی .

فاتح اوزون حسنه دهها زیاده محقرانه بر مکتوب یازدردق اردوسیه
برلکده قره حصار اوزرینه بوریه جکنی بیلدیردی . ۸۷۷ سنه سنده
اسکداردن حرکت ایتدی . موکب هایون سیواس صحراننده اخذ موقع
ایلدی . قره مان والیسی شهزاده سلطان مصطفی و آماسیه والیسی شهزاده
سلطان بایزید معیت موجوده لرله برلکده پدرلرینک نزدینه کلشلایدی .
صنوف مختلفه یه منسوب عسکرک جمله سی یوزبیکه بالغ اولیور ایدی .
اباً عن جد آقینجیلرک رئیس اولان میخال اوغلی علی بک دشمنک
توقانده ارتکاب ایش اولدیغی وحشتلرک انتقامنی آلق وبتون اووهده کی
ممالکی تخریب ایتک اوزره ایلری یه کوندرلمشدی . اوزون حسن فرات
کنارنده مساعد بر موقعده ار-وسنی جمع ایشدی . میخال اوغلی دشمنک
تفوق عددیسنی کوره رک رجعت ایلش اولدیغی حالده طلیعه ده کی خفیف
سواری یه قوماندا ایتکده اولان روم ایلی بکلربیکی کنج قوماندان خاص
مراد پاشا اوزون حسن اردوسیه چارپیشمق آرزوی شدیدینه قایللمش

و بر قاج قره غول مصادمه سنده کی موفقیتنه آلدانمش اولدیغندن دشمنك ارقه سندن آریله میهرق هجوم ایلدی . مراد پاشای تعقیب ایتمکده اولان محمود پاشا اوکا کری دونمك ایچون امر ویردیهده کنج بکلربیکی شجاعتمه مغروراً ایلریله دیکندن اوزون حسنك - ساخته بر رجعت حرکتی اجرا ایدرك - قورمش اولدینی طوزاغه دوشدی ؛ قهرمانجه دوکوشدی ؛ عسکرک تسم کلیسیله برابر میدان حربده قالدی . عثمانلی اردوسنك اك متحیز قوماندانلرندن ترخان زاده عمر بك ایله بعض امرا اسیر دوشدیلر . اوزون حسن بو معتبر اسیرلری کورنجه عمر بکه خطاب ایدرك « عثمانلی اردوسنك اك کزیده عسکری اولان روم ایلی عسکرینی تنکیل ایتدکدن وموره فاتحنك اوغلی کندی اله اسیر دوشدکدن صکره آرتق عثمانلی دولتنده اسکی قوت قالمامش » اولدیغنی سویلدی . عمر بك اوکا جواباً نشئه سنك هنور وقتسز اولدیغنی و پادشاهك دها کندی کی یوزبیکلرجه آدمی بولندیغنی بیان ایتدی .

بو موفقیت اوزون حسنك کبر وعظمتنی آرتیردی . فقط بر مدت صکره پاشاه ارزنجان قربنده اوزون حسنه قارشی بیوک بر مظفریت قازاندی . عثمانلی اردوسی بایبورده توجه ایله اوزون حسنك ممالکی داخلنده آلتی کون یول آلمشدی . یدنجی کون ترخان قربنده « اوچ آغزلی » دنیلن محله مواصلت ایتدی . اوراده ، دشمن اردوسی اوتلق بلی تپه لرده صف حرب اوزره دیزلمشدی .

اوزون حسنك صاغ جناحی کوچك اوغلی زینلک ، صول جناحی ده بیوک اوغلی اوغورلو محمدك قومانداسی آلتنده ایدی . پادشاه شهزاده سلطان مصطفای صول جناحه ، شهزاده سلطان بایزیدی صاغ جناحه کوندردی . زینل سلطان مصطفانك شدتلی هجومه مقاومت ایدمدی ؛

عسکری مغلوب اولدی؛ کندیسیدی ده میدان حربده دوشدی. بواشاده شهزاده سلطان بایزید دخی دشمنك اوغورلو محمد قومانداسنده کی صول جناحی بوزدی. بونك اوزرینه ترکن اردوسی پك پریشان بر حالده قالدیغدن اوزون حسن میدان حربی ترك ایله قاچدی [۸۷۸-۱۴۷۳]. دولت عثمانیه نك الك بیوك محاربه لرندن بری اولان اولتوق بلی مظفریتندن صکره شیین قره حصارى اوکنه مواصلت ایدلدى. اوزون حسنله محاربه نك بدایتندن بری محمود پاشا دیوان هاپونده اولا قره حصار قلعه سنك فتح اولنسی لازم کله جکنی و او قدر مستحکم بر قلعه نك اردونك آرقه سنده، دشمنك النده بر اقلیمی پك مخاطره لی اولدیغنی سویله مشدی. پادشاه بونك اوزرینه حد تلنه رك: « مقصد قلعه لر فتحی دکل، اردولر مغلوب ایتمکدر. » دیمشدی. ایران فاتحنك مغلوبیتندن صکره قره حصار سلطان محمدك ایلك تکلیفی اوزرینه تسلیم اولدی.

فاتح اوزون حسن جنکنده کی موفقیاتندن طولایي ابتدای حربده عسکرک معاشنه محسوباً توزیع ایتدیرمش اولدیغی اون میلیون آقپه ی بخش ایتدی؛ قرق بیکنن زیاده یه بالغ اولان بتون اسیرلرینی آزاد ایلدی. شیین قره حصارندن هر طرفه ظفر نامه لر کوندردی.

پادشاه اوزون حسنه قارشى یوریدیکی ائنده ونديک آمیرالنک قومانداسی آئنده بولنان براهل صلیب دونماسی قره مان ساحلنه مواصلت ایتمشدی. پاپا دردنجی (سیکست) پادشاهک استانبولدن حرکتنی ایشیدنجه فرانسه، آلمانیا واسپانیایي ترکرر علیهنه رفع صلیب ایتمکه تشویق ایتدیکی کبی ونديک وناپولی ایله بر اتفاق مثلث عقد ایلشدی. دیگر طرفدن قره مانده ظهور ایدن اغتشاشات باشلايجه اوزون حسن دخی ونديکه وردوسه برایلچی کوندره رك تدافعی و تجاوزی بر اتفاق مذاکره سنه

وبالخاصه بو ایکی حکومتدن اسلحه ناریه ایله کندی ممالکنده طوپ اذابه سینه نظارت ایچون طوپچی لر ایسته مکه مأمور ایتمشدی . چونکه اوزون حسن بوندن اولکی مغلوبیتلرینه عسکرینک نقصان شجاعتندن زیاده اردوسنده یالکز اسماً موجود اولان طوپلرینک نقصانی سبب اولدیغنه قانع ایدی . وندیک جمهوریتی ایکی یوز طوپچی ایله کلیتی باروت و طوپ کوندرمشدی . بالاخره قره مان ساحلنه مواصلت ایدن متفقین دونماسی آنطالیه ومدلی یی یغما ، از میری احراق ایلمشدی . فقط اوزون حسنک مغلوبیتی وندیک دونماسنک بعض سواحل و جزائر یی یغما ایتمسندن بشقه بر ایش کورمسنه مانع اولدی .

پادشاه اوزون حسن علیهنده کی سفردن عوتندن صکره قره مان والیسی شهزاده سلطان مصطفی ایله کدیک احمد پاشایی بر قاچ قلعه سی هنوز پیر احمد وقاسم بکلرک النده بولنان آطنه طرفلریله آناتولی ساحلنده حربی اتمامه مأمور ایتدی . احمد پاشا سیکین ، سلفکه ، ارمناک ، میان ، موقن قلعه لرینی برر بر ضبط ایتدی . میان محاصره سندن فرار ایدن پیر احمد بک ذوالقدریه طرفلرنده وفات ایتمکله آرتق مملکتده مقاومتیه اقتدار قالمدی . شهزاده سلطان مصطفی ذاتاً خسته ایدی . دوه لی حصارک فتحندن صکره نیکده ده وفات ایدی . قره مان والیکنه قسطنمونی والیسی بولنان سلطان جم تعیین ایدلای .

سلطان جم هنوز اون سکز یاشنده ، منورالفکر ، ممارسات بدنییه مراقلی بر شهزاده ایدی . اون یاشنده ایکن قسطنمونی والیسی تعیین ایدلمشدی . شعره اولان استعدادی - او زمان شاعر لرندن بر چوغنک مسقط رأسی اولان - بوشهرده انکشاف ایتمشدر . ایلک اثری «خورشید وجهشید» عنوانلی بر ایران منظومه حکایتسنک ترجمه سیدر ، که پدرینک

نامنہ اتحاد ایلشدر. اوندن صکرہ سلطان جم بالذات شعر یازمغه باشلامشدر. مصارعده کی مهارتندن، غایت آغیر کرزلری سهولتله قوللانمسندن طولای زماننک برنجی پهلوانی عد ایدیلن شهزاده سلطان جمک دست اداره سنده قره مان شهرلری کلیاً تحت اطاعتہ آندی.

عثمانلی اردوسنک بر قسمی آرنالقدہ وبغدانده حرب قریم سفری ایتمکده ایکن سلطان محمد استانبولده اوج یوز کمیدن مرکب بر دونما حاضر لامقده ایدی. بو دونمانک نرہ یه کیده جکی مجهول ایدی. واقعا ونديک ايله حرب دوام ایتمکده اولدیغندن دونمانک بو حکومتہ عائد آطہ لرہ، مثلاً کریده کیتہ سی احتمالی موجود ایدی. فقط اوصردہ پادشاه ونديکلیلرله مصالحه عقد ایتمک ایستہ یور، استانبولده مذاکرات صلحیه جریان ایدیوردی. نهایت، وزیر اعظم کدک احمد پاشا قریمه کیدرک جنوزلری اوراده اشغال ایلدکلیری موقعدن، از جمله قریم قلعه لرینک اک مهمی اولان کفہ دن طرد ایتمک ایچون امر آلدی.

شمیدیکی نامی «تئودسیا» اولان کفہ او زمان بحر سیاه ساحلنده بولنان ممالکده جنوز تجارتنک آنباری مقامنده ایدی. ایرانک ایپک وپاموخی اژدرخان طریقله کفہ تجارتکاهلرینه کلیردی. قریم خانلری جنوز قونسیرسلرینه بتون تجارتکاهلرینده دهم امتیازلر ویرمشلردی. سلطان محمدک فکر نافذی کفہ یی المقله تجارت عثمانیه نک نه قدر فائده مند اوله جغنی کشف ایتمشدی. فاتح قریمک دولت عثمانیه یه الحاقی لزومی حس ایدیور و اوراسنی - بر ایالت اوله رق دکلسه بیلہ اوامر کذار بر حکومت اوله رق - الحاق ایچون وسیله ده آرایوردی. بو وسیله آزمدت ایچنده بولندی. جنوز ملتندن بر شخص کفہ قایلرینی آچه جغنی پادشاهه عرض ایلدیکندن سلطان محمد وزیر اعظمی قریمه کوندردی.

۸۸۰ تاریخنده کدك احمدپاشانك قومانداسنده کی دونما کفه سورلری اوکنده دمیر آنه رق قره یه ۴۰,۰۰۰ عسکر چیقاردی . شهر اوج کون مقاومت ایلد کدن صکره بلا شرط تسلیم اولدی . قرق بیك کشتی استانبوله کوندرلدی . جنویزلردن بیك بش یوز دلیقانلی یکمچریلر آره سنه ادخال ایدلدی . بالخاصه ایك منسوجاتندن مرکب اولمق اوزره پك چوق مال غنائم آلدی .

کفه نك دوشمسی اوزرینه بحر سیاه ساحلنده کی دیگر قلعه لرك مقاومت ایتلری ممکن دکلدی . آزا ق ومنکوب قلعه لری ده ضبط اولندی . بونك اوزرینه عثمانیلرك (تورید) قطعه سنده حاکمیتلری تمام اولدی . عثمانلی حاکمیتی اوج عصر دوام ایتمش و پادشاهلرك اوامر کذارلری اولان تاتار خانلرینك تاریخی دولت عثمانیه تاریخنه پك زیاده قاریشمشدر .

تیمورلنك قفقاسیه ایله دونهری و بحر خزر ایله بحر سیاه آره سنده کی قیچاق مملکتی ضبط ایتدیکی زمان جنکیز احفادنن توقتامیشی قیچاق حکومتنه اصعاد ایتشدی . توقتامیش بالاخره تیمور ایله اوج دفعه محاربه ایدرك تیمورک قوماندانی ایده قویه مغلوب اولمشدی . ایده قو اون آلتی سنه قیچاق مملکتی حاکم مطلق اوله رق اداره ایتدی . توقتامیشك اوغللری قادر بردی و جلال بردی خانلر پدرلرینك حکومتی استرداده چالیشدیلر . جلال بردی میدان حربده دوشدی . قادر بردی ایده قویی مغلوب ایدلی .

قریم خانلرینك سلسله نسبی جلال بردی یه ، نوغای خانلرینك سلسله نسبی ده ایده قویه چیقار .

جلال بردی باباسنك تختنده طوره مدی . جنکیز احفادنن محمود حکومتی غصب ایتدی . محمود دخی اوزبك ابوالخیره ترك حکومته مجبور اولدی . جیحون نهرینك ایلرینسده کی ممالکک اوزبك پرنسلی ابوالخیر

نسلندندر . قپچاق حکومتی طلب ایدن متعدد مدعی سلطنتلر آره سنده کی اوزون محارباتدن صکره حاجی کرای قپچاق تختک صاحب یکانه سی اوله رق قالدی . لیکن اونک وفاتنده اون ایکی اوغلی بابالربنک میرانی ایچون محاربه یه باشلادیلر . بونلردن بعضلری اون آی ، بعضلری ده اوتوز کون سلطنت ایتدیلر . احمد کرای برادرربنک هپسنی مغلوب ایلدی . منکلی کرای کفهدہ جنویزلره التجایه مجبور اولدی .

ایشته ، قپچاق دولتی منازعات داخلیه ایله انقسامه دوچار ومملکت خراب اولدیغی صرهدہ عثمانیلر کفهی ضبط ایتدیلر ومنکلی کرای اسیر آلهرق استانبوله کوندردیلر . قریم علما واشرافی پادشاهه مراجعت ایدرک مملکتلربنک اغتاشادن قورتارلمسنی استرحام ایتدکلرندن منکلی کرای قریم خانی نصب ایلدی ؛ بر مقدار عساکر محافظه ایله قریمه کوندردی . بوندن صکره قریم دولت عثمانیه نک ویرکو ویرر بر ایالت متازه سی اولدی .

فاتح دورنده بوسنه وهرسکک فتحی اوزربنه اوروپایه
 طوغری میخال اوغلی علی واسکندر بکلر وترخان
 آقینلر

زاده عمریک کبی سرحد بکلری طرفندن اجرا ایدیلن آقینلر کسب اهمیت ایتمشدی . ونیدیک ایله محاربه دوام ایتدیکی صرهدہ بوسنه بکلری (اسقلاوونیا)، (قارینتیا)، (اشتیریا) قطعهلرینه چاپول ایدیورلر؛ (لایباخ) و (نوشتاد) ه قدر کیدیورلردی . اوره نوس زاده اسحق پاشا (خرواتستان) و (قارنیولا) یی یغما ایتمشدی . عثمانلی آقینجیلری (آپ) طاغلی اتکلرینه ، ایتالایانک (ایزونزو) نهری کنسارینه قدر کیتمکه باشلامشلردی . مالقوج اوغلی بالی بک مجار-ستانک (وارادین) شهرینه قدر ایلریشدی . کدیک احمد پاشانک (پوی) ساحلنه هجومی ده بو آقینلر جمله سندندر .

بو آقینلر بککر ایچون مال واسیر آلمق نقطه نظرندن منفعتلی ، فقط دولت عثمانیه نك منفعتنه مغایردی . همجوار ممالکده آقینجیلردن تحفظ ایچون بر چوق قلعه لر انشا ایدیلور ، عثمانیلر علیه شدتلی بر خصومت پیدا اولیوردی . بعضاً آقینلر بیوک محاربه لری انتاج ایدردی . مع مافیه بحارلر ، ایتالیانلر ، اسلاولر ، آلمانلر فرصت بولدجه عینی صورته حرکت ایدوب عثمانیلردن قات قات زیاده وحشت کوسترلردی . بردفعه میخال ، اوره نوس ، مالقوچ زاده لر کبی عثمانلی بککری بحارستانک جنوبندن کچه رک اردل قطعه سنه کیرمشلر ؛ فقط (استغان باتوری) ایله متفقرینه مغلوب اولمشلردی . دشمن امراسی محاربه دن صکره بر ضیافت ویرمشلر ، سوفره لری مقتولین و مجروحین اوزرینه قوردیرمشلردی . ایچدکلی شرابه انسان قانی قاریشدیرمشلردی .

ردوسده یرلشمش اولان سن ژان شوالیه لرله
بلغراد ردوس عثمانیلرک مناسباتی چلبی سلطان محمد زمانندن باشلار . سلطان محمد اول از میری جنید بکدن ضبط ایلدیکی وقت بوشهرک قربنده سن ژان طریقتنه عائد قلعه یی دخی آلمش و بوکا مقابل آلیقارناس [شمدیکی بودروم] لیمانی شوالیه لره ویرمشدی . فاتحک دهای بلندی آطه لر دکزنده بر موقع مهم اولان ردوسک اهمیتنی پک چابوق تقدیر ایتمش اولدیغندن پادشاه استانبولک فتحنی متعاقب بو جزیره یی ضبط ایتمک ایسته دی . شوالیه لرک استاد اعظمی پادشاهک ویرکو اعطاسی تکلیفی رد ایتدی ؛ بوندن صکره عثمانلی دونماری کرک ردوس سواحلی ، کرک بو جزیره قربنده بولنان دیگر آطه لری تخریبدن خالی قالدی .

وندیک ایله عقد صلحدن صکره بو هجوملرک آرقه سی کسیلدی . لکن مدلی ، یعنی ، امروز ، طاشوز ، سهادیرک ، آغریبوز کبی آطه لری ضبط

ایتمش اولان عثمانلیرک بحرسفید حاکمیتی تأمین ایچون ردوسدن واز
 کچمیه جکلری شهبه سز اولدیغندن استاد اعظم (پیه ردویوسون) بر هجوم
 احتماله مبنی حاضر لانیور واوروپایه خبرلر کوندره رک بتون خرسیتانلری
 خرسیتانلغک بر مرکزی اولان ردوسک مدافعه سنه اشتراکه دعوت
 ایدیوردی. بر آراق قره مان والیسی شهزاده سلطان جم ردوسه بر ایلچی
 کوندره رک هر سنه ویرکویرملک صورتیه جزیره نک صلحاً دولت عثمانیه
 ربطتی تکلیف ایتدی. شوالیه لر پالاق مقامه مربوط اولدقلرخی و بناء علیه
 - ولوکه خرسیتان اولسون - هیچ بر حکمداره ویرکو ویره میه جکلرخی
 جواباً بیلدیردیلر. اوصرده ردوس ایچون اوروپانک هر طرفندن شوالیه لر
 قوشوب کلپور ایدی.

نهایت، ۸۸۶ تاریخده مسیح پاشانک قومانداسنده کی عثمانلی دونماسی
 جزیره ساحله عزیمت ایدرک ردوس شهرینک بر میل غربنده قره یه عسکر
 چیقاردی. عثمانلی عسکری در حال اوراده بولسان طاغک اوزرنده
 وانکلرنده اخذ موقع ایتدکن صکره پک متین اولان استحکاماتی طوپ
 ایله دو ککه باشلادی. قلعه ده آچیلان رخنه لر در حال تعمیر اولیور؛
 بتون شوالیه لرله کویلیلر، قادینلر، چو جقلر مدافعه ایچون چالیشیورلردی.
 اوچ آی دوام ایدن بو قانلی محاصره ده عثمانلی عسکری « زنجیردن قورتولمش
 آرسلانلر کبی » هجوم ایتدی. فقط ردوسک فتحی ممکن اوله مدی.
 مورخلر مز بو موفقیت سزاکه هجوم ایله آلنه جق شهرک یغماسنی عسکره
 منع ایدن مسیح پاشانک خبیسلکی سبب اولدیغنی بیان ایدرلر. مسیح
 پاشا استانبوله عودتنده کلیولی سنجاق بکلکینه تنزیل ایدلادی.

فاتح بو موفقیت مزلیکی عسکرک کندی قومانداسی آلتنده بولغامسنه
 عطف ایتدیکنندن بالذات ردوسه عزیمته قرار ویردی. بتون قیش

موسمی تدارکات ایله کچدی. ایلک بهارده سنجاق و اوتاغ هایون اسکداره کچیرلدی. بو حال آناطولی جهته بر سفره دلالت ایتمکده ایدی. فقط او صهرده ذوالقدریه بکلکی مسئله سندن طولانی دولت عثمانیه ایله حال اختلافده بولنان مصر اوزرینه می، یوقسه رودوس علیه می اجرا ایدیه جکفی هیچ کیمسه بیلیموردی. پادشاه راحتسز اولدیغنه باقیه رق اسکداردن ککبوزه طوغری حرکت ایتدی. فقط یولده خسته لغی زیاده لشدی، توقفه مجبور اولدی، اللی ایکی یاشنده ایکن وفات ایلدی [۸۸۶ — ۱۴۸۱] .

فاتح سلطان محمد فراته قدر آناطولی، طونه یه قدر بالقان شبه جزیره سی فتوحاتی ا کمال ایتش ایدی. یالکزاییکی نقطه ده موفق اوله مدی: بلغراد و ردوس. حالبوکه بلغراد اولمدقجه دولت عثمانیه طونه یه تماماً صاحب عد اولنه ماز، ردوس الده بولمدقجه آطه لر دکزینه حکم ایده من و بنه علیه بحر سفیده امنیتنی تأمین ایلیه مزدی.

فاتح زماننده دولتك تشکیلات اساسیه سی حقنده بر **فاتح تشکیلات** قانوننامه تنظیم ایدلمشدر. بو قانوننامه اوچ قسمة **اداریه سی** آیرلمشدر. برنجیسی دولتك بیوک مأمورلرینک مراتبندن، ایکنجیسی عادات و تشریفاتدن، اوچنجیسی جرائمه مترتب جزالره خدمات حکومته تخصیص اولنان عواندندن بحث ایدز.

عادات و تشریفات قسمتك الك شایان دقت اولان نظاملری بایرام مراسمنه، سفره هایونه، مهر سلطانی یه، مراسم سلطنت اصولنه عائددر. بوراده بایرام کونلری دیوان او طه سننده کی عمومی میدانده بر تخت قوروله جنی و راسمه دست بوسینک اوراده اجرا اولنه جنی؛ وزیرلر، قاضی عسکرلر و دفتر دارلرک پادشاهک آرقه سننده طوره جقلری و معلم

سلطانینک وزیر لر ، قاضی سکرلرک اوکنده قائم بولنه جنی ؛ چاوشلر ایله
 - معاش مخصوصلری اولسون اولسون - سنجاق بکلری و متفرقلرک ال اوپمک
 رسمنی ایفاایده جکلری بیان اولنیور. اولجه پادشاهلر وزیرلرینی سفره یه قبول
 ایدرلرکن فاتح سفره هایونه هیچ کیمسه یی قبول ایتمه مک نظامنی وضع ایتمشدر.
 قدرت عالیه نشانہ سی دیمک اولان مهر هایون وزیر اعظمک
 محافظہ سندہ بولنوب خزینہ نک دائماً اونک و دفتردارلرک حضورندہ آچیلوب
 قیامسی اصول اتخاذ ایدلمشدر. او زماندن بری مهر هایونک بر ذاتہ
 تودیی وزارت عظمانک اوکا توجہنی تضمن ایدر. خزینہ او طہ سنک
 تختیمندن ماعدا احوالده مهر هایونک استعمالی صدر اعظمک پادشاهہ
 خطاباً یازہ جنی عریضہ لره تخصیص اولنمشدر. بتون معروضات اولجه
 وزیر اعظمک التدن کچردی.

قانوننامہ نک اوچنچی قسمندہ جرائم مختلفہ دن ہر بری ایچون آلہ حق
 قان بہاسندن ، خرستیان حکومتلری طرفندن تأدیہ اولان ویرکولردن ،
 وزیر و دفتردارلرلر بو ویرکولردن حصہ لرینی آلہ جقلرندن ، وزیر ، بکلر بکی ،
 دفتردار و سنجاق بکلرینک مخصوصاتندن بحث ایدلمشدر.

قانوننامہ نک برنجی قسمی حکمنجہ ہیئت دولت درت ارکاندن مرکب
 اولہ رق تنظیم ایدلدیکی کبی بیرون آغلاری دنیلن عسا کر عثمانیہ امرا و ضابطانی
 ایلہ اندرون هایون آغلاری دخی ترتیب اولنمشدر. ارکان اربعہ دولتک
 سلسلہ مراتبی بروجہ آتی ایدی :

۱. - امور و مصالح عامہ دن مسئول اولان وزرا . بونلر وقتیلہ بر
 ایکن صکرہ لری ایکی اوچہ و فاتح زمانندہ درده بالغ اولمش و مسند
 صدارتی حائز اولان وزیر اعظم پادشاہک وکالت مطلقہ سنی حائز بولنمشدر.
 وزرا دیوان هایونہ داخل ایدیلر. اوچ توغ طاقوب آلتون دوکمہ لی وقیشین

سمور كورك قابلی قطیفه قفتان كیرلر ؛ بکیر بکیلرایکی، سنجاق بکیری برتوغ طاقارلردی . وزرانك تخصیصات سنویه سی اولجه ۱۰۰,۰۰۰ آچه ایکن مؤخرآ ۲۰۰,۰۰۰ آچه یه ابلاغ اولمشدر . تیمارلرینك ایرادی ایسه بو تخصیصاتك بش آلتی مثل اییدی . صدر اعظم پادشاهك وکیل مطابق اولسنه نظراً بونك وظائفی دیگر وزرانك کندن پك فرقلی ومهمدر .

۲. — قاضی عسکرلر . دعا یی اك صوك درجه ده رؤیته مأمور اولان قاضی عسکر اولجه بر ایکن فاتح زماننده بری روم ایلی، دیکری آناتولی جانبنده کی دعاوی ایله مشغول اولق اوزره ایکی یه ابلاغ اولمشدر . اوزمان مفتی قاضی عسکرلرک واستانبول قاضیسنك مادوننده اییدی . مؤخرآ سلطان سلیمان قانونی زماننده مقتیلک مأمورین شرعیه نك جمله سنه تقدم ایتدیرلش و سلطان محمود اول دورنده استانبول مفتیسنه شیخ الاسلام عنوانی ویرلشدر . دیوان هایونده حاضر بولنان قاضی عسکرلر هر کون کندی قوناقلرنده دیوان عقد ایدرک دائره مأموریتلری داخلنده کی قاضی ومدرس لری تعیین ایدرلردی . یالکیز استانبول، بروسه وادرنه قاضیلرینك مواجب مخصوصه لری بولندیغدن بونلر طرف صدارتدن تعیین اولنورلردی .

۳. — دفتر دارلر . دیوان هایونه داخل اولان دفتر دارلرک امور مالیه حقنده کی تقریرلری صدر اعظم طرفندن تدقیق و قبول اولمنه دن پادشاهه عرض ایدیه مزدی . فاتح زماننده روم ایلی ایچون بر دفتر دار، آناتولی ایچون بر دفتر دار معاوینی موجود ایکن بالا آخره بونلرده درده چیقارلشدر .

۴. — نشانچیلر . بونلرک وظیفه لری فرمان و براتلرک بالاسنه طغرای هایون کشیده سندن عبارت اولوب کاتب دولت صقیله دیوان هایونه

داخل اولورلردی . امور خارجه یه مأمور رئیس الکتابک نشانجی یه تقدیمی
بالا آخره واقع اولمشدر .

یوقاریده تعداد ایدیلن ارکان دولت وزیر اعظم قیوسی ، یعنی باب عالی نی
تشکیل ایتکده ایدی . بوندن صکره بیرون و اندرون آغلاری نامیله ایکی
صنف دهه کلکده ایدی . بیرون آغلرینک برنجیسی یکچیری آغاسی
ایدی که قوه اجرائیه نك رئیس اولمق صفیله وزیر اعظمک امری آلتنده
ایدی . طوبچی ، لوازم ، نقلیه واردوگاه قوماندانلری دیمک اولان طوبچی
باشی ، خبه جی باشی ، طوپ آرابه جی باشیسی ، مهتر باشی بیرون آغلرندن
معدود ایدی . بونلردن بشقه پادشاهک آتک یاننده یوریمک امتیازینه
مالک اولان اون ایکی رکاب هایون ضابطی [بر میر علم ، دزت قوجی
باشی ، ایکی میراخور ، بر چاشنیکیر باشی ، ایکی طوغانجی باشی ، ایکی
آتمه جی باشی] دخی بیرون آغلرندن ایدی .

اندرون آغلرینک رئیس قیو آغاسی ، یعنی باب هایون آغاسی ایدی .
بو آغا بیاض بر خادم [آق آغا] اولوب هر وقت پادشاهه رفاقت ایدر ؛ یالکز
پادشاه آوه کیتدکجه ویا اوزاق بر محله بحرأ عزیمت ایلدکجه سرائیک
محافظه سی خدمتنده قالیردی . اندرون آغلرینک ایکنجیسی خزینه دار
باشی ، اوچنجیسی کیلارجی باشی ، دردنجیسی سرائیک محافظه و اداره سیله
مکلف اولان سرای آغاسی ایدی .

بونلردن بشقه پادشاهی صویوب کیندیرمک خدمتیه مکلف اولدیغندن
ذات شاهانه ایله طوغریدن طوغری یه مناسبتده بولنه رق آمری اولان
قیو آغاسنه مساوی بر موقع احراز ایدن خاص اوطنه باشی [باش
مایینجی] ، پادشاهک قلیجی کوتورن سلحدار ، مبراسمده پادشاهک
خروانیسی کوتورن چوقه دار ، اوزنکی پی طوته رق پادشاهک آته بینمسنه

معاونت ایدن رکابدار اندرون آغلرینک ایکنجی صنفی تشکیل ایتکده ایدیلر. سرایده ایکی نوع محافظ بولنه رق قبولرک و حولیلرک محافظه سی قوجیلر ، باغچه لرک و قایق لرک محافظه سی بوستانجیلر تو دیع اولنمشدی. قوجیلرک رئیس اولان قوجیلر که یاسی بیوک مابینجی دیمکدر . سرای مشیری دیمک اولان چاوش باشی دیوان کونلری ارکان دولتک اوکندن کیدردی . سیاه خادم لرک رئیس اولان قیزلر آغاسنک اکثریا بیرون ورکاب آغلرندن زیاده نفوذی واردی .

سلطان محمد ثانی زماننده اردو، عدلیه، سرای و خزیننه نک تشکیلات اساسیه سی بو صورتده ایدی . ولایاتک اداره سی - تیمار و زعامت صاحب لرینک رئیس لری اولان - سنجاق بکرینه ، بکلیر بکلیره عائد ایدی . او زمان عثمانلی دولتنک روم ایلی قطعه سنده کی ۳۶ سنجاقنک هر برندن ۴۰۰ سواری چیقاردی . اردونک سواری و پیاده قوه عمومیه سی یوز بیگ کشیدن فضله ایدی. دولتنک واردات معتاده سی ایکی ملیون دوقه آلتوتی متجاوز ایدی . بو تخمینده یالکیز ویرکیلر، خرچلر، کمرک رسم لری، رسوم سائره ، حکومات مختلفه دن استیفا اولنان مقطوع ویرکولر و معدن حاصلاتی داخلدر .

سلطان اورخان دولت عثمانیه ده ایلیک تأسیس ایلدیکی مدرسه ده مدرسلکر وضع و ییلدیرم بازید قاضیلرک آله جقلری رسوم مقدارینی تعیین ایلش ایسه ده هیئت علمیه نک تشکیلاتی آنجق سلطان محمد ثانی زماننده باشلار . فاتح کندی نامیله یاد ایدیلن جامعک اطرافنده « ثمانیه صحن » دینلن سکزمدرسه نی تأسیس ایتدی. بونلرک مدرسلرینک تحصیصاتی اوزمانه قدر دیگر مدرسلره ویریلن مقداردن زیاده ایدی . شعبات تعلیمیه و مراتب علمیه تشکیلاتی وزیر اعظم محمود پاشانک اثریدر .

مدرسه لرك مداومینی «تمه» تعبیر اولنان بنای مخصوص لرده اطعام واسكان اولورلردی . درس لری صرف ، نحو ، منطق ، کلام ، آداب ، بدیع ، معانی ، بیان ، هندسه ، هیئت ایدی . بو علومک هیئت مجموعه سنی تحصیل ایدنلر «دانشمند» عنوانی آله رق بوصفله ویا «معید» عنوانیه دها آشاخی درجه ده کی مدرسه لرده معلم اولورلر ؛ مدرسلک و ملالق منصب لینه ارتقا حقندن کندیلرینی اسقاط ایدرلردی . بو خدمت لره انتخاب اولنه بیللمک علم حقوق تحصیلنه و درجات مختلفه علمییه نائل اولمغه منوط ایدی . بوکا نامزد اولانلره « ملازم » دنیلریدی . یدی سنه قدر کلام ، فقه ، حدیث و تفسیر او قویان و شدتلی بر امتحانده موافق اولان ملازملر مدرس و قاضیلک خدمات عالییه سنه کسب استحقاق ایدرلردی .

مکاتب تشکیلی و مدرسلره اک یوکسک مراتب شرعیه مسلکک کشادی حقنده کی مساعی فاتح زماننده علومک ترقی سنی ، علمانک کمال حرمته مظهریتنی اثبات ایلر . « خواجه سلطانی » خدمتی اک بیوک مرتبه ده کی علمایه مخصوص بر منصب اولمشدی .

خلیل پاشا فاتحک ایلک وزیر اعظمی ایدی . چاندارلی
خلیل ، محمود و کمرک
 عائله سندن کلن صدر اعظم لرك دردنجیسی ایدی .
احمد پاشا
 خلیل پاشا سلطان مراد ثانینک تکرار جلوسلری مسئله سنده خلی انترقه لر چویرمش ، بوصورتله فاتحی کوچنیرمشدی .
 دیگر طرفدن پادشاهی استانبول محاصره سندن منعه چالیشیر ، روملردن رشوت آلیردی .

حتی روایات تاریخیه دندرکه فاتح بر کیجه صباحه قارشی صدر اعظم خلیل پاشایی نزدینه چاغیردر . بو وقت سزدعوتدن فوق العاده تلاش ایدرک بتون بتون جانندن قطع امید ایله یانه بر آز آلتون آلیر ؛ حضور پادشاهییه عرض ایدر . پادشاه صدر اعظمک بو تلاشی کورنجه :

— لالا، امین اول، نه خزینہ کی ایسترم، نه حیانتکہ قصدم واردر .
مرادم یا لکڑ استانبولک فتحنه معاونتکدر . بو یا صدیقی کوردکی ؟ او یقوسزلقه
دونه دونه بو حاله کتیردم . کیجه، کوندوز خیال ایتدیکم استانبول فتحی حاصل
اولدجه راحت ایتک احتمالم یوقدر

دیر وپاشانک مواعیدی اوزرینه :

— روملرک یاره سندن صاقین !

امر تهدید آمیزله ختم کلام ایلر [*] .

پادشاه استانبولک فتحی متعاقب شهرک مصرانه مقاومت ایتمی سببی
سؤال ایتمی اوزرینه روم ارکان دولتمدن غراندوق نوتاراس خلیل
پاشانک ایمراطوری ثباته تشویق ایدن مکتوبلری سبب اولدیغنی بیان
ایتشدرد . فاتح وزیراعظمی قرق کون قدر حبسدن صکره اعدام ایتدیردی .
یوزیکرمی بیگ دوقه دن مرکب خزینہ سی مصادره اولندی . طرفدارلری
اولان یعقوب و محمد پاشا لار منصبلرندن عزل و نفی ایله بتون ماللری
ضبط ایدلدی .

مورخلر مز خلیل پاشانک قتلی مناسبیله چندرملی سلاله سنک خاندان
سلطنته متوازیاً گسب قوت ایتمنی سیاستاً غیر جائز کوریرلر . « اوراق
پریشان » دیورکه :

فاتح خلیل پاشانک قتلیله برظلم ارتکاب ایتدکدن بشقه هم مملکتی اوپله بر
دشمن داخلینک وجودندن تطهیر ایلدی ، همده ایلریده وقوعی مقرر اولان بر
بیوک مخاطره نک اوکنی آلمش اولدی . چونکه علاءالدین پاشانک وفاتندن صکره
وزارت قرناً بعد قرن چانداریلرده قرار ایتمش بو صورتله سلطنته بیاغی ارثاً
نائل مسند اولور برشریک پیدا اولشدی . اکر بو حال دوام ایتسهیدی یاچوجق
وپا اقتدارسز برپادشاه ظهور ایتدیکی کبی چانداریلرده اتا بکه شکله کیرمک و آندن
حاصل اوله جق تفرقه ایله دولت الدن کیتمک ضروری ایدی .

[*] اوراق پریشانندن .

محمود پاشاہ کالجہ ؛ بر روم ایلہ ایلیریالی بر والدہ دن متولد دوشیرمہ چو جو غی ایکن ایکی دفعہ دہ اون درت سنہ [۸۵۹ - ۸۷۲ و ۸۷۷ - ۸۷۸] صدارت ایتش و فاتحک فتوح عظیمہ سنہ اشتراک ایلہ شان عثمانی بی اعلا یہ چالیشمش ایدی . پادشاہ اوزون حسن سفرندن استانبولہ عودتندہ محمود پاشائی ایکنجی دفعہ اولہ رق عزل ایتدی . پاشا بلغارستاندہ اوزونجہ اووم خاص کوبنہ چکیلدی .

پادشاہک محمود پاشا حقندہ کی انفعائتہ متعدد سبیلر وار ایدی : اولاً ، اشقودرہ اوزرینہ واقع اولان برنجی سفرده وبالاخرہ اوزون حسن جنکی ایچون اسکداردہ تحشید ایدیلن وقیش اورتہ سندنہ سفرہ کیدہ جک اولان اردونک قوماندانغنی رد ایتک صورتیلہ اوامر پادشاہی بہ مخالفتی . ثانیاً ، حرکات حربیہ یہ شین قرہ حصاری قلعه سنک ضبطیلہ باشلانسی خصوصندہ کی اصراری . ثالثاً ، اوتلق بلی محاربہ سندن صکرہ دشمنک کندی ممالیکی ایچریسنہ قدر تعقیب ایدلمہ سنی تکلیف ایلمسی و بوتکلیفک پادشاہک رأینہ مغایر اولہ رق غلبہ ایتش اولمسی . رابعاً ، مغلوبلرہ ساحت وعاطفت ایلہ حرکت ایتسی وبالخاصہ بوسنہ قرالک حیاتنہ طوقونامسی وقرہ مان اوغلی اسحاق بکک فرارینی تسہیل ایتسی .

الحاصل محمود پاشانک برچوق احوالہ اظہار ایتش اولدینی فکر استقلال پادشاہک غضبی تزیید ایتش وحسود اقبالی اولانلرک اسنادات بدخواہانہ سی نہایت سبب قتلی اولمشدر : شہزادہ سلطان مصطفی محمود پاشائی سومزدی . اوتہ دن بری آرہ لری آچیق ایدی . شہزادہ نک ارتحالندہ محمود پاشا انزووا کاهندن تعزیه ایچون استانبولہ کلدی . خصملری ینہ وزیراعظم اولمسندن قورقورلردی . شہزادہ ایلہ خصوصتنی ، پاشانک شمدی سوبندیکنی فاتحہ سوبلدیلر . خانہ سنہ کوندریلن برجاسوس محمود

پاشانك اوزمانك عادتى موجبنجه اجرا ايديلن ماته اشتراك ايتمه رك ياضلر
كينمش اولديغى حالده شطرنج اوينامقده اولديغى خبر ويردى. اون يدى
كون يدى قلهده حبس اولندقدن صكره اعدام اولدى [۸۷۹].

محمود پاشا محب علم و معرفت ايدى. ارباب علم طرفندن بر چوقا اثرلر
اونك نامنه اتحاف ايدلمشدر. خيرات و حسنانى چوقدر. استانبولده ،
صوفيه ده كندى ناميله ياد ايديلن جامعلر ، حاملر الان موجوددر. محمود
پاشا شعر دخی سويلر و « عدنى » تخلص ايدردى .

استانبولده انشا ايتديرمش اولديغى مدرسه نك ختام بناسنده دانشمندلره ايكيشر
عمامه ، قيشلق ايچون بررطوب يوك قاش ، يازلر لباس ايچون بررطوب ارغوانى
قاش ، بشريوز آقچه هديه ايتمى . هفته ده بركون علمايى سفرده سنه دعوت ايدر
ودائما يكمده - برچوغي آلتوندن اولان - نخود دانه لريله قاريشيق پلاو بولنوردى .
هر كس قاشيغنده بولدينى قسمتته صاحب اولوردى . محمود پاشا سفره يه اونور بركن
• نائل ثروت اولان هر كيمسه نك آغزنده دائما ابدال ايچون آلتون بولميدر »
ديك معتادى ايدى . بو معنيدار و محق سوزلرى برقاچ دفعه ده حضور پادشاهيده
صرف ايلمىدى .

بركون پادشاه برملايه وقتيله قريمك تدريس علوم ايله مشغول درت يوزدن
زياده علماسى بولدينى حالده سرعتله زوال بولسنگ فكنرجه نه دن ايلرى كلش
اولديغى صورمشدى . ملا جواناً قباحتك قريمه كى اك صوك وزيرده اولديغى
وبو وزيرك علمايه حقارت ايدرك جنت كى اولان قريمى خراب برچوله تحويل
ايلديكنى سويلدى . سلطان محمد بونى وسيله اتخاذا ايدرك صدر اعظمه علمايه
نه يولده معامله و علومى نصل حمايه ايتك لازم اولديغى اخطار ايلدى . محمود پاشا
وزير اعظمك قباحتى پادشاهك دها لياقتلىسى صدر اعظم پائمه تده كى خطاسنگ
بر نتيجه طبعيه سى اولديغى جوانى ويردى . صدر اعظمك بويله سرستانه و پادشاهك
خوشنه كيتيه جك بر صورتده اداره كلام ايتمى ده موت خيغنگ تعجيلنه آرز
ياردى ايتدى .

محمود پاشا اعدام اولماز دن اول وصيتنامه سنى ترتيب ايلدى . اوراده شو

سوزلر بولور : « بن پادشاهك قپوسه بر آت ، برقلیج ، بش یوز آچه ایله کلدیم . او وقتدن بری اکتساب ایتمش اولدیم هر نه مالم وارسه پادشاهکدو . او غلم محمد بک حیاتتی محافظه ایتمشی کندیسندن نیاز ایلرم . اوقافی دخی محافظه ایلیه جگنی امید ایدرم . [*]

محمود پاشا اوزمان دخی بین الحلق بر شهید مظلوم اوله رق تلی ایدلمشدر . فاتحک بر صدر اعظمی ده کدک احمد پاشادر . کدک احمد پاشا بکیچری اوجاغندن تیشمش ، فرط شجاعتیله تمیز ایتمش ، بکربکیک ووزارتی زماننده حسن خدمتی کورلمش ، درت سنه قدر مقام صدارتده قالمشدر . احمد پاشانک محاربات وفتوحاتی پک چوقدر : قره مان اوغللری محاربه سی ، سلفیکه وارمناک قلعه لرینک ، قریمک فتحی ، آرن اوودلق محارباتی ، جنوبی ایتالیا سواحلنه آقین ، سلطان بایزید ثانی زماننده سلطان جه قارشی وقوعه کلن محاربات .

کدک احمد پاشا سلطان بایزید زماننده رقیلرینک اتهامات واسناداتنه قربان کیتدی [۸۸۷] . استانبولده اونک نامنه نسبتله یاد اولنسان بر محله وارددر .

۳

بایزید ثانی و سلیم اول

سلطان محمد ثانینک وفاتی متعاقب صدر اعظم قره مانى
 محمد پاشا امور دولتی حسن اداره ایده مدی . اولاه
 پادشاهك وفاتی یکیچریلردن کیزلمک ایستدی ؛
 راحتسز لغندن طولانی استحمام ایچون سرایه کیده جگنی اعلان ایتدیکی
 حالده جنازه سنی هان بتون امرا وارکان ایله کویا کیزلیجه استانبوله نقل
 [*] هامه ر ترجمه سندن .

بایزید ثانینک

مبارسی

ایتدیردی . پادشاهك وفاتی شهرده شایع اولدی . بر از صكره بالطبع
يكيچريلر دخی حقیقت حاله واقف اولدیلر .

صدر اعظم يكيچريلرك اسكداردن استانبول جهته كچملىنى منع ایچون
نه قدر قالیق وكمی وارسه كافه سنی استانبوله كوندردی . دیگر طرفدن
عصیان ایتملرندن قورقیلان يكيچريلر بعض وزرا طرفدن تحريك ایدیلور دی .
از جمله اسحق پاشا صدر اعظم اولمق ایستیوردی محمد پاشانك ولی عهد
سلطان بایزیدك یرینه سلطان جمی تخته چیقا . ق ایستدیكنی ، سلطان
جك كلیبولیدن استانبوله قولایجه كله بیلیمسی ایچون يكيچريلرك اسكدار
جهتنده براقیلوب استانبوله كچملى منع ایدلدیكنی ادعا ایدیلور و كندیسی
صدر اعظم اولورسه عسكرك یومیه سنی آرتیره جتنی تعهد ایلوردی .

نهایت اردوگاهده کی عسکر اختلال ایتدی . يكيچريلر پندك
اسكله سنده کی كیمیره ینه رك استانبوله كلدیلر ؛ صدر اعظم محمد پاشانی
قتل ، بعض زنكینلرك خانه لرینی و موسوی محلاتنی یغما ایدیلر .

صدر اعظم قره مانى محمد پاشانك آماسیه ده بولنان ولی عهد سلطان
بایزیده پدرینك وفاتی خبرینی ایصال ایچون ساعی مخصوص چیقاردیغی ،
فقط شهزاده سلطان جمه میل و محبتی اولدیغدن دیگر بر ساعی بی دخی
قره مانه كوندردیكى روایت اولور . آنجق بوروایت طوغری اولمسه
كر كدر . چونكه ولی عهده خبر كوندردكدن صكره سلطان جك دعوتی
معاسز اولور .

سلطان جمه كوندربلن ساعینك یولده سلطان بایزیدك انشته سی آناطولی
والیسی سنن پاشا طرفدن بالتصادف توقیف و قتل ایدلدیكى روایت
ایدیلور . بو ساعینك یا سلطان جم بندگانندن بری طرفدن كوندردیكنی ،
یا خود سنن پاشانك پادشاهه حلول ایچون بویه بر ادعاده بولندیغی
قبول ایتك ده اوافقدر .

قرہمانی محمد پاشانک قتلندن صکرہ اسحق پاشا پادشاہ کلنجہ یہ قدر اداره امورہ مأمور اولدی . سلطان بایزیدک اوغلی قورقود ، سلطان جک اوغلی اوغوزخان - تأمینات مخصوصہ اوله رق - سرایدہ بولنیورلردی . قورقود سلطان پدرینک مواصلته قدر دولت قائمقامی اعلان ایدلدی . سلطان بایزیدثانی آماسیہ دن اسکداره کلدی . یکچریلر آرتق عاصی بر قوۂ عسکریه ایدی . یکچریلرله طولو صندالر اسکداردن استانبوله یکمکده اولان پادشاہک قادر غه سنی صاردیلر . اسحاق پاشانک رقیبی اولان مصطفی پاشانک تبعیدی ایستہ دیلر . سلطان بایزید قرہ یہ آباق باصمه دن یکچریلرک بتون مسئولرینی اسعاف ایدلدی . مصطفی پاشا اسکداره یکچریلر . پادشاہ سرای قپوسنه واصل اولدینی زمان یکچریلر وزیر اعظم محمد پاشایی اعدام و شهری یغما ایتیش اولملرندن طولایی عرض معذرت ایتمکله بر ایر بخشش صورتندہ تخصیصانلرینک تزییدینی طلب ایدیلر . پادشاہ یوکده مساعدہ ایتدی . یکچریلره ویریلن جلوس بخششک ایکنجی مثالی بودر .

ایرتسی کون فاتحک جنازه آلائی ترتیب ایدلدی . وزارت عظمایه اسحاق پاشا تعیین اولندی .

قرہمان والیسی اولان شهزاده سلطان جم پدرلرینک **شہزادہ سلطانہ جم** ، ارحالی و وزیر اعظم محمد پاشانک اعدامی خبری **ایا و سکنجی مارل** اوزرینہ درحال بر مقدار عسکر طویلا یہ رق بروسہ جوارینہ کلدی . سلطان بایزید طرفندن ایاس پاشانک قومانداسی آلتندہ کوندریلن عسکر ایله شهزادہ نک عسکری آره سنده بر محاربه وقوعہ کلدی . ایاس پاشا ایله عسکرک بر قسمی اسیر دوشدی . بونک اوزرینہ اوزمانہ قدر قبولرینی طرفینہ آچیان بروسہ شهری سلطان جمی قبول ایتدی .

سلطان جم بروسه ده اون سکز کون قالدی، نامه سکه ضرب ایتدیردی.
خطبه او قوتدی [۸۸۶]

سلطان بایزید اردوی هایون ایله ازمیددن یکیشهر اووه سنه کیتدی .
محاربه دن اول شهزاده نك لالاسی یعقوب بك آناتولی بکاربکی اوله جنی
وعدیله پادشاه طرفه جلب ایددی . سلطان جم بیوک خاله سی اولان
چلبی محمد سلطانک حرمی ساجوق خانونی پادشاهک نزدینه کوندردی
وپادشاهک روم ایلی جهته ده قاله رق کندیسنه آناتولینک بر اقله سنی
تکلیف ایتدی . بو تکلیف قبول اولمندی . وقوعه کلن محاربه ده یعقوب
بك کزیده عسکرک بر قسیمیله پادشاهک اردوسنه التجا ایتدیکندن سلطان
جم مغلوب اولدی ، قونییه قاجدی ، اوراده بولسان عااله سنی آلدقندن
صکره سوریه طریقله مصره کیتدی ، مصر سلطانی (قایت بای) طرفدن
حسن قبول کوردی .

سلطان جمک مغلوبیتی اوزرینه استانبوله عودته قرار ویرلدی . فقط
یکچیریلر ایاس پاشا عسکرینه شهر قپولرینی آچیان بروسه لیلرک تأدینی ،
چارشی وپازارک یغما ایدلمسنی طلب ایتدیلر . پادشاه شهرک کندیسنه
باغشلا نمنسنی طلب ایتدیکی حالده یکچیریلرینه اصرار ایلدیلر . نهایت ، بهر
نفره بیك آقچه ویریلرک پایتخت قدیم دولت یغمدان قورتارلدی .

اولجه اوزون حسنه التجا ایتمش اولان قره مان اوغلی قاسم بك
بو صره ده قونییه طرفلرنده ظهور ایدرک سلطان جم ایله برلشمشدی .
کدک احمد پاشا قاسم بکک تأدینه مأموراً آناتولییه اعزام ایدلدی .

سلطان جم مصرده درت آی اقامت ایتدکدن و حجازه عزیمتله ایفای
حج ایلدکدن صکره قره مان زاده قاسم بك ایله بعض امرا طرفدن
واقع اولان دعوت اوزرینه آناتولییه کلدی . قاسم بك ایله عقده مقاوله

ایدرک تخت سلطنتہ چیقارایسہ قرہمان امارتنک قدیم حدودی دائرہ سندہ
استقلالنی قبول ایلیہ جکفی تعہد ایتدی [۸۸۷]۔

سلطان جم ابلاہ قاسم بک قونیہ ی محاصرہ ایتدی لر ایسہ دہ ضبطہ
موفق اولہ مدیلر۔ سلطان جم آنقرہ اوزرینہ یورودیکی صرہ دہ معیتندہ کی
عسکر لر پادشاہک اردو ایلہ کلکدہ اولدیغنی خبر آنجه طاغیلدی لر ۔
کندیسی دہ طاش ایلنہ التجا ایتدی ۔

سلطان جم آناطولی دہ بر قاج ایالتک کندیسنہ ترکی تکلیف ایتدی
ایسہ دہ جواب رد آدی ۔ قدسہ عائلہ سیلہ بر لکدہ اقامت ایتدی ایچون
پادشاہ طرفندن واقع اولان تکلیفی دہ کندیسی قبول ایتدی ۔

سلطان جم مصرہ ویا ایرانہ التجا ایتک ایستیوردی ۔ فقط قاسم
بک و قتیلہ موسی چالینک یادیغنی کبی روم ایلی یہ مروری توصیه ایتدی ۔
مقصدی پادشاہی روم ایلی دہ اشغال ایدرک قرہمان شہر لر نی قولایجه ضبط
ایتمک ایدی ۔ نہایت بوکا قرار ویرلدی ۔ سلطان جم کندیسی ایلہ قپوسی
خلقنی روم ایلی یہ کچیرہ جک کمی ایستہ مک ایچون ردوس شوالیہ لرینہ
بندکانندن سلیمانی کوندردی ۔ شوالیہ لر شہزادہ نی روم ایلی ساحلنہ کچیرمکہ
راضی اولدی لر ۔ سلطان جم ردوس شوالیہ لرینک (غران متر grand
maître) ی (اوبوسون d'Aubusson) طرفندن بر حکمدار کبی مطمئن
صورتدہ قبول ایدلدی ۔

سلطان جم ردوسہ کیتدکدن صکرہ قرہمان والیسی ایلہ وزیر احمد پاشا
طرفندن شوالیہ لرہ ایکی ایلچی کوندرلدی ۔ دولت عثمانیہ ایلہ دواملی بر
صلح عقدی ایستہ نیلیور ایسہ مرخص کوندرلمسی تکلیف ایدلدی ۔
شرائط صلحیہ جملہ سندن بری شہزادہ نک تسلیمی ایدی ۔ شوالیہ لر جملہ

وجودندن استفاده ایتمک ، پادشاهدن پاره قوپارمق ایسته دیلر . شهزاده یی
 طریقتک جنوبی فرانسه ده بولنان مالکانه لرینه کوتوروب اوراده محافظه
 ایتمک قرار ویردیلر . جم سلطانه ده کندیسینی اوروپادن مجارستان طریقیله
 روم ایلی یه کچیره جکلرینی سویلیه رک برکمی یه بئیدیردیلر ؛ جنوبی فرانسه یه
 کوندردیلر . صکره ، دولت عثمانیه ایله مذاکره ایچون بر ایچی اعزام ایتدیلر .
 شوالیه لر اولجه سلطان جمک تخته جلوسی تقدیرنده ردوس کیملرینه
 عثمانلی لیمانلرینک آچیق طوئلسی ، بلابدل هر سنه اوچ یوز خرستیان اسیر
 آزاد ایدلمسی ، کندیسینی ایچون ایدیلن مصارفه قارشیلق اولمق اوزره
 یوزاللی بیک دوقه اعطاسی شرائطی حاوی اوله رق شهزاده دن بر سندن
 آملشردی . استانبوله جریان ایدن مذاکره نتیجه سنده سلطان بایزیدک
 سلطنتی مدتجه طرفینک برآ و بحرآ حال صلحه ده بولمنسی ، تجارتک سربست
 اولمسی ، طرفین اسراسنک اعاده سی ، فقط بونلر ایچنده تبدیل دین
 ایدنلر اولور ایسه هر شخص ایچون ۲۲ دوقه بدل ویرلمسی ، بودرومده کی
 (سن پیه ر) قلعه سنک تعرضدن مصون بر مامن عد ایدلمسی شرائطیله بر
 معاهده عقد ایدلدی . پادشاه طرفندن ردوسه کوندریلن ایلچی واسطه سیله
 عقد اولنان معاهده خفیه موجبجه ده جم سلطان شوالیه لره عائد محملرده
 توقیف ایدلایکی مدتجه هر سنه ۴۵,۰۰۰ دوقه اعطا ایدیله جکدی .
 شوالیه لر طرفندن اغفال اولنان سلطان جم بر موجب تعهد روم ایلی یه
 کچیرلمدی ؛ یاننده بولنان بئدکانی ردوسه کوندرلدی ؛ کندیسینی سنان
 وایاس بکلرله یالکیز قاله رق (نیس) ه کوتورلدی . شهزاده روم ایلی یه
 کیتمک ایسته دیکنی سویلدی . شوالیه لر فرانسز طوپراغی اوزرنده بولندینی
 جهته له فرانسه قرالنک موافقتی اولمدجه عزیمتی ممکن اوله میه جفنی
 سویلدیلر . شهزاده نک قراله کوندردیکی ایچی یی یوله توقیف ایتدیلر .

سلطان جم درت آی بیهوده انتظارده بولندقدن صکره نيسدن حرکت ایتدی. آلتی سنه جنوبی فرانسهده شاتودن شاتویه نقل ایدلدى. آره صره فراری تصمیم ایتدکجه شوالیه لر امر محافظه سنی تشدید ایدرلردى .

جم سلطان جنوبی فرانسهده (روش شینار Rochechinard) ده بولندیغی زمان (فیلیپین دوساسه ناژ Philippine de Sassenage) اسمنده کی بر کوزل قیز کندیسنه مفتون اولمشدى. بونلرک آره سنده کی ماجرای عشق مشهوردر . بر آراق (بورغانوف Bourganeuf) ده کندیسنک حبسنى ایچون انشا ایدیلن یدی قاتلی برقله ده اقامت ایتدی، که (Tour de Zizim) نامیله معروف اولان بوقله آلآن موجوددر .

جم سلطان فرانسهده اسیر بولندیغی مدتجه شوالیه لر بر چوق حیل و دسایس ایله جلب منفعته چالیندقلری کی سلطان بایزید هر سنه ۴۵,۰۰۰ دوقه دن ماعدا فرانسه قرالنه ، پاییه قیمتدار هدیه لر ، استانبول کلیسا و مناسترلرنده بولسان و خرستیالمرجه مقدس عد ایدیلن بعض اشیایی کوندر مکده ایدی .

نهایت، فرانسه قرالی سکزنجی شارل ایله پاپا سلطان جمک شوالیه لر لندن آله رق روماده محافظه ایدلمسنه قرار ویردی لر . هر سنه -تانبولدن آلان قرق بش بیک آلتونک اون بیکی فرانسه قرالنه اعطا ایدیلجه جکدی . بوندن بشقه فرانسه ، مجارستان ، نابولی قرالریله پاپا دولت عثمانیه علیه تصور ایتدکلری سفردده شهزاده دن استفاده ایتک ایسته یورلردى . سلطان جم پاپا سکزنجی (اینوسان)ه تسلیم ایدلدى [۸۹۳-۱۴۸۸] . واتیقان سراینده مراسم مخصوصه ایله پاپا طرفدن قبول ایدیلن سلطان جم تشریفات مأمورینک هر درلو اصرارینه رغماً سرپوشنى چیقارمغه ، پاپانک حضورنده دیز چو کمکه راضی اولمى . باشنى آچمق سزین ،

ا کیلمکسزین طوغریجه پاپانک تختنه کیتدی . صکره ، مختصر ووقار ونجات ایله مالی سوزلرله کندیسینی (اینوسان) ک حمایه سنه تودیع ایدرک خصوصی بر ملاقات ایسته دی . پاپا موافقت کوستردی . بو ملاقاتده شهزاده یدی سندهن بری چکدیکی اسارت مصائبی ؛ حال اسارتده والده سندن ، حرمندن ، چوجقلرندن افتراق الینی حکایه واونلری تکرار کوره بیلیمک ایچون مصره عزیمت آرزوسنده بولندیغنی افاده ایتدی . طالعمر شهزاده تخطر آلام ایله آغلادی . پاپاده متأثر اولدی . آنجق مصره کیدرک عالمه سنه قاووشمق آرزوسی طبیعی ایسه ده مقصد اصلی پدرینک تختنه مالکیت اولدیغنی ، مجارستان قرالئک حدود عثمانیه ده کفدیسینه منتظر بولندیغنی سوبیلهرک اول امرده خرسیتانلغنی قبول ایتسی لازم کله جکفی یما ایتدی . جم پک محق بر جواب اولمق اوزره شوصورتله فقهای اسلامک کندی حقنده ویردکلری فتوای اعدامی تأیید ایتمش اوله جغنی ونه عثمانلی سلطنتی ایچرن ، نه ده بتون دنیانک پادشاهلغنی ایچون دینی ترک ایتیه جکفی یان ایلدی . (اینوسان) دها زیاده اصرار ایتدی .

جم سلطانک هر سنه ویریلن تخصیصات مقابلنده پاپانک ممالکنده محافظه سی خصوصنی مذاکره ایچون بعض هدایا ایله پادشاه طرفندن یومایه برسفیر کوندرلمسندن استفاده ایتمک ایستین شهزاده دوچار اولدیغنی لاکتلی تعداد ایدرک پادشاهک مرحمتنه دخالت ایتدیکنه دائر بر کتوب یازوب استانبوله کوندردی . فقط بر جواب آله مدی .

سلطان جم (واتیقان) سراینده اوج سنه قالدی . او صرده وفات بدن سکزنجی (اینوسان) ک یرینه آلتنجی (آلکساندر بورجیا) کچدی . جنایاتی ایله مشهور اولان (بورجیا) پادشاهه بر سفیر کونده رک تخصیصات نویه نک ابقاسی صورتیه جم سلطانک محافظه سنی ، یاخود دفعه اوج یوزبیک

دوقہ اعطاسی مقابلندہ تسمیننی تکلیف ایتدی . استانبولده پاپا سفیریلہ مذاکرہ جریان ایتدیکی صرہده فرانسه قرالی سکزنجی (شارل) ایتالایہ عسکر سوق ایتمش ، رومایہ کیرمشدی . پاپا سلطان جمی آلہرق (سنت آنژ) قلعهسنہ تحصن ایتدی . بر قاج کون صکرہ فرانسه قرالی ایله پاپا آرہسندہ بر معاهده عقد ایدلدی . سکزنجی (شارل) ممالک شرقیہده کی تصمیمات فتوحات جویانہسندہ سلطان جمی آلت اتخاذا ایتمک ایستدیکندن شہزادہ نک کندیسنه تسلیمی شرائط صلحیہ جملہسندن ایدی .

(آلکساندر) بو شرطی ایفا ایتدی . فقط شہزادہ نک حبسنہ مقابل ویریلن تخصیصاتک ایکی سنہ لکنی حاملہ استانبولدن عودت ایدن سفیری (آنقونا) یه وصولندہ خصمی اولوب بالآ خرہ کندی رینہ پاپا اولان قاردینال (ژولین) طرفندن حبس ایدیلہ رک پارہ لر آلمش اولدیغندن (آلکساندر) سلطان جمک حیاتی پادشاهہ صاہہرق ۳۰۰,۰۰۰ دوقہ آلق امیدیلہ شہزادہ بی بطی التأثير بر زہرایلہ تسمیم ایتدکدن صکرہ فرانسه قرالنه تسلیم ایدلدی . ایتالیان مورخلرینہ کورہ سلطان جم استعمالنی اعتیاد ایتدیکی شکرہ قاریشدریلان بیاض برتوز ایله تسمیم ایدلمشدر . عثمانلی مورخلری ایسہ بالعکس سلطان بایزیدک سرای خدمہسندن رومدن دومہ مصطفانک شہزادہ نک اعدامنه متعهد اولوب تبدیل قیافت ایله رومایہ کیدرک جمک خدمتنہ کیردیکنی وشہزادہ بی زہرلی اوسترہ ایله تراش ایتمک صورتیلہ تسمیم ایتدیکنی یازارلر . بومصطفی بالآ خرہ وزیراعظم اولان وسلطان سلیم اول زمانندہ شہزادہ سلطان احمد طرفنی التزام ایتدیکی ایچون اعدام ایدیلن قوجہ مصطفی پاشادر . شہزادہ فرانسر عسکریلہ ناپولی یه کیتدیکی زمان وجودندہ تاب وتوان قالمدی . وصیتنامہ سنی یازدیردی ؛ برادرینہده بر مکتوب کوندردی . صکرہ وفات ایتدی [۹۰۰] . جسدی تحنیط ایدیلہ رک روسیہ کوتورلدی .

سلطان جم پاپانك النده بولنديني مدتيجه اوروپايله دولت عثمانيه آرمسندمه
محاربه اولمدي . حال بوكه فرانسه قرالى سكزنجي (شارل) بتون ممالك
غريبه يي اهل صليب طرزنده عثمانيلر عليه سوق ايتمكه چاليشيوردى .
ردوس شواليه لرى رئيسى، پاپاي، اسقوجيا، مجارستان، لهستان قراللىرى
دائرة اتفاقه آلق فكرنده ايدى . (طوماس پالئولوغ) دن «شرق ايمپراطورى»
عنوانى صانون آلمشدى . (اير) ، (ماكدونيا) ، (موره) قطعه لرنده
خرستيان اهالى يي تحريكه غيرت ايدىيوردى . بالخاصه آرناوودلقده كى
(ميرديتا) لره ، (دراج) قتوليك پستقوسنه كوه نمكده ايدى . نهايت ،
شهزاده وسكزنجي شارلك وفاتلريله بو جهتن قورقو قالمدى .

بدايت سلطنتده سلطان جم وقاسم بك عليهنده كى
حركات عسكريه دن وكيلى ، آق كرمان قلعه لر ينك ضبطى
ايله نتيجه لنن افلاق سفرندن بشقه محاربه اوليان سلطان
بایزید ثانی زماننده دولت عثمانیه ايله مصر حكومتی آرمسندمه بر اختلاف
وايلك دفعه اوله رق اوزون مدت سورمه بر حرب ظهور ايتدى .
سلطان اورخان زمانندن برى دولت عثمانیه ايله پيدای مناسبات ایدن مصر
حكومتی ايله عثمانيلرك آرمسى فاتحك صوك اوان سلطنتده آچيلمغه
باشلامشدى . فاتح حجاز يولنده خلفای امويه و عباسيه طرفندن وجوده
كتيريلن خيرات و مبراتك خراب اولمسندن طولايى حجاجك صيقندى
چكدكلرينى خبر آلدیغندن تعميرات لازمه نك اجراسنه مصر خزينه سى
مساعد دكل ايسه دولت عثمانیه نك معاونت ایده جكنى مصر حكومته
بيلدیرمشدى . فقط كوله منلر بو مداخله يي خوش كورمیه رك جواب رد
ویرمشلر ایدی .

ديكر طرفدن البستان بلككى ميراثى مسئله سى ظهور ايتمشدى .

ذوالقدر خاندانندن اولوب فاتح نزدینہ التجا ایدن شہسوار بکک -
پادشاہک حمایہ سیلہ - پدرینک مقامہ کچمسی اوزرینہ مصر سلطانی
قاینبای البستانہ تجاوز ایتش ، شہسوار بکی اعدام ایتدیرمشدی . فاتح
شہسوار بکک یرینہ علاءالدولہ بکی البستانہ کوندیرمشدی .

بوندن بشقہ سلطان یازید نزدینہ سفارتلہ اعزام اولنان هندستان
پادشاہی بہمن شاہک وزیر اعظمی ممالک مصریہ دن کچرکن توقیف
اولنہ رق عثمانلی پادشاہنہ تقدیم ایدہ جکی اشیای قیمتدارک قسم کلیسی
الندن آلمشدی . شہزادہ جک قاہرہ دہ کوردیکی مسافر پرورلک ،
آٹنہ و طرسوس جوارندہ رمضان اوغلنک اندہ کی قلعہ لک ضبط کی
احوال مصر ایلہ حکومت عثمانیہ آرمہ سندہ کی برودت ایتدیردی ؛ محاربہ
ظہورینہ سبب اولدی . قرہ مان والیسی قرہ کوز پاشا رمضان اوغللرندن
آنان قلعہ لک استردادینہ مأمور ایدلدی . اسباب مذکورہ دن طولای
مصر ایلہ وقوعہ کلن محاربہ بش سنہ دوام ایتدی [۸۹۰ — ۸۹۵].

محاربہ یہ مأمور امرای عسکریہ نک بربرلرینہ خصوصت لردن طولای
وظیفہ لرینی ایفا ایتدکلری ، عثمانلرک مغلوبیت لرینہ سبب اولدقلری کورلدی .
نہایت ، بالذات پادشاہک آناطولیہ کیتمنہ قرار ویرلدی . فقط بوسرہ دہ
تونس امیرینک توسطی اوزرینہ مصر ایلہ مصالحہ عقد ایدلدی . ممالک
عثمانیہ دن آلتان یرلرک اعادہ سی ، یالکز منازع فیہ اولان آٹنہ قلعہ ونواحیسی
وارداتنک حرمینہ وقف ایدلمسی جملہ شرائط صلحیہ دندی [۸۹۶].

۸۹۱ سنہ سندہ اسپانیادہ غربلرک صوک حکمداری
بنی امیر دولتی اولان (بنی احمر) امیری طرفندن نامہ محصوص ایلہ
استانبولہ بر سفیر کلدی . اسپانیادن اسلاملرک طرد ایدلمسندن بحث
اولنہ رق استمداد ایدیلیوردی . سلطان یازید اندلس مسلہ انلرینہ صورت

جدیده معاونت ایدم میوب یالکز اسپانیا سواحلی اورمق ایچون کمال
رئیسك قومانداسی آلتده بر دونما کوندردی .

۸۹۷ده بودولت قرال فردیناند و زوجه سی ایزابلک غرناطه یی استیلالری
اوزرینه منقرض اولدی . بالا آخره جزائر بککربکلیکی تأسس ایتدیکی زمان
اندلس مسلمانلرینه آفریقایه نقل ایدلمک کبی معاونت لر ایفا اولنه بیلدی .

سلطان بایزید ثانیك بالخاصه اواخر سلطنته طوغری

آقینلر

روم ایلی احوالی و اوروپا ایله مناسباتمز پك قاریشیق

برحاله کلمشدر . رجال دولت آره سنده هر سك زاده احمد پاشادن ماعدا
احوال عالمه واقف وزرا وامرا قالمامشدی . دولتلر ایله مذا کره جریان
ایدركن ، طرفین آره سنده حال صلح موجود ایکن سرحد بکلری آقینلر
اجراسندن کری طور مازلردی . بو آقینلرک اکثری ده مغلوبیت وفلاکت
ایله نتیجه لیردی .

مصر ایله مصالحه عقد ایدلدیکی صرمده (قارنیوله) یه تجاوز ایدن
بوسنه بکلری عسکرلریله برلکده محو اولمشلردی . ۸۹۷ سنه سنده
(آوستریا) ، (قارنیوله) ، (قارینتیا) قطعه لرینه هجوم ایدن و اون بش بیك
اسیر ایله عودت ایلین میخال اوغلی علی پاشا قومانداسنده کی آقینجیلر
ایمپراطور ماقسیمیلیانك سردارلرندن (رودولف هوهنوللر) ك ناکهانی
هجومنه معروض قاله رق اون بیك شهید ، یدی بیك اسیر ویردیله . علی
پاشا دشمن طرفندن میدان حربده قورشونه دیزلدی . ینه او سنه
ظرفنده خادم علی پاشا قومانداسنده (اردل) ه تجاوز ایدن آقینجیلر مجارلره
مغلوب اوله رق اون بیك تلفات ویردیله . ۸۹۸ سنه سنده یعقوب پاشا
هر آقیندن زیاده ایلری یه کیتدیکی کبی پك چوق اسرا و مال غنیمت ایله
عودت ایتدی ، عودتنده مجار و آوستریا اردوسنی پریشان ایلدی .

بالطبع ممالک متجاورہ امراسی دخی مقابلہ دن کری طور میورلردی .
 یعقوب پاشانک آقینلرینه مقابل مجارستان واسقلاوونیا رؤسای سمندرہ دن
 حدودی تجاوزایله مملکتی یاقدیله، ییقدیله، حسابسز اسیر ومال الدیله .
 تخریب ممالکدن بشقه بر شیئه خدمت ایتین بو آقینلرک منعی لازم
 ایکن حکومت بر شی یامیوردی . یالکز آلپ اتکلرینه ، مجارستان
 اووه لرینه قدر کیدن بوسنه سرحد بکلرینک مغلوبیتلری ودشمن
 رؤساسنک بزم طرفه آقینلر اجراسی اوزرینه پادشاه مجار قرالنه بر
 سفیر کوندیره رک اوچ سنه مدتله متارکه عقد اولندی [۹۰۰] .

بغدانده (استغان) کیرینه کچن (بغدان وویووده) نک دعوت وتشویقیله
 ۹۰۲ سنه سنده سلستره بکلر بکیسی مالقوچ زاده بالی بک طرفدن لهستان
 حدودینه قدر اجرا ایدیلن آقینلر غایت بیوک بر مقیاسده ایدی . سرحد
 بکلری (یاروسلاو) شهرینه قدر کیده رک لهستانی یغما ایتدیله . ۹۰۴
 سنه سنده بوسنه بکلر بکیسی اسکندر پاشامالک غربیه یه اک مشهور آقینلردن
 برینی اجرا ایتدی ، شمالی ایتالیا یه قدر کیتدی .

روسیه ایله ایلک مخبرات سیاسیه مز دخی بودورده باشلا-
 روسیه ایله مناسبات مشدر . صربستان وبلغارستان اسلاولری زیراداره عثمانیه
 کچدکلری صرهده روسیه تاتارلرک تحت تحکمندن یواش یواش قورتیلوردی .
 اون اوچنچی عصر میلادیده تاتارلره مغلوب اولان (موسقووه) حکومتی
 بر عصر قدر حال تابعیتده یشادی . نهایت ایلک دفعه اوله رق (دیتمری
 ایوانوویچ) آتون اردو حکومتنه قارشى قیام ایتدی . (قولیقووو
 Koulikovo) مظفریتنی قزاندی ؛ (دونسکوی Donskoi) عنواتی الدی .
 هر نه قدر تاتار حکومتی ده بر عصر دوام ایتدی ایسه ده روسلر
 کندیلرینی (دیتمری) زمانندن اعتباراً تاتارلردن قورتولش عدایدرلر .

اون بشنچی عصر میلادیده اوچنجی (ایوان) لادوغا کوله و بحر ابيضه قدر توسيع حدود ایتدی. تاتار حکومتنه ویرکی ویرمکدن امتناع ایلدی. نهایت (سرای) روسلر طرفدن تخریب ایلدی.

صوك بیزانس ایمپراطورینك برادری (موره) دهسپوتی سلطان محمد ثانی زماننده قیزی (صوفی پالئولوغ) ایله برلکده (روما)یه قاقشیدی. پاپا دردنجی (سیکست) ایله عن اصل روم اولان قاردینال (بساریون) خریستیانلق عالمك اسلاملردن انتقامنی الملق ایچون بو قیزی (موسقووه) چارینه تزویج ایتمکی دوشوندیلر. او زمان اورتودوقس و قوتلیك مذهبلری اختلافی برقاچ سنه ایچون زائل اولمشدی. ازدواج ۱۴۷۲ سنه میلادیه سنده اجرا ایلدی. (صوفی پالئولوغ) رومادن آلمانیا طریقیله (موسقووه)یه کوندرلدی. اوچنجی (ایوان) پالئولوغ خاندانك آرمهسی اولان ایکی باشلی قرتالی کندی آرمهسی اولمق اوزره قبول و بوآندن اعتباراً بیزانس ایمپراطورلرینك انتقامنی الملق فکرینه دوشدی.

ایشته ۸۹۷ سنه سننده روسیه چاری اوچنجی (ژان) دولت عثمانیهك تزاید شوکت و قوتتی نظر دفته آله رق طوغریدن طوغرییه مناسباته کیریشمك آرزوسنده بولندی. سلطان بایزیدك دخی عینی آرزوده اولدیغنی استخبار ایتمی اوزرینه قریم خانی منکلی کرای واسطه سیله پادشاهك فکرینی استمزاج ایتدی.

سلطان بایزید قریم خانسه «ا کر موسقووه قرالی سنك قرداشك ایسه بنمده قرداشمدر.» جوابی ویردی.

برمدت صکره آزاق و کفدهده بولمان روسیه تجاری امرای محلیهك معاملاتندن دلکیر اوله رق ترک تجارت ایتدیلر. کفه متصرفی بونی پادشاهه بیلدیردیکی صرهده منکلی کرایك دسیسهسی اولدیغنی اشعار ایلدی.

روسہ چاری دوستی اولان قریم خانی تبرئہ ایچون پادشاهہ بر مکتوب کوندرمش وبو مکتوبده هر نه قدر بربرلرینه سفیر کوندره رک رسم تبریکی ایفا ایتمه مشر ایسه ده روسیه تجارینک ممالک عثمانیه ده طرفینه نافع معاملات تجاریه ده بولندقلرینی ، دولت عثمانیه مأمورلرینک تجار حقده کی ازعاجاتنک شمدی یه قدر سکوت ایله کچیشدیرلدیکنی ، فقط آزاق متصرفی بو تجاری آنغاریه ایشلرده قوللاندیغی کی آزاق وکفده ماللرینی یاری بها ایله صاتمغه اجبار ایدلکلرینی ، روسیه تجارندن بری خسته لندیغی زمان هپسنک ماللرینی مهرلیوب خسته وفات ایدرسه حکومتجه ضبط واییلشیرسه نصفی رد اولندیغی ، روسیه تجارینک وصیتنامه لرینه عثمانلی حاکملرینک رعایت ایتمکلرینی ، بو قدر حقسزلقدن طولانی کندی تجارینی ممالک عثمانیه ده اخذ و اعطادن منع مجبور اوله جغنی بیان ایتدکدن صکره سلطان محمد ثانیکنک سفیر اعزامیله کندیسنی تبریک ایتمک ایستدیکی حالده موفق اوله مدیغی روایت ایدلدیکنی وبو آرزونک پادشاه طرفندن اجراسنه مانع بر سبب وار ایسه بیلدیرلمسنه انتظار ایلدیکنی افاده ایلشدر .

بوندن اوچ سنه صکره برنجی دفعه اوله رق روسیه دن (میخائیل بلهست چییه ف) نامنده بر سفیر استانبوله کلدی . بو سفیرک وظیفه سی ممالک عثمانیه ده روسیه تجارتنک سربستیسینی مذا کره ایتمکدی . روسیه چاری ، سفیرینه ویردیکی تعلیماتده کرک پادشاهه وکرک شهزاده لرینه عرض تعظیبات ائناسنده مسکتدن توقی ایتمسینی ، ایشنی وزرا ایله دکل طوغریدن طوغری یه پادشاه ایله کورمسنی ، هیچ بر سفیرک کندیسنه تقدم ایتدیرلمه مسنی امر ایتمشدی . (بلهست چییه ف) تعلیماتنک اوتیه طرفه کچدی . استانبوله کلدیکی زمان غایت درشانه و متکبرانہ معاملاتده بولندی ،

کندی شرفه وزرا طرفدن ویریلن ضیافه اجابت ایتدی ، ویریلن البسه فاخره یی واقامتی مصرفی اوله رق تکلیف اولان اون بیك دیناری قبول ایلدی . پادشاه قریم خانسه یازدینی تحریر ائده روسیه چاری قبا بر ایلچی کوندردیکی جهتله عودتنده کندیسنه هیچ کیمسه نك رفاقت ایتیمه جکنی بیلدیردی . مع مافیه چاره یازیلان جوابنامه ده سفیردن شکایت اولمیه رق روسیه تجاری حقنده طلب اولان مساعداته موافقت ایلدی [۹۰۴] .

ونديك حكومتی ایله وقتيله متارکه تجدید ایدلمش ایکن **ونديك سفري** بو حکومتك دشمنلری ، یعنی ناپولی ، فلورانس ، میلان

حکومتلری دولت عثمانیه یی ونديك علیه محاربه یه تشویق ایدیورلردی . ونديك حكومتی کندی علیه کی تشبثاتی عقیم براقق ایچون استانبوله بر سفیر کوندردی . بو سفیر (زانطه) آطه سنك ویرکوسنی کتیردیکی کی منازع فیه اولان مسائلك [که بوسنه جهتنده ومورده بر قاج قلعیه متعلق ایدی] کافه سنی حله مأمور ایدی . ایمراطور (ماقسیملیان) و (بابا) نك انضمام موافقتلریله ناپولی ، فلورانس ، میلان حکومتلرینك بزى ونديك علیه تشویق ایتلری هر حالده دولت عثمانیه خدمت ایچون اولمدینی آشکار ایکن رجال حکومت بوراسنی نظر دقته آلدیلر ؛ ونديك سفیرینه مهم جوابلر ویردیلر ؛ دیگر طرفدن مذا کراته دوام ایتدیلر . سفیر دخی کلیولی ترسانه سنده کی حاضر قللری کوردکدن وکال رئیسك یاقینده دونما ایله دکزه چیقجه جغنی آکلادقدن صکره ۹۰۴ سنه سنده مملکتنه عودت ایتدی .

نهایت ونديکه اعلان حرب ایلدی . اردوی هایون استانبولدن ادرنه یه حرکت ایتدی . روم ایلی بکلر بکیسی قوجه مصطفی پاشا موریه کیتدی ؛ لپانت [اینه بختی] قلعه سی اوکنده توقف ایتدی . قپودان دریا

داود پاشا دخی معیتدہ کمال و بوراق رئیس لر بولندیغی خالدہ دونما ایلہ کلیبولیدن چیقدی . دونما اینہ بختی کورفزینہ کیرہ جک ، قلعه یی دکزدن محاصرہ ایدہ جکدی . فقط مخالفت هوادن طولای اوچ آی قدر (مودون) آچیقارلندہ قالدی ، کورفرزہ کیرہمدی ، قلعه دخی ضبط اولنہمدی .

ھوارلک کسب سکونت ایتمنی متعاقب دونما حرکت ایدنجه قارشینہ (غریمانی) و (لورہدانو) اسمندہ کی آمیرالارک قومانداسی آلتندہ بولنان ۱۷۰ پارچہ سفینہ دن مرکب بر وندیک دونماسی چیقدی . ایلاک محاربہدہ بوراق رئیس بیوک بر قہرمانلق کوستردی . را کب اولدیغی کینک مغلوب اولہجغی آکلانجه ایکی طرفدن یناشان ایکی دشمن سفینہ سیلہ برابر کیندی کیسنہ آتش ویردی . کیلر طائفہ لریلہ برابر یاندی . بوراق رئیس ایلہ (لورہدانو) دخی تلف اولدی . نہایت عثمانی دونماسی غلبہ ایدرک اینہ بختی کورفزینہ کیردی .

قورفویہ رجعت ایتش اولان (غریمانی) یکرمی فرانسز وایکی ردوس کیسیلہ دونماسی تقویہ ایتدکن صکرہ اینہ بختی کورفزینہ کلدی ایسہدہ دونما مزہ هجومہ جسارت ایدہمدی ، چکیلوب کیتدی . بونک اوزرینہ اینہ بختی قلعه سی تسلیم اولدی .

بوصرہدہ مورہیہ کلن سلطان بایزید کورفزک مدخلی قیامق ایچون ایکی قلعه یاپلمسی ، پروزدہ کیلر انشاسنی امر ایتدکن صکرہ استانبولہ عودت ایلدی .

۱- آسی سنہ عثمانیلر دکزدہ بعض موفقیتسزلکلرہ دوچار اولدیلر . پرورہدہ اسسا ایدیلن کیلر بر کیجہ دشمن طرفدن احراق ایدلدی ؛ کورفز آغزندہ کی (راکیہ) قلعه سی ضبط اولندی ؛ (بیزانی) نک قومانداسی

آلئندہ کی وندیک دونمائی (غونزالو Gonzalve) ك ادارہ سندہ بولنان اسپانیا دونمائیہ برلشہرك كفالونیا آطہسنی استرداد ایلدی .

فقط پادشاہك قوماندایتدیكى اردو قرہدہ نائل مظفریت اولدی .
وندیکك موردہ مستملكتائندہ ك مهم قلعہسى اولان (مودون) ایلہ (قورونہ) قلعہلری، (ناوارین) کورفزندہ بعض لیمانلر ضبط ایلدی .

وندیکہ دولت عثمانیہ یہ قارشی عصیان ایتش عاصی بر امارت نظریلہ باقیلوردی . سالف الذکر قلعہلرك فتحی مبشر یازیلان نامہلر مجارستان، اسپانیا، فرانسه قرالترینہ، پایاہ، جنویز، میلان دوقہلرینہ کوندرلدی . حال بوکہ فرانسه واسپانیا بایراغی آلئندہ کی دونمالر وندیکلرلہ برلکدہ . بزہ قارشی محاربہ ایدیورلردی . پایا دخی وندیکك مراجعتی اوزرینہ عمومی بر اهل صلیب ترتینہ چالیشوردی .

عثمانیلرك قرہدہ کی موفقیتلری اوزرینہ پایا، فرانسه، اسپانیا، آلمانیا، آوستریا، لهستان، مجارستان ایلہ ایتالیا دہ کی کوچوك جمهوریتلر عثمانیلر علیہنہ اتفاق ایتدیلر . اوزمان پایا قی مقامندہ ایکنجی (ژول)، فرانسه تختندہ اون ایکنجی (لوئی) بولنمقدہ ایدی . ایشك اہمیتی درکارایدی . فقط رجال حکومت بونی تقدیر ایدہ میورلردی . حتی صدر اعظم بویلہ مهم بر زماندہ آناطولویہ کوندرلمشدی .

وندیک آمیرالی (پیزارو) بردن برہ (ناوارین) کورفزینہ کیرہرك اورادہ بولنان اون ایکی کمیدن برخی احراق، دیکرلرینی ضبط ایتدی . فقط کمال رئیس ایلہ وقوعہ کلن دیکر بر محاربہ دہ مغلوب اولدی [۹۰۶] . وندیک واسپانیا دونمالری آناطولوی ساحلنی تخریبہ باشلادیلر . پایا ایلہ ردوس شوالیہلرینك دونمالری آطہلرہ تعرض ایتدیلر . فرانسه فیلوسی مدالای بی استیلایہ تشبث ایلدی . آلمانیا، آوستریا، مجارستان

رؤسای ممالک عثمانیه آقین ایدیورلر، ویدیندن بالقانلره قدر اولان مسافه یی تخریب ایلورلردی. ایراندۀ ظهور ایدن شاه اسماعیل حدود مزه تجاوزه باشلامش، قره مانده صدر اعظمک آناتولی یه عزیمتی انتاج ایدن بر قاریشیق خلق ظهور ایتشدی.

غلطه جهننده بیوک بریانغین اولدی؛ بویانغینده اشتعال ایدن جیخانه صدر اعظمک، بر چوق امرانک، یوزلرجه، کیمسه لرك تلف اولمسنه سببیت ویردی؛ دیگر طرفدن دولتجه کوریلن لزوم اوزرینه اهالی اوزرینه فوق العاده ویرکولر طرح اولندی. الحاصل احوال داخلیه و خارجیه شکایاتی موجب اولیور، خلقه سوء تأثیر ایدیوردی.

خادم علی پاشانک مدلی یی قورتارمغه مأمور اولسی اوزرینه فرانسز دونماسی دکنزه آچیلدی؛ ظهور ایدن بر فورطنده غرق اولدی [۹۰۷]. ایکی سنه صکره پاپا، فرانسه، وندیک دونمالری آرناوودلق ساحلنده (آیا ماورا) آطه سنی ضبط ایتدکدن صکره آطه لر دکزینه کلدیله، ساحلر مرزی یغما ایتدیله. عثمانلی دونماسی غلبه ایده جک بر حالده دکلدی. دولت عثمانیه محاربه دن ممنون دکلدی. وندیک حکومتی ده متفقرینه کووه نه مدیکندن صلح تکلیف ایتدی. اوصرده دراج اشغال ایدلای، بوسنه حدودنده بر قاچ قلعه ضبط اولندی، بوسنه بکلری موفقیته آقینلر یاپدیله.

عقد اولنار مصالحه موجبنجه موره ده، آرناوودلقدده، بوسنه ده ضبط ایدیلن قلعه لر بزده قالدی. کفالونیا آطه سی وندیکه ترک، آیا ماورا استرداد ایدلای [۹۰۸].

بعده مجارستان قرالی (لادیسلاس) ایله بر معاهده نامه عقد ایدلای. بو معاهده نامه اوزمان رجال حکومتک احوال عالمدن نه قدر یخبر

اولدقلرینه دلالت ایدر. چونکه مجارستان قمرالی انکلتزه، فرانسه و آلمانیه قدر بتون اوروپانک حکمداری ایتمش کبی حرکت ایدلدیکی کبی ممتاز بر ایالت عثمانیه اولان افلاق و بغداد امارت لرینک عینی زمانده مجارستانی دخی طائیلرینه و ویرکو ویرملرینه مساعده اولتمشدی .

ایرانده اجرای حکومت ایدن اوزون حسن وفات **دولت صفویه** ایتدکدن صکره آق قیونلی دولتی ده پایدار اوله مدی . اوزون حسنک سکر اوغلی ایله سکر حفیدی بربریه اوغراشه رق هر بری بر صورتله تلف اولدینی صروده آذربجان و شیروان حدودنده دولت صفویه تأسس ایتدی .

صفویلر اساساً ترک اولوب ایراندن زیاده شیروانه منسوب ایدیلر . فقط شیعی المذهب بر شیخ عاٹه سی ایدیلر ، قادین طرفدن آق قیونلی خاندانه قرابتلری واردر. حدود شرقیه ده سنی اولان شیروان شاهلرینی اورته دن قالدیران بر دولت شیعیه نك تشکلی دولت عثمانیه منافعه موافق دکلدی . باخصوص آناطولیده شیعیلر چوغالمش ، دولتک باشنده برغاٹله حکمنی آلمشدی . مع مافیه حکومت عثمانیه بوبابده هیچ برتشبده بولمندی . شاه اسماعیل صفوی کسب قوت ایتدکدن صکره دولت عثمانیه نك محمیسی اولان ذوالقدریه حاکمی علامه الدوله یی تأدیب ایتمک بهانه سیله حدودی تجاوز ایتدیکی زمان دولت عثمانیه احتیاطاً آنقریه بر مفرزه کوندرمکه اکتفا ایلشدی .

تپه لری قیزیل بیاض صارق صاردقلری ایچون « قیزیل باش » نامیله معروف اولان صفویلرک آناطولیده پک چوق طرفدارلری واردی . قره بیق اوغلی اسمنده بر شخص « شاه قولی » نامنی آلهرق شیعیلردن متشکل چته لره قوماندا ایدیوردی . بین الخلق « شیطان قولی » دنیلن بو

آدمک چتہ لری شہزادہ قورقود سلطانی صومیشلر، آناتولی بکلبیکسی قرہ کوز پاشانک عسکرینی پریشان ایتشلردی . ہر سٹ احمد پاشادن صکرہ صدر اعظم اولان خادم علی پاشا بونلرلہ وقوعہ کلن مصادفہ دہ تلف اولدی؛ آنجق محاربہ دہ شیطان قوی دہ تلف اولدیغندن طرفدارلری ایرانہ فرار ایتدیلر .

غایت خونریز، غدار و ظالم اولان شاہ اسماعیل قافقاسیہ دن بصرہ کورفزیہ قدر، شروان، کورجستان، ارمنستان، آذربایجان، کوردستان، عراق عرب و عجم قطعہ لرندن مرکب بریوک حکومت تأسیسنہ موفق اولدی .

سلطان بایزیدک شہنشاہ، قورقود، احمد، سلیم اسمندہ کی **شہزادانہ اصولی** شہزادہ لری قرہ مان، تکه، آماسیہ، طربزون ولایتلرینہ مأمور ایدیلر . تبدل سلطنت وقوعندہ پادشاہک برادرلری و اقرباسی حقندہ دیلدیکی کبی معاملہ ایتدی اصولی قانون شکنہ کیرمش اولدیغندن سلطان بایزیدک سنی ایلر یلدکجہ شہزادہ لر دوچار اندیشہ اولورلردی . امور خارجیہ و داخلیہ ای کیتمیوردی . پادشاہک حال ازوادہ یشامسی حکمدارلرینی دائما حال فعالیتدہ کورمکہ آلیشمش اولان عثمانیلرک شکایاتی موجب اولیوردی . آناتولی اختلاللری، بربرینی تعقیب ایدن فلاکتلر خلقدہ کی خشنود سزلنی آرتیرمقدہ ایدی .

۹۱۵ سنہ سندہ استانبول ایلہ بلاد سائرہ دہ امثالی کورلمہ مش درجہ دہ شدتلی زلزلہ لر وقوعہ کلدی . استانبول سورینک برچوق یری ییقلدی، بیکلر جہ کیمسہ لر منہدم اولان ابنہ نک انقاضی آلتندہ قالدی . چوروم شہرینک ایکی ثانی یرہ باتدی؛ کلیولی استحکاماتی منہدم، دیمتوقہ خراب اولدی . زلزلہ قرق بش کون دوام ایتدی .

خلق بوزلزله بی بیوکلرک سفاهت ورزالتی سبيله غضب الهی به عطف ایدیوردی. اسباب شکایت اکیسک دکلدی. اولجه یکچیریلرک میخانه لرده سرخوش اولدقدن صکره سوقاقلرده غوغا، محلاتی یغما ایتدکرینی نظر دفته آلان سلطان بایزید بتون میخانه لری قیاتدیغی حالده بیوکلر طرفندن تشویق ایدیلان یکچیریلر جبراً آچدیر مشلردی. وزرا و کبرانک تخصیصات رسمیه لرندن بشقه اموال غنائمدن حصه، هدایا کی منبع وارداتلری بولندیغدن ثروت و سفاهته طامشلردی.

ایشته، اهالی رجال حکومتدن اصلاً ممنون دکل ایکن سلطان بایزید زلزله نك دواامدن طولای ادرنه به کیتدی؛ فقط اورایه واصل اولنجه متعدد زلزله لر، مدهش بر طغیان میاه وقوعه کلدی. پادشاه تخریباتی تعمیر ایچون هر خانه دن ایکیشر آچه ویرکو، هر یکرمی خانه دن بر آدم اولمق اوزره عمله مکلفه آلمسنه قرار ویردی. کرک بو تدبیر وکرک شهزاده لرک اداره لری آلتنده کی سنجاقلر اهالیسنک ویرکولردن مستننا طوتلسی خلقک خشنودسزلغنی آرتیردی.

مع مافیه سلطان بایزید جداً شایان حیرت درجه ده بر همت و غیرت ابله زلزله دن خراب اولان مبانی بی تعمیر و تجدیده موفق اولدی.

بین الخلق موجود اولان خشنودسزلق شهزاده لره دخی سرایت ایتمشدی. صدر اعظم خادم علی پاشا شهزاده احمد سلطانک وارث سلطنت اولمسنه طرفدار ایدی. شعر و ادبیاته، ذوق و سفاهته میال اولان شهنشا و قورقود سلطانلر سلطنته لایق کورلمیورلردی. احمد سلطان مدبر، سلیم سلطان جسور برر شهزاده اولدقلرندن بونلر پادشاهلغک اهلی عد ایدیلیورلردی.

قورقود سلطانک مأمور اولدیغی صاروخان قطعه سنده مقام صدارته

مخصوص خاص عائذاتی واردی . صدر اعظم لر بو عائذاتی ایستہ میوب
 شہزادہ یہ براقیرلردی . خادم علی پاشا عائذاتی ایستدی . قورقود سلطانک
 استانبولہ شکایتی متمر اولمدی . بونک اوزرینہ شہزادہ حجه کیمک
 بہانہ سیلہ مصرہ کیتدی . مقصدی سلطنتدہ کی حقن تصدیق ایتدیرمک ایدی .
 مصر سلطانی شہزادہ یہ حرمت ایتمکله برابر حجازہ کیتمسہ مساعده
 ایتدی . قورقود سلطان دخی بر مدت صکرہ نادم اولہرق وشمیدیک
 وراثت سلطنت حقندہ کی تأمینات ایلہ اکتفا ایدرک آناتولیہ عودت
 ایلدی . دکرزہ ردوس شوالیہ لری طرقدن دوچار تعرض اولدی .
 اوصردہ شہنشاہ سلطان وفات ایتدیکندن قورقود اکبر اولاد
 مقامہ کچدی . علما و شعراء علم و فضیلتہ مفتون اولان کیمسہ لر قورقودک
 جلوسنہ پک طبعی بر نظرلہ باقورلردی . فقط احمد و سلیم سلطانلر حکم
 ونفوذک یکچیریلر ائدہ اولدیغنی بیلدکلری ایچون آکا کورہ تدیر
 اتحاد ایدیورلردی .

سلیم سلطانک اوغلی اون آلتی یاشندہ سلیمان چلبی بولی سنجاغہ تعین
 ایدلدی . آماسیہ دہ بولنان احمد سلطان استانبول ایلہ کندی آرہ سنہ رقبی
 سلیم سلطانک اوغلنک یرلشدرلمسندن تلاش ایتدی . شکایتی اوزرینہ
 سلیمان چلبی کفہ سنجاغہ کوندرلدی .

شاہ اسماعیل حدودی تجاوز ایتدیکی زمان بونکله محاربہ ایدن ،
 ارزنجانی اعادہ فتح ایلین ، آناتولیدہ کی اشقیا چتہ لرینی تأدیپ و تنکیلہ
 موفق اولان سلیم سلطان بعض وزرا ایلہ یکچیریلرک کندیسنہ مائل
 اولدقلرینی بیلدیکندن محل اقامتی اولان طربزوندن کفہ یہ کیتدی .

احمد سلطانک طرفداری اولان وزرا سلیم سلطانک کفہ یہ کیتمسندن
 تلاش ایتدیلر . سلطان بایزید همان طربزونہ عودتی اوغلنہ امر ایلدی .

فقط سلیم سلطان عودت ایتدکدن بشقه یکرمی آلتی سته دن بری کورمدیکی پدرینک الی اوپمک ایچون استانبوله کلمسه مساعده ایستدی . موافق بر جواب آله مدی . بالعکس ارکان دولتک پادشاهه احمد سلطان نامنه ترک سلطنت ایتدیرمک ایستدکلرینی ، فقط یکیکچری آغاسنه یازدینی بر تحریراتده استعمال ایلدیک لساندن طولانی احمد سلطانه کوجمنش اولان یکیکچریلرک کندیسنه طرفدار اولدقلرینی خبر آلدی . پدری ، احمد سلطانه ترک سلطنت ایتمک ایسترسه مانع اولمق ، ارتحال ایدر ایسه تخت سلطنتی اله کچیرمک فکریله ایکنجی دفعه استانبوله مراجعت ایتدی . روم ایلیده بر سنجاق ویرلمسنی طلب ایلدی . جوابی بکله مدن اون بیك کشیلک بر قوت ایله یوله چیقدی . اجرا ایدیلن نصایحی دیکله میهرک استانبوله کلمکه باشلادی .

وکلا سلیم سلطانک تأدیی فکرنده ایدیلر . بونلرک اصراریله سلطان بایزید روم ایلی بکلر بکیمی حسن پاشای اون بش بیك عسکرله مقابلهیه کوندردی . حسن پاشا ادرنه خارجنده سلیم سلطانه تصادف ایتدی . فقط محاربه دن احترازاً کرییه چکیلدی . بو وقعه وکلانک شکایاتی ، اهالی وعسکرک سلیم سلطانی آلقیشلاملرینی موجب اولدی .

نهایت وکلانک اصراری اوزرینه سلطان بایزید بالذات یوله چیقدی . پادشاه غایت متأثر ایدی . سلیم سلطانک مطالبنی قبول ایتدی ، یعنی سمندریه ویدین وآلاجه حصار سنجاقلرینی علاوه ایدرک اوغلنه ویردی . یالکزر ملاقاته راضی اولمدی .

سلیم سلطان محل مأموریتنه کیتمدی ؛ ادرنهیه یاقین بولنق ایچون زغره جوارنده قالدی . پادشاه استانبوله عودت ایتدی [۹۱۷] .

شہزادہ لڑک بوجر کتلی سلامت دولت نقطہ نظر ندن
 غایت مخاطرہ لی ایدی . قورقود سلطان حقوقی محافظہ
 ایچون محل اقامتی اولان آنطالیہ دن حرکت ایدہ رک
 مغنیسیاہ طوغری کلدی . یولده شیطان قولی چتہ لری طرفدن صویولدی .
 صدراعظم خادم علی پاشا اشقیانی تأدیب بہانہ سیلہ آناتولیہ کچدی . علی
 پاشانک مقصد اصلیمی شہزادہ احمد سلطان ایلہ کوروشہ رک سلطنتی اوکا
 تأمین ایتمکدی .

شاہ قولی طاقی ایلہ وقوعہ کلن محاربہ دہ احمد سلطانک سوء تدبیری
 ایلہ عثمانیلر مغلوب اولدی . بونلری تعقیبہ کیدن صدراعظم دخی تلف
 اولدی . بو وقعہ احمد سلطانک شہرتہ نقیصہ کتیردی . قورقود سلطان
 ایسہ نسلأ عقیم اولدیغندن خلق کندیسینی پادشاہلغہ لایق کورمیوردی .
 بونی خبر آلان سلیم سلطان ادرنہ یہ کلہ رک حکومتی رسماً ضبط
 ایتدی . وکلا شہزادہ نک تأدیندہ مصر ایدیلر . سلطان بایزید احمد
 سلطانہ ترک سلطنتہ ، سلیم سلطانی تأدیبہ قرار ویردی .

پادشاہ ینہ اردو ایلہ استانبولدن چیقدی . چورلی جوارندہ اوغراش
 کویندہ پادشاہ ایلہ اوغلنک عسکرلری قارشی قارشی یہ کلدیلر . وقوعہ
 کلن محاربہ دہ شہزادہ نک عسکری پریشان اولدی ، کندیسینی آخیولی یہ
 واورادن بحرأ کفہ یہ قاچدی .

دیگر طرفدن احمد سلطان استانبولہ یاقلاشمشدی . قرتال جوارینہ
 کلہ رک استانبولہ کیرمک ایچون آلائی ترتیبی ایلہ مشغول ایدی . وکلا
 کندیسنہ طرفدار ایدی . یالکز او صرہ دہ خادم علی پاشانک یرینہ
 صدراعظم اولان ہر سک احمد پاشانک احمد سلطانک جلوسنہ طرفدار
 اولدیغی محتملدر .

احمد سلطانك موصلتی خبر آلان یکچریلر غصیان ایتدیلر ؛ وکلانك قوناقلرینی ، بعض محلاتی یغما ایتدکدن صکره سرايه کیدرک خائنلرک عزل و تأدیننی طلب ، احمد سلطانی ایسته میوب سلیم سلطانی ایستدکرینی بیان ایلدیلر .

پادشاه عاصیلرک مطالبنی قبول ایتدی . وزیر ثانی مصطفی پاشا صدراعظم اولدی . احمد سلطان قورقدی ؛ آناتولی نی ضبط ایتدکدن صکره استانبوله عودت ایتک فکريله کریه دوندی [۹۱۷] . شهنشاه سلطانك وفاتندن صکره قره مان امارتنه تعیین ایدیلن اوغلی محمد چلبیدن قونیه قلعه سنی ضبط ایتدی .

اوصرده قورقود سلطان تبدیل قیافت ایله استانبوله کهرک یکچیری اوجاغنه التجا ایتدی . مقصدی عسکری الده ایتدکی . یکچریلر قورقود سلطانله طرفدار چیقمدیلر . یالکز سلیم سلطان جلوس ایتدیکی زمان کنديسنك حیاته طوقولیه جغنی تأمین ایتدیلر ؛ سرايه کوتوروب حسن معامله ایدلمسنی پادشاهدن طلب ایلدیلر .

اواثنده سلیم سلطان قریمده ، قاین پدری اولان خانك یاننده ایدی . احمد سلطان قریم تاتارلرینی الده ایتک ایچون پادشاه اولدیغی زمان قریم خانلغنك استقلالنی تصدیق ایده جکنی ، سواحله کی اسکله لزی ده ویره جکنی وعد ایلدی ایسه ده قریمده کی سلیم سلطان طرفدارلری بونی قبول ایتدیلر .

پادشاه سلیم سلطانی عفو ایدرک محل مأموریتی اولان سمندره یه عزیمتنی امر ایتدی . سلیم سلطان اوچ بیک کشتی ایله روم ایلی یه کلدی . بعض امرا ایله یکچیری آغاسی کنديسنی استانبوله دعوت ایتدکدرندن طوغریجه استانبوله موصلت ایتدی . جلوس هدیه سندن ماعدا یومیه

اوپر آچہ ترقی وعد ایدرک یکیچریلری الدہ ایتش اولان سلیم سلطان سمندریہ عودتی ، پادشاهک وفاتنه قدر شریک سلطنت اعلان اولمسی ، پاره اعطاسی کبی کندیسنه واقع اولان تکلیفلرک هیچ برینی قبول ایتدی . یکیچری ، سپاهی ، عزب عسکری ایله بیکلرجه خلق سرايه کیده رک پادشاهک اختیار لغدن ، کنج وفعال برپادشاه ایستدکلرندن بحث ایتدیلر ؛ سلیم سلطانک جلوسنی ایستدیلر .

سلطان بایزید ترک سلطنته راضی اولدی . اوغلنی یاننه قبول ایتدی . بوصورتله سلطان سلیمک جلوسی وقوعه کلدی [۸ صفر ۹۱۸] .

سلطان سلیم جلوس ایتدیکی زمان وندیك ، مجارستان ،
ایرانہ سفری مصر ، روسیه سفیرلری حکومت متبوعه لرینک تبریکاتی
 تقدیم ایچون استانبوله کلدکلری حالده ایران طرفندن بر سفیر اعزام
 ایدلمه مش اولمسی نظر دقتی جلب ایتش وسلطان سلیم ایله شاه اسماعیل
 آره سنده حرب چیقہ غغنی اوزماندن اعتباراً هرکس آکلامشدی .
 شاه اسماعیل پادشاهک جلوسندن صکره ادعای سلطنت ایتش اولان
 شہزاده سلطان احمد علناً طرفدار اولمشدی . یکیشهر خوارنده وقوعه
 کلن محاربه دن ، شہزاده نک اسیر ومقتول دوشمنسندن صکره اوغللری
 ایران سراینه التجا ایتشلردی . شاه اسماعیل پادشاهک دشمنلرینی مملکتنه
 قبول ایتدکن ماعدا حربہ دخی حاضر لانیوردی . حتی مصر سلطانہ
 بر چوق هدایا ایله بر ہیئت سفارت کوندره رک مصر حکومتی عثمانیلره
 قارشی حربہ اشتراک ایتدیرمکه چالیشمش ایدی .

اق قیونلی وقرہ قیونلی حکومتلرینک سقوطی ایران حکمدارینک
 موفقیات حربہ سنی تتویج ایتشدی . شاه اسماعیل هم بو حکومتلرک
 مملکتلرینہ ، همده شروان ، مازندرانہ حاکم اولنجه عراق عرب ایله

خراسانی دخی آلمش؛ دیاربکره خانلرینک اک جسوری اولان محمد اوستاجلی یی، بغداده - شهه سزکه خلفای عباسیه نك خاطره لرله استهزا ایچون - «خليفة الخلفاء» عنوان محشميله برخادم آغاسنی والی تعیین ایتمشدی. دیگر طرفدن تیمورک حفید زاده سی حسین بیقرایه عائد و جیحونک بری طرفده کائن مالکی فتح ایدرک حکومتی توسیع ایتمش اولان اوزبکلر خانی ایله ده حرب ایدرک بعض موفقیاته نائل اولمشدی. کندیسنه اوامر کذار اولمق ایسته مین اون درت حکمداری مغلوب ایتمش اولدیغدن سلطان سلیمده غلبه ایده جگنی امید ایدیوردی .

سلطان سلیم دولت صفویه نك عثمانلیلر ایچون بیوک برتهلکه اولدیغی ووقت غائب ایتمه ک لازم کلدیکفی تقدیر ایتدیکی جهته ۹۲۰ سنه سننده ایران اوزرینه سفره قرار ویردی [*].

پادشاه اول امرده داخل مملکتده کی شیعیلری اورته دن قالدیرمق ایستدی . آناطولیده شیعی مذهبه منسوب اولانلری تجسس و تحقیق ایله ثبت دفتر ایتدیردی. قرق بیك نفوسه بالغ اولان شیعیلرک بر قسمی قتل، بر قسمی مؤبدأ حبس ایدلدی .

سکره اردوی هایون یکی شهر اووه سنده طوپلانندی . مغنیساده بولنان شهزاده سلیمان سلطان نیابت سلطنت ایله استانبولده قالدی . روم ایلی بککری یکی حسن پاشا روم ایلی و آناطولی بککری یکی خادم سنان پاشا

[*] سلطان سلیم عقد ایتدیکی فوق العاده بر دیوانده حرب سوزینی برقاق دفعه سویله مش اولدیغی حالده هیچ کیسه جواب و برمه مشدی . نهایت عبدالله اسمنده بر یکچیری خنکارک آياق لرینه قپانه رق آرقداش لرینک ایران شاهنه قارشی یوریمکدن حس ایتدکاری ممنونیتی اونلرک نامه بیان ایتدی . پادشاه یکچیری به مکافاة سلا نیک سنجاغفی توجیه ایلدی .

آناتولی اردوسنه قوماندا ایتدکری حالد یوله چیقیدی. اثنای راهده شاه اسماعیله حقارت آمیز بر مکتوب یازلدی [*].

اردو سیواسه واصل اولدینی زمان بر رسم کچید یاییلهرق یوز قرق بیك موجودی اولدینی آکلاشیلدی. اختیار وضعیف اولان قرق بیك کشتی تفریق ایدیلهرک هم خط رجعتک، هم ده ارزاق ومهمات نقلیاتنک تأمین ایچون قیصریه ایله سیواس آرسنده ترک ایدلدی.

اردو دهها بدایتده پک چوق مشقته دوچار اولدی. دیاربکر والیسی وشاه اسماعیلک سرداری اولان اوستاجلی اوغلی محمد خان اقوام قدیمه نک عادتق وجهله مملکتی تخریب ایدرک چوله چویرمش، کرییه چکیلش ایدی. عمراندن عاری یرلرده ذخیره واوت تدارکی پک مشکل ایدی. عثمانلی اردوسنک ذخیره سی دوتما ایله طربزونه چیقارلش؛ اورادن قاطر صرتنده کتیریلوردی.

پادشاه شاهه ایکنجی برنامه دهها کوندردی. بومکتوبله برابر شیخ عالمه سندن اولان شاه اسماعیلک منشانه تلمیح واستهزا ایچون خرقة، عصاء مسواک ایله قوشاقدن مرکب برشیخ لاسی اهدا ایتدی. ارزنجاندن کوندریلن اوچنجی بر مکتوب فارسی اوله رق یازلش اولان ایکی اولکیلری خلاصه و پادشاهک قریباً آذربایجان واصل اوله جفنی و سیواس ایله قیصریه

[*] بومکتوبک خلاصه مآلی: «بایندیریلری پریشان ایتدکدن صکره بلاد شرقیه یه مسلط اولدیکز. زندیقنلی، ملحدلکه برلشدره رک بوقدر فتنه لرچیقاردیکز. شیخین مکرینه ستم ایتمه کزک و دیگر مفاسد کزک موجب قتل اولدیغنه فتوی ویرلشدر. صفرده او طرفه توجه ایده حکم. قلیجه یایشمازدن اول اسلام تکلیفی حکم شرعی به واستغفار ایدیکنز. آتلمزک آیاقلری باصان یرلری کری ویرکز. بویله یامازسه کز تغلباً آلدیغکنز مملکت عسکرمن طرفندن ضبط اولنه جقدر.»

آره سنده بر احتیاط اردوسی بر اقلمش اولدیغنی اخبار ایدیوردی .
سلطان سلیم عسکرینک احوال روحیه سی و انتظامی حقه ده بعض مدایح دن
صکره دیوردی که :

قلیچ دعواسن ایدنلرک سپر کی بلالره کوکس کر مک دائما پیشه سی
وسرورلک سوداسنده اولانلرک زخم تیغ و تبر دن باکی اولماق هر نفس اندیشه سی
اولق کر کدر .

عروس ملک کس درکنار کیرد تنک
که بوسه بر لب شمشیر آبدار دهد

حذر سلامتده پرده نشینلک اختیار ایدنلره ارلک آدی خطا و اولومدن
قورقان کمنه لره آته بینمک و قلیچ قوشانق ناسزادر .

بر مدت صکره بر عجم سفیری کله رک سلطان سلیمک اوچ مکتوبنک
جوابی کتیردی و آفیون طولی بر آلتون قوطی تسلیم ایدی . شو
صورتله بویکی رقیب حکمدار بر چوق آسیا پادشاهلرینه امتیالاً بر برلرینه
- اعتمادنامه لری صریح تحقیردن و هدیه لری استهزادن عبارت - سفرا
کوندریورلردی . شاه اسماعیل مکتوبنده پادشاهی حربیه سوق ایدن سببی
بیله مدیکنی بیان ایله صلح و مناسبات دوستانه طلب ایتدکن صکره سلطان
سلیمک مکتوبنده کی صورت افاده نک بر پادشاهه لایق اولمادیغنی ، بو مکتوبک
شبهه سز آفیون ایله سرخوش اولمش کاتبلرک اثری بولندیغنی ایچون بر
قوطی ایچنده آفیون کوندردیکنی ، جوابی حسن قبول کورمدیکی حالده
عثمانیلره قارشی یورومکه حاضر اولدیغنی یازیوردی .

اولجه شهزاده سلطان احمدک اوغلی مراد بکک تسلیمنی طلب ایچون
ایران سراینه کوندرلش اولان سفیر من قتل ایدلدیکندن سلطان سلیم
بودفعه کلن ایران ایلچیسنک اعدامنی امر ایدی .

مع مافیہ دشمن کورونموردی . بسبتون تخریب ایدلمش بر مملکتده
دها زیاده ایلرلیک محقق بر قحطه معروض اولمق دیمکدی . یکچریلر
سولینورلر، عودت ایچون اصرار ایدیورلردی . لمطان سلیم عسکرینک
حرکتی تنظیم و شاه اسماعیلک پاتختی اولان تبریزه واصل اولمق ایچون
یورونه جک یولی قرق مرحله یه تقسیم ایلدی . چوققلغندن بری سلطان
سلیم ایله برابر حرم هایونده بیومش اولان قره مان بکلر بکی همدم پاشا
- وزرائک تشویقاتیله - پادشاهک بوسفرده معروض اولدینی تهلکینی
افاده یه واردونک شوایصنرچوللرده دها زیاده ایلرله مسی ایچون اصراره
جرات ایتدی . هیچ برمانعه اوکنده تردد ایتین سلطان سلیم بوفکری
تصویب ایلدیکندن پاشا جرائتک جزاسنی باشیله ویردی .

سلطان سلیم شاهه بر مکتوب دها کوندردی . بومکتوبده ازدیاد
جراته سبب اولور دیه کوندریلن آفیونک مملکتنه کیرلیدی حالده میدانه
چیقیمان، اختفا ایدن عجم شاهنه دها مناسب بردوا اولدینی بیان ایدلکدن
صکره دنلیورکه :

سنک ضعف قلبک ازاله سیچون قرق بیک مقداری ار لشکر ظفر رهبردن
افراز اولنوب قیصریه ایله سیواس مابینده اقامت امر اولنشدر . خصمه مروت
آنجق بوقدر اولور، بوندن آرتق اولماز . اکر من بعد دخی برقرار وضع سابق
کنج زاویه رعب وهراسده متزوی اوله سن، ارلک آدی سکا حرامدر . مغفر یرینه
معبروزره یرینه چادر اختیار ایلوب سردارلق سوداسندن وسپه سالارلق
هواسندن فراغت ایله سن .

عثمانلی اردوسی یولنه دوام ایتدی . کردستان بکی جانیکک کوندریدی
سفیرلر قبول ایلدی . بوسفیرلرله برلکده پادشاهک اردوسی ایچون بر
ذخیره کاربانی کلدی . تبریز اوزرینه تکرار یوله چیقيله جفی صرده
دشمنی هیچ کورمه دن تعقیدن یورولمش اولان یکچریلر علناً شکایت

ایدرک عودت ایتک ایسته دیلر . سلطان سلیم یکیدن وقوعه کلن بواطاً -
 عتسزک تشبثی اوزرینه یکیچریلرک اورتیه سنده جسورانه ایلریله یه رک :
 « بکا بویله می خدمت ایتک ایسته یورسکز ؟ اطاعت اعتراضی دیمکدر ؟
 آره کزده کیم حرمی ، چو جقلری نی کورمک ایسته یورسه بورادن چیقسون ،
 آیرلسون ؛ بن بورایه کری دونمک ایچون کلمدم ؛ قورقأقأر ، بنم آرقه مدن
 کلمک ایسته ینلردن ، بکا خدمت ایچون قلیچ قوشانمش و ترکش [اوق
 محافظه سی] طاقش اولانلردن شمدی آیرلسونلر . بن قرارمدن هیچ
 بر وقت کری دونمیه جکم . دیدی . بوسوزلردن صکره حرکت امری نی
 ویرنجه هیچ بر یکیچری سنجاقدن آیرلغه جسارت ایده مدی .

یوروییش ائناسنده دیاربکر والیسی اوستاجلی اوغلنک خویه مواصلت
 ایتش و شاه اسماعیلک ده اردو سیله تقرب ایتکده بولنش ولدینی خبر
 آآندی . براز صکره شاه اسماعیل چالديران صحراسنده عثمانیلری بکله -
 دیکنه دائر بر خبر کوندردی .

اردو طانه سازی دنیلن موقعدن کچرکن کسوف واقع اولدی . منجملر
 بو حادثه دن عثمانیلر ایچون خیر ایله تفأل ایتدیلر . ازمنه قدیمه دن بری
 ایرانیلر کونشیه طایار و دولتک مهر رسمیه سنده او وقت دخی کونش
 بولنوردی . بوندن طولای عثمانیلر ایرانیلرک شرفی سلطان سلیمک نجم
 شعله داری اوکنده کسوف ایده جکنی ورافضیلکک مذهب مستقیم
 اوکنده زائل اوله جغنی تصور ایتدیلر .

نهایت ، چالديران اووه سنه مواصلت ایدلدی . اوراده شاه اسماعیلک
 اردوگاه قوردینی کورلدی . عسکر استراحتیه محتاج ایسه ده محاربه برایی
 کون تأخیر ایدیلر سه آنا طولی عسکری ایچنده بولنان شیعی طرفدارلرینک
 دشمن ایله مناسبات پیدا سنه وقت بوله جقلری دوشونیه رک ایرتسی کون

علی الصباح هجوم ایدلسنه قرار ویرلدی . درحال هجوم رأینی بیان ایدن
 دفتردار پیری چلبی ایدی . بتون وزرا عسکره ۲۴ ساعت استراحت
 ویرمک طرفداری ایدیلر . پادشاه پیری چلبی تقدیراً : « ایشته، یکانه
 صاحب رأی برآدم! یازیق که وزیر اولمامش . » دیدی و درحال هجوم
 امرینی ویردی . شاه اسماعیلک سوارسیی دها قوتلی ایدی . بوکا مقابل
 عثمانلی عسکرینک طوپلری موجود ایدی . عثمانلیر اوووده معتاد اولان
 نظاملری وچله دیزلایلر : سنان و زینل پاشالرک قومانداسنده بولنان
 آناتولی عسکری صاغ، روم ایلی بکلربیکی حسن پاشانک قومانداسنده کی
 روم ایلی عسکری صول جناحده ایدی . عزبلر ایکی جناحه تقسیم
 ایدلمشردی . یکیچریلر مرکزده بولنیوردی . اونلرک آرقه سنده پادشاه
 اخذ موقع ایتمشدی . آرابه لرله دوه لر یکیچریلرک اوکنده برسر تشکیل
 ایدیوردی . طوپلر ایکی جناحک متهاارنده عزب آلایلرینک آرقه سنه
 وضع ایدلمش و زنجیر ایله بربرینه باغلامشدی . سلطان سلیم طوپچی
 عسکرینه — آنجق عزبلر صاغه و صوله کیدرک طوپنرک اوکندن
 چکیلدکری زمان — آتش آچلرینی امر ایتمشدی . عثمانلی اردوسی
 ۱۲۰،۰۰۰ کشیدی . بونلرک آره سنده ۸۰،۰۰۰ سواری بولنیوردی .
 لکن آتلاوت نقصانندن طولای ضعیف و یوزغون ایدی . عسکر
 یولده غدا اوله رق بوزوق بر اوندن ، خام میوه لردن بشقه برشی بوله .
 مامشردی . او قدر محرومیتلر عسکری یورمش ، انتظامی بوزمشدی .
 لکن عثمانلیر دشمنی کورنجه اضطرابلرینی ، یورغونقلرینی اونوتدیلر ؛
 هجوم امرینی صبرسنزقله بکله دیلر .

ایران اردوسنک سواریلری عدداً عثمانلی سواریسنه معادل ایدی .
 یوندن بشقه عجم عسکری عافیت و راحتده اوله رق آتلی ده یورولمامش ،

ای بسلمش ایدی . بالخاصه اون بیك سواری چلیك زرھلی ایدی .
عسکرینك انتظامی و صداقت مجربہ سی شاہ اسماعیلہ بیوك امیدلر ویریوردی .
قوماندانلری آره سنده آت اوزرنده اختیارلامش بر چوق جنكاورلر وار
ایدی . لکن ایران اردوسنك پیاده سی پك ضعیف اولدقدن بشقه
طوبلری یوقدی .

شاہ اسماعیل عسکرینی ایکی یه آیره رق بر قسمنی کندی قومانداسی
آلته آلدی ؛ دیگر قسمنی اوستاجلی اوغلنك قومانداسنه ویردی .
کندیسی عثمانیلرک صول ، اوستاجلی اوغلی صاغ جناحی اوزرینه یوریه رک
عزبلر صفلرینی آچدقلری وقت یان طرفدن صارارق به صورتله ییکیچریلر
اوزرینه آرقدن هجوم اولمسی قرارلشدیرلمشدی . اولاء ایران سوارسی
عثمانلی سوارسی اوزرینه آتیلدی . ایکی عسکر «الله» و «شاہ» صدالریله
بربرینه قاریشدی . شاہ اسماعیل کندی سوق ایتدیکی هجومده موفق
اولدی . حسن پاشا ایلک هجومده دوشدی . لکن صاغ جناحده سنان
پاشا اوستاجلی اوغلنك ترتینی بوزدی . عزبلر منتظماً وکمال سرعتله
کری چککدیلر ؛ طوبلر تام وقتنده آتسه باشلادی . برآن ایچنده میدان
حرب اجساد ایله طولدی .

محاربه عثمانیلرک غایت پارلاق مظفریتلریله ختام بولدی . طرفینك
تلفاتی پك چوقدی . عثمانیلردن اون درت سنجاق بکی ، ایرانیلردن
اون درت خان تلف اولمشدی . شاہ اسماعیل دخی ایکی یرندن یاره لی
اولدیعی حالده آنجق امرادن برینك فداکارلنی [*] سایه سنده فرار

[*] شاہ اسماعیل قولندن ، آیاغندن مجروحاً دوشمشدی . برعثمانلی سوارسی
شاهك اوزرینه یوریدی . شاهك امراسندن طبقی اونك کبی کینمش میرزا سلطان
علی : « شاہ بنم » دیه سوارسی یه طوغری قوشمادی . میرزا علی اسیر ایدلیدی .
صرده برسایس کندی جانی تهلکه یه قویه رق آتی شاهه ویردی . شاه قاچدی .

ایدہ بیلیمشدی . بتون اردوگاہ ، شاہک خزینہ سی ، حرملری عثمانیلر
الہ کچدی . پادشاہ پایتخت ایران اولان مظفرانہ تبریزہ داخل اولدی .
اھالیہ حسن معاملہ ایدلدی . علمایہ التفات واحترام اولندی .

عثمانلی اردوسی ایچون یاپیلہ حق ایش قرہ باغ اووہ سندنہ قیشی
کچیرہ رک شروان ، کر جستان و طاغستان خانقلرینی دولت علیہ ربط
ایتدکدن صکرہ بہارده تبریزہ عودت ایتمک ؛ بتون آذر بیجانی ، کردستانی ،
عراقی الحاق ایلکدی . بوصورتلہ دولت عثمانیہ نک شرق تشکیلاتی
غایت صاغلام اساسلرہ استناد ایتدیرلمش اولوردی .

سلطان سلیمک قرہ باغده قیشلایوب بہارده تبریزہ عودت ایتمک
نیندہ بولندیغی محقق کیدرہ . لیکن عسکر ، باخصوص راحت وسفاهتیرینی
دوشونن امرأ عودت ایتمک طرفدار ی ایدیلر . سلطان سلیم تبریزہ
آنجق برہفتہ قالدقدن صکرہ قرہ باغہ طوغری حرکت ایتدی . آراس
کنارندہ یکیکچریلر استانبولہ کیدہ جکلرینی بیان ایلہ ینہ عصیان ایدیلر .
پادشاہک اطرافنی صاردیلر و پارچہ پارچہ اولمش لباسلرینی مزارقلر اوچندہ
کوسترہ رک و ہایقیرہ رق عودت آرزو سندنہ بولندقلرینی سویلہ دیلر . بعضلری
پادشاہک چادرینی قورشونلہ دلمکہ قدر ایلری یہ واردیلر . سلطان سلیم
پک زیادہ متأثر اولدیغی حالده عودتہ روی موافقت کوستردی . وزرادن
مصطفی پاشانک عاصیلرہ پک مائل اولدیغی بیلدیکندن کندیسنی عزل
ایلہ دفتردار پیری چلبی یہ وزارت رتبہ سی ویردی . کویلیلرک عسکرک
اطرافنی یغما ایتمسندن شکایت ایللری اوزرینہ دوقہ کین زادہ وزیر احمد
پاشا ایلہ صدراعظم ہر سک زادہ احمد پاشا عزل ایدلدیلر . خادم سنان
پاشا مقام صدارتہ کچدی . بالا خرہ یکیکچریلرک یکی بر مناسبتسزلکلری
اوزرینہ دوقہ کین زادہ اعدام اولندی .

سلطان سلیم ایرانہ کیدرکن ذوالقدریہ بکی علاءالدولہ نی محاربہ یہ اشتراکہ دعوت ایلدیکی حالده علاءالدولہ دعوتہ اجابت ایتدکن ماعدا عثمانیلرہ آثار خصوصت بیله کوسترمشدی . آناتولی یہ عودت ایدیلیرکن پادشاه قیصریہ سنجاغنی ذوالقدریہ امارتنک سابق بکی شہسوار اوغلی علی بکہ توجیہ ایتدی . بعدہ صدراعظم پاشا علی بک ایله برابر البستانہ داخل اولدی . علاءالدولہ مقتول دوشدی . ذوالقدریہ امارتنہ عائد اولان یرلر رتبہ وزارت ایله شہسوار زاده علی بکہ ویرلدی .

علاءالدولہ مصر سلطاننہ استناداً عثمانیلرہ قارشی طورہ بیلوردی . علی بکک پدری شہسوار بک عثمانلی طرفداری اولدیغنی ایچون مصرده صلب ایدلمشدی . بودفعہ البستانک اشغالی اوزرینہ مصر حکمداری قانصوغوری سلطان مصرک حقوقنہ تجاوز ایدلدیکنی ادعا ایتدی . ذوالقدریہ قطعہ سنده ینہ سلطان مصر نامنہ خطبہ اوقونمنسی تکلیف ایلدی . سلطان سلیم بوکا : « غوری آدم ایسه مصرده نامنہ خطبہ اوقوتقم ، سکہ ضرب ایتدیرمک حقنی محافظہ ایتسون : » جوابنی ویردی .

پادشاه آماسیہده ایکن عقد متارکہ ومصالحنہ ایتمک ، شاہک اسیر دوشمش اولان منکوحہ سنی اطلاق ایتدیرمک اوزرہ شاه اسماعیل طرفندن کوندیریلن ہیئت سفارت اردوی ہمایونہ کلدی . سلطان سلیم بوایشده بیوک برخطا ایتدی ، چیرکین برحرکتده بولندی . ایران سفیرلرینی حبس ایتدیردکن صکرہ شاہک نکاحلی زوجہ سنی نشانچی جعفر چلبی یہ نکاح ایتدیردی . ہراییکی حرکتی حقوق مللہ ، قوانین اسلامیہ یہ مغایردر .

چالدران مظفرتی عثمانیلرک کردستان وقفقاسیہ جہتلرنده بیوک بر نفوذ صاحبی اولملرینی تأمین ایتشدی . واقعا سلطان سلیم یکیکچرلرک

عصیان نردن طولانی آرزو ایتدیکی قدر بو حوالیده قاله مدی ایسه ده اذربجان جهتلرینه مأمور ایتدیکی بقیلی محمد پاشانک معیتده قوه کله براقشدی . دیاربکر ، سعد ، بتلیس ، پالوکی اولجه ایرانیلرک اداره سنده ویاتحت نفوذنده بولان محللرک بکری تابعیت عثمانیه کیردیلر ؛ بقیلی محمد پاشانک ومشاوروی مقامنده بولان مورخ منلا ادریس بتلیسینک همتلریله کردستانک ، الجزیره نک شمال قسملری ممالک عثمانیه صرہ سنه کچدی . عثمانیلرک عودتندن صکره تبریزه عودت ایدن شاه اسماعیل کردستانه اهمیت ویره رک دیاربکری استرداد ایچون عسکر کوندردی ایسه ده موفق اوله مدی .

سلطان بایزید زماننده مصر حکومتی ایله ظهور ایدن
مصر مفری آطنه مسئله سنده کی موفقیتسزک سوء تأثیر حاصل ایتشدی . شیعلری اورته دن قالیر مقایستین سلطان سلیم ریاست اسلامیه یه کچمک آرزو سنده بولندیغدن خلافت وحریمه صاحب اولان حکومت مصریه ایله ایرکج محاربه ظهوری طبعی ایدی .

سلطان سلیم مصر سلطانلرینک بنده سی اولان البستان بکی علاء الدوله نک کله سنی قاهره یه کوندرمش ، بونسکله محاربه ایتمک ایستدیکنی ایما ایتشدی . فقط او زمان قاهره مرکز خلافت اولدیغدن فی سبیل اه جهاد ایله مشغول اولان عثمانیلرک مصر حکومتی ایله محاربه سی بادی تردد اوله بیلردی . فی الحقیقه محاربه یه اساساً قرار ویرلمش اولدیغی حالده صدراعظم سنان پاشا مصر طور اغندن کچمک اوزره دیاربکره کیدیورمش کی ۴۰,۰۰۰ کشیلک بر اردو ایله شتر حدودینه کوندردی ، پادشاهک ده ایران اوزرینه کیده جکی شایع اولدی .

دیاربکره کیتمک ایچون مصر طور اغندن کچمک ایستین صدراعظمه

مصریler طرفندن جواب رد ویرلد کدن ماعدا ابراز خصومت دخی اولندیغی استانبولده خبر آلمسی اوزرینه عقد ایدیلن مجلس مشورته هر سگ زاده احمد پاشا مصر سلطانلرینک تأدیجی لزومندن بحث ایتدی . زنیلالی علی افندی مصر اوزرینه سفرا یچون فتوی ویردی . نشانچی محمد چلبی خلافت اسلامیه نك خاندان عثمانینك حق اولدیغی سویلدی . بونك اوزرینه تدارکاته ابتدار اولندی . مصر سلطاننه قرهجه پاشا دیمکله معروف احمد بك وروم ایلی قاضیعسکری زیرك زاده مولانا رکن الدیندن مرکب بر هیئت سفارت کوندرلدی .

شهرزاده سلیمان سلطان نائب سلطنت صفیله ادرنده ، پیری پاشا ایله هر سگ زاده احمد پاشا محافظ صفیله استانبول و بروسه ده قالدقن صکره اردوی هایون قونییه طوغری حرکت ایتدی . سفر هایونك مصر ایله ایراندن هانکیمی اوزرینه وقوعه کله چکی هنوز اعلان اولنماشدی .

پادشاه طرفندن مصر سلطاننه کوندریلن ایکی سفیر الی بیک کشیلک بر اردو ایله حلبده بولتان سلطان (قانصوغوری) طرفندن سوء معامله یه هدف اولدیler ، حبس ایدلایلر ؛ صکره پادشاهك حدوده تقریبی صره سنده « صلح مذاکره سنی سلطان سلیم ایله شاه اسماعیل آره سنده یاپسونلر . » سوزیله اعاده اولدیler . بونك اوزرینه مصر اوزرینه سفر هایون اعلان ایدلدی .

اردوی هایون مصر حدودینه کلدیکی زمان عینتاب امیری بونس بك پادشاهه عرض اطاعت ایتدی . او صره ده سلطان غوری طرفندن کوندریلن هیئت سفارت اردویه واصل اولدی . بوهیئت امرای مصریه دن (مغولبای) ایله اون نفر زرهللی عسکردن مرکب دی . پادشاه علمادن برکیمسه نك ایلاچی کوندرلیوبوده عسکر اعزام قلنمسنه حدتلندی ، هیئت

سفارتك قتلنى امر ايتدى . بو امرك اجر اسنه باشلاندىغى زمان وزراردن
يونس پاشا ايلچينك شرعاً تعرضدن مصون اولديغى سويلهرك حياتك
باغشلامسنى استرحام ايلدى . سلطان سليم ايلچىنى اولديرتدى ؛ فقط
صقالنى تراش ايتديروب بر او يوز و طوپال مر كبه ار كاباً مصر سلطاننه
كوندردى .

نهایت ایکی اردو خلبك شمالنده قارشى قارشى به كلى . مقام داودك
بولنديغى ير اولان (مرج دابق) ده وقوعه كلن محاربهده مصر اردوسى
بك چابوق مغلوب اولدى . چونكه مصريلر ك طوپلرى اولمديغى كې ايكي
صنفه آيريدن عسكرلرى آره سنده دخی اختلاف وضدیت واردى . سلطان
غورى فرار ايدن عسكريله برابر چكيدى و اثنای راهده يا اختيارلنى حسیيله
نزول اصابتدن ، يا خود امر اسندن برينك اهانتدن وفات ايتدى .
اردوكاھى ، خزينه سى عثمانيلر انه كچدى . امرای مصر يه دن (خيرباى)
تعقينه مأمور اولان يونس پاشايه تسليم اوله رق پادشاهه عرض اطاعت ايلدى .
عثمانيلر مصر اردوكاھنده ۲۰۰ قنطار كموش و ۱۰۰ قنطار آلتون بولديلر .
بو محاربه دن صكره سلطان سليم حلبه كيردى . ايلك جمعه نمازنده
خطبه كندى نامه او قوندى . خطيب سلطان سليم نامه « صاحب الحرمين
الشریفين » عنواننى علاوه ايتدى ؛ سلطان سليم كال ممنونيتندن لابس
اولديغى قيمتدار قنطاری خطبه احسان ايدرك بو عنوانك « خادم الحرمين
الشریفين » ه تحویلنى امر ايلدى . حلبك سقوطى ملاطيه ، ديوريكى ،
بهسنى ، عينتاب ، قلعه الروم كې مصر حدودنده و مملوكلر انده بولسان
ديكر مواقعك عثمانيلره انتقالنى موجب اولدى .

پادشاه حلبده بر قاچ كون اقامتدن صكره حما و حص طريقه شامه
كيتدى . قانصو غورى به خلف تعيين ايتك ايستين امرای مصر يه عسكرلر يله

مصره عودت ایشلردی . بناءً علیه عثمانلیر بلا حرب شامه داخل اولدیلر .
شام محافظی امیر ناصرالدین پادشاهه دخالت ایتدی .

موسم قیش ایدی . پادشاه درت آی قدر شامده قالدی ؛ مقامات
مشهوره بی زیارت ، اطرافدن کلن مشایخ عربانی تلطیف ایتدی ؛ مملکتک
تشکیلات اداره سیله اشتغال ایلدی . بو اجرا آن حسن تأثیری موجب
اولدی . شامک فتحی عثمانلیر ایچون مهم بروقع ایدی . چونکه بولده یه
صاحب اولان حکومت حریمه دخی مالک عد اولنه بیلیر ایدی . ذاتاً
مصر حکومتک حریمه مالکیتی مصردن زیاده شام جهتلرینه صاحب
اولسنک نتیجه سی ایدی . آرتق عثمانلیر ایچون حریمین یولی آجیلمشدی .
قاهره یه کیندن امرای مصریه (طومانبای) ی قانصوغورینک هنوز
بك كوچك اولان اوغلنه ترجیحاً سلطان انتخاب ایتدیلر . سلطان سلیم
سوریه بی مصردن تقریق ایدن چولی ایلک بهارده کچمک ایچون تدارکاتده
بولیوردی . صونقلی ایچون برقاچ بیک دوه ساتون آلدی ؛ هر نفره
ایکی بیک آچه طاعیدلدی . سنن پاشا ۵۰,۰۰۰ کشیک بر قوت ایله غزه
طرفلرینه کوندرلدی .

سلطان سلیم قاهره یه بر هیئت سفارت کوندره رک دولت عثمانیه یه
اطاعت ایدلمک ، خطبه وسکه پادشاه نامنه اولمق اوزره مصرک امرای
چراکسه النده قالمسینی تکلیف ایتدی . سفیرلر طومانبای طرفدن حسن
قبول ایدلدیلر ؛ فقط سرایدن چیققدقلری صرهدده امرای مصریه دن
آلان بك طرفدن قتل اولندیلر . بونک اوزرینه محاربه قرارلشدرلدی .
مصر اردوسنه باش قوماندان تعیین اولتان جانبرد غزالی ۱۰,۰۰۰ کشی
ایلّه قاهره دن چیقدی . غزه یه یاقین بریرده یونس پاشا کاربانسرای جوارنده
عثمانلیلرک وزیر اعظم سنن پاشا قومانداسنده کی پیشدارلرینه راست کلدی .

شدتلی بر محاربہ اولدی . کولہ منلر مغلوباً رجعت ایتدیلر . بوموفقتدن صکرہ پادشاہ قدسی زیارت ایتدی . صفد ، طبریہ ، نابلس ، قدس ، خلیل الرحمان تسلیم اولدیلر . عرب قبیله لری شیخلری پادشاهه عرض صداقتہ کلدیلر . مصرہ کیتمک ایچون چولدن کچمک ، عسکرہ لازم اولان صوبی دوه لرله کوتورمک ، برچوق مشکلاتہ کوکس کر مک ایجاب ایدیوردی . بومشکلاتدن بحث ایدن وزیر حسین پاشا اعدام اولندی . غزه نك ضبطدن وجوارده کی شهر لر دخی انده ایدلکدن صکرہ اردوی هایون او صرده یاغان یاغمورک بخش ایلدیکی سهولت آره سنده اون کونده چولدن کچدی . لکن مصر عربانی تمادیاً عثمانلی اردوسنه هجوم ایدیورلردی . کولہ منلر بونلرک کتیره بیلدکلری ترک باشلرینک آغیرلغجه آلتون ویریورلردی . نہایت پادشاہ قاہرہ جوارینہ واصل اولدی [۹۲۲] .

طومانبای کندیسنه خائن اولان جانبرد غزالینک رأینہ اتباعاً طوپلرینک قسم کلیمسی ریدانیہ کوی جوارنده صاقلامشدی . جانبرد غزالی پادشاهه مقطم طاغنی طولاشمسنی توصیه ایله ریدانیہ یه سرعتله کلدیکی حالدہ قوملر ایچنده کی طوپلردن هیچ قورقولیه جغنی خبر ویردی . سلطان سلیم دہ طاغنی طولاشہ رق ریدانیہ یه کتیدی . وقوعه کلن محابوہدہ کولہ منلر صوک درجہدہ شجاعت و متانت کوستردیلر ، فقط عثمانلی طوپلرینہ مقاومت ایدہ میہرک یکر می بش بیک تلفات ویردکدن صکرہ کری یه چکیلدیلر .

طومانبای ایله امرای مصریہ دن آلان بای وقوردبای سلطان سلیمی حیاً ویا میتاً اله کچیرمکہ یمین ایتمشلردی . محاربہ نك اک شدتلی زمانندہ اردونک مرکزینہ طوغری هجوم ایتدیلر ، فقط پادشاہ ظنیله صدراعظم سان پاشای اولدیردیلر .

پادشاه بومظفری متعاقب قاهره یه کیرمدی ؛ قاهره قارشیسنده کی
 وسطانیه آطه سنده قاهره شهره بر مقدار محافظ عسکر کوندردی . اوچ
 کون صکره طومانبای کیجه لین شهره کیره رک محافظلری کاملاً قتل
 ایتدیکندن اردو قاهره یه کیردی . اوچ کون اوچ کیجه سوفاقلرده
 وقوعه کلن قانلی محاربه ده الی بیکی متجاوز نفوس تلف اولدی . نهایت ،
 غلبه ایدن پادشاه بولاق اردو کاهنه عزیمت ایتدی . طومانبای جیزه یه
 چکیلدی . مقاومتده دوام ایتدی . حتی بردفعه اوزرینه سوق اولنان بر
 مفرزه مز مغلوب اوله رق عثمانلیردن آلتی بیک ، کوله منلردن درت بیک
 کشی مقتول دوشدی .

پادشاه مصرده حکمدارلنی طانمق و خطبه ایله سکه نام پادشاهی یه
 اولمق شرطلریله صلح تکلیفی ایچون وزیر مصطفی پاشای بش یوز عسکرله
 طومانبایه کوندردی . هیئت سفارت محافظلری ایله برلکده کوله منلر
 طرفدن قتل ایدلدیکندن سلطان سلیم دخی بالمقابله بعض امرای مصریه یی
 اعدام ایتدیردی . طومانبای مصر سفلاده ، جیزه جوارنده مقاومتده
 چالیشدی . مصر علیاده قالسه یدی بلکه ده اوزون مدت طیانه بیلیردی .
 فقط دلتاده بر معاونت کوره مدی . جانبرد غزالی کندیسنی تعقیب ایدیوردی .
 بدویلردن اومدینی یاردیمی کوره مدی . هر طرفدن احاطه ایدلدی . نهایت
 خانه سنه التجا ایتدیکی حسن مرری اسمنده بر عربک اهانتیله توقیف
 اولندی . سلطان سلیم طومانبایک طو تولدیغنی ایشیدنجه : « الحمد لله !
 ایشته ، شمدی مصر فتح اولندی . » دیدی . کندیسنی احترام ایله
 حضورینه قبول ایتدی . پادشاه طومانبایک وقار وشجاعته حیران قالدی .
 اونی استانبوله کوتورمکه قرار ویرمشدی . فقط جانبرد غزالی ایله خیربای
 طومانبایک ازاله سی ایچون بر فساد قوردیلر . پادشاهک شبهه سنی ، وهمنی

اویاندر دیلر . قاہرہ سوقاقلرنده آرہ صرہ : « اناہ ینصر السلطان طومانبای ! »
 نداسی ایشیدلدی . بونک اوزرینہ سلطان سلیم طومانبای باب الزویلہ دہ
 صلب ایتدیردی . طومانبایک نعشی حکمدارلغہ لایق احترامات ایلہ
 دفن اولندی .

پادشاہ شام والیملکنہ جانبرد غزالی بی ، مصر ایالتنہ دہ خیربائی تعیین
 ایتدی . مصرک تشکیلات ادارہ سنی تنظیم ایلدی . امیر مکہ شریف محمد
 ابوالبرکت کعبہ نک آناختارینی سلطان سلیمہ تقدیم ایتدی . پادشاہ سلطان
 محمد اول زمانندن بری کوندریلن صرہ ہایونی ایکی مثلنہ ابلاغ ، مصر
 صرہ سنی ابقا ، حریمہ مرتب ارزاق ونقودی ارسال ایلدی . قاہرہ دہ
 بولنان خلفای عباسیہ دن متوکل علی اللہ ثالث خلافت اسلامیہ بی عثمانلی
 پادشاہنہ ترک ایتدی [۹۲۳] .

سلطان سلیم وسطانیہ آطہ سندنہ ، مقیاس نیل اوزرنده کی قصر دہ
 اوطوردی . ایکی دفعہ حیاتی تہلکہ یہ دوچار اولدی . برکون امرای
 مصریہ دن (قانصو عادل بای) سلطان سلیمی اولدیرمک مقصدیلہ قصرک
 سقفندن ایجری یہ کیرمکہ چالیشدی ، فقط موفق اولہ میہ رق قاجدی . بر
 کون دہ پادشاہ نیل کنارندہ قایق دن چیقارکن نہرہ دوشدی ؛ قایقچی
 طرفندن قورتارلدی .

سلطان سلیم برآراق اسکندریہ یہ عزیمت ایدرک پیری محمد پاشانک
 کتیردیکی دونمائی زیارت ایتدی .

اوسنہ نیل زراعتہ فائدہ بخش بر صورتدہ طغیان ایتدی . پادشاہک
 اجرا آتی ، نیک طغیانی اہالی اوزرنده حس تأثیری موجب اولدی .
 یاز موسمی قاہرہ دہ امرار ایدلدی . پادشاہ صوک بہار دہ نیک منبعہ ،

سودانه طوغری کیتمک نیتند ایدی ؛ فقط عسکر استانبوله عودت ایتمک ایستوردی . عودته قرار ویرلدی .

ایلول ظرفنده حرکت ایدیله وک چولدن کچیلدی ، شامه عودت ایدلدی . اثنای راهده صدر اعظم یونس پاشا قتل اولندی . پادشاه صدر اعظمه خطاباً : « مصر آرقه مزده قالدی » دیمش ؛ اساساً مصر سفرینه مخالف اولان یونس پاشا : « اوت ؛ لکن بونجه زحمت و مشقتدن نه حاصل اولدی ؟ اردونک یاریسی محاربه ده ، قوملر ایچنده محو اولدی ؛ شمدی ده مصر حکومتی خائنلر النده براقه رق کیدیوروز . » جوابی ویرمشدی . دفن اولدینی یره الیوم « خان یونس » دنیلیر .

مسند صدارت پیری محمد پاشایه توجیه ایدلدی .

مصرک فتحی وندیک حکومتک بحر سفید تجارتی عثمانلیر النده براقوردی . بونک ایچون وندیک حکومت عثمانیه ایله هر زمانکندن زیاده خوش کچینمک لزومنی حس ایتدی ؛ قاهره یه (قونترینی) و (موچه نیغو) اسمنده ایکی سفیر کوندره رک قبریسک اشغالندن طولای مصر حکومتنه ویرمکده اولدینی ۸,۰۰۰ دوقه نک پادشاهه اعطاسنی تعهد ایدلدی . ذاتاً سلطان سلیم کرک قاهره ده ، کرک شامده بولدینی صروده حکومت متجاوره طرفدن سفیرلر کلدی . محارستان ایله تمدید متارکه ایدلدی ؛ شاه اسماعیلک برای تبریک کوندردیک سفیر حسن قبول اولندی . فقط شاهک طلب صلح خصوصنده کی نامه سنه التفات ایتدی . پادشاه ینه ایرانه سفر ایتمک نیتند ایدی . عسکرک یورغونلغی بوسفری تأخیر ایتدی .

سلطان سلیم قیش موسمنی شامده کچیردی . حسن اداره سیله قلوب عامه یی جلب ایتدی . سوریه حوالیسنده تحریر املاک معامله سنی اجرا ، معابد و مبانی مبارکه یی تعمیر ، قدسی زیارت ایدلدی .

ایکی آی حلبہ اقامت ایدلدکن وایکی آی ده یولده کچدکن صکره
استانبوله مواصلت اولندی [۹۲۴] .

یاوز سلطان سلیم طقوزسنه قدر اجرای سلطنتدن
سلطانہ سلیمک مذمانی صکره ۵۴ یاشنده وفات ایتدی [۹۲۶-۱۵۲۰] .
موفقیات وفتوحاتی پک بیوکدر . ممالک عثمانیه بر مثلی دها مملکت علاوه
ایتدی : کردستان ، آذربایجان ، دیار بکر ، حلب ، شام ، مصر ، حجاز .
دولت عثمانیه قازاندریغی اهمیت مغنویه بوفتوحات مادیه دن دها بیوکدر .
خلافت اسلامیہ نک آل عثمانہ انتقالمی استانبولک فتحندن بیلہ مهمدر .
خاندان عثمانی اعضاسنک معارفده اک بیوکلرینه معادل وادیسانده
جمله سنه فائق اوله جق درجه ده تحصیل کمال ایلش اولان سلطان سلیم
اوروپا جهتنده توسیع فتوحاتی نسبتاً قولای کوره رک بونی اخلافه بر اقمش ،
کندیسی اک مشکل ، اک مخاطره لی سفر لریک اجراسنه تشبث ایتشدی .
مخاطره نه قدر بیوک ایسه آنکله اوغراشمغه پادشاهک عزیم عالیجنابانه سی ده
او قدر متزاید ایدی . ایران و مصر سفر لری بوکا دلیدر .

سلطان سلیمک بیوک بر داهی اولدیغنه شبهه یوقدر . بتون اجرا آتندن
آکلاشیلان غایه اسلامک قوای متفرقه سنی عثمانیلر انده جمع ایتک
ایدی . دولت صفویه نک تهلکه سنی ، قریمک اهمیتنی پک چابوق آکلامشدی .
آز زمان ایچنده چوق ایش یاپان بویوک پادشاهمزک عمری مساعد
اولسه یدی بلکه ده آسیای وسطایه قدر بتون اسلاملری بر اداره آلتنه
طویلامغه موفق اوله جغنی شبهه سز ایدی .

سلطانہ سلیم زمانده کی یاوز سلطان سلیمک درت صدر اعظمی هر سک زاده

رحال احمد پاشا ، خادم سنان پاشا ، یونس پاشا و پیری

پاشادر . احمد پاشا درونجی دفعه اوله رق سلطان سلیم زمانده صدر

اعظم اولمش، ایران سفرندن عودت ایدیلیرکن عزل ایدلمش، مصر سفرندن عودتده حلب جوارنده وفات ایتمشدر. یاریم عصر قدر دولته بیوک خدمتله ابرازندن خالی قالمامشدر. چالدران قهرمانی سنان پاشا ریدانیه محاربه سنده تلف اولدینی زمان سلطان سلیم: «مصری آلدق اما یوسفی آلدیروب مصری کندمز» بیت الاحزان قیلدق. «سوزلریله وزیر اعظمتک ضیاعنه نه قدر تأسف ایتدیکنی کوسترمشدر.

سلطان سلیمک یونس پاشایی قتل ایتدیرمسی برتهور اثری دکلدرد. یونس پاشا پادشاهک تشبثانه سد چکمکدن بشقه برشی دوشومین بروزیر ایدی. مصرک اداره سنه مأمور اولدینی زمان چرکس امراسنک اموالی مصادره ایله خزینه سنی طولدیرمغه و برطرفدن عربان ایچنده کندینه طرفدار پیدا ایتمکه چالیشمش و حتی مذاهب اربعه قاضیلقلرینی مزایده یه چیقارمشدی. مولانا ادریس بتلیسینک حضور شاهانه یه تقدیم ایتدیکی بر فارسی قصیده ده بواحوالی ایما ایتسی اوزرینه پادشاهک تحقیقاتندن یونس پاشانک سوء اداره سی تین ایتمشدی. یونس پاشا مصر اداره سنک کندی الندن آلمسندن طولای دلیکیرا و له رق تر بصدده دوام ایتمش و نهایت قتل ایدلمشدر [*]. پادشاهک صوک وزیر اعظمی اولان پیری پاشا مدبر ایدی. یاوزلماز ایتنی قازانمشدی. فقره آتیه بوکادلیلدر:

[*] یونس پاشانک سبب قتلنده معاصر نری بیله اختلافه دوشه رک حتی سلطان سلیمان زمان حکومتنده ابن کمال ایله مصاحبت ایدرکن: «پدرک حرکاتنه تعریض حدم دکل ایسه ده بر سوز ایچون یونس پاشایی اعدام ایتدیرمسی بکا غریب کورینور. «دنجه ملا» پادشاهم، یونس پاشا مصر حکومتندن محروم اولدینی ایچون خیانه شاه اسماعیل ایله مخبریه باشلامش و پدرکز هر طرفده بولنان جاسوسلر معرفتیه کیفیته وقوف حاصل ایتمشدی. مضرتی دفع ایچون قتل ایتدیردی.» دیمشدر. - اوراق پریشانندن.

وقنا کہ استانبولہ موصلت اولندی ؛ پیری پاشا مصالحہ کثرتندن شکایتہ کندینہ معاونت ایچون بر وزیرنای تعیینی ایستہرک بوخدمتہ روم ایلی بکار بکی مصطفی پاشای توصلیہ ایتمک : « بکا اولہ مستشارک لزومی یوقدر . مادامکہ ایستہ یورسک ، سنک وزیرک اولسون . » جوابیلہ مشارالمک وزارت ثانیہ دہ بولمنسہ مع الکراہہ رضا کوسترر . پاشا بومأموریتہ کلیر کلز حامیسی اولان پیری پاشای اترقابہ قیام ایلہ حضور پادشاہیدہ رأیلرینی تخطئه و مساوینی قعدادہ جرأت ایدنجه پادشاہ : « سلیم چوجقمیدرکہ سنہ کی احقک سوزیلہ بر امین آدمی معاتب ایسون . بیقیل حضورمدن ؛ سن بنم آدمم دکل ، پیری پاشانک وزیرسک . » یولو متجلدانہ بر تکدیر ایلہ سوزینی کسر . کندینی قهر ایتمکی قورمش ایکن پیری پاشانک مرومندانہ عرض ایتمکی شفاعت سایہ سندیہ عفو ایلر . - اوراق پریشادن .

سلطان سلیم برادر ویکنترینی اولدیرتمش ، وزیرلری وسائر مأمورلری حقندہ غدارلق کوسترمش اولمقلہ برابر بیطرفانہ حکم ویرہ بیلیمک ایچون وزرا وارکندن بعضلرینک پادشاہک اجرا آتی نتیجہ سز بر اقق ایچون اترقیہ لر چویرمک ، حرص اقبال ایلہ پک مناسبتسز افعالہ جرأت ایتمک کی شیلرلہ اوزمان معتاد اولان جزای اعدامہ کسب لیاقت ایتمک لری دم نظر دقتہ آلمیدر . اعدام اولنان یدی وزیردن ہمدوم وحسین پاشا لرایران ومصر سفرلرینہ مانع اولمق ایستہ ملرندن ، دوقہ کین احمد پاشا ایلہ اسکندر پاشا یکیکچریلرک عصیانندن ، ایکی مصطفی پاشا ایلہ یونس پاشا صداقتسز - لکمرندن طولانی قتل ایتمیشدر .

یوقسہ سلطان سلیم وزرا ، علما ، امرا آرمہ سندیہ کی ارباب اقتدار کی کشف ایتمش ؛ اولرہ دائماً حسن معاملہ ایدرک کندیلرندن بیوک خدمتار کورمشدر . پیری پاشا ، بیقلی محمد پاشا ، ادریس بتلیسی ، کمال پاشا زادہ ، خواجہ سلطانی حلیمی ، شاعر نجاتی ، نشانی محمد پاشا ، مولانا علی جمالی . . . الخ بوزوات جملہ سندرلر . سلطان سلیم بوکی ذواتہ دائماً

التفات کو سترمشدر. مصر سفر نده خواجہ سی حایمی ، قاضی عسکری کمال
 پاشا زادہ ، طیبی اخی چلبی ، ندیمی حسن جان ، ادیس پادشاہک معیتندہ
 ایدیلر . ملا ادیس مصر ادارہ سندہ کی قاریش یقلقلری ، سوء استعمالی
 پادشاہ سربستانہ اخبار ایتدی . سلطان سلیمک بوکی سربستانہ ، فقط
 صمیمی اقوال و حرکاتہ نہ یولده مقابله ایتدیکنی فقرہ آتیه دخی کوستر :
 پادشاہ مصرده ایدی . اردونک باشلیجه امراسی مصرده مدت مدیده اقامتدن
 اوصانہرق پادشاہی استانبوله عودت ایچون اقناعه بر چاره بولسنی کمال پاشا
 زاده دن رجا ایتشلردی . برکون پادشاہک بر تترهنده آت باشی برابر کیدرلرکن
 سلطان سلیم عسکر آره سندہ نہ سویله نیلیدیکنی موردی . قاضی عسکر نیل کنارنده
 بر نفرک روم ایلی یه برآن اول عودت آرزوسنی مشعر شو :

نہ منر قالدی بزم ملک عریده نیجه بر طورورز شام و حلبده ؟
 جهان خلقی قامو عیش و طربده کل اخی کیدلم روم ایلرینه !

ترکی بی جاغیردیغنی ایشیتمش اولدیغنی سویلیدی . آرزوی عمومینک شو صورتله
 ایما ایدلسی سلطان سلیمہ ناخوش کلیہ رک عزیمت حاضرقلری کورلسنی امرایتدی .
 بر قاق کون صکرہ کمال پاشا زادہ پادشاہ ایله ینہ ہم عنان اولوب کیدرکن
 سلطان سلیم کمال پاشا زادہک استادی اولان منلا لطفینک نہ سببه مبنی قتل
 اولندیغنی سؤال ایلدی . کمال پاشا زادہ جواباً لطفینک آجی استہزالریله پک چوق
 دشمن پیدا ایتمش اولدیغنی افاده و مرحومک شوخ طبیعتلی اولدیغنی و لطیفه طریقہ
 سویلیدیکی اختراعی بعضی سوزلری ایشیدنر صحیح صاندیغنی علاوه ایتدی . پادشاہ دیدی کہ :
 — سنده استادکدن بویله شیلر اوکرندکی ؟

کمال پاشا جسورانه شو جوابی ویردی :
 — داعیکیز نوبتی صاودم ، شمدی نوبت آرقداشم دعا جیکیز کدر .
 سلطان سلیم :

— کچن کون سویلیدیکک ترکی سنک اختراعکمی ایدی ؟
 دیہ موردی . کمال پاشا زادہ سربستانہ اعتراف حقیقت ایلدی ، پادشاہ
 طاریله جق یرده بش بوز دوه احسان ویردی . — هامی ترجمه سندن .

عصر سلیمی فقیه‌النردن نظر دقتمزی الك زیاده جلب ایدن مولانا علی جمالیدر . مولانا علی جمالی مفتیک خدمتی سلطان بایزیدک اواخر سلطنتده سکر ، سلطان سلیمک زمان سلطنتیه سلطان سلیمانک اوائل سلطنتده آلتی سنه مدت ایفا ایتمشدر . فتوالری « المختارات » عنوانی تحتده طویلا نمشدر . پنجره‌سنده معلق بولنان بر زنیله سوقاقده سؤال ورقلری وضع اولندیغی وجوابلری اصحابنه ینه زنبیل ایله ایصال ایدلدیکی ایچون « زنبیلی مفتی » لقبیه معروف اولان مولانا علی جمالی سلطان محمد ثانی طرفدن روملره ویریلن فرمان مسئله‌سنده اولدیغی کبی برچوق احوالده پادشاهی افراط و تفریطدن وقایه ایتمشدر .

برکون پادشاه خزینه خدمه‌سندن قباحترلی ثابت اولان یوز اللی کشینک اعدامی امر ایدر . مولانا علی جمالی همان حضوره کیره‌رک : « مفتینک وظیفه‌سی سلطان اسلامک امور آخرتی محافظه ایتکدر . شرعاً وجوب قتلری ثبوت بولیان یوزاللی کشینک عفوینی ایسترم . » دیدی . پادشاه : « بوایش امور حکومتندر . علمانک بوکا مداخله‌سی امور ملکیه‌نک اختلالی موجب اولور . سیاست مقتضای ریاستدر . » سوزلریله مقابله ایتدی . مفتی جواباً بومسئله پادشاهک امور آخرتندن و اوکا مداخله وظیفه‌سی اقتضاسندن بولندیغی ، او آدملری عفوایتزسه آخرتده اولدیغی عقاب عظیم کوره جکینی بیان ایتسی اوزرینه پادشاه عفو ایتدی .

مفتی کیده‌جکی زمان : « آخرته متعلق وظیفه‌یی ادا ایتدک . لیکن مهروته متعلق بر سوز وار . » دیهرک بو آدملرک وظیفه‌لری کسلیوبده سوقاقلرده تسأل ایتدیرملری شان سلطنته لایق اولدیغندن بخلله خدمتلرنده ابقالریی رجا ایلدی . پادشاه بو شفاعتی ده قبول ومفتی بی توقیرات ایله تشییع ایتدی .

مولانا علی جمالی بشقه بر فرستله دخی جبارتک ، حسیات نجیبه‌سنک اثرینی کوستردی . ایران ایله حریر تجارتک ممنوعیتی حقنده کی اسره مخالف حرکت ایتدکلری ایچون ۴۰۰ تاجرک ماللری مصادره و کندیلری اعدامه محکوم ایدلمشدی . پادشاهک ادرنه ینه عزیمتی اناسنده مفتی امر تشییعی ایفا ایدرکن بونلرک قتللری جائز اولدیغی سویلیدی . سلطان سلیم : « نلک عالمی اصلاح ایچون نلناتی قتل مباح دکلیدر ؟ » دیه صوردی . مفتی : « خلل

عظیمی مؤدی اولدینی وقت مباح اولور. «جوانی ویرمی اوزربنه سلطان سلیم : «پادشاهک امرینه مخالفتدن بیوک خلل اولورمی؟ مملکتده امری جاری اولیان پادشاهک زوال حکومتی قریبدر. «دیدمی. مفتی : «بونلرک مخالفتی ثابت دکلدور. زیرا حریر عسری آلتق اوزره مأمورلر تعینی اذنه دلالت ایدر. «سوزلریله مقابله ایلدی. پادشاه : «تدابیر ملکیه قاریشقی وظیفه کزدکلهدر. «جوانی ویردیهده مفتی بوکاده «امور آخرتکزدندر و بزم حق مداخله من وارددر. بو آدملری اطلاق ایدر سه کز فبها، والا عقاب عظیم وارددر. «دیهرک و سلام ویرمیه رک حدتله آیرلدی. سلیم اول فرط حدتدن بر آن آتک دیزکیننی چکدی ایسهده انفعاله غلبه ایله یولنه دوام ایتدی. وقوناق محله وارانجه محبوسلری اطلاق و ضبط ایدیلان اشیارلرینک اعاده سنی امر ایلدی. ادرنه به دخولنده روم ایل و آناتولی قاضیه سکرلکارینی برلشدیروب جمالی به توجیه ایتک ایستدی ایسهده مفتی عمر بنده «حکمت» لفظنی سویله مه مکه عهد ایتدیکنی بیان ایله اعتذار ایلدی. پادشاه مفتی به بش یوز فلوری احسان ایلدی کی وظیفه یومیه سنی الهی آقچه ضمیمه ایکی یوزه چیقاردی. - هامر ترجمه سندن.

۴

سلطان سلیمان دوری

اونونجی قرنه هجریه اروپا و آسیا
 سلطان سلیمان قانونی
 اون آلتنجی عصر میلادی به مصادف اونونجی
 قرن هجری کی کثرت وقایع اعتباریله
 کورولتیلی، ترقیات مدنیله نقطه نظرندن

مسعود دورلر پک آزدر. ولادت اوونجی قرنک ایلک سنه سنه تصادف ایدن اونونجی پادشاهمز سلطان سلیمانک زمان سلطنتی اوصاف متعدده ایله تاریخ عثمانینک اک مهم دوره سیدر. دولت عثمانیه قدرتنک، فتوحاتنک، مدنیتنک، آثار قانونیه و معماریه سنک اک واسع موجودیتنی بو پادشاهه میونددر. عثمانیلرک یالکزر «قانونی» عنوان متواضعانه سنی ویردکلری، اوروپا لیلرک «بیوک Grand» و «محتشم Magnifique» عنوانلریله یاد ایتدکلری سلطان

سلمانك زمان سلطنتی بتون دنیاده وقوعه كلن حادثات عظیمه دن طولانی قرون جدیدہ تاریخنك اك شایان دقت صفحاتندن بریدر.

اوتنجی عصرک اوائلنده آمریقانك کشفی اوروپا اصول تجارت وقوانین ثروتی تبدیل ایله موازنه سیاسیه بی یواش یواش وضع وتأسيس ایتشدر. شرقده شاه اسماعیل ، غربده (مارتن لوتر) تجدیدات دینییه قیام ایله حاصل اولان نتایج سیاسیه ومدنییه آسیاده نه قدر قصیر ومضر اولمش ایسه اوروپاده اومرتبده نافع وثمره دار اوله رق فکر انسانییه برطریق جدید آچمشدر .

فرانسه ده برنجی (فرانسوا) نك، انكلتره ده سکزنجی (هاری) نك اجرای حكومت ، پاپا اوتنجی (لئون) ك علوم وصناعاتی حمایه ، رونه سانس ، حركتنه ریاست ، (شارل كن) ك مذهب جدیدہ مقاومت ، (واسیل ایوانوویچ) ك روسیه عظمت مستقبله سی اساسلرینی تهیه ، برنجی (سكیسموند) ك قرق سنه لك بر سلطنت ایله لهستانك قدرتی تأیید ، هندستانك مغول حكمدارلرینك اك مشهوری اولان (شاه اكبر) ك دولتنه بتون آسیا حكومتلرینه نمونه امتثال اولمش بر اساس وضع ایلدیكى زمان قدر مجمع اعظم اولمش بر صفحه تاریخییه پك آرتصادف اولنور. ایشته ، صحنه تاریخنده سلطان سلمان بحق شهرت قازانمش اولان بو حكمدارلرك جمله سیله رقابت ایدہ جك بر صورتده عرض وجود ایلمش ؛ فاتحك ، قانونیلك ، عظمت ، عدالت ، ترویج علوم ، طول عمر وسلطنت ایله تمیز ایتمشدر .

سلطان سلمان جلوسی زماننده ممالك عثمانیه نك حال بلغراد ودر دوسك
سكونده بولمسندن ، روم ایلی و آناطولیده شام والیسی
جانبرد غزالینك عصیانندن بشقه بر وقعه تحدث
ایله مسندن بالاستفاده اولا بلغرادك [۹۲۷] ، صكره ردوسك [۹۲۸] فتحیله

دولت عثمانیه نك طونه دن اوته طرفه طوغری توسغی، بتون بحر سفیدك عثمانلی دونماسی حاكیتی آلتنه كیرمنی انتاج ایده جك ایکی بیوك تشبثی حسن نتیجه یه ایصاله موفق اولدی .

بلغراد وردوس فتوحاتی غربك قره و دكز یوللرینی عثمانلیره آچدی . بلغراد سایه سنده حدود عثمانیه صاوا نهرندن طونه و دراویه نقل ایدلدی . بالخاصه ردوس شوالیه لرینك بو جزیره یی ترکه مجبور اولملری غرب خرسیتانلق عالمه بك زیاده طوقوندی .

سلطان سلیمانك جلوسنی متعاقب ونديك حكومتی تبریک ایدر **عقد اولناه** تجدید معاهداته، حسن مناسباتك ادامه سنه مسارعت **معاهده** ایتدی . چونکه آطه لر دكزنده متعدد آطه لره

مالك اولدیغندن بونلرك محافظه سی حكومت عثمانیه ایله خوش كچینمسنه متوقفدی . بلغرادك فتحندن صوكره برای تبریک كوندریلن (مارقومو) نامنده کی سفیر بر معاهده تجاریه عقدینسه موفق اولدی . بالآخره دول سائر ایله عقد اولنان معاهداته، قایتولا سیونلره اساس اولان بو معاهده نامه اوتوز ماده یی حاویدر . اوزمان رجال دولت معاهده نك ایکی مساوی دولت آره سنده عقد اولنه بیله جکسی ، ونديك ایسه دولت عثمانیه نك حمایه سنده بر حكومت اولدیغنی سویلیه رك عقد اولنان معاهداته معاهده نامنی ویرمزلر، «مساعدا ت» دیرلردی . ایشته بومساعدا ت تاریخ عثمانیده بالخاصه حائز اهمیت اولان قایتولا سیونلره اساس اتخا ذ ایدلمشدر .

ونديك ایله عقد ایدیلن تجارت معاهده نامه سنك باشلیجه موادی بروجه آتیدر : اوچ سنده بر تبدیل ایدلمك اوزره دولت عثمانیه نزدنده بولندیر یله جق دائمی سفرانك صورت اقامتلی ، صرف ونديكلیله عا ئد میراث و مال دعوالرینك (بالیوز) دنیلن بوسفیر طرفندن رؤیتی ، تبعه

عثمانیہ ایلہ وندیکیلر آرہ سندنہ ظہور ایدن دعوالرک ، جنبہ و جنایت
ایشلرینک حین رؤیتندہ قاضی و محکمہ حضورندہ وندیک سفارتخانہ سی
مأمورینک حاضر بولمنسی ، بورج ایچون ویا سائر صورتلہ ہیچ برونڈیک
سفیرینک حبس اولنماسی ، وندیک تبعہ سنک سواحل عثمانیہ ایلہ داخل
مملکتندہ سربستجہ اجرای تجارت ایتلمری ویا لکزر داخلہ سیاحت
ایدہ جک تجارتک سفیر طرفدن اعطای ایدیلن تذکرہ یی حامل بولملری ،
وندیک کیملرینک چناق قلعه واستانبولہ معاینہ ایدملری ، وندیکیلرک
تونس و جزایر ایلہ تجارتلرینہ ممانعت ایدلمہ سی ، مجرمینک طرفینجہ
اعادہ سی ، اسرا فراریلرینک وندیک جمہوریتہ ردی ، ایچلرندہ اسلامی
قبول ایدنلر ایچون بیکر آقہ بدل اعطاسی ، دکر قضازدہ لرینک حمایہ سی
وبونلردن اجرت و سائرہ نامیلہ برشی ایستہ نیلمہ سی ، وندیک حکومتک
قبریس وزانطہ اطہ لرینک تصرفدن طولای برنجیسی ایچون اون بیک ،
ایکنجیسی ایچون بش بیک دوقہ آلتونک ہر سنہ دولت عثمانیہ ویرمسی ،
وندیکیلرک جزیرہ دن معفو اولملری ، حدود حاضرہ یہ طرفینجہ رعایت
اولمنسی [۹۲۸] .

سلطان سلیمان ردوس سفرندن عودتندن صکرہ برکون
وزیر اعظم پیری پاشاہ : « غایت مقبول و معتمد بر
قولم وارددر . بریوک منصب ایلہ بہرہ مند ایتک ایسترم . »
دیمش و پیری پاشا مقصد شاہانہ یی آکلایہ رق : « اویلہ مرغوب و موثوق
بندہ لرینہ لایق اولان قولککزک مأموریتیدر . » جوابیلہ استغفا الیشدر .
پیری پاشا ایکی یوز بیک آقہ تخصیصات ایلہ تقاعد ایدلدی . رینہ خاص
اوطہ باشی ابراہیم آغا وزیر اعظم تعین اولندی .
پارغہ کمیچیلرندن برینک اوغلی وکنجلیکنندہ ماهر کمانچی اولان

ابراہیم و احمد
پاشا

ابراهیم پاشا قورصانلر طرفندن طوتیه‌رق مغنیا جوارنده بر طول قادینه صائمیش ایدی . بوقادین کنج کوله‌نک ذکاسنی ، هنرینی تقدیر ایدرک تربیه‌سنه اعتنا ایتیش ایدی . اوزمان هنوز ولی عهد صفیه مغنیه‌ساده بولنان سلطان سلیمان بر کون کز رکن کمان چالقدده اولان ابراهیمه تصادف ایتیشدی . ذکا و درایتته مقتون اوله‌رق یانه ایشدی . جلوسنده خاص او طه باشیلغنه [مابینجیلکه] تعیین ایشدی . نفوذی بالطبع کوندن کونه آرتیشدی . نهایت ، ردوس سفرینی مناسب کورمه‌مش اولان پیری پاشانک برینه کچدی .

اوزمان وزیر ثانی بولنان احمد پاشا یاوز سلطان سلیمک امکدارلرندن ایدی . سلطان سلیم پدری سلطان یازید ایله وقوعه کلن مصادمه‌دن عودت ایله آخیولی‌یه کیدرکن کندیسنی تعقیب ایدنلردن بر قاچ کشی یتیشمش ، سلطان سلیمه سوء قصد ایتیش ایکن احمد پاشا بیوک بر شجاعت ایله جمله‌سنی دفع وازاله ایتمه‌ک موفق اولمشدی . یاوز زماننده میراخور وبعده وزیر اولمشدی . پیری پاشانک مقامنه کوز دیکمش وحتی اونی اسقاط ایچون افتر ایتیش اولدینی مروی ایدی . پیری پاشا عزل اولتجه ایکنجی وزیر بولمق حسیله وزارت عظمیانک حسب‌الاصول کندیسنه توجه ایده‌جکی اعتقادنده ایدی . ابراهیم پاشایه کوستریلن ترجیحه تحمل ایده‌مدی . استانبولده بولنماق ایچون مصر والیلکنی ایسته‌دی . پادشاهده احمد پاشانک آرزوسنی اسعاف ایتدی .

«خائن» لقبیه یادایدیلن احمد پاشا وزارت عظمایه بدل مصر سلطانلغنی غصب ایتمک ایسته‌دی . فقط کوله‌منلری اله‌کچیره‌بیلدیکی حالده یکیچریلرک صداقتلرینی بوزمه‌مدی . مصرک بیوک تیمارلرینی تصوراتنه آلت اولان اسافله ویردی ؛ قاهره قلعه‌سنده کی یکیچریلردن قورتولمق ایچون هر درلو

واسطہ یہ تثبیت ایتدی؛ لکن خدعہ لری هیچ بر نتیجہ ویرمدی. نہایت،
رفع نقاب ایدرک طرفدار لریلہ قلعه بی محاصرہ ایتدی. بیکچریلر وقوعہ
کلن بر محاربہ دہ عاصیلردن درت بیکنی اولدیردیلر. احمد پاشا قلعه ایچنہ
کیدن متروک بر صو یولندن بالاستفادہ کولہ منلری قلعه بی ادخال ایتدی
ویکیچریلری قتل عام ایتدیردی. سلطان عنواتی آلدی؛ کندی نامنہ
سکہ ضربنہ، خطبہ اوقوئمغہ باشلادی. اسکندریہ ایلہ بتون ساحل النہ
اولدینی ایچون مصر ایلہ مرکز دولت آرہ سندہ موصلاتی کسمک قولای
اولدی. استانبولدن کوندریلن یکی والی بی کمدہ ایکن طوتہ رق قتل
ایتدیردی.

احمد پاشا مصرک اداره سنی اوچ وزیرینہ تقسیم ایتدی. لکن بونلردن
محمد بک پادشاه صداقت کوستردی. برکون احمد پاشا قلعه دن شہرہ
ایتمش ایدی. محمد بک بر قاچ یوز عسکرلہ احمد پاشانک بولندینی یری
باصدی. فقط پاشا قور تولدی؛ قلعه بی قاجدی. قلعه ضبط ایدلدی.
احمد پاشا ینہ فرارہ موفق اولہ رق بنی بکر عشیرتہ التجا ایتدی. نہایت،
طوتیلدی؛ باشی کسیلہ رک استانبولہ کوندرلدی. محمد بک مصر دفتر دارلغنہ،
کوزلجہ قاسم پاشا ایکنجی دفعہ اولہ رق مصر ولایتہ تعین ایدلدی.

اوصرہ دہ سلطان سلیمانک همشیرہ سی وزیر اعظم ابراہیم پاشایہ تزویج
ایدیلہ رک امثالی کورلمہ مش بر طنطنہ ایلہ دوکون یاییلدی. آت میدانہ
مکلف چادیرلر و پادشاه ایچون بر تحت قورولدی. سکیز کون متہادیا
ضیافت ویرلدی. طقوزنجی کون پادشاه ابراہیم پاشانک آت میدانندہ کی
سراینہ کیتدی. دیگر بر کون کورش، رقص، قوشو، اوق یاریشی
وسائر عمومی اکلنجہ لر ترتیب اولندی.

ابراہیم پاشا قدرت مطلقہ بی پادشاه ایلہ مقاسمہ ایتمشجہ سنہ فوق العادہ

بر نفوذ صاحب اولمشدی . ازدواجندن درت آی صکره والی قاسم پاشا ایله دفتر دار محمد بک آره سنده ظهور ایدن اختلافاتی فصل ایتک و مصرک قوانین قدیمه سنی تأسیس ایلک اوزره مصره عزیمت ایتدی . دونما ایله استانبولدن حرکت ایتدیکی کون پادشاه آطه لره قدر ابراهیم پاشایی تشیع ایلدی، که بو عثمانلی پادشاهلری تاریخنده بر بشفه مثالی کورلمه مش برالتفا قدر . ابراهیم پاشا مرمری سده قره یه چیقدی . کچیککی یرلرده موراداردنی اصلاح ایده ایده مصره واصل اولدی . وزیر اعظمک قاهره یه دخولی او قدر طنطنه ایله وقوعه کلدی، که چرکس سلطانلرینک احتشاماتی بونک یاننده هیچ قالیر . بومناسبتله پادشاهک کندیسنه ویرمش اولدینی آت طاقمری ۱۵۰,۰۰۰ آلتوندن زیاده برقیمتده ایدی .

ابراهیم پاشا اوچ آی مصرده قالدی . مملکتک احتیاجنه کوره قوانین جدیده وضعی ، اسکیلرینک تعدیلی واداره نک اصلاحی ایله مشغول اولدی . برچوق اعماراته موفق اولدی؛ تاحبشه قدر بتون مصر داخلنده وفاه اهالی بی تأمینه چالیشدی .

وزیر اعظم بیوک بردبدبه ایله استانبوله غودت ایتدی . وزیرلر درت کونلک مسافه دن کندیسنی استقبال ایتدیلر . پادشاه - احجار قیمتدار ایله مزین طاقی ۲۰۰,۰۰۰ دوقه قیمتده اولان - برعرب آتی اهدا ایلدی . ابراهیم پاشاده پادشاهه او قیمتده هدیه لر تقدیم ایتدی .

ابراهیم پاشانک نفوذی ایکنجی مجارستان سفرندن اقدام سرعسکرلکه تعیین اولنق صورتیله ده ا زیاده آرتدی . سرعسکرلکک توجهی متضمن اولان برات هایونده ابراهیم پاشانک تخصیصاتی « اوتوز کره یوز بیک آچه ، اوله رق تعیین ایدلمشدرکه زمانمز مسکوکاتیه اوتوز بیک عثمانلی لیراسی دیمکدر . آنجق زمانمزده کی برعثمانلی لیراسنده بولنان آلتونک

سلطان سلیمان زمانندہ اون مثلی ایش کورہ جکی . حساب ایدلملیدر .
وزیر اعظمک آلدینی درلو درلو ہدیہ لر ، عائداتی بو حسابدن خارجدر .

شرقده سلطان سلیمان، خربده شارل کن یکدیکرہ
سلیمانہ قانونی، شارل کن،
رقیب ایکی بیوک حکمدار ایدی . بویکی حکمدارک
ایرکیچ چارپیشملری مقرر ایدی . فی الحقیقہ شرق
وغرب اوتوزسنہ قدر میدان خربده، محفل سیاسیانده بربریلہ اوغراشدی .
بلغراد وردوسک فتحی آوروپانک راحتق قاجیرمشدی . بتون
خرستیانلق عالمی بشنجی شارلی استیلای عثمانیہ قارشى طورہ بیلہ جک
بر حکمدار عد ایدیوردی . بتون امید اونده ایدی . برادری فردیناند
آوستریا دوقہ سی ، بوهیا و مجارستان قرالی صفیلہ عثمانیلرک اوکنہ سد
مقاومت چکہ جکدی .

فرانسہ، هابسبورغ خاندانک ممالکی ایلہ هر طرفدن احاطہ ایدلمشدی .
قرال برنجی فرانسوا (شارل کن) ک خصمی ایدی . جریان وقایع
فرانسہ بی دولت عثمانیہ یه یاقلاشدیردی ؛ سلطان سلیمان ایلہ برنجی (فرانسوا)
آرہ سنده بر اتفاق حصولہ کتیردی .

آوروپا تاریخلری اون آلتنجی عصرک ربیع اولنده (کلیسانک بیوک
قیزی fille aînée de l'Eglise) اولان فرانسہ ایلہ حکومت اسلامیه
آرہ سنده بر مقارنت و اتفاق حصولی پک غریب بولورلر . فی الحقیقہ
(Le roi Très - Chrétien) عنوانیلہ یاداولان فرانسہ قراللری اوتہ دن
بری عثمانیلر علیہ ترتیب ایدیلن اهل صلیب سفرلرینک باشنده بولنمشلردی .
آلتنجی (شارل) نیکبولی ہزیمتی ایلہ نتیجہ لن اهل صلیبہ اشتراک ایتمش،
سکزنجی (شارل) استانبولی الملق خلیاسنہ دوشمشدی . اون ایکنجی

(لوتی) ۱۵۱۵ سنه ملادیه سنده (آئوگسبورغ Augsburg) دیت مجلسنده خرسیتانیلق عالمی عثمانیلر علینه دین نامه محاربه یه دعوت ایشدی. برنجی (فرانسوا)، (مارینیان) محاربه سندن وپایا اوتجی لئون ایله باریشددن صکره بیوک بر اهل صلیب اردوسی تشکیلنی؛ اسقوچیا قرالی (ژاق)، اسپانیا قرالی (شارل)، پورتکیز قرالی (امانوئل)، لهستان قرالی (سکیزموند)، مجارستان قرالی (لوتی)، دانیمارقه قرالی (قریستیان) ایله فلورانسه نك (مدیسیس) خاندانی، ونیدیک و جنویر جمهوریتلری، ردوس شوالیهلری آره سنده عثمانیلر علینه بیوک بر اتفاق وجوده کتیرلمسی تصور ایشدی. برنجی (فرانسوا) المانیا ایمپراطورلغه کندیسنی انتخاب ایتدیرمک فکرنده ایدی و ذاتاً (شارل کن) ایله آرالرنده کی رقابت دخی بوندن متولد ایدی. (فرانسوا) ایمپراطورلق تاجنی محضا صلیبونک، رئیس اولمق ایچون ایستدیکنی بیان ایدیور و: «اگر بنی ایمپراطور انتخاب ایدرلرسه اوچ سنه یه قدر استانبول، آلیرم، یاخود تلف اولورم.» دیوردی.

(شاول کن) ک ایمپراطورلغه انتخابی برنجی (فرانسوا) نك هوس وغیرتنی کسرایتدی. (شارل کن) مسدکنده دخی بیوک بر تحول کوزلادی؛ فرانسه نك خصوصتندن قورقه رق ترککر ایله ائتلافه ایلك اوکجه کندیسی طالب اولدی؛ صکره و ندبکیلرک ایمپراطورک بتون اوروپا خرسیتانلرینی عثمانیلره قارشى حمایه ایتمک لازم کله جکنی اخطار ایلملری اوزرینه دولت عثمانیه ایله دوست اولمق املندن واز کچدی. بونک اوزرینه برنجی (فرانسوا) نك مسلکی تبدل ایتمکک باشلادی. فرانسه خارجنده فرانسلرک مؤسسه سی عد اولنه بیله جک یکانه هیئت (اوسپتالیه) طریقت روحانیه سی شوالیهلری ایدی. بو شوالیهلرک (غران مه تر) ی، رئیس اعظمی فرانسز ایدی؛ شوالیهلرک اکثریتی فرانسزلردن مرکبدی. (ایل آدام) برنجی

فرانسوا ایلہ صورت دائمہدہ مخبرہ ایدیور و آکا «متبوع مفخم» عنوانیلہ خطاب ایلوردی . قرال دخی شوالیہلرک قلعہسنی حاوی اولان ردوس شہرینہ عادتاً اجزای ممالکندن بربلدہ نظریلہباقعدہ ایدی. مع مافیہ ردوسک فتحندن صکرہ مغلوب ومطروود شوالیہلری برنجی (فرانسوا) حمایہ ایتدی؛ اولا پاپا هولاندالی یدنجی (آدریہن)، صکرہ آوستریا ایمپراطوری شوالیہلرک حامیسی اولدیلر . ایمپراطور (مالطہ) آطہسنی بونلرہ ویردی؛ شوالیہلر بوجزیرہدہ ایکنجی بر قلعہ تأسیس ایتدیلر .

(شارل کن) ایلہ برنجی (فرانسوا) آردہسندہ کی رقابت محاربہبی انتاج ایتدی . (پاویہ) محاربہسندہ فرانسه قرالی مغلوب واسیر اولدی . [۲۴ شباط ۱۵۲۵] . ایمپراطورک دشمنی اولان آلمان پروتستانلری قورقولرندن سکوت ایدیورلر؛ ایتالیا حکومتلری ایمپراطورک تحت حکمنہ کیرہجکلرینی آکلایورلر؛ انکلترہ قرالی سکزنجی (ہازی) مظفرایمپراطورہ قارشی سس چیقارہمیور ایدی . اوروپا موازنہسی آنجق برعثمانلی اتفاقی، عثمانلی محارباتی ایلہ اعادہ اولنہبیلیر ایدی . ایشته، تاج وتختنی غائب ایتمک تہلکہسنہ دوچار اولان برنجی (فرانسوا) سلطان سلیمانہ مراجعت ایلہ (شارل کن) علیہنہ اتفاقی رجا ایتدی . اوروپانک اوزمان ایچندہ بولندینی حال تعصب وجهالہرغماً آردہدہ کی اختلاف دینہ باقیہرق بویلہ براتفاق عقدینی فرانسدہ ایلک اوکجہ دوشونن عجاکیم ایدی؛ بوفکری برنجی (فرانسوا) ایلہ والدہسی نائبہ حکومت (لوئز)دن ہانکیسنک ایلک اوکجہ میدانہ قویدینی مجھولدر . ہالکزشوراسی محققدرکہ فرانسنک ترکیاہ کوندردیکی ایلک ہیئت سفارت (پاویہ) محاربہسندن صکرہ اعزام ایدلمشدر . سفیرک اسمی مجھول قالمشدر . بوابیچی پادشاہہ (فرانسوا) نک مکتوبی ایلہ یوزوکنی کوتورمکدہ ایدی . بوسنہدن

چکر کن اون ایکی رفیقی ایله برابر قتل ایدلدی. یاننده کی اوراق ایله یوزوک بولنه رق استانبوله کوندرلدی. بالاخره صدر اعظم ابراهیم پاشا بحارستان سفیری ایله کوروشورکن پارمغنده کی یوزوکی کوستره رک : « بویاقوت ، فرانسه قرالی اسیر دوشدیکي زمان صاغ النده ایدی. بالاخره بن صاتون آلم . » دیمشدی . (ژان فرانکیپانی (Jean Frangipani) نامنده کی دیکر برفرانسزایلچی سالماً در سعادت کلدی وقرالک مکتوبی پادشاهه تسلیم ایتدی . مع مافیه قرال ویا والده سی طرفندن کوندریلن ایلك مکتوب دخی پادشاهک اله واصل اولمشدی . صدراعظم ابراهیم پاشا بومکتوبی الدقدن صکره پادشاهک بحارستان سفرینه قرار ویردیکنی سویلشددر . تاریخلرمن پادشاهک برنجی (فرانسوا) نک حالته آجیه رق (شارل کن) علیه سفره عزم ایتدیکنی بیان ایدرلر .

پادشاهک برنجی (فرانسوا) یه یازدینی جوابنامه پک عالیجنابانه ایدی . مقدمه سندن صرف نظرله اصلی بوجه زیر نقل ایدیورز :

دوگاه سلاطین پنامه یرار آدمک فرانقیان ایله مکتوب کوندروب و بعض اغز خبری دخی اصبرلیوب مملکتکزه دشمن مستولی اولوب الآن حبسه ایدو ککزی اعلام ایدوب خلاصکر خصوصنده بوجانیدن عنایت ومدد استدعا ایلشسز . هرتهکه دیمش ایسکر بنوم پایئه سریر عالم مصیرمه عرض اولنوب علی سبیل التفصیل علم شریفم محیط اولوب تمام معلوم اولدی . امدی پادشاهلر ضناق وحبس اولماق عجب دکلددر . کوکلوکری خوش طوتوب آزرده حاطر اولمیه سز . اوپله اولسه بزم آبای کرام واجداد عظامز نورالله مراقدهم دائماً دفع دشمن وفتح ممالک ایچون سفردن خالی اولیوب بزدخی آنلرک طریقه سالك اولوب هرزمانده مملکتلر و صعب وحصین قلعه لرفتح ایلوب کیجه وکوندوز آتمز اکرلش وقلیجمن قوشانلشددر . حق سبحانه و تعالی خیرلر میسر ایلوب مشیت و اراداتی نیه متعلق اولمش ایسه وجوده کله . باقی احوال و اخبار نه ایسه مذکور آدمکزدن استنطاق اولنوب معلومکر اوله . شویله بیله سز »

(شارل کن) ایلہ برادری (فردیناند) لہستانی، افلاق و بغداد امارت لرینی دخی دائرہ نفوذ لرینہ آلمق ایستورلردی. فقط لہستان قرالغی ہابسبورغ خاندانک بوقدر قوت و نفوذ کسب ایتمنندن اصلا نمسون دکلدی. ایمپراطورک مأمورلری بغدادہ یوز بولہ مدیلر؛ لکن افلاقہ وفات ایدن بکک اوغلنک کوچک اولدیغی ہانہ ایدرک (فردیناند) طرفداری اولان (رادو) پی بک اعلان ایتدیردیلر. دولت عثمانیہ افلاق امارتی ایالات عثمانیہ میانہ الحاق ایتک ایستورلردی. (رادو) نک پرنس اعلان اولغی اوزرینہ طونہ حدود بکلرندن یحیی پاشا زادہ محمد بک افلاقہ کوندردی. محمد بک (رادو) پی اعدام ایتدیردی. افلاق بکلرینک طرف پادشاہیدن تعینی اصول اتخاذا ایدلدی.

محمد بکک اجراءات شدیدہ سنہ قارشى اولاحلری حمایہ تہ ثبت ایدن (اردل) بکی (ژان ژاپولیا Jean Zapolya) ہیچ برشی یاپہمدی، رجعتہ مجبور اولدی.

ایشته، کرک بووقعہ لر، کرک سرحد بکلرینک مجارستانہ، خروانتستانہ، دالماسیایہ، ایستیریایہ طوغری آقینلر اجرا ایتملری سلطان سلیمان ایلہ (شارل کن) آرہ سندہ ظہور ایدہ جک محارباتک مقدماتی حکمنده ایدی. دیگر طرفدن فرانسه قرالی عثمانیلری ایمپراطور علیہ تہ تحریک ایتکده ایدی. اوروپانک نصفندن زیادہ سنی یدضبطہ کچیرمش اولان (شارل کن) ک قوت فوق العادہ سنی براز تنقیص ایچون عثمانیلر ایلہ محاربہ وقوعی ایمپراطورک دشمنلرنجہ ملترمدی.

نہایت محاربہ ۹۳۲—۱۵۲۶ سنہ سندہ باشلادی.

مراج محاربہ سی سلطان سلیمان ایلک بہارده استانبولدن حرکت

ایتدی. صدراعظم ابراہیم پاشا، ایکنجی وزیر ایاس پاشا اردولرک باشندہ

ایدی. بلغرادده بتون قوتلر برلشدی؛ اوچ یوز بیك کشی طویلاندی. بویوک اردونك بتون احتیاجاتی حکومتجه تأمین ایدیلور؛ کافه لوازم اهلیدن پاره ایله صاتون آلینیور؛ الحاصل شمیدی یه قدر کرک بزده، کرک اوروپاده اولدیغی کبی اهالی اردونك مرورندن متضرر اولیوردی. خلقه تجاوز ایدن عسکر شدله تأدیب اولنیوردی. حتی سلطان سلیمانك بالذات تحریر ایتدیکی روزنامهلرده رعایانك باغچهلرینه، ترلارینه تجاوز ایدن عسکره جزا ویرلدیکی محرردر.

صدراعظم ابراهیم پاشا بلغرادده اردوی هایونندن آریله رق قوتلی برمفرزه ایله ایلری یه کیتدی. (دراوا) و (صاوا) نهرلری آرمسندگی (سیریه) قطعهنك مواقع مهمه سنی اشغال ایتدکن صکره (پترواردین Peter-Vardin) شهرینی وقلعه سنی ضبط ایتدی. بعده اردوی هایون دخی کلهرک طونه بونجه ایلر یلکه دوام ایدلدی. (ایلوق) قلعه سی فتح اولندی. (اسهك Essek) قربنده (دراوا) نهری اوزرینه ۲۹۴ آرشون طولنده برکوپری یاپیلهرق اوبر طرفه کچیلدی. (اسهك) ضبط ایدلدی. نهایت قسم جنوبیسی بطاقلقلر ایله مستور اولان (مهاج Mohács) اووه سنه مواصلت ایدلدی. مجار اردوسی بوراده صف حرب تشکیل ایتشدی. برنجی صف (پهره رهنی Pierre Pérény) وپسقیوس (پول طوموری Paul Tomori) نك، ایکنجی صف مجارستان قرالی (لوئی) نك قومانداسنده ایدی. بواردونك اصل قوتی سواری ایدی.

عثمانیلر (مهاج) ك غرب طرفنده کی تپهلری طوتدیلر. پادشاه زرهلی شوالیه لرك ایلک هجوملری پك شدتلی اولدیغنی بیلدیکی ایچون اردونك ترتیب معتادینی دکیشدیردی. اوک صرهدده روم ایلی، صکره آناطولی عسکری، آرقه ده بکیچری اخذ موقع ایتدی. طوپلر زنجیر ایله بربرلرینه باغلانهرق

یکچیرینک اوکنہ دیزلدی . دشمن هجوم ایدنجه روم ایلی عسکری صاغه طوغری کری یه چکیلہ جک، آناتولی عسکری دشمنی صولدن تضیق ایدہ جکدی . بو صورتہ دشمن یکچیری عسکرینک، اوچ یوز طوپک قارشیسنه کله جکدی . دیگر طرفدن سرحد بکترینک معیتلرنده کی آقنجیلر صاغدن و آرقه دن دشمنه هجوم ایدہ جکلردی . بوسنه بکلربیکی خسرو بکک عسکری ایله معیت پادشاهیده کی سپاهیلر محاربه یه اشتراک ایتیه رک احتیاطده قاله جکلردی .

مجارستان قرالک امید ی آتمش بیک کشیک زرهلی شوالیه لک هجومنده ایدی . بو شوالیه لر ایچنده مجارلردن ماعدا آلمان، چه، له، اسپانیول و ایتالیا لر دخی واردی .

محاربه باشلادی . ایلک مصادمه ده صدراعظمک قوماندا ایتدیکی روم ایلی عسکری مقاومتدن عاجز قالمش کبی جنوبه طوغری رجعت ایتدی . بهرام پاشانک قوماندا سنده کی آناتولی عسکری ایسه روم ایلی عسکریه یوز یوزہ حرب ایدن دشمنه یان طرفدن هجوم ایلدی . یواش یواش دشمنی یکچیریلرک، طوپلرک اوکنہ کتیردیلر .

عثمانیلرک مانووره لرنده کی مقصدی آکلا یه میان دشمن جناح لرمنی براقوب پادشاهک بولندینی مرکزہ هجوم ایتدی . اوچ یوز طوپ بردن آتش پوسکوردیکی صرہ ده بالی بکک قوماندا سنده کی آقنجیلر آرقه دن هجوم ایدنجه دشمن اردوسی شاشیردی، هر طرفدن احاطه ایلدی .

دشمنک اصل مقصدی بتون شدتیه مرکزہ صالديره رق پادشاهک یانته قدر کیتمکدی . حتی (مار قزالی Marczali) اسمنده بر فدا یینک قوماندا سنده کی مفرزه پادشاهی اسیر ویا تلف ایتمکه یمین ایتمشدی . بو مفرزه سلطان سلیمانک اوکنہ قدر واصل اولدی . حتی پادشاهک زرهنه

بر قاج اوق و مزراق اصابت ایتدی. لکن هیچ کسه ده تلاش کورلمدی. نتیجه ده دشمن اردوسنک قسم اعظمی تلف اولدی. قورتیلانلرک بر قسمی بطاققلرله صاپلاندی؛ طونده غرق اولدی. مجارستان قرالی (لوئی) دخی تلف اولمشدی. هزیمت اودرجه ده ایدی که قرالک هانکی نقطه ده ونه صورتله تلف اولدیغی آکلاشله مدی.

محاربه آنجق ایکی ساعت دوام ایتمشدی. میدان حریده قالان دشمن مقتولینی ۲۰,۰۰۰ پیاده، ۴,۰۰۰ سواری ایدی؛ ۴,۰۰۰ اسیردخی واردی.

بو مظفریت عظیمه دن صکره اردوی هایون

بودنک قمتی

مجارستانک پایتختی اولان (بودین Bude) اوزرینه

یوریدی. اوزمان (بودین) طونه نك صاغ ساحلنده ایدی. بونک یاننده

قرالک سرایی حاوی (اوفن Ofen) قلعه سی، طونه نك صول ساحلنده

آریجه بر محله شکلنده اولان (پشته) بولنمقده ایدی. پادشاه (بودین)

جوارینه واصل اولدیغی زمان شهر معتبرانی آناختارلری تسلیم ایتدیلر. سلطان

سلیمان دخی هیچ کیمسه نك مال وجانه تجاوز ایدلمه مسنی امر ایلدی. اولجه

آلمان وجه عساکر معاونه سندن پك زیاده متضرر اولان شهر اهالیسی

بوتدیردن فوق العاده ممنون اولدیلر؛ حتی کلیسالرده پادشاهه دعا لرایلدی.

سلطان سلیمان (بودین) قلعه سنده بولنان طوپلری — که ایکیمی

سلطان محمد ثانینک بلغراد اوکنده ترکه مجبور اولدیغی جسم طوپلرایدی

—، شهر میدانی تزین ایدن (هرکول)، (دیانا) و (اپولون) ک

طونج هیکلرینی، قرالک خزینه سی، (ماتياس قوروین) ک کتبخانه سی

استانبوله نقل ایتدیردی. بو هیکلر بالاخره ابراهیم پاشا طرفندن آت

میدانه رکز ایدلمشدر [*].

[*] ابراهیم پاشانک بو هیکلری سراینک قپوسی قارشیسنده رکز ایتدیرمسی

پادشاہ طونہ اوزرنده انشا ایتدیردیکی جسم اخشاب کو پریدن کچہرک (پشتہ) یہ کیتدی؛ اورادہ مجارستان زادکان ومعتبرائی قبول ایدرک (اردل) پرنسی (ژان ژاپولیا) بی مجارستان قرالی تعین ایدہ جکنی وعد ایتدی . (ژان ژاپولیا) لهستان قرالٹک دامادی ایدی . اولجہ افلاقده یحیی پاشا زاده محمد بك ایلہ محاربہ ایتمش ایکن شمدی قرالغه تعین اولنمسی مجارلرجه مقبول ومعتبر اولمسندن ایلری کلیوردی .

پادشاہ (بودین) و (پشتہ) ده بولندینی صرہده آقینجیلر مجارستانک ہرطرفنی یغما ایدیورلر ، بر چوق اسیر آلیورلردی . (فونفکیرخن Funfkirchen) ده ، (موروث Moroth) ده پک چوق نفوس تلف اولدی . آقینجیلر یالکیز مجارستان تاجنی حاوی اولان (ویشہ غراد Vichégrad) قلعه سی ایلہ (غران) ی ضبط ایدہ مدیلر .

سلطان سلیمان (پشتہ) ده برہفتہ قدرقالدی . قیش موسمی یاقلاشمشدی . اردوی ہایون خلی مشکلات ایلہ استانبولہ عودت ایتدی [۹۳۳] .

(مهاج) مظفرتی اوروپادہ پک بیوک برتائیر حصولہ زائدہ ژاپولیا کتیردی . (ہابسبورغ) خاندانک مستملکاتندن و فریدنامہ معدود اولان مجارستان عثمانیلرک الہ کچمشدی ، بوندن صکرہ آلمانیا بیلہ عثمانلی استیلا لرینہ آچیق بولنیوردی . برنجی

قیل وقائی دعوت ایتشدی . « پاشا بت پرستدر » کی سوزلر سویلنمکہ باشلامشدی . حتی شاعر نغانی چلبی : « دوابراہیم آمد بدیر جہان . یکی بت شکن ، یکی بت نشان » دیہ وزیر اعظمی عجو ایتدیکی جہتلہ اعدام ایدلشدر . ینہ ہومناسبتلہ شوہبت دخی سویلنمشددر : « برخلیل اول کلوب اصنامی قیلشمشدی شکست . سن ، خلیلم ، شمدی کلڈک ، خالق قیلڈک بت پرست . »

(فرانسوا) کنتجہ، (مہاچ) محاربہ سندن ممنون اولہ جغہ بالعکس قورقش،
 ترده دوشمندی . سلطان سلیمان ایله متفق اولدیغنی اعزافہ جسارت
 ایدہ میوردی . فرانسه رجال حکومتی عثمانیلرک علیہندہ ایدی . (شارل کن)
 برنجی فرانسوانک ترکلرله متفق اولدیغنی بتون اوروپاہ اثبات و اعلان
 ایتدیکی صرہده فرانسه قرالی آلمان حکومتلرینہ وقوع بولان تبلیغاتندہ
 بتون خطائی، مسؤولیتی رقیینک اوزرینہ آئغہ چالیشیوردی . بر مکتوبندہ
 دییوردی کہ: «شارل، طرفینک شان و شرفہ موافق بر مصالحہ عقیدینہ
 راضی اولمادی . نہ خلقک باشنہ کلن بوقدر فلاکتلردن، نہ انشتہ سی
 قرال (لوئی) نک تلف اولمسندن، نہ دہہ همشیرہ سنک، بیچارہ طول قرالیچہ نک
 دوچار اولدیغنی مصیبتلردن متأثر اولدی . . . اکر ایمپراطور ایستہ مش
 اولسہیدی بتون قوتلرمزی برلشدیرہرک ترکلری کری یہ پوسکورتہ بیلیر
 ایدک . »

برنجی (فرانسوا) فرانسیہ دوست دولتر اولان (بوهما) و
 (لہستان) ک تمامی ملکیتلری اخلاال ایدلمسندن قورقوردی . بو ایکی
 محکمت قرالترینی زیارت ایچون عن اصل اسپانیول اولوب غایت ماهر
 بر دیپلومات اولان (آنتونیو رینقون Antonio Rincon) ی کوندردی .
 دیگر طرفدن ینہ بو (رہ نقون) واسطہ سیلہ (ژان زاپولیا) ایله مناسباتہ
 کیریشدی .

عثمانی امراسی مجارستانی ضبط ایتدکدن صکرہ دالماچایہ، اسقلا-
 وونیایہ هجومدن خالی قالمیورلر؛ اورالردہ یکی سنجاقلر تأسیس ایدیورلردی .
 مجارستان تختی ایچون میدانده ایکی مدعی واردی: (فردیناند دوتریش
 Ferdinand d'Autriche) ایله (ژان زاپولیا) . (زاپولیا) ترانسیلوانیا
 و شرقی مجارستان زادکانی طرفدن قرال انتخاب اولندیغنی ادعا ایدیوردی .

بشنجی شارل (وورمس) دہ، (بروکسل) دہ دیت مجلسلر نی مذا کرہ یہ دعوت ایتدی . صکرہ (پرسبورغ) دہ عقد اولنان دیت مجلسندہ سلطان سلیمانن مجارستان قرالغنی قبول ایتمش اولان (زاپولیا) نك عاصی و دشمن دین، (فردیناند) ك حکمدار مشروع اولدییغی اعلان ایدلدی [۱۵۲۶].
 بشنجی شارلک برادری (فردیناند) بوصورتله اوستریا، بوهمیا، مجارستان، اسقلاوونیا، خرواتستان حکمداری اولیور؛ عثمانلیلره قارشی بشنجی شارلک سرحد قوماندانی حال و وضعیتنی الیوردی .

(زاپولیا) مقاومت ایتك ایستدی . فقط (طوقای Tokay) دہ مغلوب و ترانسیلوانیایه رجعتہ مجبور اولدی [۱۵۲۷] .

(زاپولیا) سلطان سلیمان طرفدن مجارستان قرالغنه تعین ایدلدیکی حالده . کویا بالاستحقاق قرال اولمش کبی طاورانیوردی . برده اوروپاده ترکر علیہندہ کی غلیان تعصبك سوقیلہ معاونتیزی ایستہ میوردی . قاین پدری (لهستان) قرالنگ معاونتیلہ مجارستانی ضبط و محافظہ ایتك امیدینہ دوشدی ؛ برنجی (فرانسوا) نك سفیری (رہ نقون) ی بومعاونتی استحصال ایتك مأموریتیلہ لهستان قرالنه کوندردی . قریم خانلریلہ عثمانلی اردوسنك ایکی جناحدن هجوملرینہ مقاومت ایدہ میہ جکئی بیلن قرال، (زاپولیا) یہ عثمانلیلرلہ اویوشمنی توصیہ ایتدی .

بونك اوزرینہ (زاپولیا)، (سیرادیہ Siradie) (پالاتن Palatin) ی، یعنی قوتی (ژہروم لاسچکی Jérôme Lasczky) یی استانبولہ کوندردی . اوصردہ استانبولہ (غریبی) اسمندہ بر وندیکلی صدراعظم ابراہیم پاشا نزدندہ، باب عالی محافلندہ پك زیادہ نفوذ صاحبی اولمشدی . (لوئی غریبی)، وقتیلہ سفارتلہ استانبولہ گلش و بالاخرہ وندیک جمهوریتی ریاستہ انتخاب ایدلمش اولان (آندرہ غریبی) نك ولد غیر مشروعی ایدی .

صدراعظمك محرم اسراری ایدی. حتی سلطان سلیمانك صدراعظم ایله برلکده بعض کیجه لر اکلنجه ایچون (غریقی) نك خانه سنه بیله کیتدیکی روایت اولنوردی. ایشته، بدایة صدراعظم ووزرادن پکده حسن معامله کوره مین (لاچکی) بو (غریقی) بی الده ایتدی .

صدراعظم ابراهیم پاشا (لاچکی) بی قبول ایتدیکی زمان : « نیچون اقدك مجارستان تاجنی پادشاهمزدن ایسته مدی ؟ » دیمشدی . ایکنجی وزیر چوبان مصطفی پاشا ایسه شو صورتله اداره لسان ایتمشدی : « سنك اقدك پادشاهك داخل اولدیغی بو دینه ، ینه پادشاهك عودتنده اقامت ایده جکی سرای قرالی یه کیرمکه نصل جسارت ایدیور ؟ ... پادشاهك بنده لرندن بری طرفدن کلدیکك حالده ویرکوسنی نیچون کتیرمدك ؟ پادشاهمزدك اردل بکنك پدری مقامنده اولدیغی سولیکه نصل جسارت ایدیورسك ؟ »

(لاچکی) ، (غریقی) نك توسطیله نهایت سلطان سلیمان طرفدن قبول ایلدی . پادشاه : « اقدكك صداقتنی ممنونیتله قبول ایدیورم . مجارستان قرالغی حقیقت حالده هیچ بر زمان کندیسنك اولماشدر . بو مملکت بنمدر ، قلیجكمك حقیدر . فقط بزه اولان صداقتنه مکافاة مجارستانی کندیسنه ویردکدن ماعدا فردینانده قارشی حمایه بی دخی وعد ایده رم . اقدك امین اولسون ، دوچار تعرض اولمقدن قورقسون . » آرتق بوندن صکره استانبولده (زاپولیا) یه مجارستان قرالی نظریله باقیلدی ، پادشاهه « پدر » دیمسنه مساعده ایلدی . سلطان سلیمان (زاپولیا) نك دشمنلرینه قارشی بتون قوتیله وبالذات حرکت ایده جکنی وعد ایلدی . (لاچکی) : دخی اقدیسنك پادشاهك دوسنرینه دوست و دشمنلرینه دشمن

اولہ جغفہ یمین ایتدی . بو اساس دائرہ سنده بر مقاولہ نامہ عقد ایدلدی
[۹۳۴-۱۵۲۸] .

دیگر طرفدن (زاپولیا) بری پارسده ، دیگرى بودینده اولوق
اوزره فرانسه قرالی ایله ایکی معاهده نامہ عقد ایتدی . بومعاهده نامہ لر
موجبجه (زاپولیا) فرانسه قرالی برنجی (فرانسوا) نك ایکنجی اوغلی
(هازی دورلئان) ك - كه بالاخره ایکنجی هاری نامیله برقرال اولمشدر -
ولی عهد اتخاذه راضی اولدی .

(زاپولیا) نك سلطان سلیمان طرفندن حمایه سنی خبر آلان (فردیناند)
ایله (شارل كن) هنوز محاربه زمانك حلول ایتدیكنی نظر دفته آله رق
عثمانیلر ایله مذاکره قرار ویردیلر . (فردیناند) زاپولیانك یرینه
کندیسنی مجارستان قرالی انتخاب ایتدیرمك ایچون استانبوله سفیرلر
کوندردی . پادشاهی اغفال ایچون ویرکو ویرمکه بیله راضی اوله جقدی .
فقط سفیرلرک اعتمادنامه لرنده قوتلی بر حکمداره لایق صورتده اداره لسان
ایدلمش اولدیغندن ایلاچیلر مظهر حسن قبول اوله مدیلر . مجارستانك
اعاده سنی استرحام ایدن سفیرلره صدراعظم ابراهیم پاشا : « ایچون استانبولی ده
ایسته میورسکز ؟ » دیمشدی . پادشاه (فردیناند) ك مدعیاتندن حدتلمدی ،
سفیرلرینی طقوز آی قدر چنبرلی طاش قارشیدسنده کی ایلچی حانده
توقیف ایتدی . سفر هایون اثناسنده ایلاچیلرک حبس خانه دن چیقملرینه
مساعده ایدلدی . کندیلرینه : « افندیکره سویلیکره زیارتمزه حاضر لنسون »
دنیلدی .

۹۳۵ [۱۵۲۹] سنه سنده پادشاه ۲۵۰,۰۰۰ عسکر

ریانه محاصره سی و ۳۰۰ طوپ ایله استانبولدن حرکت ایتدی .

بوندن اول مجارستانه قدر کوتوریلن و قیشك حلولی اوزرینه استانبوله

آلدریلان بو طوپلرک سرحدلرده ، بالفرض بلغراد قلعه سسندہ بر اقلیمسی وایجاب ایدرسه پادشاهک ویا هیچ اولمازسه اردونک بر قسمنک دخی اورالرده قیشلامسی دها موافق ایکن بویله یاپیلمیور ؛ هر سفر وقوعنده بیک درلو زحمت و مشکلات ایله استانبولدن مجارستانه کیدیلیور ، صکره قیش اوائلنده استانبوله دونیلیوردی . مایسده حرکت ایدن اردو تموزده مجارستانه اصل اولدی .

(مهاج) اووه سسندہ (ژان زاپولیا) ۶,۰۰۰ سوارى ایله کله رک پادشاهه عرض صداقت ایتدی . سلطان سلیمان (زاپولیا) یی غایت مزین بر چادیرده ، تخت اوزرنده اوطورورکن قبول ایتدی . مجارستان قرالی کورنجه آیاهه قالدی ؛ الی قراله اوپدیردی . صاغ طرفه اوتورتدی .

اوستریا قرالی (فردیناند) ک ضبط اتمش اولدیغی (بودین) سلطان سلیمان طرفندن استرداد اولندی . شهرک اوستریالی و آلمان عساکر محافظه سی بعض شرائط ایله تسلیم اولدقلری حالدہ یکیکچریلر بعض یرلرده یغما ، محافظلرک بر قسمی خلاف عهد قتل ایتدیلر . چونکه (بودین) ی حرباً آله رق یغما ایتک ایسته یورلردی . محافظلر تسلیم اولنجه یکیکچریلر جدتلنه رک یا شهرک یغماسنی ، یا خود تضمینات اعطاسنی طلب ایتدیلر . سلطان سلیمان سکونت و انتظامی اعاده ایچون رؤسادن بعضلرینی اعدام ایتدیردی ، بر مقدارده پاره طاغیتدی .

(بودین) ک فتحندن یدی کون صکره (زاپولیا) نک رسم تتوجی اجرا ایدلدی . بو رسمده صدراعظمک بیله وجودی چوق کورلدی . سکبان باشی ایله (غریتی) پادشاهه وکالۃ حاضر بولندیلر . زاپولیا تاریخلر مزده « یانوش قرال » نامیله معروفدر .

سفر هایوندن مقصد (فردیناند) ویا (شارل کن) ایله محاربه

اولدینی خالدہ بونلرک ایکسیسہ میدانہ چیمدقلرندن (ویانہ) نک محاصرہ سنہ قرار ویرلدی. ذاتاً آقینجیلر ویانہ قبولرینہ قدر کیتمشلردی. ایلول نہایتہ طوغری اردوی ہایون ویانہ اوکنده کی (سہ مرینغ Sæmmeing) کوینہ کیتدی و همان شہری محاصرہ ایتدی. مرکزہ برمعتاد پادشاہ ایلہ یکچیریلر، صول جناحدہ بہرام پشانک قومانداسی آلتندہ آناتولی، صاغ جناحدہ صدراعظم ابراہیم پاشا ایلہ روم ایلی عسکری بولنمقدہ ایدی. سمندرہ بکی بالی بک، بوسنہ بکی خسرو بک شہرک اطرافندہ کی تپہ لری طوتمشلردی. قاسم بک قومانداسندہ کی کھیل نہری اشغال ایتدیلر. اردوی ہایون ۲۵۰,۰۰۰ کشی و ۳۰۰ طوپدن مرکبیدی.

اوروپا تاریخلرینہ نظراً نوکا مقابل ویانہ دہ ۱۶,۰۰۰ عساکر محافظہ و ۷۲ طوپ موجود ایدی. فقط بو عسکرہ آلمانلر، چہلر، اسپانیوللر و ویانہ شہری اہالیسی دخی التحاق ایتشدی. باویرا دوقہسی (فیلیپ)، (سالم Salm) قوتی (نیقولا)، بارون دو (روکندورف Roggendorf)، (پول باکیچ)، (ژان قاجیانر Jean Katziaaner) کبی سردارلرک قومانداسی آلتندہ یکرمی درت بیک قدر کزیدہ عسکر بولنمقدہ ایدی. ویانہ قلعہسی آلتی قدم ٹخندہ برسوردن عبارتدی. رؤسای محصورین انہای حربہ فوق العادہ مہارت و فعالیت ایلہ حرکت ایتدیلر. ویانہ جوارندہ کی محلہلر یاقلمش، ییقلمش ایدی. برنجی استحکامدن یکرمی خطوہ کریدہ شہرک ایچنہ طوغری طور اقدن بکی براستحکام یاپیلمشدی. اردوی ہایون اوچ دفعہ ہجوم ایتدی؛ شہرک ضبطی ممکن اولہ مدی. محصورین کیجہ ہجوملریلہ مقابلہ ایدیورلردی. قیش موسمنک تقریبی یکچیریلرک شکایتی موجب اولیورلردی. نہایت یکچیریلرہ پارہ توزیع

ایدلک ، بر چوق و عدلرده بولیمق صورتیله صوگ بر هجوم اجرا ایدلدی . محصوریتده بولنان (آرکه یوز) ، یعنی فیتیلی تفنکر عسکر منری ییلدیرمشدی . بو هجومده دخی تلفات ایله رجعت ایدلدی .

کیجه اردونک رجعتنه قرار ویرلدی . رجعتک مصادف اولدینی ۱۴ تشرین اول اوروپاچه مشهور ، خرسیتیانلر نظرندده مقدس بر تاریخ اولمشدر . اردو شهردن اوزاقلاشدقن صکره صداعظم بوموفقیستزلکی ستر ایتک ایستدی . طرف پادشاهیدن صدراعظمه وزرا و امراه خلعتلر ، عطیهلر ویرلدی ؛ یکیکچریلره ۲۴۶,۰۰۰ دوقه توزیع ایدلدی . صدراعظم ویانه محافظنه یازدینی مکتوبده : « شونی بیلکزرکه بز شهریکزی ضبط ایچون دکل ، آرشیدوقه کز ایله محاربه ایچون کلدک ؛ فقط کندیسنی بوله مدق . » دیدی .

ذاتاً ایلول نهایتده ویانه نک محاصره سنه ابتدار ایتک موافق دکلدی . عسکر مزبور غوندی . قیش حلول ایدنجه مطلقاً استانبوله عودت ایدیلده جکدی . بناء علیه وانه محاصره سی جدی بر تشبث اولمقدن پک اوزاقدیر . اگر شهرک جداً ضبطی آرزو اولیورسه یا محاصره یه قیشین دخی دوام ایتک ، یاخود (بودین) ، عودتله قیشی کچیردکن صکره مارتنده محاصره یه باشلامق ایجاب ایدردی . بوجهته اهمیت ویرلدی ، بناء علیه ویانه محاصره سی موفقیستزلک ایله نتیجه لندی .

سفر هایون نتیجه سی آوستریانک و قسماً آلمانیانک یغما ایدلمسندن عبارت قالدی . چونکه آقینجیلر بر طرفدن (راتیسبون) ، ، دیگر طرفدن (استیریا) و (موراویا) یه قدر کیتدیله ؛ (برون) ایله بر چوق شهرلری یغما و احراق ایتدیله .

اردوی هایون بودینه کلدیکی زمان قرال (زاپوالیا) سلطان سلیمانک

الئی اوپہرک عرض تعظیماۃ ایلدی . یولده پک چوق زحمت چکملہرک ، حیوان واشیاچه پک چوق ضایعات وقوعه کلہرک کانون اول ظرفده استانبوله عودت ایلدی .

ویانه نك محاصره سی آلمانیا ده حسیات ملیہی ، بتون اوروپا ده حسیات دینیہی غلیانہ کتیردی . شمدی یه قدر پایا اوتخی (لئون) ك اهل صلیب ترتیباتی علیہندہ بولنش اولان و ترکلر ایله محاربہ نك جناب حقہ مخالفت دیمك اولدیغنی سویلین (لوتر) ۱۵۲۹ سنہ سندہ «ترکلر علیہندہ نطق عسکری» نامندہ کی اثرینی نشر ایتدی . ایرتسی سنہ فلمنك حکما سندن (اراسم Erasme) دخی ترکلر علیہندہ برائر نشر ایدہرک اوروپایی محاربہ یه تشویق ایلدی . برنجی (فرانسوا) نك ونیدیکده بولنان سفیری دخی قرالہ یازدیغنی تحریراتده بتون عالم عیسویت آره سندہ صلح ومسالمتك تقرری ، مشترکاً صرف مساعی ایدیلہرک ترکلرک اوروپادن اجزاجی لزومندن بحث ایدیوردی . فرانسه قرالی مشکل برموقعده ایدی . آلمان پروتستانلرینی بشنجی شارل علیہندہ قوللانہ بیلمك ایچون آلمانلرک حسیاتی اوقشامق مجبوریتندہ بولندیغندن برمدت سلطان سلیمانہ سفیر کوندرمکدن اجتناب ایتدی .

ایرتسی سنہ (شارل کن) بولونیاده ایتالیا قرالغنی ، روماده **فرانسوا نك** ایمبراطورلق تاجنی کیدی ؛ پایا طرفندن سیچلیتین قرالی **ایکی برزیلیکی** اولدیغنی تصدیق ایلدی . (فلورانسہ) بشنجی شارلک **النه کچدی ؛ (اوسپیتالیه)** شوالیہلری مالطہ اطہ سنہ یرلشدیرلدی . ۱۵۳۱ سنہ میلادیہ سندہ ایمبراطورک برادری (فردیناند) روما قرالی اعلان ایلدی . ۱۵۳۲ سنہ سندہ (شارل کن) آلمان پروتستانلریلہ عقد مصالحہ ایتدی . فرانسه قرالی ، پایا ایله ایمبراطورک متحداً حرکت

ایتدیکنی کوره رک بیوک برتهلکه قارشیسنده بولندیغنی حس ایدیوردی .
 ۱۵۳۱ سنه سنده (شارل کن) کندیسى وپایانامنه اوله رق برنجی (فرانسوا) یه
 مراجعت ایتدی؛ ترکلر علیهنده اتفاق تکلیف ایلدی. برنجی (فرانسوا)
 ایتالیاده بولنق صورتیه ترکلرله محاربه ایده جکنى بیلدیردی. بشنچی
 شارل ایسه فرانسه قرانلک ایتالیایه آياق باصمسنی ایسته مزدی. برنجی
 (فرانسوا) دخی مجارستانده (هابسبورغ) لرك قومانداسی آلتنده
 محاربه یه راضی اولدی . مقصدی ایمپراطورك علیهنده بولنقدی . حتی
 انکلتزه قرالی سکزنجی (هازی) یه مراجعت ایتدیکی زمان هم ایمپراطور
 همده پادشاه علیهنده بولنق شرطیه حصول ائتلافه چالیشدی. (فرانسوا) نك
 بوايکی یوزلیلکی بالطبع عثمانیلرك نظر دقتندن قاجیوردی .

پادشاه ایله صدر اعظم ویانه محاصره سنك سوء
 آوسریالیه مذاکرات تأثیراتی ازاله ایچون ایلک فرصتدن استفاده یه قرار
 ویر مشلردی. بوفرصت بر مدت صکره ظهور ایتدی.

(فردیناند) ویانه محاصره سندنیدی سکز آی صکره استانبوله (نیقولاً
 یوریشیچ Nicolas Jurichitz) ، (ژوزف لامبرغ) اسمنده ایکی سفیر
 کوندردی. عقد صلحه مأمور اولان بوسفیرلر (فردیناند) ک مجارستانده
 ارثاً حق بولندیغنی ، بوقطعه کندیسنه ترك اولنور ایسه هر سنه دولته و
 صدر اعظمه هدیه شکنده مبالغ کلیه ویریه جکنى ، (فردیناند) ک دولت
 عثمانیه نك بر بنده سی کی خوش کچینمکه چالیشه جغنی ، پاپا ایله عقد ایتدیکی
 معاهده نامه ایله بتون خرسیتانلق عالمنك رئیس عمومیسى اولان ایمپراطورك ده
 حسن مناسباتده بولنه جغنی بیان ایتدیلر .

صدر اعظم ابراهیم پاشا (فردیناند) ک مجارستان حقنده کی ادعای
 واهی اولدیغنی ، بر مملکتی ارثاً ویا پاره ایله آلق کافی اولمیسوب قلیج

ایہ فتح اتمک لازم کلدیکی ، مجارستان ایکی دفعہ فتح ایدلدیکی ایچون پادشاہک حق اولدیغنی ، پادشاہ طرفندن (ژان زاپولیا) یہ ویرلدیکی ، واقعا بوقطعه (زاپولیا) یہ ویرلدیکی کبی بشقہسنه وحقی (فردیناند) ہ بیلہ ویریلہ بیلیر ایسہدہ ہرکسک پادشاہہ قارشى حدینی بیللمسی لازم کلدیکی ، حکومت عثمانیہک آرشیدوق فردیناندہ قرال شارلک ویانہ والیسی وشارلہ دخی بغیرحق آلمانیاہ تجاوز ایتمش اسپانیا قرالی و آوستریا حکمداری صفتیلہ باقدیغنی وشارلک فرانسه قرالنه سوء معاملہسندن طولای پادشاہک تادینہ مستحق اولدیغنی ، شارل اولجہ روماشرینی یغما ایتدیرمش وپاللق مقامنی تحقیر ایش اولدیغندن شمدی پاپالقایلہ شارل آردہسندہ عقد ایدیلن مقالہ نامہک جدی برشی اولہ میہ جغنی ، قرال شارل مملکتی اولان اسپانیاہ چکیلیر و آرشیدوق فردیناند موقعی ایلہ متناسب مستدعیاتہ بولنور ایسہ پادشاہک دریغ لطف ایتیمہ جکنی ، مجارستانہ ادعای حق ایلکدہ دوام ایدرسہ اردوی ہایونک آلمانیا حدودینہ کیدہ جکنی جواباً بیلدیردی .

ابراہیم پاشا ویانہ محاصرہسندن دہ بحث ایتدی وپادشاہک اولکی سفر ہایوندہ فردیناندی آرامش ایسہدہ آرشیدوقک دائمعا کر عثمانیہ اوکندن قاچدیغنی ، سلطان سلیمانک دخی مملکتہ بر حکمدار حقیقی کلدیکی کوسترمک ایچون آقینجیلری آلمانیاہ قدر کوندردیکی ، زیارتلرینہ بریادکار اولمق اوزرہدہ ویانہ شہرینک قلعه دیوارلرینی براز زدہ لدیکی ، مقصدشاہانہ ویانہک فتحی اولدیغنی ایچون بیوک محاصرہ طوپلرینک کوتورلیوب قیش موسمی عسکرہ زحمت ویرمکہ باشلائیجہ عودت ایدلدیکی سویلدی . سفیرلر حضور پادشاہیہ قبوللرینی رجا ایتدیلر . رسم قبول غایت

مظنن بر صورتده اجرا ایدلدی. پادشاهه تقدیم اولنان فردیناندك نامه‌سنه یاقینده جواب یریه‌جکی بیان اولندی .

برقاچ کون صکره صدر عظم‌ایکی دفعه قیلیج قوتیه‌فتح ایدلمش اولان مجارستانك براجنی حکمداره ویریه‌میه‌جکنی بیلدیردی . برنجی سفر هایونك فرانسه قرانك مراجعتی اوزرینه اجرا اولندیغنی کیزلمدی ؛ دولتك فرانسه‌یه سوز ایله ، (ژاپولیا) یه عهدنامه ایله باغلی بولندیغنی ایچون بشقه درلو حرکت ایدیلهمیه‌جکنی ده علاوه ایلدی .

سفیرلر وداع ایچون پادشاهك حضورینه قبول ایدیلهرك جوابنامه هایونی آلدقدن صکره استانبولدن عودت ایتدیلر .

سفر استانبولده مذاکرات صلحیه ایله مشغول اولدقلری صهرده فردیناند ایله شارلك عسکری
آوستریا بلبرك
نجاوزانی
مجارستانه تجاوززه باشلامش ، قونت (روکندورف)

بودینی محاصره ایتمشدی . کیفیت استانبولده خبر آلتندیغنی زمان سفیرلر کیمشلدی . پادشاهك بو ایکی یوزلی معامله‌یه جانی صیقیدلی . یاقین محللردن (بودین) ه عسکر سوقنی امر ایتدی .

بودین ، قرال (ژاپولیا) نك عسکریله عثمانیلر طرفندن مدافعه ایدلدی . سمندره بکی بالی بك زاده محمد بك امداده کیتدی ، (روکندورف) شهری آلتی هفته محاصره‌دن صکره رجعتیه مجبور اولدی . محاصره‌دن اصل مقصد (ژاپولیا) نی قتل ایتمکدی . حتی برنجی دفعه (فردیناند) طرفندن سفارت ایله استانبوله کوندرلمش اولان (هوپوردانسکی) قراله سوء قصد ایچون قلعه‌یه کیرمش ، فقط مقصدینی موقع اجرایه قویه‌مدن اتلاف ایدلمشدر .

استانبولده مذاکره جریان ایدرکن (فردیناند) ك مجارستانه تجاوز

ایکسٹنہ مقابلہ اولمق اوزرہ سرحد بکری (ایستیریائی) ، حوالی سائرہ بی
یغما ایتدیلر۔ پادشاہ دخی ایلمک بہارده سفرہ چیقدی [۹۳۸—۱۵۳۲]۔

اردوی ہایون ۲۰۰,۰۰۰ عسکرلہ ۳۰۰ طوپدن مرکبدی۔
آرامانہ سفر (فردیناند) طرفندن کوندریلن سفیر قونت (نوغارولا)
ہمایونی نیشده اردوی ہایونہ کلدی۔ مجارستان (فردیناند) ہ

ترک اولنورسہ ہر سنہ ہدیہ نامیلہ یوزبیک آلتون ویریہ جکنی، (فردیناند) ک
دولتہ داثمدوست و بندہ اولہ جغنی بیان ایتدی۔ سفیرہ جواب ردویرلدی۔
بلغرادده برنجی (فرانسوا) طرفندن کوندریلن سفیر (رہ نقون) قبول
ایدلدی۔ فرانسه قرالی پادشاہی دشمن مشترکہ قارشی محاربہ یہ تشویق
ایتمیور، بالعکس سفر ہایونہ مانع اولمغہ چالیشیوردی۔ سفیر بیہودہ یرہ
چالیشدی؛ اردوی ہایونک حرکتہ مانع اولہ مدی۔ فرانسز سفیرینہ
اردوی ہایون بوقدر ایلریلہ مہمش اولسہیدی پادشاہک فرانسه قرالہ
اولان محبتی سبیلہ کری یہ دونیلہ بیلیر ایدیسہدہ شمدی عودت ایدیلیرسہ
ہرکسک اسپانیا قرالی شارلدن قورقولدیغہ ذاہب اولہ جنی، فرانسه
قرالک کندیسنہ بوقدر قتالقی ایدن، رومانی یغما وپاپائی حبس و ہر سنہ
بوقدر خرستیانلری قتل و ماللرینی ضبط ایلدیکی ایچون خرستیان عد
اندلسی جائز اولمیان بر حکمدار علیہندہ محاربہ ایستہ مہمسی شایان حیرت
اولدیغی بیان ایدلدی۔

(اسہک) دہ نہر کچیلدکن صکرہ اردوی ہایون مجارستانک
(فردیناند) ہ عائد اولان حدودینہ واصل اولدی؛ تصادف ایدیلن
قلعہ لر قولایجہ ضبط ایدلدی۔ یالکیز اولجہ سفارتلہ استانبولہ کلش اولان
(یوریشیچ) ک مدافعہ ایتدیکی (غونس Güns) قلعہ سی اوج ہفتہ
محاصرہ اولنہ رق شدتلی ہجوملر نتیجہ سندنہ الدہ ایدیلہ بیلدی۔

بو قلعہ نك فتحی ویانہ طریقی آچشدی . هر كس عثمانلیرك ویانہ اوزرینه یوریه جککرینی ظن ایدیورلردی . فقط قیش یا قلاشمش اولدیغی ایچون ویانہ یه عزیمتہ تشبث ایدلدی ؛ (ایستیریا) یه کیدیلهر ك آقنلر اجرا ایدلدی ؛ (غراج) بلده سی قربنه مواصلت ایدلده كن صکره بلغراده عودت اولندی .

بوسفر هایونده قریم خانك برادری صاحب کرایك قومانداسی آلتنده اون بش بیک تاتار عساكر معاونه سی دخی بولنمقده ایدی . موفقیتسنزلکه تصادف ایدلدی . یالکز سرحد بکرندن قاسم بکك قومانداسنده کی مفرزه (ایستیریا) ده احاطه ایدیلهر ك محو اولدی . تلف اولان قاسم بکك اسلحه سی بیوک بر اثر ظفر کبی امپراطور (شارل کن) . تقدیم اولندی . اردوی هایون تشرین اول ظرفنده استانبوله عودت ایتدی [۹۳۹] . ینه اوسنه ظرفنده عثمانلیلر علیهنده متشکل اهل صلیب ارکانندن اولان وندیکیلر یونانستانده محاربه یه باشلادیلر . (شارل کن) ك آمیرالی اولان (آندریا دوریا André Doria) قورون ، باتراس ، لپانت قلعهلرینی ضبط ایتدی .

مصلحه مذاکرانی (شارل کن) غربی اوروپاده بر چوق مشکلات تحدرت ایتك اوزره اولدیغی بیلدیکندن مجارستان محاربه سنه نهایت ویرمك ایستور؛ برادری (فردیناند) ی پادشاه ایله اویشمق ایچون صیقیشدیریوردی . سلطان سلیمان دخی ایرانه قارشی محاربه لزومنی حسن ایتدیکندن مصالحه یه میال ایدی . حتی وندیکه یونس بکی وظیفه سفارت ایله کوندرمش ، سفیرمن اوراده فوق العاده حسن قبوله مظهر اولمشدی . (فردیناند) استانبوله (شه پر Schepper) و (ژه روم دوزارا Jérôme de Zara) اسمنده ایکی سفیر کوندردی .

پادشاہ اولجہ ویانہ بہ کوندردیکی برچارش واسطہ سیلہ (Gran)
 قلعه سنک آنخاتارلری تسلیم ایدیلیرسہ عقد مصالحہ اولنہ جغنی بیلدی ر مشدی .
 بناءً علیہ (فردیناند) ک سفیرلری بوقلعه نك آنخاتارلری کتیر مشلردی .
 (فردیناند) قلعه نك تسلیمندن شکایت ایدن تبعہ سہنہ کوندربلن
 آنخاتارلرک ساختہ ازلدیغنی ، آنخاتار ارسالندن برشی چقیمہ جغنی
 سولیشدی . قرال بوساختہ کارلقدہ بولندینی صرہ دہ صدر اعظم ابراہیم
 پاشا سفیرک تقدیم ایتدیکی آنخاتارلری قبول خصوصندہ استغنا کوستردی ؛
 « مقصد آنخاتارلری آلمق نکدی . پادشاہ ترضیہ ویرلمسی لازمدی .
 ایجاب ایدر ایسہ بزقلعه نی قلیچمز ایلہ دہ آلیرز » دیہرک آنخاتارلری
 اعادہ ایتدی .

بوسفیرلر ایلہ صدر اعظم ابراہیم پاشا نك ملاقات ومذاکراتی تاریخدہ
 مشہوردر . ایلک ملاقاندہ صد اعظم دولت عثمانیہ نك قوت و ثروتندن ،
 کندیسنک اقتدارندن ، حقندہ کی امنیت پادشاہیدن بحث ایتدی .
 سفیر بوفرستدن بالاستفادہ صدر اعظمک اقتدارینی بیلدیکی یچون قرال
 فردیناندک کندی برادرینہ مراجعت ایدر کبی ابراہیم پاشایہ مراجعت
 ایتدیکنی ، پاشاہی دخی پدر کبی طانیوب حرمت یلدیکنی سولیدی .
 صدر اعظم قرال فردیناندک مکتوبنی سفیرک الدن آلدینی حالہ
 ایمپراطور شارلک نامہ سنی کوردیکی زمان آیاغہ قالقہ ورق تقیل ایلدیکندن
 سفیر بشنچی شارلک دخی پادشاہی قرداش مقامندہ انیدیغنی سولیدی
 ومجارستان فردیناندہ ویریلیرسہ اخیراً اہل صایب دونمائی طرفندن
 مورہ دہ ضبط ایدلمش اولان (قورون) قلعه سیلہ آفریقا ساحلندہ کی
 (ارجل) آطہ سنک اعادہ اولنہ جغنی بیان ایتدی . ابراہیم پاشا مجارستانک
 پادشاہ طرفندن (زاپولیا) یہ ویرلیدیکنی ، کری یہ آلہ میہ جغنی ،

(قورون) قلعه سه کنج، دولتک بوراسنی حرباً آلمنی ترجیح ایتدیکنی
جواباً بیلدیردی .

بو مذاکراته یوقاریده اسمی کچن (لوتی غریقی) دخی اشتراک
ایتمکده ایدی .

بر کون ، ابراهیم پاشا پادشاهک چوسنی بر چاوش واسطه سیله
قرال فردینانده بیلدیردیکنی ، بو چاوشک سره معامله کورمسی اوزرینه
ایضاحات ایسته نیلمک ایچون کوندربان ایکنجی چاوشک قتل ایدلدیکنی ،
پادشاه بوکا حدتاندیکی صرمده (پاویه) ده اسپر اولان فرانسه قرالئک
والده سی طرفدن استدعای معدات اولندیغنی ، بو ایکی سبیدن طولانی
سفر هایونک اجرا ایدلدیکنی ، مجارستان قرالی (لوتی) میدان حربده
تلف اولدیغدن مملکتک حق غزا اوله رق پادشاهه کچدیکنی ، مجارستان
فتح اولتورکن (شارل کن) ، (فردیناند) ویا دیگر بر کیمسه نک
کلوب ادعای حق ایتدیکنی ، (شارل) او صرمده ایتایاده اولوب
اوزدن عثمانیلری تهدید ایتدیکنی سویلیدی . وقرال (شارل) ک
مکتوبنده قولاندیغنی عنوانلره دخی اعتراض ایدهرک قدس پادشاهک
ملک مشروعی ایکن شارلک کندیسنی « قدس قرالی » عنوانیه دخی
یاد ایدلدیکنی بیان ایتدی .

صدر اعظم قرال (شارل) ک کندی برادری ایله پادشاهی عینی
مرتبه ده حکمدار عدایمک ایستدیکنی ، حال بوکه پادشاهک (فردیناند) دن
دها قوتلی ، اونک مملکتدن دها واسع سنجاقلره مالک بر چوق بنده لری
بولندیغنی ، (شارل) نه رقت دولت عثمانیه ایله عقد صلح ایدرسه
ایمپراطورلغک اوزمان مقبول اوله جغنی دخی علاوه ایلدی .

مذاکرات بوصورتله خیلی زمان دوام ایتدی . ایرانه سفر ایتک

لزومندن طولای دولت عثمانیہ عقد صلح آرزو سنده بولندیغندن نہایت
بر زمین ائتلاف بولندی . مصالحہ نامہ عقد ایدلدی [۹۳۹] .

صلح معاہدہ نامہ سی بلا مدت ایدی ؛ یعنی (فردیناند) طرفندن
محافظہ ایدیلہ جکی مدتیجہ بردوام اولہ جقدی . (فردیناند) او صرہ دہ
مجارستانہ اشغال ایتمش اولدینی یرلرہ مالک اولہ جقدی . (فردیناند)
ایلہ (زاپولیا) نک مملکتلری حدودینی تحدید وتعیین ایچون (غریقی)
مجارستانہ کوندریلہ جکدی . بو ایکی قرال آرمہ سنده عقد اولنہ جق
مقاولات طرف پادشاہیدن تصدیق قلنہ جقدی . (فردیناند) مجارستانک
اشغال ایتدیکی قسمی ایچون سنوی (۳۰,۰۰۰) آلتون ویرہ جکدی .
(شارل کن) دخی عقد مصالحہ ایچون ایلچی کوندردہ جک وبوایلچی کلنجه یہ
قدر تعطیل مخاصمہ اولنہ جقدی ؛ شاید بو ائنادہ (شارل) محاربہ یہ
باشلایہ جق اولورسہ دولت عثمانیہ دخی جنکہ ابتدار ایدہ جکدی .

سفیرلر حضور پادشاہیہ قبول ایدلدکری صرہ دہ قرال (فردیناند) ک
سلطان سلیمانی پدری مقامندہ طانیہ جفی ، پادشاہک دخی آنی اولادلغہ قبول
ایدہ جکی ، پدرک مال و ملکی اولادک واولادککی دہ پدرک اولدینی بیان
ایدلدی ؛ قرال (لوئی) نک زوجہ سی قرالیچہ (ماری) نک جہازی
ومالکانہ سی دہ اعادہ اولندی . طرف پادشاہیدن برادری (شارل کن) ہ
واوغلی (فردیناند) ہ ، صدراعظم طرفندن برادری (فردیناند) ایلہ
اسپانیا قرالی (شارل) ہ برنامہ یازلدی .

الحاصل آوستریا ایلہ دولت عثمانیہ آرمہ سنده منعقد بوایلک مصالحہ نامہ
ایلہ قرال (فردیناند) صدراعظمک برادری ، یعنی پادشاہک بندہ سی
اولیوردی .

عراقین سفری

سلطان سلیمان، دور سلطنتده دائماً اروپا جهتده مشغول اولمقله برابر عراق و ایران جهتی ده نظر دقتدن اوزاق طوتمامشدر. شاه اسماعیل پادشاهك جلوسنی تبریکه لزوم کورمه. مشدی. بلغراد وردوسك فتحی اوزرینه شاه ایران دولت عثمانیه نك قوت وسطوتی سندن سنه یه آرتدیغنی کوردی؛ جلوسدن ایکی سنه صکره استانبوله بر هیئت سفارت کوندردی. هیئت سفارتك بش یوز آتلی ایله کلی خوشه کیتمدی؛ سفیرك آنجق یکر می کشی ایله شهره داخل اولسنه مساعدده ایدلدی. مع مافیه بو هیئت سفارتك اعزامندن بر نتیجه حاصل اولدی.

شاه اسماعیلک وفاتندن صکره یرینه کچن شاه طهماسبک استانبوله سفیر کوندرمه سی موجب اغبرار اولدی. شاهه تحقیر آمیز بر نامه کوندرلدی [۹۳۲]. شاه طهماسب ایسه بوکا جواب ویرمیرك (شارل کن) ایله (فردیناند) ه سفیر لر اعزام ایتدی؛ دولت عثمانیه علیه اتفاق تکلیف ایدلدی.

بوندن بشقه ایکی دولت آراسنده حربه سبب اوله بیله جك احوال اکسیک اولیوردی. دولت عثمانیه طرفندن کردستانه تعیین اولنه رق بتلیسده اقامت ایدن کرد امراسندن شرف بك عجم شاهنه عرض اطاعت ایتدی؛ آذربایجان حاکمی (اولامه) شاهه اهانتله بزه التجا ایدلدی؛ بغدادده ایران والیسی ذوالفقار خان شهرک آناختارلرینی سلطان سایمانه تقدیم ایتدی، فقط شاه طرفدارلری طرفندن قتل ایدلدی.

ایران ایله محاربه یه قرار ویرلدی. ایمپراطور (شارل) وقرال (فردیناند) ایله ایلک مصالحه نك عقدینی متعاقب سر عسکر تعیین اولسان صدر اعظم ابراهیم پاشا استانبولدن حرکت ایتدی.

اردو صوك بهارده يوله چيقديغندن قيشی حبلده كيردى. كردستان بلككنه تعين اولسان اولامه پاشا اردونك مواصلندن اول شرف بكه غلبه ايتمشدى. ابراهيم پاشا ايلك بهارده حركت ايله ديار بكر طريقه ايرانه طوغرى كيتدى؛ وان كولى اطرافده كي قلعه لرى آلدی، تبریزه كيردى، آذربجانك فتحنى اكمل ايلدى [۹۴۱ — ۱۵۳۴] .

بالاخره پادشاه دخی تبریزه كيتدى. كيلان، شروان اميرلى، شاهك دبكرا مراسى تبریزه كلهرك سلطان سلیمان عراض مطاوت ايلدىلر. آذربجانك ضبط وربطنى اكمل ايجون قيش موسمنی تبریزه كچيرمك لازم ايكن اردوى هائون موسمك مساعده سزلكنه باقیه رق بغداده ايتدى. يوللرده بك چوق زحمت چكيدى، حتى يوز قدر طوپ يولده ترك ايلدى، طوبراعه كومولدى. (الوند Oronte) بوغازندن كيملرك، كردستان سلسله جبالنى تعقیباً بغداده مواصلت ايلدى. شهر تسليم اوله رق پادشاه بلا حرب بغداده كيردى [۹۴۱ — ۱۵۳۵ كانون ثانى]. سلطان سلیمان بغداده بولندينى مدتجه ملكتك اداره سنى تنظيم ايتدى، اجرا ات حسنیه موفق اولدى.

پادشاه بغداده بولندينى صروده دفتر دار مشهور اسكندر چلبی اسكندر چلبی اعدام ايدلمشدر. اسكندر چلبی اردو استانبولدن حركت ايتديكى صروده وزير اعظم ابراهيم پاشايه كتبخدا، يعنى معاون صفتيله ترفیق اولنمشدى. اداره ماليه ده مهارتيله سلطان سلیمانك امنيتنى قازامش و ثروت عظيمه سى كنديسنه بيوك بر نفوذ ویرمشدى. بيوك مأمورلر ايجنده دارات و دبده جه وزرايه، حتى بالذات وزير اعظمه رقابت ايدم بيلن يالكز چلبی ایدی. بيكار جه كوله سى واردی. اوزمان دفتر دارلر سفر آچیلدقجه اردويه كندی مصرفلريله تجهيز

اولمیش او تو بوز آدم کوندر برلردی . اسکندر چایی یوزاون کشتی کتیرمشدی . فقط ابراهیم پاشا دفتردارک - ثروت عظیمه سینه نظراً - بوامسا کندن ممنون اولاماش ، او وقتدن بری اسکندر چایی حقنده کین باغلامشدی . دفتردار دخی وزیر اعظمک کمندی حقنده نه فکر بسلیدیکنی بیلدیکنی جهته اونک سقوطنه مترقب ایدی .

بعض کیمسه لر وزیر و دفتردار آره سنده کی خسومتی شدتله دیرمهک ، بوندن استفاده یه چالیشورلردی . ابراهیم پاشا شرق حدودینه طوغری کیدرکن دیار بکر وموصل طریقله بغداده عزیمت فکرنده ایدی . اسکندر چایی تبریزک آلمشی بغدادلرده سقوطنی موجب اوله جغنی سویلیه رک طوغریجه بغداد اوزرینه کیدلمسینه مانع اولدی .

بر کون اردو حرکت ایدرک خزینه دوه لری یوله حقیقه جنی صره ده هر طرفدن بردن بره « خرسن وار ! » سسلری ایشیدلدی . وزیر اعظمک آدم لری قوشوب خزینه بکجیلرندن او تو بوز کشتی بی توتیف ایتدیلر . بود مختلر اشکنجه یه قونیلنجه دفتردار ایله او یوشه رق کیجه لین خزینه بی یغما اتمک تورنده بولندقلری بی اعتراف ایلدیلر . فقط بو ، افترادن عبارتدی . حتی عسکر بیله بوایشده سر عسکرک حیله سندن بشقه رشکی کورمدی . اسکندر چایی او آندن اعتباراً آرتق دشمنی محو اولدقجه کندیسکی ایچون سلامت اوله میه جغنی اکلادی .

فی الحقیقه اردو پادشاه ایله برلکده تبریزدن بغداده کیتدیکنی زمان ابراهیم پاشا یولده چکیلن مشکلات عظیمه بی اردو نقلیاتنه مأمور اسکندر چالینک احتیاط سزلغنه عطف ایله خصمنی محو ایچون پادشاهک انفعالمندن استفاده ایتدی . اسکندر چایی عزل ایله مالکانه لری مصادره اولندی .

پادشاہک بغداددہ اقامتی انسانندہ وزیراعظم ثروت بی پایاندن طولانی
کندیسی ایچون حالا مخاطرہ لی کوردیکی اسکندر چلی حقندہ پادشاہدن
بر اعدام امری آلق ایچون هیچ بر شیدہ اہمال ایتمدی . نہایت ، موفق
اولدی . صلب ایدیلن دفتردارک آلتی یدی بیک کولہسی سرای قوللری
آرمسنہ ادخال ایدلدی .

اسکندر چلی کولہلرینی او قودوب یازدیرہ رق آدم یتشیدیرمک
مسلکینہ سالک ایدی . کولہلرندن یدی وزیر و برچوق امرا و رجال
یتیشمشدر . وزرادن پرتو، پیالہ، احمد، زال محمود، لالا مصطفی، حسین
وبکلر بکلرندن کلای، بہرام، روس حسن پاشا اسکندر چلی کولہلرنددر
بونلردن بالاخرہ وزیراعظم اولان احمد پاشا : « حالا دیوان ہایونندہ
یدی وزیرز . جملہ مزک مالی چلی مرحومک اقتدارینہ یتیشمز . »
دیر ایش .

ابراہیم پاشا اون درت سنہ دنبری وزارت
ابراہیم پاشا ک قلی عظامادہ بولنمقدہ ایدی . پادشاہ بر کولہی
کندیسنہ انشتہ یامش ، دولتک اک بیوک مقاملرینہ چقارمش ، زمام
ادارہ حکومتی الہ ویرمش ، بتون اردولرینہ سر عسکر تعین ایلشدی .
اوکا دائما سوکیکی بر قرداش معاملہسی ایش ایدی .

ابراہیم پاشا ایسہ مست اقبال اولہرق کندیسنی اوموقع
بالاترینہ چقارمش اولان ذاتک الطافنی اونوتدی ؛ غرور نامعقول
ایچندہ ہر درلو حسیات تواضعدن تجرد ایدرک افندی بی قولدن آیران
مسافہ بی بیلیمور کی کوروندی ؛ احتراض وغروری اودرجہ بہ واردی کہ
بستون پادشاہہ مخصوص عنوانلری بیلہ آلق ایستہ دی . شارل کن
وفردیناندک ایلچیلرینہ پادشاہک ارادہ ایتدیکي خصوصاتدہ بیلہ کند .

یسنک کال اقتدارینی کوسترمک ایستیه رک پک احتیاطسزجه برنخوت ایله سوزلر سویلشدی. ابراهیم پاشانک پادشاهک افکاری اوزرنده کی تاثیر ساحرانه سی بعض کیمسه لرجه خشنودسزلغنی موجب اولیوردی. حلبده ایکن اسکندر چلبی علمنده کی منفور خدعه لری سوء تاثیر حاصل ایتمشدی. دفتردارک اولا عزلی، صکره قتلی عمومک خشنودسزلغنی صوگ درجه یه کتیردی. کردستانک فتحندن بری ابراهیم پاشا اولامه پاشا کی بعض سبکمفرانک القایله القاب واعلاناده «سرعسکر سلطان» عنواننی قوللامقده ایدی. کرد سنجاقلری امراسنجه اوتهدنبری سلطان عنواننک استعمال ایدلمش اولمسی بولندینی مملکتک داداتنه تبعیت صورتنده بر معذرت عد اولنه بیلیرسده بویله بر عنوانک استعمالی پادشاهه کران کلمکه باشلامشدی. حتی اسکندر چلبی پاشانک بو کی حرکات نابجاسنی تقییح ایتمکدن کری طورمامشدی.

پادشاه اسکندر چلینک اعدامنی تعقیب ایدن کیجه کوردیکی بر رؤیایی بر اخطار آسمانی اولق اوزره تلقی ایتمشدی. ابراهیم پاشانی هیچ یاندن آیرماز ایکن اوکوندن اعتباراً احترازه، خیانتدن قورقغه باشلادی. بلکه پادشاهک ابراهیم پاشانی قتل ایتدیرمسی ایچون مجهول قالمش دهها بشقه سبیلر واردی. هر نه حال ایسه، ابراهیم پاشا برکون بر معناد پادشاه ایله برلکده طعام و استراحت ایتک اوزره سرایه کیتدیکی حالده ایرتسی صباح بوغولمش بولندی. نعتی غلطیه نقل اولنه رق برتکیه یه کومولدی، اوزرینه تر به یاپیلندی.

عثمانلی وزراسندن هیچ بری ابراهیم پاشانک واصل اولدینی ذروه اقباله چیقمامش، هیچ برینک سقوطی ده ممالک دولته او قدر شدتلی حس ایدله مشدر.

اوتارینجندہ بحر سفید قورصانلر ایله طولوایدی .
 بابا بارس غیر العربین یا انا بر طرفدن ردوس شوالیه لری، دیگر طرفدن
 عثمانلی وروم قورصانلری آناتولی و مصر سواحلندن ایرمازلردی . عثمانلی
 قورصانلرینک مرکزی مدلی آطه سی ایدی شمالی آفریقاده تأسس ایتمش
 اولان حکومت اسلامیه نك [مرینلر، زیانیلر، حفصیلر] انحطاطی، تونس
 و جزایر سواحلنده بعض مواقعك شارل کن نامنه اسپانیوللر طرفدن
 ضبطی و بو صورتله اورالرده اغتشاشات ظهوری عثمانلی قورصانلرینک
 نظر دقتی بحر سفیدك غرب طرفلرینه چویردی .

مدلیده بر سپاهینک الیاس، اسحق، بابا اوروج و خضر نامنده دوت
 اوغلی واردی اوروج کنجلکندن بری قورصانلقده شهرت قازانمشدی .
 برکون برردوس کیسی طرفدن آنمزین باصیله رق اسیر ایدلمش، برادری
 الیاسك کوزی اوکنده اولدیرلدیکنی کورمش، فورسه صققله دشمن
 کمیسنده کورک چکمشدی . نهایت، فراره موفق اولمش؛ تونسہ کیتمش،
 بنی حفص حکمدارندن حسن قبول کوره رک جربه آطه سنده یرلشمش
 ایدی . بر مدت صکره خضر رئیس دخی برادرینه التحاق ایتدی .

اوروج و خضر قورصانلقله هم بیوک بر شهرت قازاندیلر؛ همده بر
 چوق اموال غنائم جمعنه، بو اموالی بنی حفص حکمدارینه تقدیم ایده رک اونک
 معاونتی جلبه موفق اولدیلر . بر آراق جزایردن کلن بر هیئت اسپانیولری
 بجایه [Bougie] لیماندن طرد ایتک ایچون ایکی برادرک معاونتی طلب
 ایتدی . اوروج و خضر جزایر مسلمانلرینه یاردم ایتک اوزره همان
 بجایه کتدیلر؛ فقط ایکی دفعه وقوعه کلن هجومده بوراسنی ضبطه
 موفق اوله مدیلر؛ (جیجه لی) بی اشغال ایله اکتفا ایتدیلر . بر مدت
 صکره جزایر شهرینه کیردیلر . اسپانیولر جزایرک قارشیسنده بر آطه

اوزرنده بولنان (په نون Penon) قلعه سنه قانديلر . بونلرك واقع اولان
استرحامانی ارزرينه شارل كن بر كوچك دونما ايله عسكر كوندردی
ايسه ده اوروجی جزايردن چقارمه دی .

اوروج رئيس اون درت سنه آفريقاده قالدی . بومدت ظرفنده
قورصانلق ايتدی ؛ بلکه داخله طوغری ايلرليده رك توسيع ممالكه
چالیشدی . حتی شلیف وادیسی ، تلمسانی ضبط ایتدی . اسپانیوللره
وقوعه کلن بر محاربه ده تلف اولدی . هنوز قرق درت یاشنده ایدی .
اوروجك یرینه قائم اولان و خدمت دولت علیه یه کیردکن صکره بارباروس
خیرالدین پاشا نامنی آن خضر رئيس بر طرفدن یرلی قبائله ، دیگر جهتدن
اسپانیوللره مقاومت ایده بيلمك ایچون یاوز سلطان سلیمه عرض اطاعت
ایدرک ضبط ایدیلن ممالکی دولت عثمانیه یه تقدیم ایتدی . بحرسفیدك غرب
جهتده ، آلمانیا ایمپراطوری واسپانیا وسیچلیا قرالی شارل كنك ممالکی
قارشیسندره یرلشمك دولت عثمانیه ایچون بریوك موفقیت ایدی . سلطان
سلیم خضر رئیس ۲,۰۰۰ یکیچری کوندردی و آناطولیده ایسته دیکی
قدر عسکر یازمسی ایچون مساعده ویردی .

بوندن صکره دولت عثمانیه نك مأمورینی صره سنه کچمش اولان خیرالدین
پاشا شارل كن طرفدن ۵,۰۰۰ کزیده عسکرله برلکده جزایره
کوندریلن ۴۰ پارچه کمی بی مغلوب و محو ایتدی . بر طرفدن جزایر
سواحلی باشند باشه الله ایتمهک چالیشیور ، دیگر طرفدن ایتالیا سواحلی
اورییوردی . معیتده بحر سفیدك بتون لیانلرندن کلوب طوپلانمش
جسور محاربلا ، ماهر قورصانلر بولنقه ده ایدی . اسپانیوللرك الله
بولنان (په نون) قلعه سنی دخی ضبط ایتدکن صکره خیرالدین پاشا
جزایر لیمانی سفائن حربیه ، آلات وادوات حربیه ايله تولدیردی .

اك بيوك رقبی شارل كن دونماسنك باش آمیرالی (آندریا دوریا) ایدی۔
دوریانك جرجل آطه سی اوزرینه تعرضی دفع ایتدی۔ شارل كن
طرفدن شدتله تضییق اولئان اسپانیا مسلمانلردن یتمش بیک کشی یی شمالی
آفریقایه نقل ایلدی۔

(آندریا دوریا) نك قومانداسنده کی شارل كن دونماسی (قورون)
قلعه سنی ضبط ایتسی اوزرینه خیرالدین پاشا استانبوله دعوت ایلدی۔
آفریقا ساحلندن حرکت ایدن (بارباروس) اثنای راهده (آندریا دوریا) نك
کیلرندن بر چوغنی باتیردقدن صکره استانبوله کلدی ؛ عهده سنه
جزایر بکیر بکیلیکی توجیه ایلدی۔ خیرالدین پاشا بتون قیش تدارکات
ایله مشغول اولدی ، بهارده ۸۰ قطعه کمی ایله دکره چیقدی ؛ جنوبی
ایتالیا سواحلی اوره رق تونسہ کیتدی۔ تونس امیری مولا حسن سوء
اداره سیله اهالی یی اوصاندرمش اولدیغندن خیرالدین پاشا تونس یی قولایجه
ضبط ایتدی۔ مولی حسن (شارل كن) ه مراجعت ایله استمداد ایلدی۔
ذاتاً خیرالدین پاشانك موفقیتی اوروپایی دهشت انجده براقمش
اولدیغندن (شارل كن) ۵۰۰ کمی ایله تونسہ کلدی۔ قلعه لری ، شهری
ضبط ایتدی۔ اهالی حقده درلو وحشتلر ، جایتلر اجرا اولندی۔
هر طرف یغما و تخریب ایلدی۔ خیرالدین پاشا جزایره التجایه مجبور اولدی۔
خیرالدین پاشا (شارل كن) ك تونسدن عودتی اوزرینه ۲۵ کمی ایله
دکره آچیلهرق (باله آر) آطه لرینی تخریب ایتدکدن صکره استانبوله کلدی۔
وندیک ایله دولت عثمانیه آره سنده ظاهراً مناسبات
حسنه جاری ایکن وندیک جمهوریتی محاربات بحریه نك
کافه سنده عثمانلی دشمنلرله متفق بولنیور ، فرصت
دوشوردکجه تجارت کیلر مزی ضبط ایدیوردی۔ نهایت ، وندیکه کوندر دیکمز

ونبیک الیه

محابه

سفیر یونس بکک اثنای عودتده ینه ونديک دونماسی طرفندن دوچار
تعرض اولسی اوزرینه سفر هایونه قرار ویرلدی [۹۴۳]

سلطان سلیمان (آلونیا) یه کیندی . قبودان دریا اولان خیرالدین
پاشا آق دکره چیقدی . (آندریا دوریا) برقاچ کیمیزی باتیردی ، فقط
خیرالدین پاشانک کلدیکنی خبر آنجه مسینایه قاچدی . اردوی هایون
آلونیاده بولندیفی صروده ونديک حکومته عائد اولان (قورفو) آطهسی
قره دن وکزدن محاصره ایدلدی . مع مافیه قیش موسمئک حلولی
اوزرینه محاصره رفع ایدیلرک عودت اولندی . فقط خیرالدین پاشا
ونديکلیردن (شیرا) ، (پاتموس) ، (استامپالیا) ، (اکین) (ناقسوس)
وسائر کوچک آلهلری آلدی . (ناقسوس) آطهسی سنه ده بش بیك
دوقه ویرکو ویرمک و ونديک ایله قطع علاقه ایلمک شرطیله صاحب
قدیمی دوق (قریسیو) نک النده براقیلدی . یالکز (نوبلی) قلعهسی
محاصره اولندیفی حالده ضبط ایدیله مدی .

خیرالدین پاشا ایرتمی سنه آطه لر دکزنده کی
روزه محاسبی جزائرک کافهسی ضبط وکریدک قنیه وحانیه
قلعه لرینی یغما ایتدی . (آندریا دوریا) پی آریور ، بونک دونماسیله
چارپیشمق ایستیتوردی . نهایت (دوریا) نک ونديک ، اسپانیا وپاپانک
۱۶۶ کیسندن مرکب اولان دونماسنه پروژه اوکنده راست کلدی ؛
پروژه وآیامورا صورلنده ایکی بیوک مظفریت قازاندی [۹۴۴-۱۵۳۸] .
بوندن صکره بتون بحر سفیده حاکم اولدی .

بارباروس خیرالدین پاشا ایله روم ایلی بککری خسرو
پاشا دالماسیا وموره سواحلنده ونديکلیرله محاربه یه دوام
ایتدیلر . نهایت ، ونديک صلحه طالب اولدی . موره ودالماسیا ساحلنده کی

قلعہ لری، اطہر دکنندہ بارباروسک ضبط ایتدیکی جزا اری ترک ایتک و ۳۰۰,۰۰۰ آلتون تضمینات و یرمک شرطیلہ عقد صاح ایدلدی .

آوستریا ایلہ دولت عثمانیہ آره سنده عقد
ایلمش اولان ایلک مصالحہ دن آرزو ایدیلن
نتایج حاصل اولمدی . پادشاہک ایران سفرینہ
بخارزانی

عزیمتی اوزرینہ ہابسبورغلر براز راحت ایتمشلر؛ شارل کن جنوبی اوروپادہ حکومتی تقویہ یہ چالیشمشدر .

ذاتاً پادشاہ فریناندا یلہ عقد مصالحہ ایتمش، شارل کنہ قارشی سربستی^۱ حرکاتی محافظہ ایلشدی . بناءً میدان حرب طونہ اووہ لرندن بحر سفید سواحلہ نقل ایدلدی . مورده کی قورونہ قلعہ سی عثمانیلر طرفدن حرباً ضبط اولمدی . بارباروس خیرالدین پاشا بحر سفیدہ شارل کن نامنہ ہر طرفہ تجاوز ایدن دونما ایلہ حربہ دوام ایتدی . محاربہ نک دکنہ ، بحر سفیدہ انتقال ایتسی فرانسه قرالی ایلہ پادشاہ آره سنده کی استلافہ دہا صمیمی ، دہا مؤثر بر شکل و یردی . پادشاہک کوندردیکی بر سفیر (پوئی Puy) دہ برنجی (فرانسوا) طرفدن قبول ایدلدی . خیرالدین پاشا تونسہ ضبط ایتدی ، کندی نامنہ اولہ رق فرانسه قرالہ بر سفیر کوندردی . جزایر وتونسک عثمانیلرک النہ یکمسی مالطہ جزیرہ سنہ مالک اولان (شارل کن) ایچون بیوک بر مخاطرہ ایدی . عثمانیلر (ردوس) ک فتحندن صکرہ شرقی بحر سفیدہ صاحب اولدقلری کی شمالی آفریقانک ضبطی نتیجہ سنده دخی بو دکنرک حوالی غربیہ سنہ وضع ید ایدیورلردی . وندیکنک غائب ایتکک باشلادیکی حاکمیت بحریہ عثمانیلرہ انتقال ایلککدہ ایدی . (شارل کن) بالذات آفریقا ساحلہ کیدرک تونسہ ضبط و تخریب ایتدی ؛ فرانسه قرالندہ اعلان خصومت ایدرک (پرووانس) قطعہ سنہ

کیردی . الحاصل مصالحه نك عقدندن صكره ده محاربه دوام ایتدی .
بالخاصه ونديك ايله محاربه ایتدیکمز صره ده (فردیناند) برچوق دفعه لر
تجاوز ایلدی . بر دفعه جنرال (قاجیانر) ك قومانداسی آتنده بولنان
قوتلی براردو مجارستانی ضبطه قالدیشدی . فقط ، بوسنه و دیگر سرحد
سنباق بکاری طولانهرق بواردونی محو ایتدیلر [۹۴۴ - ۱۵۳۷] .

(فردیناند) بر طرفدن ایران سفرندن عودت ایدن پادشاهی تبریکه
مسارعت ایتك کی حرکات ايله دولت عثمانیه نك ممنونیتی جلبه چالیشیور،
دیگر طرفدن مجارستانه تجاوزدن خالی قالمیوردی . (فردیناند) ايله (زاپولیا) نك
حدودینی تحدیده مأمور اولان (غریقی) بر سر سری اولمقله برابر دولته صادق
بولندیغندن هرايکی قرالک ایشنه کلمیوردی . بر کون ائتلاف ایلدی . (زاپولیا)
وقتیله سفارتله استانبوله کلن لهستان زادکانندن (لاچکی) یی — اقتدارینی
چکه مدیکی ایچون — قاتل صفیله توقیف ایتدیردی . فقط (لاچکی) قرالیچه
(ایزابل) ك التماسیه قورتولدی ؛ (زاپولیا) یی ترك ایا (فردیناند) ه التجا ایتدی .
اوضره ده دولت عثمانیه ونديك محاربه سنه نهایت ویرمك اوزره
اولدیغندن بر آو بجرأ تجاوزاتده بولمش اولان (شارل) ايله (فردیناند)
عقد صلح ایچون تشبثاده بولندیلر . (فردیناند) استانبوله بر سفیر کوندره رك
قرالیچه (ماری) نك جهازی عاء اولمدیغندن شکایت ایتدی . ابراهیم
پاشانك یرینه صدراعظم اولان آياس پاشا عثمانلی مرخصی (غریقی) نك
اهانه قتل اولغنی سببیه جهازك اعاده سی تأخر ایتدیکنی سویلدی .

(قاجیانر) اردوسنك بوزولسی اوزرینه (فردیناند) پك زیاده
تلاش ایتدی . (لاچکی) یی استانبوله کوندردی . (لاچکی) متبوع سابق
(زاپولیا) دن اخذ انتقام مقصدیه کنديسنك (فردیناند) ايله (غروس
واردین) ده دولت عثمانیه علیه بر معاهده خفیه عقد ایتمش اولدیغنی خبر

ویردی . بوافشآت پادشاهك غضبی موجب اولدی . سلطان سلیمان (فردیناند) ایله (زاپولیا) نك حکمدار تاجی طاشیمغه لایق اولمدقلربی بیان ایله (فردیناند) بودین قلعهسنی محاصره ایتمش اولدیغندن اعتذار وتضمین ضرر ایدلمکله برابر آتی ایچون تأمینات ویرلمزسه مجارستانه بالذات سفر ایده جکنی بیلدیردی .

(لاچکی) فردیناندك نزدینه عزیمتله ایرتسی سنه تکرار استانبوله کلدی . مجارستانك (زاپولیا) یدنده بولنان قسمی آوستریایه، یعنی (فردیناند) ویریلیرسه کیتلی ویرکو وبرچوق هدایا اعطا قلنه جفنی تأمین ایتدی . اوصرده (زاپولیا) وفات ایتمشدی . بونی خبر آلان (فردیناند) ، (لاچکی) نك تعلیماتی توسیع ایتدی؛ استانبوله برسفیر کوندردی . دیگر طرفدن (بودین) ی تحت محاصره یه آلدی؛ فقط بوراسنی ضبط ایده میهرک دیگر بعض بلده لره هجوم ایتدی .

(زاپولیا) نك زوجهسی قرالیچه (ایزابلا) مجارستانك زوچنك وفاتندن برقاچ کون اول تولد ایدن اوغلی (سکیز موند) ویرلمسنی پادشاهدن استرحام ایتدیکی کبی اوسنه نك ویرکوسی اولان ۳۰,۰۰۰ دوقه بی ده تقدیم ایلدی . (فردیناند) ك آدمیری بوچوجنك قرالیچه نك اولمدیغنی ادعا ایتدیلر . فقط دولت عثمانیه (بودین) و کوندردیکی مأمور مخصوص واسطه سیله ادعای واقعك طوغری اولمدیغنی تحقیق ایتدیردی .

(لاچکی) بودینك محاصره سنی تأویل ایله (فردیناند) ك کویا پادشاهك ملکنه تجاوز ایتدیکنی، (زاپولیا) ایله اوغراشدیغنی اثباته چالیشدی ایسه ده سوزلیرنه اهمیت ویرلمدی؛ حبس ایدلدی . بعده سفر هایونه قرار ویرلدی [۹۴۸ — ۱۵۴۱] .

۹۴۸ سفر همایونی

صدراعظم سنان پاشا ایرانک حرکاتنه کوره
 اتخاذ تدابیر ایتمک اوزره آناتولی سرحدینه
 مأمور اولدقدن صکره پادشاه تموز ظرفنده استانبولدن حرکت ایتدی .
 اردوی هایون بلغرادده ایکن سرحد بکلری (بودین) ی محاصره ایدن
 آوستریا و آلمانیا عسکرینه هجوم ایدرک بیوک بر مظفریت قزاندیلر . آوستریا
 اردوسی بوزولدی ، باش قوماندان (روکندورف) تلف اولدی .

پادشاه مجارستانک (سکیزموند) ه ویریله جکنی تأمین ، فقط چوجفک
 سن بلوغنه قدر (بودین) ایله مواقع سائرهنک اشغال عسکری آلتنده
 بولندیریله جفنی بیان ایتدی . قرالیچه (ایزابلا) نک نائبه حکومت صفیله
 اردلده اقامتی امر ایلدی . (سکیزموند زاپولیا) امور حکومتی اداره
 ایدجک سنه کلنجه ، عثمانیلرک اشغال ایتدکلری محللر کندیسنه اعاده
 اولنه جقدی . بوماده لری حاوی برده فرمان ویرلدی .

بوصورتله مجارستان اوچ قسمه آیرلمش اولیوردی : بر قسمی (فردیناند) ک
 النده ، بر قسمی عثمانیلرک تحت اشغالنده ، اوچنجی قسم — که اردل
 ایدی — نائبه حکومت صفیله قرالیچه (ایزابلا) نک یداداره سنده ایدی .

پادشاه (بودین) ه کیردی . اردوی هایونک کچدیکی یرلرده هیچ
 کیمسهنک مالنه ، جاننه تعرض ایدلمدیکی کبی (بودین) ده دخی بوقاعدهیه
 رعایت اولندی . سلطان سلیمان جامع شریفه تحویل اولنان (سنت ماری)
 کلیساسنده نماز قیلدی . سلیمان پاشا (بودین) محافظی ، خیرالدین افندی
 قاضی ، مجار ارکانندن اولوب سفارتله استانبوله کلش اولان (وهربوچی
 Verböczy) خرستیانلره حاکم تعیین اولندی . بوصورتله عثمانلی شهری
 حالنه کیرن (بودین) ۱۴۷ سنه عثمانیلرک النده قالدی .

پادشاہ سفر ہایون تدارکنده ایکن (شارل کن) تلاشہ دوشمش ایدی . فرانسه قرالی ایله سلطان سلیمان آردہ سندہ جریان ایدن مخابرات ومذاکراتہ واقف اولمق ایستہ یوردی . فرانسه نك اولجہ استانبولہ کوندر دیککی سفیر اولوب بوکرہ مملکتدن ینہ استانبولہ اعزام ایدیلن (ردفقون) ، (پاویہ) قربندہ قتل ایدلمشدی . فقط حامل اولدیغی اوراق الہ کچیریلہ مہ مشدی . بونک یرینہ تعین اولنان (بولہن دولاغارد Paulin de la Garde) بودیندہ پادشاہک نزدینہ کلدی . فرانسه سفیری پادشاہک نظر دقتنی بحرسفیدک غرب طرفلرینہ جلبہ مأمور ایدی . محل مخصوصندہ کوریلہ جکی اوزرہ سلطان سلیمان بارباروس خیرالدین پاشای فرانسه قرالہ معاونتہ مأمور ایتدی ، دونماز مارسلایہ کیتدی .

(شارل کن) ایله (فردیناند) بودینک ضبطدن صکرہ پادشاہک ویانہ یہ تعرض ایدہ جکندن قورقدقلری ایچون رجال حکومتدن قونت دو (سالم) ایله (برشتاین Berstein) ی سفارت ایله بودینہ کوندر دیلر . مجارستان تماماً (فردیناند) ە ترک ایدیلیرسہ یوزبیک ، (فردیناند) ک اندہ بولنان قسم کندیسنہ براقیلیرسہ قرق بیک آلتون ویرہ جکلرینی بیان ایتدیلر . سفیرلر آوستریا طرفدن وقوع بولان تجاوزک پادشاہہ قارشى اولیوب (زاپولیا) نی تحدید حدودہ اجبار مقصدیلہ وقوعہ کلدیکنی دخی سویلورلردی .

پادشاہ (فردیناند) ک بغیر حق اشغال ایتدیکی مواقعی اعادہ ایتسی لازم کلہ جکنی ، اولجہ کندیسندہ قالمسنہ موافقت ایدیلن شمالی مجارستان ایچون سنوی ۴۰,۰۰۰ آلتونک کفی السابق ویرلمسنی ، مجارستانک اقسام سائرہ سی دولت عثمانیہ نك اولوب (سکیزموند) ە احسان ایدلیدیکنی بیان ایتدی . سفیرلر تعلیمات جدیدہ آلمق ایچون عودت ایدیلر .

قیش موسمنک بودین ویا بلغراددہ کچیریلہ جکی ، ایلک بہارده ویانہ یہ

کیدیه جکی ظن اولنمقده ایکن سفیرلرک عودتی متعاقب اردوی هایون
بودندن حرکت ایتدی ؛ تشرین ثانی ظرفنده استانبوله عودت ایدلدی
[۹۴۸]. مجارستان اموری یوزاوستی بر اقلمش ایدی. فقط اوسنه خیرالدین
پاشا دکزده بویوک مظفریتلره نائل اولدی .

۹۵۰ سفر همايونی مجارستانده کی قلعهلرک محافظلری توسیع حدوده
چالیشدقلری کی (فر دیناند) دخی بر طرفدن استانبوله
سفیر کوندریور، دیگر جهتدینه (بودین) ی محاصره ایتدیریوردی. سفیر
ایله جریان ایدن مذاکراتدن بر نتیجه حاصل اولمدی، ینه سفرهایونه قرار
ویرلدی [۹۵۰ — ۱۵۴۳] .

بودفه نیسانده استانبولدن چیقلدی. اردونک هر درلو لوازمی مکمل
ایدی . اوچیز قدر کمی قره دکز وطونه طریقله مجارستانه مهمات
حربیه و ذخیره نقل ایتدی .

دشمن بودینی ، پشته یی محاصره ایتشدی . بودین محافظی بالی زاده
بالی پاشانک معیتده سکز بیگ کشی واردی . دشمن اردوسی ایسه پک
غلبه لکدی . پروسیه دوقه سی (یوواکیم دو براندبورغ) ک معیتده قرق
بیگ منتظم عسکر اولدقندن بشقه اوستریا، ایتالیا، اسپانیا وفلمنکدن قرق
بیکی متجاوز قوه امدادیه کلشدی . عثمانیلر بو قوتلی اردویه مقاومت
ایتدیلر. محاصره دوام ایتدیکی صره ده پادشاهک مجارستانه کلکده اولدیغی
خبر آلدیغندن دشمن اردوسی رفع محاصره یه وشاله طوغری چکیلمکه
مجبور اولدی .

مجارستانه داخل اولان سرحد بکلری قلعهلری بربر و ضبط ایدرلرکن
پادشاه (بودین) داخل اولدی. طونه طریقله سوق اولنان بیوک محاصره
طوپلرینک ورودندن صکره مجارستان دولتنک مؤسسی (سن اتیهن) ک

وطن اصلیسى و قدیم قراللىك مقرى اولان (غران) قلعہسى ضبط ایدلدى . بعدہ مجار قراللىرىك مدفلىرىنى حاوى اولان (استونى) بلغراد (Stuliweissenburg) شہرى اوج ہفتہ محاصرہ دن صکرہ فتح اولندى . ضبط ایدیلن قلعہلرہ محافظلر ، قاضیلر تعین ایدیلیور ، مجارستان سنجاقلرہ آریلہرق تشکیلات ادارہیہ ابتدار اولئیوردى .

قیس موسمنی مجارستاندہ کچیرمک ، بہارده شمالہ طوغرى چیقہرق لدی الايجاب ويانهی ضبط ایتک ، الحاصل (فردیناند) ایلہ (شارل) ی قطعی بر معاہدہ عقدینہ اجبار ایلک لازم ایکن (استونى) بلغراد) ک فتحندن صکرہ اردوی ہایون ینہ استانبولہ عودت ایتدی .

ایرتسی سنہ (بودین) والیسی ایلہ سنجاق بکلى فتوحاتى ا کمال ایتدیلر . مجارستان قراللىك تاجنى حاوى بولان ویوکسک شہر معناسہ اولان (ویشہ غراد Vichégrad) — نام دیکرى بلیندنبورغ Blindenburg — قلعہسى ایلہ (اسقلاوونیا) و (خروانستان) دہ بر چوق قلعہلری ضبط ایدیلر . خرواتلرہ قوماندا ایدن قونت (زرىنى Zriny) و آوستریالیرہ قوماندا ایدن (بیلدر شتاین Bilderstein) بوسنہ بکلىرکی اولامہ پاشا ایلہ ہرسک بکی مالقوچ زادہ نک عسکرلرینہ (لونسقا Lonska) موقعندہ مغلوب اولدیلر .

مجارستان (بودین) بکلىرکی محمد پاشانک تحت ادارہسندہ اون ایکی سنجاغہ آیرلدى . دفتردار خلیل افندى طرفندن تحریرى اجراء ویرکو ورسومک نوعی ، صورت طرح و تحصیلى تعین ایدلدى .

بر مدت صکرہ مذاکرات صلحیہ ابتدار اولندى . اول امرده (غران) پسقوسى ،

(فردیناند) نامنہ (بودین) والیسنہ مراجعتلہ

متارکہ طلب ایتدیکی کبی هندستان صولرنده کی مخاصاتہ نہایت ویرمک

اوزره عقد مصالحهیه مأموراً استانبوله کلن پورتکیز سفیری (قاتانه‌ئو) ویانه‌دن کچرکن قرال (فردیناند) طرفندن دولت عثمانیه ایله صلح مذاکره‌سسه مأمور ایدلدی. بوسفیرک رفاقتنه (آدورنو) اسمنده بر مرخص، (مالوچی) نامنده دخی بر کاتب ویرلدی.

(آدورنو) استانبوله وفات ایتدیکندن (فردیناند) طرفندن (سیقو)، (شارل کن) طرفندن دخی فلمنکلی (وه‌لتویک) اسمنده ایکی سفیر کوندردی. (فردیناند) طرفینک حدودی محافظه اولنق شرطیه عقد مصالحه ایدیلیرسه هر سینه دولته اون بیك، صدراعظمه اوچ بیك، قبه وزیرلرندن هر برینه بیك آلتون ویره‌جکنی وعد ایدیور؛ طرفین تبعه‌سنگ دعوالرینی رؤیت ایچون برقاچ شهرده محکمه‌لر تأسیس‌نه مساعده ایستیوردی. نهایت ادرنده اون سکرز آیلق بر متارکه عقد ایدلدی. (شارل کن) ایله (فردیناند) اون سکرز آی ظرفنده برر مرخص کونده‌رک مصالحه نامه‌ی امضا ایده‌جکلردی [۹۵۳].

آیلرجه دوام ایدن مذاکراتدن صکره مجارستان دولت عثمانیه‌نک ید ضبطنده بولنق، حاصلات سنویه‌لری یکریمی بیك دوقه حساب اولان اعیان مملکته عائد املاک ایله تیماره ربط ایدیلن بعض یرلر ترک ایدلمک، بونلرک بدلاتیه اولجه قرارلشدیریلان اون بیك دوقه ویرکونک یکونی اولان ۳۰,۰۰۰ دوقه هر سینه دولت عثمانیه‌یه ویرلمک شرائطی و بش سنه مدت ایله متارکه شکنده بر مصالحه نامه عقد ایدلدی. بو مصالحه نامه (فردیناند) و (شارل کن) دن ماعدا پاییه، فرانسه قرالنه، ونديک جمهوریتته دخی شاملدی. اوچ آی ظرفنده بونلر طرفندن دخی تصدیق اولندی [۹۵۴].

ایرانہ سفری
ہمایونی

برنجی ایران سفر ہایونندن بری اوچ سنہ کچمشدی .
بو مدت ظرفندہ شاہ طہماسب اولجہ غائب ایتدیکی
یرلری استرداد ایتمش ، وان کولنہ قدر کلکشدی .

شاہک برادری القاص میرزا پادشاہہ التجا ایلشدی . ایرانیلرک تجاوزاتی
اوزرینہ ۹۵۵ سنہ سندہ ایکنجی بر سفر ہایون وقوعہ کلہرک وان وتبریز استرداد
اولندی . القاص میرزا اصفہانہ قدر ایلرلیدی . کر جستان قلعہ لری ضبط
ایدلدی . قیش موسمی شرق حدودندہ کچدی . بعدہ ، استانبولہ عودت اولندی .
پادشاہک عودتندن صکرہ شاہ طہماسب ینہ میدانہ حیقہ رق موش ،
عادلجواز و آخلاط طرفلرینہ تجاوز ایتدی . بونک اوزرینہ وزیر اعظم
رستم پاشا بر اردو ایلہ آنا طولیہ کچدی .

۹۶۰ تاریخندہ ایرانیلرک ارضروم حوالیسنہ تجاوزلری اوزرینہ
بر سفر ہایون دہا اجرا ایدلدی . ارمنستانک ایرانہ عائد اولان قسمی ،
نخچوان ، اریوان ، قرہ باغ ضبط اولندی . شاہ طہماسب محاربہ یہ کیریشمدی
بالعکس ایلچیلر کوندردہرک صالحہ طالب اولدی . ایکی دولت آراسندہ
ایلک دفعہ اولہرق بر معاہدہ رسمیہ عقد ایدلدی .

واقعا ایران سفرلری فتوحات ایلہ نتیجہ نمش ایسہدہ کردستان
و آذربایجان طرفلرندہ اساسی تشکیلات ملکیہ وجودہ کتیریلہمدی .
بورالردہ کی قلعہ لردہ بک طرزندہ حرکت ایدن امرایہ ، رؤسای محلیہ یہ
ترک ایدلدکجہ محافظہ اولنہ مازدی . بو بکلیر ایسہ عادت قدیمہ لرینہ اتباعاً
بر برلریلہ محاربہ دن خالی قالمازلر ؛ بعضاً پادشاہہ ، بعضاًدہ شاہ ایران طرفنہ
کچرلردی . ایران سفرلری آراسندہ کوچک محاربہ لر ، محاصرہ لر اکسیک
اولمازدی . بونک ایچون دولت عثمانیہ آذربایجانی تماماً ، ارمنستان ایلہ
کردستانی قسماً محافظہ یہ موفق اولہمدی .

حرم هایونده بولسان قادینلرک امور دولته هیچ
بر مداخله و تأثیرلری اولماق لازم کلیر . لکن
اکثریا حرم هایونک اداره دولته بیوک بر نفوذ

شهرزاده سلطان
مصطفی

و تأثیری کورلمشدر .

سلطان سلیمان دورنده بالخاصه خرم سلطان دولت عثمانیه نک آتییی
نقطه نظرندن غایت مشوم بر رول اوینامشدر . خرم سلطان تاتارلر
طرفندن روسیه ممالکنه وقوع بولان بر هجومده اسیر ایدیلهرک بالاخره
حرم هایون ایچون صاتون آلان (روغاتینو Rogatino) پاپاسنک قیزی
ایدی . سرایه داخل اولنجه بیوک بر نفوذه صاحب اولمش ایدی .
کندیسیله ولی عهد شهرزاده مصطفی سلطانک والدهسی آره سنده شدتلی بر
رقابت و خصومت حصوله کلشدی . خرم سلطان رقیه سنی پک چابوق
کوزدن دوشوردی .

خاصکی سلطان اولدینی زمان تأثیر و نفوذی فوق العاده آرتدی .
پادشاهک یالکز کوزدهسی دکل ، مشاوری کبی ایدی . بتون اوروپا
خرم قادینک نفوذ و اقتدارینی بیلیردی ؛ حتی لهستان اویلزادکانی قرال
برنجی (سکیز موند) ک سفیری (اوپالینسکی Opalinski) واسطه سیله
کندیسنه بر تبریکنامه کوندرمشلردی . غایت حریص ، حیل و دیسیله
مائل ، غرضکار ایدی . شهرزاده مصطفی سلطانک والدهسنه غلبه ایتدکن
صکره ولی عهد ایله اوغراشمغه باشلادی . اولا استانبولدن برقاچ کونلک
مسافه ده ، مغنیساده بولان شهرزاده یی یکریمی بش کونلک اوزاغه ، آماسیه یه
کوندرتدی . صکره سلطان مصطفانک طرفداری اولان صدراعظم ابراهیم
پاشانک علیهنه دوندی .

ابراهیم پاشانک وفاتی اوزرینه خرم سلطان امور اداره یی بسبتون

الہ آلدی . بر قاج سنہ صکرہ قیزی مہرماہ سلطانک زوجی رستم پاشانی مقام صدارتہ کتیرتدی . بوواسطہ ایہ سلطنتی اوغلی سلطان بایزبدہ تأمین ایتک ایستیوردی . ولی عہد علیہندہ کی خصوصتہ تشدید ایتدی . رستم پاشا ایرانیلرلہ حرب ایچون آناطولیہ کچدیکی زمان شہزادہ سلطان مصطفی علیہندہ درلو درلو ترتیبادہ بولندی . شہزادہ نک کویا ایرانیلرلہ متفق اولدیغنی اعلان ایلدی . یکیکچریلرک کویا : « پادشاہ دشمن اوزرینہ یوریہ میہجک درجہدہ اختیاردر . مصطفی سلطانی پادشاہ اعلان ایتلی . سلطان سلیمان استراحت ایتسون . » دیدکلرینی پادشاہہ اسماع ایتدی . سلطان سلیمان دہ بونلرہ ایناندی . ۹۶۰ سنہ سندہ ایرانہ کیدرکن اوغلانی دعوت ایتدی . سلطان مصطفی بعض خیر خواہلرینک اخطاراتنہ رغماً ارککیدہ پدرینک یانہہ کیتدی . چادیرہ داخل اولدیغنی زماق قبوجی محمود آغا اسمندہ بر شخص طرفدن اولدیرلدی .

مجارستانہ وقایعی : طمشوارک فتنی ، فردیناند و شارل کن ۹۵۴ تاریخندہ عقدایدیلن مصالحہ نامہ احکامنہ رعایت اولنہ جغنی تأمین ایتدکلری و بوتأمینانہ

اکری ماحصرہ سی

لیل اولق اوزرہ مالوہ چی « انترنونس internonce » نامیلہ ایلک آوستریا سفیردائیمی اولہرق استانبولہ قالدینچی خالدہ سنوی ویرکونک ایلک تقسیطی تأدیہ ایدلمہ دنینہ اختلاف چیقدی ؛ مخاصمات باشلادی . طرفین بربرلرینک حدودینہ تجاوز ایدیورلردی . بالخاصہ اردل وقایعی حربک تکرار باشلامسنہ سبب اولدی .

اردلہ بولنان قرالیچہ ایزابلانک معیتندہ ایکی مشاور وار ایدی . آوستریایہ طرفدار اولان بومشاورلردن بری ایزابلانک حکومتدن فراغت ایلسنہ ، اردل ایہہ مجارستانی (فردیناند) ہ براقسنہ چالیشیوردی . بو

انتریکه لره واقف اولان دولت عثمانیه نك تهديداتنه رغماً (فردیناند) ك اردوسی (اردل) حدودینی تجاوز ایتدی .

اوستریا سفیری (مالوه چی) معاهده احكامنك تمامی اجراسنه رهن مقامنده استانبولده بولندیغی ایچون آناتولی حصارنده حبس ایدلدی ؛ روم ایلی بکلی بکی صقوالی محمد پاشا ایله سرحد بکلی سفره مأمور اولدی .

سرحد بکلی مواقع مستحکمه دن معدود اولان (لیا) یی ضبط ایتدیلر [۹۵۸] . بیوک بر مرکز اداره اولان (طمشوار Temesvar) محاصره اولندی ایسه ده ضبط ایدیه مدی ؛ محمدپاشا قیش موسمنك حلولی اوزرینه ایرتسی سنه یکیدن محاصره ایدلک اوزره بلغراده عودت ایلدی . محمد پاشانك بلغراده چکیلسمنی متعاقب اوستریا اردوسی (اردل) ه کیردی ؛ اهالی عصیان ایتدی . اوستریالیر (لیا) یی استرداد ایلدیلر . موسم بهارده اوستریالیر شدتلی هجوملرده بولندیلر . آلمان ، مجار ، ایتالیان ، اسپانیول عسکرندن مرکب اولان دشمن اردوسی (چکه دین Szegedin) قلعه سنه هجوم ایتدی . محافظ میخال اوغلی خضر بك ایچ قلعه یه قیانه رق کوکرجین واسطه سیله (بودین) والیسی خادم علی پاشایه خبر کوندردی . امداده کلن عسکر اوستریا اردوسنی محو ایتدی . بعده یکیکچری عسکرینك بر قسمی وزیر ثانی احمد پاشانك قومانداسی آلتنده سفره مأمور ایدلدی . عثمانلیلر (وه سپریم Vesprim) ، یاخود (وایسه نبورغ Veissenburg) ، (طمشوار) ، (لیا) قلعه لرینی ضبط واسترداد ایتدیلر . بوضورتله (ترانیسلوانیا) نك اك مهم ومعمور قسمی اولان (بانات Banat) عثمانلیلر اله کچدی ؛ سنجاق بکلکنه قاسم پاشا تعیین ایدلدی [۹۵۹] .

(بودین) والیسی خادم علی پاشا ایله (استونی بلگراد) بکی بلی زادہ
 آرسلان بك شمالہ طوغری چقہرق (فردیناند) ہ عائد قلعہ لری ضبط
 ایتدکلی کبی بر آوستریا اردوسنی (فولہق Fulek) موقعندہ بوزدیلمر؛
 اردونک یاریسی مقتول، یاریسی اسیر اولدی. مواقع مستحکمہ دن
 معدود اولان (چولنوک Szolnok) دخی ضبط ایلدی.

یالکز (ارلاو Erlau)، یاخود (اگری Agria) قلعہ سی مقاومت
 ایدیوردی. عثمانیلر بو قلعہ نی ۳۲ کون محاصرہ دن و محافظلرک بر قاچ
 مثلی تلفات ویردکن صکرہ ترک ایله رفع محاصرہ یه مجبور اولدیلر.

مع مافیہ بوسنہ، ہرسک بکلی، دیگر سرحد امراسی آوستریا یه
 تجاوز ایدہ رک متصل توسیع حدود ایدیورلردی. بونک ایچون
 (فردیناند) عقد مصالحہ ایتک، دها طوغریسی برآز وقت قزاق
 ایچون استانبولہ ایکی سفیر کوندردی. سفیرلر مجارستان قرالنی عنوانیہ
 (اردل) قطعہ سی (فردیناند) ہ ترک اولنورسہ سنوی ۱۵۰,۰۰۰،
 مجارستانک کنڈیسندہ قالان قسمی ایچون دخی ۴۰,۰۰۰ آلتون ویریلہ.
 جکی بیان ایدیورلردی. دولت عثمانیہ (اردل) قطعہ سنک (سکیز
 موند زاپولیا) یه عائد اولدیغی جوابی ویردی. بونک اوزرینہ مذاکرہ
 اوزادی. فقط او صرہ دہ ایران ایله عقد صلح ایدیلہ رک شرق جہتدن
 اندیشہ قلمدیغندن (فردیناند) ایشہ بر نتیجہ ویرمک لزومنی حس ایتدی؛
 استانبولہ بلچیقالی (بوسبہک Busbecq) اسمندہ بر سفیر اغرام ایلدی.
 ایران سفرندہ آماسیہ یه قدر کیدہ رک تشکیلات عسکریہ، احوال وعادات می
 تدقیق ایله بر اثر معتبر وجودہ کتیرمش اولان (بوسبہک) ک مدت
 سفارتی آلتی سنہ قدر سوردی. بومدت ظرفندہ مجارستان، اردل،

خرواستان جهت‌رنده محاربه‌یه دوام ایدیلیور؛ بر چوق قلعه‌لر آلتوب ویریلوردی .

(شارل کن) ۱۵۵۸ سنه میلادیه‌سنده وفات ایتشدی . مملکتی ایکی‌یه تقسیم ایدلدی . برادری (فردیناند) اوستریا و شمالی ایتالیا به مالک اوله‌رق آلمانیا ایمراطوری عنواتی آلدی ؛ اوغلی ایکنجی (فیلیپ) اسپانیا، جنوبی ایتالیا و بلجیقادہ حکمدار اولدی .

سنه‌لرجه دوام ایدن بو مذاکرات نتیجه‌سنده (فردیناند) اردل قطعه‌سندن، مجارستانک بزده اولان قسمندن واز کچدی ؛ مجارستانک کندیسنده قالان قسمی ایچون کفای السابق سنوی ۳۰,۰۰۰ آلتون ویرکو اعطاسنی تعهد ایتدی . بو شرائط دائره‌سنده وسکز سنه‌لک متارکه شکلنده بر مصالحه نامه عقد اولندی [۱۵۶۲ - ۹۷۰] .

شهرزاده سلطان شهرزاده سلطان سلیم ایله شهرزاده سلطان بایزید آره‌سنه وراثت سلطنت مسئله‌سندن طولانی خصومت کیرمش و بوکا سبب اولان سلطان سلیمک لالاسی مصطفی بایزید پاشا بر چوق حیل و دسایس ایله سلطان بایزیدی پدرینه قارشی عادتاً عاصی کوسترمشدی . نهایت ۹۶۶ سنه‌سنده کوتاهیه والیسی کوچک شهرزاده سلطان بایزید آماسیه و مغنيسا والیسی بیوک شهرزاده سلطان سلیم قونیه‌یه تعیین ایدلدیلر . سلطان بایزید بو معامله‌دن مغیر اولور . بعض منافق‌لرک القا آتیه عسکر طویلایه‌رق برادريله محاربه‌یه قالدیشیر . قونیه صحرا سنده مغلوب اولمسی اوزرینه نادم اوله‌رق پدرینه برعریضه یازار، عفویخی استرحام ایدر . فقط هرایکی طرفدن کوندریلن مکتوبلر لالا مصطفی پاشا طرفدن احما ایدلدیکندن پادشاه اوغلنک عصیاننه حکم ایدرک آناطولی طرفه کچر . سلطان بایزیدده درت اوغلیله برلکده ایران شاهنه التجا

ایلر . شاہ طہماسب درت سنہ مخابرہ دن صکرہ شہزادہ ایلہ اوغلارینی شہزادہ سلطان سلیم طرفندن کوندریلن جلادہ تسلیم ایدر . بیچارہ لڑک جملہ سی قتل اولئور .

سیکتوار سفری دولت عثمانیہ ایلہ آوستریا آردہ سنندہ کی ۹۷۰

وسلطانہ سلیمانک مصالحہ سنک عقدندن ایکی سنہ صکرہ فردیناند

ارغالی وفات ایدہ رک یرینہ اوغلی ماقسیمیلیان ایمپراطور

اولدی . ماقسیمیلیان تداخلدہ قالان ایکی سنہک ویرکوی ویردی . فقط حال صلح چوق زمان دوام ایتدی . حدود قوماندانلرینہ طرفین مالکنہ تجاوز ایدلمہ مسی ایچون امر ویرلمش ، خلاف عہد بر قلعہ یہ هجوم ایدن قوماندانک اعدام وقلعہ نک اعادہ ایدلمسی مصالحہ نامہ احکامندن بولنمش اولدینی حالہ بر مدت صکرہ حدود منازعالری محاربه نک یکیدن ظہورینہ سبب اولدی .

(سکیز موند زاپولیا) ماقسیمیلیانہ عائد (چاتمار) قلعہ سنی اشغال

ایتدیکی کبی ایمپراطور دخی (توقای Tukay) و (سرینچ Serenics)

قلعہ لرینی ضبط ایتدی . (بودین) والیسی طرفندن (سکیز موند)

امداد کوندردلی . ویانہ یہ اعزام ایدیلن هدایت چاوش توقیف ایدلدی .

آوستریانک استانبولده کی ایلچیسی صدر اعظم صقوالی محمد پاشانک

مطالباتی قبول ایتدیکنندن سفر ہمایونہ قرار ویرلدی .

سلطان سلیمانک صوک سفری اولان بو محاربه لر (سیکتوار سفری)

نامیلہ معروفدر . او سنہ محاصرہ ایدیلن مالطہ دہ عثمانیلر موفقیتسزلک

دوچار اولدیغندن پادشاہ سننک ایلر بلدیکنہ باقیہ رق بو موفقیتسزلکک

سوء تأثیرینی ازالہ ایچون بالذات سفرہ قرار ویرمشدی .

اردو ایکی یہ آیرلدی . بر قسمی وزیر ثانی پرتو پاشانک قومانداسی

آلنده اوله رق افلاق ، بغداد ، قریم عساکر معاونه سنی آلدقن صکره (زاپولیا) ایله برلشدی؛ آوستریانک النده قالان قلعهری استرداده مأمور اولدی . ایکنجی قسم پادشاه وصدر اعظم ایله برابر بلغراده کیتدی .

(ماقسیملیان) دخی تدارکات عظیمه ده بولنمقده ایدی . (بودین) والیسی بلی زاده آرسلان پاشا پادشاهک ورودندن اول احراز مظفریت ایتمک املیه (پالوتا) قلعه سنی محاصره ایتدی . فقط آوستریا اردوسی اوکنده رجعته مجبور اولدیغی کبی (وه سپریم) قلعه سنی ده مدافعه ایده مدی . بو قلعیه کیرن آوستریا عسکری اسلام ، خرستیان بتون اهالی یه وحشیانه آشکنجه لر یاپدیلر ؛ شهری یغما وتخریب ایتدیلر . آرسلان پاشا بلا امر حرکت ایدرک بو مغلویتیه سبب اولمق تهمتیه اعدام ایدلدی .

پادشاه بلغرادک قارشیسنده کی (زمیلین) ده (سکیز موند زاپولیا) یی قبول ایتدی . کندیسنه : « عسکر ، باروت ، قورشون وپاره تدارک ایتمک چالیشکیز . بزه محتاج اولورسه کز همان خبر ویریکیز » دیدی . و مجارستان تخته کندیسینی اقامه ایتمه دن ترک سلاح ایتمه جکنی تأمین ایدلدی .

اردوی همایون (اکری) اوزرینه کیدرکن شیمدی یه قدر عثمانلیلر طرفندن ضبط ایدیه مه مش اولان (چیکت Sziget) ، یعنی (سیکتوار) قلعه سی محافظی قونت (زرنی) بر مفرزه مزه هجوم ایتدیکندن اول امرده بو قلعه نك ضبطنه قرار ویرلدی .

(چیکت) محاصره ایدلدی . (زرنی) مردانه مقاومت ایتدی . جیخانه سنی آتله دی ، برقاچ رفیق ایله اردومزه طالدی . تلف اولدی . نهایت خیلی تلفات ویردکدن صکره (چیکت) ضبط ایدلدی .

فقط قلعه نك ضبطدن ایکی کون اول سلطان سلیمان اردوکاهده وفات

ایتمشدی [۹۷۴] . پادشاہک وفاقی کتم اولندی . صقوللی محمد پاشا پادشاہ حیاتده ایتمش کی امرار ویریوردی . نہایت (سیکتوار) ک ضبطنی متعاقب رجعتہ قرار ویرلدی . سلطان سلیمک استانبولہ ورود ایتدیکی خبر آلدینی زمان پادشاہک وفاقی اعلان اولندی .

سلطانہ سلیمانہ دوربنک سلطان سلیمان زمانی یالکز فتوحات نقطہ نظرندن دولتک دورہ اقبالی دکلدر؛ بامکہ علوم وادیاتمز، رجال مشهورہ سی صنایع نفیسہ مز ایچوندہ شعشعہ دار بر دوردر . فضولی بوپادشاہک زمانندہ وفات ایتمش، معمار سنان بوزماندہ معماری عثمانینک آنافس آثارینی وجودہ کتیرمش ، ابن کمال ایلہ ابوالسعودینہ بوزماندہ ساحہ علمدہ لایموت برشہرت براقشدر . الحاصل دور سلیمانیدہ یتیشن رجال تعداد ایدیلہ میہ جک درجہ دہ جو قدر . بز آنجق بر قاجندن بحث ایدہ جکز واوندن اول سلطان سلیمانک صدر اعظم لرینی صرہ ایلہ ذکر ایلیہ جکز :

سلطان سلیمانک برنجی وزیر اعظمی پیری محمد پاشادر . ردوس سفر هایونندن عودتدن صکرہ تقاعد ایدیلہ رک یرینہ ابراہیم پاشا تعین اولمشدر . پیری پاشا قاضی ایکن چالديران سفرندہ باش دفتردار وبعده وزیر اولہرق یونس پاشادن صکرہ صدارتہ کچمش واوچ سنہ سی سلطان سلیم اول ، اوچ سنہ سی سلطان سلیمان دورینہ عائد اولمق اوزرہ آلتی سنہ بو مقامدہ قالمشدر . سلوری قصبہ سندہ کی جامعک حرمنده مدفوندر . ابراہیم پاشادن صکرہ وزیر اعظم اولان آولونیالی آياس محمد پاشا یاوز سلطان سلیم زمانندہ یکچیری آغالغہ تعین ایدلمش؛ سلطان سلیمان زمانندہ آناطولی بککریکی ، شام والیسی ، وزیر ثانی اولمشدر . درت سنہ قدر صدارتدہ بولنہرق وبادن وفات ایتمشدر [۹۷۶] . زوجہ وجاریہ لر

چوق اولوب قوناغنده قرق بش بشیمکک صالاندینی واقع اولورمش .
« آياس پاشا قره غوله چيقدی ، ضرب مثله باعث اولمشدر .

آياس پاشانك يرينه كچن لطفی پاشا دخی آرناووددر . سرای هایونده
یتیشمش ، پادشاهك همشیره سنی تزوج ایتمشدر . اوچ سنه قدر صدارتده
قالمش ، متهور وحید اولمسنه مبنی عزل و شرف صهریتدن اسقاط
ایدیلهرك دیمتوقیه تبعید ایدلمشدر . بر چوق آثاری واردر . تاریخ
عثمانیسی مقبولدر .

لطفی پاشادن صکره خادم سلیمان ورستم پاشالر مقام صدارتی اشغال
ایتمشلدر . شهزاده سلطان مصطفی وقعه سندن صکره عزل ایدیلن رستم
پاشانك يرينه برادری قره احمد پاشا كچمش ، ینه برادرینك افتریقهلری
نتیجه سنده قتل ایدلمشدر . رستم پاشانك ایکنجی صدارتندن صکره وزارت
عظمایه نائل اولان سمیز علی پاشا کندیسینی چكه كك آت بولنیه جق
درجه ده قالین بر آدم ایدی . مع مافیه لطیفهلری ، کوزل سوزلری واردی .
چوق وعدده بولنوردی . « علی پاشا ویرکیسی » ضرب مثلی اوکا اسناد
ایدیلیر . سلطان سلیمانك صوك سفرندن اول ركوب ونزوله غیر مقتدر
اولدیغی ایچون عزل ایدلمش ویرینه وصقوللی محمد پاشا كچمشدر .

ابن کمال ویا کمال پاشا زاده لقبيله مشهور اولان احمد
شمس الدین افندی ادرنه ده طوغمشدر . بیوک پدری
سلیمان پاشا کی خدمت ملکویه سالک اولمشدی . برکون سلطان بایزید
ثانی وزراسندن ابراهیم پاشانك مجلسنده اوزمانك اك بیوک امراسندن
اورنوس زاده احمد بك اوتوریرکن ادرنه مدرسلرندن بری ایچرییه
کیرهك احمد بكك اوست طرفنده اخذ موقع ایلر . ابن کمال بو حاله
تعجب ایدر . رتبه علمیه نك اعلی الرتب اولدیغنی آکلاتیرلر . بوندن صکره

کندیسنده تحصیل علمہ بیوک بر ہوس اویانیر۔ ادرنہ مدرسہ لرنده ا کمال تحصیل ایلر۔ کرسی تدریسہ چقدینی زمان پک چوق طلبہ طویلانیر۔ ادرنہ قاضیغندہ، یاوز سلطان سلیم زمانندہ آناطولی قاضی عسکر لکنندہ بولنور۔ سلطان سلیمان زمانندہ ۹۳۲ سنہ سنندہ مولانا علی جمالینک وفاتندہ مفتی اولور۔ سکز سنہ بو مقامدہ قالیر۔ ۹۴۰ سنہ سنندہ وفات ایدرک سور خارچندہ محمود چلبی زاویہ سنہ دفن ایدیلیر۔

ابن کمال مدار افتخار من اولان ذواتک اک بیوکلرنددر۔ امر افتادہ کی احاطہ کلیہ سندن طولانی «مفتی الثقلین» عنوانیہ معروفدر۔ آثار ی پک چوق و پک متنوعدر۔ تفسیر، فقہ، اصول، کلام، حکمت، تاریخ، معانی ولغندہ معتبر تألیفات ی وارددر۔ فارسی و ترکی شعر سویلہ مشدر۔ علمای عثمانیہ نک اک بیوکلرندن بری اولان ابوالسعود

ابوالسعود

افندی ۸۹۶ سنہ سنندہ استانبول جوارندہ، مدرس کوبندہ طوغمشدر۔ پدری شیخ محمد بن مصطفی العماد اولدیغندن کندیسی ابوالسعود العمادی عنوانیہ یاد اولنور۔ ۹۲۲ دە وظیفہ تدریسہ باشلامش، بروسہ و استانبول قاضیقلرندہ بولندقدن صکرہ ۹۴۴ دە مقام فتوایہ تعین اولنمشدر۔ اوتوز سنہ یہ یاقین او مقامدہ قالہرق ۹۸۲ دە ۸۷ یاشندہ وفات ایتمشدر۔ جنازہ نمازی بتون علما و وزرا حاضر بولندقلری حالہ مثلی کورلمسک بر جماعت ایلہ فاتحہ قیلنمش، ایوب انصاری جوارندہ بنا ایلدیکی مکتب ساحہ سنہ دفن اولنمشدر۔ حریمین محترمیندہ وفاتی شایع اولنجه علمای مملکت صلات غائب قیلمشدر۔

ممالک عثمانیہ ابن کمالدن بشقہ ابوالسعودہ ترجیح ایدیلہ بیلہ جک عالم یتیشمہ مشدر۔ کمال پاشا زادہ درجہ سنندہ وسعت و تنوع معلوماتی یوقدی؛ فقط علوم شرعیہ، فتاوادہ بر مثلی دها کلہ مشدر۔ بعض

کونلر بیکی متجاوز فتوی ویردیکی روایت اولنور . « ارشادالعقل السليم الى مزایا قرآن العظیم » عنوانلی تفسیری غایت مقبولدر . عثمانیلر آره سنده ابوالسعود قدر عربجه یازان عالم یوقدر ، دیرلر . متواضع ووقور بر ذات ایدی .

خادم سلیمان پاشادن صکره وزیر اعظم اولان رستم پاشا
 رستم پاشا
 خروات و دوشیرمه چوجقلرندن ایدی . وزیر اعظم ابراهیم پاشانک کندیسنه توجهی واردی . مهاج سفرندن صکره برنجی سلحدارلقدن باش امیراخور منصبه چقمش ، مؤخر آدیار بکر بکلر بکلکنه ووزارته نائل اولمشدر . حربدن بشقه بر شیدن آکلامازدی . علوم وادیاتدن بی بهره ایدی . شاعرلرک دشمنی ایدی . بلکهده شو فقره شاعرلر طرفندن بر هجویه اوله رق یازلمشدر :

سلطان سلیمان کریم سی مهر ماه سلطانی رستم پاشایه ویرمکی تصور ایتدیکی صهرده وزیرک قالچه سنده جذام بولندیغی اشاعه ایدلمش . پادشاه حقیقی آکلامق ایچون حرم هایون اصدقاسندن برنی پاشانک یانه قویمش . بوکیمسه برکون وزیرک البسه سنده بریت کورمش . جناملیلرده بیت بولنمازمش . بونک اوزرینه : « الحمد لله ! سنک تمیزلکک ثابت اولدی . داماد پادشاهی اولغه لیاقتک میدانه چیقدی . » دیه باغیرمش . بو مناسبتله شو بیت انشاد ایدلمشدر : « اولیجق بر کشینک بنحتی قوی ، طالعی یار - کلهه داخی محلنده آنک ایشه یارار . »

رستم پاشانک صدارتنده قاین والده سی حرم سلطانک نفوذ و مداخله سی پک زیاده آرتمش ، رستم پاشا دور سلیمانی عادتا ایکی یه آیران بر حد فاصل خدمتی کورمشدر . برنجی دور پک شعشعه لی اولدیغی حالدده ایکنجی دور انترقه لرله مالیدر . شهزاده سلطان مصطفانک قتلی بو انترقه لرندن

بریدر. اوزمانك شاعر لری قرق یاشنده ایکن قتل ایدیلن شهزاده ایچون
بك سوزشلی مرثیه لر سویلشدر و «مکر رستم» ی وفاتنه تاریخ دوشور-
مشلردر. قیل وقاله نهایت ویرمك ایچون رستم پاشا عزل ایدلمش ،
یرینه برادری قره احمد پاشا کچمشدر. رستم پاشا بر مدت صکره برادری
علینده کی انتریقهلریله اونك قتلنه سبب اولمش وایکمنجی صدارتنده شهزاده
سلطان بایزید وقعه مؤله سی کورلمشدر .

رستم پاشا رشوت آلمق خصوصنده دخی بك ایلری یه وارمش وروایت
نظراً پاره سز هیچ بر منصب توجیه ایتمه مشدر .

خادم سلیمان پاشا آق آغالرنددر . خزینه دار باشی
ایکن سلطان سلیمانك جلوسنده شام والیلکنه تعیین

پاشا ایدلمشدر . وزیر اعظم ابراهیم پاشا مصر اداره سنی
تنظیم ایتدکن صکره بوقطعه نك والیلکنه شجاعت و فعالیت مجرب اولان
سلیمان پاشایی کوندرمشدر. سلیمان پاشا دبده وطنطنه یی سوردی. مصری
اون سنه قدر حسن اداره ایتدی . خطه مصریه دن آلان ویرکوی
« مصر خزینه سی » نامیله ایلک اوکجه استانبوله کوندرن اودر .

دولت عثمانیه شط العرب حوالیسنده ، مصرده اساسلی صورتده
یرلشمشدی . شط اوزرنده کائن بصره ایله مصرده سویش لیمانلری
سایه سنده عثمانیلر بحرا حمره ، بصره کورفزینه ، هند دکزینه حاکم ایدیلر .
اوزمان هندستانك شمال غریبسندده اولاد تیموردن (بابر) ایله
وارثلری بیوک بر حکومت تأسیسنه موفق اولمشلردی . پورتکیزلیلرده
سواحلک بعض مهم نقطه لرینی ، آطه لری اشغال ایدیورلردی . هندستانك
بیوک کوچك حکومتلری تلاشده دوشدکلرندن دولت عثمانیه یه مراجعت
ایتدیلر .

دلهی حکمداری اسکندر سلطان بابرک اوغلی و مسرور اکبر شاهک
 پدري همايون شاهک تجاوزاتنه قارشی دولت عمیه معاونتی استحصال
 ایچون استانبوله اوغلنی کوندردیکی کبی کجرات امیری هادر شاه دخی
 بر سفیر اعزام ایدمرك (دیو Diu) شهرینی ضبط ایدن پورتکیزلیلر
 علمینه امداد ایستدی و آلتی میلیون دوقه قیمتندہ تخمین اولان خزینه سنی
 امانت مکہیه کوندردی .

ذاتاً ۹۳۳ تاریخلرنده سلیمان رئیس بحر احمرده عثمانلی کیلرله سیر
 و سفر ایدیور؛ حجاز ویمین قطعه لری اوزرنده حاکمیت عثمانیه نی نأمین
 ایلوردی . دلهی و کجرات امیرلرینک مراجعتلری اوزرینه مصر والبسی
 خادم سلیمان پاشا هندستان اوزرینه سفره مأمور اولدی . سلیمان پاشا
 یتیمش کیمی یکریمی بیگ عسکر بیدیرهرك سویوشدن حرکت ایتدی
 [۹۴۵ - ۱۵۳۸] .

سلیمان پاشا سکسانلک بر اختیار ایدی . او قدر شیشمان ایدی، که
 یردن قالقمق ایچون درت آدمک معاوتنه محتاج ایدی . فقط فعالیت
 و خسارتندن برشی غائب ایتمه مشدی .

سلیمان پاشا هندستانه کیدرکن عدن اراضیسنده بر سنجاق تأسیس
 ایتدی . بر قاج هفته صکره عسکرینی کجرات ساحلنه چیقاردی؛ ایکی
 قلعه نی هجوم ایله ضبط ایتدکن صکره (دیو) شهرینی محاصره ایلدی .
 عثمانیلرک طوپلری آره سنده تقریباً برر قطار ثقلننده کولله آتار جسم
 طوپلر وار ایدی، که بونلرک سویوش بر رخندن دیو سورلرینه قدر
 نقللری شایان تعجبدر . محاصره یکریمی کون سوردی . پورتکیزلیلر
 شجاعتله مدافعه ایتدیلر . کجرات امیری اولجه پورتکیزلیلر طرفندن
 قتل ایدلمش ویرینه کچن امیر محمود اونلرله اتفاق ایتمش اولدیغدن عثمانیلره

معاونت ایتدی . سلیمان پاشا عسکری کملرہ چکمکہ مجبور اولدی .
 یمک اداره سنی بیقلی محمد پاشانک اوغلی مصطفی بکه تودیع ایتدکن
 صکرہ مصرہ واورادن استانبولہ کلدی .

سلیمان پاشا لطفی پاشانک عزندن صکرہ صدر اعظم اولدی . فقط
 بو موقعی حسن اداره ایدہ مدی . ذاتاً وزیر ثالث رستم پاشانک نفوذی
 صدراعظمک نفوذندن زیادہ وصدارتہ کچہ جکی محقق ایدی . نہایت خادم
 سلیمان پاشانک دیوان هایونده وزیر ثانی خسرو پاشا ایله آرہلرنده ظهور
 ایدن مجادلہ یی بربرلرینہ خنجر چکمک درجہ سنہ ایصال ایلملری سبب
 عزلی اولدی ؛ یرینہ رستم پاشا کچدی .

آق دکزى ، بحر احمرى ، بحر محیط ہندی یی
 جولانکاه اتحاد ایتمش اولان عثمانلی دونماسنک
 بیوک آمیرالی خیرالدین پاشا وفاتی تاریخنہ قدر
 صبر الدین پاشانک
 صوک سفارلی
 [۹۵۳] آق دکز حاکمیتنی ید اقتدارندہ طوتمشدر .

شارل کن (دوریا) نک ۷۴ بیوک ، ۲۰۰ کوچک کیمسی ایله اسپانیادن
 جزایراوکنہ کلدی . جزایری خیرالدین پاشانک اوغلی حسن بک مدافعہ ایتدی .
 ایمپراطورک یکرمی بش بیک کشیک اردوسی تلفات کلیہ یہ دوچار اولدی ؛
 ظهور ایدن بر فورطنہ دہ بر چوق کملر باتدی . نہایت (شارل کن)
 مأیوساً رجعت ایتدی .

فرانسہ محاربات سابقہ دہ دولت عثمانیہ یہ جدی برمعاونندہ بولمندی
 کبی دکزده دخی بر شی یامدی . ونديک ایله حرب اولورکن پروزہ
 صولرنده طولاشان فرانسز دونماسی ہیچ بر محاربہ یہ اشتراک ایتدی .
 بالعکس پروزہ وآیاماورا محاربہ لرندن صکرہ فرانسہ سفیرلری دولت
 عثمانیہ ایله ونديک آرہ سنده متارکہ عقدینہ وایمپراطور (شارل) ک دخی

بو متارکيه داخل اولمسنه چالیشدیله . پادشاه فرانسه سفیرینه عالیجنابانه بر جواب ویردی : « مادامکه اسپانیا قرالی متارکه ایستیور و بو متارکه فرانسه قرالنجه دخی خوش کوریلور ؛ شوخالده سزدن ضبط ایتدیکی ولایتلری، شهرلری، قلعهلری اعاده ایتسون. » دیدی. برنجی (فرانسوا) نك تلونی، قرارسزلی بتون دنیایی شبههیه دوشوریوردی .

(شارل) ك جزایر فلاکتی بحرسفیدی عثمانلی و فرانسز دونمالرینك تحت حاکمیتده براقدی . ذاتاً فرانسه قرالی سلطان سلیمانی مجارستان طرفنده محاربه دن واز کچیره ترك بحرسفیدك غرب جهتلرنده عثمانلی دونماسندن استفاده ایتك املنده ایدی . بوجهت خیرالدین پاشانك ایشنه ده کلیوردی . پادشاه دونمانك معاونتی وعد ایلدیکندن ۹۴۹ - ۱۵۴۳ سنه سنده خیرالدین پاشا ۱۵۰ کی ایله استانبولدن دکره چیقدی .

فرانسه سفیری (پولهن دولاغارد) دونمای هایونده بولنیوردی . خیرالدین پاشا سیچلیا و جنوبی ایتالیا سواحلمنده بعض قلعهلری ضبط ایتدی ، رومانك اسکله سی مثابه سنده اولان (اوستیا) یه کیدرك هر طرفی تلاش ایچنده ، براقدی ؛ نهایت، مارسیلیا یه واصل اولدی .

اوراده فرانسه آمیرالی دوق (دانکیهن d'Enghien) ك قومانداسنده کی فرانسز دونماسیله برلشدکدن صکره (نيس) ه کیتدی . شهر ضبط اولندی . محاربه نك بدایتده فرانسزلرك مهمات حربیه سی توکنمش ، بزم کیلردن استعانه ایتمشدی . حتی خیرالدین پاشا فرانسزلری کیلرینه باروت یرینه شراب طولدیرمغله اتهام ایلمشدی . برآراق (طولون) لیمانی عثمانلی دونماسنك استنادکاهی اولدی .

خیرالدین پاشا طورغود، پیالہ، قلاج علی، حسن و صالح
 پاسالر، سیدی علی رئیس کبی قپودانلری یتیشدیرمش
 اولدینی جہتلہ عثمانلی دونماسی بحر سفیدہ کی حاکمیتی

جربہ محاربہ سی

پیالہ و طورغود

اوزون مدت محافظہ ایتدی . بر آراق قپودان دریا اولان رستم پاشانک
 برادری سنان پاشا اہلیتسزلکی حسیلہ بارباروسک رفقاسنی کوچدیردی .
 فقط اونک وفاتی متعاقب پیالہ پاشا قپودان دریا اوائجہ ایش دیکشدی .
 اون دوت سنہ قدر قپودان پاشالق ایدن پیالہ پاشا عن اصل خروات
 ایدی ، شہزادہ سلطان سلیمک کریمہ سی کوہر سلطانی تزوج ایتشدی .
 معیتدہ طورغود و صالح پاشالر بولندینی حالہ ایتالیا ساحلی اورہرق
 (راجیو) شہرینی ضبط ایتدیک کی آفریقا ساحلندہ (اوران) ی ودیکر
 شہرلری اسپانیوللرک الدن آلدی .

عثمانلیرک موفقیات بحریہ سندن تلاش ایدن پاپا ، جنویز ، فلورانسہ ،
 مالطہ ، سیچلیا ، ناپولی ، موناقو و اسپانیا حکومتلری آندریا دوریانک
 قومانداسندہ ایکی یوز کیمین مرکب بر دونما حاضرلدیلر . بو دونما
 طورغود طرفدن تضییق ایدیلن جربہ آطہ سنی محاصرہ ایتدی .
 یانندہ پک جزئی قوت بولنان طورغود آطہ جوارندہ چکیلدی ؛ کیفیتی
 استانبولہ بیلدیردی .

بونک اوزرینہ پیالہ پاشا ۱۲۰ سفینہ ایلہ حرکت ایدرک یولہدہ براوقدر
 سفینہ دہا آلدقدن صکرہ جربہ آطہ سی اوکنہ کیتدی . وقوعہ کلن
 محاربہ مشہورہدہ آندریا دوریا ۵۴ کمی ضایعات ویردکدن صکرہ ایتالیاہ
 قاجدی . طرابلس غرب بککریکی اولان طورغود دخی بو آراق یتیشہرک
 آطہدہ کی قلعہ بی ضبط و بر کمیہ را کبا قاچان اسپانیا جنرالی (آوارو) بی

اسیر ایتدی . متعاقباً اسپانیوللرک آفریقا ساحلنده کی مستملکه لرندن
بر قاجنی دها آلدی [۹۶۷ - ۱۵۶۰] .

ردوسدن مالطیه چکلمش اولان شوالیه لر راست کلدکلی سفائن
اسلامیه یی تخریب ایتدکلی جهتله دفع مضرتلری ایچون بو آطه نك
ضبطی اوتهدن بری تصور اولنمقده ایدی . اخیراً مالطه شوالیه لرینك حرم
هایونه عائد اشیانی حامل بر کمی یی یغما ایتلری بو تصویری قوتلندیردی .
۹۷۲ سنه سنده پیاله پاشا ۲۱۰ کمی و وزرادن مصطفی پاشا قومانداسنده
اوله رق ۳۲,۰۰۰ قدر قره عسکر یله حرکت ایدرک مالطه اوکلرینه کیتدی .
پیاله پاشا طورغودک ورودینه انتطار اولنمی رأینده ایکن مصطفی پاشا
هان قره یه یکر می بیك عسکر چیقاردی ؛ (سنت الم) قلعه سنی طوپه
طوته رق محاصره ایتدی . بر قاج کون صکره اوتوز بر کمی ایله کلن طورغود
بو قلعه نك محاصره سنه لزوم اولمدیغنی ، اصل مالطه قلعه سی اوزرینه هجوم
ایدلک لازم کله جکنی سویلدی . فی الحقیقه سنت الم پك چوق فدا کارلق
نتیجه سنده ضبط ایدلدیکی حالده آطه آله مدی . بو محاربه ده بر کولله نك
قیایه تصادفله طاغیتدینی پارچه لر دن بری طورغوده اصابت ایتدی ؛
بو شانلی قپودان اوراده شهید اولدی . مالطه سفری درت آی امتداد
ایتمش ؛ نهایت رفع محاصره یه محبوریّت کورلمشدر .

خادم سلیمان پاشانك هندستان سفری نتیجه سز
هندستانه سفرلری قالدیغنی زماندن بری هند صولرنده ارائه سطوت
ایدلمسی آرزو اولنور ایدی . ۹۵۴ سنه سنده هند حکمدار لرندن بری
سلطان سلیمانه سفیر کوندره رک پورتکیز لیلره قارشی حمایت و معاونتی
طلب ایتمشدی .

ذاتاً پورتکیز کمیجیلرینك عربستان سواحله تعرضلرینی دفع ایتک ،

بصرہ کورفزی حوالیسنده سیرسفائٹک امنیتنی تأمین ایلک لازم ایدی. درت سنہ صکرہ مصر ایالتی قیودانی پیری رئیس ۳۱ کمی ایله سولیشن حرکت ایتدی. عدنی پور تکیزایلردن استرداد ایلدکن صکرہ بحر محیط هندی به چیقدی. مسقط ساحلریله بحرین آطه لرینی ضبط ایلدی. قیشین بصره ده قالدی. فقط ایلک بهارده پور تکیزایلرک قوتلی بردونما ایله هرمن بوغازینی سدایده جکلرینی خبر آلدی. جمع ایتدیکی اموال غنائی قورتارمق املنه دوشدی؛ دونمائی بصره ده براقدی؛ اوچ کمی ایله حرکت ایتدی. کیلردن بری یولده غرق اولدی. ایکسی ایله مصره کلدی. بوحرکتی اهانت غد ایدیلهرک مصره اعدام اولندی.

پیری رئیس مشهور کمال رئیسک یکنی ایدی. کنجلیکنده کمال رئیسک معیتده آق دکزک هرطرفنی کزمش، محاربات بحریه وسیر سفائنده کسب مهارت ایتمشدر. بحر سفید ایله آطه لر دکزینک بتون سواحل و جزائرینی، قوی، لیمان واسکله لرینی. غایت مدققانه مصور اولمق اوزره بر جغرافیای بحریسی ایله آطلاسی واردر.

پیری رئیسک براقدیغی دونما قوماندانلغنی اولجه قطیف سنجاقل بکلیکنده بولنش اولان مراد رئیس درعهده ایتدی. مراد رئیس بصره بی نقطه استناد اتخاذا ایدرک هند دکزنده توسیع نفوذ مأمور اولدی. یدی پارچه کیدن مرکب بر دونما ایله هرمن بوغازینه کیتدی. اوراده قوتلی برپور تکیز دونماسنه راست کلهرک صابحدن آقشامه قدر حرب ایتدی. دشمن قوتجه پک فائق اولدیغندن کیجه لین ظلمتدن بالاستفاده بصره به دوندی، ضایعات عظیمه به دوچار اولدی.

بعده «کاتبی روم» عنوانیله معروف اولان سیدی علی رئیس بحر احمر وهند دکزى فیلوسی قوماندانلغنه تعیین ایدلدى. سیدی علی رئیس بصره دن

۱۵ کمی ایله آچیله رق عمان ساحلنده غایت قوتلی برپورتکیز دوئمناسنه تصادف ایدرک همان حربه باشلادی . دشمن دوئمناسی ۲۵ کمیدن مرکبدی . سیدی علی رئیس مهارت فوق العاده سیله اوچ کمینسی ضبط ایتدی و برینی قره یه دوشورتندی . اون آلتی کون صکره مسقط اوکنده ایکنجی برپورتکیز دوئمناسنه تصادفله بتون کون حرب اولدی . ایکی طرفده خسارات عظیمه یه اوغرا دی . فقط غلبه عثمانیلرده قالدی . پورتکیز لیلر هند صولرینه قاچدیلر .

فقط سیدی رئیس دوئمناسی ده فورطنه لره طوتیه رق بلوچستان ساحلنه دوشدی . اورادن بصره یه عودت ایچون دکزه آچیلدیغی زمان مدهش برقاصیرغیه طوتولدی . کمیلر کوچ حال ایله کجرات ساحلنه واصل اولدیلر . سیدی علی رئیس دوئمنای کجرات امیرینه تسلیم ایتدی . کندیبی یتمش قدر آرقداشیه قره دن درت سنه یه یاقین برزمانده ادرنه یه کلدی ؛ اوغرا دیغی مملکتلرک حکمدارلرندن آلدیغی یکر می قدر نامه یی پادشاهه تقدیم ایلدی . سیدی علی رئیسک « محیط » و « مرآت الممالک » عنوانلی ایکی مهم اثری واردر .

سلطان سلیمانک دور سلطنتنده دولت
سلطان سلیمان دور بک مناسبات
عثمانیه ایله فرانسه قرالری آره سنده کی
مناسبات تدقیق ایدیلر سه پادشاهک
نظامیه نقطه نظر نه الهیمینی

فرانسه یه و دشمنلرینه قارشی قطعی ، لایتغیر برمسلك اتحاد ایتدیکی حالده برنجی فرانسوانک اودرجه وضوح و صمیمیت ایله حرکت ایلدیکی کوریلور . فرانسه قرالی ایکی نوع حسیات آره سنده متردد ایدی : فرانسه نک عثمانیلرله اتفاقدن حاصل اوله جق منافع سیاسیه یی تقدیر ایدیور ، فقط مسلمانلرله متفق اولمی خرسیتانلغه مغایر کوریوردی . عثمانیلرک معاونت لرینه محتاجدی .

لکن کنڈیلریلہ متفق اولدیغنی اعترافہ جسارت ایدہ میوردی . بعضاً استانبولہ سفیر لر کوندره رك پادشاهی (فردیناند) و (شارل) علیهنه تحریک ایدیور ؛ بعضاًده « Roi Très - Chrétien » عنوانی حائز اولدیغنی تخطر ایلیره رك عثمانیلر علیهنده کی اهل صلیب ترتیبانه دائماً (شارل کن) ك ریاست ایتمسنی قیصقانیوردی . (شارل کن) ایلہ عقد اولتان معاهداتك هر برنده عثمانیلر ایلہ (هابسبورغ) لر آردسندہ توسط ایتمك ایستیور ؛ (هابسبورغ) لك كنديسنی آلداتدق لرینی کورنجه عثمانیلر ك غیرت جنكاورانه لرینی تحریكه مسارعت ایلوردی . بك چوق دفعه لر پایایه ، آلمانیا پرنس لرینه ، انكلتره قرالی سكزنجی (هازی) یه توركلر ایلہ متفق اولمديغنی تأمین ایتدی . پادشاه ایسه هیچ بر زمان برنجی (فرانسوا) نك معاونت طلب لرینی نتیجه سز بر اقمادی ؛ متفقنه صادق والدی . فرانسه قرالی ایکی یوزلی ، متردد طاوورانديغنی ، براز اول یاپدیغنی شیئی بر کون صكره انكار ایتدیکی ، هم كنديسنی ، همده بشقه لرینی آلداتدیغنی حالدہ عثمانی پادشاهی شایان تقدیر بر خلوص و صمیمیت ، جداً شاهانه بر علو جناب کوسترمكدن کری طورمدی . سلطان سلیمانك سوزلری ، حرکاتی ، اجرا آتی بیوك بر حکمداره شایان اولدیغنی حالدہ برنجی (فرانسوا) جدی برایشه تشبث ایتسه بیلہ منابع وارداتی بك آز زمانده بیتیریور ؛ پاره سز ، اردوسز قالیوردی . عثمانیلر ك قوتی ، سطوتی غربك قوت وسطوتنه قات قات فائق ایدی . سلطان سلیمان ۲۰۰,۰۰۰ كشیلك اردولری ، ۲۰۰ كیدن مرکب دونملری قولایجه تجهیزومیدان حربه سوق ایدیوردی . عثمانی اردوسنده کی انتظام وانضباط فرانسز لرك ویا (هابسبورغ) لك اردولرنده مفقود ایدی . (نیس) ده خیرالدین پاشانك دونماسنده هرشی مكممل اولدیغنی حالدہ فرانسز لركولله وباروتی عثمانیلردن ایسته مكه مجبور

اولشلردی . حتی خیرالدین پاشا بویله انتظامسز بر متفق دوغما ایله
(نیس) کبی اهمیتسز بر قلعه‌یی ضبط ایتمکدن عبارت اولان حرکات
حربییه‌یی استخفاف ایدرک فرانسزلردن ایرلمشدی .

۱۵۴۴ سنه‌سند بشنجی (شارل) ایله انکلتره قرالی سکزنجی
(هازی) فرانسه‌یه هجوم ایتشلردی . (شارل) فرانسه داخلنده برچوق
قلعه‌لر ضبط ایتدکدن صوکره اردوسنک ارزاقنی تدارکده مشکلات
چکدیکندن برنجی (فرانسوا) ایله (قره‌پی) (Crespy) معاهده نامه‌سنی
عقد ایتدی . بو معاهده نامه موجبنجه فلمنک ویا (میلانه) نک فرانسه
قرالنک ایکنجی اوغلی دوق دورلثانه - ایمپراطورک قیزی ویا اقرباسی
اولان بر پرنسس ایله ازدواج ایتک شرطیله - ترکی قرارگیر اولدی .
(قره‌پی) معاهده نامه‌سنک عقدی اوزرینه سلطان سلیمان فرانسه
اتفاقه نه‌درجه‌یه قدر اعتماد اولته‌بیله‌جکنی آکلادی . ۱۵۴۷ سنه
میلادیه‌سند پادشاه ایمپراطور ایله بش سنه‌لک متارکه عقد ایتدی ؛
اوستریا سنوی ۳۰,۰۰۰ دوقه اعطاسنه راضی اولدی . [بو ویرکویی
قارلوفچه معاهده نامه‌سنه قدر ویرمشر [. یوقاریده ایضاح ایدلدیکی
اوزره متارکه چوق زمان دوام ایتدی . برنجی (فرانسوا) نک اوغلی
ایکنجی (هازی) عثمانیلر ایله مناسبانده پدرندن زیاده قطعت و صمیمیت
ایله حرکت ایتک ایستوردی . حتی ایمپراطور ایله پادشاه آره‌سند متارکه
عقدینه مانع اولمغه‌بیله چالیشدی . سلطان سلیمانک ایران سفری اثناسنده
(آرامون) اسنده بر سفیر کوندوره‌ک فرانسه‌نک پادشاه اوزرنده غائب
ایتدیکی تأثیر و نفوذی اعاده‌یه چالیشدی .

ایکنجی (هازی) آروپا موازنه‌سنی محافظه ایچون انکلتره‌دن بر
معاونت امید ایتموردی . (شارل‌کن) آلمانیا نک پروتستان پرنس‌لرینی

مغلوب ایلش ، ایتالیایی الدہ ایتشدی . (هازی) خیرالدین پاشانک وفاتندن صکره طورغود رئیس ایله مخبرات خفیه ده بولندی ؛ حتی ایمپراطورک ولی عهدی ایکنجی (فیلیپ) ی بردکیز سفرنده اسیر ایتک ایچون طورغودرئیسه تعلیمات ویردی . ۱۵۴۹ سنه میلادیه سنده طورغود رئیسک فرانسه قرالیله اتفاق ایتدیکی ومارسیلیا لیماننک عثمانلی دونماسنه ارزاق ومهمات ده پوسی اولدیغی روایت ایدیلیوردی . طورغود رئیس طرابلس غربی ضبط ، سیجیلیایی تخریب ایتدیکی صروده ایکنجی (هازی) ایتالیاده محاربه یه باشلادی [۱۵۵۱] . ایمپراطوره قارشى آلمانیا نک پروتستان پرنسلیله اتفاق ایتدیکنی اعلان ایلدی ؛ شمالی ایتالیانک بعض محالرینی الدہ ایتدی .

(اگری) محاصره سیله ختام بولان مجارستان سفرهایونی وطورغود رئیسک ناپولی صولرنده (آندریا دوریا) یه غلبه سیله نتیجه لنن مظفریت بحریه سی اثناسنده ایکنجی (هازی) ده (شارلکن) ایله محاربه ایدیوردی [۱۵۵۲] .

ایرتسی سنه فرانسز دونماسیله طورغودرئیسک دونماسی برلشدی . ایکی دونما جنویز حکومتنه عائد اولان قورسیقه آطه سنه هجوم ایتدی . (قالوی Calvi) و (باستیا) مستثنا اولمق اوزره ساحلده کی قلعه لرك جمله سی ضبط ایلدی . بوفتوحاتدن صکره عثمانیلر عودت ایتدکیرندن فرانسزلر ضبط ایتدکری قلعه لرك برقسمنی تخلیه یه مجبور اولدیلر .

اسپانیا ولی عهدی ایله انککتره پرنسیسی (ماری) نك ازدواجی تصویر فرانسزلرك منافعه مغایر اولدیغندن فرانسه قرالی دولت عثمانیه نك معاونتته هر زماندن زیاده محتاج ایدی . اوصروده سلطان سلیمان ایران ایله محاربه ایدیوردی . فرانسه سفیری (آرامون) ك خلفی (قودینیاق

(Codignac) پادشاه ایله برلکده شرق حدودینه کیتدی ، دولت عثمانیه نك بتون قوتی اوروپایه قارشی استعمال ایده بیلیمسنی تأمین ایچون عثمانیلر ایله ایرانیلر آره سنده عقد مصالحه چالیشدی . مصالحه نامه آماسیه ده عقد ایدلدی . (فردیناند) ك شهر مذکورده بولان سفیرلری (وهرانقیوس Vérantius) ، (زای) ، (بوسبهك) عقد متارکيه موفق اولدیلر . فقط (شارل کن) ایله متفقلری بومتارکيه داخل دکل ایدیلر . ایکنجی (هازی) ناپولییه قارشی وقوع بولان محاربه ده طورغود رئیسك دوتماسدن استفاده ایتك ایستدی . عثمانلی دوتماسی براز کجیکدی ؛ بر نمایش ایله اکتفا ایتدی . (هازی) قورسیقه وایتالیا سواحلنده بر ایکی قلعه بی غائب ایلدی .

۱۵۵۵ سنه میلادیه سنده ایکنجی (هازی) ینه سلطان سلیمانك معاونت و اتفاقی رجا ایتدی . پادشاهك « عزیز وصیمی دوستی » اولدیغنی سویلور و محاربه شهتله دوام اولنورسه دشمن مشترکك عاجز قاله جغنی تأمین ایدیوردی . ایمپراطورك الدیغنی ویرکولزك اغرلغندن ، ظلم و تعدیدن ، تکالیف عسکریه دن بیزار اولان ایتالیا ، ناپولی ، سیچیلیا ، اسپانیا ، فلاندر و حتی هندستان اهاالیسنك مهای عصیان اولدقلرینی بیان ایلوردی . (فردیناند) ك سفراسی طرفدن سویلتن سوزلره ، ایدیلن وعدلره اهمیت ویرلمه مسنی ده توصیه ایدیوردی . سنه مذکورده ظرفنده پیاله پاشانك قومانداسنده کی عثمانلی دوتماسی (طوسقانا) صولرینه کیده رك (پیومبینو Piombino) قلعه سنه هجوم ایتدی . بعده فرانسز دوتماسیله برلشهرك (قالوی) قلعه سنی محاصره ایتك و (باستیا) اوکنده بر نمایش یایمق ایچون قورسیقه یه کیتدی . (شارل کن) ك موقعی کیندکجه کسب وخامت ایتکده ایدی .

ایمپراطور آرتق هیچ بر شئہ موفق اولہ میوردی۔ فرانسرلر ایلہ بلچقہا، فلمنک وایتالیا جہتلرنده وقوعہ کلن محاربات نتیجہ سنده (ووسہل Vaucelles) متارکہ سنی عقد ایتدی۔ بو متارکہ موجبہ فرانسرلرک (میچ) دن قورسیقہ یہ قدر الہ کیردکلری واقعک فرانسدہ قالمسنہ راضی اولدی [۱۵۵۶]۔ آرتق اختیارلامش، صوک زمانلردہ کی موفقیتسزلکلردن مایوس اولمش اولدینی ایچون ترک سلطنتہ قرار ویرمشدی، برادی (فردیناند) عثمانیلرلہ نصل اولورسہ اولسون عقد مصالحہ یہ چالیشمسنی توصیه ایتدی۔

(ووسہل) متارکہ سنی عقد ایدن (ہازی) بونک دولت عثمانیہ ایلہ موجود اولان اتفاق شرائطہ مغایر اولدیغنی بیلدیکی ایچون سلطان سلیمانہ ایضاحات اعطاسنہ مسارعت ایتدی۔ (شارلکن) ی ترک سلطنتہ تشویق ایچون عقد متارکہ ایتدیکنی بیان وایمپراطور میدانن قالدقدن صکرہ یرینہ کلہجک اوغلنک ذوق وسفاحت ایلہ مشغول، تجربہ سز، امور عظیمہ یہ تشبثدن عاجز، اصول حربہ غیر واقف اولدیغنی، بناء علیہ بونکہ اوغراشمنق قولای اولہ جغنی تأمین ایلدی۔ ایمپراطور سلطان سلیمان ایلہ (فردیناند) آردہ سنده عقد صلح ایچون (ہازی) نک معاونت ایدہ جکنی امید ایتمشدی۔ (ہازی) نک سفیری (قودینیاق) بالعکس اوستریا ایلہ دولت عثمانیہ آردہ سنده عقد مصالحہ یہ ممکن مرتبہ مانع اولغہ چالیشق ایچون امر آلدی۔

فرانسہ قرالنک سیاستی دولت عثمانیہ یی شہیہ دوشورمشدی۔ دیگر طرفدن ناپولینک ہانکی حکومتہ قالدجغنی بیلنک عثمانیلر ایچون مهم بر مسئلہ ایدی۔ ناپولی فرانسرلردہ قالدجق ایسہ بحر سفیدک غرب طرفلرنده عثمانی دونماسنک حاکمتنہ ایراث خلل ایدہ بیلیردی۔ چونکہ

دولت عثمانیه فراسه قرانك لزومندن زیاده کسب قوت ایتدیکنه ذاهب اولیوردی . مع مافیه عثمانلیرك مجارستانده بر قلاچ موفقیتمزلکه دوچار اولسی ، اسپانیا کملرینك جزائر بحر سفیده تعرض ایتلمری سلطان سلیمانك افکارنده تبدل حصولنه سبب اولدی . ایکنجی (هازی) نك (ووسهل) متارکهسی حقنده ایضاحات ویرمك ایچون استانبوله کوندردیکی (دولاوینی De la Vigne) پادشاه طرفدن فرانسهیه اعاده ایدلدی . سلطان سلیمان بو متارکهیه ختام ویرلمسنى طلب ایدیوردی [۱۷۵۷] . حال بوکه متارکه ذاتاً بوزولمش ، ایکنجی (هازی) ایمپراطورك خلفی اسپانیا قرالی ایکنجی (قلیپ) ایله ایتالیاده محاربهیه باشلامشدی . فرانسرلر (سن قانتن) ده مغلوب اولدیلر . سلطان سلیمان بو مغلوبیتی خبر آلدیغی زمان فرانسه سفیرینه تسلیت آمیز سوزلر سویلدی .

ایکنجی (هازی) دولت عثمانیه نك معاونتدن استفاده ایتك ایستدی . سفیر (دولاوینی) واسطه سیله مجارستانه هجوم ایدلمسنى ، عثمانلی دونمانسك بحر سفیده قیشلامه سنى ، (ناپولی) قرالغنه عساکر عثمانیه چیقارلمسنى ، فرانسهیه ایکی میلیون آلتون قراض اولنمسنى طلب ایتدی . فقط دولت عثمانیه (ووسهل) متارکه سندن صکره (فردیناند) ایله عقد ایدیلن متارکه نی بوزمه جغنی بیلدیردی . استقراض مسئله سنه کلنجه ؛ بو پاره نك ویریه میه جکنی ، فقط عثمانلیرك دوست و متفقرینه پاره ایله دکل ، شخص و قوتلریله معاونت ایتدکلی بیان ایدلدی . پادشاه دونمانك بحر سفیده کوندرلمسنه موافقت ایتدی ، فقط قیشین اوراده قالمسنه راضی اولمادی .

دونمای هایون طوغریجه (قورسیقه) یه کیتدی [کانون اول ۱۷۵۷] . (غاۋت) ده بر نمایش ایله اکتفا ایتدی ، فقط (لیغوریا) سواحله

ہجوم، (مینورقہ) آٹھ سہ ہسکر اخراج ایلدی . بعدہ عودت ایتدی .
فرانسزلر دونمیانک عودتنی جنوزلرک انتریقہ لرینہ ، ہدیہ لرینہ عطف
وحتی پیالہ پاشادن شکایت ایلدیلر . پادشاہ ایرتسی سنہ دہا جدی بر
معاونت وعد ایتدی . فی الحقیقہ بر سنہ صکرہ بالازات مجارستانہ کیتدی .
مع مافیہ اوروپای غربی دولتری محاربہ دن اوصامشلردی .
(قاتو قامبرہ زی Cateau - Cambrésis) دہ مذاکرات صلحیہ ابتدار
اولنمشدی . ایکنجی (ہازی) ضبط ایتدیکی ممالکک بر قسمی محافظہ
ایدہ بیلیمک ایچون آلمانیا پرنسیرینک معاونت لرینہ محتاج اولدیغدن
(راتیسبون) دہ عقد اجتماع ایدن (دیت) مجلسندہ فرانسنک عثمانیلر
ایلہ متفقاً حرکت ایلدکلرینی انکار ایتدی . « نہ متوفی پدرینک ، نہ دہ
کندیسنک عثمانیلرلہ هیچ بر زمان معاہدہ ویا اتفاق عقد ایلدکلرینہ
جناب حقک شاهد اولدیغنی » سویلہ دی . آلمانیا پرنسیرینک نہ کندی ،
نہ دہ سلطان سلیمان علیہندہ (فردیناند) ہ معاونت ایتلرینی ایستہ مدیکندن
پادشاہہ مراجعت ایلہ آلمانیا ایمپراطورینی انتخابہ صلاحیتدار اولان
پرنسلرہ بر مکتوب یازہرق ایمپراطورلغک دوستی اولدیغنی و دوستی
قالمق ایستہ دیکنی، (فردیناند) علیہندہ کی محاربہ سنک ایمپراطورلغہ خصوصت
و حقارتی تضمن ایتدیکنی بیلدیرمسنی رجا ایتدی . سلطان سلیمان دہ
طلب ایدیلن مکتوبی یازدی [۱۵۵۹] .

(قاتو قامبرہ زی) معاہدہ سی عقد ایلدی . ایکنجی (ہازی) شرائط
اتفاقہ رعایت سزلکنی کویا حقلی کوسترمک ایچون پادشاہک آوستریا ایلہ
عقد مصالحہ ایتمش اولدیغنی ادعا ایتک ایستدی . پادشاہ آلمانیاک بتون
قوتیلہ فرانسنہ اوزرینہ یوکنمسنہ مساعدہ ایتمش ، (فردیناند) دہ
اسپانیولرک مطالباتی قبولہ مجبور اولمش . حال بوکہ آوستریا ایلہ دولت

عثمانیه آرسنده هنوز عقد مصالحه ایدلمه مشدی. فرانسز سفیری بو مصالحه هنوز عقد ایدلمدیکندن دولت عثمانیه علیهنده بر دلیل اولمق اوزره کوستریله میه جگنی (هازی) یه بیلدیردی. سلطان سلیمان ایسه فرانسه حکومتک دول غربیه ایله عقد معاهده یه موفق اولمسنی نمونیتله تلقی ایتدی؛ فرانسه سفیرینه (هازی) نک متیقظ طاورامسنی، بو قدر سنه کندیسنه خصومت ایدن حکومتلرک دوستلغنه علی العمیا اینامامسنی توصیه ایلدی. شو حال عثمانلی پادشاهی ایله فرانسه قرالترینک مسلکلی آراسنده نه بیوک فرقلر اولدیغنی کوسترمکه کافیدر.

(قاتوقامبره زی) معاهده سنک عقدی وبعده ایکنجی (هازی) نک وفاتی ایکی مملکت آراسنده کی مناسباتده تبدلات عظیمه وقوعنه سبب اولدی. فرانسه نک لستانبول سفیری حکمدار لاحق ایکنجی (فرانسوا) یه عثمانیلر ایله ائتلافدن ایسه آلمانلرله خوش کچینیلیمسنی توصیه ایتمشدی. فقط ایکنجی (فرانسوا) فرانسه نک مسلکی دیکشیمیه جگنی پادشاهه تأمین ایتدی. مع مافیه فرانسه و دولت عثمانیه آرتق متفق دکل ایدیلر، یالکز بر برلرینه دشمن دخی اولمامشلردی. برنجی (فرانسوا) زماننده اولدیغنی کبی عثمانیلر علیهنه اهل صلیب اردولوی تشکیلی تصوری آرتق فرانسه ده موضوع بحث دخی اولمیلوردی. چونکه فرانسه عقد ایتدیکی معاهدات سایه سنده ممالک عثمانیه ده بر موقع مستثنا احرارز ایتمشدی؛ رجال حکومت بو مستثنا موقعی الدن قاچیره جق هر درلو تشبثک مضرتدن بشقه بر شی انتاج ایتیه جگنی بیلورلردی. آرتق بوندن صکره فرانسه حکومتی استانبولده همان صورت دائمه ده سفیر بولندیردی. شو قدرکه دوات عثمانیه ایله فرانسه نک اتفاقی دوره سی ختامپذیر اولمشدی.

بو دورده روسیه ایله مناسباتمز دخی آرتمشدر. اوچنجی واسیلک

یرینه کچن دردنجی (ایوان) - که مدهش لقیله مشهوردر - دولت عثمانیه ایله دوست کچینمک ایسته دی؛ ۹۴۴ سنه سنده استانبوله (آداشوف) اسمنده بر سفیر کوندردی. روسیه ایلچیی عثمانیلرله بر اتفاق عقدی ایچون چوق اوغراشدی. فقط بو اتفاق لهستان علینه اوله جغندن رجال دولتی اقناع ایده مدی؛ یالکیز بعض مساعدات تجاریه استحصال ایده بیلدی. او زمان رجال عثمانیه نهستانک بر کون وب مجارستان ایله علیهمزه اتفاق ایده بیله جکئی تقدیر ایده مه مشلر، روسیه اهمیت ویرمه مشلر ایدی. مع مافیه ایکی دولت آرهنده مناسبات حسنه دوام ایتدی. اسوج وانکلتره ایله هنوز مناسباته کیریشیلیمه مشدی.

سلطان سلیمان دررنک معاهدات سلطان سلیمانک دورسلطنتی معاهدات نقطه نظرندن دخی پک مهمدر. ایمپراطور شارل، قرال فردیناند، فرانسه قرالری نقطه نظرمنه اهمیت

ایله دولت عثمانیه آرهنده کی مناسباته دائر تفصیلات لازمه ویرمش اولدیغمز کی بلغرادک فتحی متعاقب وندیك ایله عقد ایدیلن تجارت معاهده نامه سندن دخی بحث ایتیش ایدک. معاهدات تجاریه مزك کافه سنه اساس اولان بو معاهده دن بشقه دولت عثمانیه فرانسه ایله دخی بر معاهده نامه عقد ایتدی.

دولت عثمانیه ایله فرانسه نك اتفاقی طرفین مناسبات تجاریه سنك توسعنه سبب اولمش، بحر سفیده کی فرانسز لیانلرینك کسب ثروت و اهمیت ایللرینی تأمین ایلشدی. وندیك ایله عقد ایدیلن معاهده نامه دن دهامهم اولان بر معاهده (۹۴۲ - ۱۵۳۵) سنه سنده فرانسه سفیری (لافوره Laforêt) ایله صدراعظم ابراهیم پاشا طرفندن امضا ایدلمشدر. دیگر دولتلرله عقد ایدیلن معاهداته اساس اولان وفرانسز لرجه

« ۱۵۳۵ قایتولاسیونلری » دئیلن بو معاهده نامه ده سربستی تجارت و سفائن ایله قونسولوسلرک حق قضالری قرارلشدیرلمشدر : یوزده بش کمرک رسمی مقابلنده سربستی سیر و سفر واخذ و اعطا . — ممالک عثمانیه ده مقیم بالجله فرانسلر اوزرنده ، کرک حقوق و کرک جزا ایشلرنده ، فرانسلر قونسولوسلرینک حق قضاسی و قونسولوسخانه دن ویریه جک حکملرک اجراسنه مامورین عثمانیه نک معاونت اجراسنه مجبوری . فرانسه قونسولوسلری فرانسلره عائد دعاوی حقوقیه و جزائیه یی بیلدکری کبی رؤیت ایده جکلر ، فرانسلر وصیتنامه لرینی ایستدکری کبی تنظیم ایله قاضیه ویا حکومتیه تبلیغه مجبور اولیه جکلر ، وصیتنامه لر احکامی قونسولوسخانه لرده فرانسه قانونی موجبجه موقع اجرایه وضع ایدیه جک قونسولوسلر اموال و نقوده وضع یدایله بالذات توزیعاته نظارت ایلیه جکلردی . فرانسه تبعه سندن بری مدیوناً وفات ایدر و یا خود تبعه عثمانیه یه اولان بورجی تأدیه ایتمه دن فرار ایلر ایسه بوندن طولای دیکر فرانسه تبعه سی ویا قونسولوسی مسئول ایدلیه رک فرانسه قرالی مدیون عد اولنه جق ، دینک تسویه سی حکومتجه طلب ایدیه جکدی . فرانسه تبعه سی علیه اقامه اولان دعاوی حضور قاضیده دکل ، باب عالیده رؤیت اولنه جق وائنا ی محاکمه ده فرانسلر ترجمانی حاضر بولنه جقدی . — حریت مذهبییه و قدسده مقامات مقدسه نک محافظه سی . بوماده فرانسه نک بالجله خرسیتیانلر اوزرنده حق حمایه ادعا ایتسنه سبب اولمشدر . — معاهده نامه نک عقدندن اولکی اسرآنک تخلیه سی . بوندن صکره اسرای حربیه نک اسرای سائر معامله سندن مصونیتلری .

فرانسه حکومتی بو معاهده نامه دن صکره ممالک عثمانیه ده بر موقع ممتاز و مستثنا احرار ایتدی . انکابزلر ، قاتالانلر ، سیچیلیلر ، جنويزلر کبی

دیگر اروپا ملتوں کی فرانسیز باہرانی آئندہ سیروسفرہ، تجارتہ باشلادیلر۔
پادشاہک کندیسیلہ ہم مرتبہ عدایتیکی یکانہ حکمدار فرانسه قرالی
ایدی۔ «فرانسه بکی» آرتق «فرانسه پادشاہی - ایمپراطوری» اولمشدی۔

۵

ایک علائم انحطاط

سلطان سلیمانک سیکتوار اوکندہ وفاتی وزیراعظمک
یازدینی مکتوبدن خبر آلان ولی عہد سلطان سلیم
صورت جاپوسی کوتاہیدن اوچ کوندہ قاضی کونہ مواصلت ایتدی
وبورادن اسکدارہ کیدرک ہمیشیرہ سی مہرماء سلطانک سراینہ نازل
اولدی۔ اسکداردن سرای ہایونہ کیدرکن قیزقہ سی اوکندن مرووری
انسانندہ طوپلر آتیلہرق سلطنتی اعلان ایدلدی۔ مفتی ابوالسعودافندی
وبالجملہ رجال وعلماء سرایہ کلہرک ال اوپدیلر، بیعت ایتدیلر۔
ایکی کون صکرہ سیرسریع ایلہ بلغرادہ کیتدی۔ هنوز سیکتوار
اونندہ بولنان اردویہ التحاق ایتک اوزرہ اورادن دخی حرکت ایتدی۔
فقط (ووقووار) موقعندہ صدراعظمدن برعریضہ آلدی۔ عریضہ شو
مآلہ ایدی: «اردوی ہایونی تشریف بیوردلینی تقدیردہ قول طائفہ سی
اجداد عظامکز قانونی اوزرہ جلوس بخشی ایستہ جنکدردر۔ حال بوکہ
اردو خزینہ سندہ کفایت مقداری آچہ یوقدر۔ ذاتاً سفر بیتمش، قیش
ایریشمش، سیکتوار قلعہ سنک تعمیری قوۂ قریبہ یہ کلشدر۔ اوچ کونہ
قدر عودت مأمولدر۔ بلغرادی تشریف بیوریلہرق اورادہ بکلہ نیلسون۔»
سلطان سلیم صدر اعظمک توصیه سی وجہلہ بلغرادہ دوندی۔

صقوللی محمد پاشا عسکره علوفه لرینی ویردی . بعده ، اردو حرکت ایتدی . ارکان دولت دروننده سلطان سلیمانک نعشی بولنان مزین بر آرابه نك اوکنده یوریمکده ایدیلر . آرابه نك اطرافنی صولاقلر آلمش ایدی . چاوشلر بر معتاد آلقیشلایورلر ؛ طبل ، نقاره ، سورنا ، نفیرلر چالمنقده ایدی . محمد پاشا کویا بعض معروضاتده بولتیورمش کبی طورلر آله رق آرابه نك یاننده کیتمکده ایدی .

صدراعظم بلغراد درت منزل قالنجه بر صباح برقاج حافظ ایسته دی . حافظلر آرابه نك ایکی طرفنده ذکر اللهه باشلادیلر . «روحی ایچون فاتحه» ندای مؤثری ایشیدلدی . بتون عسکر فوق العاده متأثر اوله رق اردوده برفغان عمومی حاصل اولدی . وزرا وعلما پادشاهک وفاتی اشاعه ایتمک زما ی کلدیکنه قانع ایدیلر . صقوللی عسکره خطاباً شو مألده بر نطق ایراد ایتدی : « قرداشلر ، یولداشلر ، نیچون طوریورسکمز؟ یوریه لم . بونجه ییلق اسلام پادشاهنه توحید و تهلیل ایله نیچون تعظیم و تکریم ایتیم ؟ غزالر ایدرک انکروس ولایتنی دارا سلام ایلدی وجهه مزنی نعمت واحسان ایله بسله دی . عوض بومیدرکه جسد مبارکنی باشمزده کوتورمیه لم . خصوصاً اوغلی سلطان سلیم حضرتلری حالا پادشاهمزدردر . اونیدی کوندن بریدر بلغرادده سزه منتظر و پدرینک وصیتی اوزره بالجمله انعام و ترقی معاشاتکزی اعطا و اجرایه حاضر در . خاطریکزی خوش طوتک . همان حافظلر تلاوتله مشغول اولسونلر ، بزده چکیلوب کیده لم . طوره جق بر دئلدردر . »

بونک اوزرینه اردو یوریدی . عسکرلر قرق سکر سنه کندیلمینه قوماندان اولان بیوک پادشاهک جنازه سنی اوکترینه ، کوز یاشلرینی صوک بهارک یا غمورلرینه قانه رق شمالی مترو و یچیه کلدیلر . صقوللی بورادن

پادشاہ بر مفصل عریضہ یازدی. بو عریضہ نك مآلی شودر: « جنازه ایله اردو بلغرادہ مواصلت ایلدکده نصب اولنه جق اوتاغ هایون اوکنده جتمکانك بوسفرده برابر کتیرمش اولدینی تخت زرین اوزرینه جلوس بیورلسون ، بالجمله اعیان و بندکان پایہ سریر سلطنته یوز سورسون . قول طائفه سنك قانون قدیم وجهله بخشش و ترقیلرینك احسان بیوریلہ جغنی لسان شاهانه لرندن ایشیتملری تقرر ایتمش برعادتدر . یعنی جمله سی ویرلسون ، مقبول هایونمدر دیمکزی ایستلر . باخصوص یکیکچری طائفه سی عادت قدیمه لری وجهله ال قالدیروب و چاوشلری آل عثمان پادشاهلرینه و او جاقدن کچن یولداشلرینه دعالر ایدرلر و آمین دیرلر که خیر و برکت دخی بونده در . بوکا مساعده بیورلسون . بعده جنازه نمازی قیلینسون . فرداسی کونی ده ارکان دولت تبریک سلطنت ایچون سریر عزته تکرار یوز سوردکلرنده خلعتلر ویرلسون . »

سلطان سلیم بو عریضه یی مقربلرندن خواجه عطاء الله افندی یه کوستر . عطاء الله افندی وزیر اعظمك نفوذنی قیرمق مقصدیله : « ذات شاهانه کز استانبولده جلوس بیوردیکز . بونک رسماً تکرارینه حاجت یوقدر . بوتکلیف حاکمی محکوم ایتمکدر . » دیر . پادشاه لالا حسین پاشانک رأینی صورار . اوده : « بز استانبولدن بلغرادہ کلمه مش اولسه یدک ااردونه یاپه جق ایدی ؟ مراسم جدیدہ نه یه یارایه جق ؟ تنزل بیورمیکز . » جوابی ویرر . پادشاه مصاحب جلال چلینک دخی رأینی آلمق ایستر . جلال چلبی : « سلطنت ایچون یالکز بروارث وارا یکن بودرلو تکلفاته حاجت قالماز . » جوابیله مقابله ایدر .

سلطان سلیم دخی وزیر اعظمك توصیه سنه رعایت ایتیره ک بر تهده قورولمش اولان اوتاغ هایونه کیدر . صقولی بونی خبر آلدینی

زمان محرم اسراری اولان فریدون بکه : « صداقتله ایفای خدمت
 ایدن برصدراعظم امورملکه عائد احوالی خاکپای شاهانه‌یه عرض ایدرده
 پادشاه غیریلرک رائی ایله حرکت ایدرسه نظامه اختلال کلندن غافل
 بولور . پادشاهمز غایتله مستغنی ، کیمسه‌یه سوز سویلک ایسته‌مز . قول
 طائفه‌سی ایسه مطلقا جلوسلورنده بالذات پادشاهلرک سوزلرینی ایشیده
 کلشدر . هم خواه وناخواه سویله‌تیرلر . بو صروده محمدلاینجه مدارا
 ایلسون . همان اه تعالی خیرلر ویره . » دیر . فریدون بک « شو حالی
 پادشاهه یازلم . » دیه کاغد وقلمی اله آلیرسه‌ده وزیراعظم : « بز
 بیلدیکمزی سویلرک ؛ جائز که بنم یریمه دیلدیکنی نصب ایلر . پادشاهلره
 خطاب ایلك اولماز . » دیه‌رک منع ایدر .

ایرتسی کون اردو متروویچه‌دن قالقدی . ارکان دولت سیاه‌شمه‌لر
 صارمش ؛ صولاقلر ، پیکلر صورغوجلرینی چیقاروب بورکلری اوسته
 پشمال طولامش ایدیلر . بلغراد اهالیسی‌ده ماتم روبالری کیمش اولدقلری
 حالد اردوینی قارشیلادیلر . تابوت اوتاغ هایون یانسه کتیرلدی . پادشاه
 اوتاغدن چیقدی . عطاء افندی جنازه نمازینی قیلدیردی . بعدالصلات
 سلطان سلیم هرکسه سلام ویره‌رک ینه اوتاغ هایونه کیردی . او آنده
 بر کورولتی قوپدی . عسکر : « عاده رعایت اولنمدی . بزّه اعطاسی
 واجب اولان بخششک اصلا بحثی بیله اولمدی . وزیرلر ، نیچون بویله
 ایتدیکز ؛ صوچلولر المزدن قورقوله میه‌جقدر . بز پادشاهی ادرنه‌قپوسنده ،
 یاخود سرای قپوسنده اوت آرابه‌سنک یاننده بولورز . » دیه باغیرمه
 باشلادی .

وزرا بر اختلالک قریب‌الوقوع اولدیغنی کوره‌رک جنازه‌نک استانبوله
 نقلنی تعجیل ایتدیلر . وزیر احمد پاشا بو ایشه مأمور ایدلدی . ارکان

ورجال دولت حضور ہایونده مراسم دست بوسی بی ایفا ایتدکدن صکره صدر اعظم نزد شاهانہ دہ قالدینی صرہ دہ عسکر آره سندہ کورولتی آرئدی . عسکر معیت شاهانہ دن کلنلرہ سب وشم ایتمکہ ، حتی مرحوم سلطان سلیمان حقندہ بددعا یہ باشلادی . بونک اوزرینہ لالا حسین پاشا جازہ نک کیزلیجہ استانبولہ نقانی امر ایتدی . نہایت ، سلطان سلیم بر بیوک اختلال چیقہ جغنی حس ایتدیکندن تہدید آمیز نمایشلرہ ختام ویرمک اوزرہ ضابطان عسکری بی حضورہ قبول ایلدی ؛ بش کون ظرفندہ نفر باشنہ ایکیشر بیک آچہ بخشش ویردی ؛ نفرات وضابطانک یومیہ لرینہ ضم ایتدی . فقط عسکر سلطان سلیم اول ایلہ سلطان سلیمانک اوچریک آچہ ویردکلرینی سویلیہ رک شکایت ایتدیلر . متباقینسک استانبولہ ویریلہ جکی وعدا ولندی . بعدہ ، بلغراددن حرکت ایدای .

استانبولہ کوندریلن جازہ نک دفن ایدلیدی ادرنہ دہ خبر آئدی . استانبولہ یاقلا شیلدینی زمان آلا ی ترتیباتی اکمال ایدیہ بیلیمک ایچون کیجہ خلقہ لی کویندہ کی کوشکدہ کچیرلدی . کیجہ لین یکیچریلرک بر قسمی مشعلہ لر اطرافندہ مجلس قوردیلر ؛ یاپہ جقلری ایشی قرارلشدیردیلر . صاحب لین قائم مقام وقودان پاشالرہ شیخ الاسلام ، علما و مدرسین استقبالہ کلدیلر . آلا ی یولہ دوزولدی . استانبول اہالیسی آلا ی تماشایچون سوفاقلرہ دوکولمشلردی . اوکدہ بولنان یکیچریلر صفلی صیقلاشدیردیلر . ایلری یہ کچمک ایستہ ینلری چویردیلر . پادشاہ ادرنہ قوسنہ یاقین بر میداندہ تام بر ساعت بکله دی . « نہ طور ییورسکنز ؟ » دیہ صوران وزیرلرہ یکیچریلر : « اوکدہ بر اوت آرابہ سی وار . دوریلش ، یولی قامش ؛ کچیلیمور . » جوانی ویردیلر ، کہ بو سوزلر عصیانک باشلادیغہ دلالت ایدیور ایدی . بر آرائق ایکنجی وزیر پرتو پاشا یکیچریلرہ نصیحت ایتمک

ایسته دی ؛ یانلرینه کیده رک : « ییکیتلر ، بو حرکتکز سزه یاقیشماز . » دیدی . فقط ییکچریلر پرتو پاشایی آتندن دوشوردکلری کبی اونک کبی نصیحتہ قالیشان قبودان پاشایه ده حقارت ایتدیلر . بونک اوزرینه صقوللی محمد پاشا واحمد پاشا آلتون سرپه رک طاتلی دیل ، طاتلی سوز ایله آلائی یوروتمکه موفق اولدیلر .

یکچیری آغاسی مندیلی بونینه دولایه رق : « بن سزک الکزده یم . ایسترسه کز شو باغی صیقوب بی اولدیریکز . فقط براز بی دیکله ییکز . » دیمشدی . یکچیریلر : « اکر بویله لکله پادشاهک وصدراعظمک خزینه لرینی قورتارمق املنده بولنیورسه ک سن ده المزدن قورتوله مازسک . اوت آرابه سنک دوریلدیکنی سکاده کوستیرز . » تهدیدیه ایلریلدیلر .

سرایک برنجی حویلسنه کپردکلری زمان قبولری قبادیلر . وزرای آتلرندن ایندیردیلر ؛ یاقه لرندن طوتدیلر ؛ خصکی سلطان حمامنه یاقلاشمش اولان پادشاهک یانه کیتدیلر ؛ « عادت قدیمه بی اقرار ایت » دیه باغریشدیلر . صدراعظم « شوکتلو خنکارم ، بونلر مبارک لسان شریفکزدن ویرکولرینی ایشیتمه نیجه متسل اولمازلر . غایت بیورک ، فتنه دفع اولسون . » دیه اصرار ایتدی . سلطان سلیم : « انعام وعلوفه کمز بکا اجدادمدن انتقال ایدن عادت موجنبجه احسان اولندی » دیدی . مقصده حاصل اولدی .

وزرا آتلرینه بینرک سرای قپوسنه کلدیلر . « آرتق مرادیکز حاصل اولدی ، قپوی آچیک . » دیه یالواردیلر . ایچرده کی یکچیریلر : « بز ایشیتمدک . » جوانی ویردیلر . نهایت ، اوسته لرک شهادتیه باب هایون آچیلدی ؛ کیجه ساعت بر بچقده سرایه کیرمک ممکن اوله بیلدی . شو تفصیلات محضا اقباڤ ایچون فدا اولان بر حقوق سلطنتک صکره نصل زوربالقلره سنب اولدیغنی پک کوزل کوسترر . سلطان مراد ثانی

تکرار جلوس ایچون عسکرلری تطیب ایله مقصدینه نائل اولمشدی ؛ فقط بونک اوزرینه یکچریلر کندیلرینه بیوک براهیت ویردیلر ، فاتحک تکرار تحته جلوسنده جلوس بخششی ایسته دیلر . بو صورتله باشلایان جلوس بخششی اصولی صکره لری دولتی صوگ درجه بیوک مشکلاته دوشوردی .

وندیك، سنوی ۲۳۶،۰۰۰ دوقه ویرکوی پادشاه
تأدیهدہ دوام ایدیوروبوکامقابل ممالک عثمانیه تجارتک
قبریک قعی
برقسم مهمنی اله کچیره رک کسب ثروت ایلوردی . دولت عثمانیه دن پک زیاده قورقدینی ایچون احتیاطاً دائماً بیطرف بولنیور ؛ فقط تسلیحاته دوامدن ، امنیتسزک کوسترمکدن ، عثمانیلره قارشى بدخواهلقدن فارغ اولموردی . دولت عثمانیه علیهنده خرستیان حکومتلرک کافه تصوراتی ال آلتندن تسهیل ایدیوردی ؛ مع مافیه عثمانلی دولتنک ضعف واضمحلالندن قورقمی ، یوقسه ممنون اولمقی لازم کله حکنی تعین ایده میوردی . یالکز اون اوچنجی عصرده شرق ایمپراطورلغسک ضعفندن استفاده ایتدیکی کبی شمدی ده دولت عثمانیه نك قوتنه خلل کلیرسه اقوام سائرہ دن زیاده مستفید اولمق املنی تعقیب ایلوردی . وندیكک (ایونیہ ن) آطه لری ایله (مورہ) قطعہ سی ساحلنده ، دالماچیاده کی ممالکی هر سک وبوسنه حدونده ممالک عثمانیه ایله اتصال وپیدای ، مناسبت ایدیوردی . هر طرفی عثمانیلر طرفندن ضبط ایدیلن آطه لر دکزنده کرید وقبریس آطه لری وندیكک ایدی . بو آطه لرک لیمانلری خرستیان قورصانلره آچیق بولنمقده ایدی . عثمانلی طرق بحریه سی اوزرینه تصادف ایدن بویکی آطه وندیکیلرک الندہ بولندجہ ، خرستیان قورصانلره ملجاء خدمتی کوردکجه ردوسک فتحی ایچون اختیار ایدیلن فدا کارلقلر هبا اولمش عد ایدیله بیلیردی .

بوندن بشقه آدریاتیک آطه لرنده (اوسقوق Uscoque) لر ، یعنی عثمانیلر طرفدن مملکتلرینک ضبطی اوزرینه آطه لره هجرت ایدن دالماسیا و بوسنه اسلاولری راست کلدکلی عثمانلی سفینه لرینه هجوم ایدیولردی ؛ سلطان سلیمان بو قورصانلرک تأدینی و ندیکدن طلب ایتمش ، و ندیک جمهوریتی دخی خیلی ترددن صکره قورصانلری تعقیب و تنکیله مجبور اولمشدی . سلطان سلیمانک اواخر سلطنتده پیاله پاشا جنویز حکومتنه عائد ساقز آطه سنه وضع ید ایتمشدی . سلیم ثانیک ایلك سنه سنه دخی (ناقسوس) آطه سی (قریسی) خاندانندن آلنه رق (ناسی) بو آطه یه دوقه تعیین اولندی . الحاصل برکون کلوب قبریسک ضبط اولنه جنی شبه سزدی . و ندیکلیر دولت عثمانیه نك آوستریا ایله عقد مصالحه ایتدیکنی ، ایراندن کلن هیئت سفارتک حسن قبول ایدلدیکنی و یمن محاربه سنه ختام ویرلدیکنی ، یعنی عثمانیلرک شرق و شمال جهتلرنده سربست قالدقلرینی کورنجه قبریس ایچون تلاش ایتمک باشلادیلر .

مصر ، سوریه ، آنا طولی قطعه لرینک اورته سنده بولندیغی جهته موقعاً حائز اهمیت اولان قبریس جزیره سی خلفای راشدین زمانندن بری بر چوق دفعه اسلاملر انه کچمش ، حتی اکثر محللری حریمه وقف ایدلمشدی . و ندیکلیرک اولامصر حکومتنه ، صکره دولت عثمانیه یه ویردکلی ۱۰,۰۰۰ آلتون حرمین اوقافک بدلی مقامنده ایدی .

بونکله برابر صدر اعظم صقوالی محمدپاشا و ندیک ایله منعقد معاهده نامه احکامینی اخلاص ایتمک ایسته مدکدن ماعدا قبریس ایچون محاربه وقوعنده آوروپا دولتلرینک عثمانیلرعلیه نه اتفاق ایده جکلرینی بیلدیکندن جزیره نك فتحه معارضدی . فقط سلطان سلیم ثانی یه نفیس شرابلر تقدیم ایدن ، قبریس شرابلرینی مدح ایله ین (ناسی) پادشاهدن جزیره نك

ضبطی و کنڈیسنک اورایہ قرال تعینی و عدینی آلمشدی . بونک تشویقیہ پادشاه قبریس سفرینی تعجیل ایتدیکی حالده صدر اعظم مانع اولمقده ایدی . نہایت ، ابوالسعود افندی قبریسک و قتیلہ دارالاسلامک بر جزئی اولمسندن بحثلہ عامہ مسلمینہ موافق اولیان شروط ایله منعقد مصالحہک حکمی اولہ میہ جغنه دائر بر فتوی ویردی . بونک اوزرینہ ونڈیک ایله محاربہ یہ قرار ویدلدی .

ذاتاً اوصردده ونڈیک ترسانہ سی یامشدی . جمهوریتک قوتنه خلل عارض اولمش ظن ایدیلوردی . ونڈیکه بر سفیر کوندریلہ رک جزیرہ نک تخلیہ سی طلب اولندی . ونڈیک حکومتی جواب رد ویردی ؛ بونک اوزرینہ محاربہ باشلادی [۹۷۸] .

ونڈیک جمهوریتی دیگر حکومت عیسویہ نک کنڈیسنه معاونت ایلیہ جکلرینی امید ایتدیکنندن پاپا بشنچی (پی) یه مراجعت ایتدی . پاپا اون ایکی کمینک . صرفنی درعہده ایتدکن ماعدا فرانسه ، اسپانیا قرالرنندن ، ایتالیا پرنسلرندن وحتی ایران شاهندن معاونت ایستدی . ایکنجی (فیلیپ) ، (ژان آندریادویا) نک قومانداسنده الی کی کوندردی . ناپولی امرای عسکریہ سندن (قولونا) ، « کیسا جنرالی » تعین اولندی . ونڈیک ایله متفقہری دونماسنک بطائت حرکاتی آطہ لر دکزینی عثمانیلرہ سربست براقدیغندن سر عسکر لالا مصطفی پاشا قومانداسنده کی اردو قبریسہ چیقدی ؛ لفقوشہ پی ایکی آی محاصره دن صکرہ ضبط ایتدی . جزیرہ نک دیگر قلعه مہمہ سی اولان (ماغوسه) بتون قیش مقاومت ایتدیکنندن اوزون بر محاصره دن صکرہ تسلیم اولدی . بوضورتلہ ضبط ایدیلن قبریس آطہ سی وارداتی ابتدا صدر اعظمک ، صکرہ والدہ سلطانلرک خاصہ تخصیص ایدلدی .

قبريسك فتحی اوروپاده عثمانيلر عليهنه براتفاق
 اينه بنجي محاسبی حصولنه سبب اولدی . ذاتاً اوزمان انکیزیسیون
 دورنده بولمان اوروپانک مسلمانلر عليهنده کی خصومتی ، تعصبی حال
 غلیانده ایدی . اسپانیا قرالی ایکنجی (فیلیپ) فرانسه قرالی طقوزنجی
 (شارل) ، آلمانیا ایمپراطوری ایکنجی (ماقسیمیان) ، پاپا بشنجی
 (پی) بیوک برغیرت دینیه ایله هر نوع فداکارلقلر اختیار ایده بیلیرلردی .
 بزم ایله محاربه دن چکین ، علیهمزده کی اتفاقه داخل اولقده تردد ایدن
 ونديک حکومتی قبريسك فتحی اوزرینه اتفاق عمومی یه کیردی .

اول امرده پاپا ، مالطه ، اسپانیا ، ونديک آره سنده عقد ایدیلن
 (اتفاق مقدس Sainte - Ligue) ه طوسقانه ، جنوز ، صاووا ، مانتو ،
 پارمه ، لوق Lucques ، فهارار حکومت صغیره سی دخی داخل اولدیلر .
 اسپانیا و ونديک اتفاق الک مهم ارکاندن اولدقلى ایچون باش قوماندانی
 تعیین خصوصبنده آره لرنده اختلاف ظهورایتدی . نهایت ، پاپانک توصیه سیله
 (دون ژوان دوتریش Don Juan d' Autriche) باش قوماندانلغه تعیین
 ایدلدی .

(شارل کن) ک ولد غیر مشروعی ، اسپانیا قرالی ایکنجی (فیلیپ) ک
 برادری اولان (دون ژوان) اوزمان هنوز ۲۳ یاشنده ایدی ؛ فقط
 بالخاصه شمالی آفریقا عربلریله اجرا ایتدیکی محارباتده شهرت قزانش ،
 امرای عسکریه مشهوره صره سنه کچمشدی .

متفقین دونماسی (مسینا) دن حرکت ایتدی ؛ (پاتراس) کورفزی
 مدخلنده ، (اسکروفا Scropha) برونی آچیقلرنده - بورایه بالاخره
 قانلی برون نامی ویرلشدی - عثمانلی دونماسنک (لپانت - اینه بنجي)
 کورفزدن چیقديغنی کوردی .

دشمن دوننامسی ۲۵۰ کمیدن مرکیدی. بزم دوننامز دخی بومقدارہ یاقین ایدی. فقط اوروپا کیلرینک بزمکیلردن ای اولمسندن صرف نظر ہربری اک مشہور امرای بحریہ نک تحت ادارہ سندہ ایدی. بزم دوننامک باش قوماندانی ایسہ یکچیری آغالغندن قپودان پاشا اولان مؤذن زادہ علی پاشا ایدی.

جزایر سنجاق بکی اولوج علی رئیس، طرابلس بکی جعفر رئیس، عساکر بریہ قوماندانی پرتو پاشا ایلہ امراءن بعضلری دوننامزک خفیف کیلردن مرکب اولدیغنی، باخصوص کیلرک اوزرنده ۲,۵۰۰ قدر ایی عسکر، یعنی یکچیری بولنوب ۲۲,۰۰۰ کشینک محاربات بحریہ آلیشامش، هنوز عسکرلکہ کیرمش سپاہیلردن عبارت بولندیغنی نظر دقتہ آلہرق ساحل استحکاماتندن ایرلیوب حال تدافعیہ قائمسنی توصیه ایتدیلر. فقط قپودان پاشا کنج و محاربہ ہوسکار ایدی؛ اینہ بختی کورفری خارجہ چیقدی، تعرضہ باشلادی.

دشمن کیلرینک اکثری بیوک، طوپلری چوق، عسکری ایی ایدی. عسکر زرہلی اولدقدن بشقہ (آرکہبوز) ایلہ مسلح ایدی. عثمانیلرک قسم اعظمی ایسہ مزراق و اوق ایلہ محاربہ ایدہ جکلردی. بوندن بشقہ متفقین عسکری ۲۹,۰۰۰ کشی ایدی.

دشمن آمیرالری آرہ سندہ دخی اختلاف واردی. برقسمی محاربہ کیریشیلیمہرک طوعریجہ آطہلر دکزینہ کیدلسی فکرندہ ایدی. فقط مؤذن زادہ علی پاشانک میدان اوقومسی اوزرینہ بولنردہ محاربہ قرار ویردیلر.

(۹۷۴ - ۱۵۷۱) سنہ سی تشرین اولندہ بیوک بر محاربہ بحریہ وقوعہ کلدی. محاربہ پک شدتلی ایدی. کیجیلرمن قہرمانانہ حرب

ایتدیلر؛ قپودان پاشا شهید اولدی. اولوچ علی رئیس ماهرانه مانوره لرله دشمن آمیرالترینه فائق اولدیغنی اثبات ایتدی. فقط متفقین دونماسنك بزم کیلره پك فائق اولمسندن طولای نتیجه ده ۱۵ کی باتدی ویا یاندی، ۱۷۷ کی دشمن انه دوشدی. اون قدر بك ویا پاشا شهید اولدی. مجموع ضایعاتمز یکر می، اوتوز بیك کشی ایدی. یالکز اولوچ رئیس دونمانك محو اولدیغنی کورنجه قرقی متجاوز کمی یی قورتاردی، آق دکزده بولنان دیگر کیلری ده یانه آلهرق استانبوله کلدی.

دشمن دونماسنك ضایعاتی دخی مهمدی. اون بیوک کمی غرق، ۷,۰۰۰ کشی تلف اولمشدی. یالکز ونیدك قپودانلرندن اون یدی کشی، مالطه شوالیه لرینك هیئت مجموعه سی محو اولدی.

بومظفرتی احرازیدن متفقین نه یاپه جقلردی؟ بعضلری (پلوپونس) قطعه سنك، حتی استانبولك عثمانیلردن آلمسی ممکن اوله جغنی تخیل ایدیورلردی. فقط عودته مجبور اولدیلر. چونكه میدان حربدن مظفراً چیقان کیلرك اکثری پك چوق خساراته اوغرامشدی. (آیامورا) و (قورفو) ده برمدت وقت کچیرلدکدن صکره ایتالیا یه عودت ایتدیلر. اینه بختی مظفرتی اوزرینه خرسیتانلق عالمنك هر طرفنده تشکر دعالری اوقوندی، روما و ونیدیکده شنلکدر یاپیلدی، امرای بحریه نامنه هیکلر رکز اولندی.

اولوچ علی رئیس استانبوله ۸۷ کی ایله عودت ایتمشدی. قهرمانلغنه مکافاة «اولوچ» لقبی «قلیج» تبدیل ایدیلره رك قپودان پاشالغه تعیین اولندی.

صدراعظم صقولی محمد پاشا بهارده دکزه بیوک بر دونما چیقارمق

ایچون بتون قیش چالیشدی ؛ انشاآت دستکاهلری توسیع ایدلدی ، یوز اللی یی متجاوز کمی انشاسنه باشلاندی . قپودان پاشا بهاره قدر بو مقدار کینک دکره ایندیرلمسی ممکن اولدیغنی ، فقط بونلری تجهیز ایچون لازم کلن دمیرو سائر ادواتک یتیشدیر یله میه جکنی بیان ایتدیکی زمان صقوللی : « دولت عثمانیه بودمیرلری کموشدن ، خلاطلری ایپکدن ، یلکنلری ده اطلاسدن یامغه مقتدر در . » جوانی ویردی . فی الحقیقه بهارده ایکی یوز کمی حاضرلندی ؛ « آرکه بوز » ایله مسلح بحریه عسکری بو کیلره بندیرلدی .

وندیک « بالیوز baile » ی ، یعنی سفیری (آنطونیا باربارو) محاربه یه رغماً استانبولده قالمشدی . اینه بختی فلا کشتن صکره صدراعظمک وندیک جمهوریتی حقنده کی فکرینی آکلامق ایچون صقوللی محمد پاشا ایله کوروشدی . صقوللی کندیسنه خطاباً دیدی که : « اینه بختی محاربه سنک بزه نصل تأثیر ایتدیکنی آکلامق ایستیورسکوز ، غالباً ... شونی بیلکیز که سزک ضایعاتکیز ایله بزم ضایعاتمیزک آره سنده بیوک بر فرق وارد در . بز سزدن بر قراللق [یعنی قبریس آطه سنی] آلدق ، قولکزی کسک . سز دونمیزی مغلوب ایتمکه صقالمیزی تراش ایتمش اولدیکیز ... کیسلن قولک یرینه بشقه سی کلز ، فقط تراش ایدیلن صقال اولکندن دهاقوتلی اوله رق چیقار . »

فی الحقیقه (۹۸۰ — ۱۵۸۲) سنه سی حزیراننده ایکی یوز اللی عثمانلی کیسی دکره چیقدی . دونماز (چه ریغو) ده ، (ماتابان) برونده ایکی دفعه دشمن ایله محاربه یه طوتوشمق ایستدی . لکن متفقین دونماسی حربه کیریشمکه جسارت ایده مدی ؛ ایتالیا صولرینه قاچدی .

دولت عثمانیه نک بویله بر قیش موسمنده اولکندن دهاقوتلی بردونمائی

دکزه چیقاره رق دشمنه میدان او قومی متفقلر ک شوق وغیرتی کسر ایتدی .
 محاربه دن ال زیاده ضرر کورن ونیدیک حکومتی متفقلرینه کو و نه مدیکندن
 سفیر (باربارو) و فوق العاده مرخص (موچه نیغو) فرانسه سفیری
 (فرانسوا نوآی F. de Noailles) ک توسطیله عقد صلحه طالب اولدیلر .
 (۹۸۱ — ۱۵۸۳) سنه سنده عقد ایدیلن مصالحه نامه

مصالحه

موجبجه ونیدیک حکومتی قبریس سفیرینک مصارفی
 اولق اوزره تخمین ایدیلن ۳۰۰,۰۰۰ دوقه یی اوچ سنده تأدیه ایده جکدی .
 (زانطه) آطه سندن طولایی دولته ویریلن ۵۰۰ دوقه ویرکو بیک بشیوز
 دوقه یه ابلاغ ایدلدی . قبریس ایله آرناوودلق ساحلنده (صوبوتو)
 موقعی طویلریله برابر دولت عثمانیه یه ترک اولدی . آرناوودلق ایله
 دالماسیاده کی عثمانی ووندیک ممالکی حدودی حال قدیمه ارجاع قلندی .
 معاهدات سابقه احکامنک ابقاسی و محاربه ده متضرر اولان طرفین تجاری
 زیانلرینک تضمینی قرار کیر اولدی .

الحاصل بو معاهده نامه اینه بختی محاربه سنده دونمازن غلبه ایتمش
 کی منافع عثمانیه یه موافق ایدی .

مصالحه نك عقدندن صکره تونس سواحلنه تعرض ایدن اسپانیوللر
 قلیج علی پاشا دونماسیله سنان پاشانک قومانداسنده کی عساکر بریه یه
 مغلوب اولدیلر . تونس ایالتی کاملاً زیر اداره عثمانیه یه کچدی
 [۹۸۲ — ۱۵۷۴] .

بو دورده باب عالینک دول غربیه ایله مناسباتی کوندن
 کونه آرتیور ، کسب اهمیت ایدیوردی . بالخاصه
 فرانسه اتفاق قدیمک خاطره سی و قاپیتولاسیونلر
 سایه سنده شرقد احرار ایتدیکی موقع ممتازی محافظه ایلوردی .

دول غربیه ایله
 مناسبات

وندیکیلردن بشقہ بتون اور وپا ملتلی آنجق فرانسز بایراغی آلتندہ سیر و سفر ایدہ بیلورلردی . فرانسه قرالی استانبولده صورت دائمده سفیر بولندیریوردی . مع مافیه ایلریده کوره جکمز وجهله انکلیزلرک، هولاندا- لیلرک نفوذی آرتمغه، فرانسزلی مشکل بر موقعده بر اقمغه باشلادی .

اینه بختی محاربه سندن اول فرانسه ایله دولت عثمانیه آره سنده مناسبات حسنه جاری ایدی . حتی دولت عثمانیه اسپانیا قرالی عاينده مشترکا حرکتی فرانسه دن طلب ایتدی . فقط فرانسه اسپانیا علیهنده عثمانیلرله برلکده حرکت ایتدی ، یالکز وندیک ایله عقد مصالحه به چالیشدی . بونکله برابر طقوزنجی (شارل) اینه بختی مظفریتدن طولایی پارسده تشکر دعالری اوقوتدی .

فرانسه ایله مناسباتمز بو مرکزده ایکس سفیر (دونوآی) منحل قالان لهستان تحتنه فرانسه قرالک برادری پرنس (هانری دووالوا) نک کچیرلمسی ایچون معاونتمزی تأمین ایتدی .

قرال سکیزموندک وفاتنده (پیاست) سلاله سی منقطع اوله جفندن لهستان تحتنک منحل قالمسی احتمالی نظر دقته آلان صدر اعظم صقوالی محمد پاشا بو مملکتک (هابسبورغ) خاندانندن ویا آلمانیا پرنسلرندن برینه کچمسنی منع ایچون اردل بکی (سکیزموند زاپولیا) یی قرال انتخاب ایتدیرمک ایسته مشدی . ذاتا (زاپولیا) لهستان قرالی (سکیزموند) ک حفیدی ایدی . محمد پاشا (زاپولیانک) اهمیتتی آرتدیرمق ولهستان امورینه فرانسه یی علاقه دار ایتک ایچون طقوزنجی (شارل) ک همشیره سی پرنسس (مارگریت) ی (زاپولیا) یه تزویج ایتک املنده ایدی . بومسئله ایچون ترجمان محمود بکی سفارت ایله پارسه کوندر مشدی . فقط فرانسه بو ازدواجه موافقت ایتیه رک قرالک برادری (هانری دووالوا) نک

لهستان قراللغه انتخابی ایچون دولت عثمانیه نك معاونت و حمایتی طلب ایتدی . صقولی محمد پاشا دخی بو جهتی قبول ایلدی .

لهستان حکومتی دولت عثمانیه ایله مناسبات حسنه ده
بولمقله برابر افلاق و بغداد امارت لرنده بعض آمال
تعقیدن خالی قالمیوردی . لهستانك بوسیاستی نتیجه سنده
لهستانه ایلد
مناسبات

افلاق بکی میرچه عزل ایلدی . فقط سنوی قرق بیك آلتون ویرکویه
بر مثلی دها ضم ایله استانبوله کلدی ؛ وکلای عثمانیه یی کندی طرفه
جلب ایتدی . لکن اولاحر میرچه یی ایسته مدکرندن قونیه یه تبعید
اولنه رق یرینه برادری آلکساندر تعیین اولندی [۹۷۷] . بر مدت
صکره آلکساندرک یرینه بک تعیین ایدیلن بغداد بک کیزلیجه لهستان
ایله اتفاق ایدرک قرال سکیزموندی متبوع طانیمشدی .

بو حال بالطبع لهستان ایله آره مزك آچیللمسینه سبب اولدی . بوندن
استفاده ایتک ایسته ین (ایوونیا) اسمنده بر آدم بغداد وویوه ده سی استفانك
اوغلی اولدیغنی بیان ایله استانبولدن امداد آلدی ؛ بغداد بک محاربه ایله ایتدی .
بغدان بک مغلوباً روسیه یه قاچدیغندن بغداد امارتنه صاحب اولدی .
فقط دولت عثمانیه علیه انترقه لر چویرمکه باشلادی . لهلر و قازاقلرله
بالاتفاق افلاقی ضبط ایتک ، بیوک بر حکومت تأسیس ایلك ایستدی .

اواننده لهستان قرالی (سکیزموند) وفات ایده رک (پیاست) سلاله سی
منقطع اولدی . (ایوونیا) لهستان قرالی اولمغه چالیشدی . لهلره خطاباً
یازدیغنی ترجمه بر مکتوبده دولت عثمانیه نك آرزوسی خلافتده حرکت
ایدلمه سنی و روسیه ، یاخود آلمانیا پرنسلرندن قرال انتخاب ایتلمی نی توصیه
ایدیکی حالده لهجه یازدیغنی دیگر بر مکتوبده الك بیوک دشمن ترک لراولدیغنی ،
بونلرک احواله واقف اولدیغنی ایچون کن دیسك قرال تعیین ایدلمس نی بیان

ایتدی. بعدہ (اوقراینا) قازاقلریله اتفاق ایدرک عثمانیلره اعلان خصوصت ایلدی. ابرائیل، آقکرمان کی موقعلری اله کچیردی. لهستان قراللغه انتخاب اولنان (هانری دووالوا) لهلری (ایوونیا) یه معاونتدن منع ایتمکله برابر (ایوونیا) بیوک براردوايله بلغارستانه تجاوزایتدی؛ فقط وقوعه کلن محاربه ده مغلوب وتلف اولدی. لهستاندن افلاق وبغدان ایشلرینه مداخله ایتمه سی ایچون تأمینات قطعیه آلدی [۹۸۲].

اوصره ده روسیه ایله مناسباتمزہ کرکینک عارض اولدی.

قریم تاتارلری همان موسقووا جوارینه قدر آقینلراجرا

روسیه ایله

ایدیورلردی. صقوللی محمد پاشا سویش قنالی حفر

مناسباتمزہ

ایتمک، سودان ونیل منبعلرینه قدر حدودی توسیع ایلک کی تصورات و تشبثات عظیمه سنه علاوه دون و وولغا نهرلرینی برلشدره رک آزاق

وخزر دکزلری آره سنده بر قنال حفرینه تشبث ایتمش، بو قنالك حفری ایچون عسکر و عمله کوندردیکی کی اژدرخان شهرینی ضبط ایتمک ایسته مشدی. بوشهرک ضبطی حقنده کی تشبثاتمز روسیه نک علیهنده دیمکدی.

چار (مدھش ایوان) اژدرخان، بتون وولغا حوضه سنی روسیه یه الحاق ایتمشدی. روسلرک اژدر خانہ هجوملری، قریم خانک قنال حفری علیهنده بولمنسی صقوللینک تشبثاتی عقیم براقدی.

تاتارلرک تجاوزاتندن شکایت ایچون کوندریلن روسیه ایلچیسنه دول سائرہ سفراسی درجه سنده اهمیت ویرلمدیکی کی مقابله سفیر دخی کوندرلمدیکندن روسیه ایله مناسباتمز کرکینلشدی.

سلطان سلیم ثانی آلتی ارکک اولاد براقشدی. بیوک

سلطان مراد ثالث

اوغلی سلطان مراد ثالث ۲۸ یاشنده پادشاه اولنجه ایلک

و مرمر همایونه

اراده سی بش برادرینک قتل مادمه سی اولدی. مع مافیه تاریخلر مزہ نظراً کندیمی حلیم بر پادشاه ایدی. فاضل وشاعر اولوب

شعردہ مخلصی «مرادی» ایدی . قادینلرہ انہماک فوق العادہ سی حبیبیلہ سلیم ثانی کی سرایدن چیقمدی؛ اجدادی کی محاربه میدانلرنده بولمندی . فاتح زمانندہ ، قانونینک ایلك دورہ سلطنتندہ اولدینی کی امور حکومت آرتق «ارکان اربعہ دولت» ده دکلدی . حکم ونفوذ درت قادینک اندہ ایدی : بونلردن بری مراد ثالث والدہ سی نوربانو سلطان ، ایکنجیسی همشیرہ سی وصدر اعظم صقولینک حر می اسما سلطان ، اوچنجیسی ایلك زوجہ سی صفیہ سلطان - کہ ونديکک بیوک بر خاندانی اولان (بافو Baffo) عائله سنہ منسوب اولوب چوجقلغندہ قورصانلر طرفندن اسیر ایدلمشدی - دردنجی قادین نوربانو سلطانک وفاتی متعاقب حکم ونفوذنی آرتیران جانفدا خاتون اسمندہ کی حرم کھیاسی ایدی .

نوربانو وصفیہ سلطانلر آره سندنہ کی رقابت یالکز حرم هایونی قاریشدر مقلہ قالمدی؛ امور حکومتہ دخی تأثیر ایتدی . نوربانو پادشاهک حرمک نفوذنی قیرمق ایچون صفیہ سلطانہ دائما یکی رقیبہ لر بولمغہ چالیشیور ، اوغلنک انہماک معلومنه خدمت ایدیوردی . نوربانو وفات ایتدیکی ، صفیہ سلطانک سنی ایلر یلدیکی زمان جانفدا خاتونک تأثیریلہ حرم هایون امشالی کورلمه مش درجہ ده توسیع ایدلدی . پادشاه نامنه آلنان جاریہ لرك کثرتندن طولانی استانبولده کوزل جاریہ فیأتنک یوز مثلی یوکسلدیکی مرویدر . ایشته سلطان مراد ثالث قادینلرہ انہما کندن طولانی یوزایکی اولادی دنیاہ کلدی . بالطبع کندیسی ده مریض اولدی ، ایکنجی دورہ سلطنتنی خستہ لقلرلہ کچیردی .

بودورده قادینلرک نفوذی سرای خارجنہ دخی چیقدی . اوروپا لیلر نوربانونک نفوذنی اوزمان بر حیات اولان (قاترین دوم دیسیس)ک نفوذینہ تشبیہ ایدرلردی . قادینلرک امور حکومتہ مداخلہ وتأثیرلری اوروپا

سفر اسنجه، دولترنجه دخی آکلاشیامشدی. نفوذ نسوان وخیم نتیجه لره سبب اولدی. رساله مشهوره صاحبی قوچی بك سلطنت عثمانیه نك الحطاط معنوی ومالیسی بودوردن اعتبار ایدر. صفیه سلطانك نفوذینه کلتجه ؛ بو قادینك الك زیاده سیاست خارجه مزه اجرای تاثیر ایتدیکی شهه سزدر. کرک مراد ثالث حرمی ، کرک بوندن صوکره کلن پادشاهلرک والده سی صفتیه نفوذینی دائماً ونديك حکومتیه محافظه صلح ومساملت جهته صرف ایتدی .

حرم هایون نفوذینك ایلک نتیجه سی مضایقه مالیه در . عسکره علوفه اعطاسنده مشکلاته تصادف ایدلدی. ذاتاً صنوف عسکریه ، قوانین قدیمه خلافه اوله رق خارجدن بك چوق کیمسلر کیردیکی ایچون علوفه نك مقداری آرمشدی . مسکوکاتك تنزیل وزن وعیاری کبی بر تدبیر سقیمه مراجعت اولندی . بوندن طولای علوفه صاحب لریله اصناف وتجار آره سنده منازعه لر وقوعه کلدی . یکچیریلر ، سپاهیلر بر قاچ دفعه عصیان ایتدیلر . شدتله تأدیب ایدیله مدکلرندن عسکرک مناسب سزلکی ایکید برده تکرر ایتمه باشلادی .

دیگر بر نتیجه سی ده حرم هایونك مداخله سندن طولای وزرانك اداره حکومتدن عاجز قالملریدر .

صقوالی محمد پاشا بو دورده بش سنه ده صدر اعظمق
صقوللینك ایتدی . زوجه سی پادشاهك همشیره سی اولقله برابر
شرافی ندما ومقرینك مداخله لری ، سوء استعماله انهما کلری
 حسبیه نفوذینك کوندن کونه محو اولدیغنی کوردی . برکون بر بوشناق
 صدر اعظمك قوناغنه کتدی ، صقوللی یی اولدیردی . تیمارینك تنقیص ایدلمسندن
 طولای شخصی بر انتقام اوزرینه می ، یوقسه صقوللینك دشمنی لالا مصطفی

باشانك ویا اداره حكومتك پادشاه النده بولمنسی ایستهین حرم هایون
ومقرین سائر نك تشویقه می بوجناتی ارتکاب ایتدی آکلاشیله مدی؛
اعدام اولدی [۱۵۷۹-۹۸۷] .

اوج پادشاه زمانده اون بش سنه دولتی موفقیتله اداره ایدن
صقولیدن صکره صدارت الدن اله کچدی؛ اون آلتی سنه ده طقوز
اون صدر اعظم دیکشیدی .

دوئمای هایونك هر سنه ایلك بهارده آق دکره
چیه رق وندیک ، مالطه ، سیچیلیا ، ایتالیا ، اسپانیا ،
سواحلنده ارائه سطوت ایلمی عادت حکمنه کیر -

وادی السبیل

و قفسی

مشدی . جزایر ، تونس ، طرابلس ایالتلرینک زیر اداره عثمانیه کچدی
زماندن بری ده بحر سفیدک غرب طرفلرنده حاکمیت بحریه عثمانیلره
انتقال ایتمشدی . سلطان مراد ثالثک جلوسندن بر قاج سنه صکره
پورتکیز قرالی (سباستیان) فاس امیرینک عمجه سنه معاونت ایتک
بهانه سیله فاسه عسکر چیقارمش اولدیغندن امیرک دوات عثمانیه مراجعتی
اوزرینه جزایر بکلربکی رمضان پاشا امداده مأمور اولدی . پورتکیز
قرالی ۱۰،۰۰۰ سواری ، ۷۰،۰۰۰ پیاده ، و ۳۶۰ طوپ ایله عثمانیلره
مقابله ایتدی . فقط وادی السبیل موقعنده وقوعه کلن محاربه شدیدده
قرال مقتول ، اردوسی محو اولدی . بوصورتله فاس حکمداری پادشاهک
معاونتی سایه سنده مملکته صاحب اولدی [۹۸۶] .

سلطان مراد ثالثک دور سلطنتیده دولت عثمانیه

ایرانه سفری

ایکی بیوک محاربه ایله مشغول اولمشدر . بونلرک
برنجیسی ایران سفری ۱۲ ، ایکنجیسی آوستریا سفری ۱۴ سنه دوام ایتدی .
ایران حکمداری شاه طهماسب ۵۴ سنه سلطنتدن صکره وفات

ایتدیکے زمان اولاد واحفادی آرہ سندہ اختلاف ظہور ایتدی ؛ مملکت
اختلال ایچندہ قالہرق ایران حکومتی بردن برہ دوچار ضعف اولدی .
ارضروم بککریکی خسرو پاشا ایرانده کی قاریشقیقلقدردن بالاستفاده بو
مملکتک قولایجه ضبط اولنه جغنی بیان وتجاوز اولنسنی توصیه ایدیوردی .
فقط صدر اعظم صقوللی محمد پاشا ایران سفرینہ معارضدی . صقوللینک
فکرنجہ ایران سفرندن دولتجه هیچ بر فائده حاصل اولہ مازدی .
ایرانک بعض یرلری ضبط ایدلسہ بیلہ مسافہنک اوزاقلغی ، آرادہ
کردستان طاغلرینک موجودیتی حسیلہ ۱۰ ارہ عثمانیہ پی اورالردہ ادامہ
ایتمک ممکن دکلدی . بوجہتہ صرف ہمت اولنسنہ قرار ویرلسہ بیلہ
قلعہ لردہ کلیتی عسکر بولندیرمغہ ، مصارف کثیرہ اختیارینہ مجبوریت
حاصل اولوردی . بو ملاحظہ لہ بناءً صقوللی ایران محاربہ سنہ
مانع اولدی . فقط سلطان مراد ثالثک جلوسندن صکرہ صدر اعظمک
نفوذی قیرلمشدی . رأس ادارہ کلن تجربہ سز کیمسہ لک تنسییلہ لالا
مصطفی پاشا سرعسکر تعین ایدیلہ لک ایرانہ اعلا حرب اولندی [۹۸۵] .
اون ایکی سنہ دوام ایدن محاربہ نتیجہ سنندہ دولت فتوحات نقطہ
نظرندن استفادہ ایتدی . فقط پک چوق مصرف اختیار اولندی . پک
چوق عسکرہ لزوم کورلدیکندن یکیکچری وسپاہیلرک قوانین قدیمہ سی
بوزولدی . محاربہ نک ایکنجی سنہ سنندہ صقوللی قتل ایدلدیکندن رجال
حکومت آرہ سنندہ اختلاف ظہور ایتدی . قبریس فاتحی لالا مصطفی
پاشا ، یمن فاتحی سنان پاشا ، فرہاد پاشا ، اوزدمیر اوغلی عثمان پاشا ،
چغالہ زادہ سنان پاشا ، ثانیاً فرہاد پاشا صرہ سیلہ سرعسکر تعین اولہ رق
شرق حدودینہ کیتدیلر . مصطفی پاشا (چلدیر) محاربہ سنندہ ایران
سرعسکری طوقاق خانی مغلوب ؛ تفلیس ، کرجستان ، شروان طرفلرینی

ضبط ایتدی . اوزدمیر اوغلی عثمان پاشا طاغستان جهتلرینی ، تبریزی فتح ایلدی .

فرهاد پاشا
مصالحه سی
اوصرده ایران تخته کچن شاه عباس محاربه یه ختام
ویرمک لزومنی حس ایتدی . آذربایجان و شروان طرفه
فلرنده ضبط اولنان محللری دولت عثمانیه یه براقق ،
برادر زاده سی حیدر میرزایی رهن اوله رق استانبوله کوندرمک شرطیله
فرهاد پاشا ایله عقد مصالحه ایتدی [۹۹۸] . تبریز ، کنجه ، قارص ،
شماخی ، تفلیس شهرلری زیر اداره عثمانیه ده قالدی .

ایرانیه سفیریک
دوامی و نضوح پاشا
مصالحه سی
شاه عباس فرهاد پاشا ایله عقد صالح ایتدکن صکره
امور حکومتی تنظیمه چالیشمش و دولت عثمانیه یه
ترک ایلدیکی آذربایجان و شروان قطعهلرینی استرداد
ایچون فرصته انتظار ایتمکده بولنش ایدی . آوستریا
سفرینک دوامی و آناتولیده جلالی اشقیاسنک ظهوری ایرانیلر ایچون بر
فرست اولدیغندن شاه عباس ۱۰۱۲ تاریخنده اعلان حرب ایتدی ؛ تبریزی
استرداد ، روانه طوغری هجوم ایلدی . سلطان احمد اولک جلوسنده چغاله زاده
سنان پاشا شرق سرعسکرلکنه تعیین ایلدی . روان قلعه سی محاصره دن
قورناریله مدی . سنان پاشانک قره باغده قیشلامق حقنده کی رأینه امرای
عسکریه مخالفت ایتدکلرندن اردو کردستانه دوندی . ایرتسی سنه
تبریزی استرداد ایچون کردستاندن حرکت ایلدی . عساکر عثمانیه سلماش
جوارنده مغلوب اولدی . سنان پاشا دیار بکره رجعت ایله اوراده وفات
ایتدی . شروان و شماخی طرفلری ایرانیلرک الیه کچدی .

برخی مدت شرق حدودی محافظه سز قالدی . ۱۰۱۹ سنه سنده
صدراعظم قیوجی مراد پاشا کردستانه کیتدی . کردستانک اصلاحات

داخلیه سی، حدودك تقویه سی ایله مشغول ایکن دیار بکرده وفات ایتدی. یرینه صدراعظم اولان دیار بکر والیسی نصوح پاشا محاربه یی پاشه چیقارمه جغنی آکلادیغندن فرهاد پاشا مصالحه سنده دولت عثمانیه یه کچن تبریز، روان، شروان شاهه رد و تسلیم، فقط ممالک مذکوره ویرکوسی اولق اوزره سنوی ایکی یوز یوک ایپک وسائر اشیا اعطا ایدمک شرطیه بر مصالحه نامه عقد ایتدی، استانبوله کلدی [۱۰۲۰].

آنحق بالاخره شاهک تمهد ایتدیکی ویرکو وهدیه لر و قتله کلدیکندن، ایران کوندریلن سفیر من ایجیلی مصطفی چاوشدن ایکی سنه قدر خبر آلنه مدیغندن ۱۰۲۶ سنه سنده ایران تکرار اعلان حرب ایدلدی؛ صدراعظم اوکوز محمد پاشا، بعده خلفی خلیل پاشا شرق حدودینه کوندرلدی. دولت عثمانیه ایله آوستریا آره سنده رسماً صلح و مسالمت جاری ایکن حدودده وقایع حربیه اکسیک اولمازدی.

سرحد بکلر من تجاوز ایدر لر، آوستریا و مجارستان امراسی ده بالطبع مقابله دن کری طور مازلردی. اوزمان عثمانیلر آوستریا، لهستانه اردل و راغوزه کبی خراج کذار برر حکومت نظریله باقارلردی. سرحد بکلرینک تجاوزاتی آوستریا لیری اوقدر قورقوش ایدی که ایمپراطور ایکنجی (رودولف)، «ترك چاکی Cloche de Turcs» نامیله یکی بر چاک ترتیب ایتشدی. هر کون اوچ دفعه خرستیانلری کلیسالره چاغیرلر، ترکله غلبه ایچون دعالر اوقونوردی.

بوسنه بکلر بکی حسن پاشا (۱۰۰۱) سنه سنده آوستریا مالکنه وقوع بولان بر آقین اناسنده خروا اتسانده بر پوصویه اوغراددی، کندیسيله برابر معیتک اکثری تلف اولدی. بو وقعه اوزرینه صدراعظم سنان پاشانک

اصراریله و مورخ خواجه سعدالدین افندینک رأیی خلافده آوستریایه
اعلان حرب ایدلدی [۱۵۹۳ - ۱۰۰۱] .

صدراعظم سنان پاشا اردوی هایون سردارلغنی درعهده ایله مجارستانه
متوجهاً حرکت ایتدی . (وه سپریم) ، (پالوتا) قلعهلرینی ضبط ایدلدی .
(بودین) والیسی حسن پاشا (استونی بلغراد) قلعه سنک مدافعه سنه
قوشدی ایسهده ۱۲,۰۰۰ کشتی و ۴۷ طوپ ضایعات ویردی . بونک
اوزرینه (نه توغراد Néograd) اطرافنده کی متعدد کوچک قلعهلر آوستریا-
لیلرک الله کچدی .

سنان پاشا قیش موسمنی (بودین) ده کچیرمک ایستدی . فقط
روزقاسمک حلولنده برآو بجرأ محاربه یه نهایت ویرلمسی عادت قدیمه ایدی .
عسکر سویلنمکه باشلادیغندن بلغرادده قیشلامغه مجبور اولدی . ۱۰۰۲
سنه سی بهارنده استانبولدن کلن قوه امدادیه ، قریم خانی غازی کرایک
معیتنده ورود ایدن قرق بیك تاتار ایله طونه یی کچوب سلطان سلیمان
زماننده احراق اولندیغنی ایچون بزم تاریخلرده (یانق قلعه) دینیلن (راب
Raab) قلعه سنی ضبط و آوستریالیلری مغلوب ایتدی .

سنان پاشا احراز مظفریت ایتدی ایسهده اردل ، بغداد ، افلاق بکلی
دولت عثمانیه علیهنده آوستریا ایمپراطوریه تدافعی و تعرضی بر اتفاق عقد
ایلدیلر . (پراغ) ده عقد اولتان معاهده موجبنه اردل بکی (سکیزموند
باتوری) بلا وارث وفاتی تقدیرنده اردلک ایمپراطور (رودولف) ه
ویرلمسنه راضی اولمشدی . بغداد بکی (آرون Aron) ، افلاق بکی
(میخال Michel le Brave) دخی (هابسبورغ) لر ایله اتفاق ایتدیلر .
(سکیزموند باتوری) اردلده دولت عثمانیه طرفدارلرینی قتل ایتدیکی کبی
(آرون) و (میخال) دخی بغداد و افلاقده بولتان بیگلرجه اسلاملی

خددہ ایلہ تلف ایلدیلر . بواتفاقلر آوستریالیلرک قوتی آرتیردینی صرہدہ سلطان مراد ثالث وفات ایتدی [۱۰۰۳ - ۱۵۹۵] .

افلاق بکی (میخال) ک تجاوزاتی حائر اهمیت بردرجہ یه وارمشدی . فرهاد پاشانک یرینه دردنجی دفعه مقام صدارتہ کلن سنان پاشا افلاقہ کیتدی ؛ اوغلی محمد پاشا دخی مجارستان سرعسكرلکنہ تعین ایدلدی . میخال بک بکرش و (ترغوویشتہ) قصبہ لینی ضبط ، محافظلرینی قتل ایتدیکی کبی یر کوکیدن بری طرفہ عودت ایدن اردو باصقینہ اوغرایہرق تلفات کلنہ یرلدی . دیگر طرفدن محمدپاشا آوستریالیلرہ مغلوب اولدی ؛ (غران) ، (ویشہ غراد) قلعہ لری دشمن الہ دوشدی [۱۰۰۴] .

بومغلویتلر اوزرینہ سلطان محمد ثالث بالذات مجارستانہ عزیمتہ قرار یردی . حزیران ظرفدہ صدراعظم ابراہیم پاشا ومورخ خواجہ سعدالدین افندی معیتندہ بولندیغی خالدہ استانبولدن حرکت ایتدی . اول امردہ (اگری) قلعہ سی یکرمی کون محاصرہ دن صکرہ فتح ایدلدی . (اگری) نک فتحندن اون کون صکرہ (خاچ اووہ Kereztes) محاربہ عظیمہ سی وقوعہ کلدی [۱۰۰۵ - ۱۵۹۶] .

بومحاربہ مجارستان ایچون ایکنجی بر (مہاچ) ایدی . اوسنہ قیش موسمی سرحددہ کچیریلرک ایلک بہارده تکرار هجوم ایدلسہ آوستریائی ایجہ ازملک واساسلی بر مصالحہ عقد ایتک ممکن ایدی . نہ چارہ کہ محاربہ نک عقبنده استانبولہ عودت ایدلدی ، امور سفریہ کوشک طوتلدی ، دشمنہ جبر مافات ایچون میدان یرلدی .

بر مدت صکرہ مجارستان جہتدہ سرعسكر براقیلان صقوللی زادہ حسن پاشا عزل ایدیلرک سرعسكرلک خدمتی ساطورجی محمد پاشاہ تودیع ایدلدی . بوایشک اہلی اولیان . محمد پاشا یانق قلعہ یی دشمنک

محاصره سندن قورتاره مدینگی کبی پهوده یره اردل جهتنه کیدرک (وارات) دنیلن (غروس واردین) قلعه سنی محاصره ایله مشغول ایکن آوستریالیلر (بودین) ه قدر ایلریلیدیلر. هر نه قدر (بودین) قورتارلدی ایسه ده پک چوق ضایعات ویرلدی.

او صره ده افلاق بکی (میخال) دخی طونه جهتنک محافظه سنه مأمور اولان بوسنه بکلربکی حافظ احمد پاشایی اغفال ایدرک نیکبولیده معیتک قسم اعظمیله برلکده تلف ایتمک موفق اولدی. بوفلا کتر نتیجه سنده سرعسکر محمد پاشا اعدام ایدلدی.

۱۰۰۷ سنه سنده صدراعظم ابراهیم پاشا بالذات سفره کتدی. اردونک مختل اولان انتظامی اعاده ایتدیکی کبی (قیژه Canicha) قلعه سنی ضبطه موفق اولدی. طونه سرعسکری کوزجله محمود پاشا دخی (میخال) بکی قهر و تدمیر ایتدی.

آوستریانک اک مهم قلعه لرندن بری اولان (قیژه) پی قورتارمق ایچون آرشیدوق (فردیناند) ک قومانداسنده بولتان قرق الی بیك عسکر قلعه پی محاصره ایتدی. تریاکی حسن پاشا اوچ درت بیك عسکرله طول مدت قلعه پی محافظه ایتدکن ماعدا دشمن اردوسنی پریشان ایتمک موفق اولدی. او صره ده (استونی بلغراد) دخی استرداد ایدلدی. فقط پشته قلعه سی دشمن آله دوشدی.

محارستان سفرینه سلطان احمد اول زماننده دخی دوام اولندی. صدارته تعیین اولتان لالا محمد پاشا سردارلنی درعه ده ایتدی. تدارکات قویه ده بولندقدن صکره (استرغون) دخی دنیلن (غران) قلعه سنی ضبط واسترداد موفق اولدی.

محاربه نک بدایتدن بری افلاق، بغداد، اردل امارتلی دولت

عثمانیہ خصوصیت و آوستریا آمانہ خدمت ایدیورلردی . بو سیبلہ قطعات مذکورہ کرک استانبولدن سوق ایدیلن اردولر، کرک قریم خانلری طرفندن دفعات ایله تحریت ایدلمشدی . او صرہده اردل بکی اولان (بوچقای Bocskay) دولت عثمانیہ دخالت ایتدی ، مجارستانده عصیان چیقارہرق قرالغنی اعلان ایلدی . بونک معاونتیلہ عثمانلیلر (ویشہ غراد) ، (وہسپریم) ، (اویوار Neuhausel) ، (پالوتا) قلعہلرینی ضبط ایتدیلر .

(بوچقای) ک خدماتی مظهر تقدیر اولدی . اردل بکلکی عہدہسندہ قالمق واولادی توارث ایتک اوزرہ مجارستان قرالغنی عہدہسنہ توجیہ ایدلدی . (بوچقای) صدراعظم طرفندن (بودین) ہ دعوت اولندی . اورادہ دولت عثمانیہنک تابعی صفتیلہ صدراعظمک الی اوپدکدنصرکہ استانبولده اعمال ایدیلن تاج مراسم مخصوصہ ایله باشہ کییدیلدی ، بلنہ مرصع قلیج قوشادلدی . سلطان سلیمان زمانندہ ضبط اولنان بلاد وقصباتدن درونندہ جامع شریف انشا ایدیلنلردن ماعداسی (بوچقای) ہ ترک ایدلدی . مجارستان قرالغنی اون سنہ ویرکودن معفو طوتیلوب بعدما سنوی اون بیک دوقہ ویرکو ایله اکتفا اولندی .

افلاق ، بغداد و بالخاصہ اردل امارتنک بو صورتلہ
 آوستریادن آیریلسی اوزرینہ صلح مذاکرہسنہ ابتدار
 ایدلدی . بو مذاکرات خیلی زمان دوام ایتدی .

او صرہده (بوچقای) آوستریا ایله بر معاہدہ عقد ایتدی ؛ ترانسیلوانیا بکلکنی تصدیق ایتدیلدی . مجارستان سرحد قوماندانلغندہ بولناز، قیوجی مراد پاشا صدراعظم اولمازدن ایکی آی اول اون درت سنہدن بری دوام ایدن محاربہ ختام ویرمکہ موفق اولدی . مصالحہنامہ دولت

عثمانیه مرخصلری (بودین) بکربکی علی پاشا وقاضیسی هابل افندی ایله آوستریا مرخصلری (مولار Mollard)، (آلتان Althan)، (پهجن Pezzen) طرفدن (استرغون) ایله (قومران Comorn) آره سنده و طونه اوزرنده کائن (زیدوا طوروق Sitvatorok) موقعنده عقد ایدلدی [۱۶۰۶ - ۱۰۱۵] .

بو اوزون محاربه نتیجه سنده دولت عثمانیه ملکا مستفید اولدی . چونکه اولجه دشمن الله کچمش اولان (یانق)، (استرغون)، (استونی بلغراد) وسائر قلعه لر استرداد ایدلدکن بشقه فضله اوله رق (اکری)، (قانیزه)، (ایوار) ضبط اولندی . سردار محمد پاشانک هزیمتدن بشقه میدان محاربه سی بوزغونلغی کوریلدی . حال بوکه (یانق قلعه)، (اکری)، (قنیزه) محاربه سنده آوستریا لیلرک اوچ بیوک اردوسی محو اولدی . فقط محاربه نك اون درت سنه بلا فاصله دوامی داخل ضررلری انتاج ایتدی ؛ آناطولیده شقاوت چوغالیدی ، مملکت خراب اولدی . بوندن بشقه اوروپا لیلر (زید واطوروق) معاهده نامه سنی دولت عثمانیه نك مسلك سیاسیسنك تحولنه مبدأ عد ایدرک اهمیتله تلقی ایدرلر . چونکه اوزمانه قدر عقد ایدیلن صلح عهد نامه لرنده معامله متساویه اصولی جاری دکلدی . مقام سلطنت دیگر بردولته فارشی تعهد آلتنه آدیرلماز، دائما صدراعظم ایله مصالحه اولنان دولتك مرخصی بیتنده طوغریدن طوغرییه ویاخود طرف صدارتدن تعین قلنان مأمور واسطه سیله شرائط صلحیه قرارلشدیریلوردی . مذاکراتک قرار قطعیمی باب عالیجه نه صورتله قلمه آلینیرسه اودولت سفیری بونی عینیه قبوله مجبور اولوردی . دولت عثمانیه نامه ویریلن بر عهد نامه نك صورت تحریرینه اعتراض ایتمک حرمتسزلک عد ایدیلوردی . بو دفعه ایسه مصالحه یه مأمور اولان

مرادپاشا طرف پادشاهیدن و صدراعظم جانبندن مرخص ایدی . پادشاه ایلہ
ایمپراطور مساوی عد ایدلدی . شمدی یہ قدر آوستریا ایمپراطور لرینہ
« قرال » تعبیرندن زیادہ بر عنوان ویرلمہ مش ایکن بوندن صکرہ رسماً
« رومچاساری » ، یعنی ایمپراطوری عنوانیلہ یاد اولندی . اوتہ دن بری
آوستریادن آلمقدہ اولان سنوی اوتوز بیک دوقہ ویرکو دخی دفعہ
۲۰۰,۰۰۰ آلتون آلمغہ مقابل لغو ایدلدی . شمدی یہ قدر ویریلن
عہدنامہ لر نہایت سکز سنہ ایچون اولدینی خالدہ بومعاہدہ نامہ نک یکر می سنہ
مدت مرعی اولسی تقرر ایتدی . ایمپراطور (رودولف) ایلہ (بوچقای)
آرہ سندہ عقد ایدیلن معاہدہ نامہ تصدیق اولندی . بو تصدیق نتیجہ سندہ
اردل صرف عثمانیلرہ تابع بر امارت حالندن چقیدی . آوستریانک
مداخلہ سنہ یول آچیلدی . الحاصل (زید واطوروق) معاہدہ نامہ سی
دولت عثمانیہ نک مبدأ انحطاطنہ علامت اولمہ بیلہ آرتق شمالہ طوغری
توسیع ممالک ایدہ میہ جکنہ دلالت ایدیوردی .

ایران و آوستریا سفر لرینک اوزون مدت دوام ایتمی
جہولی انتقامی بر طرفدن دولتک مصارفنی آرتیردینی ، پک چوق عسکرہ
لزوم کورلمسندن طولای یکیکچری و سپاہیلرک نظامات قدیمہ سنی بوزدینی
کبی دیگر طرفدن آنا طولیدہ امنیت و آسایشی اخلاص ایتدی . چغاله زاده
سنان پاشا اکر ی سفر ہایونندن صکرہ صدراعظم اولدینی زمان خاچ اووہ
محاربه سندہ فرار ایتش اولان عسکرلری جزالاندیرمق ایستہ مش
وارد وکاہدہ یوقلمہ یاپدیرمش ایدی . بواجرات شددیدہ دن قورقانلرک
جوغی آنا طولی یہ قاجشملر ، اشقیا اولمشلر ایدی .

بواشقیا سر کردہ لرندن قرہ یازیمچی اورفہ طرفلرینی تخریب ایتدکن
صکرہ سیواسہ طوغری کلدی . اوزرینہ کوندربلن بکلر بکیلردن برقاجنی

مغلوب ایتدی . نهایت ، بغداد بکلیکی صقولی زاده حسن پاشا سرعسکر تعیین اولندی . قره یازیچی اوزرینه حرکت ایده چکی صروده بوسر کرده وفات ایدرک یرینه برادری دلی حسن کچدی . حسن پاشا اشقیا ایله محاربه به دوام ایلدی . فقط حکومت مرکزیه نك سوء تدبیری نتیجه سی اوله رق نفوذی منکسر اولدی ؛ توقات قلعه سنده محصور قالدی ونهایت مقتول دوشدی .

بر مدت صکره دلی حسن دخالت ایتدیکندن کویا دفع فتنه ایچون عهده سنه بوسنه بکلیکی توجیه ایدیه رک آوستریا سفرینه مأمور اولندی . سکز اون بیک قدر عجیب قیافتلی حشرات ایله کچدیکی یرلری تخریب ایدرک چناق قلعه بوغازندن مرور ایلدی ؛ بوسنه به کتیدی .

مع مافیه شقاوتک اوکی آله مدی . آوستریا و ایران سفیرلرینک دوامی تیمارلی سپاهیسنک نظاماتنه ایراث خلل ایدرک بونلرک یرینه قائم اولان حشرات منبع شقاوت حاله کلشردی . ایچلرندن بری فرصت بولنجه برایکی یوز کشینک باشنه کچه رک یاجلالی اولور ، یاخود اولمشلره التحاق ایدردی . بونلر کیتدکجه چوغالدی . مملکت باشند باشه خراب اولقده ایدی . نهایت ، زیدوا طوروق معاهده سنک عقدندن صکره صدراعظم قوجی مراد پاشا بالذات آناتولی به کیدرک جلالی رؤسانی تأدیب ایتدی ؛ اوجاقلرینی سوندیردی . ۶۰,۰۰۰ ایله ۱۰۰,۰۰۰ آره سنده اشقیا ته لیدیکی مرویدر .

اوراث سلطنت قانوننی تأسیس ایدن ذات سلطان احمد اصول وراثت اولدر . تاریخلر مزده بوقانون و اصولک وضعی سلطان سلطنت احمدک جمله محسناتندن بری اوله رق کوستریلیر .

فی الحقیقه قوصوه محاربه سنی متعاقب ییلدیرم بایزیدک یعقوب چلبی حقه ده کی

حرکت منفرہ سی عادتاً بر اصول شکنہ کیرمش ؛ بوغدو عظیم سلطان سلیم ثانیؒ ، سلطان مراد ثالثؒ سرایدہ اوتوران معصوملرینہ قدر سرایت ایتدیرلمشدی . سلطان احمد برادری سلطان مصطفایہ برشی باعدی ؛ شہزادگانک طشرہ والیکلرینہ کوندرلمسی قاعدہ سنی الغاء صقال صالیویرمکی وتولید ذریات ایللرینی منع ایتدی وسلطنتی اکبر شہزادگانہ تخصیص ایلدی . بویکی اصول موجبہ کندیسندن صکرہ سلطان مصطفی پادشاہ اولدی .

سلطان مصطفانک - خفت عقلنہ مبنی - جلوسندن اوچ
سلطانہ عثمانہ ثانیؒ آی اون کون سکرہ خلع ایدلمسی اوزرینہ پادشاہ اولان
امبرانی [۱۰۲۷-۱۶۱۸] سلطان عثمان ثانی سلطان احمدک بیوک

اوغلی ایدی . والدہ سی ماہ فیروز سلطان ایدی . جلوسندن اوچ سنہ صکرہ ہرنہ سببہ مبنی ایسہ قتل ایتدیردیکی کوچک برادری محمد سلطانندن بشقہ کوسم سلطان نامیلہ معروف اولان وعن اصل روم بولنان ماہ پیکر سلطانک اولادی اولمق اوزرہ بش برادری حیاندہ ایدی . ماہ فیروز وماہ پیکر سلطانلر پادشاہی ادارہ یہ چالیشمشلر ایسہ دہ حکم ونفوذ بر آراق خاصکی سلطان ایلہ قیزلر آغاسی سلیمان آغا الندہ بولنمشدی .

سلطان عثمانک جلوسنی متعاقب ایران ایلہ محاربہ یہ دوام اولنہ رق
 نصوص پاشا مصالحہ نامہ سی تجدید اولندی .

پادشاہ اون سکز یاشنہ کلدیکی زمان وکلانک وصایتندن وارستہ قالہ رق بالذات ادارہ حکومتہ تشبث ایتدی . حربہ ہوسکار ، اسلحہ قوللانمقدہ ماہر ایدی . عسکرہ ویریلن علوفہ وعطیہ لڑک تقیصی ، علمایہ ویریلن آرپہ لڑک قطعی ، میخانہ لڑک سدی ، ایچکی فروختنک منعی ، خلافتدہ حرکت ایدنلرک شدیداً مجازات ایدلمسی کی تدابیر ایہ عسکری صیقیشدیردی . بواجرات افکار عمومیہ بی پادشاہ علیہ چویردی .

اولجه، قریم تاتارلرینک وقازاقلرک تجاوزات متقابله لرینه
لهستانه سفری رغماً لهستان ایله دولت عثمانیه آره سنده عقد مصالحه
ایدلش و (دینیستر) نهری ایکی حکومت میانده حدود اعتبار ایدیلوب
دولت عثمانیه تاتارلرک لهستانه تجاوزلرینی منع ایتمکی ولهستان دخی آرتق
بغدان، افلاق، اردل ایشلرینه مداخله ایلمه کی تعهد ایتشلر ایدی.
۱۰۲۷ سنده بغدان وویووده لغنه (غراتیانی Gratiiani)، افلاق
وویووده لغنه اسکندر پاشا تعیین ایدلشدی. (غراتیانی) دولت عثمانیه یه
اهانت ایدرک قازاقلر ولهلر ایله مناسباتده بولنیوردی. نهایت، طرف
پادشاهیدن عزل ایدلدی. قازاقلر ایله لهلر (غراتیانی) یه معاونت
فک یه بغدانه داخل اولدیلر. سلسره محافظی و تاتار خانک قومانداسی
آلندی کی اردو ایله (پاش) شهری جوارنده وقوعه کلن محاربه ده لهلر
کاملاً تلف اولدقلری کبی (غراتیانی) دخی برکوبلی طرفدن قتل ایدلدی.
سلطان عثمان لهستان ایله محاربه املنده بولندیغندن ۱۰۳۰ سنده
مصالحه ایچون له قرالی طرفدن کوندربلن سفیرلری قبول ایتدی، انکلتره
ایلچیسنک وساطتنه دخی جواب رد ویردی و رجال حکومتدن بعضلریسک
احظار تنه رغماً بالذات لهستانه عزیمت ایتک اوزره استانبولدن حرکت ایتدی.
اوصره ده شدتله یاغان یاغورلردن طولایی بالقانلر کمال مشکلات ایله
سیدلدی. ایساقچیدن طونه نهری کچیله رک (طورله)، یعنی (دینیستر)
نهری کنارینه مواصلت ایدلدی. اوراده قریم خانی، اردل و مملکتین
بکری اردوی هایونه التحاق ایتدیلر. (خوتین Khotin) قلعه سی
محاصره اولندی. قلعه نك ضابطی ایچون بر چوق دفعه اجرا ایدیلن
سدتلی هجوملردن بر فائده کورلمدی؛ بالعکس تلفات کلیه ویرلدی. امرانک
تکاسلی، عسکرک عدم اطاعتی حسیله احراز ظفر ایتک ممکن دکلدی.

بناءً علیہ سلطان عثمان لہستان قرالی طرفندن اظہار ایدیلن آرزو اوزرینہ عقد مصالحہ ایتدی . لہستانک کفی السابق قریم خانہ قرق بیک دوقہ ویرکو ویرمسی ، تاتارلرک لہستان اراضیسینہ تجاوز ایتہملری مصالحہ شرائطدن ایدی . فقط قازاقلر ایله تاتارلرک تجاوزات متقابلہلری دوام ایدوب کیتدی .

(خوتین) سفری اثناسندہ ایکی حال عسکرک قلبندہ عصبانہ [*] عقدہ اولوب قالمش ایدی . بری : اردونک (بغداداشت)

نام محلہ نزولندہ یکچیرینک نصفی قالمادی دیہہ برسوز شایع اولمسی اوزرینہ یارمشر غروش انعام ویریلرک ، برر برر حضوردن کچیریلرک یوقلامہ ایدلمسی ایدی کہ بوتفتیش اوجاق ضابطلرینی مغبر ایله مش ایدی . دیکری : (خوتین) ہ دردنجی هجومدہ بودین بکربیکی (قرہ قاش پاشا) نک شہادتی اوزرینہ سلطان عثمان اوتاغہ عودتندہ (سپاہ) طائفہ سی دہ برابر دونمش وپادشاہ کندیلرینہ عتاب ایله مش ، بودہ سپاہیلری کوچدیرمش ایدی . اسباب منضمہ دن اولہرق بوستانچی باشی محمد آغانک ۱۲۰۹ تاریخندہ یکچیری آغاسی یوسف آغا ایله خصوصتہ بناءً پادشاہی تبدیل جامہ ایله معیتندہ بوستانچیلر اولدقلری خالدہ کزدیزوب میخانہلری باصدیرمسی ، یکچیریلری دریایہ و شہرلیلری کورکہ آتدیرمہ سی و حین سفرده اسیر کتیرنلرہ بر آلتون مقداری آز عطیہ ویرلیدی جہتلہ « بز پادشاہ اوغورینہ بذل جان ایدوب باش آلیورز » دینلرہ مصاحب و مقرب نامہ نزد پادشاہیدہ بولنان خادم آغالریلہ سائرلرک : « سنک کتیردیکک کلہ بر آچہ دکر می ؟ » دیہرک تنفیر قلوبہ باعث سوزلر سویلہ مش اولملری ، (خوتین) قلعه سنک فتح اولنہ ماییشنک عسکرک اہمال وعدم غیرتہ [*] بوبحث ایله وقعہ شہادت بحثی احمد راسم بکک عثمانی تاریخندن آلمشدر .

حمل ایدیلەرک یوز چویرلمسی، ینه مقربلردن بعضیلرینک خوتین محاربه سی ائناسنده : « عسکر ، عسکر مصر عسکریدر . بونلره ویریلن علوفه زیاندر . » طرزنده هذیانلر سویلیه رک پادشاهی بو مقوله عسکر تدارکنه اماله ایتدیرمک ایسته ملری ، حتی پادشاه طرفدن بونی قوه دن فعله کتیرمکه تشبث ایدیله رک بو جهتی ستر ایچون بلا مشورت مکّه مکرمه یه عزیمته قالدیشلمش اولمسی ده متواتردر .

فی الواقع - لطان عثمان عربستان ، مکّه ، شام و حلب طرفنه عزیمت ایده جکنی اعلان ایله وزیر اعظم (دلاور) و دفتردار (باقی) پاشالارک سفر تدارکی و رملرینی و سرای عتیق بالطه جیلرندن (اسکی یوسف) ک ذخیره اشتراسیچون حلب و شم و مصر طرفلرینه اعزامی امر ایله مش ایدی . یوسف مصره کیده رک کمی و ذخیره احضارینه باسلامدینی کبی دوه جی، دوه، آت و سائره دخی حاضر لایوب مکّه شریفه ذخاری آلتق ایچون ایجاب ایدن و سائله توسل ایله مسنی بیلدیردی . حرمین اهالیسی یادشاهک زیارتندن دغدغه یه و بر طاقم روایات کاذبه ایله وسوسه یه دوشدیلر . معیت پادشاهیده یکیکچریدن بش یوز نفرله صامسونجی باشی، سپاهیدن بیک قدر نفر بولنه جق و متباقی عسکراستانبولده قاله جق ایدی . حسین پاشا استانبوله قائم مقام ، کورجی محمد پاشا ادرنه یه و رجب پاشاده بروسه یه محافظ تعیین ایدلایلر . وزیر اعظم ، دفتردار ، ناشانجی و رکاب هایون آغاریه کدکلی چاوش و قرق نفر متفرقه و او توز کاتب دیوانده برابر کیده جک و دونانما دخی حاضر لایوب خلیل پاشا قومانداسیله آق دکره چیقه جق ایدی . بو تشبثاته صدر اعظم یان کوزله باقدینی حالده دارالسعاده آغاسی ایله معلم سلطانی عمر خواجه تشویقاتدن خالی قالمیورلردی .

بونلرہ بردہ سلطان عثمانک کوردیکی رؤیا قاریشدی: تخت اوزرنده تلاوت قرآن ایلرکن جناب فخر عالم افدمن کلهرک الندن مصحف شریفی وآرقه سندن جبه وزرهنی آلوب بر توقات اورمشلر وتختندن دوشورمشلر. سلطان عثمان قدم مبارک یوز سورمک ایچون طاورامش ایسهده میسر اولمه مش. معلم سلطانی بورؤیانی حین تعبیرنده «حج شریف نیتندہ تردد ایتدیککز ایچون سزی معناً تویخدر» دیر. پادشاه قانع اولماز. عزیز وقت اسکداری محمود افندی یه تعبیر ایتدیرر. مشارالیهده «کلام قدیم شرع شریفدر. جبه عالم وجوددر. پادشاه اسلامه توبه وانابت ایتمک کر کدر.» دیر. سلطان عثمان ده بونک اوزرینه تره زیا. رتلرینه باشلار. ابو ایوب انصاری زیارتندہ ذبح قربان ایجاب ایدر. قویون، صغیر تدارک اولونسون دیه امر چیقار، قویون بولنور اما صغیر بولونه ماز. (قره کمرک) سمتندہ بولدقلری آرا بهلرک اوکوزلرینی سوروب بوغازلارلر. صاحب لرینک فریاد لرینه باقیلماز، اوکوزلرک درتده برقیمتی ویریلیر. بالطبع بددعا وانکسار خاطر واقع اولور. پادشاه اوچمه غریب بر تدبیره دهها مراجعت ایلر. خلقه مهیب کورونمک فکریله جمعه کونی اوزرینه پنبه لی عظیم بر قبا جبه کینوب سلطان سلیم جامعنه نمازه کیدر. رجبک سکزنجی کونی بر قادرغه اوتاقلری وچادرلری آلمق ایچون یاناشیر. بو آزالق شیخ الاسلام: (پادشاهلره حج لازم دکلدیر. یرنده اوطوروب عدل ایلک اولادر. جائزکه بر فتنه ظهور ایلسون) زمیننده بر فتوا کوندردیکی کبی اسکداری پیر محمود افندی ده نصیحت ایلر. مفید اولماز. منجم باشی محمد چلبی ده ایشه قاریشیر. دفتر دار باقی پاشا کتبخداسنه؛ «نافله یره زحمت ایدیورسکز، سفر یوق. (قران نخبین سرطانی) اولدینی کبی طالع پادشاهی اولان برجده

دخی کسوف وقوعه کلدی ، رمضانہ ایریشه میه جک « دیر . والحاصل
عسکر طرفدن عقد ایدیلن بر مشورتده « پادشاهک حجه عزیمتی بزدن
نفرت ایتدیکی ایچوندر . دشمن ظهوری احتمالی وار ایکن ، مسکتی
براقوب کیمک خطا در . واز کچمه لیدر « حکمی ویریلر . علما نامه
آره لرینه قاریشان بر طاقم مفسدینی ده برابر آلوب آت میدانه کیدرلر .
صدر اعظم دلاور پاشا بیورلدی ایله چاوش باشی بی کوندیرر ، طاشلارلر .
خلق آیاغه قالقار .

آت میدانده دیکر بر مجلس دها عقد ایدیلوب شیخ الاسلام اسعد
افندیدن : پادشاهی اضلال و بویه سودالرمه دوشوروب عبث یره بیت المالی اتلاف
ایدنلر و افساده باعث اولانلر حقده قتل ایله قنوا آلیرلر . بلوک آغلرینی
ویکیچری آغاسنی ده رجم ایدرلر .

یدی قله یه کلن دونانماده کی یکیچریلرده کیمیلردن فیزلایوب بونلره
قاریشیرلر . بو درلو جمعیت ایله اولامعلم سلطانی عمر افدینک سرائی
اوکنه کیدرلر . خواجه تبدیل قیافله قاجار . قوسنی قیروب مالنی یغما
ایدرلر . بعده صدر اعظم سرائینه کیدرلر . باقارلرکه صدر اعظم معیتی
سلاحلی . بونلرک ایسه سلاحلری یوق . سپاه چارشوسنده بولدقلری
سلاحلری آلمق ایچون دوزلر . آقشام اولور . پادشاه علمایی دعوت
ایدوب جمعیت عسکریه نک مقصدینی صورار . آنلرده « عسکر آناطولی یه
کچدی کیزی ایسته میور ، خواجه افندی ایله دارالسعاده آغاسنی نفی
ایتسون دیورلر . « دیه عرض ایدرلر . پادشاه : « حجدن فراغت ایدرم .
اما آنلری عزل بیله ایتیم « جوانی ویریر . کیجه لین یکیچری او طه لرنده
« پادشاه بوستانجیلری سلاحلاندیرمش » ، بوستانجیلر آره سنده ده « دونانما
طوپلرینی سرائه چویرمش » دیه روایتلر چیقار .

ایرتسی کون یکچیری و سپاہ عسکری بر سلاح سلطان محمد جامعہ طولارلر: کبار علمایہ خبر کوندیرلر؛ «آنلر دہ یکی جامعہ کلسونلر» دیرلر. کبار علما - کہ مفتی، نقیب غباری، یحیی افندی، قاف زادہ، بوستان زادہ، عزمی زادہ، کتخدا مصطفی، آیاصوفیہ واعظی عمر، درویش، قاضی زادہ ایدیلر - جامع ایچنہ کیدوب بونلرک اختیارلرینی چاغیرلر. سبب جمعی صورارلر. بونلر دہ خواجہ سلطانی ایلہ دارالسعادہ آغاسی سلیمانک، قائم مقام احمد، دفتر دار باقی، صدراعظم دلاور پاشالرک ونصوح آغانک قتلری حقندہ عرضحال ویرلر. «بونلرک قباحتری نہ در؟» دیہ سؤال ایدیلنجه: «خواجہ ایلہ قزلر آغاسی پادشاهی سفرہ تحریک ایتدیلر. بز دلاور پاشانک سراینہ کیتدی کمزده آدملری اوزرمزہ اوق آتوب بر قاج کشی قتل ایتدیلر. دفتر دار دائماً زیوف آچہ ویرر، قائم مقام قوریچی و اوراق معاشلرینی ویرمز، سکبان باشی نصوح آغادہ قائم مقام ایلہ اتفاق ایدوب قوریجیلری اتمک لرندن ایتدیلر» دیرلر.

علماء، عرضحالی پادشاه ویرلر. پادشاه: «قتلی طلب اولنان آدملری ویرم» دیر. رجا ایدرلر، اھون شرین (!) اختیای (زمدر، ویرلمز سہ فساد زیادہ اولور» دیرلر. پادشاه ینہ رد ایلہ جواب ویرر. «بو عسکراجداد عظامک زکدہ ایستہ دکلرینی آلمش لردر. سز شیمدی ویررسہ کز ایی اولور» دیرلر. سلطان عثمان: غالباً بونلری تحریک ایدنلر سز سکز. اولجہ سزی کسرم. ذاتاً آنلرک تدارکی کورلمشدر. دیر. فقط دیگر طرفدن سراہہ کیدن علمادن خبر کلینجه: «بوستانجیلر قبولری طوتمش لرمی» دیہ آیاصوفیہ منارہ سنہ آدملر چیقاروب باقدیررر. آنلردن بر اثر کورمینجه سرای قپوسنہ واروب ایچری یہ کیرلر. قپوجیلر، بونلرہ:

— صاقینک، بوستانجیلر غافل اولمیک. دیرلر. بونک اوزرینہ بر قاج

یوز تفك اندازی بدنلره قویوب طویچی ، جبه جی و عجمی اوغلانلریله اهلیدن-لاحسز اولانلر آباردن اودون آلیرلر. «دلاور پاشا ایله دارالسعاده آغاسنی وخواجہ بی ایسترز» دیه نعره آتہ آتہ ایکنجی قپودن کیره رك دیوان هایونه طولارلر . اوچ ساعت قدر بویله طور دقدن صکره اوچنجی قپودن ده کیروب ایچلرندن برینك فریادی اوزرینه «سلطان مصطفای ایسترز» دیمکه باشلارلر. آرتق بتون بتون ایچری یه کیره رك حرم قپوسنی قیروب سلطان مصطفانك اوطه سنی بولورلر . قپوسی ایچریدن اولمغله اوطه نك قبه سنه ضوپالرله چیقوب :

— شرع ایله سلطان مصطفای ایسترز ، دیه باغیرلرلر . ایچرودن :
— سلطان مصطفی بوراده در . دیه یواش برسس کنجه مطبخدن بالطه لر کتیره رك قبه بی دلرلر . آشاغی یه آدم ایندیرلرلر . سلطان مصطفی برمندراوزرینه اوطورمش ، قارشیسنده ایکی جاریه آیاقده طور ییورمش . در حال یر اوپوب :

— طیشاریده عسکر سزه منتظر در ، دیدکلرنده بیچاره سلطان مصطفی صوایستر . مکر محبسندہ اوچ کون قپانوب صوویمک ویرلمزایمش . برطرفدن والده سلطانه مژده ویریرلر ، برطرفدن ده سلطان مصطفای قبه دن چیقاره رق شیخ الاسلامك آتہ بیندیریرلر . بك ضیغ اولدیغندن آتده طورده مازہ عرض اوطه سنه کوتورورلر .

سلطان عثمان عسکرک ایچری یه کیردکلرینی طوینجه دلاور پاشایی کتیرتمک ایچون بوستانجیلر یوللار ایسه ده ایش ایشدن کچمش ایدی . عسکر دلاور پاشا ایله دارالسعاده آغاسنی کورونجه قتل ایدرلر . والحاصل نصایح دیکله میوب علمایی زور ایله سلطان مصطفایه بیعت ایتدیرلرلر . بیعتدن صکره عسکر سلطان مصطفای بر خسته آرابه سنه بیندیره رك

اسکی سرایہ ، اورادن دخی سلطان عثمان بوستانجیلرله باصہ جقمش قورقوسیلہ اورتہ جامعہ کوتوررلر . بورادہ شایان دقت برشی وار ایسہ اودخی یولده خلقلک آرابہ اطرافنه اوشہ رک کیمی روباسنک یکنی وکیمی اتکنی ایجری براقوب احسان امیدیلہ نشان ویرمکہ چالیشدقلریدر . بوبر عادت اولسہ کرک . ہرنہ ایسہ، عسکر اورتہ جامعدن طوغریجہ (باباجعفر) و(غلطہ) زندانلرینہ کیرہ رک اورادہ کی محبوسلری وطاش کیلریلہ ترسانہ محبسندہ کی موقوفینی صالیوررلر . اوکونک آقشامی قیوجی باشی (قرہ علی) آغانک خانہ سی یغما ایدیلیر . ارباب عصیان بر آرتدیرلیجہ طاورانہ رق اسکہ لردہ قایق بر اقامشلردی . سلطان عثمان آناطولی طرفہ قاجق ایستر ایسہدہ بوسیددن موفق اولہ ماز . (مرہ حسین) پاشا اک صکرہ سلطان عثمانی آقشام اوزری آغا قپوسنہ کوتوررلر . بورادہ یکی چری آغاسی (علی آغا) ایلہ مذا کرہ ایدیلیر . ایثی باصدیرمق اوزرہ یکیکچری یہ الیشر آلتون انعام ایلہ اسکرلت چوقہ و سپاہی یہ اوزر آچقہ ترقی ویرمک قرار . لشدیریلیر ایسہدہ علی آغا ایرتسی صباح مسئلہ یی نفراتہ آچنجہ اوپہ باشیلرک تعلیمی وجہلہ آغایی پارہ پارہ ایدرلر . جٹہ سنی آقسرایدہ یول اورتہ سندہ براقیرلر .

میداندہ بر والدہ سلطان ایلہ اوجاق آغالرندن کتخدابک ، زغرچی باشی و سائریدی سکز آغادن ماعدا حاکم قالمامشدی . بونلر بعد المشاورہ (داماد داود) پاشایی صدراتہ کچیرلرلر . (درویش) آغا فامندہ کی برسلحدارده یکی چری آغاسی اولور .

عسکر پادشاه جدیدہ بر عر ضحال ویرہ رک قائم مقام احمد ودفتردار باقی پاشالرلہ خواجہ سلطان عمر افندی و سکبان باشی نصوح و آياس آغالرک قتلنی ایسترلر . فرمان صادر اولور . دیکر طرفدن علی آغانک قتلئ انسانندہ

سلطان عثمانك آغا قپوسنده اولدینی شایع اولمشدی . بر مقدار عسکر اورایه هجوم ایده رك سلطان عثمانی صاقلان دینی یردن چیقاریرلر . آرقه سنده بیاض بر انتاری وار ایمش . باشنده عرقیه بيله اولیوب آچیق ایمش سپاهینك بری کیرلی دلبندینی ویریر . بر بار کیره بیندیررلر . یاننده بولنان صدر سابق حسین پاشانك فرار ایدرکن یتیشوب باشنی کسرلر . اورته جامعه کتیررلر . سراینی یغما ایدرلر . سلطان عثمان ، حسین پاشانك نعشی کورنجه آغلار :

— بو مظلوم بی کناه ایدی . هر زمان عسکر حقنده بکا ایولك سویلردی . آنك سوزیه عامل اوله ایدم باشمه بو حال گلز ایدی . بنی خواجه ایله دارالسعاده آغاسی اضلال ایتدی . دیر . یولده کوتورلرکن بر طاقم اراذل و اشرار سب و شتم ایلرلر . حتی بعضلری :

— جانم عثمان چلبی میخانه باصوبده یکچیری و سپاهیدن طوتیلانلری طاش کیسنه حبس ایتمك ، دكزه آتمق نصل ایمش ؟

دیه اكله نیرلر . (آلتونچی اوغلی) نامنده بر رذیل سلطان عثمانك بالدرلرینی صیقوب ادبدن خارج کفرلرده بولئور . بو حال ایله اورته جامعه کلنیر . جمعه اولمغله مؤذنلر صلا و یردکلرنده عسکر سلطان عثمان قتل اولندی ظن ایدر . سلطان عثمانه سؤ قصد ایدلمسون دیه باغریشیرلر .

والده سی سلطان مصطفی خانی محرابه او طور دوب ایکی جاریهده اتکلرینی طوتاردی . طیشاریده برهنکامه ، بر آواز اولسه یرندن صیجرا . یوب پنجره دن باقمق ایستردی . زور ایله او طور دیرلردی . سلطان عثمان ایسه باقوب :

— هی دردمندلر ، پادشاه ایتدی ککز آدمی کورك . بودولتك انقراضنه سبب اولوب اوجا غکزی سون دیره جکدر . یقینده پشیمان اولورسکزر ،

دیدکدن صکره باشندن او کیرلی دستاری چیقاروب آغلادی . و آغلاره خطاب ایدوب :

— بيلمزلك ايله سزه جفا ايتدم ايسه غفوايدك. سز ايتيمك. دون صباح پادشاه ايدم . شمدی عريان قالدیم . حامدن عبرت آلك . دنیا سزه ده قالماز. هانکی پادشاهك قوللری پادشاهلرینه بواهاقی ایتدیلر؟ دیه سویلنهرک خلقی آغلادتدی. طور ناجی باشی کچه سنده اولان دلبدن مقرر مه بی چیقاروب: پادشاهم پا کچه در ، مبارک باشکزه صارک ، دیه ویردی . اوکجه آلمق ایسته مدی ، اما صکره آلدی ، صاریندی .

بواننده صدراعظم اولان داود پاشا یاننده جبه جی باشی **وقفه شهادت** دینیان بی دین النده کمند اولدینی حالده کلوب سلطان عثمانک اوزرینه بو غمق ایچون کمند آتدی . سلطان عثمان دونوب کمندی طوتدی . حاضر اولان آغلار یوریدیلر .

— نه یاییورسکمز؟ شیمدی طیشاری به عکس ایدرسه جمله مزی قیرارلر ، دیه منع ایتدیلر .

سلطان عثمان داود پاشایه دونوب :

— بهی ظالم ، بن سکا نیلدم . ایکی دفعه موجب قتل جرمی عفو ایدوب اولدورمدم . منصب ویردم . بکا عداوتک نه در ؟ دیه سویلندی . وینه آغلاره دونوب :

— بو ظالم بی قوماز ، اولدورور .

دیینجه آنلرده :

— یوق پادشاهم ، خاطر کزی خوش طوتک . اورته لق بر مقدار سکون بولسون ، ینه پادشاهمز سکمز ، دیه تسلی ویردیلر . فقط سلطان مصطفانک والده سی آغلاره :

— سز بيلمز سکز ، بونه ييلاندر . بورادن صاغ قورتولورسه
 بزدن وسزدن کيمسه براقاز ، ديه کيزليجه فتنه ويريردي . ينه تکرار
 داود پاشا ، جبه جي باشي به اشارت ايدوب کمند آديردي . ينه منع
 ايتديلر . صکره عسکر طشردن تنيه ايتمکله ال چکديلر .

الحاصل سلطان عثمان کمنديسندن وقوعه کلن خطاري اعتراف ايله
 ايله برابر هر شيئه موافقت ايتديکني بيلديرر و برادرينک محبوس اولديني
 او طه ده حبس اولمسنه راضي اولور ايسه ده داود پاشا ايله يکيچري آغاسي
 درويش آغا مشار اليه بر بازار آرابه سنه قويوب صو باشي کتخداسي
 اولان (کلندر) نامنده کي حياسزي دخی برابر بينديرلر . عظيم بر جمعيت
 ايله يدي قله يه کوتورورلر . عسکر طاغنه قد صکره داود پاشا ايله کتخداسي
 عمر آغا و جبه جي باشي آغا و برقاج اوباش اوراده قاليرلر . جبه جي کمند
 آتورق و کلندر حصيه لرني صيقه رق اولدورلر . جبه جي نشانه اولمق
 اوزره قولاغني کسوب سلطان مصطفى نك والده سنه کوتورر .

سلطان مصطفای اولک اون بش آی دوام
 سلطان مصطفایک ايکنجي بلورنده
 اي دن ايکنجي دور سلطنتي مدھش بر آنا رشي
 استانبول درويات احوالي
 زمانيدر . يکيچريلر ايله سپاهيلر تغلب ايدرك
 حکومتي ضبط ايتديلر . بوايکي اوجاق براز صکره بربرينه دشمن ايکي قسمه
 آيرلدي . آلتی صدر اعظم ديكشدي . هر صدر اعظم اوجاقلردن برينه استناد آ
 اداره حکومت چاليشيور ، بالطبع ديکراوجاغلک خصوصتي جلب ايد ييوردي .
 يکيچريلر ايله سپاهيلر بربرينه غلبه ايله حکومتی الله ايتدکجه بخشش آيورلر ؛
 ترقيه ، ترفيع رتبه يه نائل اوليورلردي . يکيچريلر و سپاهيلر هر کون
 سراي ، قوناقلري ، شهري يغما ايد ييورلر ، ايستدکريني اولد ييورلر ،

ایستدکری یرلرده یانغینلر چقاریورلردی . الحاصل استانبول اوزون مدت محاربه دن صکره هجوم ایله ضبط ایدلمش برشهره بکزمه یوردی .

ایالاته کلنجه ، والیرک برچوغی عصیان ایتمشدی . سکبان ولوند دینلن عساکر محلیه استانبولده کی یکچیریلر و سپاهییلر کی مملکتی تخریب ایدیورلردی . ارضروم بکربیکی آرازه محمدپاشا سلطان عثمان ثانینک انتقامنی آلق بهانه سیله قلعده کی یکچیریلری قتل ایتدکن صکره باشنه اوتوز بیت کشی طوپلامش ، راست کلدیکی یکچیری و سپاهییلری اولدیره اولدیره سیواسه کلمشدی . استابوله کله جکنی ، اوجاقلیدن انتقام آله جغنی اعلان ایدیورلردی . بغدادده عسکری طاقنک مرجی اولان بکر صو باشی والی بی قتل ایتدیره رک بغداد والیلکنی الدہ ایتمش ، تأدینه دیار بکر والیسی مأمور اولدینی زمان بغدادی تسلیم ایتک وعدیله شاه عباسدن استمداد ایتمشدی . دفع بلا ایچون بغداد والیلکی بکر صو باشی به توجیه ایدلدی . فقط شاه عباس قوه کله الله کله رک بغدادی ضبط ایتدی .

نهایت مره حسین پاشانک صدارتی زماننده استانبولده کی قاریشیق صوک درجه بی بولدی ؛ آرتق بو حاله نهایت ویرمک لزومنی هرکس آکلامشدی . یکچیریلرک آرزولری اوزرینه مقام صدارته کلن مره حسین پاشانک تداییر شدیده سی نهایت یکچیریلرله سپاهییلرک اتحادنی موجب اولدی . حسین پاشا عزل ایدلدی . کانکش علی پاشا صدارته کچدی . علی پاشا بالجمله ارکان دولت و علمانی طویلا یه رق سلطان مصطفانک امور حکومت ایله اشتغالدن عاجز بولندیغنی ، اغتشاشات داخلیه نک دولت ایچون نه درجه تهلیکلی اولدیغنی ایضاح ایتدکن صکره تبدل سلطنته لزوم کوستردی . خلعت لزوم و مشروعیتی حقنده رأیلر اتحاد ایتدی . فقط تبدل سلطنت وقوعنده عسکره ایکی میلیون دوقه قدر بخش اعطاسی

لازم کلدیکی حالده خزیننه نك حالی بونی اعطایه مساعد دکلدی نهایت
عسکر بودفعه بخشش آلمقدن صرف نظر ایتدی بونك اوزرینه سلطان
مصطفی خلع اولنه رق مقام سلطنته سلطان احمدك شهزاده لرندن الكیوکی اولان
سلطان مراد رابع اون ایکی یاشنده ایکن جلوس ایتدی [۱۰۳۲-۱۶۲۳].

کوسم سلطانك اوغلی اولان سلطان مراد رابع الك
سلطان مراد رابعك
مدهش مشکلات آره سنده جلوس ایتشدی . ارتق
امرات شبره سی استانبولده صنوف عسکریه نك عصیان عادت حکمنه
کیرمش اولدیغندن برچوق سنلر یکچیریلر ، سپاهیلر انواع اغتشاشاته
سبب اولدیلر . ارکان دولت ایله والیر اطاعتسزلکه ، تخریب مملکت ایله
کسب ثروت وسامان ایلمکه آلیشمشلردی . حدود شرقیده اون طقوز
نجاق ایرانیلر طرفدن ضبط ایدلمشدی .

سلطان مراد رابع یکرمی بریاشنده والده سنك ، وکلاسنك وصایتدن
قورتولدی ؛ بوتاریخدن صکره پادشاهك نه قدر شدید الطبع ، سفك دمایه
نهمك اولدینی آکلاشیلدی . صدراعظم خسرو ورجب پاشالری عصیان
عسکرینك محرکی اولق اوزره اعدام ایتدیردی . اشقیانك تأدی ،
مصالح دولتک تنظیمی خصوصنده کی شدت و متاتی فوق العاده ایدی .
وزرا وامرای عسکریه دایما : « یا اطاعت ، یا اولوم . » دیه خطاب
ایدردی . ایلك دفعه اوله رق مفتی انخی چلبی یی ، ینه ایلك دفعه اوله رق
(کیریلوس) اسمنده کی روم بطریقنی اولدیردی . آناتولی سفرینه کیتدیکی
رمان والیر ، بککر حقنده فوق العاده شدت کوستردی . عینی شدتی
اوروپالیر حقنده دخی ابراز ایدیوردی . بدایه درت برادرینی حیانه
براقدی ؛ بالآخره برینی ، دها صکره دیکر ایکسینی اعدام ایتدیردی ؛
یالکمز دردنجی برادری ابراهیم سلطانه طوقونمدی .

واقعا سلطان مراد رابع غدار برپادشاہ عد اولنہ بیلیر؛ فقط نہ وخیم مشکلات ایچندہ بولندیغنی، نہ درجہ واسع سوء استعمالاتہ غلبہ ایتک مجبوریتندہ اولدیغنی ده اونوتما ملیدر. دولتی اصلاح ایتک، عسکری عصیانلرینہ نہایت ویرمک عزم قطعیسندہ ایدی. اموردولتک اصلاحی حقندہ مشهور قوچی بک طرفدن یازیلان رسالہ سلطان مراد رابعہ تقدیم اولنمشدی. سلطان مراد رابع امور حکومتی مستقلاً ید اقتدارینہ آلدیغنی زمان سپاہیلری، یکیچریلری آت میدانندہ طویلادی؛ شمدی به قدر عسکرك سبب اولدیغنی فالقلری تعداد ایتدکدن صکره آرتق بویله شیرایستہ مدیکنی سویلہ رک اطاعت مطلقہ ده قصور ایتیه جکلرینہ دائر قرآن کریم اوزرینہ یمین ایتدیردی. عصیانلره سبب اولان رؤسای قتل ایتدی. بلا استحقاق یکیچری و سپاهی میانہ کیرمش اولاملری چیقاردی. اصول و نظامات عسکریہ یی اصلاح ایلدی. میخانہ لری، قہوہ خانہ لری قباتدی؛ توتون استعمالنی منع ایتدی. کیجه لری تبدیلاً شہردہ کزر، اوامربنہ اطاعت ایتیمیلری درحال اعدام ایتدیرردی. سفرہ چیقدیغنی زمان غایت سادہ بر حیات کچیر، عادی بر نفر کبی حرکت ایدردی. اورتہ بویلی وغایت کوتلی ایدی. برکون وزرادن برینی قوشاغندن طوتوب برال ایله یوقاری قالدیرمشدی؛ جریدا ایله درت پارمق قالینلغندہ کی تختہ لری دلر، تفک قورشونندن دها اوزاغہ اوق آتاردی. (۱۰۴۹-۱۶۴۰) سنہ سندنہ وفات ایتدی.

سلطان مراد رابع زمانندہ کی وقایع حربیہ نک الہ

مہملری روان وبغداد سفر لیدر. صدر اعظم چرکس

پاشا بغدادی استرداد ایچون تدارکات سفریہ ده بولنورکن

وفات ایتسی اوزرینہ یرینہ تعین اولنان حافظ احمد پاشا ۱۰۳۵ سنہ سندنہ بغدادہ

روانہ وبغداد

سفر لری

کیتدی ، لکن یدی سکز آی قدر ایرانیلرله محاربه ایتدکن صکره
 شهری ضبط ایدمه دن عودته مجبور اولدی . او صروده شاه عباس
 آخسخه قلعه سنی محاصره وقارص طرفلرینه تجاوز ایتدی . ۱۰۳۸ سنه سنده
 صدراعظم خسرو پاشا ایرانیلر غلبه ایدرک همدان ، نهاوند حوالیسینی
 یغما ایتدی ، اصفهانه طوغری ایلر ایلدی . استانبولدن آلدینی امر اوزرینه
 بعده بغداد اوزرینه یوریدی ایسه ده شهری استرداد موفق اوله مدی .
 او صروده شاه عباس وفات ایتدی . رینه کچن شاه صفی غایت غدار ،
 عشرته مبتلا ، خوزیز ایدی . اون درت سنه دوام ایدن مدت حکومتی
 ظرفده ولایتده عصیانلرک تکرر ایلدیکی ، والیرک اهانت ایتدکلری
 کورلدی . ایران ینه قاریشدی . ۱۰۴۵ سنه سنده دولت عثمانیه سلطان
 مراد رابعک تدابیر شدیدیه سی سایه سنده کسب قوت ایتمشدی . پادشاه سنه
 مذکورده بالذات سفره چیقدی . شروان قلعه سنی ضبط ایتدی ،
 (آراقس) نهری کچلهرک تبریز حوالیسینی باشند باشه تخریب ایلدی .
 بعده استانبوله عودت ایلدی .

اردوی هایونک استانبوله عودتندن صکره بورالری ینه ایرانیلر اله
 دوشدی . ۱۰۴۷ سنه سنده [۱۶۳۸] سلطان مراد رابع بغداد
 کیتدی . قرق کون محاصره دن وبر چوق هجوملردن صکره بغداد فتح
 ایلدی .

ایرتسی سنه استانبوله عقد مصالحه ایلدی . روان ایرانده ، بغداد
 دولت عثمانیه ده قالدی . آلتش بر سنه دن بری دوکولن بو قدر قان ،
 صرف ایدیلن بو قدر مساعی حدود قدیمه نك اعاده سندن بشقه بر ایشه
 یارامدی . سلطان سلیم اول ایله سلطان سلیمان قانونی زماننده کی حدوده
 عودت ایدلمشدی . ایکی حکومت اسلامیه بیهوده یره قان دوکملریدی .

مراد رابع طرفندن تشبث ایدیلن اصلاحاتک ثمره
 اور موفقیت اولسی ایچون بو اصلاحاتہ قوتلی بر
 پادشاہک اوزون مدت دوام ایلسی لازم ایدی .
 حال بوکہ سلطان مراد رابعک الک کوچک برادری

سلطان ابراہیم
 دورنہ سیات
 ارارہ

واحمد اول ایلہ کوسم سلطانک الک کوچک اوغلی سلطان ابراہیم بو ایشک
 اہلی دکلدی . بالعکس دور سلطنتندہ سلطان مراد ثالثک زمانندن زیادہ
 حرم ہایون انتریقہ لری امور حکومتی اخلاص ایتدی . مجوہرات ،
 عطریات تدارک ایتک ایچون یرلی — وحقی سفرانک اعتراضاتنہ رغماً
 اجنبی — تجارک دکانلری یغما ایدلمک کبی احوال کورلدی . حرم ہایونہ
 قار یتیشدیرمک ایچون بروسہ قاضینک ہفتہ لرجہ کشیش طاغندہ وقت
 کچیرمسی ، بروسہ یہ عودتندہ یرینہ حرم ہایونندہ خدمتچی قادینلردن
 برینک محمدینک قاضیلغہ تعین ایدلمش اولدیغنی کورمسی کبی غرائب
 نادر کلدی .

قادین انتریقہ لری ، احتیاج نقد و مال ، جنبی خواجہ کبی سحر
 ایلہ اوغراشان کیمسہ لڑک تاثیراتی ، ہر نوع سوء استعمالاتدن متولد حال
 مرضی سلطان ابراہیمی ظالم و غدار یامشدر : ایرانیلرہ غلبہ ایدن
 صدراعظم قرہ مصطفی پاشا والدہ سلطانک خصومتندن طولانی ، کرید
 فاتحی یوسف پاشا کریددن ہدیہ کتیرمدیکی ایچون ، صدراعظم صالح
 پاشا بر کون سوفاقدہ کیدرکن یولی اوزرندہ بر آراہہ توقفندن حدتلتن
 پادشاہک ویردیکی امر اوزرینہ اعدام ایدلدیلر . سلطان ابراہیم ونڈیک
 ایلہ محاربہ اٹسانندہ ونڈیک دونماننک مورہ سواحلدن بش بیک اسیر
 آلدیغنی ایشیدنجہ اودرجہ حدتلندی ، کہ بتون خرسیتانلرک قتل ایدلمسنی
 امر ایتدی . شیخ الاسلام بوکا فتوی ویرمدی ، مانع اولدی . صکرہ

فرنكلرك قتلنه امر ویردی. بواراده بی ده شیخ الاسلام و صدراعظم کری
آلدر دیلر. صدراعظم سلطان زاده محمد پاشا حرم هایونده جمع ایدیلن
روس، له، مجار، فرنک جاریه لرك انترقه لری آراسنده اداره حکومتک
ممکن اوله مدیغنی اعتراف ایتشدی. مرکز حکومت بو حالدله ایکن
قازاقلر قره دکز سواحله، وندیکیلر بوسنه، دالماسیه، پلویونسه
هجوم ایدیورلر، عساکر عثمانیه کریده هزیمتله دوچار اولیوردی.
دولت عثمانیه سلطان مصطفای اول زماننده اولدیغی کبی مخاطره ایچنده ایدی.
نهایت صدراعظم احمد پاشاک سیئات اداره سی بو مخاطره بی هر کسک
آکلایه بیله جکی درجده بیوتدی؛ یکچیری امراسنک ایشه مداخله سیله
سلطان ابراهیمک خلعه قرار ویرلدی. شیخ الاسلام، قاضی عسکرلر،
اوجاق آغلاری سرایه کیدرک کوسم والدله سلطانه ایشی آکلاتدیلر؛
«پادشاهک فکر و شعوری، غدر و ظلمی دولتی تهلکیه قویدی. دشمن
بوسنه حدودنده قرق قلعه ضبط ایتدی؛ سکسان کمی ایله قلعه سلطانه
بوغازینی آبلوقه ایدیور.» دیدیلر. سلطان ابراهیمک بیوک اوغلی
او زمان یدی یاشنده ایدی. والدله سلطان یدی یاشنده بر چوجغک
پادشاهلغی جائز اولوب اولدیغنی صورتی. فکر و شعوری اداره
حکومه غیر مساعد بر پادشاهدن ایسه عاقل بروزیرک تحت اداره سنده
بولنان چوجغک مرجع اولدیغی جوانی ویردیلر. بونک اوزینه والدله
سلطان حفیدی سلطان محمدی کتیردی؛ همان کندیسنه بیعت ایدلدی.
بواجرات یکچیری آغلرینک تنسییه وقوعه کلشیدی. سپاهیلر
بوکا معترض ایدیلر. سلطان ابراهیم حیاتده قالدقجه بونلر تبدل سلطنت
ایچون قیام ایده بیلیرلردی. بونک ایچون جلوسدن اون کون صکره
سلطان ابراهیم اعدام ایدلدی [۱۰۵۸ — ۱۶۴۸].

ونديك حكومتی وقيله قبريس آطه سنی ترك ايتك
 صورتيله عقد مصالحه به مجبور اولمشدی . فقط كريد
 جزيره سی ده عینی درجه ده حائز اهمیت اولديغدن ونديك جمهوريتك
 بحر سفیده حاکمیتنی چکه مین عثمانلیر طرفدن برکون کلوب بو آطه نك
 ضبط اولته جنی شہم سزدی .

سلطان ابراهيمك جلوسندن صكره مصره واورادن حجه كيتمك
 اوزره يوله چيقان قيزلر آغاسی سنبل آغانك راكب اولديغی سفینه مالطه
 قورصانلری طرفدن ضبط ايدلدى . قيزلر آغاسی ، كمينك قپودانی
 مقتول اولدى . كمیده کی اشخاص ایله اموال قورصانلر طرفدن كریده
 کوتورلدى . اوراده مزایده علیه ایله ساتلدى . ونديك واليسنك بوكا
 مانع اولماسی ونديك لیره اعلان حربه وسیله اتخاذايدلدى . (۱۰۵۵—۱۶۴۵)
 سنه سنده ۳۰۲ سفینه ده ۷,۰۰۰ يکيچرى ، ۱۴,۰۰۰ سپاهی وسكسان
 بيك عساكر سائر اولديغی حالده دونمای هایون استانبولدن چيقدی .
 دونما وعسکر عن اصل (ژوزف مارقوويچ) اسمنده دالماجالی براسلاو
 ايکن سرای هایونده بيويه رك قپودان پاشا اولان يوسف پاشانك قومانداسنده
 ایدی . دونمای هایون (قوگوا Cogua) کورفزينه کیردی ، قره یه
 چيقان عسکر قديمآ (سیدونيا Cydonia) وعربلر نذرنده (خندق)
 ناميله معروف اولان حانيه قلعه سی اوزرينه يوریدی . ايکي بيوك هجوم
 اجرا ايدلدى ، نهايت ونديك لیر تسليم اولديلر . ونديك لیرك جانلرندن
 امين اوله رق اموال منقوله لريله چيقوب کيتملرينه مساعدده ايدلدى . حتی
 نقللری ایچون کمیلر ویرلدى . شهرک اک بيوك کلیسası اولان
 (سن نيقولا) کلیسası ایله ديكر ايکي کلیسا جامعه تحویل اولندی .
 ایرتسی سنه کريده صدر اعظم سلطان زاده محمد پاشا ، بعده بودین

بکریکی دلی حسین پاشا مأمور اولدی . محاربه یه دوام ایدلدی .
آپوقورونه ، رسمو ، کیسامو قلعهلری ضبط اولندی . بعده جزیره نك
مرکز اداره سی اولان قندییه هجوم ایدلدی . فقط بو هجوم موفقیتسز لکله
نتیجه اندی . قندییه ، کرید سفرینك باشلامسندن یکریمی بش سنه صکره
ضبط ایدیله بیلدی .

حانیه قلعه سنك ضبطی متعاقب ونديکلیلر تملك عثمانیه یه تجاوزه
باشلایه رق (پلوپونس) عسکر چیقاردیلر؛ پاتراس ، مودون ، قورون
طرفلرینی تخریب ایتدیلر وبش بیک قدر اسیر آلدیلر ایسه ده بوقلعه لر دن
هیچ برینی ضبطه موفق اوله مدیلر . بر آراق ونديک کمیلری قلعه
سلطانیه بوغازینی آبلوقه آلتنه آلدیلر ، بوزجه آطیمی اشغال ایتدیلر ،
استانبولدن و محال سائر مددن کریده امداد کوندرلمسینه مانع اولدیلر .
بویله اولقله برابر اون بش سنه قدر کرید قوماندانانغده بولان حسین
پاشا جزیره داخلنده فتوحاته دوام ایده رک یوقاریده صایدیغمز قلعهلری
ضبطه موفق اولدی .

سلطان سلیم ثانی دورندن بو زمانه قدر اوروپا
مناسبات خارجییه حکومتلریله مناسبات سیاسیّه مزه کلنجه ؛ یوقاریده
کورلدیکی اوزره دولت عثمانیه (هازی دووالوا) نك لهستان قرالغنه
اتخابنه معاونت ایتمش ، فرانسه ایله مناسبات حسنیه یی محافظه ایلشدی .
سلطان مراد ثالث زماننده فرانسه سفیری جزویتلرک غلطه ده اقامتلرینه مساعده
استحصال ایتدی . فرانسه قرالی دردنجی (هازی) بونلری فرانسه
سفیرینك حمایه سی آلتنه وضع ایتدیکندن جزویتلر پك چابوق کسب نفوذ
ایتدیلر . سلانیکده ، از میرده ، ساقزده ، ناقسوسده ، آتیه ده یرلشدیلر .
دردنجی (هازی) دن صکره فرانسه نك شرقده کی نفوذ واعتباری

آزادی؛ حتی (ریشلیو) زمانندہ بیلہ فرانسه سیاستی اسکی رونقنی بولہ مدی .
 بعض فرانسز لر ، حتی استانبولده کی فرانسه سفرا سندن بر قسمی
 اهل صلیب تصور اتندن واز چکمه مشلردی . عثمانیلر هر یرده ، دشمن
 کیمیری ، بالخاصه مالطه و فلورانسه شوالیه لرینک سفینه لری اوز ریده فرانسز لره
 تصادف اتمه لرندن طولای فرانسه یه ای بر نظر له باقاز لردی . دردنجی
 (هانری) غایت منور الفکر اولدیفی حالده ترک لک اور و پادن اخراج لرینی
 تمخیل ایدردی . سلطان احمد اولک زمانندہ قایتولا سیونلری تجدیدہ مرفق
 اولان فرانسه سفیری (صاواری دو بره و Savary de Brèvs) عثمانلی
 حکومتک اورتهدن قالدیرلمسی اسباب و وسائطدن باحث بر اثر یازمشدی .
 (ریشلیو) نک مشاور خاصی اولان راهب (ژوزف) دخی بوکبی خیالات
 ایله مشغول اولمقده ایدی .

بناء علیہ باب عالی ایله فرانسه سفراسی آرہ سنده کی مناسباتک دائما
 صمیمی و دوستانه اولدیغنه حیرت اتمه ملیدر . سفیر لک کبر و عظمتلری ،
 بعض رجال دولتک خشونت طبعی خیلی وقعه لره سبب اولمشدر .
 سلطان احمد اولک زمان سلطنتده بعض تشبثادن بولنان جزویتلرک حبس
 ایدلمرینه فرانسه سفیری مانع اوله مدی . ینہ اوزمان سفیر (هارلہی سانس
 Harley-Sancy) نک کاتبلرندن بری بر پولونیالی محبوسک حبس خانهدن
 فرار ینہ یاردیم ایتدیکی ایچون ضرب ایدلدی ، اعتراض ایدن سفیر دخی بر مدت
 حبس اولندی . سفیر (مارشویل Marcheville) ک اوغلی ینہ بر محبوسک
 فرارینی تسهیل ایتدیکی ایچون - حبس ایدلدی . بالاخره سفیر ایله
 اوغلی استانبولدن تبعید ایدلدیلر . بر ازالق قتولیک کلیسارلی قبادلدی .
 فرنکلردن سلاح طویلاندی ، جزیه آلمق ایسته نیلدی . الحاصل اوزمان
 نه سفراء نه ده رجال دولت طرفندن قاعده سیاست و نزاکته رعایت اولنوردی .

انكلتره ايله مناسباً قرايچه (اليزابت) زماندن بدأيدر. اوزمان كرك انكلتره وكرك دولت عثمانيه اسپانيا قرايلى ايكنجى (فيلپ) ك دشمنى ايدى. سلطان مراد ثالث زمانده (ويليام هاربون W. Harebone)، (ادوارد البون E. Elbon)، (ريشارد استاپه R. Stapei) اسمنده اوچ انكليز تاجرى صدر اعظم صقولى محمد پاشان عثمانلى ليمانلرندە سربستى تجارت ايچون مساعده الدير. بعده پادشاه ايله قرايچه آره سنده مخابرات باشلادی. (اليزابت) پادشاهه كوندردىكى نامه ده «حضرت عيسا نك مذهبن دن انحراف ايدن بت پرستره قارشى حامى دين حقيق اولان پادشاه آل عثمان» عنوانى يازمىدى، كه اوزمان پروتستانلر ايله قتولكلر آره سنده كى خصومتك درجه شدى كوسترر. سنان پاشا انكليز اياچيسنه: «انكليزلك مسلمان اولملى ايچون پارمق قالدروب شهادت كتيرملرندن بشقه برشى قالميور.» ديمىدى. انكلتره نك استانبول اياچيسى (هاربون) مذاكراتنده سلطان محمد ثالث خواجەسى مورخ سعدالدين افدينك معاونته مظهر اولمىدى. ايكى دولت آره سنده كى ايلك تجارت معاهده نامه سى اوزمان عقد ايدلى. سلطان مراد ثالث وعثمان ثانى زمانلرندە لهستان ايله مصالحه انكليز ايلچيلرينك توسطلريله عقد اولدى. انكلتره ايله فرانسه اوزمان دخی شرقده احراز تفوق ايچون بربرلرینه رقابت ايدى ورلردى. دردنجى (هانرى) استانبول سفيرينه يازدىغى بر مکتوبده (اليزابت) ك فرانسه نفوذى قيرمغه چالشمىندن شكایت ايتمىدى. انكليز ايلچيسى (ادوارد بورتون) اوروپا ملتارينك عثمانلى صولرنده فرانسز بايراغى آلتنده سير وسفر ايتمك مجبوريتندن وارسته قالملىنى وممكن ايسه فرانسز بايراغى رينه انكليز بايراغك اقامه سنى تأمينه چالشمىدى. نهايت؛ انكليز فرانسز بايراغى آلتنده سير وسفر و تجارت مجبوريتندن وارسته اولدير.

اسباب انحطاط

دولت عثمانیه نك دور سلیمان قانونیدن صکره باشلایان
 یادشاهد و سرزاد ^{۱۸۰۸} اسباب انحطاطی شایان تدقیق در. بوباده یازلمش اولان
 آثارك اك مهمی کوریجه لی - ویا بر روایت کوره کوملجنه لی - قوچی
 بلك سلطان مراد رابعه تقدیم ایتدیکی رساله در. رساله اونیدی عرض
 تذکره سندن متشکدر. هربری دائما شو: «سعادتلو وشوکتلو پادشاه
 جم جاء حضر تلرینك خاطر هایون فیض اثرلرینه نهان اولیه که...»
 مألنده بر فقره ایله باشلار وهان دائما: «... حقیقت حال بودر. باقی
 فرمان پادشاه دین پناه حضر تلرینکدر.» فقره سیله ختام بولور. فقط
 بومتواضعانه سوزلر آره سنده دولت عثمانیه ده جاری اولان سوء استعمالاته،
 بوسوء استعمالاتی ازاله ایچون اتخاذه لازم کلن تدایره، پادشاهک بونلره
 چاره ساز اولغه مجبور بولندیغنه دائر غایت سربست برلسان ایله ایضاحات
 ویرلمشدر. قوچی بك فنا لنگ مسیبلری مقربان وندماء پادشاهی اولدیغنی
 آچیقجه سویلکدن چکینه مش، یالکز حسب الادب حرم هایونك
 مداخلات و تزویراتی قبالی کچمشدر. ایشه، اسباب انحطاطمزی بورساله دن
 تدقیق ایده جکز:

سلیمان قانونینك وفاتندن محمد رابعك جلوسنه قدر اجرای سلطنت
 ایدن سکز پادشاهدن اوچی اردوی هایونك باشنه کچرك حرب میدانلرنده
 بولنشلردر. بونلرده «خاچ اووه» محاربه سنده بولتان سلطان محمد ثالث،

(خوتین) قلعه سنی محاصره ایدن سلطان عثمان ثانی، بغداد و روان سفرینه کیدن سلطان مراد رابعدر . صوك اوچ پادشاهدن دخی یالکمز سلطان مراد رابع جنگاور، اردویه بحق قوماندایه مقتدر ایدی . بوسکز پادشاهک اکثری چوجق ایکن تخت سلطنته کچمشلردر . سلطان احمد اول و عثمان ثانی اوندرت، سلطان مراد رابع اون ایکی، سلطان محمد رابع یدی یاشنده جلوس ایتش اولدقلرندن وزرانک واکثریا حرم هایونک وصایتی تحتند بولمشلردر .

عثمانی شهزاده لرینک تحت چیممازدن اول آلدقلمری طرز تربیه دخی اسباب انحطاطدن بری ایدی . شمیدییه قدر بتون شهزادگان، حتی پادشاه اولملری محتمل بولمیانلر بیله فعال برحیات کچیرلر ؛ عسکره قوماندان، ایالاتی اداره ایدرلردی . سلیم ثانی ایله محمد ثالث ایالاته کوندریلن صوك شهزاده لردر . بوندن صکره ولی عهد ایله دیگر شهزادگان سرایده قالدیلر ؛ حرم آغالرینک ، لالالرك یدتربیه لرینه تودیع ایدلدیلر .

عسکرلرینه کورونمین پادشاهلری تبعه، حتی وزرایله کوره میورلردی . پادشاهلر آرتق امور اداره یی بالذات رؤیت، دیوانه ریاست ایتمورلر ؛ شکایتیلری استماع، لازمه عدالتی بالذات اجرا ایلیمورلردی . شکایتیلرینی پادشاهه اسماع ایده مین تبعه دوچار ظلم و غدر اولیورلر ؛ ظالملر جزاسز قالیورلردی . خصائل کزیده سنی غائب ایدن عسکر دائما فساد، اطاعتسزلکه مهیا ایدی ؛ قیمت حربیه سنی کوندن کونه غائب ایدیوردی . وزرا ایله بکلربکی و سنجاق بکلری آرتق پادشاهک نظارت مخصوصه سندن آزاده قالدقلرندن ایستدکلری کبی، منفعترینه الویردیکی طرزده اداره امور ایلیمورلردی .

الکفنا برجهت دخی پادشاهلرك وزرا ورجالی حسن انتخاب ایده مهملری

ایدی . سلیم ثانی پدرندن میراث قالان اعظم رجالی استخدا ایتشدی . محمد ثالثدن اعتباراً صدراعظم لک نفوذ واهیتلری تناقصه باشلادی . بوصدراعظم ابراهیم وصقوللی محمد پاشا لک بیوک ذوات اولسه لر دخی آرتق اداره حکومته مقتدر دکل ایدیلر . حرم هایون قادی نلرینک ، آغالرینک نفوذی ایله انتخاب ایدلر کلدن بونلرک النده آلت حکمنده ایدیلر . قوچی بک رساله سنده ک زیاده اهمیت ویردیکی ، مکرراً ایضاح ایدیلدی بر نقطه حرم هایونک ، سرائیک صدارته عائد اموره مداخله ایتمه سی ایدی . صدراعظم پادشاهک وکیل مطلق اولدیغندن مستقل اولمق ایجاب ایدردی . حال بوکه حرم هایون اداره حکومته کوندن کونه دهها زیاده مداخله ایتکده ایدی . سلطان سلیمان قانونی زماننده بیله حرم هایون ایله مقام صدارت آره سنده اختلاف ، رقابت واردی . ابراهیم پاشانک اعدامنه خرم سلطان سبب اولمشدی ؛ رسم پاشا خرم سلطانک دامادی ومطیع بنده سی اولدیغی ایچون مقام صدارته کتیرلمشدی .

بویله حرم هایون نفوذیله رأس کاره کلن صدراعظم موقعلرینی محافظه ایچون مملکتک حرم طرفندن یغما وتخریب ایدلمسنه مساعده ایدییه لرردی . پادشاه آرتق حکومتی اداره ایتدی کندن و صدراعظم دخی مستقلاً ایفای وظیفه دن منع اولندیغندن حکومت خادم زنجیره ، صاتون آغوش اسیرلره کچمش دیمکدر . حکومت بویله اللره دوشنجه یکچیری ، سپاهی او جاقلری ، صنف علما تغلب ایتدی . آرتق مملکت اغتشاشات داخلیه دن ، «آنا رشی» دن قورتیله مدی . منابع واردات قوروددی . اردو بوزولدی ، حکام و علمانک قدر و شرفی آزالدی ، تبعه نک صبر و صداقتی توکندی .

رعایادن تحصیل اولنان ویرکولر کیتدجه آرتیور ؛ تغشیش مسکوکات ، عوارض رسومی ، خواص هایون التزاماتی سوء استعمالاتی تریدا ایدیوردی .

کویلدی بارکران تکالیف آلتنده ازیلمکده ایدیلر . قوچی بک دیورکه :
 « ۹۹۰ تاریخنه کلنجیه قدر رعایا فقراسندن هر برنفر باشنه قرقر ، الیشر
 آچه جزیه ، قرقر آچه خانه عوارضی ، ایکی قیوندن بر آچه رسم
 آلیرکن شمدی میری ایچون یالکزر برنفردن ایکشر یوز قرقر آچه ،
 هر خانه عوارضندن اوچر یوز آچه ، هر قیوندن یدیشر سکزر آچه
 آلنور ... والحاصل شمدیکی حالدہ رعایا فقراسنده اولان ظلم وتعدی بر
 تاریخده ، بر اقلیمده وبر پادشاه مملکتنده اولماشدر . ممالک اسلامیه دن
 بر مملکتده ذره قدر بر فردہ ظلم اولسه روز جزاده ملوکدن سؤال اولنور .
 وکلادن صورلماز . وآنره سپارش ایتدم دیمک حضور رب العالمینده جواب
 اولماز . آه سرد مظلومان خانمانلر خراب ایدر . اشک چشم درمندان دنیایی
 غرقاب فنا ایدر . کفر ایله دنیا طورر ، ظلمله طورماز . عدالت طول
 عمره سبیدر وانتظام احوال فقرا پادشاهلره موجب جنتدر . »

ارکان دولت یوقاریده بیان ایدیلن طرزده قلمش ؛
 یالکزر ابن کمال وابوالسعود کبی بیوک ذاتلرک اشغال
 ایتدکلری مقام افتا کسب اهمیت ایدرک مفتیلر صدر اعظملرله هم رتبه
 طوتولمش ، قبودان پاشاقلی مناصب دولتک اک بیوکلری میاننه کیرمش ،
 امور مالیه باش دفتردارلق مقامنده جمع ایدلمشدی .
 سقوللی اون بش سنه امور سلطنتی مستقلاً اداره ایدرک وفات
 ایلدکن صکره مقام صدارتده صیق صیق تبدلات وقوعه کلمکه باشلادی .
 وزیرلر صدر اعظم اوله بیلیمک ایچون طرف سلطنته ، حرم هایونه ،
 مقربان پادشاهییه تقدیم هدایا ایدرلردی .

وقتیله بریره سردار اوله رق کوندریلن وزرا وامرانک اموال غنائمن
 پادشاهه هدیه تقدیم ایتلمری عادت ایدی . حتی بارباروس بر دفعه سفر

عودتندہ اوموزلرنده برر پستال چوقه ايله ايكي بيك اسير، كذلك اوموزلرنده برر كيسه آچه ايله ايكي يوز، اللرنده كموش تپسي ايچنده آطلس كيسه لرله بيكر آلتوني حامل يوز غلام وينه اللرنده آلتون تپسيلر ايچنده اينجي ومرجان تسييحر، كردانقحر، آلتون قدحرلر وسائر اشياي نفيسه يي حامل ايكي يوز جاريه تقديم ايتمشدى. يواش يواش سفر عودتي واموال غنائم قيدي برطرف اولدى؛ استانبوله كلن وزرا وبكربكيلر هديه تقديمه باشلاديلر. حتى سلحدارلقدن مصر واليسى اولان ابراهيم پاشانك قبه وزراتيله استانبوله دعوت اولنديغى زمان سكسان بيك مثقال آلتوندن مصنوع مرصع برتخت، آلتون ومجوهرات ايله مزين اسلحه وآت طاقملى واشياي سائر اوله رق تقديم ايلديكي هدايايه يكرمي كره يوز بيك آلتون قيمت تقدير ايدلمشدر كه زمانمز حسابنه كوره بر مايون ليرادن فضله در. صدر اعظم سنان پاشا كلخانه ده انجلى كوشكى بنا ايتديكي زمان عظيم برضايف ترتيبيله وكيتلى مرصعات ايله برلكده تقديم ايتمشدى. عيديه ونوروزيه ناميله هداياي رسميه تقديمي دخى معتاد حكمنه كيرمشدى.

بعض وزيرلر فوق العاده زنكين ايديلر. از جمله رستم پاشا كنديسيه زوجه سى مهرماه سلطان نامنه ادرنه قپوسنده، اسكدارده، زندان قپوسى جوارنده، از ميده جسيم جامعلر، مدرسه لر، خانلر ياپدير دقندن وبونلرك اوقافنى تنظيم ايلدكن صكره حين وفاتنده ۳۰۰,۰۰۰ كيسه آچه لك مخلفاتى قالمشدر. قيليچ على پاشا استانبوله مشهور اولان جامعى بنا واوقافنى ترتيب ايلديكى حالده وفاتندن صكره ۵۰۰,۰۰۰ آلتون نقدى چيقمشدر. فاتح يمن سنان پاشانك استانبول، آناتولى، روم ايلي، عربستان ويمنده ابنه جسيمه اوله رق يوزى متجاوز مبراتى وانلرى

اداره به کافی اوقافی وار ایدی. حتی زمانده عقلره حیرت ویرن ثروتی کورن جهلا پاشایی سیمیا سایه سنده آلتون یایمق یولنی بولمش صانیرلردی. والیک ایله طشرده بولسان شهزاده لره ۳۲، صدر اعظم لره ۲۰ [بعضاً ۳۰]، قبه وزیرلرینه اوز، اون بشر، نشانچی، دفتردار، رئیس کبی رجاله اوچر دردر یوک آچه خاصی تخصیص اولتوردی. بر یوک زمانمز حسابیله اللی بیك غروش ایدر ایه ده اوزمان مأ کولات وحوایج سائر جه شیمدی تصور ایدمه جکمز درجه به واران او جوزلنی، وزرا معیتده کی آدم لرك حیقتلکرده کچیندک لری نظر دفته آلتدینی تقدیرده بو تخصیصاتک چوقلنی آکلا شیلیر.

الحاصل، سلیم ثانی و مراد ثالث دورلرنده زینت، دارات و احتشام کوندن کونه آرتدی. حال بوکه وقتیه بویه دکلدی. یاوز سلطان سلیم سلطان غوری اردوسیه قارشی قارشی به کلدیکی زمان کندی عسکرینی دمیره، مصر عسکرینی زر وزینته مستغرق کوره رک حیرت ایتمش و بردفعه شهزاده لری سلطان سلیمان پک سوسلی لباس ایله حضورینه کیرد کده: «سلیمان، آنک نه کیسون؟» دیمش ایدی. قوچی بک سلطان سلیمان و زراسندن احمد پاشانک بش آلتی یوز کوله سی و آکا کوره اسلحه و مهمات سفریه موجود اولدینی حالده ایکی کورکی اولوب برینی دیوانده، برینی خانه سنده کیدیکنی یازیور.

وقتیه بکلربیکی و سنجاق بکلری اوزر، یکر میشر سنه و بلکه ده ا زیاده منصلرنده قاهره بک چوق آثار خیریه و تنظیلات ملکیه به موفق اولور. لرکن بالاخره رکاب هایونده وقوعه کلن تبدلات سریعه بونلرده سرایت ایتدی؛ بر مأموریتک اوچ بش سنه تبدلاتدن وارسته اولمسی شاذ حکمنه کیردی. بنابرین امرا به قدرتسزک، معصومیت ممالکه

نقصان کلمکہ باشلادی . مأمورلر انواع ارتکاباتہ متجاسر اولدیلر . رشوت
 آلوب ویرمک جرم صایلمدی . صدراعظم رستم پاشا ایچون : « رشوتسز
 منصب توجیه ایتمز ، انصافی ده الدن براقماز » دیرلردی . حتی بعض
 مورخلر من پاشانک انصافی بیان ایچون بر دفعه ارضروم بکلربکی طر -
 فدن ۵۰۰۰۰ آلتون تقدیم اولندقدہ « ارضروم منصبک بوقدر آلتونه
 تحمیلی یوقدر ، دیه اوچ بیکنی آلوب ایکی بیکنی اعاده ایتدیکنی یازارلر .
 صقوللی زماننده بو آلیش ویریشه نهایت ویرلدی . فقط اونک وفاتندن صکره
 رشوت اودرجه ایلری کیتدی که اقسام وانواعنی تعداد ایتک ممکن دکلدرد .
 حتی قسطمونی حکمداری اسفندیار اوغللری سلاله سندن اولوب سلطان
 مراد ثالث مصاحبی بولنان مشهور شمس پاشانک برکون غایت بشاشته
 یالیسنه کلوب سببی سؤال ایدلده : « بوکون سلطان مراد حضر تلرینه
 بیوجک بر رشوت قبول ایتدیردم . بعدما بولدت دماغ سلاطینده مستقر
 اولور وانتظام دولتک انحلالنی ایجاب ایدم رک بو صورتله بن دخی اجدا -
 دمک انتقامنی آلمش اولورم . » دیدیکنی « کنزالاخبار » یازیور .

وقتیله رجال دولت صرهمسیله قطع مراتباید وهربری طشره لرده ،
 سردارلر معیتده احوال ملکیه وحریه یه کسب ووقوف ایلر ایکن مؤخرأ
 نازونیم ایچننده پرورده اولان وزرا وکبار زاده لر ، طرف و تقریبی
 بوله بیلنلر بیوک منصبلره کچمکه باشلادیلر . سلحدار ، چوقدار ، رکابدار
 و میراخورلر دفعه وزیر اولورلردی . قاعده بوزولدقن صکره یکیکچری
 آغالغندن نشانچی ، نشانچیلقدن قودان پاشا اولانلر دخی کورلدی . وزیرلر
 چوغالدی . حال بوکه اصلنده منصب وزارت طرف پادشاهیدن رخصت
 کامله یی متضمن اولدیغندن وزرا فرمان یازمغه و طغرا چکمه مآذون
 ایدیلر . سلطان ابراهیم زماننده بو مآذونیت استرداد اولندی .

بکربکی و سنجاق بکترینک وظیفه‌لری مملکتک آسایشنی تأمین ،
 زیراداره‌سندده قلعه وارسه اونلری محافظه ایتک ، محلول اولان تیمار
 وزعامت‌لری اهل واربانه توجیه ایتدیرمک ، سفر مأمور اولدیغی زمان
 زیراداره‌سندده‌کی دیرلک اصحابنی جمع ایله تعیین اولنان یره کیمک ایدی .
 مواد حقوقیه ایله شهر و قصبه‌لرک معاملات خصوصیه‌لری حکام
 شرعه ، مراتبات میریه‌نک جایت و تحصیل دفتردار و محصل‌لره مودوع
 ایدی . بالاخره امرایه مدار تعیش اولان خاصلرک اکثری رفع والفا
 اولنه‌رق مقاطعات میریه‌یه الحاق ایدلدی . بو ایسه مظالم و تعدیاته رسماً
 رخصت و یرمک دیمکدی . بناءً علیه بکربکی و سنجاق بکبری درلو درلو
 مظالم ایله جمع‌ماله باشلادیلر . اهالی‌یه عیناً و بدلاً برچوق و یرکولر طرح
 ایتدیلر . محلول اولان زعامت و تیمارلری هر کیم زیاده رشوت و یررسه
 اوکاتوجیه ایتدیردیلر . زیر اداره‌لرنده بولنان زن‌کینلری بررسبیله مضادره‌یه
 قویولدیلر . بعضاً انصافی بتون بتون الدن براقانلر ایچون اهالی طوپلانیر ؛
 اونلری مملکتدن چیقاریر و یا پارچه‌لار ، یاخود رکاب هایونه شکایت
 ایدرک دیوان هایونده محاکمه‌لری اجرا اولنور ایدی .

سلطان بایزید ناینک اواخر سلطنتنده امور مالیه‌جه

امور مالیه

مضایقه حاصل اولمشدی . یاوز سلطان سلیم جلوس

ایتدیکی زمان بعض تجاردن استدانیه مجبور اولمش ایکن مصرک فتحندن
 صکره کلیتی نقد ادخار ایتشدی . حتی « آلتون ایله طولیدیردیغ آنبارلری
 اخلافدن هر کیم آچقه ایله املا ایده‌بیلیرسه کندی مهریله مهرلسون
 والا خزینه هایون بنم مهرم ایله مهرلسون » دیه وصیت ایلدیکندن
 اندرون خزینه‌سک سلطان سلیمک مهریله مهرلمسی عادت اولمشدی .
 سلطان سلیمان زماننده دولت پک‌زیاده بیودیکی، تزینات و احتشامات ایله

برابر مصارف عسکریه آرتدیخی ، پادشاه خیرات و مبرات معلومه لرینه خزینه لر صرف ایلدیکی حالدده مشکلات مالییه تصادف ایدلمه مشدی . فقط ۹۷۳ سنه سنده سیکتوار سفرینه عزیمتده سرای هایونده بولنان بعض آلتون و کموش اوانیدن سکه ضرب اولنمشدی . اوسنه نك طوغریدن طوغریه خزینه دولته کیرن وارداتی ۱۸۰,۰۸۸,۰۰۰ و مصارف ۱۸۹,۶۵۷,۰۰۰ آچه اولدیغنه کوره آلتی یوز اللی بیک کسور آچه آچیق بولنیور دیمکدی .

صقولای زماننده امور مالییه ضررسز کچدی . اونك وفاتندن صکره عساکر موظفه نك تکثری ، اتلافات و اسرافاتک تزایدی سبیلریله امور مالییه مختل اولدی . علوفه لری وقت وزمانیله ویرمک ممکن ارله مدی . هر نه قدر مراد نالک اواخر سلطنتده (۱۰۰۱) واردات ۲۹۳,۴۰۰,۰۰۰ آچه به بالغ اولدی ایسه ده مصارف دخی ۳۶۳,۴۰۰,۰۰۰ آچه به چیقیدن آچیق ۷۰ میلیون آچه بی بولدی . وارداتک آرتمی اسبابی بروجه آتی ایدی : اولاً ؛ جسیمجه زعامت و تیمارلر محلول اولدجه ارباب استحقاقه توجیه اولنمیوب مقاطعات میریه نامیله خزینه دن توقیف و سنه دن سنه به ملتزم لره الزام و بدلاتی ایراد قید اولمغه باشلادی . بو صورتله ایالات عسکرینک تشکیلاتی بوزولدی .

ثانیاً ؛ ادنا ، اوسط و اعلا اعتباریله آلفقه اولان جزیه به نصف درجه سنده ضم ایدیلرک اولکیسی ۱۵ ، ایکنجیسی ۳۰ ، اوچنجیسی ۴۵ آچه به ابلاغ ایدلدی .

ثالثاً ؛ وفات ایدن وزرا و امراتک مصادرات نقودیه سی بر واردات غیر مقررده حکمنه کیردی .

رابعاً ؛ مسکوکاتک وزن و عیاری تنقیص اولندی .

سلطان مراد ثالث ایچ خزینه ده پك چوق پاره ادخار ایلش اولدیغدن ۱۰۲۶ تاریخه قدر مصارف سفریه تسویه حتی سلطان احمد جامی کی مبانی جسیمه انشا ایدیلرک مضایقه مالیه او درجه حسن ایدله مشدی . فقط تاریخ مذکورده سلطان مصطفی ، اوچ آی صکره سلطان عثمان ، درت سنه صکره ینه سلطان مصطفی و بر سنه صکره سلطان مراد رابع جلوس ایدرک بش سنه ده درت دفعه جلوس بخششی ویرلمکله برابر سلطان مصطفانک والده سی اشقیای تلطیف و اوغلنک سلطنتی تقویه فکریله خزینه یی عصات عسکریه به بذل و اسراف ایلدیکندن نقود مدخره قالمدی . سلطان مرادک جلوس بخششی بعض تجار و اغنیادن استدانه و سرایده بولنان آلتون و کموش اوانیدن سکه ضرب ایدمک صورتیه ویریه بیلدی . هر جلوس بخششی تقریباً ۳۰۰ میلیون آچه ایدی [*] . سلطان مراد واردات دولتی یغما ایتمکده اولان اشقیای عسکریه یی تأدیب ایتدکن صکره امور مالیه ینه یولنه کیردی ؛ فقط سلطان ابراهیم زماننده و سلطان محمد رابعک اوائل سلطنتده اموال دولت شونک بونک دست تغلبه کیردی ؛ مصارف مهمه تسویه ایدیه مز ، علوفه ویریه مز اولدی . بعض ینسز دفتردارلر خزینه یه کلن پاره یی صرافلره اعطا و مقابلند ، زیوف آچه اخذ ایدرک بونک فضله سنی فائده ظن ایتدیلر . عسکره ویریلن زیوف آچه یوزندن درلو رزالتلر ، عصیانلر وقوعه کلدی . امور مالیه کوندن کونه قنلاشدی ، قاریشدی . او درجه ده ، که مثلاً طشره لرده عساکر مستحفظه ضابطلکنه مخصوص زعامتار دعاکو وظیفه سی نامیه له شیخ نامنی طاقینان بر طاقم قلاشلره ، سرسریلره تخصیص ایدلدی .

[*] او زمانک بر آچه سنی حاوی اولدینی گوشه نظراً زمانمک برغروشی ، فیأت اشیایه نسبتله ده لاقل اوچ غروشی اوله رق حساب ایتیلدر .

دعا کو وظیفہ سنی ایجاد ایدن سلطان مراد ثالث در . سلطان مراد ، زمانندہ پک زیادہ شہرت و اعتبار قازا امش اولان شیخ شجاعک ولایتہ قائل اولدیغندن کرک اوکا و کرک امثالہ اوقاف سلاطیندن ، کمرک و سائر اموال امیریہ دن دعا کو وظیفہ لری تخصیص ایتدی . صکرہ ، بو اصول کیتدجہ بیودی . دائرہ سلطنتہ و بالخاصہ حرم آغالیہ ، حرم هایونندہ کی فادینلرہ انتساب ایدن سرسریلرہ پک چوق وظیفہ تخصیص اولندی . کوپرلی محمد پاشا مصارف زائده یی قطع و واردات خزینہ یی مجرای صحیحہ ارجاع ایتدیکی صرہ دہ بو دعا کو وظیفہ لری دہ قطع و یا تنقیح ایتدی . اوزمان شیخ سالم اسمندہ بر مغربینک یومی بیک آچہ وظیفہ سی واردی . کوپرلی بونی نصفنہ ایندیردیکی وقت شیخ النده کی براتلری یرہ آتوب « بونلری بکا پادشاہ و یردی ، سن فصل قطع ایدیورسک ؟ » دیہ باغیرمش و درحال اعدام اولمشدی . ایشته بو شیخک دعا کو وظیفہ سی قبریسده لفقوشہ قلعه سنک یرلی آغالغہ ، یعنی عساکر مستخفظہ ضابطہ لکنہ مخصوص اولان زعامت ایدی .

کوپرلینک ہمتیلہ ایکنجی ویانہ محاصرہ سنہ قدر مشکلات مالیہ برطرف اولمش ایکن صکرہ ینہ ظهور ایتدی .

۱۰۶۴ تاریخندہ تنظیم اولنان طرحونجی لایحہ سندہ دولتک ۱۴،۵۰۳ کیسہ وارداتی ، ۱۶،۴۰۰ کیسہ مصارفی بولندیغندن ۱،۹۰۰ کیسہ آچینی اولدیغنی و برحق سنہ لک واردات تداخلدہ بولندیغنی محرردر . فقط بو موازنہ دہ محرر واردات و مصارف طوغریدن طوغریہ خزینہ یہ کیرن و خزینہ دن چیقان مبالغ اولوب بونک خارجندہ دہا پک چوق واردات و مصارفات و ارایدی ، کہ امور مالیہ مزى آکلامق ابچون بونلری بیلمک اقتضا ایدر :

اولاً. — مصر ارسالیه سیله اردل ، افلاق ، بغداد ، راغوزه کبی
کبی ممالك ممتازه ویرکولری ، معادن حاصلاتی ، اموال غنائم ، ووزرا و امرانک
مخلفاتی طوغریجه ایچ خزینه یه وضع اولندیغدن سالف الذکر موازنه
دفتردن خارجدر .

ثانیاً . — سرای هایون ایله صنوف عسکریه تعیناتی ایچون اهایلیدن
آلنان اوندهلق اغنامی ایله پرنج وسائر داخل دکلدر .

ثالثاً . — بتون وزرا ، رجال و کتبه نك ، طشرده بولنان بکلربیکی
وسنجا بکلرینک خاص ، زعامت ، خرج و مخصصات یومیله لری اولدیغدن
وطریق علمیه رجالنک مواتیق شرعیه دن واردات مقررله لریله صدور
وموالی معزوللرینک آرپه لقلری بولندیغدن خزینه دولتن بولنره معاش
ویرلزدی . « عوارض » و « بدل نزول » نامیله اهایلیدن آلنان ویرکو
حاصلاتی کوپری ، طریق کبی شیرک تعمیر وانشاسنه ، منزل بارکیری
وسائر بونک کبی مصارف بلدیهنک تسویه سنه صرف اولتوردی .

رابعاً . — قلعه لرده بولنان مستحفظ و بیوک شهرلرده اولان قیوقولی
نفراتنک علوفه لری اوجاقلقلرندن ویرلدیکی ایچون بوده موازنه دن خارج ایدی .
خامساً . — زعامت و تیمار صاحبی اولان کلیتلی سواری عسکرینه
وحدود محافظلرینه خزینه دن هیچ برشی ویرلمز ؛ بالعکس مضایقه مالیه
زمانلرنده بولنلردن « بدل تیمار » نامیله برویرکو آلینیردی .

سادساً . — ترسانه مصارفنک [۱،۶۰۰ کیسه] نصفی خزینه دن
ویریلیر ، نصفی ترسانه اوجاقلقلرندن آلینیردی .

سابعاً . — مملکتک هر طرفده پک چوق جامع ، مدرسه ، مکتب ،
کوپری ، خان ، حمام کبی ابنیه خیریه و نافع انشا وصولر اساله ایدیلرک
بولنرک اداره سی ایچون اوقاف حسیمه تخصیص اولنمشدی . بعض مهم یول

و کوپرلرک تطہیر و تعمیر ایچون جوارنده بولسان کوپلر ویرکودن معاف طوتولدیغدن اونلرده وظیفہلرینی ایفا ایدرلردی . بنابرین دولتک بودجهسندہ اوقاف ، معارف و نافعہ تخصیصاتلرینہ لزوم یوقدی .

بالمناسبہ ذکر ی کچن مصادره اموال ایله اوقاف حقدہ دخی بعض معلومات اعطاسی فائده دن خالی دکدر : وزرا وامرانک اموالی مصادره اولنلق دیمک بونلردن برینک اموال واملایک تماًماً آلتق وعیال واولادی سوقاغہ آتیللق دیمک دکدی . وزرانک چوغی زنکین اولدقلرندن ودائرہ لری لدی الاقتضا قوللانیلق اوزرہ کوچک بر اردو حکمنده بولندیغدن حین وفاتلرنده نقود موجودہ ایله بعض ذیقیمت اشیاء اسلحہ ، حیوانات ، چادیر کی مهمات سفریہ حکومتجہ آلتوب ورثہ سنہ املاک و عقار و سائرہ دن کچنہ جکلری درجہ اموال ترک اولنور و مدار تعیش بر اقیان وزرا وامرانک اولادلرینہ طرف دولتن معاش اعطا ایدیلردی . مثلاً کوپرلی زادہ فاضل احمد پاشانک وفاتندہ بیک کیسہ قدر نقدی خزینہ یه آلتوب اموال واملاک کلیہ سی برادر و همشیرہ لرینہ انتقال ایتشدی . مرزیفونی قرہ مصطفی پاشانک بتون نقود و اشیای مصادره ایدلیدی حالہ اوغلی علی پاشا دیوان یولندہ کی مدرسه و متفرعاتی باباسنک قتلدن صکرہ انشا ایتدیرمشدی . بونلرک خارجنده اولہرق بر صورتلہ تغلب ایدہ رک بیوک ثروتلر جمعہ موفق اولان بعض کیمسہ لرک بتون نقود و اموالی بعضاً مصادره اولنوردی . مثلاً ، جنجی خواجہ وزرا وامرادن آلدینی رشوتلر ، پادشاهدن آلدینی احسانلر ، اوقافدن تخصیص ایتدیردیکی وظیفہ لر سایہ سندہ بر ثروت عظیمہ جمع ایتش ایدی . بو ثروت مصادره اولنہرق امور دولتہ صرف ایدلدی .

مع مافیہ بالا آخرہ مصادره مشلہ سی سوہ استعمالہ اوغرادلدی .

مأمورین و ملتزمیندن ، بلکه دولت ایشلرینه هیچ قاریشمیب کندی تجارت و زراعتیله کسب ثروت ایدن اغیادن وفات ایدنلرک اموالی بررنام و وسیله ایله مصادره اولمغه باشلادی . بوبایده نه قدر ایلری یه واریله جغنی ایکنجی جلدده کوره جکز .

اوقافه کلنجه ؛ اسلافک اوقاف ترتیب ایتلمی مجرد مصادره قورقوسندن نشأت ایتدیکی و ماللرینی اولاد و احفادلرینه ایراد براقق مقصدینه مبتنی بولندیکی اکثریا بیان اولنور . بلکه واقفلرک ایچنده بویله لری ده واردر . فقط بوسوز اکثریت حقنده طوغری اوله ماز . محافظه املاک قیدی اولسه یدی بتون اوقافده خیرات و مبراتک آز و عقار و مسقفاتک چوق اولسی اسباب ایدردی . حال بوکه حقیقت بو مرکزده دکلدر . مثلاً ، کوپرلی محمد پاشا استانبول ، بوزجه آطه ، لمنی ، یانوه ، وارات ، وزیر کوپری ، کیوه ، قسطنیونی و سائر یرلرده متعدد جامع ، مدرسه ، مکتب ، خان ، حمام یاپیدردندن بشقه کلیس طرفنده یولجیلرک تأمین امنیت و راحت ایچون قلعه لر بنا ایدوب مستحفظلرینک وظائفنی کندی وقفندن تخصیص ایلمشدر . اوغلی فاضل احمد پاشا دخی قندیه ، اویوار ، قانیجه ، بلغراد و سائره موقعلرده جامع ، مدرسه ، مکتب ، خان و حمام کبی مبراتدن بشقه یالکیز ازمیرده قرق قدر چشمه ، متعدد کوپری ، خان ، چارشی و حماملر یاپیدرمشدر . بو عقار ملکاً وارثاً برادری فاضل مصطفی پاشا ایله همشیره لرینه قالدینی زمان مصطفی پاشا ورثه سائره حصه لرینی بالاشترا « قرداشم بونلری وقف نیتیه یاپدیرمش ایکن تسجیلنه وقت بوله مامشدر . » دیهرک وقف ایلشدر . بو کبی مثاللرک چوقدر . دارالسعاده و قیو آغلاری کبی اولادی اولیان ذواتک پک چوق خیرات وقف ایتمش اولملری ده تنظیم اوقافده کی مقصده دلالت ایتزمی ؟

واقعا اوقافك جملہ سی حلال پارہ ایلہ یاپیلمامش ایسہدہ ہرنہ صورتلہ جمع ایدیلن ثروتك اسراف وسفاہتدن ایسہ مواد خیریه یہ صرفی بالطبع مرجحدر . اخلاف وقتیلہ یاپیلان بومبراتی تعمیر وحسن محافظہ ایتمدکری ایچون مواخذہ یہ شایان اولمشلردر .

اوقاف خصوصندہ جالب دقت اولان بر جہتدہ استانبول ، ادرنہ وبروسہ کی شہرلردہ جامع شریف انشاسندہ لزوم واحتیاجك درجہ سی نظر دقتہ آلتنامش اولمسیدر . برسوء استعمالدہ اراضینك وبعض ویرکو۔ لرك وقف ایدلمسیدر . تشکیل دولتدہ خدمتی کوریلن امرانك قیلیجلریلہ فتح ایتمدکری مملکتلرنندہ عہدہ لرینہ بررمقدار اراضی تملیك ایتدیرہرك وقف ایتمدکری واقع وبونلرہ بردیہ جك اولمدینی بدیہی ایسہدہ صکرہ لری بعض کیمسہ لر عمار ومسقفات انشا ایدہ جککری بردہ زعامت ، تیمار ومقاطععات معریہ یہ مربوطیتی اولان اراضی یی و حتی «کیالیہ» ، «قطاریہ» ، «باچ بازار» کی رسوماتی بیلہ کنڈیلرینہ تملیك ایتدیرہرك وقف ایشلردر، کہ بونلر وقف صحیح اولمدیغندن «تخصیصات قیلندن اولان اوقاف» نامیلہ یاد اولنور . مع مافیہ بونلرك ایچندہدہ بعض معقول اولانلری واردر .

وقتیلہ امام ، حاکم و مدرس لر اڈزیادہ علم وقدم صاحبی **طریقہ علمیہ** اولانلر آرہسندن انتخاب اولنورلردی . بونلر لاینگزل کی ایدیلر . ابوالسعود افندی بتون مدت حیاتندہ مقام افتادہ بولنمشدی . استقبالرندن امین اولدقلری ایچون حیاتلرینی تحصیل علمہ ، نشر عدالتہ حصر ایدرلردی . بالآخرہ رتب علمیہ یہ سوء استعمال قاریشدی ؛ عادتاً صاتیلمغہ باشلادی . ہیئت علمایہ جاہلار قاریشدی . شیخ الاسلامر ، قاضیسکرلر بلاسبب عزل ایدیلر اولدیلر . علما وحکامك قدر وقیمتی

آزادی. و قتیله علما « بر ماده ده امر حق بودر دیسه لر هر کس سمعاً و طاعة دیر ایدی؛ کیمسه نك مخالفته زهره سی یوقدی.

واردات دولتک باشلیجه سی عشر حاصلاتی ایدی. **اداره اراضی** واقعا بو واردات خاص، زعامت و تیمار صورتیله وزیریه، امرایه، بندکانه و تیمارلی سپاهیدنه؛ وقف نامیله مبرات و خیراتک اداره سنه و نشر معارف خصوصه؛ یورتلق و اوجاقلق نامیله حدود محافظلرینه؛ ینه اوجاقلق نامیله بعض قلعه لرك یرلی نفراتنه تخصیص ایدلمشدی. فقط بو تخصیص و تقسیم سببیه دولت وکلایه، رجال دولته، مأمورین اقلامه بالجمله طشره والی و مأمورلرینه معاش ویرمکدن وارسته اولدقدن بشقه بلامصرف ۱۴۰,۰۰۰ قدر سواریه مالک ایدی. بونک ایچون اداره اراضینک قانون دائره سنده جریاننه پک زیاده اعتنا اولنمشدی.

حتی بر ارضک وقفه، یاخود بر خاصک زعامته و بر زعامتک تیماره تحویلی لازم کلیرسه اراده مخصوصه پادشاهی اوزرینه نشانچی بولنان ذاته خطاباً تصحیح قید امری صادر اولور؛ نشانچی دخی بو امر موجبنجه دفتر خاقانی قیودینی کندی قلمیله تصحیح و آلتنه امضاسنی وضع ایدر؛ بو بابده کی فرمانک طغراسنی مطلقاً صدر اعظم چکر ایدی. کرك امور مهمه یه، کرك دعوالره دائر صادر اولان فرمانلرك طغرالرینی قبه وزیرلری دیوان هایونده چکدکری حالدله اراضی توجهاتنده دکل، حتی تصحیح قیدنده بیله بو حقتک یالکیز صدراعظمه عائد اولمسی اداره اراضیه ویریلن اهمیتک درجه سنی کوسترد.

دولتک قانون قدیمی موجبنجه اراضی اوزرنده ایکی درلو تصرف جاریدر. برنجیسی اراضینک حق زراعتیدر. طاپو سندیه بو حقه متصرف اولان کیمسه لر اراضی بی زراعت و آنکله تعیش ایدرلر. ایکنجیسی اراضی

محصولتک عشر شرعیسی آلمق، محلول اولدینی زمان اواراضی نی طالبنه تفویض ایتک، فراع وانتقال وقوعنده معین اولان خرجی آلهرق طابو سندی ویرمک حقدرو. بو حق دولته عائددر. فقط دولت بو حقی خاص، زعامت و تیمار صاحبلینه اعطا و تقسیم، یاخود بعض خیرات و مبراتہ وقف اولمق اوزره تخصیص ایتشددر.

شو حالده برکویک اراضیسی طابو سندلریله سکسان یوزکشینک عهده تصرفنده بولنور. او قریه نیک بتون اراضیسی اوززنده دولته عائد اولان حقوق عشریه برسپاهینک تیماری، یاخود بززعیمک زعامتی ویا بر میرلوانک خاصیدر. یاخود خیرات و مبراتدن برینک وقفیدر.

اراضینک حقوق عشریه سنه متصرف اولانلره « صاحب ارض، دنیلیر. اهایلدن بری تارلاسی صاته جق اولسه صاحب ارض حضورنده تقریر ویرمسی، صاحب ارضک اذنی اولمسی لازمددر.

« دیرلک » مدار تعیش دیمکدر. دولت طرفندن ویریلن هر نوع عارفه یومیه، خاص، تیمار وزعامته « پادشاه دیرلکی » دنیلیر.

صاحب ارض دیرلکی داخلنده محلول اولان اراضی نی، زراعتدن خالی اولان یرلری طابوی مثیلله طالبلرینه تفویض ایدر. فقط کندی عهده سنده آلیقویه ماز و بشقه قضا اهایلسنه صاته ماز. چونکه کندی عهده سنده آلیقویه بیلسه بالاآخره کوی چیفتلک اوله بیلیر؛ بشقه یرلر اهایلسنه صاته بیلسه کویلی مضایقهیه دوشه بیلیر. فقط تفویض ایدیله جک اراضی پک بیوک بر چیفتلک اولوبده کوی اهایلسنکده اراضییه احتیاجی اولمازسه اوزمان صاحب ارض بشقه یرلر اهایلسنه ویره بیلیر.

بر مملکت فتح ایدلدیکی زمان هرکویک حاصلات شرعیسی ونفوس مقداری، قاج خانه دن عبارت اولدینی، هر قضانک مستقلاً ویا مشترکاً

استعمال ایلدکلی اورمان و مرعالر قید اولنوردی . مثلاً ، برسنباجلک یوز یوک آقچه حاصلات عشریه سی اولسون و بوسنباجده دیرلکک هر نوعی بولنسون فرض ایدلم . بو حاصلاتک یکر می یوکی خاص ، اون یوکی زعامت ، قرق یوکی تیمار ، یکر می یوکی اوقاف ، اون یوکی اوجاقلق و یورتلق اولمق اوزره تقسیم ایدیایردی .

حاصلات مقیده سی یوز بیك آقچه دن زیاده اولان دیرلکه خاص دنیلیر . پادشاهه ، سلاطینه مخصوص حاصلردن ماعدا وزرا ، بکلربیکی ، میرلوا و سایر بندکانه عائد حاصلرا ونلرک منصبلرله قائمدر . یعنی هر منصبک متصرفی معین اولان خاصنده تصرف ایدر .

هر خاص صاحبی سفر وقوعنده قاچ یوز بیك آقچه خاصی وار ایسه هر بش بیك آقچه سی ایچون برجه لو کوتورمه که مجبور ایدی . بوسورتله اون یوک آقچه خاصی اولان بزکلربیکی اسلحه سی مکمل ، حرب و ضربه قادر ایکی یوز جبه لو ایله سفره کیدردی . فقط اکثرا بر بکلربیکی ویا میرلوا خاصنه نسبتله بورجلی اولدینی چپه لونک برقاچ مثلنی سفره کوتوریر و بو حالده « قپوسی مکمل » تعمیریه شایان تقدیر کوریلور ایدی .

حاصلات مقیده سی ۲۰,۰۰۰ دن ۱۰۰,۰۰۰ آقچه یه قدر اولان دیرلکه زعامت دنیلیر . زعیملر هر بش بیك آقچه ایچون بر جبه لو کوتورمک مجبوریتنده ایدیلر .

لکن زعامتلر هر ایالت مرکزنده بولنان خزینه و تیمار دفتردارلرینه ، زعامت کتخدالرینه ، هر سنباجده اولان آلا ی بکنه ، قلعه محافظلرینه ، رکاب هایونده بولنان قپوجی باشلره ، خواجکان دیوان هایونه ، دفترخانه ، خزینه عامره ، دیوان هایون قلمی کاتبلرینه دخی توجیه اولنور و پک بیوک برجایتلری ظهور ایتدکجه عهدملرندن آلنه مازاندی . بناءً علیه قید حیات ایله مقید ایدی .

حاصلاتی ۳,۰۰۰ دن ۲۰,۰۰۰ آقچہ یہ قدر اولان دیرلکہ تیمار دنیلیر . ایلک اوچ بیک آقچہ یہ « قلیج تیماری » تعبیر اولنور . هر تیمار صاحبی قلیج تیمارندن صکره هر اوچ بیک آقچہ ایچون برجه لو کوتورمکه مجبور ایدی . مثلا طقوز بیک آقچہ تیماری اولان سپاهی کنديسیله برلکده ایکی جبه لو کوتوریر ایدی . تیمار صاحبیرینک دیرلکیرینک بولندیفی سنجاقده متوطن اولمسی مشروط ایدی .

تیمار اوچ درلو ایدی : ۱ . — اشکینچی تیماری . بونک متصرفلری آلائی بکنک بایراغی آلتنده مأمور اولدقلری سفره اشرلردی . تیمارلرک چوغی بونوعدن ایدی . ۲ . — مستحفظ تیماری . قلعه محافظلرینه عائد تیمارلر ایدی . ۳ . — خدمت تیماری . بعض سمر حدلرده بولنان جامعلرک امام و خطیبلرینه ، سرای هایونلر خدماتنه مخصوص ایدی . حتی سرایه مثلا سنوی اوتوز بیک سنبل صوغانی کتیرمک ، شاهین و سائر قوشلری تدارک ایتمک ودها بونک کبی ایشلری کورمک ایچون مخصوص تیمارلر واردی .

بعضاً دخی بالذات پادشاهلر بعض سپاهیلرک امکدارلرینه متصرف اولدقلری تیمارلری تملیک ایدرلردی . بو حالده او تیمارلر ورثه یہ میراث قالیردی .

بر تیمار ویا زعامت محلول اولدقده متوفانک حرب و ضربه قادر اولادی وارسه اوکاویریلیر ایدی . اگر چوجنی صبی ایسه ایفای خدمته مقتدر اولنجه یہ قدر جبه لو کوندرلمک شرطیله توجیه ایدیلیردی . بلاولده وفات ایدن دیرلک اصحابنک تیمار ویا زعامتی جبه لوردن مستحق اولانه — بکلربکیلرک تذکره لری اوزرینه صادر اولان برات ایله — تفویض اولنوردی . فقط تیمار ایسه مثلا اون بش بیک ، زعامت ایسه اوتوز قرق بیک آچمک

بولنديني حالده ايجانبه كوره تيمارك اوچ بش بيكي، زعامتك يكرمي يكرمي بش بيكي
توجيه اولنه رق اوست طرفلري شايان مكافات كوريلن ديرلك صاحبلىرینه
ترقى صورتيله تقسيم قلديردى . بويه ترقيزلره برساھينك تيمارى يكرمي
بيك آچھي تجاوازايدرسه زعامت اعتبار ايديليردى .

يوزسنده بركره عمومآ تحريرمالك قانون اقتضاسندن ايدى . فقط سلطان
سليم ثانى زماننده ختام بولان تحريردن صكره بردها بومعامله اجرا
ايديله مەمشدى . سالف الذكر ترقيزلر سبيله ديرلكلر حصه لره آرتمش ،
باخصوص مرور زمان ايله ديرلكلر كاوى اولديني اراضيده معموريت
ويا خرابى وقوعه كلهرك حاصلات مقيده سى آرتمش ويا اكسيلمش
اولسنه مبنى براتلرده يازيلان پاره برامى اعتبارى ايدى؛ يالكز حصه دارانه
تقسيم حاصلاتى ارأه ايجون برميزان حكمنده قالمشدى .

بر سنجاق ويا ايالك اشكيني زعيملىرى و تيمار صاحبلىرى سفره
مأمور اولديني زمان هم كويلرني محافظه، هم ده آرقداشلىرىك ديرلكلىرى
اموريني تسويه ايلك ايجون اونده برى مملكتلرنده قوروجى قالير ؛
ديكرلىرى كيدردي . اشكيجيلر مأمور اولدقلىرى سرعسكر ك معينه
وصولرنده يوقلمه اولنورلر ، كرك ديرلك صاحبلىرى و كرك جبه لولرى
آيرى آيرى دفره قيد ايديليردى . فلان سپاھى ويا فلان جبه لو فلانجه
باشانك دفترليسيدير ، دنيليردى كه سفرده اثبات وجود ايتمش ديمكدر .
اكر سرحدلرده قيشلامق لازم كليرسه هر سنجاق سپاھيلرى ايجلرندن
بشمر اونر آدم انتخاب ايدوب « خرچلقچى » ناميله ، يعنى تيمارلىرى
حاصلاتندن كنديلرينه خرچلق كتيرمك اوزره مملكتلرينه كوندريرلردى .
چونكه بونلره سفرده بولندقلىرى مدتجه بيله معاش و تعين كچى برشى
وبرلمزدى .

پک اختیار و عمل ماندہ اولانلری تیمارلرینک ترقیاتی مساعد ایسه آنکله تقاعد ایدیله رک قلیج تعیر اولنان و وظیفه حربیه یی شامل اولان اساس تیمار بشقه سنه تفویض قلنیردی . بوضورتله یکیدن مصرف آچیلمه دن هم بر آدم تقاعدہ نائل اولور ، همده عسکرک عددینه نقصان کلزدی . بو باده کی قانونلر پک منتظم و بر چوق فائده یی متضمن ایدی :

اولا ؛ سفرلر نه قدر اوزون سورر ، تلفات نه قدر چوق اولسه تیمارلی سپاهیسندن بر نفر اکسیلمک احتمالی یوقدی . چونکه بر تیمار حملول اولورسه اون طالبی بولنوردی .

ثانیاً ؛ تیمار صاحب لرینک اکثری ابا عن جد مملکتلرینک ضابط و محافظی و اوجاق زاده سی ایدیلر . اہالی بونلری بیوک کورمشلردی . کندیلری ده خاندانقله مفتخر صاحب قدرت کیمسلر ایدی . بنابرین کوی و قصبه لرینک محافظه سنه مقتدر ایدیلر . اجانب و اشقیاء تجاوز ایتدیکی زمان درحال اہالینک ایشہ یارارلرینی طویلا یوب دشمنی دفعہ چالیشیرلردی .

ثالثاً ؛ بونلرک اولادلری بابالرینه خاف اولہ بیلیمک حقنی استحصال ایتک ایچون وقت صباوتلرنده آتہ بینمک ، اساعہ قوللانق خصوصلریله اشتغال ایتدکلرندن بینجیلکده ، سلاحشورلقده کسب مهارت ایدرلردی . رابعاً ؛ بونلرک منافعی دیرلکاری داخاندہ بولنان چیفتجیلرک زراعتلرینی تکثیرہ وابستہ اولدیغندن محتاج اعانہ اولان اہالی یہ تخم و حیوانات اعطا ، زراعتدن خالی محل قالماسنه اعتنا ایدرلردی . بوندن بشقه کندیلری ایچون حیوان یتیشدیرمکہ مجبور ایدیلر . بناء علیہ ممالک عثمانیہ نک معموریتی ، دینج و قوتلی حیوانلر یتیشمسی خصوصندہ چوق فائده لری کوریلور ایدی .

الحاصل محلول دیرلکمر حرب و ضربه قادر و اصحاب حیثیت و ناموسدن اولان ، ملازمک ایلہ خدمتی مسبوق بولنان مستحقینه توجیه اولنورکن سلطان سلیمان زماننده بکمر بکیلردن خسرو پاشا رشوت ایلہ ویرمک سیئہ سنہ پیشوا اولدی . بوندن صکرہ قوانین موضوعه یواش یواش بوزولمغه باشلادی .

سلطان مراد زماننده ایران سرعسکری اوزدمیر اوغلی عثمان پاشا محلول اولان تیمار و زعامتلی کندی توابعنه توجیه ایتدی . ایالتلر اهالیسی دعوایه قیام ایتدکری زمان : « بنم آدملم بنمله برابر بونجه سفرلرده بولنش و پادشاه دیرلکنه کسب استحقاق ایتشد . » جوابی ویردی . نهایت ، محلولاتک نئی پاشانک منسوبیننه ، ثلثانی ایالتلی ملازملره توجیه ایدلدی . قوچی بک بومعامله نک ایلک اوکجه وقوعی عثمان پاشایه اسناد ایدر . فقط صقولی محمد پاشانک آغلاری عهده سنده تیمار و زعامتلی بولندیغنی ، حتی سلطان مراد ثالث صقولی بی تحقیر ایتکه باشلادیغنی زمان آغلرندن اون یدیسنک عهده سنده کی زنکین تیمار و زعامتلی خواص هایونه آلهرق مقابلنده حاصلات مقیده سندن آز واردات براقان چوروک تیمارل ویردیکنی دیگر تاریخلر یازیورلر . شوخالده وزرا دائره لرنده کی آدمیره دیرلک توجیهی ، یعنی قانونک بوزولسی ده اول وقوعه کلش دیمکدر . واقعا او وقتک طرز اداره سنجه هر وزیرک دائره سی بر مکتب حکمنده اولدیغندن لیاقت و استحقاقی مشاهده اولنانلره دیرلک توجیهی حد ذاتنده فنا بر حرکت دکلدی . حتی قوچی بک سالف الذکر اوزدمیر اوغلی عثمان پاشانک آدملی یمن و ایران سفرلرنده بک چوق خدمات حریبه ده بولنده قلرندن اولنرک استحقاقلرینی تصدیق ایدیور . لیکن پادشاه دیرلکنه نائل اولانلرک آرتق افندیلرینک دائره سنده قالمیوب دیرلکک بولندیغنی سنجاقده

ایفای خدمت ایتملری قانوناً لازم ایکن بوکا رعایت اولمندی . دیرلکه نائل اولانلر وزرا وامرا دائره لرنده قالدیلر . تیمارلی سپاهیسی آزالدی . ۱۰۰۱ سنه سنده سرحدلرده اسکیسی قدر عسکر بولمندی .

کرك خواص هایونك ، كرك خاص وزعامترك عشری تعیین ایدیلن امینلر معرفتله تحصیل ایدیلرکن رستم پاشا خواص هایونی التزامه ویرمک بدعت مخربه سنی ایجاد ایتدی . بوفنا اصول خاص وزعامتره ، اوقافه اراضیسنه ، حتی تیماره بیله سرایت ایلدی .

منتزملر دیرلک صاحب لری کبی سنن آتیہ حاصلاتنک تکثری قیدنده اولدقلرندن زراعه درلو درلو ظلم وتعدییه باشلادیلر . بوحال خرابی مملکتک باشلیجه برسبی اولدی .

دها صکره لری ایش بسبتون چیغرنندن چیقدی . بوبابده کی تفصیلات ایکنجی جلدده کوریه جکدر .

اوجاقلق ترسانه مصارفه ، یاخود برقلعه مستحفظلرینک ویا بر شهر یرلی نفراتنک علوفه یومیه لرینه قارشیلق اوله رق تخصیص ایدلمش بر قاچ قریه ویا بر قضا حاصلات عشریه سنه دنیلیر . بونلر دیرلک کبی اداره اولتوردی . فقط اوجاقلق اعشاره منحصر اولیوب جزیه ، میزان حریر ، کمرک کبی بعض رسوماتدن دخی تخصیص ایدیلردی .

یاوزسلطان سلیم ایران حدودی اوزرنده بولنان بعض یرلری کرد امراسنه یورتلق و اوجاقلق نامیله توجیه ایتشدی . بونلر ارضینک واردات شرعیه و عرفیه سنی آلیرلر ، حدودی محافظه ایدرلر ، سفر وقوغنده سرعسکر معیتده بولتورلردی . دیرلکلری اوغلرینه ، اوغللری اولمدیخی حالده منسوب اولدقلری عالهدن منابنه توجیه ایدیلردی .

نکبت و عسکر پرده وقتيله يکيچريلر مطلقاً دوشيرمه اطفالندن عجمي اوغلانلري عسکر پرده قشله سنده يدي سنه تعليم و تربيه کوريلنلردن آلييردي **سوء اسماوات** وخارجدن يکيچري يازلق محال ایدی . بو بابده ياوز سلطان سليمک مصر سفرنده اوغلنک يکيچري يه آلمسني استرحام ایدن تاجره جواني و سلطان سليمانک سيکتوار سفرنده حيواننک کني تعمير ایدن يکيچري نقرينه معامله سني تخطرايتمک کافيدر . سلطان مراد ثالث زماننده يکيچري نظاماتنه صورت معلومه ده ايلک خلل ايراث ايدلدکن صکره برحامي بوله بيلن و يارشوت و یرن کيمسه لرك اوجاغه داخل اولمري ايچون برمانع قالمدي . مراد ثالثک جلوسنه قدر بتون يکيچريلر - عجمي اوغلانلريله برلکده - آنجق يکرمي بيک کشي ايکن ۱۰۰۰ تاريخندن براز صکره ۴۸,۶۸۸ کشي يه و علوفه لري ۱۱۱,۱۷۲,۵۲۶ آچه يه بالغ اولدي .

اوجاغک نظامي بوزولدقن صکره منتسين کروهي افنديلرينک يانلرنده اوتورير ، برقسيمي آليش و یريش ايله مشغول اولور؛ فقط خزينه دولتن بونلر جدا عسکر ايمش لکي علوفه چيقاردی . دولتک عسا کر منتظمه سي بوزولدي . علوفه لريني تاديده دن خزينه عاجز قالدي . دوشيرمه اصولي الفا ايدلدي . بوندن ده برچوق مضرات حاصل اولدي .

دوشيرمه اصولي الفا ايديلنجه ، اقوام عيسويه نك اك فعال عنصر لري ، کنجلري آرتق خدمت عسکري يه کيره مدکلرندن ايلاتده شقاوت چوغالدي . طريق شقاوتيه سلوک ایدن آدملره اسلاو عنصرينک بولنديني مملکتلرده (هيرق) و (هايداماق Haïdamak) ، روملرک بولندقلري مملکتلرده (قله فت Clephte) ديرلردی .

شقاوته مانع اولمق ، بوني ازاله ايتمک ايچون حکومت خرستيانلره مسکون بعض نواحی و قرايه برنوع تشکيلات سياسي ، اهالي سنه سلاح

طاشیق خقی ویردی . بلغارستان جہتلرنده بولنان بوکبی نواحی وقت
سفرده اردوی هایونه عسا کر معاونه ویرلردی . روملرک ساکن اولدقلری
(آغرافا) ، (اولیپ) طاغلرنده دخی بوکا مشابه تشکیلات واردی .
بورالرده کی قصبات وقراده مسلمان قاضیسی ایله روم متره پولیدی و برنوع
میلیرس دیمک اولان عسا کر محلیه قوماندانی اداره امور ایدرلردی .
بو قوماندانلره (آرماتول Armatole) ، افراده (پالیقاریه) دنیلیردی .
کرک یکچیریلرک ، کرک دیگر اوجاقلرک ۱۰۰۰ تاریخندن صکره
وقوعه کلن حادثات فجیعده نه مهم رول اوینادقلری تخطر ایدیلیرسه
تشکیلات عسکریه ده کی سوء استعمالک نتایجی تقدیر ایدلش اولور . هله
سپاه دنیلین سواری اوجاقلرینک کاه منفرداً ، کاه یکچیریلرله مشترکاً
یابدقلری زوربالقلرک حدو حسابی یوقدر .

سواری اوجاقلرینک منبعی دخی دوشیرمه اصولی ایدی . سلطان سلیمان
سفرلره کیتدجکه سواری بلوکلرندن ۳۰۰ کشتی ملازم نامیله آریلیر ،
دائرہ هایون محافظه سنده و شمدیکی تعبیرایله یاورلک خدمتده قولانیلیردی .
سفردن عودتده مکافاة بوملازملره بعض سلاطین اوقافی تولیتلری ، جسیمجه
مقاطعات میریه نک برسنه لک اداره سی ، جزیه تحصیلی کبی خدمتلر ویریلیردی .
بواصول یواش یواش قانون حکمنه کیردی . سپاهلر خدمات ملکیه
منافعندن والتزامجیلقدن لذت آلدیلر ؛ ایچلرینه برچوق بیانجی قاریشدیغندن
تریه لری بوزولدی ؛ سلطان مراد ثالث زماننده ایکی دفعه دیوان هایونه
هجوم ایتدیلر . بیک تاریخندن صکره سپاهلردن برچوغی سفر اولسون
اولسون هر سنه ملازم یازیلیرلر ، خدمت نامیله خدمات ملکیه و دیوانیه
طالب اولورلر ، قبه وزراتنه ولسکه صدارته قدر بزم حقمزدر دیرلر ،
وکلای دولته ایتدکلری اذا وجفا قالمالزدی .

سلطان عثمان وقعه‌سنة سبب اولانلر سپاهلر ایدی. اولا سلطان مراد رابع، دها صکره کوپرلی محمد پاشا بونلری ایجه ازدیله؛ اوجاقلرنده اعتبار برآمدیلر.

۷

دور رجعت

محمد رابع ارابل سلطنتده کی اغتشاشات
 یاشنده جلوس ایتدیکی زمان
 کوسم و زمانه سلطاندر

[۱۰۵۸] حکم و نفوذ بیوک والده‌سی کوسم ویا ماه پیکر سلطانده ایدی. والده‌سی ترخان سلطان ایکنجی درجه‌ده حائر اهمیت ایدی. کوسم سلطان حکم و نفوذی یکچیری و سپاهی رؤسایله تقسیمه مجبور اولمشدی. بونک ایچون صورت دائمده امور دولته مداخله ایدن صنوف عسکریه‌نک مناسبتسز احوالی او درجه آرتدی، که سلطان مصطفای اول زماننده کی «آنارشی» ینه حکمفرما اولمغه باشلادی. صدراعظم‌لر، شیخ‌الاسلام‌لر، رجال دولت و علما عاصی عسکرک‌النده اویونجیاق کیدی. عاصیلر ایستدکلرینی عزل و اعدام ایتدیریورلر، ایستدکلرینی مقام اقتداره کتیریورلردی. ۱۰۵۸ دن ۱۰۶۶ تاریخنه قدر سکر سنده صدارت اون اوچ دفعه تبدل ایتمشدی. بو صدراعظم‌لر ایچنده طرخونجی احمد پاشا کی واردات و مصارفات دولتک منتظم بردفترینی، یعنی مفصل بودجه یاپه‌رق اصلاح امور دولت اوغورنده افنای حیات ایدن برذات بولندیفی مثللو ابشیر پاشا کی اشقیالقدن کلن بر جاهلک مقام صدارتده درلودرلو اجراءات قانون سگمانه‌یه جرأت ایلدیکی مشلهده ایدلمشدر.

امور حکومتہ نظارت ایدن بیوک والدہ سلطان ایلہ دائماً عصیانہ
 مہیا اوجاقلر آردہ سندہ وظیفہ سنی حسن ایفا ایدہ جک بر صدر اعظم
 بولنہ مازدی . سلطان محمد رابع ہنوز چوجقدی . سرایدہ اندیسنہ
 تعلیم ایدیلن سوزلری تکرار ایدوب طور یوردی . اطاعتسزک ، مقام
 سلطنتہ حرمتسزک اودرجہ دہ ایدی کہ سلطان محمد رابع برکون ، سرای
 ارکانک تعلیمیلہ ، قاضی عسکر عزیزاقدی یہ : «ایشیتدم ، رشوت آلیورمش .
 نیچون آلیورسکنز ؟» دیدیکی زمان عزیزاقدی : «جانم افندم ، بونی
 سکا کیم اوکرتدی ؟» جوابی ویرمشدی .

آناطولیدہ والیر عصیان ایدیور ، رؤسای اشقیا میدانہ چقیور ،
 اہالیٰ مطیعہ ایسہ ازلیوزدی . حیدر اوغلی ، قاطرچی اوغلی ، کورچی
 عبدالنبی کبی ارباب شقاوت اردولر طوپلایورلر ؛ اوزرلرینہ کوندریلن
 عسکری مغلوب ایدیورلردی . پایتختدہ جسور وجرأتکار اولان
 یکیکچریلر عصاتہ قارشی وقوعہ کلن محاربہ لردہ فراردن بشقہ برشی
 دوشونمورلر ؛ قندیہ قلعہ سی اوکندہ قوماندانی محاصرہ پی رفعہ مجبور
 ایدیورلر ؛ بر محاربہ بحریدہ سفینہ لری براقوب قاجیورلردی .

قاریشیققلق اودرجہ آرتدی ، کہ سرایدہ ترخان والدہ سلطان طرفدا-
 رلری ایلہ کوسم سلطان طرفدارلری آردہ سندہ دہشتلی بر رقابت وخصومت
 حاصل اولدی . کوسم سلطان یکیکچریلری عصیان ایتدیرمک ، کیجہ لین
 آچیق براقیلان سرای قبولرندن ایجری یہ آلمق ، ترخان سلطانی اولدیرتمک
 ایستدی . فقط ترخان سلطانہ طرفدار اولان آغالر کوسم سلطانی قتل
 ایتدیلر . آلتی پادشاہ زمانندہ صاحب حکم ونفوذ اولان بو قادینک
 حیاتی بوصورتلہ ختام بوللی .

امور دولت ترخان سلطانک تغلی زمانندہ دخی یولندہ کیتمدی .

ایکی دفعه مقام صدارتہ کلن سیاوش پاشا : « بو صدر اعظمق دکل ، حرم آغالرینک تحت تحکمنده بر اسارتدر » دیوردی . نہایت ، بونی یارہلی محمد پاشانک زمان صدارتندہ آق دکرہ چیقاریلان دونما قلعہ سلطانہ بوغازی جوارندہ ونديک کیلرینہ مغلوب اولدی . دشمن لینی بی ، سمندرکی ، بوزجہ آطہ بی ضبط ایله بوغازی قیادتدی . اغتشاشات داخلہ یہ بو مغلوبیت دخی منضم اولتجہ استانبولده تلاش آرتدی ؛ بوغازک قیالی اولسی پاتخت ایچون بیوک بر تہلکہ ایدی ؛ حال بوکہ صدر اعظم یدی قلعہ دیوارلرینی بیاضلاتمق کی تداییر اطفال فریبانہ دن بشقہ برشی یاپہ میوردی . ایشته بویله بحرانی بر زمانده والدہ کتخداسی مشہور معمار قاسم آغا طرفدن والدہ سلطانہ توصیہ ایدیلن کوپرلی محمد پاشا اسمندہ بر اختیار وزیر مقام صدارتہ کلدی [۱۰۶۶ — ۱۶۵۶] .

کوپرلی محمد پاشا صدر اعظم اولتجہ اولای زوربالغی صوک
 کوربیلر دوری :
 درجہ یہ واردیر مش اولان صنوف عسکریہ بی تأدیب
 امورال داخلہ
 ابتدی و بو خصوصہ بیوک بر جسارت کوستردی .
 بر دفعہ یکچیریلر ، سپاہیلر ، طوپچییلر ، جبہ جیلر بر دفعہ عصیانہ حاضر .
 لشمردی ؛ کوپرلی رؤسای عساکدن آلتش کشی بی بی پروا اعدام
 ایتدیرہ رک عصیانک اوکئی آلیویردی ، ونديکلیلرہ قارشی وقوعہ کلن
 بر محاربہ بحریدہ یکچیریلردن بعضیلری کیلردن قاجد قلردن محمد پاشا
 کتخدالرینی ، امرادن یدی کشی بی قتل ایتدیردی . تیمار وزعامتله عارض
 اولان سؤاستعمالاتی ازالہ یہ ہمت ایتدی . بتون آناطولی بی وروم ایلی سپاہیلرینک
 حقوق تصرفہ لرینی یکی باشدن تدقیق ایتدیردی . یکچیری اوجانک
 انحطاطنہ شدتلی تدبیرلر ، صیقی نظارتلر ایله مانع اولدی .
 ۱۰۶۸ سنہ سندہ صدر اعظمک اجراءات شدیدہ سندن قورقان ، اشقیاء

لقدن یتیشن حلب والیسی آ بازہ حسن پاشانک تشویقیلہ اون بش قدر بککر یکی وپاشا عصیان ایتدیلر ؛ آناتولیدہ کی اشقیا دخی بونلرہ التحاق ایلدیلر . کوپرلینک عزانی ، اعدامی ایستورلردی . صدر اعظم اوزمان اردل سفرندہ ایدی . محاربہ دن عودت ایتدکدن صکرہ همان بتون عصیان ایدن والیری اعدام ایتدیردی ، آناتولی یی اشقیادن تمیزدی ؛ عربستانہ قدر زردہ اشقیا وارسہ جملہ سنی بر طرف ایتدی .

کوپرلی محمد پاشا صدر اعظم اولدینی زمان ونڈیکیلر قلعه سلطانیہ مدخلنی ، بوزجہ آطہنی ، سمندرکی ، لیمنی یی ضبط ایتشلر ؛ پاتختی محاصرہ ایدیورلردی . کوپرلی استانبولده آسایشی اعادہ ایدر ایتمز تدارکات سفریہ یہ باشلادی ؛ بالذات قلعه سلطانیہ یہ کیتدی ؛ ونڈیکیلری وجعتہ ، بوزجہ آطہنی ، لیمنی یی تخلیہ یہ مجبور ایتدی . قلعه سلطانیہ بوغازینی یکی استحکامات ایلہ تقویہ ایلدی .

الحاصل اجراءات شدیدہ سیلہ یواش یواش ادارہ دولتی یولہ قویدی . وفات ایتدیکی زمان یرینہ کچن اوغلی فاضل احمد پاشا دولتی سکون ایچندہ بولہ رق واسوار معاہدہ سنک عقدی وکریدک اکمال فتی کی موفقیاتہ نائل اولدی .

مناہبات خارجه : اردل یکی (ژورژ راقوچی) افلاق وبغدان اردل وقایعی وآوسریا بککریلہ قازاقلری دولت عثمانیہ علیہندہ اتفاقہ تحریک ایتدیکندن کوپرلی محمد پاشا اردلہ کیتدی . (راقوچی) نک یرینہ اردلہ (اقوش بارچای Acatius Barczay) ی ، (قسطنطین سربان C. Serban) ک یرینہ افلاقہ بر روم چیلنسکیرک اوغلی اولان (میخنہ Mihnea) یی ، بغدانہ دخی (یورکی کیفا) یی بک تعین ایتدی .

(راقوچی) مقاومت چالیشدی ؛ (لیا) ده بر فرقه مزی مغلوب ایتدی ؛ فقط کوپرلی به مقاومت ایده مدی .

افلاق بکی (میخنه) دولت عثمانیه دن (راقوچی) علیمه استعمال سلاح ایچون امر آلدینی حالد به العکس بویارلری، معتبران مملکت عثمانیلره قارش عسایه تشویق ایتدی . (ترغوویشته) ده محافظلری اولدیردی ؛ یرکوککی ، ابرائیل قلعه لرینی آلدی ؛ بغداد بکنی (یاش) ده مغلوب ایدرک مرکز اداره سی ضبط ایلدی . بونک اوزرینه سر عسکر تعیین اوانان قبودان دریا کوسه علی پاشا افلاقه کیره رک (میخنه) ایله متفی اولان (راقوچی) یی مغلوب ایتدی . افلاق (یورکی کیکا) یه ، بغداد (استفان) ه ویرلدی . مملکتین و اردل قطعه لرینی قاریش دیران بو وقایع مجارستان حدودنده آوستریا حکومتیه بعض اختلافات ظهورینه دخی سبب اولدی . آوستریا کندی اراضی سی تانارلرک تجاوزندن محافظه ایچون (راقوچی) ایله عقد ایتمش اولدینی مقاوله نامه موجبجه مجارستان حدودنده کائن بعض قلعه لری اشغال ایشدی . حالبوکه (راقوچی) نک بویله بر مقاوله نامه عقدینه صلاحیتی اولمدیغندن دولت عثمانیه قلاع مذکور نک استردادینه تشبث ایتدی ؛ بونلرک باشلیجه سی اولان (وارات) قلعه سی کوسه علی پاشا طرفندن ضبط اولندی [۱۰۷۱]

اوصره ده آوستریا سفیرینک بیاناتنه اهمیت ویرلمدی . (وارات) یاخود (غروس و ارادین) قلعه سی ضبط اولدینی زمان سفیر خرستیان دول بریه و بحریه سنک بالاتحاد ممالک عثمانیه به هجوملری احتمالی کوپرلی به ایما ایتمشدی . صدراعظم : « پادشاهم نه آتشدن قورقار، نه ده صودن . قوتنی آکلامق ایستیورلر سه بتون دولتلر برلشوب ممالک شاهانه به هجوم ایتکده سربستدرلر » جوابی ویردی .

فرانسہ ایلہ

مناسبات

سلطان مراد رابع زمانندہ استانبولدن طرد ایدیلن
فرانسہ سفیری (مارشویل) کیرینہ (ژان دو لاهی
Jean de la Haye) تعیین اولمشدی . اوصردہ مالطہ
شوالیہ لری عثمانلی کیمیرینہ تعرض ایتدکلری کبی فرانسزلردخی جزایر وتونس
جهتلرینہ تعرضدن خالی قالمدقلرندن سفیر ایلہ باب عالیٹک مناسباتی پکده
دوستانہ دکلدی . (دولاهی) کوپریلدن اولکی صدر اعظملردن بری
اولان درویش پاشایہ (آراس) قلعه سنک اون اوچنجی لوئی طرفدن
ضبط ایدلدیکنی تبلیغ ایتدیکی زمان حسن قبولہ مظهر اولہ مامشدی .
کوپریلینک صدارتندہ بو مناسبات دہا زیادہ فٹالشدی . (دولاهی) صدر
اعظم لک صیق صیق تبدلی نظر دقتہ آلہرق کوپرلی محمد پاشا صدر
اعظم اولنجہ معتاد اولان ہدایای تقدیم ایتہ مشدی ؛ بالآخرہ محمد
پاشانک مقام صدا تہ تقریرنی کورہ رک تقدیم ہدایاہ قرار ویردی
ایسہدہ صدر اعظمک حدتی تسکین ایدہ مدی . صدر اعظم کریدہ
عثمانیلرہ قارشی محاربه ایدن ونڈیکیلر آرہ سندنہ برحق فرانسزلرک
بولمسنہ حدتلیوردی . ونڈیک حکومتک خدمتندہ بولنان آمیرال
(غرمونویل Grémonville) ک سفیرہ کوندردیکی شیفرہ تحریرات
(ورتامون Vertamont) اسمندہ بر فرانسز طرفدن چالینہرق صدر
اعظمہ ویردی . محمد پاشا اولاسفیرک اوغلندن ، بعدہ بالذات سفیردن
شیفرہ ک حلنی ایستدی . جواب رد ویرملری اوزرینہ ایکسینی دہ
ضرب ایتدیرہ رک حبس خانہ یہ آتدیردی . بو وقعہ صدر اعظمک اردل
سفرینہ کیتمک ایچون ادرندہ بولندینی زمانہ تصادف ایتشدی .
بالآخرہ فرانسہ قرالی اون دردنجی لوئی (برلین) سفیرینی
فوق العادہ ایلچی تعیین ایدہ رک ترضیہ مقامندہ کوپریلینک عزلی طلب

ایتمک اوزره نامه مخصوص ایله سلطان محمد رابع زردینه کوندردی . فقط اوزمانه قدر کوپرلی اردل سفرندن ادرنه یه عودت ایتشدی . فوق العاده ایلچی یه سفیرک حالا حبس خانه ده بولمسنندن طولانی اظهار تعجب ایله برابر حرکات واقعه سندن شکایت ایتدی؛ فوق العاده ایلچینک حضور پادشاهی یه قبول اولمسی طلبنه استانیولده مقیم ایلچیلر حضوره قبول اولنه بیلیرلر سده مأموریت مخصوصه ایله کلن مصلحت کذارلرک قبولی موافق اصول اوله میه جفی جوانی ویردی . سفیر صدر اعظمک عزله داتر اولان نامه مخصوصی بالطبع کوپرلی یه ویره مدیکندن (دولاهی) ایله اوغلنک استانبولدن چیقوب کیتمک اوزره تخلیه سیلیرینه بالجبوریه راضی اولدی .

حال بوکه او صروده فرانسز باندیراسنی حامل بر کمی عثمانلی امتعه ممنوعه سنی آله رق لیماندن چیقدیغندن سفیر ایله اوغلی تکرار حبس خانه یه آتیلدیلر . کوپرلی حمله نك بدلی اولان ۳۶,۰۰۰ غروشی آلدقندن صکره (دولاهی) ایله اوغلنی براقدی . بونلر دخی استانبولدن کیتدیلر . استانبولده کی فرانسه تبعه سی بر تاجری باب عالی نزدنده کنیدیلرینه وکیل تعیین ایتدیلر .

فاضل احمد پاشا صدر اعظم اولدینی زمان [۱۰۷۲] **آوستریا سفری** وندیکیلرله محاربه ، کرید سفری دوام ایدیوردی . وندیک حکومتک آره صره امداد کوندردن فرانسه دن بشقه دوستی قالمامشدی . او زمان فرانسه یی اداره ایدن قاردینال (مازارن) باب عالی ایله فرانسه سفیرلری آره سنده کی مناسباتک دوستانه بر شکلده جریان ایتمه مسندن بالاستفاده وندیکه معاونت ایدیوردی . اختیار کوپرلی وفاتندن اون کون اول **آوستریا سفری** (دینسکر

(Reninger) ی یانہ جلب ایله اوغلی دخی حاضر بولندیغی حالده اودل مسئله سنی مذاکره ایتمش، اردله یکی بر بک انتخابی مسئله سنه آوستریا ایمپراطورینک مداخله سی دولت عثمانیه جه قبول اولنه میه جغنی، بکلکک (آپانی) یه ویرلوب رقیبی اولان (که میانوش) ویا (که مهنی) نک مدعیانہ اهمیت ویرلمیه جگنی بیلدیرمشدی. فاضل احمد پاشا پدرینک سیاستنی تعقیب ایتدی. سلستره، بودین والیری، تاتار خانی (آپانی) یه معاونت ایلدیلر، (که مهنی) آوستریا عسکریه مقاومت چالیشیرکن تلف اولدی. (آپانی) نک اردل بکلککنه تعیننی اوزرینه آوستریا دولتی بو مسئله یه بر نهایت ویرلمسنی، تجدید معاهده ایچون مذاکره اولنمسنی تکلیف ایتدی ایسه ده عقد اولنان مجلس مخصوصده نه اردل بکنک انتخابی حقنک ترکنه، نه ده آوستریانک ایستدیک بر قاج قلعه نک تحفه سنه موافقت ایدلمدی؛ ایلک بهارده مجارستان اوزرینه سفر آچیلمسنه قرار ویرلدی. دولت عثمانیه اردلک بعض قلعه لرنده یرلشن آوستریا عسکرینک چیقمسنی، (قنیزه) جوارنده انشا اولنان (زه زینوار) قلعه سنک هدمنی ایستوردی. ۱۰۷۳ — ۱۶۶۳ سنه سنده استانبولدن حرکت ایدن صدر اعظم ۱۲۲،۰۰۰ کشتی و ۱۴۵ طوب ایله (غران) ده طونه دن کچدی.

آوستریا مرخصلری منازع فیه قلعه لارک رد و تخریبی قبول ایتدیلر ایسه ده فاضل احمد پاشا سلطان سلیمان زماننده ویریلن اوتوز بیک آلتون ویرکوبی طلب ایتدی. بعده قونت (فورقاچ Forgács) ک قب مانداسی آلتنده کی عسکری پریشان ایتمکه، آلتی هفته ده (نوهوزل Neuhaeusel) یاخود (اویوار Ujvar) قلعه سنی ضبطه موفق اولدی. اردویه ۱۰۰،۰۰۰ تار و ۲۰،۰۰۰ قازاق دخی التحاق ایتشدی. یالکز مجارستان دکل، (موراویا) و (سیلزی) دخی تخریب و ۸۰،۰۰۰ اسیر اخذ ایدلدی.

(اویوار) ی محاصره دن قورتارمغه کلن آوستریا قوماندانی مشهور
(مونه قوقوللی) مغلوب اولدی .

یاریم عصردن بری اغتشاشات داخلیه سببیه آرتق انحطاطه یوز
طومش ظن اولسان دولت عثمانیه نك برآی ظرفنده بو مظفریاته نائل
اولسی ، آوستریا و آلمانیا بلادینه تجاوز ایتسی اوروپالیری حیرته
براقدی . تركلرك اوروپایی استیلاری زماننك تقرب ایتدیکنه ، هر كسك
وقته حاضر اولسنه دائر اوسنه واعظله ، پاپاسله ، محررله طرفندن درلو
روایات و مقالات نشر ایدلدی .

(اویوار) قلعه سنده آوستریالیرله مجارلرك مقاومت شدیدله رینه
قارشی عساكر عثمانیه نك کوستردیکی ثبات و بسالت اودرجه ایدی که :
«نوهوزل قارشیسینه بر ترك کبی *comme un turc devant Neuhaeusel*»
تعبیری اوزماندن بری ضرب مثل حکمنه کیردی .

صدر اعظم قیشی بلغرادده کچیردی . آوستریا ایمپراطوری طرفندن
مصالحه تکلیفنه منتظر اولدی ایسه ده بر شی ظهور ایتدی . اردونك
بلغرادده طورمسی استانبولده موجب قیل وول اولدیغندن پادشاه
حرکات حربیه دوام ایدلمسنی امر ایتدیکی کبی اودل بکی (آپانی)
ایمپراطورک تهباتی ، فرانسه ایله دیگر متفقلرینك کنديسه امداد ایچون
عسکر کوندردیکنی بیلدیردیکندن فضل احمد پاشاموسم شانك ختامندن
اول بلغراددن حرکت ایتدی .

اولکی محاربه ده آوستریا ایمپراطوری (لئوپولد) ك یالکنز باشنه
عثمانلیرله قارشی طوره میه جفی آکلاشیلمشدی . ایمپراطورک محب و متفی
اولان پاپا یدنجی (آلکساندر) خرستیان حکمدارله ، پرنسله طرفندن
دولت عثمانیه علیه بر «اتفاق مقدس» تشکیلنی تصور ایتمش و فرانسه

قرالی اون دردنجی (لوئی) هر كسدن اول عرض معاونت ایلشدی .

فرانسه قرالی اجدادینك دولت عثمانیه ایله تعقیب ایتدیكى سیاستدن آریلیور ، فرانسه نك شرقده كی منافعی اخلاص ایدیوردی . اون دردنجی (لوئی) نك فكری اهل صلیب خیالات قدیمه سی ایله مشوع ایدی . فرانسه نك « قتوليك کلیسانك بیوك قیزی » اولدیغنی دایما اثبات ایتك ایستور ایدی . سفیر (دولاهی) ك استانبولده دوچار اولدیغنی سوء معاملاتدن طولای كوجنمشدی . بوندن بشقه ایمراطورك كندی معاونته محتاج اولدیغنی انظار عالمده اثبات ایتك ، (رن) حوالیسنده كی آلمان حكومات صغیره سیله موجود اولان اتفاقك كندی النده نصل قوتلی بر سلاح اولدیغنی كوسترمك آرزوسنده ایدی . بناء علیه آوستریا ایمراطورینك معاونته ۳۰,۰۰۰ فرانسز عسكری و بوندن بشقه (رن) اتفاقك باشلیجه ركنی صفیله كرك فرانسزلردن و كرك آلمان حكومات متفقہ سی عسكردن مركب اوتوز بیك كشیلك دیگر بر اردوینی كوندرمك تكلیفنده بولندی . ایمراطور بوقدر كلیتی قوه امداد دیه دن قورقدی ، قبول ایدرسه فرانسه قرالنك بتون آلمانیاده كندیسندن دهازیاده نفوذ صاحبی اوله جغنی آكلادی . پاپایله بر لكده اون دردنجی (لوئی) . نك تكلیفنی رد ایدرك یالكر ۶,۰۰۰ كشیلك بر فرانسز فرقه سنك كوندرلمسنی طلب ایلدی . بوفرقه دخی اهمیتلی بر قوه امدادیه ایدی . چونكه آوستریانك بحارستانده (مونته قوقولی) نك قومانداسی آلتنده یكرمی بیك عسكری واردی . فرانسز فرقه سی اك كزیده عسكردن ، كوكلولردن مركب اوله رق قونت دو (قولینی Coligny) نك قومانداسنده آوستریایه كلدی .

صدر اعظم فاضل احمد پاشا بلغراددن حرکت ایتدکدن
 سن غوتار سکره (قیژره) بی محاصره ایدن و بزم تاریخلرده
 محاربه سی (تیمورقازیق) لقیله معروف اولان مشهور جنرال
 (زرنی) محاصره بی رفع ایتدی. عساكر عثمانیه منازع فیه اولان
 (زرینوار Sérinvar) قلعه سنی ضبط و تخریب و بر آوستریا فرقه سنی
 پریشان ایلدی.

ایمپراطور برنجی (لئوپولد) غلبه دن نومید اوله رق صدر اعظم نزدینه
 ایلچیلر کوندردی، اوتوز بیک آلتون ویرکونک یرینه بر دفعه لق ایکی
 یوز بیک غروشک قبولی تکلیف ایتدی. بوتکلیف اساساً قبول ایدلمکله
 برابر صدر اعظم مصالحه نك تسریعی ایچون اولمیدرکه متارکه عقد ایتیمه رک
 یانیق قلعه به طوغری ایلریله دی. عثمانیلر (راب) صوینک صول،
 (مونه قوقولی) قومانداسنده کی آوستریا اردوسی صاغ طرفنده ایدی.
 عثمانلی اردوسی صاغ طرفه کچمکه چالیشیوردی. نهایت (سن غوتار)
 قریه سی جوارنده نهردن کچمکه باشلادی. (مونه قوقولی) نك ماهرانه
 مانوره لری وقوعه کلن محاربه ده عسکر مزك مغلوبیتی انتاج ایتدی.
 ۱۰,۰۰۰ قدر ضایعات ویردك [۱۰۷۵ - ۱۶۶۴].

بوهزیمت اوزرینه صدر اعظم (واسوار Vasvar)
 واسوار معاهده سی یاخود (آیزه نبورغ Eisenburg) بلده سنه رجعت
 ایتدی. بورایه کلن آوستریا مرخصلریله عقد مصالحه به موفق اولدی.
 (واسوار) معاهده نامه سی (زید واطوروق) عهدنامه سی اساسنه
 مستند ایدی. اردل هم عساكر عثمانیه، هم ده آوستریا عسکری طرفندن
 تخلیه ایدیله جکدی. (آپانی) نك بکلسکی آوستریا طرفندن تصدیق اولندی.

اردل، کافی السابق دولت عثمانیہ ویرکو ویرہ جکدی . (تایس) ایله اردل
آرہ سندہ کی محارستان بلادندن بعضری پادشاهه ، بر قسمی ایمراطوره
عائد ایدی . (نوویغراد) ، (نوهوزل) عثمانیلرده قاله جقدی . ایمراطور
منازع فیہ قلاعدن (چکلید Szekellyde) قلعہ سنی محافظہ ایدیور ،
فقط (زینوار) قلعہ سنی یکیدن انشا ایتیمہ جکنی تعہد ایلوردی .
(سن غوتار) ہزیمتی معاہدہ نامہ یہ اصلاً تاثیر ایتیمہ مشدی . چونکہ بالجملہ
موادی دولت عثمانیہ لہنہ ایدی .

بعدالحرب اون دردنجی (لوئی) ایله ایمراطورک
آرہ لری آچیلدی . آوستریا ، (سن غوتار) محاربہ سنک
بتون شرفی آوستریالی عسکرہ ویریوردی ؛ فرانسز .
فرانسہ ، انگلترہ
وغرب ارمافلری
قوہ امدادیہ سنہ کلنجہ ، محاربہ دن صکرہ بونلرہ مسکن و ییہ جک تدارکنده
مشکلات کوستردی . اون دردنجی (لوئی) دہ آلمانیان عسکرینی
آلہرق مسلمانیلرہ قارشی آیریجہ محاربہ ایتیمکہ قرار ویردی . جزایر
سواحلندہ (جیجہ لی) دہ بر مستملکہ تأسیس ایتیمک ایستدی ؛ فقط جزایر لیلر
مانع اولدیلر . فرانسزلر تونس و جزایری طوپہ طوتدیلر ؛ نہایت ایکی
شہر ایله عقد مصالحہ ایتدیلر .

او صرہ لردہ طرابلس ، تونس و جزایر قورصا انلرینک مضراتہ
بر چارہ بولق ایچون ایالات مذکورہ حکومتلریلہ انگلترہ آرہ سندہ
و باب عالینک تصدیق آلتندہ بر مقاولہ نامہ عقد اولنمشدی . بو مقاولہ
نامہ موجبنجہ عہدہ مغایر حرکت ایدن طرفی انگلترہ حکومتی تأدیب
ایدہ بیلہ جک و بودہ دولت عثمانیہ ایله انگلترہ بیندہ جاری اولان حسن
مناسبات و مصافاتہ خلل ویرمہ جکدی . فقط جزایر دیوانجہ بوخصوص
مذاکرہ ایدلدیکی صرہ دکرزدہ حر اولان بر سفینہ نک ملکہتہ خلل

کتر مک اساسی قبول اولمندی ، انکلتريه بو صلاحيتک ویريله ميه چکی
جوابی اعطا ایدلدی . بر مدت صکره طرفین بیننده مخاصمات باشلادی .
جزایر قورصائلری (مادر) ، (ایرلندا) و حتی (ایرلندا) آطه لرینه
قدر کیدوب اهایلدن طوتدقلری اسیرلری جزایره کتیرلردی .

فرانسه حکومتی ، ایلچیسنک حبسندن طولایي شکایت و ترضیه طلب
ایتمک اوزره کوپرلی محمد پاشانک زماننده ضرب و حبس ایدیلن
(دولاهی) ک اوغلی (دنیس دولاهی) ی استانبوله کوندردی . سفیر
وقيله پدرینه و کندیسنه یاپیلان معامله دن طولایي ترضیه ایستدیکی حالدده
فاضل احمد پاشا فرانسه نك دولت عثمانیه ایله محارب اولان آوستریایه
معاوننده بولمسندن طولایي شکایت ایتدی و سفیر حقنده اظهار عظمت
ایدرك کندیسنی بلا قیام قبول ایدلدی . ایکنچی بر ملاقاتده ایلچی دولت
عثمانیه ایله فرانسه آره سنده منعقد معاهده نامه لری صدراعظمک آیاقلرینه
طوغری آتدیغندن کوپرلی معامله تحقیریه ده بولندی ؛ ایلچی قلیجه
طاوورانسى اوزرینه حاضر بولمان چاوشدن بر طوقات یدی ؛ نهایت
اوج کون حبس ایدلدی . بعده پادشاهک امری اوزرینه صدراعظم ایله
سفیر ظاهرآ باریشیدیلر . یکی بر ملاقاتده صدراعظم ایلچینی آیاقده قبول
ایتدی . فقط فرانسه ایله منعقد معاهدات تجدید اولمندی . جنویزله بعض
مساعدا ت ویرلیدیکی صره ده فرانسلرک بحر احمرده و مصر لیمانلرنده
میر و سفرلرینه مساعده ایدلدی .

کبرک اکال قلمی
صدراعظم اردل و آوستریا ایشلرینی تسویه
ایتدکدن و امور داخلیه یی یولنه قویدقدن
صکره ۱۰۵۵ تاریخندن بری دوام ایدن کرید محاربه سنه نهایت
ویرمک ایچون ۱۰۷۷ سنه سنده بالذات جزیره کیدرك قندییه یی محاصره

ایتدی . قلعہ محافظی وندیکلی (فرانچسکو موروزینی F. Morosini)
 فرانسرلردن متہادیا امداد آلیوردی . حتی فرانسه قرالی استانبولہ کوندر-
 دیکی سفیر جدیدی درت سفینہ حریہ ایلہ اعزام ایتدیکی صرہده قندیہ
 الک مشہور زادکانک قومانداسی آلتندہ اولہرق ۶,۰۰۰ فرانسر کیتمشدی .
 صوگ محاصرہ ایکی بحق سنہدن زیادہ دوام ایتدی . بر آراق
 فرانسرلر ایلہ وندیکلیلر آره سندنہ اختلاف افکار ظهور ایتدیکندن
 فرانسه شوالیہلری مملکتلرینہ عودت ایلدیلر . قندیہ محافظلری
 درت بیک کشیدن عبارت قالمشدی . عثمانیلر بتون استحکاماتی
 لغملر ، طوپلر ایلہ تخریب ایتشلردی . نہایت (موروزینی) تسلیمہ مجبور
 اولدی . صدراعظم شرائط تسلیمہ حرفیاً رعایت ایتدی ؛ (موروزینی) یہ
 حسن معاملہ کوستردی [۱۰۸۰ - ۱۶۶۹]

قندیہ محاصرہ سی کرید سفرینک یکر می بش سنہ دوامنہ سبب اولمشدی .
 بوقلعه نک ضبطی ایچون طرفین حسابسز تلفات و ضایعات ویرمشلردی .
 بتون جزیرہ نک عثمانیلرہ ترکی صورتیلہ وندیک ایلہ عقد مصالحہ اولندی .
 یالکز (قارابوسا Carabusa) ، (سودا) ، (اسپنالوانغا Spina-Lunga)
 لیمان و آطہ جقلری وندیکلیلردہ قالدی .

او صرہده فرانسه ایلہ دولت عثمانیہ مناسباتی ہان
 بر محاربہ ظهور ایدمک درجہده بوزولمشدی .
 اون دردنجی (لوئی) ایلچیلرینہ ایدیلن سوء
 معاملہ نک انتقامی آلمق ایچون عثمانیلرہ محاربہ یی آرزو ایدیوردی .
 مشہور (قولبر) ک توصیه و اصراری اوزرینہ وازکچدی . ۱۶۷۱ سنہ -
 سندہ مارکی دو (نوانتل Nointel) درت قطعہ سفینہ حریہ ایلہ
 استانبولہ اعزام ایلدی . استانبولہ دول اجنیہ بایراغک سلامتمسی

فرانسہ اید
مناسباتمخ

عادت اولمديغندن سفائن مذکوره قوماندانی دخی سلامدن امتناع ایتدی. مع مافیه ایشه سرای قاریشدی، والده سلطانک کندیسینک دخی سلامنوب سلامیه جغنی صورمسی اوزرینه فرانسزلر طوپ انداختيله رسم سلامی ایفا ایلدیلر. فاضل احمدپاشا ایله سفیرک ملاقاتی پکده صمیمی دکلدی. مارکی دو (نوانتل) اون دردنجی (لوئی) یی فوق العاده مدح ایتدیکی صروده صدراعظم: «فرانسه پادشاهی بیوک بر حکمداردر؛ فقط قلیجی هنوز یکدر.» دیدی. (نوانتل) فرانسزلرایله عثمانیلر آره سنده کی محبت قدیمه یی یاد ایلدیکی زمان فاضل احمد پاشا: «اوت، اما هر یرده فرانسزلی دشمنلر مزله برابر بولیورز» جوانی ویردی. نهایت تجارت مسائلی موضوع بحث اولدیغی زمان صدراعظم: «بو قدر بیوک پادشاه نصل اولیورده بازرکان ایشلریله مشغول اولور؟» سؤالی ایراد ایتدی. اون دردنجی (لوئی) سفیرینک راپورینی آلدیغی زمان استانبوله شوالیه (داروینو d'Arvieux) یی کوندره رک شاید عثمانیلردن حسن معامله کورمزسه هان مملکتنه عودتنی امر ایتدی. (مارسلیا) ده اجتماع ایدن فرانسز تجاری قوه جبریّه استعمالنه قرار ویردیلر. (طولون) ده تدارکات حربیه باشلاندى. مصرک اشغالی مسئله سی موضوع بحث اولدی. فقط او صروده (هولاندا) ایله ظهور ایدن محاربه فرانسزلرک محاربه تصوراتی تأخیر ایتلمینه سبب اولدی. اون دردنجی (لوئی) نک (هولاندا) ده کی مظفرياتی متعاقب (نوانتل) قایتولاسیونلرک تجدیدینی تأمین ایتدی. روم اورتودوقسلرک اعتراضاتنه رغماً مقامات مقدسه مسئله سنده فرانسز سفیرینک آرزوسنه بماشات ایلدی. بونک اوزرینه ایکی دولت آره سنده کی مناسبات دوستانه برشکله کیردی. مع مافیه پارسده دولت عثمانیه نک محاسی خیالاتیه اشتغال ایدن فرانسزلر اکسیک اولمدی.

اون دررنجی (لوئی) در سعادتہ کوندر دیک (نوانتل) و بعدہ (کیلہ راق Guilleraques) نامندہ کی ایلچیلرینہ صدر اعظم طرفندن احترام اولنماسنہ ، جزایر و طرابلس غرب قورصانلرینک تجاوزاتنہ تحمل ایدہ میوردی . بو قورصانلرہ قارشی محاربه ایدن (آبراهام دوکن A. Duquesne) اسمندہ کی فرانسز آمیرالی ۱۶۸۱ سنہ سندہ سکرز قطعہ طرابلس غرب سفینہ سنی ساقرہ قدر تعقیب ایتدی . شہری طوپہ طوتدی ، ایکی جامعی ییقدی . سفائن عثمانیہ معاونتہ کیتدی . فرانسز آمیرالی طرابلسلیر خرستیان اسرانی برامازلرسہ ساقری یاقہ جغنی ، عثمانلی کیلیرلہ محاربه ایدہ جکنی سویلدی . اوزمان صدر اعظم اولان قرہ مصطقی پاشا بونی خبر آلتجہ ایلچی (کیلہ راق) ی حبس ایتدی . ساقرزہ کی خساراتک تضمینی ایچون ۳۷۵,۰۰۰ آلتون ایستدی . (دوکن) اون قطعہ کمی ایلہ قلعه سلطانیہ بوغازینہ یاقلاشدی ؛ استانبولہ کیدوب فرانسه ایلچینسنی قورتارہ جغنی مقام تہدیددہ سویلیوردی . نہایت ، فرانسه سفیری خسارات واقعہ مقابیل صدر اعظمہ ہدایای کثیرہ اعطاسنی تعہد ایدہ رک سیلی تخلیہ ایدلدی . بر مدت صکرہ ایفای تعہد ایلدی . بو مناسبتلہ فرانسزلرک حائر اولدقلری امتیازات تجدید اولندی .

فاضل احمد پاشا درت سنہ دوام ایدن لہستان سفرینی **ربانہ نک ایلنجی** ختامہ ایردیرہ رک ۱۰۸۷ - ۱۶۷۶ تاریخندہ وفات

مخاصرہ سی ایتدکدن صکرہ صدر اعظم اولان قرہ مصطفی پاشا اولاجہرین سفرینی اجرا ایتدی ؛ صکرہ ، آوستریاہ اعلان حرب ایلدی . ایکی دولت آرہ سندہ ظہور حربہ سبب اولہ بیلہ جک وقایع اکسیک دکلدی : ایمراطور برنجی (لئوپولد) اوتوز سنہ محاربه سندن صکرہ مجارستانی پک ظالمانہ اداره ایدیوردی . بوندن طولایی مجارلر آوستریا

علیه قیام ایتمشردی. بزم تاریخلرده (امره توکلی بك) نامیله معروف اولان مجارستان زادكانندن (امریخ توکلی Emerich Tœkoeli) ارباب قیامك باشنه كچهرك برقاچ مصادمهده آوستریالیلری مغلوب ایتمش واستانبوله ایلچیلر کوندرهرك پادشاهك معاونت و حمایتی ایسته مشدی. دیگر طرفدن (اردل) بکی (آپای) دخی دولت عثمانیه یی آوستریالیلر علیه تحریك ایدیوردی. (واسوار) معاهده نامه سی مدتی قریب الانقضا اولدیغندن (بودین) والیسی ابراهیم پاشا (توکلی) یه معاونته مأمور اولدی. حریص صدر اعظم دشمن طرفندن سبیت ویرلدكجه دولت عثمانیه ایچون محاربه یه کیریشیلمه سی لزومی تقدیر ایده میوردی. (توکلی) یه «اورته مجار» قرالغی توجیه ایدیلهرك فرمان هایون ایله طوغ وعلم کوندرلدکن صکره صدر اعظم قره مصطفی پاشا اردوی هایونی آله رق بلغرادده طونه یی کچدی [۱۰۹۴ — ۱۶۸۳].

برجوق قلعه لر ضبط ایدلدی. صدر اعظم (توکلی) ایله ابراهیم پاشانك اخطاراتنه رغماً طوغریجه ویانه اوزرینه یوریمکه قرار ویردی. تموزك برنجی هفته سنده (راب) نهرندن کچن اردو (آلتنبورغ) ایله دیگر بر ایکی قلعه یی هجوم ایله آلدقن صکره تموز اواسطنده ویانه پیشگاهنه واصل اولدی. ایکی یوز بیسکه قریب اولان اردوی عثمانی یه قارشی ویانده اون ایکی بیك عساكر منتظمه موجود ایدی. ایمپراطور برنجی (لئوپولد) شهردن قاچمشدی. ویانه والیسی (اشتاره مبرغ Starhemberg) صدر اعظمك تسلیم اولمق تکلیفنه مقابل ویانهك طیس محله لرینی یا قمش، الی سلاح طوتان اهالی یی تسلیح ایله مدافعه یه مأمور ایتمشدی. عثمانلی اردو سنده (توکلی)، (آپای) ایله بغداد، افلاق بککری وقریم خانی دخی بولنمقده ایدی. محاصره ۶۰ کون سوردی.

آتیلان کله ولغم لردن ، اجرا ایدیلن اون سسکز قدر متفرق هجومدن قلعہ دیوارلرندہ رخنہ لر آچیلمشدی . عسا کر عثمانیہ قطعی بر هجوم ایلہ شہرہ داخل اولہ بیلیرلر ایکن قرہ مصطفی پاشا بو بلدہ عظیمہ نک یغما ایدلمہ سی ایچون تسلیم اولسنہ منتظر ایدی ؛ بونک ایچون محاصرہ یی اوزاتیوردی .

حال بوکہ اوروپانک کلیدی مثابہ سسندہ اولان بر شہرک عثمانیلر الہ دوشمہ سسندہ کی تہلکہ یی آکلایان دولتر ایمپراطور (لئوپولد) ہ مطلقا معاونت ایدہ جکلردی . آلمانیاک ہر طرفندہ اردولر طویلانیور ، دوق دو (لورہن) ک قومانداسی آلتندہ کی فرقہ لر ویانہ نک امدادینہ کلہکہ حاضر نیورلردی . ویانہ محاصرہ ایدلدیکی صرہ دہ ایمپراطورہ اعلان حرب ایتمش اولان فرانسه قرالی اون دردنچی (لوئی) دہ (لوکسمبورغ) ی محاصرہ ایدیوردی . فقط ایکی یوز بیک عثمانینک ویانہ یی ضبط ایتک اوزرہ اولدقلرینی خبر آلدینی زمان یاقرہ مصطفی پاشا ایلہ برلکدہ ایمپراطور علیہندہ محاربہ یی غیرت دینیہ عیسویہ سنہ یاقیشدیرہ مدیغندن ، یاخود ینہ عثمانیلر علیہندہ اہل صلیب خیالاتنہ طالدیغندن ویا اہل صلیب پردہ سی آلتندہ قوہ امدادیہ صفیلہ آلمانیاہ فرانسز عسکری ادخال ایتک ایستدیکندن بردن برہ (لوکسمبورغ) محاصرہ سنی رفع ایتدی ؛ ایمپراطورہ عرض معاونت ایلہ ۹۰,۰۰۰ عسکر اعزامی تکلیف ایلدی . ایمپراطور ، اون دردنچی (لوئی) نک دام اغفالہ دوشمدی : فرانسه قرالنک دولت عثمانیہ ایلہ حال ائتلافدہ بولندیغی ادبا ایدیلہ مزدی ؛ فقط قرال ، (توکلی) نک و آوستریاہ قارشى عصیان ایدن مجارلرک آمالنی ترویج ایتدیکنی آچیقندن آچیغہ اعلان ایتمشدی . بناء علیہ (لئوپولد) لہستان قرالندن استمدادی دہا موافق کوردی . اون دردنچی (لوئی)

لهستان قرالی (صوبیه‌سکی) یه لهستانك حقیقی دشمنلری . آوستریا ، براندنبورغ و موسقوه حكومتلری [كه بواوچ دولت ۱۷۷۲ ده لهستانی تقسیم ایتشلردر] اولدیغنی آ کلاته‌رق ایمراطوره معاونت ایتمه‌مسنی اخطار ایتدی ؛ خیلی اوغراشدی . لکن اهل صلیب فکرینه قاپیلان ، پاپالق مقامی طرفدن تحریك و تشویق ایدیلن (صوبیه‌سکی) ایمراطور ايله عقد اتفاق ایتدی ؛ دوق دو (لورن) ك قومانداسی آئنده‌کی اردویه التحاقه مسارعت ایلدی . (باد) ، (صاوا) ، (باویرا) ، (صاقسونیا) پرنسلیله (آیزه‌ناخ) ، (لوآنبورغ) ، (هولشتاین) ، (وورتمبرغ) ، (برونسویق — لونه‌بورغ) دوقه‌لرینك و آلمانیا ماره‌شال‌لرندن آلتج ذاتك داخل اولدیغنی امداد اردوسی ایلولاك ایلک هفته‌سنده ویانه‌یه یاقلاشه‌رق (قاله‌نبرغ) ده اخذ موقع ایتدی .

ایرتسی کونی (صوبیه‌سکی) آیین روحانی‌یی بالذات اجرا ایتدکدن صکره امداد اردوسی صدر اعظمك اردوگاهنه هجوم ایتدی . قره مصطفی پاشا دشمنك تقریبی وقتيله خبر آله‌مامشدی . کیفیتن خبردار اولنجه موقتاً محاصره‌یی ترك ايله متریس‌لرده اولان طوپلری و بتون عسکری آله‌رق دشمن اردوسنی قارشیلامغنی ارکان عسکریه تکلیف ایتشلر ایکن صدر اعظم محاصره‌یی رفع ایتدی . دشمنی طونه‌دن کچیرمه‌مك ایچون قریم‌خاننی مراد کراینی بر مقدار عسکرایله کوندردی . مراد کرای دشمنك مرورینه مانع اوله‌مدی . دشمن بیوک بر سرعت وشدتله اردوگاهمزی باصدی . عثمانیلیر پریشان اولدیلر . بالخاصه (صوبیه‌سکی) نك وله سواریسنك هجومی مظفرتی تأمین ایتدی .

عثمانیلیر میدان حربده ۱۰,۰۰۰ کشی ، ۳۰۰ طوپ ، ۵,۰۰۰ چادیر ، کیتلی اشیا ، لوای شریفدن ماعدا بایراق‌لری بر اقدیلر .

امداد اردوسنک مواصلتندن اول ویانہ یہ هجوم ایتسہ موفق اولہ جغندہ
 شبہہ اولیان قرہ مصطفی پاشانک بتون فتوحات تصوراتی بوزیمت ایله
 آلت اوست اولدی . صدر اعظم ، مغلوب ومایوس ، (راب) و بعدہ
 (بودین) و رجعت ایتدی . (پارقانی) موقعندہ طونہدن کچرکن للرک
 هجوملرینہ معروض قالہرق برخیلی ضایعات دھا ویردی . (صوبیہ سکی)
 اردومزی صیقیشدیرہرق (غران) قلعہ سنی استرداد ایتدی . صدر اعظم
 بلغرادہ عودتہ مجبور اولدی . اورادہ حرص وحدتی بودین والیسی
 ابراہیم پاشادن آلدی . ابراہیم پاشا طوغریدن طوغری یہ ویانہ اوزرینہ
 یوریمہ نک علیہندہ رأی ویرمشدی . ویانہ اوکنده دخی الک اول بوزولمشدی .
 اعدام ایدیلیرکن : « بو آدم بنی بغیر حق قتل ایدیور ؛ فقط پادشاهمزه
 سویلسونلر ، تلافی مافات ایدہ جک آنجق بودر ؛ عزل ایتسون . »
 دیدی . فقط برقاج کون صکرہ صدر اعظم قرہ مصطفی پاشا دخی پادشاہک
 امریلہ بلغراددہ اعدام ایدلدی . مقام صدارتہ قرہ ابراہیم پاشا
 کچدی [۱۰۹۴] .

اون دردنجی (لوئی) کرک فرانسه قرالنک و کرک لہستانک منافع
 حقیقیہ سنہ اصلا موافق اولیان (قالہ نبرغ) مظفریتنی (صوبیہ سکی) یہ
 تبریک ایتدی . مع مافیہ عثمانیلر ویانہ محاصرہ سنی رفع ایتزدن اول
 (لوکسمبورغ) ی یکیدن محاصرہ یہ مسارعت ایلدی . عثمانیلرہ قارشی
 صرف ایلدیکی مساعی عظیمہ دن یتاب قالان آلمانیا فرانسه قرالیلہ عقد
 متارکہ یہ واون دردنجی (لوئی) نک فتوحاتی تصدیقہ مجبور اولدی .
 فرانسه قرالی عثمانیلرک آوستریا ایلہ محاربہ سندن پک چوق استفادہ ایتمشدر .
 فقط جزایر وتونس کیلرینہ قارشی محاربہ دن ، سواحلی طوبہ طوتمقدن
 فارغ اولمدی . بومشکل زمانلردہ فرانسه سفیری (کیلہ راق) و بعدہ خلنی

(ژیراردهن) قدسده کی اماکن مقدسه نك فرانسه طرفدن حمایه سنه ، غلطه ، حلب و میلوده اوج قتولیک کلیسایی انشاسنه دأثر مساعدات استحصال ایتدیلر ؛ جزایر و تونس کمیلرینك فرانسه سفائنه تسلطلرینك منعیله فرانسزلرك وقوع بولان ضایعاتلرینك تضمیننه دأثر محلی حکومتلرینه اوامر لازمه اعطا ایتدیردیلر .

ویانه هزیمتی اوزرینه پاپانك تشویق و حمایه سیله آوستریا ،
لهستان ، وندیک و مالطه حکومتلری آرده سنده بر
رودت عثمانیه علیه اتفاق ضایعات ملکه
(اتفاق مقدس Sainte-Ligue) نشكل ایتدی [۱۰۹۵-]

[۱۶۸۴] . بواتفاق عثمانیلر علیهنده کی اون دردنچی اهل صلیب ایدی . برنجی (فرانسوا) وایکنجی (هانری) درجه سنده افکار سربستانیه مالک اولمیان اون دردنچی (لوئی) باب عالینك تمایلات دوستانه سندن بالاستفاده عثمانیلرله اتفاق ایتدی . یالکز اتفاق عمومی به داخل اولمدی . آوستریا و لهستان حکومتلری موسقووه حکومتی ده دائره اتفاقه ادخاله چالیشدیلر . موسقووه به کیدن آوستریا هیئت سفارتی روسلری «پادشاهك صاغ قولى» مثابه سنده اولان قریمه هجوم ایتمهك تشریق ایتدی . (صوبیه سکی) موسقووه به کوندردیکی برتحریراتده «عثمانیلرك اوروپادن طرد و تبعیدلری زماننك حلول ایتدیکنی و بو فرصتك بردها اله چکمه جکنی» بیان ایدیوردی . نهایت ، روسیه حکومتی دخی اتفاقه داخل اولدی .

دول متفقه هر طرفدن ممالك عثمانیه اوزرینه صالیرمغه باشلادیلر . صدر اعظم قره ابراهیم پاشا پایتخته قاله رق تکفور طاغلی مصطفی پاشانی مجارستان سرعسکری تعیین ، قریم خانى سلیم کرانی لهستان اوزرینه وسایمان پاشانی باباطاغی سرعسکرلکیله آکا معاونته مأمور ایتدی ؛

موره‌یه تجاوز ایتمکده اولان وندیکیلره قارشیده خلیل پاشایی کوندردی. آوستریا اردوسی قوماندانی دوق دو (لورن) اول امرده (ویشه-غراد) قلعه‌سنی ضبط ایتدی، (واجن Vaczen) جوارنده عساکر عثمانیه‌یی مغلوب ایدهرک شهر آلدی، (پشته) بی اشغال ایلدی. (بودین) ی محاصره‌یه باشلادی، بوشهرک امدادینه کیدن براردومزی، رجعته مجبور ایتدی. دیگر طرفدن خرواتستانده (وهروویچ) ده بر فرقه‌مز بوزولدی.

مجارستان سرعسکرلکنه (بودین) ی مدافعه ایدن شیطان ابراهیم پاشا تعیین اولندی. سرعسکر جدید حرکات عسکریه‌یه ابتدار ایله (واجن) قلعه‌سنی استردادده، (بودین) محاصره‌سنی رفعه موفق اولدی. فقط قوه عسکریه‌مز لهستان وموره جهته دخی تقسیم ایدلمشدی. دشمن مجارستان قلعه‌لرینی برر برالد ایتدی. (توکلی) تحصن ایتدیکی قلاعی ترکه مجبور اولدی. امر مدافعه‌ده تکاسل ایله اتهم اولنهرق استانبوله کتیرلدی.

وندیکیلره کمنجه؛ بونلرده بوسنه‌یه، آرناوودلغه تجاوز ایتمشلردی. قنده مدافعی (فرانچسکو موروزینی) یتش یاشنده اولدینی حالده صلیبونک باشنه کچهرک (آیاماووا) آطه‌سنی، (پروژه) بی آلدی؛ خیماره‌لیری عصیان ایتدیردی. عثمانیلر یالکمز لهستان جهته موفق اولمشلر، له اردوسنی (دینه‌پر) نه‌ری کنارنده بوزمشلردی.

بوموفقیتمز لکزر اوزرینه صدر اعظم قره ابراهیم پاشا اولامغزول، بعده مقتول اولدی؛ یرینه لهستان جهته حسن خدمتی کوریلن سلیمان پاشا کچدی [۱۰۹۷].

سلیمان پاشا اداره داخلی‌جه اصلاحات لازمه‌یی اجرا واستانبولده

محبوس اولان (توکلی) یی تخلیه ایتدکن صکره مجارستانه کیتدی .
 دوق دو (لورن) طقسان بیك کشی ایله (بودین) ی محاصره ایتکده
 ایدی . صدر اعظمک موصلتندن اون دشمن (بودین) ی ضبط ایتدی .
 محافظ عبدی پاشا ایله عسکر صوکنه قدر ثبات ایدرک جمله شهید
 اولدیلر [۱۰۹۷ - ۱۶۸۶] .

ایرتسی سنه سلیمان پاشا مشهور (مهاج) محاربه میداننده ضایعات
 کلیه ایله مغلوب اولدی . بونک اوزرینه لهرلر بغدادنه تجاوززه باشلادیلر؛
 اوستریالیلر (اسقلاوونیا) یی، مجارستانک قسم متباقیسنی، (خرواستان)ک
 بر قسمی اشغال ایلدیلر .

سلطان محمد رابعک خلعی
 اقتضات داضله
 سلیمان پاشا بلغرادده قیشلامق اوزره عودت
 ایدرکن متدایاً یاغان یاغمورلردن دوچارپریشانی
 و سفالت اولان عسکر صدراعظم عاینه عصیان
 ایتدی . عسکر طرفندن پادشاه کوندربان خبر اوزرینه سیاش پاشا
 صدراعظم تعیین ایدلدی . عسکرک صوفیه و فلبده قیشلامسی امرایدلدی
 ایسهده اردو حال عصیانده ایدی . مجارستان جهتنده کی هزیمتله ،
 ونیکیلر طرفندن موردهنک باشدن باشه ضبط و استیلاسنه انضمام ایدن
 قحط و غلا و او صرهده استانبولده وقوعه کلن بیوک بر حریق عمومی
 دوچار یأس ایتدیکندن پایتخته بولنان عسکر مجارستاندن کلن عاصی اردو
 ایله برلشدی ؛ سلیمان پاشا ایله بعض ذواتک عزل و نفی ، نهایت وقتی
 آو ایله کچوروب بو قدر ممالکی دشمن الیه دوشوردیکی ادعاسیله سلطان
 محمد رابعک خلعی ایستدی . آياصوفیهده عقد ایدیلن مجلس عمومیده
 بو خصوصه قرار ویرلدی ؛ محمد رابعک برادری سلطان سلیمان ثانی
 اجلاس ایدلدی [۱۰۹۹ - ۱۶۸۷]

تبدل سلطنتی متعاقب استانبولہ یکچریلر ینہ عصیان ایتدیلر ؛
 محلاتی یغما، صدراعظم سیاوش پاشای قتل ایلدیلر . ایالاتده دخی عصیان
 باش کوسترمشدی . قحط رجال مناسبتیلہ صدارتہ نشانجی مرعشلی
 اسماعیل پاشا ، روم ایلی سر عسکر لکنہ اسکی جلالی رؤسا سندن یکن
 عثمان پاشا تعین اولندی .

دولت عثمانیہ اغتشاشات داخلہ یی تسکین ایلہ اوغرا شیرکن
صربہ درام آوستریالیر (اکری) و (لیپا) قلعہ لرینی ضبط ایتدیلر .
 آوستریا حکومتی ضبط اولنان محللرده تشکیلات اداره یہ باشلامشدی .
 اردل بکی (آپانی) ایمپراطورہ عرض مطاوعت ایتدی . (برہ سبورغ) ده
 اجتماع ایدن مجارستان (دیت) مجلسی مجارستان تاجنک وراثت صورتیلہ
 آوستریا خاندان حکمداریسنہ عائد اولدیغنی اعلانہ مجبور ایلدی .

وندیکیلرہ کلنجه ؛ (فرانچسکو موروزینی) اوج سنہده بتون
 جنوبی یونانستانی ضبط ایتمشدی . ۱۰۹۶ ده (قورون) و (قالاماتا)
 قلعہ لرینی ، طاغلرده ساکن اولان و (ماینوت) دنیلان عصائی دائرہ
 اطاعتده طومتق ایچون وقتیلہ کوپرلی طرفدن انشا ایدیلن دیگر اوج
 قلعہ یی الہ کچردی . ۱۰۹۷ ده اسوج حکومتی خدمتندہ «فلد مارشال»
 اولان قونت دو (قونیگسمارک Koenigsmark) ک و آلمان کوکالمولرینک
 معاونتیلہ (ناوارین) ، (مودون) ، (آرغوس) ، (نوپلی) قلعہ لرینی
 ضبطہ موفق اولدی . ۱۰۹۹ ده (مورہ) نک ضبطی همان اکمال ایتدی .
 عثمانیلرک النده یالکز (اسپارطہ) ایلہ (مونہم وازیا Monemvasia)
 قلعہ لری قالمشدی . وندیکیلر (پاتراس) ، (لپانت) ، (قورینت)
 موقعلرینی دخی ضبط ایتدکن صکرہ آتہ اوزرینہ یوریدیلر . بوشهرک
 محاصرہ سی صرہ سنده باروتخانه اتخاذا ایداش اولان مشهور (پارتنون) ه

وندیکیلر طرفدن آتیلان برکله تصادف ایدرک برهوا اولدی. (موروزینی) آتیه‌ی آلدقدن صکره (پارته‌نون) ده و محال سائرده بولنان آثار عتیقه‌ی وندیکه نقل ایتدیردی. خدماتنه مکفۀ وندیک رئیس حکومتی انتخاب اولندی. دیگر طرفدن وندیکیلر دالماسیای دخی ضبط ایتملردی.

۱۰۹۹ سنه‌سندۀ آوستریالیلر مجارستان، اردل، بوسنه جهتلرنده محاربه‌یه دوام ایتدیلر. (مونقاج)، (لیپا)، (غرادیسقا)، (سمندره)، (قولومباچ)، (بنالوقه)، (استونی بلگراد) قلعه‌لرینی برر برر آلدیلر. نهایت (بلگراد) موقع مهمنی ده‌اله کچیردیلر. دشمن صربستانه کیرمشدی. عثمانیلر صلحه طالب اولدیلر. مذاکرات صلحه ایچون ویانه‌یه دولفقار افندی ایله ترجمان دیوان هایون ماورو قورداتوبک کوندرلدی. فقط مذاکراتدن بر نتیجه حاصل اولدی. آوستریالیلر بتون مجارستان واردلی ایستدکلرندن محاربه‌یه دوام اولندی.

۱۰۹۹ سنه‌سی ایلولنده اون دردنچی (لوئی) آلمانیا ایله محاربه‌یه باشلامش اولدیغندن ایمپراطور قوه عسکریه سنک بر قسمنی غربه کوندرمکه مجبور اولمشدی. فقط بوسنه، صربستان، بغداد جهتندۀ منققلر محاربه‌یه شدتله دوام ایدیورلردی. سمندره، نیش، ویدین قلعه‌لرینی ضبط ایتدیلر؛ اسکوب و شهر کویندن صوفیه‌یه طوغری صارقدیلر.

بو هزیمت لر رجال حکومتک، ارکان عسکریه‌نک اهلیتسز لکنندن نشأت ایدیورلردی. صدر اعظم لر دیکشیدیکی حالده بر فائده‌سی کورلمه مکده ایدی. نهایت ادرنه‌ده حضور هایونده عقد ایدیلن دیوان فوق‌العاده‌ده کوپرلی زاده فاضل مصطفی پاشانک مقام صدارته کتیرلمسنة قرار ویرلدی

اوصردہ فرانسه سفارتہ تعین اولنان مارکی دو (شاتونوف
Châteauneuf) دولت عثمانیہی آوستریا علیہندہ محاربہیہ دوامہ ولہستان
ایلہ آیریجہ صلح مذاکرہ سنہ تشویق ایڈیوردی .

فاضل مصطفی پاشا برادری فاضل احمد پاشانک بحق
فاضل مصطفی پاشا وارث مسلکی اولدیغی درحال اثبات ایتدی .
محاربہنک دوامی مناسبتیلہ اہالیہ طرح اولنان ویرکولری الغاء یکچیچی
ایلہ دیگر اوجاقلری ممکن مرتبہ اصلاح ایتدکدن صکرہ سفرہ چیقدی؛
آوستریا جنرالی (سہ کندورف) ی مغلوب ایدرک نیش، ویدین، سمندره،
بلغراد قلعه لرینی استرداد ایتدی؛ آوستریالیلری طونہ نهرینک اوبرطرفہ
آندی . اردلہ سوق اولنان چرکس احمدپاشا ایلہ (توکلی) بک آوستریا
عسکرینی مغلوب ایتدیلر . (توکلی) اردل بکی اعلان اولندی .
اوصردہ مورہیہ مأمور اولان قوجہ خلیل پاشا ونڈیکک قتولیک
ادارہ سندن خوشنود اولیان روملری طرف دولتہ جلب ایتدی؛ ماینوتلر
پادشاهہ التجا ایلدیلر . (آلونیا) عثمانیلرک انہ کچدی . قریم خانی سلیم
کرای دخی قوتلی بر روس اردوسنی رجعتہ مجبور ایتدی .

آوستریالیلر نیش طرفلرینہ استیلا ایتدکری اثناسندہ اہالیہ اسلامیہ
متفرق وپریشان اولمش، خرستیانلرک بر قسمی اعلان عصیان ایتمش، اہل عرض
قسمی طاغلرہ قاجمشدی . بلغراد ایلہ صوفیہ آرمہ سی خراب اولمشدی . فاضل
مصطفی پاشا دشمنی طونہ دن اوتہ طرفہ آتدقدن صکرہ عصائی تأدیب
ایتدی؛ رعایاہ تخملق و حیوانات ویردی؛ اسباب محافظہ لرینہ اعتنا
ایلدی . اہالیہ اسلامیہ دخی یکیدن یرلرینہ عودت ایتدیلر .

ایرتسی سنہ فاضل مصطفی پاشا اردوی ہمایون ایلہ بلغرادہ کیدرکن

سلطان سلیمان ثانی وفات ایدرك یرینه برادری سلطان احمد ثانی جلوس ایتدی [۱۱۰۲] .

صدارتده ابقا ایدیلن کوپرلی مصطفی پاشا بلغرادده واصل اولدی ؛ (صاوا) نهرندن کچدی ؛ (پترواردین) دن کلمکده اولان (باد) پرنسک قومانداسنده کی اردو اوزرینه یوریدی ؛ ایکی اردو (صالانقه مین Salankemen) موقعنده قارشیلانیدی [۱۱۰۲ — ۱۶۹۱] . محاربه نك بدایتده آناتولی عسکری رجعت ایتدی ؛ صدر اعظم کندی یاننده کی عسکرک باشنه کچهرک متریسلی ترک ایله هجوم ایدن دشمنه صالیدردی . النده قلیچ ، بالذات عسکره قومانداییدیوردی ؛ آوستریالیلره غلبه ایتسنه پک آز برشی قالمش ایکن قورشون ایله اوریلوب دوشدی . صدر اعظمک خبر شهادتی اردو مزنی شاشیرتدی . عسکر میدان حربده ضایعات کلیه ویره رک بلغرادده رجعت ایتدی . آوستریالیلر دخی پک چوق ضایعاته دوچار اولدقلرندن اردویی تعقیبه جسارت ایده مدیلر .

مصطفی فاضل پاشا وزرای عثمانیه نك الك بیوکی عد اولنه بیلیر . برقاج سنه دهامعمر اولسه ضایعات ملکیه یی استرداد ایتسی محقق ایدی . قصورسز بر وزیر ایدی . تبعه غیر مسلمیه مساوات حقوق ویرلمسنى الك اول دوشونن مصطفی پاشادر . (صالانقه مین) مغلوبیتندن صکره ممالک عثمانیه نك ضایعاتی کری آلق امیددی قالمدی .

مع مافیه مذاکرات صلحیه تکرار باشلانیدی . انکلتره
 صلح نیشانی
 سفیری (پاگت Paget) ، هولاندا سفیری (همس
 کرکه Hemskeerke) توسط ایتدیلر . بو ایکی حکومت
 نیمه سز قالدی
 ایمپراطورک فرانسه یه قارشی بتون قوتی استعمالنه مانع اولان بو محاربه یه
 نهایت ویرمک ایستیورلردی . فرانسه سفیری (شاتونوف) ایله مأمور

خصوصی مارکی دو (فهریول Forriol) ایسه ایمپراطورک بتون قوتی فرانسه قارشی استعماله میدان ویره جک اولان مصالحه یه مانع اولمغه چالیشورلردی. ایمپراطور مجارستان واردلی، لهستان (قامیچه) ایله (پودولیا) یی، وندیک (موره) ایله (دالمیاسیا) یی ایستدکلرندن مذاکرات صلحه عقیم قالدی. قریم خانک باب عالی ایله لهستان آره سنده طوغریدن طوغری یه عقد مصالحه ایچون صرف ایلدیکی مساعیدن دخی بر نتیجه حاصل اولمدی.

۱۱۰۳ و ۱۱۰۴ سنه لرنده مخاصماتک شدتی زائل اولدی. دولت عثمانیه حال تدافعه بولنیوردی.

آوستریا بوندن بالاستفاده بتون قوتی فرانسه یه قارشی، غرب محاربه میدانلرینه نقل ایتشدی. یالکیز وندیکلیلر، حرکتلرنده دها سربست اولدقلری ایچون، ۱۱۰۵ سنه سنده محاربه یه کرمی ویردیله. ساقز آطه سنی ضبط ایتدیله.

اوصره ده سلطان احمد ثانی وفات ایدرک سلطان محمد رابع شهزاده سی سلطان مصطفای ثانی جلوس ایتدی [۱۱۰۶]

جلوس هایوندن بر آرز صکره وندیکلیلر ساقز صولرنده (مزومورتو حسین پاشا) نک کیلرینه مغلوب اولدیله؛ ایکی قانلی محاربه یی غائب ایتدیله. ساقز عثمانیلر طرفدن استرداد اولندی.

اوتوز بیاشده جلوس ایدن سلطان مصطفای ثانی سلطان مصطفای ثانیك بالذات سفره کیتک ایتدی؛ ۱۱۰۷ [۱۶۹۵] آوسربا سقری سنه سنده مجارستانده حرکات تجاوزیه باشلا یه رق

(لیوه) دخی دنیلن (لیا) یی، (لوغوس Lugos) قلعه سنی ضبط و آوستریا جنرالی (وهرانی Veterani) یی مغلوب ایتدی. ایرتسی سنه

اوستریالیر طمشواری عسا کر کلیه ایله محاصره ایتدکلرندن سلطان مصطفای ثانی تکرار مجارستانه کیدرک (اولاش Olasch) موقعنده (صاقسونیا) پرنسک قومانداسنده کی اردوی پریشان ایلدی .

او صروده فرانسه حکومتی ایمپراطور ایله مذاکرات صلحیهیه کیریشه رک (ریسویک Risvik) مصالحه نامه سنی عقد ایتدی [۱۶۹۷] . اون دردنجی (لوئی) بو مصالحهیه دولت عثمانیه یی دخی ادخال ایتک ایستدی ایسه ده باب عالیجه قبول اولمادی . حال بوکه (ریسویک) مصالحه سنک عقدندن اول ایمپراطور فرانسهیه قارشی قوللاندینی کزیده عسکرینی واک ماهر قوماندانی اولان پرنس (اوژن) ی عثمانیلر اوزرینه سوق ایتدی .

۱۱۰۷ سنه سنده روسیه چاری (پترو) آزا ق قلعه سنه هجوم ایتمش ، فقط اوتوز بیک تلفات ویره رک رجعته مجبور اولمشدی . ایرتسی سنه دولت عثمانیه نك آق دکرده ، مورده ده ، مجارستانده ، لهستان و بوسنده ده محاربه ایله مشغول اولمسندن بالاستفاده تکرار قلعه یه هجوم ایدرک ضبطه موقع اولدی .

سلطان مصطفای ثانی ۱۱۰۹ سنه سنده مجارستانه کیتدی . اردوی هایون بلغرادده ایکن محل مذکور محافظی عموجه زاده حسین پاشا ایله صدر اعظم الماس پاشا (وارادین) اوزرینه کیدلمسنی تنسیب ایتمشلر ایسه ده اردو ارکاننک مخالفتلرینه بناء طمشواز جهتنه عزیمت اولندی ؛ (تایس Theiss) ایرماغی کچیلدیکی صروده (زانتا) موقعنده پرنس (اوژن) آنسزین اردوی هایونه هجوم ایتدی . وقوعه کلن محاربه ده اون بیکی متجاوز ضایعات ویرلدی ؛ صدر اعظم ، درت وزیر ، اون اوچ بک ، ارکان عسکریه میدان حربده دوشدی . بوهزیمت اوزرینه صربستان و بوسنه جهتلری دشمنک تجاوزاتنه معروض قالدی .

(زانتا) محاربہ سندن صکرہ کو پرلی محمد پاشانک برادری حسن آغانک اوغلی اولان عمو جہ زادہ حسین پاشا مقام صدارتہ کتیرلدی . حسین پاشا همان تدارکات حربیہ بہ باشلایہ رق آ زماندہ آوستریالیلری (صاوا) نہرندن اوبر طرفہ آتبعہ موفق اولدی . دیگر طرفدن انکلترہ سفیری (پاجت) ک توسط تکلیفلرینی قبول ایتدی . اون دردنجی (لوئی) نک دولت عثمانیہ یی یالکیز براقہ رق ایمپراطور ایلہ عقد مصالحہ ایتمسندن طولای فرانسه ایلچیبی (فریبول) ک محاربہ بہ دوام ایتک خصوصندہ کی تشوقاتنی نظر دقتہ آلمدی . فرانسه ایلچیبی، (ریسویق) مصالحہ سنک قریباً اخلال ایدیلہ جکنی و آلمانیا ایلہ فرانسه آرہ سندہ اسپانیا وراثتی مسئلہ سندن طولای محاربہ باشلامق اوزرہ بولندیغنی سویلہ رک دوام حربہ تشویق ایدیوردی .

سلطان مصطفای ثانی دخی ضایعات ملکیہ استرداد اولندجہ مصالحہ طرفداری دکل ایدی . فقط عمو جہ زادہ حسین پاشا سفرك دوامی حبیلہ ممالک عثمانیہ اہالیسنک دوچار سفالت و پریشانی اولدیغنی ، دولتک یورغون دوشدیکنی ، درت دولتہ قارشی محاربہ دن ایسہ اتفاقک انحلالنی بکلیہ رک وبر طرفدن دہ تنظیم و تزید قوای عسکریہ بہ صرف ہمت ایلہ رک ایلریدہ فرصت دوشدجہ حقلرندن برر برر کلنسی موافق اولہ جغنی بیان ایدیوردی . دول متفقہ بہ کلنچہ ؛ آوستریا اون آلتی سنہ دن بری دوام ایدن بو محاربہ بہ اولسہ اولسہ طمشوار ایالتنی آلق ایچون دوام ایدہ جکدی . فقط بوراسی صورت مکملہ دہ تقویہ ایدلدیکندن دوام حربدن بر فائدہ حاصل اولمہ جغنی آ کلامشدی . وندیکیلر مورہ یی آلدققدن صکرہ آق دکزدہ دونمالری ، بوسندہ اردولری مغلوب اولدیغندن مورہ بہ تصرفدن بشقہ برادعالری

یوقدی . اهلر (قامنیچه) محاصره سندن بر قاج دفعه منهنزماً رجعت ایتمشلردی . مملکتلری تاتار آقینجیلری طرفندن یغما ایدیلوردی . روسیه چاری پترو آزاق قلعه سنی آلمشدی ؛ فقط اصلاحات داخلیهیه محتاج اولدیغندن محاربه یه ختام ویرلمسی طرفدار ی ایدی .

بوتمایلات صلح پورانه یه ، انکلتروه و هولانداسفیرلرینک قارلوفیچه معاهده سی توسط لرینه بناءً مصالحه یه قرار ویرلدی . رئیس الکتاب رامی محمد افندی ایله دیوان هایون ترجمانی ماوروقورداتو پنا یو پ بک مرخص تعیین ایدلایلر . یدی دولتک مرخصلری (صاوا) ، (دراوا) نهرلری آراسنده کائن (قارلوفیچه Karlovitz) قصبه سنده اجتماع ایله یتمش ایکی کونده و اوتوز آلتی جلسه ده یکرمی بش سنه لک متارکه شکلنده اوله رق مواد آتیه یی قرارلشدیردیلر [۱۱۱۰ — ۱۶۹۹] :

دولت عثمانیه اردل ، طمشوار ایالتی مستننا اولمق اوزره مجارستانی ، سیرمیه [اسقلاوونیا] قطعه سنک قسم اعظمی اوستریایه ترک ایتدی . دولت عثمانیه ایله اوستریا آراسنده کی حدود (اونا Unna) ، (صاوا) (دراوا) ، (تایس) ایرماغی ایله برلشدیکی نقطه یه قدر طونه نهرلری ایدی . (قامنیچه) قلعه سیله (بودولیا) و غربی (اوقراین) لهستانه ویرلدی . دالماسیانک (کرکا Kerka) و (ناره نتا Narenta) آره سنده کی قسمی ، (قورینت) مستننا اوله رق (پلوپونس — موره) قطعه سی ، (آیاماورا) آطه سی و ندیکه ترک اولندی . روسیه آزاقی آلدی . لهستانک قریم خانسه ویردیکی ویرکو عفو اولندیغی کبی دول سائرهنک ویرکو وهدیله نامیله دولت عثمانیه یه اوته دن بری ویردکلری عائدات هیچ قاله آلمدی . قارلوفیچه معاهده نامه سی دولت عثمانیه نک سیاست خارجیه سی تاریخنده بروقه مهمه در . سلطان سلیمان قانونینک فتوحاتندن اک کوزل قسمی ترک

ایدلشدری . بومعاهده اوروپالیلرک قلوبندہ عثمانیلرک ہیبتندن حاصل اولان خوفی ازالہ ایتدی .

محاربه نك سببی اولان (توکلی) بك مذاکرات صلحیہ ائناسندہ آوستریا حکومتی طرفندن طلب ایدلدی . فقط دولت عثمانیہ اعاده حربی مهمانکشلکه ترجیح ایدرک شدتله مخالفت کوستردی . (توکلی) بك ازمد طرفلرنده کنیدیسنه ویریلن چیفلتنکه چکیلدی .

دولت عثمانیہ درت حکومت ایله اون آلتی سنه دوام ایدن بومحاربه ده اوروپاده جدی برمتفق بوله مدی . اکر فرانسه ودولت عثمانیہ ایمپراطوره قارشی عینی زمانده اعلان حرب وعقد صلح ایتسه لر نتیجه احتمال که بشقه درلو اولوردی . فقط مخالفت مذهبیہ ، اون دردنجی (لوئی) نك افکار مخصوصه سی واسباب سائرہ خلیفہ اسلام ایله (Très Chrétien) نك عنواتی حائز فرانسه ، قرالی آره سندہ ائتلاف واتفاق حصولنه مانع اولدی . بالاخره اسپانیا وراثتی مسئله سندن طولایي آلمانیا ایله فرانسه آره سندہ ظهور ایدن محاربه ده دولت عثمانیہ بیطرف قالدی ، قوای مالیه وعسکریه سندہ کی ضعف ، سلطان مصطفای ثانینک خلعی واحمد ثالث جلوسی زماننده کی اعتشاشات ضایعات ملکیه یی استرداد ایچون عثمانیلرک سلاحه صارملرینه مانع اولدینی کبی وقیله فرانسه نك (توکلی) زردنده مأمور مخصوص صفیله عثمانیلرک یدی بیوک محاربه سندہ بولمنش وبالاخره استانبوله ایلچی تعیین ایدلمش اولان (فوریول) باب عالیده هیچ برنقوزه مالک اوله مدی . فرانسه ایلچیسی عادت خلافت اوله رق حضور شاهانه یه قلیج ایله کیرمک ایتدی ، بوغاز ایچنده پادشاهک قایغنه مشابه برقاق ایله کز مکہ باشلادی ؛ بواحوال سفیرک استانبوله بولندینی مدتجه حضور شاهانه یه قبول ایدلمه مسنه سبب اولدی . اون سنه صکره (فوریول) ک شعورینه خلل کلدی .

یونی خبر آلان صدراعظم : « ذاتاً استانبوله کلدیکی کوندنبری دلی ایدی . »
 جوانی ویردی . بوکا مقابل انکلتزه سفیری (پاجت) مصالحه یه توسطندن
 طولانی نائل التفات اولیور . باب عالی اوزرنده کی نفوذینی محافظه ایدیوردی .
 فرانسه نك غیرتنه رغماً دولت عثمانیه اسپانیورائی محاربه سنه اشتراك ایتدی .

عموم زاده حسین
 قاله رق رئیس الکتاب رامی محمد افندی و ترجمان
 دیوان هایون ماوروقورداتو بکی امور حکومتده

یا

استخدام ایتدی . بدایت مأموریتده مضایقه مالیه یی ازاله یه ، آوستریایه
 قارشی براردو ترتیبه ، بعدالمصالحه ایران ، قریم ، مصر و عربستانده
 ظهور ایدن عصیانلری برطرف ایتمه موفق اولدی . بالخاصه مصائب
 سفریه دن پریشان اولان حدوده یاقین اهلینک تهوین ضرورتلرینه
 چالیشدی ؛ بونلرک بر سنه لک ویرکولرینی عفو ایتدی . مدرس ، امام
 و حاکمک سوه استعمالاتی منعه و مزومورتو حسین پاشا ایله برلکده
 دونمای هایون امورینی نظام آلتنه آلمغه ، اوجاقلرک اصلاحنه صرف غیرت
 ایتدی . نهایت شیخ الاسلام فیض الله افندینک هرشیئه مداخله سی ، صدر
 اعظمک محبی اولان رجالک تبدیلی حسبیله استعفا واون یدی کون صکره
 وفات ایلدی [۱۱۱۴ — ۱۷۰۲] .



ایکینچی قسم

۱۶ و ۱۷ نجی عصر لرده اوروپا

۱۴۹۴ دن ۱۵۵۹ تاریخنه قدر اوروپا سیاست عمومیہ سی

اون بشنجی عصر نہایتندہ غربی اوروپادہ اوچ
اورہ بشنجی عصر حکومت تشکیلات داخلہ لرینی همان همان اکال ایتش
اواخرندہ اوروپا وکړک عسکرجه ، کړک نقدجه منابع مهمہ یه مالک
بولمش اولغله توسیع ممالک سیاستنی تعقیبه مقتدر بر حالہ کلشردی .
بو اوچ دولت سکرنجی شارلاک اجرای حکومت ایتدیکي فرانسه ،
یدنجی هازی تودورک قرال اولدینی انکلتړه ، فردیناند وایزابللاک
اداره ایتدکلی اسپانیا ایدی .

مرکزی اوروپادہ آلمان ایمپراطورلنی یوزلرجه کوچک حکومتلره
منقسم اولدینی جہتلہ - ثروتہ رغماً - مؤثر وفعال برسیاست حربیہ
تعقیبنہ مقتدر دکلدی . معافیہ بورادہ قوتلی بر خاندان حکمداری ،
یعنی آوستریا خاندانی بولمقدہ و بو خاندانک رئیس ماقسیملیان آلمانیا
ایمپراطورانی مقامنی اشغال ایتمکده ایدی . ماقسیملیان ، پدری اوچنجی
فرہدریقک « بتون جهان حکومتی آوستریاہ » قول معروفنی کنڈیسنہ
دستور حرکت اتخاذ ایتہمش اولمقلہ برابر برشی قازانمق امید ایتدیکي
ہر مسئلہ یه مداخلہ ایدہ جک قدر حریص اقبال ایدی .

جنوبی آوروپاده ایتالیا ایکنجی بر آلمانیا ایدی . پرنسلیرنیک
وجهوریتلرنیک حرص و خصوصتلی نتیجه سی اوله رق پارچه لائمش
اولان ایتالیا قوتدن دوشمش ، اتریقهلردن بشقه بر صورتله کنبدنی
مدافعه ایدمه جهک برحاله کلش ایدی . لدی الایجاب اجنبی حکمدارلرنی
دعوته مهیا ایدی . اونک ایچون حریص قومشولری نظرندله ایتالیا
دائما اشتهاپی تحریک ایدن بر شکار حکمنده ایدی .

شرقی آوروپاده ۱۴۵۳ تاریخندن بری قسطنطنیهیه صاحب اولان
ترکلر بالقان شبه جزیره سی فتوحاتی اکمال ایتشلردی . مکمل براردویه ،
بالخاصه مدهش یکیکچری پیاده سنه قوماندا ایدن عثمانلی پادشاهلری مجارستانه
و مرکز ی آوروپایه طوغری توسیع ممالکه حاضر لانیورلردی .

۱۴۹۴ د ۱۵۵۹ تاریخه قدر آلتش بش سنه

غربی آوروپا دولتلری صورت دائمه ده حال سفر
بریده بولندیلر . فقط آلتش بش سنه ظرفنده

دائما حرب ایتدیلر . صلح و حرب همان مساوی
عمومیه سی

فاصله لرله بربرینی ولی تعقیق ایتش ، بو صورتله صلح ایچنده کچن سنه لک
مجموعی حرب سنه لری مجموعنه همان مساوی بولنمشدر . فقط مصالحه لر
دائما متساوکه حکمنده قالمش ؛ هر دولت صلح زمانی قوتلرنی یکیدن
طویلامق ، متفق آرامق و یکی محاربه لره حاضر لائمی ایله کچیرمشدر .

عددی اون ایکییه بالغ اولان بو محارباتک برنجی سبی فرانسه
قرالیرنیک ایکی ایتالیان حکومتی اوزرنده ، ناپولی ایله میلان دوقه لغنده ،
ادعای حق ایللری واسپانیا قرالک ناپولی یی ، آلمانیا ایمپراطورینیک
میلان دوقه لغنی الملق ایسته ملریدر . ایتالیا ، اوزون مدت ، باشلیجه
میدان حرب اولدی . اونک ایچون محاربات مذکوریه اکثریا ایتالیا

محاربہ لری « دنیلیر . فقط ۱۵۱۹ دن اعتباراً ایتالیا ینہ میدان حرب اولقلہ برابر محارباتک سبب حقیقیسی اولدی . آرتق نابولی حکومتی ومیسلان دوقه لنی ایچون دکل ، اوروپاده - برطاقم ازدواج ومیراثلرک تصادفی نتیجه سی اوله رق - تشکل ایدن بر بیوک دولتک دول سائرہ استقلاللرینی دوچار مخاطره ایتدیکی ایچون حرب ایدلدی . بو دولت آوستریا خاندانی رئیس شارلکنک حکومتی ایدی . فرانسه قراللری ایتالیا محارباندہ اولدینی کبی بو دولته قارشو وقوعه کلن حربلرده دخی برنجی موقعی اشغال ایتدیلر . فرانسه خاندانی آوستریا خانداننک فوق - الحد بیون قوت وسطوتی تنقیصه چالیشدی . فقط آلمان پرنسلی ، دولت عثمانیه ، انکلتره کبی دیگر حکومتلردخی ایشه مداخله ایتدکلرندن فرانسه وآوستریا خاندانلری آرہ - سنده کی مبارزه بر اوروپا محاربہ سی حالی آلدی .

بنام علیہ ۱۴۹۴ دن ۱۵۵۹ تاریخنه قدر وقوعه کلن محارباتی ایکی دورہ یه آیرمق اقتضا ایدر :

اولا ، ۱۴۹۴ دن ۱۵۱۹ تاریخنه قدر اصل ایتالیا محاربہ لری .
ثانیاً ، ۱۵۱۹ دن ۱۵۵۹ تاریخنه قدر فرانسه وآوستریا خاندانلری محارباتی .

بو آلتمش بش سنه لک محاربات فرانسه ده یدنجی شارل ، اون ایکنجی لونی ، برنجی فرانسوا ، ایکنجی هازی ؛ اسپانیاده فردیناند قتولیک ، شارلکن ، ایکنجی فیلیپ ؛ آلمانیا ده ماقسیملیان ، شارلکن وبرنجی فردیناند زمانلرینه تصادف ایدر . سلطان سلیمان قانونی ایله انکلتره قرالی سکزنجی هازی دخی بومحاربہ لرده مهم روللر اوینادیلر .

ایتالیا محارباتی

ایتالیا محارباتک

اسبانی

ایتالیا محارباتک اسپانی هم فرانسه ده ، هم فرانسه
خارجنده آراملیدر . برنجی سبب بر وصیتنامه در .
آراغونیا خاندانی طرفندن ناپولی قراللغندن طرد
ایدلش اولان (رنه دانزو) ۱۴۸۰ تاریخنده فرانسه قرالی اون برنجی
لوی بی کندیته وارث اتخاذا ایدهرک (پرووانس) ، (مهن) و (آنزو)
قطعه لرندن ماعدا ناپولی تاجی اوزرنده کی حقوقی اوکا براقشدی .

اون برنجی لوی ناپولی تاجی اوزرنده کی حقوقی استحصاله اصلا
تثبت ایتدی . چونکه دائماً تأتی واحتیاط ایله حرکت ایدر ، غایت عملی
دوشونور ، ترقی سن ایله تجربه صاحبی اولمش بر حکمدار ایدی .
فرانسه حدودندن سکز یوز کیلومترودن فضله اوزاقده بولنان ناپولی بی
آلسه بیله بونکه فرانسه نك قوتی آرمیه جغنی ، بالعکس مصارف کثیره
اختیارینه مجبور اوله جغنی آکلامشدی .

فقط اون برنجی لوی نك یرینه کچن سکزنجی شارل پدرینك تمامیه
ضدی اوله رق سرگذشته جویانه وقعه لره مجلوب ، خیالی وهنوز یکرمی
یاشنده ایدی . شوالیه رومانلری ، شارلمانك افسانوی سفرلری اوقویه
اوقویه ، ذهنی حال اشباعه کلش ، شارلمان کبی بیوک ایشلر یایمق هوسنه
دوشمشدی . ترکلره قارشى اهل صلیب سفرلری ترتیبی ، قسطنطنیه نك
ضبطی تخیل ایدیوردی . بو شهری آلدقدن صکره ایمپراطورلق تاجی
کیه جك ، شرق ایمپراطورلغنی احیاوقدسی مسلمانلردن استرداد ایله جك
ایدی . بو خیالاتی موقع تطبیقه قویمق ایچون ناپولینك ضبطی پك بیوک

بر فائدہ تأمین ایدہ جکدی . چونکہ ناپولی شرق یولی اوزرندہ برنجی مرحلہ ، بر اس الحركه اولہ جقدی . ایشہ ، بو تصورات سکزنجی شارلک (رمنہ دانرو) طرفدن فرانسه قرالترینہ ترك ایدیلن حقوقی استحصالہ تثبٹ ایلمسہ سبب اولدی . بنابرین سکزنجی شارلک خیالاتی ایتالیا محارباتنك ایکنجی سببی عد ایدیلہ بیلیر .

اوجنچی بر سببده اون ایکنجی لوئینك جلوسنی متعاقب [۱۴۹۸] ظهور ایتدی . لوئینك بیوك پدری و آلتجی شارلک برادری دوق دورلثان میلانك ایلک دوقه سی (ژان غاله آس)ك قیزی تروج ایتمشدی . اون ایکنجی لوئی بو صفته - لودوویق اسفورچا طرفدن ضبط ایدلمش اولان - میلان دوقه لنی اوزرندہ ادعای حق ایتدی . حتی جلوسی کونی میلان دوقه سی عنواتی آلدی . ناپولی قرالینی اوزرندہ کی ادعایه بودوقه لقی اوزرندہ کی ادعایه دخی منضم اولدی .

فقط ایتالیا محارباتی یالکز فرانسه قرالترینك ادعایله ظهور ایتدی . فرانسه خارجنده دها بعض اسباب بو محارباتی تولید ایلدی . اسرارنكلی اولمسندن طولای «ماوریتانیالی لودوویق Ludovic le Maure» لقبیله یاد ایدیلن (لودوویق اسفورچا) ناپولی قرالی طرفدن تهدید ایدلمسی اوزرینه سکزنجی شارلدن استمداد ایتدی . دیگر طرفدن فرانسه قرالری قارشیلرنده یالکز ناپولی قرالی ایله میلان دوقه سنی بولمش اولسه لر ایدی محاربه چابوق بیتردی . فقط ناپولی قرالنی مسئله - سنده بو قرالغه کوز دیکمش اولان سیچلیا و آراغونیا قرالی فردیناند قتولیک ، میلان دوقه لنی مسئله سنده سوزرن صفتیله بو دوقه لنی الہ ایتك ایستہ یین ایمپراطور ماقسیمیلیانی قارشیلرنده بولایلر . الحاصل فرانسه قرالی کبی بر قتولی حکمدارك ایتالیا دہ یرلشمسی ونديك ، فلورانسہ ،

پاپا لقی حکومتلرینک استقلاللری ایچون بر تہلکہ اولدیغندن بونلر تلاشہ
دوشمشلر ایدی . بوندن طولایی ایتالیا محارباتی تاریخی پک قاریشیق
بر حالہ کتیرن بر چوق اتفاقلر عقد ایدلدی . اویلہ اتفاقلر، کہ سرعتلہ
عقد ایدیلیر ، پک آرز زماندہ بوزیلور ، لایتقطع تجدید اولنوردی . بز
باشلیجہ وقایعی ذکر ایدہ جکر .

سکزننجی شارل ۱۴۹۴ ایلولندہ ایتالیاہ ایندی .
برنجی نابولی سفری فرانسز اردوسی آلپ طاغلرندن نابولی قرالغی
حدودینہ قدر بر تترہہ کیدر کی راحتجہ کیتدی . فرانسه قرالغی
قوتندن قورقولدیغی ایچون شارل میلان ، فلورانسہ ورومادہ بر دوست
صفیتلہ استقبال ایدلدی . نابولی قرالغی حدودندہ جزئی بر مصادمہ
اولدی . نابولی اردوسی قاچدی ؛ قرالی سیچلیایہ التجا ایتدی . بدایت
سپردن بش آی صکرہ سکزننجی شارل نابولی شہرندہ ایدی [۲۲ شباط
۱۴۹۵] . دوت بیاض بارکیرک چکدیکی بر مکلف آرابہہ بینمش ،
ایمپراطورلق تاجنی کیمش ، انہ ایمپراطورلق علاماتی اولان عصا ایلہ کرہنی
آلش اولدیغی ، عسکرواھالی طرفندن « قسطنطنیہ ایمپراطوری و قدس قرالی »
صفیتلہ آلقیشلانیدیغی حالہ شہرہ کیردی .

اوچ آی صکرہ سکزننجی شارل - دشمنلری طرفندن محاصرہ
ایدلمہ مک ایچون - شہری ترکہ مجبور اولدی [۲۰ مایس ۱۴۹۵] .
فی الحقیقہ ونیکیلیر ، لودوویق اسفورچا ، پاپا الکساندر بورجیا ، ایمپراطور
ماقسیمیلان ، فردیناند وایزابل قتولیک فرانسه قرالی علیہنہ عقد اتفاق
ایتمشلردی . متفقین اردوسی (آپہنین) کیدلری مدخلندہ ، (فورنوئہ
Fornoue) دہ سکزننجی شارلک خط رجعتنی کسمکہ چالیشدی [۵ تموز] .

فقط فرانسز عسکری شدتلی هجوملری سایه سنده یولی آچدی ؛ شارل عزیزمتندن برسنه صکره فرانسه یه عودت ایتدی .

ناپولی قراللغده براقیلان عسکر بر سنه دن فضلہ ، ۱۴۹۷ سنه سی اوائلنه قدر اوراده قالمیلدیلر . تاریخ مذکورده سکرنجی شارل ایٹالیدان کف ید ایتدی و ۱۴۹۸ ده وفات ایلدی .

اون ایکنجی لوئی قرال اولور اولماز میلان دوقه لغنی **میدونه دوقه لغنی**

ضبطه تشبث ایتدی : ۱۴۹۹ ده باشلایان حرب **برنجی دفعه ضبطی** یدی آیده اکمال ایلدی . (نوواره) محاربه سنده

اجرتلی عسکرلری طرفندن ترک ایدیلن لودوویق اسفورچا فرانسه یه کوتورلدی ؛ (لوش Loches) شاتوسنه حبس ایلدی ؛ اوراده وفات ایلدی [۱۵۱۰] . اون ایکنجی لوئی میلان دوقه لغنه اون درت سنه قدر صاحب اولدی .

اون ایکنجی لوئی میلان دوقه لغنی ضبط ایتدکن **ایکنجی ناپولی**

صکره ناپولی قراللغنی استرداد ایتک ایستهدی .

فردیناند قتولیکک سدره اولمغه چالیشمسندن ویکنی **مفری**

اولان ناپولی قرالی اوچنجی فره دریقه امداد ایتمسندن قورقدیغی ایچون آراغونیا قرالنه ناپولی حکومتک مقاسمه سنی تکلیف ایتدی . زمانک اک خائن وحیله کار حکمداری اولان فریناند بوتکلیفی قبول ایلدی : اوچنجی فره دریقه معاونت ایتک بهانه سیله عسکرینی ناپولی شهرینه سوقدی . ۱۵۰۰ ده ناپولی قراللغنی فتح ایدلمشدی . فردیناند سیچلیا قارشیسنده کی (قلابریا) یی ، (پوی) طرفلرینی اشغال ایتمش ؛ اون ایکنجی لوئی قراللغک قسم متباقیسی ایله برلکده ناپولی قرالی عنوانی آلمشدی .

فقط براز صکره فردیناند فرانسزلی ناپولیدن طرد ایتک وبتون

قراللی کنديسی ایچون ضبطه باشلادی . ۱۵۰۴ ده قرطبه لی غونزالو Gonzalve de Cordoue اسمنده کی ماهر جنرالی سایه سنده نائل مقصد اولدی واون ایکنجی لوتی (بلووا Blois) ده عقد ایدیلن بر متارکه ایله نابولی یی فردینانده بر اقدی .

ایتالیا محارباتی بوصورتله ختام بوله بیلیرکن پاپا ایکنجی **ایکنجی ژول** ژول مخاصماتک تکرار باشلامسینه سبب اولدی . ایکنجی ژول اون آلتنجی عصرک اک شایان دقت سیالرندن بریدر . هرشیده ، سیاسیانده ، صنایع نفیسه ده بیوک ایشلر یامغه هوسکار ایدی . پاپالغه انتخابی صره سنده ۷۲ یاشنده اولقله برابر بو مقامده قادینغی اون سنه ظرفنده [۱۵۰۳ — ۱۵۱۳] کنجلره شایان بر فعالیت فکریه ، شدت احتراض وحدت وتهور کوستردی . پاپادن زیاده بر سیاسی ، بر عسکر ایدی . (میشل آنر) ه سویلدیکی بر سوز ایله گندی حالتی پک کوزل تصویر ایتمشدی . استاتوسنی سپارش ایتدیکی هیکل تراش شهر ، پاپایی آئنده بر کتاب اولدینغی حالده کوسترمک ایسته مش ، ایکنجی ژول : « نصل ، بر کتابی ؟ بن ادیب دکلم ! اله بر قلیج ویر » دیه باغیرمشدی .

فی الحقیقه ایکنجی ژول لباس وتاج روحانی یی کییدیکی کبی زره ومغفر دخی طاشیدی . محاصره لره قوماندا ایتدی ؛ مغلوب قلعه لره سورلرنده آچیلان رخنه لردن ایچری یه کیردی . برونديک سفیری ایکنجی ژولک بتون دنیا یه حاکم اولق ایسته دیکنی سویله مشدی . شبهه بز ایکنجی ژول بودرجه واسع خیاله قایلمدی . فقط بتون مساعیسی غایت نجیب بر فکرک حصوله صرف ایتمکدن اصلا خالی قالمدی : انقسامه اوغرایان ، اجانبک آیاقلری آئنده چیکنه بن ایتالیان متحد وحر بر ایتالیا یامق ؛ ایتالیانک

طاغینق قوتلرینی پاپانک اداره سی آئندہ طوبلایوب « باربار » نامیلہ یاد ایتدیکی فرانسزلی ، بعدہ اسپانیوللری طرد ایتک .

فقط ایتالیاده بردولت وارایدی که پاپانک هکه مونیاسنی
ونریک علیه اتفاق
 بالاخیار قبول ایدمه جک واستقلالنی قسماً پاپلق
 مقامنه تسلیمه راضی اوله میه جق درجه ده قوتلی ایدی . بودولت ونریک
 جمهوریتی ایدی . اول باول ونریکی ازمک لازم کلیوردی . ایکنجی ژول
 بوکا موفق اولمق ایچون « باربار » لره مراجعته مجبور قالدی . ونریکیلرک
 ثروت وسطولرینه هرکس حسد ایتدیکی ایچون ۱۵۰۸ تاریخده
 (قامبره) ده جمهوریت علیه بر اتفاق - قولایجه - وجوده کلدی .
 اون ایکنجی لوئی ، ایمپراطور ماقسیملیان ، فردیناند قتولیک ، فلورانسہ ،
 پاپا متفق اولدیلر . ایلک اوکجه حاضر لانان فرانسه اردوسی (آئیدهل) ده
 ونریکیلری مغلوب ایتدی [مایس ۱۵۰۹] . فرانسزلر قولایجه نائل ظفر
 اوله مدیلر ؛ اون ایکنجی لوئی عسکرینی تشجیع ایچون استحقار موت
 ایدرک عادی بر نفر کی چارپیشدی . میدان حربده اون بیك قدر ایتالیان
 پیاده سی قالدی .

ونریکیلر ایکنجی ژولدن صلح طلبنه مسارعت
اونه ایکنجی لوئی
 ایتدیلر . بوندن صکره پاپا ونریک علیه عقد ایدلمش
علیه اتفاق
 اولان اتفاقی فرانسه قرالی علیه چویرمکه چالیشدی .
 ۱۵۱۱ ده بوکا دخی موفق اولدی . قامبره اتفاقی فرانسه علیه کی
 « اتفاق مقدس » ه تحول ایتدی . اسویچره لیلر وبعده - فرانسه دن (کوئینه)
 قطعہ سنی آلمق ایسته یں - انکلتره قرالی سکزنجی هازی دخی بو اتفاقه
 داخل اولدیلر .

حرب ، ایلک اوکجه ، اون ایکنجی لوئی یه مساعد برطرزده جریان

ایتدی . ۲۲ یاشنده بر ماهر جنرال اولان یکنی (غاستون دوفووا Gaston de Foix) سریع مانووره لری سایه سنده متفقری آنی هجوملره اوغر ایتدی و اونلرک اردولرینی بر برینی متعاقب بولونیا ، بره سچیا و راوهنه محاربه لرنده مغلوب ایتدی [۵ شباط — ۷ نیسان ۱۵۱۲] . صولک محاربه ختام بولدیغی صرهدده کندیسی ده تلف اولدی . بوندن صکره حرب اون ایککنجی لویئنک علیهنه دوندی . اسویچره لیلر (نوواره) ده فرانسر اردوسنی مغلوب ایتدیلر [۱۵۱۳] . فرانسلر میلان دوقه لغنی غائب ایلدیلر . حتی فرانسه بیله استیلایه اوغرادی . شرق طرفنده ، اسویچره لیلر (بورغونیا) یه کیردیلر و (دیژون) ه قدر ایلر یله دیلر . شمالده ، (قاله) یه چقان انکلیرلر (پیقاردیا) یی استیلا ایتدیلر ؛ ایمپراطور ماقسیمیلیانک عسکر یله برلشدکن صکره (تورنه Tournai) جوارنده فرانسلر مغالب کلدیلر [آغستوس ۱۵۱۳] . مع مافیه اون ایککنجی لوی پاره قوت یله دشمنلرینی توقیفه موفق اولدی ؛ بعده ایککنجی ژولک مقامنه قائم اولان پاپا اونجی لئون ، ایمپراطور و فردیناند قتولیک ایله متارکه نامه لر امضا ایتدی . بو متارکه لرک همان امضا ایدلمسنی متعاقب وفات ایلدی [۱ کانون ثانی ۱۵۱۵] .

اون ايكنجى لوئيئك خلفى اولان يىكنى برنجى
فرانسوا دىخى (والانتين ويسقوتى) احفادندى
اولدىنى و بناء عليه ميلان دوقه لغنه ادعاى حق
ايلدىكى جهتله قرال اولور اولماز بو دوقه لغنى يىكىدن فتحه تشبث ايتدى .
وندىكىليرك اتفاقنى تاامين ايلدىكىدن صكره آلپ طاعلرندن كچدى . ايكى
كون محاربه دن صكره [۱۳ — ۱۴ ايلول ۱۵۱۵] مارينيان مظفريتنى
قازانمى اوزرینه دوقه لغنه صاحب اولدى .

بونڈن بشقہ مارینیان مظفریتی فرانسه قرائنک رقیلرینی اسکیسی کبی
 متارکہ دکل ، مصالحہ امضاسنه محبور ایتدی . ایلک اوکجه پاپا اوتنجی لئون
 بولونیاده مذاکراته کیریشدی . ۱۵۱۶ قونقورداسی عقد ایدلدی . بعده ،
 اسویچره لیلر فریبورغده « صلح مؤبد » ی امضا ایتدیلر . اسویچره لیلر
 بو مصالحه نامه ایله فرانسه قرائنک دشمنلرینه اجرتلی عسکر ویرمه مکی
 تعهد ایدیورلردی . بوکا مقابل فرانسه قرالی سنوی بر مقدار پاره
 اعطاسی مقابلنده اسویچره قانتونلرندن ایسته دیکی قدر عسکر آله بیله جک
 ایدی . بو معاهده یه طرفین ۱۷۸۹ اختلال کیرینه قدر تمامیه رعایت
 ایتدیلر . آلمانیا ایمپراطوری واسپانیا قرالی میلان دوقه لغنک برنجی
 فرانسوایه عایدیتی (نویون Noyon) معاهده سیله تصدیق ایلدیلر .
 برنجی فرانسوا میلان دوقه لغنه مقابل ناپولی قرالغنی اسپانیا قرالنه ترک
 ایلوردی . بناء علیه ایتالیا فرانسه واسپانیا قراللری آرسنده تقسیم
 ایدلمش ، شمال جهتی فرانسه نك ، جنوب طرفلری اسپانیانك تحت نفوذ
 و حاکمیت کیرمش دیمکدر .

ایتالیا محارباتی بوصورتله ختام بولدی . ۱۵۱۸ سنه سنده غربی آوروپا
 صلح و مسالمت ایچنده ایدی .

ایتالیا محاربه لری عسکرلک نقطه نظرندن بیوک بر اهمیتی
 محازدر . فی الحقیقه بو محاربات قرون وسطی اصول
 حربی ایله محاربات جدیدہ اصولی آرسنده بر دوره انتقال حکمنده در .
 ایتالیا محاربه لرندہ هم باشند آیاغه قدر وجودی ستر ایدن اسکی چلیک
 زرهلرک ، همده آرتق بوزرهلری فائده سز بر حاله کتیرن طوب
 وآرکه بوزکبی اسلحه جدیدہ نك قوللانیدلینی کورلمشدر . کذلک قرون
 وسطی اردولرینک باشلیجه منبع قوتی اولان سواری ایتالیا حربی

میدانلرندہ پارلاق بر رول اوینامقلہ برابر بونک یانندہ یکی اردولرک اسالاسی - ناپولئونک تعیری وجهلہ «ملکہ محاربات» - اولان پیادہ نک اہمیتی آرتدینی مشاہدہ ایدلمشدر .

اسلحہ ناریہ دن یالکز طویلر مدھش بر آلت حرب اولمغہ باشلا - مشدی . طوپ اعمالی صنعتی ؛ اصلاح اولنش طونجدن اصاغہ اولندینی جہتلہ پاتلامق تہلکہسی بر طرف ایدلمشدی . نشان آلمنی تسہیل ایدہ جک بعض ترتیبات یاییلمش ، شمدیکیلرہ مشابہ طوپ آرابہ لری وجودہ کتیرلمشدی . فقط بو طویلر پک جسم ایدی . الک بیوکتری اوچ مترو دن فضلہ اوزونلغہ ، ۳،۲۰۰ کیلوغرام آغیرلغندہ ایدی ؛ اون یدی بارکیں ایلہ چکیلیدی . بناءً علیہ طوپلرک سرعتلہ بریردن دیگر یرہ نقلی ممکن اولیوب بر محاربہ دہ مخاصمات باشلادینی زمان طویلر نرہ یہ قونمش ایسہ ختام حربہ قدر اورادہ قالیدی . مغلوب اولان طرف طویلرینی دہ غائب ایدردی . الدہ قوللانیلان اسلحہ ناریہ کلنجه ؛ آرکہ بوزلرک طولدیرلمسی ایچون اوچ ، آتیلسمی ایچون ایکی ، یعنی برانداخت ایچون بش دقیقه لازم ایدی ومنزللری یوز اللی مترو بیلہ یوقدی . اوق دہا اوزاغہ کیدردی . بوندن طولایی قرون وسطی اوقلری حالا قوللانیلیوردی . قرون وسطادہ اولدینی کبی حالا مظفریت کوکس کوکسہ وقوعہ کلن مصادماتک نتیجہ سنہ مربوط ایدی .

فرانسہ دہ دائمی ، ملی ومنتظم بر صنف تشکیل ایدن سواریلر ، اسکیدن اولدینی کبی ، ۸۸ کیلوغرام آغیرلغندہ شوالیہ زرہلرینی ، اوزون و آغیر مزاراقلرینی ، قیلیج وبالطہلرینی محافظہ ایتکدہ ایدیلر . پیادہ قسم اعظمی آلمان واسویچرہ لیلردن مرکب اولان اجرتلی عسکر ایدی .

بایار و غاستونہ

دوفووا

ایتالیا محارباتنک قرون وسطی و جدیدہ عائد ایک
مختلف صفحہ سنی شخصریلہ تمیل ایدن ایک کنشی
واردہ، کہ بری شوالیہ لک صوکنجیسی بایار، دیکری
یکی قوماندانلرک برنجیسی غاستون دوفووا در .

بایار ۱۴۷۶ تاریخندہ (غرہ نوبل) قربندہ تولد ایتشدی . «قورقوسز
ولکھسز شوالیہ» لقبی بایارک حالی پک کوزل تصویر ایدر . کاتبنک
دیدیکی کبی «براینجی کبی تمیز قلبہ مالک ایدی» و «دائما ک تہلکہلی
نقطہ لردہ بولمنی آرزو ایدردی . . ای، عالیجناب، مغلوبہ قارشی
مرحمتی، غالبلرک یغمانی ک مشروع برحق بیلدکری بر زماندہ بدلنی
ویرمہ دن هیچ برشی آماز، افسانوی بر شجاعتہ صاحب ایدی .
(فورنوئہ) دن (مارینیان) ہ قدر ایتالیا سفرلینک بتون بیوک محار -
بہلرینہ اشتراک ایتدی . (آنیادہل) دہ سواری فرقه سنک باشنہ کچہرک
بریان حرکتیلہ مظفریتی قازانمغہ سبب اولدی . شارل کنہ قارشی وقوعہ
کلن محاربات اثناسندہ (مہزیہر) ی مدافعہ و تخلص ایلدی . بومحاربات
صرہ سندہ، ۱۵۲۴ دہ، (رومانیانو) موقعندہ خطر جعتی تأمینہ چالیشیرکن
تلف اولدی . بوکا مماثل حرکتلری پک چوق ایدی . ایکنجی ناپولی
سفری اثناسندہ برکون بر کوپری بی یالکز باشنہ ایک یوز اسپانیولہ
قارشی یاریم ساعت مدافعہ ایتشدی .

متعدد دفعہ لر قول اردولرہ قوماندایتمش اولان بایار قوماندان
صفتیہ محافظہ حیاتہ اعتنا ایتسی لازم کلہ جکنی اصلا دوشونمز، دشمن
طرفندن واقع اولان باشہ باش مبارزہ تکلیفلرینی درحال قبول ایدردی .
بر اسپانیول ضابطی ایلہ اوچ دفعہ دوئللو ایتدی . ناپولیدہ «اون برلرک
غوغاسی» نامیلہ معروف اولان مشہور تورنوواہ اشتراک ایتدی . اون

بر فرانسىز شواليه سى اون بر اسپانيول شواليه سيله اون بيك سيرجى حاضر بولنديغى حالده دو كوشدى . قرون وسطى آدمى اولديغنه دلالت ايدن بو فائده مزى يكي تكلر بايارك بتون اوروپاده پك بيوك بر شهرت قازانمى سبب اولدى . پاپا ايكنجى ژول ، ايمپراطور ماقسيمليان ، انكلتره قرالى سكزنجى هازى بوجسور شواليه يي كندى خدمتلىنه آلمق ايجون پك پارلاق تكليلدرده بولنديلر . فقط كندى مملكتى مدافعه ايدر كن اولمك ايسته ديكى دأما سويله ين بايار بو تكليلرى رد ايلدى .

غاستون دوفووا ۲۲ ياشنده بر بيوك حرب آدمى اولدى . عمجه سى اون ايكنجى لوئى ۱۵۱۱ ده ، يعنى ايكنجى ژولك اسپانيولر ونديكليلره ميلان دوقه لغى ضبطه چاليشديغى اك تهلكى بر زمانده بو دوقه لغك مدافعه سنى اوكا توديع ايتمى . غاستون دوفووانك قوماندانلى اوچ آي بيله سورمدى ؛ فقط بوقيصه مدت ظرفنده كنج قوماندان حرركات حربه ده كى مهارتى اودرجه پارلاق بر صورتده اثبات ايتدى ، كه (تورن) و (ناپولئون) كى اك بيوك سوق الجيش متخصصلىنك برنجيسى عد اولتور . اردولرك فوق العاده عطالت ايله حركت ايتدكلرى ، سكزنجى شارلك آلپ طاغلرندن نابولى حدودينه بلا حرب بش آيده ، برنجى فرانسوانك (آرژانتير) دن ۲۲۰ كيلومترو اوزاقده بولان (مارينيان) ه بر آيده كيده بيلدكلرى بر زمانده غاستون حر كاتنده كى سرعت و تعرضلر نده كى جراتى ايله رقبيلر نى حيرته دوشوردى .

اوچ طرفدن هجوم ايدن دشمنه قارشى يالكر باشنه حركت ايتدى ؛ هر ريه يتيشدى . ۱۵۱۲ سنه سى شبا طنده قار اوزرنده ، بوزوق يوللرده عسكرينه ۱۴ كونده ۲۰۰ كيلومترو مسافه قطع ايتدردى . آيك بشنده پاپانك محاصره ايتدى كى بولونيائى قورتاردى ؛ اون آلتيسنده مانتوئىنك

شمالندہ وندیکیلری مغلوب ایتدی ؛ اون طقوزندہ برہسچیانی هجوم ایله آلدی .

ایکی آی صکرہ راوہندہ اک پارلاق مظفریتنی قازاندی . محاربه پک شدتلی ایدی . میدان حربده حاضر بولمیش بر مؤلف : « دنیاده هیچ کیمسه قوللری و باجاقلری کسيلمش اولدینی حالده بیله دشمنی دیشلریله ایصیران اسپانیولر قدر شدتلی بر مقاومت کوسترمه مشدر . » دیبور . اون آلتی بیک کشی تلف اولدی . غاستون محاربه نك ختامی صره سنده اسپانیول پیاده سندن بر قسمنك بر قتال ایله بطاقلق آره سنده کی طار شوسه دن مغرورانہ رجعت ایتدیکنی کوردی . هان یالکز باشنه اونلرک اوزرینه هجوم ایتدی . هر طرفدن احاطه اولندی . بارکیری یره دوشدی . کندیسیده تلف اولدی . وجودنده اون سکز یاره صاییده مشدر .

فرانسه و آوستریا خاندانلری آره سنده کی رقابت

۱۵۱۸ ده پک کوجلکله الده ایدیلہ بیلن صلح ایکی سنه سورمدی . ۱۵۲۰ ده فرانسه تکرار حربہ باشلادی . بو دفعه سبب حرب ایتالیا دکلدی ؛ شارل کن نامی آلتندہ ایمپراطور اولان (شارل دوتریش) ک فرانسه نك موجودیتنی مخاطرمه دوچار ایدہ جک درجه ده کسب قوت ایتسی ایدی .

شارل کن ایمپراطورلغنک تأسسی بر طاقم ازدواج شارل کنک ممالکی و میرانلرک نتیجه سی ایدی . درت خاندان حکمداری ، بورغونیا ، آوستریا ، آراغونیا ، قاستیلیا خاندانلری ؛ درت میراث ، جسور شارلک ، ماقسیملیانک ، فردیناند قتولیکک ، ایزابلانک میرانلری ۱۵۱۹ سنه سی اوائلنده شارل کنده جمع ایدلمشدی . فی الحقیقه شارل

۱۴۹۴ دن ۱۵۵۹ تاریخه قدر آوروپا سیاست عمومیه سی ۳۲۱

پدری کوزل فیلیپدن طولای (ماری دوبورغونی) ایله (ماقسیملیان دوتریش) ک طورونی، والده سی دیوانه ژان جهندن ده آراغونیا قرالی فردیناند ایله قاستیلیا قرالیچه سی ایزابلانک حفیدی ایدی .

پدر جهندن جد وجده سندن :

جسور شارلک بقیه ممالکی اولان په بی با ، آرتووا ، فلاندر ، فرانیش قونته بی ؛

هابسبورغ خاندانک ممالکی اولان آوستریا آرشیدوقه لغنی ، استیریا ، قارینتیا ، قارنیوله و تیرولی ؛

والده جهندن جد وجده سندن دخی :

آراغونیا قرالغنی ، ساردنیایی ، سیچلیا و ناپولی قرالقرینی ؛

قاستیلیا قرالغنی و اخیراً کشف ایدلمش اولان آمریقایی المشدی .

بو مملکتلر شیمدیکی په بی با و بلجیقا قرالقرینه ، لوکسمبورغ غراندوقه لغنه ، فرانسه نک شمالنده بش ده پارتمانه ، اسپانیا قرالغنه ، ایتالیا قرالغنک نصفه ، آوستریا ایمپراطورلغنک یاریسنه ، بر جدیدک کذلک نصفه معادل ایدی . بو قدر چوق مملکتلرک تاجلرینی شیمدی په قدر هیچ بر حکمدار باشنده جمع ایتمه مشدی . شارل دوتریش یالکز باشنه دول مختلفه دن مرکب بر هیئت اتقاقیه حکمنده ایدی . قرناسنک مغرورانه دیدکلری کبی « کونش اسپانیا قرالنک مملکتنده غروب ایتزدی . »

ارثاً انتقال ایدن بتون بو تاجلره ۱۵۱۹ سنه سی حزیراننده آلمانیا ایمپراطورلغنی تاجی دخی منضم اولدی . ماقسیمیلیان وفات ایتدکدن صکره آلمانیا نک یدی منتخب پرئسی ایکی نامزددن برینی ، فرانسه قرالی برنجی فرانسوایی و یا شارل دوتریشی انتخاب ایتمک مجبوریتنده قالمشردی . نامزدلرک ایکسی ده کندیلرینی انتخاب ایتدیرمک ایچون هیچ بر فدا کارلقدن

چکینمہ مکہ قرار ویر مشلردی. منتخبلر بوندن استفادہ ایتدیلر. ایچلرندن اوچی رایلرینی ایکیشر دفعہ نامزدلردن هر برینه صائدیلر. نہایت، برنجی فرانسوا انتخاب ایدیلر سه آلمانیایی دخی فرانسه کی بر حکمدار مطلق طرزنده اداره ایدر قورقوسی شارل دوتریشک انتخاب ایدلمسنه سبب اولدی. بو آندن اعتباراً شارله «شارل کن»، یعنی بشنجی شارل عنوانی ویرلدی. اوزمان شارل کن هنوز ۱۹ یاشنده ایدی.

شارل کن اورته بویلی، قامتی موزون، چویک، او یانیق، ملایم، هر درلو ممارسات بدنیهده ماهر ایدی. سیاسی جدی، صغوق، قورو ایدی. ایلری یه طوغری اوزانان آلت دوداغی، فضله بر چیقندی تشکیل ایدن چککسی بو سیمایه قوتلی بر معنای ثبات وعناد ویرمشدی.

شارل کنک حرص وطمعی حدسز پایانسز ایدی. وسعت ممالکی حرصی تطمینہ کفایت ایتموردی. «دائماً دها اوتیه *Toujours plus outre*» قوی شعاری ایدی.

جسور شارلک حفید زاده سی صفتیله جندن میراث قالان مملکتلرک جمله سنی، ۱۱ نجی لوئی طرفندن فرانسه قراللغنه الحاق ایدلمش اولان پیقاردیا و بورغونیا قطعہ لرینی استرداد ایتک ادعاسنده ایدی. مقدس جرمان روما ایمپراطورلنی رئیس صفتیلهده وقتیله بو ایمپراطورلنه تابع اولان بتون ممالکی: ایتالیایی، قدیم آرل قراللغنی، یعنی رون وادیسنی، دوفینهیی، پرووانسی فرانسه دن الملق ایسته یوردی. ایمپراطور صفتیله بتون قراللرک سوزرنی اولمق املنده ایدی. اونک ایچون «جهانشمول بر حاکمیت» ادعاسنده بولندیینی بیان ایدیلوردی.

غایت احتیاطکار اولدیغی ایچون، بدایه، آمال حریصانه سنی،

کبر و غرورینی ظاہری بر تواضع و محویت ایلہ کیزلدی. سکنزنجی ہازی ایلہ اتفاق ایتک ایستہین برنجی فرانسوا انکلترہ قرالی فرانسہ دعوت ایلہ رک « Camp du Drap d'Or » نامیلہ معروف زیب و زیورہ مستغرق چادیرلر، کاشانہ لردہ ترتیب ایدیلن مکمل ضیافتلر، مظنن مراسم ایلہ کوزلرینی قماشدیرمغہ چالیشمش، فقط سیاست ہیچ بر موفقیته نائل اولہ مامش ایکن شارل کن خدم و خشمیدن عاری بر صورتہ، یانندہ و کلاسندن یالکز بری بولندیفی حالہ مانش دکزینی کچوب انکلترہ یہ کیتمش، کندیسندن دہا قوتلی بر حکمدارک لطف و کرمنی استرحام ایدر جہ سنہ اتفاق طلبندہ بولنہ رق انکلترہ قرالی کندی طرفہ جلبہ موفق اولمشدی. شارل کن غایت ثباتکار، یاپہ جغنی ای دوشونور، ہر شیئی پک درین حساب ایدر، شایان حیرت بردر جہدہ نفسہ حاکم ایدی. پاویدہ امید ایتدیکی درجہدہ پارلاق بر مظفریتہ نائل اولدیغنی خبر آلدینی زمان پک آز بر تائر کوسترمش و عرض تبریکات ایلنلرہ: « خرسیتیانلر آنجق مسلمانلر اوزرینہ احراز ایلدکلری غلبہ و موفقیتلردن طولای اطہار مسرت ایتیلدرلر. » دیمش ایدی. صمیمی بردیندار ایدی. ہر کون بر چوق آیین روحانیلردہ حاضر بولنور، دیوارلری سیاہ قماشلرلہ اورتولمش بر اوطہدہ اوزون مدت عبادت ایدردی.

فقط دیندارلنی سیاستہ اصلا اجرای تاثیر ایتہ مشدر. پاویدہ محاربہ سندن صکرہ پاپا یدنجی قلعہ مان فرانسہ طرفہ دوندیکی ایچون شارل کن پاپا علیہنہ بالخاصہ پروتستانلردن مرکب براردو کوندردی. (قونہ تابل دو بوربون) ک قومانداسندہ بولنان بواردو رومانی هجوم ایلہ ضبط و مدہش بر صورتہ یغما ایتدی [۱۵۲۷]. شارل کن قاتی یورہ کللی، سرت ایدی. برنجی فرانسوا حال اسارتندہ بر حکمدار، بر برادرکی معاملہ کورہ جکنہ منتظر

ایدی . شارل کن ایسہ فرانسوایہ عادی براسیر معاملہ سی یابدی ؛ کندیسنی کورمک ایستہمدی ؛ مادرید سورینک برقلہ سندنہ دمیر پارمقلقلہ مجھز تک پنجرہ لی بیوک ، قسوت انکیز براوطہدہ حبس ایتدی . اسپانیوللر بیلہ بودرجہ شدتی روا کورمدیلر . فرانسه قرالی تکلیف ایدیلن آغیر شرائطی قبول ایدنجهیه قدر سالف الذکر اوطہدہ قالدی .

شارل کنک فعالیتی شایان حیرت بردرجہدہ ایدی . ۱۵۵۵ تاریخندہ ۵۶ . یاشندنہ ، بارکران حکومتی تخفیفہ احتیاج حس ایدرک ممالکندن برقسمنک حکمدارلغنی اوغلی ایکنجی فیلیپہ ویردیکی وپہنی بانی تماماً اوکا دور ایلدیکی زمان قرق سنہ ظرفندہ آلمانیایہ طقوز ، اسپانیایہ آلتی ، ایتالیایہ یدی ، فلاندرہ اون ، انکلترہیہ ایکی ، آفریقایہ ایکی ، فرانسهیہ درت دفعہ سیاحت ایلدیکنی ؛ طقوز دفعہ بحر سفیددن ، اوچ دفعہ بحر محیط آطالاسیدن کچدیکنی مواجهہ عمومیہدہ نقل و حکایہ ایتدی . شارل کنک حیاتی مملکتدن مملکتہ سیاحت ایتک ، بر میدان حربدن دیگر میدان حربہ قوشمق ایلہ کچدی . اکثریا انکلترہ قرالنک وایتالیا حکومتلرینک معاونتنی تأمین ایدن فرانسه قرالی ، آوستریا خاندانی ممالکنہ بش دفعہ هجوم ایلین سلطان سلیمان قانونی ایلہ حرب ایتدکن ماعدہ آلمانیادہ تجددات دینیہدن متولد محاربات داخلہیہدخی کوکس کرمک مجبوریتندہ قالدی . بونکلہ برابر مسلمانلرہ قارشی اهل صلیب سفرلری ترتیبی دوشونہ بیلہ جک وقت بولدی وبردفعہ تونسہ [۱۵۳۴] ، بردفعہدہ جزایرہ [۱۵۴۱] بالذات کیدرک برنجی سفرده یکریمی بیک خرسنتیان اسیری قورتاردی ، ایکنجی سفرده ایسہ مدھش برھزیمتہ اوغرایہرق تلف اولسنہ رmq قالدی .

ہردولت ایچون قورقونچ بر رقیب اولان شارل کن شارل کن و فرانسه اک زیادہ فرانسه ایچون دھا مدھش بردشمن ایدی .

۱۴۹۴ دن ۱۵۵۹ تاریخچه قدر اورپا سیاست عمومیہ سی ۱۲۵

فرانسه شارل کنک واسع ایمپراطورلنی قارشیمسندہ ہر طرفدن محاصرہ
ایدلمش بر قلعہ کبی ایدی . ایمپراطورلق ممالکی، حدودینک ہر طرفدن
فرانسیہنی احاطہ ایتشدی . بالخاصہ شمال وشرق طرفلرندہ تہلکہ دہا
زیادہ ایدی . اوزمان فرانسیہ بو جہتلردہ شمدیکی قدر واسع دکلدی .
آرتووا، فلاندر، فرانیش قوتہ قطعہ لری شارل کنہ عائد ایدی . پیقاردیا،
شامپانیا، بورغونیا حدود اوزرندہ ایدی . پارس دشمندن آنجق ۱۵۰
کیلومترو اوزاقده ایدی . شمال جہتندن واقع اولہ جق آنی بر هجومہ قارشی
پایتختی مدافعہ ایچون یوکسک طاغ وکنیش نہرلر کبی بر مانعہ طبعیہ یوق
ایدی . حدودک شکلندن متولد مخاطرہیہ شارل کنک آمال حریصانہ سی،
پیقاردیا و بورغونیا اوزرندہ وبالخاصہ دوفینہ و پرووانس حقندہ کی ادعالری
منظم اولمقدہ ایدی .

بناء علیہ شارل کنہ قارشی حرب ایتک فرانسیہ ایچون بر ضرورت
حکمندہ ایدی . ۱۵۲۰ تاریخندن اعتباراً برنجی فرانسوانک و دہا صکرہ
ایکنجی ہائرینک اداره ایلدک لری محاربات سکزنجی شارل واون ایکنجی
لویئیک سفرلری کبی حرص وفتوحات محاربہ لری دکل، سلامت ملیہ
حربی ایدی . فرانسیہ نک تمامیت ملکیت سی، موجودیتی ایچون حرب ایدلدی .
۱۵۲۰ تاریخندہ باشلایان محاربہ اوتوز طقوز سنہ،

محاربانک اوصاف

۱۵۵۹ تاریخچہ قدر سوردی . حربہ ابتدار ایدن
مبذہ عمومیہ سی شارل کن و برنجی فرانسوا بونک صوکنی کورمدیلر :

مخاصات بونلرک اوغللری، اسپانیا قرالی ایکنجی فیلیپ ایلہ فرانسیہ قرالی
ایکنجی ہازی زمانندہ دخی دوام ایدلدی . دردنجی برنجی فرانسوا،
ایکیسی ایکنجی ہازی زمانہ عائد اولمق اوزرہ آلتی دورہ، آلتی سفر
تفریق اولنہ بیلیر . بو محاربات ہم ایتالیا، ہم دہہ شمالی و شرقی فرانسیہ دہ

جریان ایشدر . یوزسنہ محاربہ سندنہ اولدینی کبی ایکی حکمدار آره سندنہ عادی برمصادمہ دن عبارت قالدی . شارل وایکنجی فیلپ ، برنجی فرانسوا وایکنجی هازی متفقلر آرادیلر وبولدیلر . بو صورتله فرانسه و آوستریا خاندانلری آره سندنہ ظهور ایدن حربہ سلطان سلیمانک ، انکلتزه قرالنک ، آلمان پرنسلیرنک ، ایتالیا حکومتلرینک ، اسوج قراللرندن برینک ، پاپالرک قاریشدقلری کوردی : فرانسز محاربہ لری اوروپا محاربہ لری شکنه کیردی .

۱۵۲۰ دن ۱۵۲۶ تاریخنه قدر دوام ایدن ایلک دوره
ایلک محاربات محارباتک الک فجیع واک مهم دوره سی اولدی . فی الحقیقه بودوره بتون محاربات آتیده طرفینک مقدراتی اوزرنده اجرای تأثیر ایتدی و فرانسه نك هزیمتنه ، فرانسه ایچون پک مضر بر معاهده یه منجر اولدی . ایلک حرکات حربیه یکی حربک وصف ممیزینی آشکار بر صورتده کوسترر بروقعہ اولمق اوزره فرانسه نك شمال حدودنده وقوعه کلدی . آرتق مسئله ایتالیا ده اراضی ضبط ایتک دکل ، بلکه تفوق ایچون بر حرب ، همان همان بر حیات و ممت مسئله سی ایدی . شارل کن باب مخاصماتی آچارکن : « آرمانده یافرانسوا بر زواللی قرال اوله حق ، یاخود بن بریچازه ایمپراطور اوله جفم . » دیمشدی . شامپانیا استیلا و مه زیهر محاصره ایدلدی . بایار موقع محصوری قورتاردی [۱۵۲۱] . ایشته ، بوسره ده (قونه تابل دو بوربون) اهانت ایدرک شارل کن طرفه کچدی . براز صکره فرانسه میلان دوقه لغنی غائب ایتدی : رومانیانوده وقوعه کلن صوک مصادمه ده بایار تلف اولدی [نیسان ۱۵۲۴] . بونک اوزرینه ، شمال استیلا سندن صکره جنوبی فرانسه دخی استیلا ایدلدی . (بوربون) پرووانسه کیره رک - آنسزین ضبط ایدیوره جکنی امید ایتدیکی - مارسلیا اوزرینه یوریدی .

فقط مه زیه رکبی مارسلیا دخی طایندی. برامداد اردوسنک تقربی بوربونی
رفع محاصره یه مجبورایتدی. اثنای رجعتده لاینقطع کویلرطرفدن تعجیز
ایدیلن اردوسی اریوب بیتدی [ایلول ۱۵۲۴]. بونی متعاقب برنجی
فرانسوا تعرضه باشلایه رقیاتالیاه کچدی ومیلان دوقه لغی استرداد ایتدی.
استحصال ایدیلن بتون موفقیات برکونده غائب ایدلدی

باریه

وفرانسه قرالک احتیاطسز جه سنه شجاعتی پاوویه مغلوبیتنه
سبب اولدی [جمعه ، ۲۴ شباط ۱۵۲۵]. میلانک اون بش کیلومتر وجنوبنده
بولتان پاوویه اسپانیوللرک انده قالمشدی. برنجی فرانسوادر آیدن بری بو
موقعی محاصره ایتمکده ایدی. قلعه تسلیم اوله جق بر حاله کلدیکی صره ده
برامداد اردوسی یتیشدی. قرال بواز دونک یولنی کسمک ایسته دی. فرانسز
طوبجیلری اسپانیول پیاده سی صفلرینی طاعتیمغه باشلامش ، « قول و باقلری
هواده اوچوریور ایدی ». برنجی فرانسوا دشمنک ایجه صارصیلدیغنی
کورنجه « طامارلرنده کی قان قاینادی » ؛ دشمن اوزرینه آتیلدی ؛
طوپلرینک اوکنه کچدی ؛ طوپلر آتشی کسمکه مجبور اولدی. اسپانیوللر
کندیلرینی طوپلامغه وقت بولدیلر. هر طرفدن احاطه ایدیلن برنجی فرانسوانک
آلتنده کی بارکیر تلف اولدی. قرال ، قلیج الده ، اوزون مدت مدافعه
ایتدی. فقط ایکی دفعه یاره لندی ؛ نهایت ، اسیر دوشدی.

مادریده نقل ایدیلن برنجی فرانسوا استرداد حریت
مادیرید معاهده سی ایده بیلیمک ایچون پک آغیر شرائط صلحیه یی قبوله
مجبور اولدی. مادرید معاهده سی ایله [۱۴ کانون ثانی ۱۵۲۶] ناپولی قرالغی
ومیلان دوقه لئی اوزرنده هر درلو ادعادن ، آرتووا وفلاندر قطعه لری
اوزرنده سوزرنلک حقندن واز کچور و بورغونیایی اسپانیا قرالنه
ویریور ایدی. بو صورتله فرانسه قرالغندن تماماً آریلان آرتووا

یوز سنه صکره استرداد ایدلی ؛ فقط فلاندر قطعه سنک تمامی هیچ بر وقت کری به آله مدی .

بویله بر معاهده آنجق بر متارکه اوله بیلیردی . چونکه مغلوب ایچون پک آغیر ایدی . برنجی فرانسوا معاهده نامهیه وضع امضا ایتزدن اول جبرو شدتله کنديسنه تحمیل ایدن بو شرائطی ایضا ایتیه جکنی کیزلیجه سویله مش ، پروتستو ایتشدی . مملکتنه عودت ایدنجه بو پروتستوی علناً تکرار ایدرک بورغونیایی تسلیمدن امتناع ایدلی . عمرینک قسم متباقیسنی پاویه هزیمتی تعمیره وقف و حصر ایتدی .

یالکوز ، منفرداً شارل کنه قارشی حرب ایچون کنديسنی پک ضعیف بولیوردی . ده حال اسارتده ایکن والدهسی و فرانسه قرالنی نائبه حکومتی لوئیزدوصاوا بعض مذاکراته کیریشمش و برنجی فرانسوایه متفقلر آرامشدی . ایمراطورک قوت فوق العاده سی بتون دولتری قورقوتدینی ایچون متفق بوله بیلمشدی . بو متفقلر پاویه محاربه سنک فردای وقوعنده سلطان سلیمان قانونی ؛ مادرید معاهده سندن صکره انکلتزه قرالی سکزننجی هانزی ، پاپایدنچی قله مان ؛ ده صکره آلمانانک پروتستان پرنسلی ایدی .

بو متفقلرک وبالحاصه ۱۵۲۹ تاریخنده ویانه یی محاصره ایکنجی ، اویغنی ایدن ترکلرک معاونتلی سایه سنده برنجی فرانسوا و دردیجی سفیرلر ایکنجی دوره محارباتی [۱۵۲۶ - ۱۵۲۹] متعاقب قامبره معاهده سنی عقده موفق اولدی . شارل کن معاهده مذکوره ایله بورغونیایی طلب ایتکدن واز کچیوردی . مادرید معاهده سنک بو نقطه حقدنه کی موادی فسخ ایدلمشدی . فقط مواد سائره سی احکامی ابقا اولنمشدی .

اوچنچی [۱۵۳۶-۱۵۳۸] ودرنجی [۱۵۴۲-۱۵۴۶] سفرلرده فرانسه قرالی بعض موفقیاتہ نائل اولدی . ۱۵۳۶ ده باشلایان اوچنچی دورده شارل کنک متقی اولان صاووا دوقه سنک زیر اداره سنده کی صاووا وپیه مونته قطعہ لری برنجی فرانسوانک الہ کچدی و ۲۳ سنہ [۱۵۳۶-۱۵۵۹] فرانسزلرده قالدی . دردرنجی سفرده ، ۱۵۴۴ ده ، ۲۵ یاشنده بر جنرال اولان دوق (دانکیہن) ک قومانداسنده کی فرانسزلر پیه مونته ده ، (سهریسول) ده بر پارلاق مظقریت قازاندیلر . فقط مغلوبیتلر ده غالبیتلر قدر چوقایدی و فرانسه ایکی دفعہ استیلا یه اوغرادی . ۱۵۳۶ ده ایمپراطور اردولری شمالده پیقاردیایه کیردکلری صرہ ده شارل کن پرووانسه داخل اولمش و (آرل) شہرینہ قدر ایلریشدی . فرانسزلر ایمپراطوری رجعتہ مجبور ایتک ایچون قرا و محصولات یاقہ رق ہر طرفی چولہ چویر مشلردی . بو خرابہ اورتہ سنده قالان شارل کن ہیچ حرب ایتدیکی حالده ۲۰,۰۰۰ کشی غائب ایتدی . ۱۵۴۴ ده ، ہان ہان (سهریسول) مظقریتک فردای وقوعندہ ، شارل کن شامپانیایه کیردی ؛ بو قطعہ یی باشند باشہ قطع ایدرک پارسدن الی کیلو مترو مسافہ ده کائن (مو) موقعنہ قدر ایئرلہ دیکی ائنادہ شارل کن طرفنہ کچمش اولان انکلترہ قرالی (بولونی) شہرینی ضبط ایتدی . فرانسه پک مشکل بر موقعہه قالمش ایکن بو دفعہ ده ترکلرک مجارستانده کی حرکات حربیہ لری سابه سنده (قرہ پی) معاہدہ سنی عقدایدہ بیلدی . بو معاہدہ ایلہ آرتووا وفلاندرک فرانسدن آیرلمسی تأیید ایدلدی . براز صکرہ برنجی فرانسوا وفات ایلدی [۱۵۴۷] .

ایکنجی ہانری زمانندہ محاربات بشنجی دفعہ اولہ رق باشلادینی زمان [۱۵۵۲] فرانسزلر ایتالیایی ہان

بشنجی سفر

بسبتون ترك ايتديلر . باشليجه محاربه لر فرانسه نك شمال حدودنده ، شرقنده موزل و رن حواليسنده وقوعه كلدى . بو دورنده كي اصل اتفاق عثمانلى اتفاقى دكل ، آلمان پرنسلىيله عقد ايديلن اتفاق اولدى . بر چوق سنه دن برى شارل كن ايله حرب ايتمكده اولان بو پرنسلىر ايكنجى هازيدن نقداً معاونت ايسته ديلر . بوكا مقابل (شامبور) ده مذاكره وهسده كائن (فريد والد) ده امضا ايديلن [كانون ثانى - شباط ۱۵۵۲] بر معاهده ايله آلمانىا ايمپراطورلنى داخلنده اولدينى حالده لسان واهالى اعتباريله فرانسزاولان مچ ، طول ، وردون شهرلرني اشغال ايتمكه فرانسه قرالنك صلاحيتدار اولديغنى تصديق ايتديلر . ايكنجى هازى « اوچ پىسقبوسلق » ناميله معروف اولان بوشهرلرى درحال اشغال ايتدى [نيسان ۱۵۵۲] وحى استراسبورغه قدر كيتدى .

شارل كن درحال مچى استرداده تشبث ايلدى .
مچ مدافعى ۶۰,۰۰۰ كشى ايله ايكنى بچق آى محاصره ايتدى [۱۹ تشرين اول ۱۵۵۲ - ۱ كانون ثانى ۱۵۵۳] . قلعنك عساكر محافظه سى آنچق ۱۰,۰۰۰ كشى ايدى . فقط فوق العاده فعال برجنرال اولان (فرانسوا دو كيز) ك قومانداسى آلتنده ايدى . فرانسوا غايت احتياطلى طاورانه رق سورده كي رخنه لرى اولدن قايمش ، اسباب مدافعه يي تهيه ايتمشدى . محاصرلر هجومه بيله تشبث ايده مديلر . ديكر طرفدن صفوق ، طغيان مياھ ايمپراطورك عسكرلرني صوك درجه ازعاج ايتدى . خسته لقدن چوق تلفات اولدى . شارل كن ۱ كانون ثانى ۱۵۵۳ ده چكيلدى ؛ لوازم حربيه سنك بر بيوك قسمنى ، مجروحين و خستگانى براقه رق ۲۰,۰۰۰ كشى ايله عودت ايده بيلدى .

شارل کنک سلطنتده بوموفیتسزلك شارل كنه پك فنا تأثیر ایتدی . دیگر طرفدن خسته لقلر کندیسنی یورمش ایدی . علت فراغتی تقریسدن مضطرب ایدی . اوتوز سنه دن فضله برمدت ظرفنده پك واسع اولان ایمپراطورلغی اداره و مدافعه ایتك ایچون صرف ایلدیکی مساعی فوق العاده دن طولای بستیون بیتاب قالمشدی . اونك ایچون سلطنتدن فراغه قرار ویردی . اولاً ، اوغلی ایکنجی فیلیپه ناپولی و سیچلیا قرالقلرینی [تشرین اول ۱۵۵۴] ؛ بعده به بی بابی [تشرین اول ۱۵۵۵] ، فرانسه قونته بی ، نهایت اسپانیا و آمریقای قانئون نانی ۱۵۵۶] ترك ایتدی . بر قاق آی صکره - مجارستان قرالی لوی یا کللونك مهاج میدان حربنده مقتول دوشمی اوزرینه آرده منعقد عائله مقاوله نامه سی موجبجه مجارستان و بوهیمیا تاجلرینه یکریمی بش سنه اول نائل اولان - برادری فردینانده هابسبورغلرک آلمان ممالکینی و ایمپراطورلق تاجنی بر اقدی [ایلول ۱۵۵۶] . بو صورتله بتون عنوان و حکومتلرینی ترك ایدهرک اسپانیاده ، (سن ژوست) مناستری قربنده کائن بر سرایه چکیلدی . اوراده ده ایلکی سنه یشادی . کشیش کی دکل ، غایت پارلاق بر سرای ارکانی ایله محاط اولدینی حالده بر حکمدار کی وقت کچیردی ؛ سیاسته مراق ایتمکدن خالی قالمدی ؛ ایکنجی فیلیپ و ایکنجی هانری آره سنده کی مخاصماتی کمال دقتله تعقیب ایتدی . ۱۵۵۸ ده وفات ایلدی .

شارل کنک سلطنتدن فراغتی و ایمپراطورلغک ایلکی به آیرلمسی فرانسه ایچون حقیقی بر ظفر ایدی . آوستریا خاندانی آوستریا هابسبورغلری ، اسپانیا هابسبورغلری نامیله ایلکی به بولونمشدی . شهبه سز ، بونلرک ایلکیسی ده فرانسه نك دشمنی و مجموع قوتلری شارل کنک قوتنه معادل ایدی . فقط

بو منابع قوت اسکیمی کبی بر حکمدارک اراده سنه تابع دکلدی . توحید مساعی قولایجه تأمین اولنه مازدی . بوکا مقابل فرانسه ، حرکاتنده دها زیاده سهولتله نائل اوله بیلیردی .

شارل کن اسپانیا تاجنی اوغلانه ترك ایتزدن اول
آلتنجی سفر ؛ ایکنجی هازی ایله صلح مذاکراتنه باشلانمشدی .

قاله نك ضبطی مذاکرات (ووسهل) متارکه سنه منجر اولدی

[شباط ۱۵۵۶] . بومتارکه نامه ده اوچ پسقپوسلق ایله پیه مونته نك فرانسه یه

عائدتی تصدیق و تأیید ایدلدی . متارکه فرانسه قرائنك تدایرسز لکیله

بوزولدی . ۱۵۵۷ اوائلنده ایکنجی هازی ایکنجی فیلیپه هجوم ایتدی .

حال بوکه اوزمان اسپانیا قرائنك قوتی - سکنزنجی هازینك قیزی وانکلتره

قرالیچه سی ماری تودور ایله ازدواجندن طولای - پک زیاده آرتمش ،

انکلیز اردولری اونك امری آلتنه کیرمشدی . فرانسر سرداری (مو -

نمورانس) سن قانتنه اوکنده فنا حالده مغلوب اولدی ؛ شهر سقوط

ایتدی ؛ پارس طریق ایکنجی فیلیپه آچیلدی [آگستوس ۱۵۵۷] .

فقط اسپانیا قرالی موفقیتندن استفاده ایده مدی . برقاچ آی صکره دوق

دوکیز (سن قانتنه) مغلوبیتنك انتقامنی آلدی . قیش اورته سنه بردن

بره (قاله) اوکنده کوروندی ؛ قلعه یی درت بکونده هجوم ایله آلدی ؛

ایکی کون صکره شهر تسلیم اولدی [۱-۶ کانون ثانی ۱۵۵۸] . انکلیزلر

ایکی عصردن بری یرلشمش اولدقلری قاله دن چیقیدیلر . مایس ظرفنده

دوق دوکیز (تیون ویل) ی آلدی ، بعده لوکسمبورغی اشغال ایتدی .

فقط فرانسزلر حربدن یورولملشلردی . پاره بولنامه

باشلانمشدی . ایکنجی فیلیپ دخی عینی حالده ایدی .

قانو قمبره زی

مصالحه سی

دیگر طرفدن ایکی حکمدار پروتستانلغک کندی

۱۴۹۴ دن ۱۵۵۹ تاریخه قدر اوروپا سیاست عمومیہ سی ۳۳۳

مملکتلری داخلندہ تعمم ایتمسندن تلاش ایدیورلر، مذهب جدیدی
ازمک ایچون سربست قالمق ایستہ یورلردی. فرانسه، اسپانیا و بعدہ
انکلتزہ آرمسندہ باشلایان مذاکرات آلتی آی صکرہ قاتو قامبرہ زی
مصالحہ سنہ منجر اولدی [۳ نیسان ۱۵۵۹]. فرانسه، اسپانیا و انکلتزہ
حکمدارلری طرفدن امضا ایدیلن معاهدات موجبجہ فرانسه قرالی
ایتالیا اوزرنده ہر درلو اعدادن واز کچور؛ پیہ مونته بی براقہ رق آلپ
طاغلرینک اوتہ طرفندہ یالکیز (تورمن) و (پنیہ رول) کبی بر قاج
موقعی محافظہ ایدیور؛ صاووایی ترک ایلور ایدی. فقط معاہدہ نامہدہ
ذکر و تصریح اولنماقلہ برابر طول، میچ ووردون شہرلرینی محافظہ
ایتدکدن بشقہ انکلتزہ دن (قالہ) یی آلوردی. بوکا مقابل اسپانیا قرالی
ایتالیادہ رقبہ غلبہ ایدہ رک ناپولی قرالغنی و میلان دوقہ لغنی آلمقدہ ایدی. بو ایکی
مملکت ۱۵۰ سنہ، ۱۸ نجی عصر اوائلنہ قدر ایکنجی فیلیپک اخلافی الندہ قالدی.
قاتو قامبرہ زی معاہدہ سی، مواد مذکورہ دن بشقہ، طرفین
آرمسندہ کی ائتلافک قطعیتہ ضمان اولمق اوزرہ - ماری تودورک وفاتسندن
صکرہ زوجہ سز قالمش اولان - ایکنجی فیلیپک ایکنجی ہازینک
قیزیلہ ازدواجنی تأمین ایتمشدی. بو ازدواج مناسبتیلہ پارسدہ بیوک
شنلکیر یاپیلدی. ایکنجی ہازی (تورنوو) یہ اشتراک ایتدی.
عسا کر خاصہ قوماندانی (مونمورانسی) نک مزراغی قرالک القانی اوزرنده
پارچہ لاندی؛ مزراغک بر پارچہ سی قرالک کوزینہ کیردی. ہازی
بو جریحہ دن متأثراً وفات ایتدی.

آلپ سلسلہ سنک اوتہ طرفندہ و بحر سفید ساحلندہ
ایتالیا محاربانک
میلان دوقہ لغنی و ناپولی قرالغنی کبی مملکتلری ضبط
ایتمک ایچون فرانسنک جنوب شرقیسندہ باشلامش
نتایجی

اولان ایتالیا محارباتی شمالدہ قالہ نک استردادی ، شمال شرقیدہ میچ ، طول ، وردون شہرلرینک الحاقی ایلہ ختام بولدی .

بویلہ بر نتیجہ ، ظاہراً ، غیر منطقی کورونور . فقط حقیقت حالہ اوچ پسقپوسلغک الحاقی فرانسزلرک حربدن آلدقلى درس عبرتک خاتمہ طبیعیہ سی مٹاہہ سندہ ایدی .

فرانسزلر ایتالیا دہ سرکدشتجویانہ محاربات آرقہ سندہ قوشدقلى صرہ دہ دشمن شمال حدودندن درت دفعہ ایجری یہ کیرمشدی . دشمن اردولری شامپانیا وپیقاردیا قلعه لرندن کچمکہ موفق اولمش ، شارل کن پارسہ الی کیلومترو یاقین اولان (مو) یہ قدر ایلریلہ مش ایدی . بو وقاعدن صکرہ ، قرالغک باشی وقلبی مٹاہہ سندہ بولنان پارسک - حدودک پک یاقین اولمسندن طولانی - بر محاربہ نک ضیاعی ویا دشمنک جرأتکارانہ بر یورویشی نتیجہ سندہ سقوط ایدہ بیلہ جکی پک کوزل آکلاشیلمشدی . بناءً علیہ توسیع ممالک صورتیلہ حدودی دہا اوزاغہ کوتورمک ایجاب ایدیوردی . میچ ، طول و وردون شہرلرینک اشغالنہ سبب بو ایدی . فرانسه امرای عسکریہ سندن مارشال (وئیہ ویل Vieilleville) ۱۵۵۲ سنہ سندہ ایکنجی ہانری یہ دیمشدی کہ : « شامپانیا وپیقاردیا ایچون ناقابل تسخیر بر قلعه حکمنده اولان بو اوچ شہری یواشجہ ضبط ایدیکنز . لوکسمبورغ دوقہ لغنہ کیرمک ، بروکسلہ قدر ایلریلک ایچون بر کوزل یول آچش اولورسکنز . بوندن بشقہ وقتیلہ فرانسه تاجندن قوپارلمش ، آیرلمش اولان پک چوق کوزل و بیوک شہرلرہ صاحب اولمش و بیک سنہ دن بری ، اک اسکی زمانلردن اعتباراً فرانسه قرالیرینہ عائد ایکن حیلہ و دسیسہ ایلہ سرقت ایدیلن فلاندر قطعہ سی اوزرنده کی حق حاکمیتکزی استرداد ایلش اولورسکنز . »

مارشال بوسوزلرله دردنجی هانری ، ریشلیو ، اون دردنجی لویی ،
سلامت عمومی قومیت سی طرفندن بربرینی متعاقب ، تام ایکی عصر تطبیقنه
چالیشیلان بر سیاستی تعریف واجمال ایتمشدی . بو سیاست وقتیه شرقی
فرانسه یه ، قدیم اوستریایه عائد اولان بتون ممالکی ودها اسکی زمانلرده
غالبانک حدود طبیعی سی حکمنده بولنان رن نهرینک غرب طرفنده کی
بتون قطعه لری فرانسه یه الحاق ایتمک ایدی . قاتوقامبره زی معاهده سی
فرانسه ایچون یکی بر سیاستک ، حدود طبیعی سیاستک ایلک نتیجه لرینی
تصدیق ایتمشدی . فرانیش قونته ، آرتووا ، فلاندر ، په یی با قطعه لری
وآلساس اراضینک بر قسمی آوستریا خانداننده قالمش اولدینی جهتله
معاهده مذکور فرانسه و آوستریا خاندانلری آره سنده کی رقابتده آنجق
بر متارکه اوله بیلیردی . فی الحقیقه فرانسه ۱۷ و ۱۸ نجی عصر لرده وقتیه
فرانسه نك اولان بو مملکتلری استرداد ایچون هابسبورغ خاندانک هرایکی
قولی ایله پک چوق اوغراشدی .

شارل کن بدایت مخاصمانده کندی ممالکنک وسعتی
فرانسز لک اسباب فرانسه ایله مقایسه ایتدیکی زمان فرانسه خاندانک
موقفینی غلبه ایده جکنه اصلا احتمال ویرمه مشدی . حال بوکه

اونکله برنجی فرانسوا آره سنده قوتجه کوریلن نسبتسز لک صرف
ظاهری ایدی .

شارل کن ایمپراطور لغندن درت بش دفعه کوچک اولان فرانسه
وحدت ملیه کی بر تفوقه مالک ایدی . بربرینه پک صیقی صورتده مربوط
اولان اقسام ممالکی کتله واحد ایدی . قراک اغاذ اراده سنه مانع
اوله بیله جک هیچ بر قوت یوقدی . زادکان قانلرینی ، بورژووالر پاره لرینی
قراله بلا حساب ویریورلردی . مادرید معاهده سنک فردای عقدنده

بورغونیا اہالیسنک بالاختر قرالہ مراجعت ایدرک فرانسز قلمق ایستہ دکلرینی بیان ایتدکلری حقندہ کی روایت - اخیراً کشف واثبات ایدلدیکی وجہلہ - طوغری اولمسه بیلہ حسیات ملیہنک پک قوتلی اولدینی محققدر . یوز سنہ محاربہ سی ائناسندہ [۱۴۲۰] بورغونیا دوقہسی انکلیرلر طرفہ کچدیکی کبی ۱۵۲۳ تاریخندہ (قونہ تابل دو بوربون) شارل کنہ التحاق ایتدیکی زمان بورغونیا دوقہسی واسالترینک یابدینی وجہلہ کندی واسالترینک دہ شارل کن طرفہ کچہ جکلرینی امیدایتمشدی . حال بوکہ بونلرک ہیچ بری یرندن قیملدامدی و بوربونک حرکتی قرالغک ہر طرفندہ تعیب ایدلدی . ۱۵۵۲ دہ ، میچ شہرینی اشغالہ مأمورارلان اردو تشکیل ایدلدیکی زمان دخی حسیات ملیہنک غلیانی کوردی . مارشال دو (ویہی ویل) ک شہادتق ایلہ ثابت اولدینی اوزرہ کسجلبو اردویہ کوکللو یازلق ایچون شہرلردن قاجدیلر ؛ دکانلر آدم بولمندیغندن طولانی قبادی ؛ ہرکس « اوسترازا سیاحتہ » اشتراک ایتک ایستیوردی . برنجی فرانسوا وایکنجی ہازی ملتک وطنپرورلکی سایہ سندہ ہربرہزیمتک فردای وقوعندہ یکی قوتلر ، اردولر تشکیل ایتدیلر . شارل کن وایکنجی فیلیپک نہایت الامر مغلوب اولملرینک برسبی دہ بودر .

وسعت ممالک اعتباریلہ پک قوتلی اولان شارل کن دولتی
شارل کنک اسباب حقیقت حالہ ضعیف ایدی . اولا شارل کن ایمرطورلنی
مغلوبیتی بردکل ، متعدد دولتلردن مرکبدی . بودولتلر
 آرہ سندہ روابط قویہ یوق ایدی . برلرلردن ایرلمش ، فرانسه حدودینک
 درت طرفہ طاغیلمش ایدی . بونلر آرہ سندہ مواصلہ و مناقلہ اوزون ،
 قاریشیق و تہلکلی یوللر ایلہ ممکن ایدی . مثلاً ، اسپانیاد پینی یایہ کیتمک
 ایچون بحر محیط آطلاسیدن ، ایتالیا دن اسپانیایہ کیتمک ایچون بحر سفیددن

کچمک لازم ایدی. اهالی عینی عرقدن دکلدی. یالکز ازدواج و میراثلرک تصادفی اثری اوله رق عینی حکمداره تابع ایدی. اهالی آره سنده مشارکت لسان بیله یوق ایدی. شارل کن تبعه مختلفه سیله تر جانسز کوروشه بیلیمک ایچون لاقل بش لسان، یعنی فرانسز، فلامان، اسپانیول، ایتالیان و آلمان لسانلر نی بیلیمک مجبوریتده ایدی.

شارل کن، زیر اداره سنده برلشن دولترک هیچ برنده حاکم مطلق دکلدی. هر یرده عادات و تعامل، امتیازات، قوانین اساسیه ایمپراطورک قدرت حکومتی تحدید ایتیمکده ایدی. اسپانیا قرالقلارنده، آراغونیا و قاستیلیاده، شارل کن - بالخاصه بدایت سلطه تمده - (قورتهس Cortès) دنیلن مجالس عمومیه ایله اوغراشمغه مجبور اولدی. زادکانک، شهرلر اهالیسنک مبعوثلرندن مرکب اولان بو مجلسلر (فوئرو Fuero) نامی ویریلن امتیازاتی محافظه ده صوک درجه ثبات ایتیمکده ایدی. ذاتا شارل کن قرال اولمازدن اول امتیازات مذکوره یه تمام ارایت ایده جکنه یمین ایتمشدی. اسپانیا قرالقلارنده خدمت حکومتیه هیچ بر اجنبی کیره مز؛ قورته سلرک موافقتی اولمه دن هیچ برویرکو آله ماز ایدی. شارل کن بو امتیازاته رعایت ایتدیکی ایچون اسپانیوللر سلاح عصیانیه صارل دیلر [۱۵۱۹-۱۵۲۰]. مع مافیه عصیان باصدیرلدی و نتیجه ده اسپانیا شارل کنک باشلیجه منبع قوتی اولدی. په یی باده دخی بوکابکزر امتیازلر موجود ایدی. فلامانلر دخی ناحیه لرینک امتیازات مخصوصه سنه صوک درجه مربوط ایدیلر. حتی بو حریت، امتیازاته رعایت ایدلمدیکندن طولای (غان) شهرنده بر عصیان بیله وقوعه کلدی [۱۵۳۹].

مع مافیه بو مخالفقلر شارل کنک آلمانیا ده تصادف ایتدیکی مقاومتلره نظراً هیچ بر شی دکلدی. آلمانیا ده شارل کن (دیت) مجلسنک مخالفته

معروض قالدی. وکلاسندن قاردینال (گران وول) ک دیدیکی کبی «ایمپراطور
شان وسطوتی محافظہ ایچون آلمانیا دن برفندق قیمتندہ بر استفادہ بیلہ
نائل اولہ میور ایدی.» فضلہ اولہ رق لوترک تجدادات دینہ سی آلمانیا دہ
یکی بر تخم نفاق اکوب اوزون ومدہش محاربات داخلہ ظهور ایتدیکی
زمان شارل کن قوتنک بر بیوک قسمنی آلمانیایی تسکین ایچون صرفہ
مجبور اولدی.

الحاصل شارل کنہ عائد دولترک وسعت وتعددی نفاق وتفرقہ مخاطراتی
تزیید ایتدیکی ایچون بر سبب ضعف عد اولہ بیلیر ایدی. شارل کن یالکز
برنجی فرانسوایہ قارشی حرب ایتدی؛ بلکہ شرقدن کلن الہ تہلکہ لی هجوملرہ،
سلطان سلیمان قانونی اردولرینہ کوکس کرمک مجبوریتندہ دخی بولندی.
اوستریا و فرانسه خاندانلری آره سندنہ کی رقابت مسئلہ سندنہ

اتفاقیہ

اک شایان دقت اولان بر جہت سیاسی مذاکرہ لر،
اتفاقلردر. شمدی یہ قدر دولتر آره سندنہ بو درجہ مذاکرات جریان
ایتدیکی کورلمہ مش، دیپلوماسی بو قدر فعالیت کو سترمہ مشدی. مذاکراتدن
مقصد، اکثریا، عقد صلح دکل، بلکہ اتفاقلر عقدی صورتیلہ حربہ
دوام ایتک ایدی. فرانسه قرالری بالخاصہ انکلترہ قرالی سکزننجی ہانزی،
سلطان سلیمان، آلمانیانک پروتستان پرنسلی ایلہ اتفاق ایتدیلر.

سکزننجی ہانزی برقاج دفعہ ہم فرانسه قرالی، ہم دہ شارل کن
طرفہ کچہ رک متفق دیکشدیردی. هیچ کیمبہ انکلترہ قرالک صداقتہ
اعتماد ایدہ مدی. ہانزی «مدافعہ ایتدیکم حاکمدر Qui je défends
est maître» قولنی شعار ایدینمشدی. پک اوزون سورن دورہ سلطنتندہ
«باسکول سیاستی Politique de bascule» دنیلن سیاستی تطبیق ایتدی.
شارل کن ایلہ برنجی فرانسوادن ہانکیسی دہا قوتلی اولدی ایسہ اونک

علیهه دوندی. بصورتله فرانسه قرالی وایمپراطور آره سنده، انکلتړه نك منفعتنه، بر موازنه حصوله. کتیرمک ایسته دی. محارباتك ایلک دوره سی اوائلنده برنجی فرانسوانك « Camp du Drap d'Or » ملاقاتنده خوشه کیتمک ایچون واقع اولان مساعیسنه رغماً - بلکه ده کوسترمک ایسته دیکی ثروت وحشمتدن طولای - سکزننجی هازی شارل کن ایله اتفاق ایتدی [۱۵۲۰]. آلتی سنه صکره برنجی فرانسوا پایوه محاربه سنده مغلوب اولدیغندن انکلتړه قرالی فرانسه طرفه کچدی. ۱۵۴۳ ده برنجی فرانسوانك شمال جهتنده توسیع حدوده چالیشدیغنی کوردیکی زمان تکرار شارل کنك متفق اولدی. انکلتړه نك آوستریا و فرانسه خندانلری آره سنده کی محارباته اشتراکندن حاصل اولان نتیجه - سکزننجی هازینك وفاتندن صکره، قیزی ماری تودورک زمان حکومتده - قاله نك فرانسزلر طرفدن استراد ایدلمسی وانکلیزلرک فرانسه طوپراغندن صورت قطعیه ده طرد اولملریدر. فرانسه ترکلر ایله اتفاقدن پک چوق فائده کوردی. یوقاریده بوتفاق حقنده تفصیلات لازمه ویرلمش اولدیغندن تکراره حاجت یوقدر. یالکز سلطان سلیمان قانونینک ویا نه اوزرینه یوریمسی شارل کنی (قلمبره) معاهده سنی عقده مجبور ایتدیکنی، برنجی فرانسوانك مچ شهرینی آله بیلیمسی ینه ترکلرک مجارستان سفرلری سایه سنده ممکن اوله بیلدیکنی، الحاصل بو اتفاق فرانسه نك سلامتی و شرقده بیوک برنفوذ قازانمسی تأمین ایلدیکنی اخطار ایله اکتفا ایده جکزر.

برنجی فرانسوانك بر حکومت اسلامیه ایله اتفاقی اوزمان نه درجه شایان حیرت کورلمش ایسه پایالق مقامی وقتولیکلکک دشمن بی امانی اولان آلمانیا نك پروتستان پرنسلیله ایمپراطور علیهه بر اشمسی ده اوقدر حیرتی موجب اولمشدر. پروتستان پرنسلیله اتفاق ۱۵۳۲ تاریخنده عقد ایدلی.

فقط بوافاقدن آنحق یکر می سنہ صکرہ، یعنی ۱۵۵۲ء، ایکنجی ہازی
 زمانندہ فرانسه ایچون حقیق بر فائدہ کورلیدی . آلمان پرنسپلر ایله
 ایکنجی ہازی آردہ سندہ (شامبور - فریدوالد) معاہدہ سی او وقت
 امضالاندی [شباط ۱۵۵۲] . معاہدہ مذکورہ نک اک مهم مادہ سی شو
 ایدی : « فرانسه قرانک آلمان لسانی مستعمل اولماق لہ برابر اوتہ دن بری
 ایمپراطور لہ داخل اولان شہر لری ، یعنی (لورہن) داخلندہ طول ایله
 میچ ووردونی ممکن مرتبہ چابوق آلمسی موافق حقانیت کورلشدرد . »
 فرانسز لر اوچ یحق عصر اول عقد ایدیلن (فریدوالد) معاہدہ سنک
 بومادہ سنہ چوق اہمیت ویرر لر و دیر لر کہ : « ۱۵۵۲ سنہ سندہ میچ شہرینک
 طول ووردون کپی آلمان شہری دکل ، فرانسز بلدہ سی اولدیغنی بالذات
 آلمانلر بیان و تصدیق ایتشلردرد . آلمانلرک بالا اختیار رضالریہ لسان جہتندن
 فرانسز شہری اولان میچ سیاسة دخی فرانسز بلدہ سی اولمشدرد . بوضورتہ
 آلمانلر ۱۸۷۱ سنہ سندہ میچ شہرینک فرانسدن آلمسی حقسز بر معاملہ
 اولدیغنی اولدن سویلہ مشلر دیمکدر . »



کشفیات بحریه و تأسیس مستملکات

اون بشنچی عصرک صوڪ سنه لرنده واون آلتنجی عصر اوائلنده دنیا، اوروپالیر ایچون، بیودی. جنوبده بحر محیط آطلاسیده جنوبی آفریقا، شرقده آسیانک بحر محیط هندی سواحلی، غربده ایسه یکی بردنیا، آمریکا کشف ایدلدی. بوکشفیات بالخاصه پورتکیزلیلرله اسپانیوللرک اثریدر. شرقی آفریقا و اسپانیا ایچون (واسقودوغاما) یه، آمریکا ایچون (قریستوف قولومب) عائددر. باشلیجه سببی برچوق کرانهاامتعه و محصولات مملکتی اولان هندستانه طوغری یکی ریول بولوق آرزوسیدر. بوصله نك کشفی، سیر سفائنده وقوعه کلن ترقیات، ساحه علم وفنده و بالخاصه جغرافیاده مشاهده اولتان مراق و تجسس کشفیات مذکورہ نك وقوعی ممکن قیلمشدر. نتایج کشفیات (آلبوکرک) سایه سنده پورتکیزک، (فرنان قورتهز) و (پنزار) سایه سنده اسپانیانک واسع مستملکاته نائل اولملری، ایکیسنک دخی اون آلتنجی عصرده اوروپانک اک زنکین ایکی حکومتی اوله رق بوسایه ده قومشو دولتلرک دخی اکتساب ثروت و سامان ایلریدر.

شروع تجارتی

کشفیات عظیمه نك برنجی سببی قازانچ حرصی، زنکین اولوق آرزوسیدر. قرون وسطاده بعض اشیا تجارتی چوق کار بر ایددی. چونکه بواسیا پک نادر بولنوردی. ایپک، قطیفه، منسوجات قطیفه، اججار ثمنه، اینجی، فیل دیشی، پورسلن، عطریات، بنجور، مرصافی، صاری صبر و بالخاصه بهارات، قراقلیل،

دارچین، هند جوزی، بیر، زنجفیل اشیای مذکورہ میانندہ ایدی۔
 الك زیادہ بہارات صرف اولنوردی۔ بہاراتلی مشروبات، دارچینی علی الخصوص
 ویا زنجفیلی شرابلر هر یرده قوللانیلردی۔ بتون بو محصولات آسیانک
 مختلف یرلرندن اوروپایہ نقل اولنوردی۔ عطریات عربستاندن؛ احجار
 ثمنیہ، اینجی، فیل دیشی، منسوجات قطنیہ هندستاندن؛ اپیک وپورسلن
 چیندن؛ بہارات صوند آطهلرندن کلیردی۔ آسیانک جغرافیائی معلوم
 اولمدینی ایچون بو مملکتلرک جملہ سنہ (هندستان) نام عمومی ویرلمشدی۔
 بو هندستان۔ اوروپالیر خیالندہ۔ فوق العادہ زنکین، اسرار آلود
 بر مملکت ایدی۔ هندستان اوروپاچہ تمامیلہ مجهول ایدی۔ فی الحقیقہ
 اوروپالیر کلیتی مقدارده صرف ایلدکلی محصولات بالذات کیدوب
 آلازلردی۔ بو محصولات اوروپاچہ عرب تاجرلرینک وساطتیلہ
 وبری قرہ، دیکری دکز یولی اولمق اوزره ایکی طریق ایلہ کلیردی۔
 آسیای وسطادن کچن قرہ یولی، تعیر دیکرلہ «ایک طریق» بحر سیاہہ؛
 بحر محیط ہندی و بحر احمر دن کچن دکز یولی ویا «بہارات طریق»
 بحر سفید کنارندہ مصر و اسکندریہ منتهی اولوردی۔ دوه کاربانلریلہ
 بحر سیاہہ کلن امتعہ جنویز کیلرینہ تحمیل ایدیلردی۔ عرب کیلریلہ
 مصرہ کتیریلن حواللر وندیک سفائن تجاریہ سنہ آقظارمہ اولنوردی۔
 جنویز و وندیکیلر او زمان اوروپاچہ شرق امتعہ سی تجارتہ حاکم ایدیلر
 و بو یوزدن زنکین، سیاست قوتلی اولمشلردی۔ بالطبع بو ثروت و قوت
 اقوام سائرہ نک حسدینی حلب ایتکده ایدی۔ چونکہ جنویز و وندیکیلر
 طرق معلومہ مدخللرینی کندیلری ایچون محافظہ پک زیادہ اعتنا
 ایتدکلرندن دیکر اقوام بحریہ نیجہ نیجہ منابع ثروتہ مالک اولان هندستانہ
 کیتمک اوزره یکی یوللر بولمق ایستہ دیلر، و نہایت، آریوب بولیدلر۔

قرود و سطاوه

جغرافیا معلومانی

فقط یکی یولر آرامغه تشبث ایتک ایچون اولار ارضک

شکلی حقنده کی افکار قدیمه نك دیکشمسی و جغرافیا

معلوماتنک بر از توسع و کسب قطعیت ایتسی لازم

ایدی . قرون وسطاده اوروپالیرک جغرافیا حقنده کی معلوماتلری قدیم یونانیرک، رومالیرک، معلوماتلرندن آزایدی . اوروپالیر ، کندی مملکتلری خارج اولمق اوزره ، آنجق بحر سفید اطرافنی ، یعنی فاس ، جزایر ، تونس ، طرابلس سواحلی ، نیل ده لتاسنی و مصری ، سوریه و فلسطینی ، برده آسیای صغرای بیلیرلردی .

بحر سفید خارجنده ، آفریقا حقنده کی معلومات (بویادور) برونه ، آسیا حقنده کی معلومات (غائر) نهینه قدر کیده بیلیردی . هر ایکی قطعه نك داخلی ایسه همان بستیون مجهول ایدی . کمیجیلر ایچون سواحلك خریطه سی یاپیلیر و بونک اوزرنده باشلیجه لیمانلر کوستریلیر ایدی . اوزمان خریطه ترسیم و اعمالی علمنده کی جهاله نظر آ شایان حیرت درجده طوغری اولان بو خریطه لره « Portulas » ، یعنی لیمانلری دکزک بعض احوالی مصور کتاب نامی ویریلیردی . کره ارضه کلنجه ؛ ارضک کروی الشکل اولدینی اصلا قبول ایدیلور و « ارض کره شکلنده اولورسه بزه مقابل نصف کره ده کی انسانلرک باش آشاغی کزملری لازم کلیر . بو ایسه معاسز و غیر ممکن بر شیدر » دنیلیردی . ارض یا بر کنیش مربع ، یا خود تپسی کبی بر قرص شکلنده تصور اولنیور ؛ هر ایکی حالده قدس مرکزی اشغال ایدر ظن ایدیلور و جنت منهای شرقده کوستریلیور ایدی . قره لری احاطه ایدن اوقیانوسک بتون کائناتی محیط اولان و سمانک استناد ستونلری حکمنده بولان دیوارلره قدر امتداد ایتدیکی بیان اولنیوردی . شمالده شدت برودت و بوزلر یولی قاپور ؛

جنوبہ شدت حرارت ایلہ دکڑ صوینک قاینامسی دھا ایلری یہ کیتمکہ مانع اولیوردی . شو معلوماتہ کورہ هندستانہ طوغری اوتہ دن بری معلوم اولان یوللردن ماعدایکی بر طریق بولق امکان خارجندہ ایدی .

مع مافیہ اون آلتنجی عصر دن اعتباراً جغرافیا معلوماتی
جغرافیایک ترقیسی آرتدی . اولاء اوروپالیر آسیای قسمائ کشف ایتدیلر .

مارقوپولو ۱۲۶۶ ده پایا دردنجی اینوسان ، ۱۲۵۳ ده سن لوئی

ارض مقدسه صاحب اولان مسلمانلرہ قارشی مغوللرلہ براتفاق عقد ایتمک امیدیلہ بايقال کولنک جنوبندہ کائن قاراقوروم شهرینہ ، مغول پایتختنہ ایلچیلر کوندردیلر . (پلان قارپن Plan Carpin) اسمندہ بر ایتالیان ، (کیوم دو روبروکی Guillaume de Roubrouquis) نامندہ بر فلامان اولان بوسفیرلر فرانسیسکن طریقنہ منسوب ایکی کشیش ایدی . اوزمان اوروپالیر مغول خاننک خرستیان اولدیغنی ظن ایدیورلردی . سفیرلر بحر خزر دن شمالی چینہ قدر کچدکلری ، کوردکلری ممالک حقندہ شایان دقت معلومات کتیردیلر . بر از صکرہ ، مارقوپولو اسمندہ بر ونڈیکلی آسیادہ یکریمی سنہ دوام ایدن بر سیاحت اجرا ایتدی [۱۲۷۱ - ۱۲۹۱] . (قامبالو Cambalu) شهرینہ [*] کتیدی ؛ خطایده ، یعنی چینده ۱۷ سنہ اوطوردی ؛ بعدہ هند چینی ، هندستان و ایران طریقہ اوروپایہ دوندی . عودتندن اوچ سنہ صکرہ ، کزدیکی مملکتلرک احوالی مصور اولق اوزرہ ، « کتاب غرائب Livre des Merveilles » نامیلہ فرانسزجہ بر اثر یازدی .

مارقوپولونک ویردیکی معلومات اوروپالیرلرک مراقنی ، حرصنی پک زیادہ تحریک ایتدی . سیاح هر کون کمرکلرینہ ایپک ایلہ طولوبیکی

[*] خان بالقک محر فیدر . شمڈیکی پکین .

متجاوز آراہہ کیرن ، یالکز کمرک حاصلاتی سنوی ۱۵,۷۰۰,۰۰۰ دن
 فضله چوال آلتون کتیرن شہرلردن؛ بش بیکی متجاوز کمینک طویلاندینی،
 « اسکندریہ لیمانہ کان بیدر یوکلے بر کمی یہ مقابل یوزی متجاوز کمی
 کیرن » لیمانلردن ؛ « اوزرنده بتون ممالک عیسویہ نہرلرنده و دکزلرنده
 [بحر سفیدہ] بولنان کمی و امتعہ دن چوق کمی و امتعہ کوریلن ،
 حدسز حسابسز شہرلردن کچن » بر بیوک نہردن [ماوی نہر] بحث
 ایدیوردی . « عجائب عالمدن معدود اولہ جق درجہ دہ چوق » اینخیلر ،
 الماسلر ، فیروزہ لر ، یاقوتلر ، شکر ، بہارات ، عطریات و سائرہ بولنان
 ولایتلرک موجودیتنی خبر ویریوردی . زیپانغو Zipangu [شمڈیکی
 ژاپونیا] دہ آلتون او قدر مبذول ایدی ، کہ حکمدارک سرانی « ایکی
 پارماق قالینلغندہ » آلتون ایلہ سترو تفریش ایدلمشدی .

آسیا قسماً کشف ایدلیدی صرہ دہ شکل ارض حقندہ کی افکار
 قدیمہ دخی دکیشیوردی . اہل صلیب سفرلری نتیجہ سی اولہ رق عربلرلہ
 اوروپالیلر آرہ سندہ مناسبات آرمشدی . ممالک و ابجار بعیدہ سیاحت
 خصوصندہ اقوام سائرہ دن پک ایلری یہ کیتمش اولان عربلر علوم قدیمہ نک
 بر قسمنہ دخی وارث اولمشلردی . اوروپالیلر عربلر واسطہ سیلہ
 اراتوسن ، استرابون و بطلمیوس کبی یونان قدیم جغرافیونک آثارینی
 اوکرنمکہ باشلادیلر .

یونان علماسی ایسہ ارضک کرہ شکلندہ اولدینی قبول ایتشلردی .
 بناءً علیہ کرہ ارضی دائراً مادار طولاشمق ، اوروپادن حرکت ایدیلہ رک
 دائماً غربہ طوغری کیدیلرسہ آسیاہ واصل اولمق ممکن ایدی . میلاد
 عیسادن ایکی یوزسنہ اول اراتوسن اسکندریہ دہ درس ویررکن « بحر
 محیط آطلاسینک وسعتی مانع اولسہ یدی ایبہ ریا [اسپانیا] دکزندن

هندستانه کیتمک ممکن اوله جغنی ، سویله مشدی . دیگر طرفدن ایمپراطورلق زماننده روماتاجرلری هندچینی یه قدر ایلریله مشلر و (سهریک Sérigue) نامی ویریلن چین ایله مناسبات منظمه تجاریه تأسیس ایتشلردی . بطلمیوس ۱۶۰ سنه میلادیه سندده و آنطونین زماننده دنیانک خریطه سنی ترسیم ایتدیکی زمان « سهریک » قطعه سنی کوسترمشدی . « کتاب غرائب » اوقوندینی زمان بطلمیوسک (سهریک) ی ایله مازقوپولونک خطایی بر مملکت اولدیغنه حکم ایدلدی . خطای ، (سهریک) دن ده ایلریده فرض ایدلدی و بو صورتله آسیا اودرجه ایلری یه طوغری تمیددا ولندی ، که ژاپونیا شمدی قالیفورنیانک بولندینی موقعه قدر کوتورلدی . بو زماندن اعتباراً اسپانیا ایله هندستان آره سندده مسافه نک او قدر چوق اولمدینی فکری قوت بولدی . بو فکر و ارضک کرویشکل اولدیغنه دائر موجود اولان معلومات اون دردنجی عصر اواخرنده قاردینال (پیهردایی P. d'Ailly) اسمنده بر فرانسز طرفندن ایضاح و اکمال ایدلدی . آلتنجی شارلک سرای راهی و پارس دارالفنونک رئیس اولان بو قاردینال « دنیا تابلوسی » عنوانلی بر کتاب نشر ایتدی ، که بالاخره قریستوف قولومب بو کتابی کورمش ، اوقومشدر . پیهردایی اثرنده اروپا ، آسیا و آفریقایی احاطه ایدن دکزلرک بر اوقیانوس اولدینی فکرینی — که یونان قدیم حکما سنک فکری ایدی — ایضاح ایتمشدی . شو حالده آفریقا طولاشیله جق اولورسه هندستانه وصول ممکن اوله جقدی . ایشته ، اون بشنجی عصر اوائلنده پورتکیزلیرک ایلك سیاحت کشفیه لرینه سبب اولان و ایلك کشفیاتی انتاج ایدن بو صوک فکردر .

جغرافیا معلوماتنک ترقیسی سیاحت و کشفیات بحریه
 پلانرینک تصور و ترتینه امکان بخش ایلدیکی صروده
 سیر سفائنده ، انشاآت بحریه ده وقوعه کلن ترقیات
 سیر سفائندک ترقیسی
 قاراول

سایه سنده بو پلانرک موقع تطبیقه وضعی ممکن اولدی. ترقیات مذکوره
 دخی اهل صلیب سفرلرینک نتایجندن بریدر. افقک فوقده قطب
 ییلدیزینک ارتفاعنی اولچمک و بو سایه ده معلوم اولان بر نقطه یه نه قدر
 مسافه ده بولنلیدیغنی حساب ایتمک ایچون استعمال ایدیلن و اون اوچنچی
 عصردن بری معلوم بولنان اسطرلاب ایله پوصله سایه سنده کیجیلر بیوک
 دکزلرده بیله یوللرینی امنیت و قطعیت ایله تعیین ایده بیلرلردی. عینی
 زمانده سفینه انشا و تجهیزی صنعتی ترقی ایتشدی. قرون وسطاده همان
 یالکز بحر سفیده سیاحت ایدیه بیلور و « غاله Galère » ایله
 « نف Nef » دنیلن ایکی درلو کی بولنیوردی.

قادیرغه دیدیکمز « غاله » لر اللی مترو اوزونلغده ، ایکی یوز اللی
 ویا اوچ یوز کورجکی ایله حرکت ایدر، اینجه، اوزون، سریع الحرکه کیلر
 ایدی. فقط صو اوزرنده غایت آچاق ، سویه بچردن نهایت بر بحق
 مترو یوکسک اولوب بحر محیط کی یوکسک و جسم طالعلی بر دکزده
 بولنرله سیاحت ایتمک غایت تهلمکلی ایدی.

« نف » دنیلن کمی ایسه بالعکس یوکسک کنارلی ایدی. اهل
 صلیب سفرلری اناسنده اردولر بو نوع کیملرله نقل ایدلمشدی. فقط
 « نف » آغیر ایدی؛ بر دیرکلی ، بر یلککنلی و بناءً علیه غایت بطی الحرکه
 ایدی. سن لوئی بی قبریسدن فرانسه ساحلنده کائن (اییه Hyères) ه
 کوتورن « نف » بو کون عادی بر واپورک بر هفته ده قطع ایده جکی
 مسافه بی ۷۰ کونده قطع ایتشدی.

اون دردنجی عصرده یوز سنه محاربه سی وندیکیلرک فلاندره اشیا و امتعه تجاریه نقلی ایچون کچدکلی فرانسه طریقنی قبادی . وندیکیلرک دکزدن فلاندره کیتملری و بونک ایچونده هم سریع السیر ، همدم بحر محیط آطلاسیده بلا مخاطره سیروسفر ایده بیلجک شرائطی حائر یکی بر نوع کمی انشا ایتلری لازم کلدی . « نهف » ک شکلی تبدیل ایتک صورتیله بویکی کمی انشا ایدلای . نهف دها خفیف بر شکله قوندی ؛ اوچ دیرک ، مربع ویا مثلثی الشکل بش یلکن یابیلدی . بوصورتله نهایت ۳۰ مترو اوزونلغده — شمیدی اک کوچک طوریدولر بوینده — ، فقط غایت قوللانیلی بر کمی وجوده کیتلیدی « قاراوول Caravelle » دنیلن بویکی کمیلر ساعتده اون کیلو مترو قطع ایتدکلی ایچون اوزمانه کوره سریع السیر اولدقلری کبی غایت یوکسک اولدقلرندن بحر محیطک اک جسم طالعه لرینه دخی مقاومت ایده بیلرلردی . ایشته ، اون بشنجی عصرده پورتکیز سیاحلرینک و جنوبی آفریقا کاشفلرینک ، قریستوف قولومبک و آمریقایه کیدن ملاحلرک را کب اولدقلری کمیلر « قاراوول » سیستمنده ایدی .

پورتکیز لیلر

بحر محیط آطلاسیده و آفریقا ساحلنده ایلاک سیاحات پورتکیز کاشفلرینده کشفیه جنویز و فرانسمز ملاحلری طرفندن اجرا ایدلمشدر . اولکی مودلر اون دردنجی عصر اوائلنده ، کوزل فیلیپ ایله صوک قایت حکمدارلری زماننده بویادور برونه ، آصور ، مادهر و قناریا آطه لرینه مواصلت اولنمشدی . فی الحقیقه اخیراً کشف ایدیلن ۱۳۳۹ تاریخی

برخريطه ده سالف الذکر برون و آطه لر محرر دره . اون بشنجی عصر اوائلنده ،
 ۱۴۰۲ ده (ژان دوبه تنقور Jean de Béthencourt) اسمنده (قو Caux)
 مملکتی اها لیسندن بر نورمان قناریه آطه لرینی ضبط و اوراده بر قراللق
 تأسیس ایتدی . فقط تاریخ مذکور دن یاریم عصراول ، ۱۳۶۰ سنه سنه
 طوغری (دیه پ) ، بعده (روآن) کیجیلری (کینه) کور فزینه واصل
 اولمشلردی . بشنجی شارلک بتون دور سلطنتده و آلتنجی شارل زمانک
 بر قسمنده ، ۱۳۶۴ الی ۱۴۱۰ تاریخلری آره سنده بو کیجیلر الیوم « فیل
 دیشی ساحلی » و « آلتون ساحلی » دیدیکمز سواحله محصولات مختلفه ،
 بالخاصه فیل دیشی و آلتون توزی آرامغه کیتدیلر . یوزسنه محاربه سنک
 تولید ایتدیکی فلاکتله ، شمالی فرانسه نک انکیزلر طرفدن اشغالی فرانسز
 کیجیلرینک باشلادقلری آفریقا تجارتنک معطل قالسنه سبب اولدی .

پورتکیزلر سیاحات کشفیه لرینه ۱۴۱۹ تاریخنده ،

یوقاریده ذکر یکن فرانسه قرالی آلتنجی شارلک

اواخر سلطنتنده باشلادیلر . بوسیاحتلرک وصف میزی

بالکزتجاری اولیوب بدایتندن نهایته قدر علمی و اصولی

پورتکیز سیاحات

کشفیه سنک اوصاف

مجموعه سی

اولمسیدر . مثلاً ، ۱۴۶۹ سنه سنده پورتکیز قرالی بشنجی آلفونس کینه
 سواحلنک ایشله دلمسی امتیازینی بر قومانیایه ویررکن هر سنه بش یوز فرسخ
 سواحل جدیده کشف اولنسی مجبوریتنی تحمیل ایتشدی .

پورتکیز سیاحتلرینک علمی بر ماهیتی اکتساب ایلسنه

سبب قرال برنجی ژانک اوغلی اولوب « ملاح Navigateur »

پرنس هانری

لقبیه معروف اولان و سیاحات مذکورده نک ایلک متشبثی بولان پرنس

هانری (۱۳۹۴ - ۱۴۶۶) در . پرنس هانری هنوز یکرمی یاشلرنده ایکن

فاس مسلمانلرینه قارشى وقوعه کلن محارباتده تمیز ایتدکن صکره پورتکیزک

دکڑہ طوغری اک زیادہ ایلریلہ مش اولان واك جنوبی نقطہ سنی تشکیل ایدن سن و ہنسان برونندہ کائن (ساگرہ س Sagrès) دہ اختیار اقامت ایتدی . اورادہ کی سرایی یواش یواش سیرسفاٹن ، ہیئت و جغرافیا مکتبی حالہ کلدی . ہازی بر چوق کتاب و خریطہ جمع ایلدی و ہر صورتلہ ممکن مرتبہ دہ واسع جغرافیا معلوماتی طویلامغہ چالیشدی . احتمال کہ ، بدایہ ، صرف سوق الجیشی بر مقصد ایلہ حرکت ایدیور ؛ بلکہ دہ پور تکیز لیلرک عصر لرجہ زماندن بری دشمنلری اولان فاس مسلمانلرینی آرقہ دن اور مق ایچون آفریقا سواحلندہ مناسب بر نقطہ آرایوردی . فقط بر مدت صکرہ بتون مساعیسنی ہندستان یولنی بولمغہ حصرو صرف ایتدی . ۱۴۱۹ دن اعتباراً ہمان ہر سنہ بر ہیئت سیاحینک یولہ چیقدینی کورلدی . بو ہیئتلر صوک سیاحتلرک نتائجہ کسب و قوف ایدرلر واولکی سیاحتلرک واصل اولدقلری نقطہ دن دہا ایلری یہ کیتمکہ چالیشیرلر ایدی .

ترقی پک آغیر و کوچ اولدی . ہندستان یولی بولننچہ یہ پور تکیز ملامہلرینک قدر ۷۰ سنہ کچدی . اون درت سنہ دہ بویادور بروننہ سیاحات مرمہلری [۱۴۳۳] کیدلدی : اورادن یشیل برونہ کیتمک ایچون تام اون بش سنہ کچدی [۱۴۴۷] . یشیل برونہ مواصلت ایدلکدن ۲۴ سنہ صکرہ خطاستوا کچیلہ بیلدی [۱۴۷۱] . خط استوانک کچیلمسی ایلہ قونغو منصبندہ کی قویک کشنی آره سندنہ کی فاصلہ ۱۴ سنہ در . حال بوکہ خطاستوا ایلہ مذکور قوی آره سندنہ کی مسافہ آنجق ۵۶۰ کیلومترو قدر در . بوندن صکرہ سیاحت کشفیہ دہ دہا زیادہ سرعت کورلدی . آفریقانک منہای جنوبنہ کیتمک ایچون ایکی سنہ کفایت ایتدی . ۱۴۸۷ دہ فورطنہلر (بارتہلمی دیاز) ک کیسنی جنوبہ طوغری سور وکلہ دی ؛ صکرہ شالہ سوق ایدرک شیمدیکی ناتال قطعہ سی آچیقلرینہ کوتوردی . (بارتہلمی

دیار) بحر محیط هندی به واصل اولدیغنی خاطره بیله کتیرمیه رک عودت ایدرکن (نابل Table) طاغنی و آفریقانک منهای جنوب نقطه سنی کوردی؛ بورایه «فورطنه لر برونی» اسمنی ویردی. پورتکیز قرالی بواسمی امید برونه تحویل ایتدی. اون بر سنه صکره واسقودوغاما هندستانه، (قالیکوت Calicut) پیشکاهنه واصل اولدی.

کشیفاتنک بودرجه بطائله ایلرلمسی اسباب متعدده دن نشأت ایتشدور. اولاء سفائن مرتباتنک بسبتون مجهول اولان بحر محیط قارشیسنده کی افکار باطله سی، خوف و خشیتی بطائنه سبب اولدی. کیجیلر بحر محیط صولرینک دینده کیلری جذب ایدن و اونلری باتیران «مقاطیس طاشلری» بولندیغنه قانع ایدیلر. خط استواده صولرک قاینادینی بر منطقه موجود اولدیغنی ظن ایدیورلردی. امید برونه یا قلاشیلدینی زمان کیجیلرک قورقولری آرتدی. اک قوتلی، اک بیوک طالغه لر بوبرون آچغنده کوریلور. طالغه لر بوراده اون بش مترویه قدر - درت بش قاتلی بر خانه نک ارتفاعجه - یوکسلیر. (بارته لی دیاز) ک یاننده کی کیجیلرک نه مدهش خاطرات ایله مملکتلرینه عودت ایتدکلرینی تصور ایچون یالکمز بو طالغه لرک دهشتنی دوشونمک کافیدر. بوندن طولاییدر، که واسقودوغامانک کیلری تجهیز ایدیلیرکن مرتباتی اکمال ایچون اعدامه محکوم اون کشینک - جزالری عفو ایدلمک وعیدله - مرتبات میاننه آلمسنه مجبوریت حس ایدلدی. بو قدر سعی و غیرت ایدلمکله برابر مرتبات آنجق یوز آلمش کشی به ابلاغ اوانه بیلدی. ثانیا، خط استوانک اونه طرفه واصل اولان کیجیلر جهت تعینی امکانسزلنی قارشیسنده بولندیلر. فی الحقیقه بولندقلری نقطه نک عرضی حساب ایچون الزم اولان قطب ییلدیزی آرتق کوره میورلردی. یکی برواسطه، بر اصول بولمق ایجاب ایدیورلردی. بو اصول آنجق ۱۴۸۲ تاریخنه طوغری

(مارتن بہ ہم Martin Behaim) اسمندہ نورہ نبرغلی بر آلمان طرفندن کشف ایدلدی، کہ اسطراب ایلہ قطب ییلدیزینک ارتقاعی یرینہ وقت ظہردہ افقک فوقدہ کونشک ارتقاعنی اولچمکدن عبارت ایدی .

(بارتلمی دیاز) آفریقانک جنوبہ طوغری ایندیکی واسقودو غاما صرہدہ ہندستانہ طوغری یکی بر یول بولق خصوصہ

پرنس ہانری درجہ سندہ مراق ایش اولان پورتکیز قرالی ایکنجی زان (پہردو قوویلہام Pierre de Covilham) اسمندہ رضابطی مصر و بحر احمر طریقہ کشفیاتہ مأموراً اعزام ایشدی [۱۴۸۶] . قوویلہام بر عرب کیسنہ بینہ رک - اوزمان بحر محیط ہندینک الہیوک بازار تجارتی اولان - قالیکوتہ واصل اولدی . قالیکوت الہیادہ بیر پیاسہ سی اولقلہ معروف ایدی . ہندستان ایلہ شرقی آسیانک محصولاتی بولیمانده طویلانیر ؛ عرب تاجر لرینک کیلری آفریقا و آوروپایہ امتعہ نقل ایشک ایچون بورادن حرکت ایدردی . (قوویلہام) قالیکوتدن شرقی آفریقا ساحلہ کیتمکہ موفق اولدی و زامبہزہ قدر جنوبہ ایندی . ہر یردہ بیوک بر فعالیت تجاریہ کوردی . ایکنجی ژانہ کوندردیکی راپور، آفریقادن ہندستانہ سیاحت حقندہ و یردیکی معلومات مفیدہ ہندستانہ بر آن اول واصل اولق آرزوسنی تشدید ایتدی . اوصردہ قریستوف قولومب ایلک ایکی سیاحتنی اجرا ایشدی [۱۴۹۲-۱۴۹۶] . ہرکس قولومبک آسیا قطعہ سنک شرق طرفہ واصل اولدینغی ظنندہ ایدی . پورتکیز لیلر کندیلرندن اول اسپانیوللرک ہندستانہ آباق باصملرینہ میدان و یرمہ مک ایچون یکی بر غیرت ایلہ ایشہ کیریشدیلر .

۱۴۹۷ سنہ سی جزیرانندہ اوچ کیدن مرکب بر ہیئت سفیرہ ، واسقودو غامانک قومانداسی آلتندہ، یولہ چیقدی . امید برونی طولاشدقن

صکرمه آقینی و فورطنه لردن طولانی شرقی آفریقا ساحلنی تعقیباً کمال مشکلات شماله طوغری یولنه دوام ایتدی . موزامبیکده زامبهز منصبه ، پورتکیزدن حرکتدن اعتباراً اون آی صکرمه زنکبار ساحلنه واصل اولدی . اوراده ، واسقودو غاما معینه بر عرب قلاغوز آلدی . موصون دنیلن موسم روزکارلری جنوب - غرب استقامتمنده وزان اولدیغدن واسقودو غاما یکریمی اوچ کونده قالیکوته مواصلت ایتدی [۲۰ مایس ۱۴۹۸] . قالیکوت راجه سی پورتکیزلیرمه باردانه معامله کوستردی . احتمال که عرب تاجرلری بویکی کلن آدملرک کندیلرینه مدهش بر رقیب اوله جقلرینی آکلامشله ، حکمداری اونلرک علیه چویرمشلردی . واسقودو غاما ، قالیکوتدن صکرمه (غوا) به کیتدی . بعده ، کیلرندن بری غرق اولدی ؛ پورتکیزه عودت ایلدی [ایلول ۱۴۹۹] . مظفر بر قوماندان کبی استقبال ایلدی و قرال کنديسنه « بحر محیط هندی آمیرالی » عنوانی — صلاحیت واسعه ایله برلکده — توجیه ایتدی .

پورتکیزلیر هندستانک یکی طریقی کشف ایتدکن صکرمه بونک اللرنده قالمسنی تأمین ایتک و بحر محیط هندی تجارتی ید انحصارلرنده طوتمق ایسته دیلر . بو مقصده بناء باشلیجه لیمانلری اشغال ایتدیلر

پورتکیز مستملکات

امپراطور لغند

تأسی

ورقیلرینی - درلو ظلم و وحشت ایله - قورقوتدیلر . واسقادو غامانک عودتی متعاقب (آلوارهز قابرال Alvarez Cabral) ک قومانداسی آلتنده بر مقدار عسکر ایله بر دونما کوندردی [مارت ۱۵۰۰] . هندستانه آیاق باصمق مقصدیه ترتیب ایدیلن بو سفر نتیجه سز قالدی . مع مافیه هندستانه کیره مین بو دونما پورتکیزک مستملکاتی آره - سنده اک چوق زمان کنديسنده قالان واستقبالی پک پاولاق اولان اراضینک الحاقنی تأمین

ایتدی ، روزگارلرک غربہ سوق ایتدیکی (قابرال) نہایت یکی بر قطعہ یہ آباق باصدی ؛ اوراسنی پورتکیز نامہ ضبط ایلدی . بو قطعہ یہ بالا آخرہ (برہ زیلا) نامی ویرلمش ، اون طقوزنجی عصرہ قدر پورتکیز مستملکہ سی اولہ رق قالمشدر .

واسقودوغاما (قابرال) دونماسنک هندستانہ کیدہ مہ مسندن متولد موفقیتسزلکی تلافی ایچون ۱۵۰۲ تاریخندہ یکرمی کمی ایلہ حرکت ایتدی . بوسیاحتندہ ظلم و وحشت ایلہ اقوام ساثرہ یی قورقوتقم مسلکنی تطبیقہ باشلادی . قالیکوتی طوپہ طوتدقدن صکرہ عمان کورفرزندہ طولاشدی . حجازدن عودت ایدن حجاجی حامل بر عرب کیسنہ راست کلدیکی زمان سفینہ یی یولجیلریلہ برلکدہ یاقدی . حتی قالیکوت پیشکاہندہ تصادف ایتدیکی پرنج یوکلکی کیلری — برون ، قولاق واللرینی کسیدردیکی سکزیوز مرتباتی ایچندہ اولدینی حالہ — یاققدن کری طورمدی . پورتکیزہ منسوب اولیمان ویا پورتکیزلیلر طرفندن سیروسفرہ مآذون اولیمان هیچ بر کمی بعدازین هند صولرندہ کزمیہ جک ایدی .

پورتکیزلیلرک هندستانہ وضع ید ایتلمری عربلرک تجارتی احما ، مصر سلطانک منافعی اخلال ، وندیکیلرک ثروت و قوتلرینی تنقیص ایدیوردی . متضرر اولانلر آرہ سندہ بر اتفاق حصولہ کلدی . وندیکیلر مصرسلطانہ و عرب تاجرلرینہ پارہ ، لوازم حربیہ ، عسکر و ضابط ویردیلر . بحر احمرده بر فیلو تجهیز ایلدی . فقط بو دونما بر قاچ موفقیت احراز ایتدکن صکرہ (دیو) دہ پورتکیز قپودانی (آلمیدا Almeida) یہ مغلوب اولدی [۱۵۰۹] . بونک اوزرینہ وندیکیلر امید برونی طریقک کشفی فائدہ سز بر حالہ کتیرمک ایچون سویش برزخندہ بر قبال حفرینی دوشوندیلر . فقط او زمان وندیک جمهوریتی ایتالادہ (قامبرہ) اتفاقی

قارشیسندہ و مشکلات عظیمہ ایچندہ ایدی . فرانسه قرالی اون ایکنجی
لوئی وندیک اردوسنی (آنیادہل) دہ محو ایتدی . بوندن صکرہ
وندیکیلر قنال حفری مسئلہ سیلہ اشتغالہ وقت بومدیلر .

آلبوکرک

وندیکیلرک ہندستان تجارتی (آلبوکرک) اسمندہ بر
پورتکیزی قپودان بستون محو ایتدی آلبوکرک اولہ
عدن کورفزی و بحر احمر مدخلنی سد ایدن صوقوترا آطہ سنی [۱۵۱۳]،
بعده بصرہ کورفزی مدخلندہ کی ہرمز بوغازینی [۱۵۱۵] اشغال ایلدی .
بوندن صکرہ شرق امتعہ سنی بحر سفیدہ ایصال ایدن ایکی طریقک
مدخللری پورتکیزیلر اندہ بولندی و امتعہ مذکورہ یالکیز اونلر
واسطہ سیلہ جنوبی آسیادن اوروپایہ نقل اولندی .

آلبوکرک پورتکیز مستملکات ایمپراطورلغک مؤسس حقیقیسی
اولدی . ہندستان ساحلندہ (غوا) پی اشغال ایتدی [۱۵۱۰] .
بولیمان پورتکیز آسیا مستملکاتنک مرکز ادارہ سی حالہ کیردی . آلبوکرک
ہندستاندن اوروپایہ کیدن یوللری غرب جہتندہ تحت تأمینہ آمازدن
اول بنغالہ کورفزی چین دکنزیلہ برلشدیرن بوغازدہ کاٹن مالاقای
ضبط ایتک [۱۵۱۱] صورتیلہ ہندستاندن چینہ کیدن یوللرک مدخل
شرقی سنی الہ کچردی . بتون مدخل و مخرجلری قپانان بحر محیط ہندی
عادتا بر پورتکیز کولی اولمشدی . آلبوکرک معیتندہ کی ضابطان مالاقادن
دہا ایلری یہ کیدرک بہارات آطہ لرینہ ، جاوایہ ، باندایہ ، مولوک جزائرندن
ہند جوزی آطہ سنہ واصل اولدیلر . بعدہ چین ساحلندہ قانتونہ کیتدیلر
[۱۵۱۷] . الحاصل ، ۱۵۲۰ سنہ سندہ پکینہ بر پورتکیز ہیئت سفارتی کوندردی .
بو صورتلہ یکی اوروپانک ایلک بیوک مستملکات ایمپراطورلغی یکرمی
بش سنہ یہ یاقین بر زمان قلیل ظرفندہ تاسیس ایدلمش اولدی . اسپانیوللرک

الندہ آنجق آنتیل آطہ لری واردی . پورتکیز لیلر جنوبی آمریقاده
برہ زیلیاہ آیاق باصدقلری و بحر محیط آطلاسیدن بحر محیط کیرہ، آفریقاده
بویادور برونندن آسیادن دھا اوزاقدہ اولان مولوک آطہ لرینہ قدریکرمی
بیك کیلو متروندن فضلہ طولہ مالک سواحلدہ مستملکات تاسیس ایتدکلری
حالدہ اسپانیولر ہنوز آمریقا قطعہ سندہ یرلشمکہ باشلامامشئر ایدی .

پورتکیز مستملکات امپراطور پورتکیز مستملکات امپراطورلنی شمیدیکی
نفک اوصاف ممبڑہ سی اروپا دولترینک مستملکاتنہ اصلا بکڑہ -

میوردی . فرانسنک جزایر ویا انکلترہ نک اوسترا لیا مستملکہ سندہ اولدین
کبی کتلہ واحدہ تشکیل ایدن، مملکتک منافع طبعہ سندن استفادہ ایتک،
یرلشوب اوتورمق، یکی بر وطن احداث ایلک مقصدیلہ کلن مستعمرلر
ایلہ مسکون اراضی موجود دکلدی . وقتیلہ فیکہ لیلر ایلہ قارطاجہ لیلرک
یابدقلری کبی پورتکیز لیلر دخی یالکز سواحلدہ بعضی نقطہ لری اشغال
ایتمشئر، داخلہ طوغری کیرمکہ چالیشامشئر ایدی . اھالیسی صرف
تاجرلردن مرکب مستملکہ لر، تعبیر دیکرلہ بحری موقفلر و تجارت
بازارلری تأسیس ایلشلردی . بو تجارت یرلرنده لیزبونہ کوندریلہ جک
امتعہ واشیایی ادخارایلہ اکتفا ایدرلر وزنکین اولمق ایچون نہ قدر زمان
لازم ایسہ آنجق اوقدر - وسطی اولہ رق اوچ، نہایت درت سنہ - اورالردہ
قالرلر؛ بعدہ، زنکین اولنجہ مملکتلرینہ دوزلردی . اوروپادہ ہند
تجارتنک اک بیوک حصہ منافعی - کندی خطالری اثری اولمق اوزرہ -
اللرندن قاجیردیلر . وندیکیلری تقلید ایدہ مدیلر؛ ہندستان محصولاتی
پراکنده صورتیلہ صاتمغہ موفق اولہ مدیلر . لیزبون طویدن صاتیش
ایچون بر مرکز اولدی . اوروپالی تاجرلر اورادن مبیاعاعدہ
بولنورلردی . فقط بومبیاعات ہولاندالیر واسطہ سیلہ اجرا ایدیلیردی .

هولاندالیر پورتکیزلیرک نزل ایتدکلری قومیسوخیلق یوزندن زنکین اولدیلر سیاست آتیه لری ایچون برواسطه قدرت وقوت الده ایتدیلر . دیگر طرفدن پورتکیز چوق کوچک برملکت ایدی . بودرجه واسع مستملکاتی مدافعه ایده بیلیمک ایچون لازم کلن عسکردن ، آدمدن محروم ایدی . اونک ایچون پورتکیز مستملکات ایمراطورانی پک آز ، آنجق ۷۵ سنه ، یعنی برانسان عمری قدر دوام ایتدی . اون آلتنجی عصر اوآخرنده هولاندالیر پورتکیزک - اسپانیولرک الله دوشمش اولان - اک کوزل مستملکه لرینی ، صوماترا و جاوای ، بهارات آطه لرینی آلدیلر .

اسپانیولر

پورتکیزلیر جنوبدن هند یولنی آزادقلری و آفریقایی طولاشدقلری صروده قریستوف قولومب عینی طریق اسپانیولرک حسابنه اوله رق غربده آرایور و - کندیسینی فرقه بیله وارمهدن - یکی بردنیا ، یعنی آمریقایی کشف ایدیور ایدی .

قریستوف قولومب ۱۴۵۱ و یا ۱۴۵۲ سنه سنده جنوده قریستوف قولومب طوغمش ایدی . تاریخ تولدی صورت قطعیده تعیین ایدیله مەمشدر . برفقیر چولخنک اوغلی ایدی . قریستوف قولومبک اون درت یاشنده کیمچی اولدینی وقتيله روایت ایدیلردی . حال بوکه یکریمی یاشنده جنوده یباغی ایشله یین عمله میاننده چالیشدینی بوکون ثابت اولمشدر . کیمچی اولدینی زمان اوزون سیاحتلرده بولندی . بالاخره فردیناند وایزابیل قتولیکه یازدینی بر مکتوبده : « شمدی یه قدر سیر وسفر ایدیلن بتون دکزلرده بنده کزدم . » دیمشدر . شرقی کورمش ؛ متعدد دفعه لر

انگلترہ یہ ، ایسلانڈیہ ، کینہ سواحلہ کیتمشدی . ۱۴۷۸ء نیز بوندہ اختیار اقامت ایتمشدی . اورادہ سکز سنہ قالہرق جغرافیا و ہیئت تحصیل وجسور برملاح دیہ شہرت بولمش اولان برپورتکیزلی اصلزادہ نک قیزیلہ نأهل ایتدی .

پورتکیزدہ اقامتی اٹناسندہ سیاحت پروژہ سنی ترتیب ایتدیکی ظن اولنور . بو پروژہ یی شوصورتلہ تعریف ایدیور : « شرقی غرب جہتندہ آرامق و غرب طریقہ بہارات یتشدیرن مملکتہ واصل اولمق » قریستوف قولومب (. بیہ ردایی) نک کتابندن وارضک کرویتی حقندہ کی افکار شخصیه سندن ملہم اولمق صورتیلہ پروژہ سنی ترتیب ایتمشدی . ذاتا قولومبک فکری اوزمانک تحصیل کورمش آدملرینہ ییانجی دکلدی . ۱۴۷۴ سنہ سندہ (طوسقانلی Toscanelli) اسمندہ برفلورانسہ لینک پورتکیز قرالہ یازدینی برمکتوبدہ عینی پروژہ یی بیان وایضاح ایلدیکی ، قریستوف قولومبک بو مکتوبی اوقومش وحتی طوسقانلی ایلہ مخابرہ ایتمش اولدینی پک چوق زمان روایت ایدلمش ایسہدہ بونک حقیقتہ مغایر بولندینی ایوم آکلاشیلمشدر . اوزمانک جغرافیونی - یوقاریدہ بیان ایتدیکمز وجہلہ - آسیایی شرقہ طوغری پک زیادہ تمدید وبوصورتلہ غربی اوروپا ایلہ شرقی آسیا آرہ سندہ کی مسافہ یی تنقیص ایتمش اولدق لرندن بحر محیط اطلاسی طریقہ اوروپادن ہندستانہ کیتمک دہاقولای و ممکن عداولنمقدہ ایدی . بحر محیط اطلاسیدہ مادہر ، آصور وقناریا آطہ لرینک کشفی بومسافہ یی دہا زیادہ قیصالتمش ایدی . قریستوف قولومب پروژہ لرینی ایلک اوکجہ پورتکیز قرالہ عرض ایتدی . فقط حسن قبول وتلقیہ نائل اولہمدی . فردیناند وایزابل قتولیک نزدندہ حسن

قریستوف قولومب

اسیایادہ

قبولہ مظهر اولمق امیدیلہ ۱۴۸۴ سنہ سندہ اسپانیایہ کچدی . ۱۴۸۶

سنه سی اوائلده قرطبهده حضور حکمداریه کیرمکه موفق اولدی .
 بالخاصه ایزابل طرفدن مراق و دقت ایله دیکله نن تکلیفلی برای تدقیق
 (سالامانق) دارالفنوننه کوندردی . دارالفنون پروژهینی موافق کوردی .
 فقط فردیناند و ایزابل اوزمان اندلس عربلرینه قارشی اجرا ایتدکلری
 محاربات ایله پک مشغول بولندقلرندن قریستوف قولومبه تخصیصات باغلادیلر
 و برمدت انتظار ایلمسنی توصیه ایتدیلر [۱۴۸۸] . مذاکراته تکرار باشلانیدینی
 زمان قریستوف قولومبک مطالب مفرطه سی یکیدن تأخراته سبب اولدی .
 قولومب ده ا زیاد صبر ایدمه یه فرانسه یه عزیمته قرار ویردی . یوله
 (پالوس) قریبنده کائن بر مناسترده توقف ایتدی . بومناسترك باش راهی
 و قتیله ایزابلک یاننده بولمشدی . قولومبک پروژه لرینه واقف اولنجه
 فرانسه یه عزیمته مانع اولدی و قرال و قرالیچه ایله یکیدن مذاکره قیوسنی
 آچدی . اوصرده غرناطه تسلیم اولمشدی . بو موفقیتی احراز ایدن
 فردیناند ایله او یوشمق کسب مهولت ایتدی . فردیناند و ایزابل (سانتافه) ده
 قریستوف قولومب ایله عادتاً بر معاهده امضالادیلر [۱۴۹۲] . قولومبه -
 ارثاً اولادینه انتقال ایتک اوزره - « بیوک آمیرال » عنوانی ، کشف
 ایدمه جکی آطه لرك والی عمومیلکنی ، تجارت انحصارینی و سائر منافی تأمین
 ایدیورلر و ایجاب ایدن کیلر ایله تقریباً ۳۵۰,۰۰۰ فرانق تخصیصات
 ویریورلردی . قرالیچه بومبلنی تدارک ایدمه یلمک بتون مجوهراتی ترهینه
 مجبور اولدی . ایجاب ایدن سرمایه نک قسم متباقیسی ، تقریباً ۷۰۰,۰۰۰
 فرانق پالوس کمی صاحب لرندن (مارتن پنزون Martin Pinzon) اسمنده
 بر شخص طرفدن تأمین ایدلدی . (پنزون) هیئت سفریه یه التحاق ایدیور
 و قریستوف قولومبدن ضعیف بر حصه استفاده آلیوردی . شو حالده
 آمریقایی کشف ایدن هیئت سفریه عادتاً قوماندیت طرزنده بر شرکت
 تجاریه گبی ایدی .

ایملک سیامت قریستوف قولومب الکی بیوکی و آمیرال کمیسی اولان (سنت ماری) ۲۳ مترو طولندہ اولمق اوزره اوچ قاراول ایله ۳ آگستوس ۱۴۹۲ تاریخندہ پالوسدن حرکت ایتدی. مرتبات یوزیکرمی کشی ایدی. کوچک فیلو قناریا آطہ لرندہ برقاچ کون طوردی؛ بعدہ ۹ ایلولده اورادن بحر محیطہ آچیلدی. سیاحتک دوام ایلدیکی ۳۳ کون ظرفندہ کمیجیلر یولک اوزونلغندن قورقدیلر حتی اسپانیایہ عودت ایدہ مہمک اندیشہ سیلہ ییزار اولدیلر. فقط - بو بابده کی افسانہ خلافتدہ اولہرق - عصیان ایتدیلر.

۱۰ تشرین اول چہارشنبہ کونی کمیجیلر دہا اوزاغہ کیتمک ایستہ. مدکلرینی سویلدیلر. قریستوف قولومب جواباً ہندستانہ واصل اولمق ایچون حرکت ایتیش بولندینی جہتلہ اورایہ مواصلت ایدنجہیہ قدر یولنہ دوام ایدہ جکنی بیان ایتدی. قولومبک یازدینی خطرہیہ نظراً فرداسی، ۱۱ تشرین اول پنجشنبہ کونی، آقشام ساعت ایکیہ طوغری کمیسنک باش طرفندہ بولنان قریستوف قولومب اوزاقدہ بر ضیا کوردی. آرقداشلرندن برینہ کوستردی. بو ایشیق « یوقاریہ چیقاریلوب بعدہ آشاغیہ ابندیریلن بر مشعلہیہ بکزه یوردی. » مرتبات کیفیتدن خبردار وھرکسک متیقظ بولمنی تنبیہ ایدلدی. بر قاچ ساعت صکرہ، ۱۲ تشرین اول جمعہ کونی صباح ساعت ایکیہ طوغری لاقلا ایکی میل اوزاقدہ قرہیہ تقریق ایتمک ممکن اولدی. قریستوف قولومب دیز چوکدی، سوئنجندن آغلادی، دعای شکرانی او قودی.

قریستوف قولومبک یناشدینی و (سان سالوادور) نامنی ویردیکی (عوآناہانی) آطہسی شمالی آمریقاہ یاقین، فلورید بوغازی مدخلندہ کائن (لوقای) جزائرندن بری ایدی. جمعہ کونی اورادہ کچیرلدی.

جمعه ایرتسی صباحی قولومب یلکنلری آچدیره رق کیمیره یول ویردی . چونکه هندستانه آیاق باصدیغنه صورت قطعه ده قانع بولنیور واسپانیاقرالئک زیپانغو حکمدارینه و خطای ایمپراطورینه یازدینی نامه لری برآن اول تسلیم ایتک ایسته یوردی . اوچ آی مملکت و حکمدار آرادی؛ لوقای آطه لرندن حرکتندن درت کون صکره کوبایه ، بعده (سن دومه نق) ه کیتدی . قاراوولارینک اک ایسی اولان (سنت ماری) بر فورطنه ده غرق اولدیغندن و مرتبات پک زیاده یورغون دوشدیکندن تشبثک اکالنی وقت آخره تعلیق ایدرک کشفیاتی اخبار ایچون اسپانیاه دوندی . ۱۵ مارت ۱۴۹۳ تاریخنده ، عزیمتدن یدی آی صکره پالوسه عودت ایتدی و مراسم فوق العاده ایله استقبال اولندی .

قریستوف قولومب اوچ سیاحته دهاتشبث ایتدی [۱۴۹۳ قولومبک صوک
- ۱۴۹۸ - ۱۵۰۲] . آمریقانک اوک طرفده بولنان
سیاحنلری آنتیل جزائر مجتمعه سنی تماماً کشف ایلدی . اوچنجی
سیاحتنده اصل آمریقا قطعه سنه ، جنوبی آمریقانک شمال ساحلنده کائن
اوره نوق منصبه آیاق باصدی . دردنجی سیاحتنده آمریقای وسطی
ساحلنی قسماً طولاشدی و پاناما برزخه واصل اولدی . اسپانیاه عودتندن
براز صکره وفات ایتدی [۱۵۰۶] .

قریستوف قولومب ایکنجی سیاحتندن صکره بین الحلق شهرت و اعتبارینی
چوق غائب ایتدی . فی الحقیقه کشفیاتی مارقوپولونک حکایه لرندن بکله نیلن
و بالذات قولومب طرفندن وعد ایدیلن شیلری ویرمه مش ، یعنی بهارات
وباخصوص آلتون بولما مشدی . سن دومه نقه مستعمر کوندرمک ایچون واقع
اولان تشبث دخی نتیجه سز قالمشدی . قولومب بوموفقیتر سز لکلردن مسئول

طوتولدی . فردیناند وایزابیل کشف ایدیلن ممالک والیٰ عمومیلکنندن قولومبی عزله قرار ویردیلر . یکی والی - امرالمهدن - قریستوف قولومبی توقیف وزنجیربند اوله رقا سپانیایه اعزام ایتدی [۲۳ غستوس ۱۵۰۰]. وایزابیل و فردینانت کیفیتدن خبردار اولنجه بو حفسزلنی تعمیر ایتدیلر . فقط قولومبه مأموریتی اعاده اولمندی . قریستوف قولومبک فقر و سفالت ایچنده ترک حیات ایلدیکی طوغری دکلدیر . یالکز وفاتندن براز اول فردیناندک (سانتافه) معاهده سی ایله تأمین ایدیلن حقوق و منافعت بر قسمنندن قولومبی محروم ایلش اولدیغی محققدیر .

قولومب آسیایه آیق باصمش اولدیغی قناعتیله وفات ایتدی . حتی ایکنجی سیاحتنده بحر احمره کیده بیلیمک کافی مقدارده ارزاق تدارک ایتیمش اولدیغنه تأسف ایتیمشدی . کشف ایتدیکی آطه لرك هندستانه پک یاقین اولدیغنی ظن ایتیمکده ایدی . بونک ایچون او آطه لر « هند غربی » ویرلی اهالی یه « هندلی » نامی ویرلمش ایدی ، که آمریقار لیلری الآن دخی بونام ایله یاد اولتورلر .

مع مافیه آسیادن بشقه بر قطعه ارض کشف ایدلمش اولمسنندن شبهه ایدلمکده باشلامشدی . فی الحقیقه قولومبدن بشقه واسپانیاقرانلک اوکا تأمین ایتش اولدیغی انحصاره **ماملرده ، دور عالم** رغماً هندستانک یکی طریقنده سیاحت ایچون متعدد هیئتلر یوله چیقمش وبونلرک هیچ بری هندستانه واصل اوله مامشدی . جمله سنک یولنی بر قطه ارض قپامشدی . ایکسی پوزتیکز لیلرک حسابنه بره زیلیایه اولمق اوزره درت سیاحتیه اشتراک ایدن (آمریغووه سپوچی Améric Vespuce) اسمنده بر فلورانسه لی - ۱۵۰۷ تاریخنده نشر ایدیلن مکتوبلرنده - یکی بر

دنیا نك كشفندن بحث ایدیوردی [۵]. آلتون مملکتی تحرینه چیقمش اولان (بالبوآ Balboa) ۱۵۱۳ سنه سی ایلولنده پاناما برزخی طاغلرینه طیرمانه رق ذروء جبالدن غرب جهنده حدسز پایانسز بردکز کوردیکی زمان بوفکر کسب قوت ایتدی. ماجللا نك سیاحتندن صکره ایسه [۱۵۱۹ - ۱۵۲۲] بوبابده هیچ بر شبهه قالمدی.

ماجللان پورتکیزی بر اصیلزاده ایدی. آلبوکرکک هند سفرنده رفیق سیاحتی ایدی. پورتکیزدن کوردیکی حقسز قلر اوزرینه شارل کنگ خدمته کیرمشدی. ماجللان - برچوق امثالی کی - بهارات مملکتنه کیتمک ایچون بر کچید آرامق اوزره جنوبی آمریکا سواحلی بویجه یواش یواش جنوبه ایندی. اسپانیادن عزیمتندن برسنه یی متجاوز زمان صکره قطعه مذکوره نك منهای جنوبنده ۶۰۰ کیلو مترو طولنده بر بوغاز کشف ایتدی، که بالآخره بورایه کندی نامی ویرلمشدر. ماجللان بر آیده بوغازدن کچدی؛ بعده آمریقانك غربنده کی بحر محیطه کیردی. بودکزده روزکار دأما مساعد اسدیکندن ماجللان بحر محیطه «متعدل Pacifique» نامی ویردی. درت آی صکره فیلیپین آطه لرینه یناشدی. اوراده یرلیر ایله وقوعه کلن یر محاربه ده تلف اولدی [نیسان ۱۵۲۱]. فقط دور عالم سیاحتی ماجللانك قلاغوزی (دهل قانو Del Cano) طرفندن اکمال ایدلدی. کیلر امید برونی طریقله اسپانیاه عودت ایتدی.

[*] لورهن دارلفنونی پروفیسور لرندن بری ۱۵۰۷ تاریخنده یازدینی قوز موغرافیا کتبانك مقدمه سنك آمریغووه سپوچنك خبری اوله دن اونك شرفنه یکی کشف ایدیلن ممالکه آمریکا نامنك ویرلمسی تکلیف ایتشدر. دیگر برروایته کوره «آمریکا» نامی مکسیقا لساندم «یوکسک اراضی» معناسنه برکله در. اسپانیولر هانکی طرفده آلتون بولندیغنی صوردهجه یرلیرك «آمریکا» جوانی ویردکلرینی ایشیده ایشیده نهایت بر جدیده بواسمی ویرمشلدر.

ماجلالانك سياحتی اوچ سنہ سورمندی. بش کمی و ۲۳۹ کشتی ایلہ حرکت ایدلمش اولدیغی حالده اورویایہ یگرمی برکشتی و (ویقتسوار) نامتده بر کمی دونہ بیللمشدی. فقط بو کمی مولوک آطہلرینہ اوغرایہرق بہارات تحمیل ایتمش اولدیغندن حمولہنک فروختندن حاصل اولان مبالغہ ایلک دور عالم سیاحتنک بالجملہ مصارفہ تقابل ایتمشدر.

اسپانیوللر، ایلک اوکچہ، یالکز آنتیل جزائر
اسپانیا مستملکت امیر اطور لہنک
مجموعہ سنی و بوجز اژدن دخی بالخاصہ کو با
وسن دومہ نق آطہلرینی اشغال ایتدیلر. فقط
تاسی

بورالزہ کوندریلن مستعمرلر ہر شیدن اول آرادقلى آلتونی کافی مقدارده بولہمدیلر. یرلیرک افادات و حکایاتی ایلہ معادن ثمینہنک اصل آمریکا قطعہ سندہ مبذولاً بولندیغنی اوکرنڈکلرندن قریستوف قولومبک وفاتندن اون بش سنہ صکرہ بو قطعہنک ضبط و فتحنہ تشبث ایلدیلر. آمریقانک ضبطی تاریخندہ ایکی سلسلہ وقایع مشہوردر: مکسیقانک (فرنان قورتہز) طرفندن ضبطی، پہرونک فرانسوا پیزار طرفندن ضبطی.

اسپانیوللر آنتیل آطہلرینہ صاحب اولدقلى زمان
مکسیقا؛ آرتہ کلر
اورادہ بولدقلى یرلیر، «قارايبہ Caraiibe» لر

ملت حالندہ دکل، قبائل حالندہ یشایورلردی. بو قبیلہلر قلعہلردہ اوتورلرلردی. تشکیلات اجتماعیلری قرون قدیمہدہ کی جرمان قبائلنک و یازمانمزدہ کی قونغوزنجیلرینک تشکیلاتنہ مشابہایدی. حال بوکہ اسپانیوللر مکسیقادہ، مرکزی آمریقادہ، پەرودہ حقیقی دولتلر، تشکیلاتی منتظم و۔ بالخاصہ مکسیقادہ۔ اولدقچہ مترقی بر درجہ مدینتہ چیقمش ملتلر بولدیلر.

مکسیقا مرکزی آمریقانک اک بیوک قسمی، غرباً بحر محیط کیر

و شرقاً مکسیقا کورفزی آره سنده بولنان یا یلائی احتوا ایتکده ایدی .
 یرلیر اصل یا یلایه « آناهوآق Anahuac » ، یعنی « صویه یاقین مملکت »
 دیرلردی . اسپانیولر کلدکری زمان (آناهوآق) ده « آزتک Aztèque » لر
 ساکن ایدی . بونلر ۱۳۲۵ تاریخه طوغری برکولک اورتہ سنده کی
 برچوق کوچک آطہ لر اوزرنده (مکسیکو) شہرینی انشا ایتشلردی .
 آزتہ کلر جنکجو بر قوم ارلوب بر بحر محیطدن دیگر بحر محیطہ قدر
 ہر طرفی تحت حاکمیتلرینہ آلمشلر ایدی . فقط تأسیس ایتش اولدقلری
 دولت یکی برشی ، نہایت یوز اللی سنہک ایدی . آزتہ کلرک تبعہ سی بولنان
 اقوام آره سنده وقیلہ بش عصر قدر (آناهوآق) ده اجرای حکومت
 ایتش اولان (تولتک Toltèque) قومی بولنمقده ایدی . بوکون دخی
 محتشم خرابہ لردن ، معبد و سرائیلردن آکلاشیلدینی اوزره بوقوم پارلاق
 برمدیتہ صاحب ایدی . مدنیت مذکورہ تولتک دولتی محو ایتش اولان
 ازتہ کلری یواش یواش تحت تأثیرینہ آلمشدی .

آزتہ کلر رهبان ، زادکان ، تجارت و زراع نامیلہ صنفلرہ آیرمشلردی .
 اسپانیولرک ایمپراطور نامنی ویردکلری حکمدار آمر مطلق ایدی . والیر
 حکمدار نامنہ ولایتلری اداره ایدرلردی . ہر ولایت ایلہ پایتخت آره سنده
 منظم پوستہ لر تأسیس اولنمشدی . اسپانیولرک اک زیادہ نظر حیرت لرینی
 جلب ایدن شی مکسیقا شہرلرینک انتظامی ، کوزللیکی ایدی . بو شہرلری
 اسپانیا شہرلرینک چوق فوقندہ بولدیلر . (فرنان قورتہ ز) شارل کنہ
 یازدینی بر مکتوبدہ کول اورتہ سنده و سابع باغچہ لر ایلہ محاط اولان
 مکسیکو شہرینی متحیرانہ تصویر و آزتہک و پایتختنک چیچک باغچہ لر ایلہ
 مزین بیوک و کوزل اولرندن ، سرائیلرندن ، اوزرلرنده اہراملر بولنان
 و «سہ ویلدہ کی بیوک کلیسانک چاک قلعہ سی قدر یوکسک ، جملہ سی یونتولمش

طاش و پك كوزل ترتیب ایدلمش نقشلی کرسته ایله یاپیلان « معبدلردن بحث ایدیور، دییورکه: «هر کون او قدر محیر العقول شیلر کور ییورز، که کوز- لرمزه اینانه میه جغمز کلیور. شهر سه ویل وقوردو [اشبیلیه و قرطبه] قدر بیو کدر. باشلیجه سوقاقلری غایت کنیش و غایت طوغریدر. بازار خدمتی کورن متعدد بیوک میدانلر واردر. بالخاصه بو میدانلردن بری دائراً مادرار جسم قبولرله محاط اولوب سالامانق شهرندن دها بیو کدر. هردلو نباتات طیه صاتان کوچکیلر، هر نوع ادویه مستحضره فروخت ایدن اجزاجیلر، صقال و صابج تراش ایدن بربرلر، مشروبات و ماء کولات ویرن آشجیلر واردر.»

حقیقت حالده مکسیقا مدینتی محیر العقول اولمقدن زیاده تعجبه شایان ایدی. همان دائماً فنا ترتیب ایدلمش اولدجه قبا مالز مه دن یاپیلمش اولان آبدلر اهرامه بکزه بن شکلری و بربری اوستنده کی تراچلری ایله مصر و آتوریه بی خاطره کتیرمکه برابر غایت ابتدائی بر صنعتک محصولی ایدی. دیگر طرفدن مکسیقا دینی وحشی، خونریز بر مذهب ایدی. معبودلره یوزلرجه، بیکلرجه انسان قربان ایدیلیدی. ۱۴۸۰ ده یالکز بر معبدده یکر می بیك کشی قربان ایدلمشدی. قربان ایدیلر جك کیمسه درت راهب طرفدن طو تولدینی حالده بر طاش اوزرینه یاتیریلیر؛ بیچاق ایله - اسپانیوللرک تعیری وجهله « بر نار کی » - کوکسی آچیلیر؛ قای قوپاریلر رق صنملرک یوزینه آتیلیدی. هر ایک ایلك کونلرنده - ۱۴۵۳ تاریخنده منعقد بر مقاوله نامه احکامنه توفیقاً - مکسیقو و همجوار دیگر شهرلر اهالیسی محضاً « یاغلی وای قربانلر » تدارک ایده بیلیمک ایچون بربرلرله منتظماً حرب ایدرلیدی.

مکسیقانک ضبطی

فرانسه دن درت دفعه بیوک بر ایمپراطورلق اولان

مکسیقانک ضبطی درت سنه ده اکال ایدلدی. ۱۵۱۹

قورتهز

ده باشلادی، ۱۵۲۲ ده ختام بولدی. بو فتوحات

(فرنان قورتهز) ک اثریدر.

بر اصل عائلهیه منسوب اولان (فرنان قورتهز) سالامانقه تولد ایتشدی. حقوق تحصیلنه باشلادینی صروده، اون طقوز یاشنده سرکذ. شتجویانه سیاحتاره هوس ایده رک سن دومتقه کیتدی [۱۵۰۴]. مختلف سفرلره، بالخاصه کوبا جزیره سنک ضبطنه اشتراک ایتدی [۱۵۱۱]. کوبا والیسی (وه لاسکز Velasquez) کندیسنی اصل آمریکا قطعه سنه کیتمک اوزره بر هیئت سفریه ترتینه مأمور ایتدیکی زمان فرنان قورتهز اوتوز درت یاشنده ایدی.

قورتهز ۱۵۱۹ سنه سی نیشاننده ۶۶۰ کشی ایله مکسیقا ساحلنه چقیدی و بر موقع مستحکم انشایده رک بوکا «Villa Rica de la Vera Cruz»، یعنی «صليب حقیقینک زنکین شهری» نامنی ویردی. بش آی صکره، آغستوسده، اون اوچی آر که بوز ایله مسلح اولق اوزره ۳۰۰ پیاده، ۱۵ سواری و اون پارچه طوپ ایله مکسیکو اوزرینه یوریدی؛ تشرین اولده شهر مذکوره واصل اولدی. «هر صباح سراینده آلتی یوزی متجاوز زادکانک طوپلاندینی» بر حکمدار اولان ایمپراطور (مونتهزوما Montezuma) قورتهزک ایلرییه طوغری حرکتی توقیف ایده مدیکسندن اونی دوستانه قبول ایتدی. آلتی کون صکره قورتهز مکسیقالیلرک بر قاج اسپانیول اوزرینه هجوم ایتدکلری بهانه سیله - یاننده بر اووچ آدم بولندینی حالده - مونتهزومانک سراینه کیتدی؛ حکمداری اسیر ایده رک اردوگا - هنه کوتوردی. بو جرأتکارانه حرکتی سایه سنده مکسیقا حکومتنی عادتاً

حمایہ سی آئنه آلدی والندہ بولنان ایمپراطور اسپانیوللرک بر سنہ قدر مکسیقای قولایجہ اداره ایتملرینہ خادم بر آلت اولدی .

۱۵۲۰ جزیرانندہ ، قورته زک مکسیقوشہرندہ بولندینی بر صرہدہ اسپانیول ضابطانندن برینک بر ضیافتدہ حاضر بولنق ایچون سلاحسنز اولہرق اردوکاھہ کلش اولان برقاج یوز آرتہک زادکانی - مجوہرلرینی غصب ایتک مقصدیلہ - عموماً قتل ایتدیرمسی اوزرینہ مدہش بر عصیان ظہور ایتدی . همان مکسیقیوہ عودت ایدن قورته ز وقایعک اوکنہ کچہمدی . قورته زک اصراری اوزرینہ آرتہکلری تسکینہ چالیشان مونته زوما تبعہسی طرفندن اولدیرلدی . سوقاق محاربہلری کونلرچہ دوام ایتدی . بو محاربات اوقدر قانلی ومعندانہ ایدی،کہ - قورته زک افادہ سنہ نظرآ - «قولنی اوزاتمغہ مقتدر برسواری،یرندن قیملدانہ بیلہ جک بر پیادہ بیلہ قالمامشدی» نہایت اسپانیوللر بر کیجہ مکسیقیوی تخلیہ یہ مجبور اولدیلر . کولک اورتہ سیندہ بولنان شوسہ لردن برندہ یوزلرچہ اسپانیول جسدی قالدی . قورته ز بو مغلوبیتک انتقامنی آنجق بر سنہ صکرہ آلہ بیلدی . اوزون بر محاصرہ یی متعاقب هجوم ایلہ مکسیقیوی ضبط ایتدی . [۱۱۳ آگستوس ۱۵۲۱] . بونک اوزرینہ «یکی اسپانیہ نامی ویرلش اولان ایمپراطورلق قولایجہ تحت اطاعتہ آلدی . شارل - کن طرفندن والی وقوماندان تعیین ایدیلن قورته ز فتوحاتہ دوام ایلدی . ۱۵۲۹ دہ اسپانیایہ عودت ایتدیکی زمان قالیفورنیا شہہ جزیرہ سندن (داریہن) برزخہ قدر بتون مکسیقا ضبط اولنمشدی .

ضبط ایدیلن ایمپراطورلغک بیوکلکی قورته زک

برقاج یوزکشیدن عبارت اولان قوتی ایلہ مقایسہ

ایدلیدیکی زمان اسپانیوللرک بو قدر سرعت و

قورته زک

اسباب موفقیتی

سہولت ایلہ نائل فتوحات اولملرینہ حیرت ایدیلیر . فقط قورته زك غایت مساعد احوال و شرائط داخلندہ بولندیغنی نظر دقتہ الملق ایجاب ایدر . مونته زوما ایمپراطورلنی غایت واسع اولقلہ برابر پک ضعیف ایدی . چونکہ متجانس دکلدی . حرباً تشکل ایتشدی . محاربات مدیدہ دن صکرہ آرتہ کلرہ هنوز تابع اولمش مختلف عرقہ منسوب اہالیدن مرکبدی . دارانک یونانیلرہ هجومی صرہ سندنہ ایران دولتی نہ ایسہ مکسیقا ایمپرا . طورلنی دہ اوکا مشابہ بر حالہ ایدی . اقوام مغلوبہ غالبلرک غایت آغیر اولان بیوندروغنه کوجلککلہ تحمل ایدہ بیلورلردی .

دیگر طرفدن مکسیقادہ عمومک شایان اعتماد بولدیغنی و مونته زومانک دخی بیلدیکی بعض کھانتفروشلر اقوام مغلوبہ بی قورتارمق ایچون معبودلر طرفندن بر منجی کوندریلہ جکنی و بونک شرق طرفندن کلہ جکنی خبر ویر مشلردی . قورته ز - مکسیقالیلر جہ مجهول و بنساء علیہ مخلوقات غریبہ دن معدود اولان - بارکیلری و - بتون یرلیلرک الدہ طاشینیر رعد و برق ظن ایتدکلری - طوپلری ، آرکہ بوزلری ایلہ شرق طرفندن کلنجه هرکس اونک معبودلر طرفندن کوندردلیکنہ ذاہب اولدی . قورته ز « مغلوبلری عصیانہ مہیا ، غالبلری خوف و دہشت ایچندہ عواقب امورہ منتظر بولدی » مع مافیہ بارکیلر ، طوپلر و آرکہ بوزلر آرتہ کلری چوق زمان قورقوتہ مدیلر . بونلر اوروپالیلرک دہ کندیلری کی انسان اولدقلرینی پک چابوق آکلادیلر . آرتہ کلر غایت جسور ، عددآ چوق ، اوچلرندہ - خصوصی بر طرز اعمال ایلہ چلیک درجہ سندنہ متانت ویردکلری - باقیر بولنان مزراق و اوق ایلہ مسلح اولدقلری جہتلہ - اگر اسپانیوللر یالکز اولسہ لردی - اونلرک حقندن پک چابوق کلہ بیلیرلردی . فقط قورته ز آرتہ کلرک عاصی تبعہ سی آرہ سندنہ کندیسنہ برچوق متفق بولدی .

موفقیتی بو متفكر ك معاونت دائمه و مؤثره لرینه مدیون ایدی . مكسیكو اوزرینه ایلک یوروییش اناسنده بیله ریلردن ۷,۰۰۰ کشیك بر قوت آلمشدی . ریلر نهایته قدر اسپانیولره ارزاق ولوازم و بیکلرجه عسا کر معاونه ویرمشلردی .

مکسیقونك ضبطدن تقریباً اون سنه صکره اسپانیوللر

پهرو قطعه سنك فتحنه ابتدار ایتدیلر .

بوگونکندن ده اوسع اولان پهرو بحر محیط کبیر سواحلی بونجه امتداد ایدیور و آند سلسله جبالی حاوی بولئیوردی . بو صورته شیمدیکي اقوآ تور ، پهرو ، بولیویا تماما ، شیلی قسماً اوزمانك پهرو دولته داخل ایدی . پهرو حکمدارینه (ایتقا Inca) نامی ویرلمکده ایدی . ایتقا (کیشوا Quichua) لر دنیان قوم اوزرنده حاکم مطلق ایدی . معبود شمسك احفادنن معدود و بو صفته بتون اراضیه ، معادنه ، محصولاته ، ابنیه ، اهالییه ، الحاصل ایمراطورلق داخلنده نه وارسه جمله سنه صاحب ایدی . زرعیات ایچون تخمدن و محصولات ارضیه دن دولت اعمالا تخانه لرنده طوقونان قاشلره قدر بر انسانك یشامسی ایچون نه لازم ایسه جمله سنی حکمدار مأمورلری واسطه سیله تبعه سنه توزیع واعطا ایتمکده ایدی . پهرو اشتراك اموال اساسنه مستند بر ایمراطورلق ایدی . اینقالر دنیانك اکیوکسك طاغلریله مستور اولان بو جسم ایمراطورلنی قولایجه اداره ایتک ایچون پک مکمل یوللر یاپدیرمشلردی . حسن محافظه سنه صورت دائمه ده اعتنا ایدیلن بو یوللرک دردی پایتخت اولان (کوزکو Cuzco) شهرینه منتهی اولیوردی . « مرکز » معناسنی افاده ایدن کوزقونك ۶۰,۰۰۰ نفوسی وار ایدی .

حکمدارک - مشارکت اموال قاعده سنه مستند - استبدادی اساساً

فکر تشبیدن محروم ، حلیم و ساکن ، پک ماهرانه اسقا ایتدکلی
تارالرنده اک زیاده مصر و پاتاس یتشدرمکه مشغول مکمل چیفتچی
اولان پهرویلره تحمفرسا بر یوک کبی کلیوردی . پهروده کی آبدلر
کال اعتنا ایله یونتولش و خرچسز بربری اوزرینه قونمش جسم قیا
پارچلرندن یاپیلمشدی . تزینات داخلیه - مملکتده پک مبذول اولان -
آلتون وکوشدن ایدی . دیوارلری ستر ایدن آلتون لوحلر ، سقفلری
طوتان آغیر قورنیشلر ، استاتولر ، چیچکلر ، حیوانلر ، الحاصل بتون
بو تزینات - اسپانیوللرک حرص وطمعی سببیه - همان تمامیه غائب
اولمشدر .

پهروده معادن ثمیننهک پک مبذول اولدینی مرکزی
پهرونک ضبطی آمریقاده دخی معلوم ایدی . بو آلتون مملکتی
حقده نقل ایدیلن حکایات غریبه بی پاناما برزخنده اقامت ایدن اسپانیوللر
دخی ایشیتمشلردی . بو اسپانیوللردن ایکی سرسری ، بری اللی دیکری
آلتمش یاشنده ، ایکسی ده او قومق یازمق بیلمه یه جک درجه ده جاهل ، و قتیله
طوموز چوبانلغی ایدن (فرانسوا پزار) ایله سوقاقدده بولنمش برچوجق
اولان (آلماغرو Almagro) پهرونک ضبطی ایچون عقد شرکت ایتدیلر .
۱۵۲۴ سنه سی ، یعنی قورته زک مکسیقویه تماماً صاحب اولدینی زماندن
اوچ سنه صکره ایدی . فقط پزار و آلماغرو تصورلرینی آنجق سکز
سنه صکره موقع اجرایه قویدیلر .

۱۵۳۲ ده فرانسوا پزار تقریباً ۱۷۰ کشی و ۷۰ بارکیر ایله په رویه
چیقدی . اوچ آرکه بوزدن بشقه اسلحه ناریه یوق ایدی . فقط تام
اوصرمده ایتقا (آتاهاوا Atahualpa) ایله تختدن ایندیرمش اولدینی
بیوک برادری آده سنده سلطنت غوغاسی واردی . بو غوغانک نتیجه سی

اولہرق ظہور ایتس اولان اغتشاشات و تفرقہ پزارک موفقیتی تسمیل
 ایتدی . پزار داخل مملکتہ طوغری ایلرله دیکی زمان هر طرفده بر
 دوست کبی قارشیلاندی . آند سلسله جبالنی کچهرک ، ۱۵ تشرین ثانی
 ۱۵۳۲ تاریخده ، (آتاهوا لپا) نك اردوکاری اوکنه واصل اولدی .
 ایرتسی کونی اسپانیول قرارکاهی زیارته دعوت ایدیلن (آتاهوا لپا)
 سلاحسز ، معیتسز اولہرق دعوتہ اجابت ایتدی وبر طوزاغہ دوشدی .
 انسای ملاقاده پزارک یاننده بولنان بر راہب اینقایہ بر انجیل
 اوزاتہرق بو کتابک بیان ایتدیکی شیلرہ اینانمق لازم کلدیکنی سویلهدی .
 (آتاهوا لپا) کتابی قولاغنه یاقلاشدیردی ؛ هیچ برشی ایشیتمدیکندن
 یرہ آتدی . اسپانیولر دینلرینہ حقارت ایدلدیکی بہانہ سیلہ حکمدارک
 اوزرینہ هجوم ایدہرک کندیسینی اسیرایتدیلر . اینقا استرداد حریت ایچون
 کلیتی فدیہ نجات اعطاسنی تکلیف ایتدی . اسپانیولر بو تکلیفی قبول
 ایدہرک (کوزقو) معبدلری دیوارلرندن چیقاریلان ایکی یوز یوک آلتون
 لوحہ ایلہ بونک ایکی مثلی کوش لوحہ ا لیدیلر . فدیہ نجات تأدیہ ایدلدیکی
 زمان اینقایی تخلیہ ایتہدکدن ماعدا کندیلری علیہنہ ترتیباندہ بولنمق ،
 کیزلیجہ بر عصیان حاضرلامق ایلہ اتہام ایدیلر . محاکمہ سنی اجرا و دیری
 دیری یاقیلمق جزاسنہ محکوم ایتدیلر . اینقا خرسیتیانغی قبول ایلہ
 وافتیز اولمغہ موافقت ایتدیکندن یاقیلمازدن اول بوغولمق لطفنہ مظهر
 اولہ بیلدی . بعدہ اسپانیولر اجرای رسم ماتم ایدہرک حکمدارک استراحت
 روحی ایچون دعالر او قودیلر [نisan ۱۵۳۳] .

برمدت صکرہ آلماغرونک کتیردیکی قوای امدادیہ واصل اولدیغندن
 پزار (کوزقو) اوزرینہ یوریدی وبر قاچ اوفاق تفک مصادمہدن
 صکرہ بہرونک پانختنی ضبط ایتدی [۲۵ تشرین ثانی ۱۵۳۳] .

۱۵۳۵ ده پهرو قطعه سی همان تمامیه تحت اطاعته آلمش ایدی . پزار (لیمّا) شهرنی تأسیس ویکی پایتخت اتخاذ ایتدی .

فقط پزار و آماغرو غوغا ایتدیلر . هراکیسنک طلبی اوزرینه شارل کن قدیم پهرو ایمراطورلغی اراضیسی بونلرک آره سمنده تقسیم ایتشدی . پزاره شمال مملکتلرینی ، شیمدیکی پهروی ؛ آماغرویه جنوب ممالکنی ، بوکونکی شیلی ویرمشدی . ایکسی ده دیکرینک ضررینه اوله رق توسیع ممالکه قیام ایلدیکندن نهایت محاربه یه باشلادیلر . آماغرو (پزار) طرفندن اسیر ایدلدی ، بوغدیردلی [۱۵۳۸] . معیتده کی عسکرلر ، بر مدت صکره ، پزاری اولدیره رک انتقام آلدیلر [۱۵۴۱] . بوقانی غوغالر آماغرونک اوغلی ایله پزارک برادرلری آره سمنده دخی دوام ایتدی ؛ آنجق شارل کنک پهروی طوغریدن طوغری یه کندی اداره سنه آلوب بر والی کوندردیکی زمان ختام بولدی [۱۵۴۷] .

امپایرل فنو مانک
امریقاده تأسیس مستملکات ایللرینه عائد وقایع
آره سمنده اک مهملریدر . اسپانیولار یوقاتان [۱۵۲۷-]

[۱۵۴۷] ، و نه زوئللا [۱۵۲۰ - ۱۵۴۰] ، قولومیا [۱۵۳۸] ، شیلی [۱۵۴۰] قطعه لرینی ؛ اون آنتیجی عصرک نصف اخیرنده دخی آرژانتین و پاراگوآیی ضبط ایتدیلر . یوقاتان طرفلرنده بولتان آلمش قدر شهر خرابه لری تولته ک مدنیتک اک پارلاق دورینه عائددر . و نه زوئللا بر آزالق پاره یه احتیاجی اولان شارل کن طرفندن آلمانلره ، هامبورغ صرافلرینه صاتیلدی . آلمانلر قطعه مذکورده دن استفاده یه چالیشدیلر ، فقط موفق اوله مدقلرندن یه شارل کنه اعاده ایتدیلر . هر نه قدر

شیلی آلماغرونك حصہ سنہ دوشمش ایدیسہدہ اونك طرفدن تمامیلہ فتح ایدیلہ مہ مشدی .

۱۵۴۰ دہ پزارك آرقداشلرندن (اوریلانا Orillana) پەرودن شرقہ طوغری کیتدیکی زمان پك بیوک بر نہرہ راست ککش و بونہری تعقیباً بحر محیط آطلاسی ساحلنہ واصل اولمشدی . اوریلانا نہر سواحلندہ یونان افسانہ سنك آمازونلرینہ مشابہ محارب قیلہ لر کوردیکی حکایہ ایتمش اولدیغندن نہرہ (آمازون) نامی ویرلدی . بو سیاح بتون مملکتی فتح ایتك ایچون سفرہ حاضر لانیرکن وفات ایتدی . آمازون حوالیسی برہ زلیلا ایلہ برلکدہ پورتکیز مستملکاتی میانہ کیردی .

اسپانیولر تأسیس ایلدکری مستملکات ایمپرا -
اسپانیاستملکات ایمپراطورلنك
طورلغنہ منتظم ویکنسق بر تشکیلات ویرمک
ایچون چوق زمان بکلہ مدیلر . مستملکات
تشکیلاتی

جملہ سی طوغریدن طوغری یہ قرالہ عائد ایدی . قرال ہر بر مستملکہ یہ وکیل صفتیلہ بر والی کوندریوردی . بو وکیلہ مکسیقا و پەر وکی اکی مهم مستملکہ لردہ « والی عمومی » ، دیگر لرنده « قوماندان » دنیلیوردی . اسپانیادہ شارل کن طرفدن تشکیلاتی اکمال ایدیلن [۱۵۲۴] بر « هندستان مجلس عالیسی » بولمققدہ و بومجلس بتون مستملکات مأمورلرینہ نظارت ایتمککہ برابر ادارہ ملککہ ، عسکریہ ، دینیہ وعدلیہ ایلہ اشتغال ایلکدہ ایدی . اسپانیولردہ - پورتکیزلیلر کبی - مستملکہ لر یلہ تجارتی کندیلرینہ حصر ایتك طریقہ اختیار ایلدکلرندن بر ادارہ تجارتیہ دخی تأسیس ایدلمشدی . بو ادارہ « تجارت اوطنہ سی » نك النده ایدی . مرکزی (سہویل) ایدی . سنہدہ بر دفعہ بر چوق کیلردن مرکب بر قافلہ حالندہ مستملکاتہ کیدن واورالردن کلن کیلر آنجق بولیمانده اشیا وامتعہ تحمیل ویا اخراج ایدہ بیلیردی .

مستملکات تشکیلاتنده اسپانیا قواللری یرلیری
یرلیرک الحاسی اونو تمذیلر. بونلرک جان و ماللرینه رعایت اولمسنی،
 ارزو ایدرلرسه چالیشدیریلهرق اجر تلرینک ویرلمسنی، کندیلرینه دائماً
 حلم و ملایمت ایله، قواعد دینه عیسویه توفیقاً معامله ایدلمسنی امر
 ایتدیلر. فقط بو امرلرک هیچ بر تأثیر وفائده سی اومدی.

اسپانیوللرک فتوحات اشناسنده کی حرکتلری - علی الاکثر - شایان
 نفرت بر درجه یه واران حرص و طمعدن، سوء نیتدن، ظلم و وحشتدن
 عبارتدر. فاتحلر وحشیانه بر احتراض ایله آلتون تحرینه باشلادیلر.
 مکسیقوده قورته زک ضابطلرندن بر قاتل و خرسزک زادگان محلیه یی فصل
 بر طوزاغه دوشوردیکنی، پهروده پیزارک (آتاهاوآلپا) یه نه یاپدیغنی
 یوقاریده سویله مشدک. مکسیقونک ضبطندن صوکره (مونت-زوما) نک
 خلفی اولان (غوا تیموزن Guatimozin) ایمپراطورلق خزینه سنی کولک
 نره سنه صاقلادیغنی خبر ویرمکدن امتناع ایتدیکی ایچون اسپانیوللر طرفندن
 قیزغین آتش اوزرینه یاتیلدی. یینه قورته زک ضابطانندن بری بردفعه ده
 ۴۶۰ مکسیقالی یی دیری دیری یاقدی. پهروده، کیتوده پیزارک ضابطانندن
 بر ظالم اولا بتون ارککلری قتل ایتدیردی؛ صکره، شهره آتش ویره رک
 قادین و چوجقلری کسیدردی.

بو ظلم و وحشتلر حرب زماننده، فتوحات دورنده وقایع عاده دن
 معدود ایدی. فقط یرلیر هر طرفده تحت اطاعته داخل اولدقن صکره
 دخی اسپانیوللر ظلم و غدرده پک ایلری یه واردیلر. یرلیرلر مستعمرلر
 آره سنده تقسیم ایدلایلر؛ اونلرک حسابنه مجاناً چالیشمغه مجبور طوتولایلر؛
 اسپانیا قواللرینک اوامر و ارادات متعدده سی خلافتده اولهرق درکه
 اسارته دوشدیلر. یرلیرک زیاده معادن ثمیننه تحریاتنده، هر صنعتدن فضله

آغیر برایش اولان معدنچیلکده استخدام اولنورلردی . میلیونلرجه یرلی تلف اولدی . روایتہ نظرآ یالکز سن دومہ نق آطہ سندہ - قریستوف قولومب طرفندن کشف ایدلدیکی تاریخده [۱۴۹۲] - بر میلیونی متجاوز اہالی وار ایدی . ۱۷ سنہ صکرہ [۱۵۰۹] آنجق قرق بیك ، بش سنہ صکرہ اون اوچ بیك کشی قالدی . اوست طرفی اسپانیوللر طرفندن احیا ایدلمشدی .

زنجی تجارتی

بعض راہبیلر یرلیلری حمایہ یہ تشبث ایتدیلر . بوللردن (لاس قاساس) اسپانیوللرک ظلم و وحشتلرینی اعلانہ و مظلومین ایچون عدالت طلبنہ وقف عمر ایتمشدی . نہایت ، ایمپراطور شارل کمٹک نظر مرحمتی جلب و یرلیلری حمایہ بعض تدابیر اتخاذ ایدلمسنہ موفق اولدی .

فقط نتیجہ بشریت ایچون یکی بر فلاکت شسکلندہ تظاہر ایتدی . اسپانیوللر آمریقادن بشقہ یرلردہ ایشچی آرادیلر . آفریقادن صاتون آلدقلری زنجیلری آمریقاہ کوتوردیلر . بو صورتلہ مدہش بر تجارت ، زنجی ویا اسرا تجارتی باشلادی ؛ اون طقوزنجی عصرہ قدر دوام ایتدی . درت یوز سنہ آفریقا زنجیلری اوروپالیلرہ صاتیلہ جق اسرا تدارک ایدہ - بیلیمک ایچون بربرلریلہ حرب ایتدیلر . آفریقادہ میلیونلرجه نفوس تلف اولدی .

اسپانیا مستملکات ایمپراطورلنی پور تکیز

اسپانیا مستملکات ایمپراطورلنک

مستملکات ایمپراطورلغندن چوق فرقلی

ارصاف ممیزہ سی

ایدی . پور تکیزلیسلر تاجر ایدیلر ؛

اسپانیوللر ایسہ فاتح اولدیلر . یالکز ساحلہہ باشلیجہ نقطہ لری اشغال ایلہ اکثفا ایتدیلر ؛ ساحل آرقہ سندہ کی مملکتلری ، (ہینترلاند Hinterland) ی

دخی ضبط ایتدیلر . مکسیقا ، پهرو ، قولومیا و سائر مستملکات اسپانیانک ماورای بحر محیطده برر جزئی کبی اولدی ؛ یکی اسپانیا ، یکی قاستیلیا ، یکی غرناطه و سائر ناملیله یاد ایدلدی . اسپانیوللرک اک سرگذشتجو و اک جرأتکارلری آره سندن چقان مستعمرلر بردها وطنلرینه عودت ایتمه مک اوزره آمریقاده یرلشدیلر . اونک ایچون اسپانیوللر - پورتکیزلیرک خلافتده اوله رق - دواملی بر مستملکات ایمپراطورلغی تأسیس ایتدیلر . بو ایمپراطورلق ، برچوق خطالره رغماً ، صوک عصر میلادییه قدر پایدار اولدی . بوکون اسپانیول مستملکاتندن اثر قالمامشدر . لکن اکتساب استقلال ایدن مرکزی و جنوبی آمریقاده اسپانیا عرقی لسانی و مدینتی حاکمدر .

کشفیات عظیمه یالکز اسپانیا و پورتکیز کشفیات عظیمه نک ناجبی تاریخلرینه عائد وقایع اولیوب بلکه اقتصادی ، سیاسی ، علمی ، دینی نتایجی اعتباریله تاریخ عالمه تعلق ایدر . بونتایحک بعضلری همان میدانده چیقدی ، بعضلری ایسه بالآخره کوریه بیلدی . احتمال که بتون نتایج هنوز تمام اولمامشدر . اک مهم نتیجه لر - پورتکیز و اسپانیانک بردن بره کسب قوت و سطوت ایلش اولملرندن صرف نظر - بوجه آتیدر :

بیوک تجارت یوللری درحال دیکشیدی : مصر طریقله کچن امتعه بوندن صکره امید برونی طریقندن کچدی . بنابرین قرون قدیمه دن بری فعالیت تجاریه مرکزی اولان بحر سفید اهمیتنی غائب ایتدی ؛ بو اهمیت بحر محیطه انتقال ایلدی . اسکندریه ، جنوه ، ونڈیک ، مارسیلیا ایکنجی درجه لیان حاله کلدیلر و آنجق زمانزده سویش قنالنک حضری سایه سند . اهمیت و معموریت سابقه لرینی استرداد ایده بیلدیلر . بوکا مقابل

پورٹیکز، اسپانیا، فرانسه، ہولاندانک و بالاخرہ انکلترہ نك بحر محیط اطلاسی اوزرنده کی لیمانلری — بحر سفید لیمانلرینك غائب ایتدکلری — اہمیتی قازاندیلر .

آمریقادہ چیقاریلان کلیتی مقدار معادن ثمینہ اوروپاہہ نقل ایدلدی . مکسیقا، پەرو، و وەنەزوئلا دہ سرای و معبدلر دہ، حتی مزارلر دہ یغما ایدیلن آلتون ییغینلرینہ معدنلردن چیقاریلان کموش ییغینلری منضم اولدی . ۱۵۴۵ دہ پەرو دہ کاٹن (پوتوزی Potosi) دہ ۷۰۰ مەترو ارتفاعہ قدر یوکسلن کموش جوهرینی حاوی طاغلر کشف ایدلدی . پەرونك ثروت و سامانی ضرب مثل حکمنہ کیردی . ہر سنہ بر چوق قالیونلردن مرکب بر قافلہ سفائن معدنلرک حاصلاتی اسپانیایہ کتیرردی . اون آلتنجی عصر اواسطندہ اوروپادہ متداول اولان آلتون و کموش مسکوکات مقدارینك قولومبک ایلک سیاحتی صرہ سندنہ کی مسکوکاتدن اون ایکی مثلی فضلہ اولدینگی حساب ایدلمشدر . یالکز مکسیقا و پەرو قطعہ لری قورتنہ ز و پزارک فتوحاتندن زمانمژہ قدر اوروپاہہ ۹ میلیار فرانق آلتون و ۲۴ میلیار فرانق کموش کوندرمشدر .

بو کلیتی معادن ثمینہ دن اسپانیوللر اصلاً استفادہ ایتدیلر . بو قدر آلتون و کموش اونلرک اللرندن آقوب کیتدی . چونکہ خزائن جسمیہ قارشیسندنہ بولنان اسپانیوللر کنڈیلرینی زنکین ظن ایدرک یواش یواش چالیشمقدن فارغ اولدیلر . ارتق بالذات اعمال ایتدکلری شیلری قومشو ملتلردن صاتون آلمغہ باشلا دیلر . آلتون و کموش صنعتکار و تاجرلرہ ، یعنی بورژووالرہ کچدی . اوزمانہ قدر باشلیجہ ثروت طوپراق ایدی . قرون وسطادہ بتون طوپراق زادکان الندہ ایدی . اون آلتنجی عصر دن اعتباراً آلتون و کموش سایہ سندنہ بورژووالر دخی زادکان قدر زنکین

اولدیلر. بورژواصنفک اهمیت اجتماعی و سیاسی سی اوزماندن اعتباراً آرتمقدن خالی قالمدی .

معلومات بشریه فوق العاده بر سرعتله آرتدی . یکی قطعه لرده یکی عرقلر ، یکی مدیتلر ، یکی حیوانلر ، یکی نباتلر ، یکی ییلدیزلر کشف ایدلدی . بردن بره میدان چقان بو یکی شیلر حیرتی موجب اولدی ، مراق و تجسس حسنی اویانیدردی ، فکرلری تنویر ایتدی ، نظریات قدیمه علمییه و اعتقاداتی صارصدی .

کشفیات عظیمه بر طرفدن دین عیسوی ایچون یکی بر ساحه فعالیت آچمش و خرستیانتلک آمریقاده انتشارینی تأمین ایتمش ، دیگر طرفدن اوروپاده هیئت رهبان حقنده کی اعتمادک آزالمنسه و راهبرک تدریساتنه آرتق حرمت ایدلمه مسنه سبب اولمشدر . (پیهردایی) کبی کتابلریله کشفیات عظیمه بی حاضرلامش اولان علمای رهبانک یاننده عددلری دها چوق اولان راهبر برمدت صکره حقیقت اولدقلری آکلاشیلان برخیل مسائلی ، مثلاً ارضک کرویتی معناسز ، غیر ممکن ، علم و دینه مغایر کوسترمشدر و بناءً علیه حقیقه عاشق بعض عالملری محکوم ایتمشلردی . بونک ایچوندرکه کشفیات عظیمه ره فورمه بحران دینسنه ، رونه سانس فکرلرینک ظهور و ترقیسنه - فقط بالطبع کوچک مقیاسده - خلیجه مدار اولمشدر .

روڼه سانس

اون بشنځي عصر ك صوك سنه لرنده واون آلتنجي
 عصر ك نصف اولنده ، كشفیات عظيمة بحريه نك
 اوصاف ممیزه سی وقوعی زماننده اولا ایتالیا ده ، بعده فرانسه
 و آلمانیاده ادبیات ، علوم و بالخاصه صنایع نفیسه ده بیوك بر كشایش
 كوردی . بو ، تاریخك اك پارلاق و اك مهم وقایعك بریدر . چونكه
 صنعتكارلر زمانمزه قدر دها كوزللری یاپيله میان شاه اثرلرینی او زمان
 وجوده كتیردیلر ؛ انسانلر كشفیات بحریه ايله توسع ایدن فعالیت
 مادیه ساحه سی یاننده فكر و فعالیت معنویه ساحه سنك دخی بیودیکنی او
 زمان كوردیلر .

بو ترقیاته « احیا » ، « تجدد » معناسنه « روڼه سانس » دنیلمشدر .
 قرون وسطی مدنیتنه عدم وقوفدن ویا اومدنیقی بحق تقدیر ایتمه مكدن
 نشأت ایتش اولان بو تعیر قسماً طوغری دكلدر . چونكه « احیا »
 دینجه اون آلتنجی عصر دن اول صنایع نفیسه و ادبیاتك اولمش اولدیغی ،
 اون بشنځي عصر اواخونده بردن بره دیرلیدیکی خاطره کلیور . حال بوكه
 روڼه سانسده بردن بره ، ناکهانی هیچ برشی اولما مشدر . ایستر صنایع
 نفیسه ویا ادبیات جهتدن تدقیق ایدلسون ، ایستر سه ایتالیا ، فرانسه
 و آلمانیاده اولق عبارتیه نظر دفته آلسون روڼه سانس بر « تجدد »
 دكل ، بلکه اوزون بردوره مساعینك نتیجه سی ، بطی بر ترقینك صوك

حدیدر . اوصاف میزه سندن برنجیسی بودر . رونه سانسدن اولسکی دورک صنعتکارلری ، مؤلفلری ، اومانیتلری رونه سانس صنعتکارلرینک ، مؤلفلرینک، اومانیتلرینک مبشر و استادلری اولدقلری کبی اون بشنجی عصرک پارلاق مدینتی اون آلتنجی عصرک پارلاق مدینته سبب اولمشدر . رونه سانسک ایکنجی واکمهم وصف میزی قرون قدیمه یه ، بتپرستک دورینه عودت ایدلمش اولمیسدر . قرون قدیمه نك تأثیری اون بشنجی عصردن اعتبار آیتالیاده پک قوی ایکن اون آلتنجی عصرده هر شیئه ، ادبیات و صنایع نفیسه یه - فرانسه و آلمانیا ده دخی - حاکم اولدی . قرون قدیمه صنعتکارلرله برلکده مؤلفلره تقلیده شایان نمونه لردن بشقه یکی موضوعلر بخش ایتدی . دین عیسوی منابعه ، تاریخ مقدس ایله انجیللره بتپرستک منابعی ، تاریخ قدیم اساطیری علاوه ایلدی . یالکیز صنایع نفیسه یی نظر دقته آلیرسه ق رسام و هیکل تراشلرک عینی زمانده هرا یکی منبعدن استفاده ایتدکلرینی ، جتندن اولیمه کچدکلرینی ، حضرت عیسی و مریمه متعلق تصاویر ایله برلکده ونوس ، جبرائیلک حضرت عیسانک تولدینی مریمه تبلیغ ایلمسی ایله برلکده با کوسلری ، تجلی عیسی ایله « پسیخه Psychée » یی ترسیم ایتدکلرینی ، « فیلیپ دو قومین » ک مزارنده کی یان یانه بولنان اورفه ایله حضرت عیسی تصویر لرنده اولدیغی کبی خرستیانلق موضوعلرینه بتپرستک موضوعلرینی قاریشیدر دقلرینی کوریرز . صنعتکارلردن بعضلری - (لیوژ) بیوک کلیسانک منبرنده هر کول افسانه سیله اون ایکی ایشنی مصور اثر هیکل تراشیده اولدیغی کبی - بر کلیسانک تزیینی ایچون صرف بتپرستلکه متعلق منابعدن ملهم اولمق درجه سنده ایلری یه واردیلر .

رونة سانسک اوچنجی وصف میزی قرون قدیمه یه عودت ایدلمش اولمیسندن طولانی قرون وسطادن بسبتون آیرلمیسدر . صرف خرستیانلغک

تأثیری آلتند بولان قرون وسطاده فکر ایمان ومطاوعت کوریلور . او دورده هرشیدن اول مغوی حسه ، تکمله ربط قلب ایدلشدی . دنیا به عادتاً بر منفاء حیات فانی به برنوع مسافرت نظریله باقیلیر ؛ انسانک احتراصاته غلبه ایتمی ایچون صورت دائمهده صرف مساعی ایتمی ، حتی تصفیۀ روح ایچون المواضطرابی قبول وتحرری ایلهرک، تعذیب بدنن چکیمیه رک حیات ابدیه طوغری یوکسلمسی لازم کله جکنه اعتقاد اولنور ایدی . بوکبی فکرلر قدامیه بستیون یبانچی ایدی . قرون قدیمده حیات الک قیمتدار برمال ، ذوق وصفا حیاتک اساس وغایه سی ، تعذیب بدن منفور ، چرکینلک دخی هان بودرجه فنا ایدی . روسانس قرون قدیمه نک اثرینی تعقیب ایتدی . عقلک قدرت کامله سنه قانع اولدی ؛ مادیاته میل ایدرک حیاتک احتراصاته صاریلدی ؛ ذوق وسروره ، مادی کوزلله پرستش ایلدی . بو حال ، اخلاق وعادته - بالخاصه ایتالاده - درین برفساد عمومی ایله صنایع نفیسه ده اشکالک تکملی اندیشه سی وفکره قارشی کوستریلن لاقیدی ایله تظاهر ایتدی . بوصورتله هر درلو حس دیانت پرورانه دن محروم آثار دینه وجوده کلدی . کلیسارله عاذاولان بوآثاری تماشا ایدنلر خریستانلق ویا بترستلک دورلرندن هانکیسنه عاذا بر وقعه یی ویا اشخاصی تصویر ایتکده اولدقلرینی تعیننده عاجز قالیرلر .

اون بشنچی عصر اواخرنده واون آلتنچی عصرده **رونه سانسک ایمانی** رونه سانسی تولید ایدن اسباب نه دره ؛ اولاً ، اوتار یخلورده برچوق دها وزکای فوق العاده اصحابنک یتیشه رک توحید مساعی ایتلمری ، ثانیاً - رونه سانسک اوصاف ممیزه سندن بحث ایدرکن یوقاریده سویله دیکمز وجهله - صنایع نفیسه نک ذاتاً مکملیه طوغری تقرب ایتمش اولمسی رونه - سانسی تولید ایدن ایکی مهم سببدر . بو ایکی اساسلی سببه آتیده کی اسباب

تاليه دخي منضم اولدى : قرون قديميه عائد كتب و آثارك هر كسجه تداركنى تسهيل و افكار و معلومات بشريه نك كمال سرعتله دنيا نك هر طرفده انتشارى تأمين ايدن صنعت طباعتك ترقيسى ؛ هندستان طريق جديد نك و يكي دنيا نك كشفندن صكره فعاليت تجاريه نك آرتمى نتيجه سى اوله رق ثروت عموميه نك ترايدى ؛ هر مملكتده صنعتكار و مؤلفرك - آوغوستك رفيقى و (ویرژیل) ايله (هوراس) ك حاميسى مشهور (مەسن) ك ناميله ياد ايديلن - محب علم و معرفت ذوات طرفندن حمایه ايدملرى .

مهسه نلر ، يعنى ادبيات و صنايع نفيسه يي صورت مخصوصه - مهسه نلر
صده حمایه لرى آلتنه آلان بيوك ذوات ، زنكين زادكان و حكمداران هر دورده ظهور ايتشدرد . اون دردنجي عصر اواخرنده و اون بشنجي عصر اوائلنده فرانسه ده بورغونيا دوقه لرى ، ايتالياده بانكر (قوزمه دو مديسيس) حامى علم و معرفت اولمق اوزره شهرت بولمشلردى . اون بشنجي عصر اواسطنده روماده پاپا بشنجي نيقولا بش بيك ال يازيسيله محرر كتاب جمع ايتمش و بو صورتله - اليوم دنيا نك اك زنكين كتبخانه لرندن برى اولان - واتيقان كتبخانه نك تأسيسنه باشلامش ايدى . فقط رونه سانس زماننده مهسه نلر پك چوق ايدى . ايتالياده بيوك ويا كوچك هيچ بر پرنس ، هيچ بر حكومت ، روماده هيچ بر پاپا ، فرانسه ده هيچ بر قرال ، آلماننده هيچ بر ايمپراطور يوق ايدى كه صنعتكار و مؤلفرك تشويق و حمایه سنى مدار شرف بيلمسون . هپسى سراى ، شاتو ، كليسا كي مباني انشا آتته مراق و استاتولر ، تابلولر سپارش ايتديلر و صنعتكارلره چوق اجرت و يرديلر . كتبخانهلر تأسيس ، ارباب علمه معاشرلر تخصيص ايلديلر . پاره دن زياده حسن

معاملہ لربلہ ازباب علم و معرفت قدر و حیثیت لربلہ آرتیردیلر ؛ صنعتکار
و اومانیتلری دائرۂ صمیمیتلرینہ قبول استدلر ؛ اونلرہ اک بیوک ، اک
ذی قدرت کیمسہلر کی معاملہ یابدیلر و حتی بعضاً کتدیلرینہ ہر شیدن
مستتا بر موقعہ بولدیہرق استہدکرینی یابملرینہ مساعلہ ویردیلر۔ بابا
اوچنجی بول قتل صلیبہ تعقیب ایدیلن (بن وونو چہلینی Benvenuto
Cellini) نامندہ کی مشہور قلمکار ایچون ؛ چہلینی کی صنعتلرندہ یکانہ
اولان ادملر مرکس حقندہ جاری اولان قوانینہ تابع طوتیلہ مازلر ، دیشدیر۔
فلورانسہدہ (قوزمہ دو مدیسس) اک حنفی اولوب (محشم)
عنوانیہ معروف اولان (لوران) میشل آئر اسمندہ کی کفج
ہیکلترانی اوغل و بکنلرینہ رفیق اولہرق سرائیہ قبول ایتشدی ۔
بیوک ہدربنک آئریہ اقنا ایدرک زمانک بتون علومنہ واقف اولان
بیق دو لا میراندول Pic de la Mirandole [۱۴۶۳ - ۱۴۹۴] و
اومبروسک آئارینی نظماً لاینجہبہ ترجمہ و افلاطون فلسفہ سنی تدریس
ایدن آئر پولیتین Ange Politien [۱۴۵۴ - ۱۴۹۴] کی صنعتکارلر ،
مؤلفلر و عالملری سرائیہ جلب ایدیوردی ۔ (لوران) اک یونان قدیمہ
اولان محبتی پرستش درجہ سنہ وارمقدہ ایدی ۔ (پولیتین) ایہہ برلکدہ
افلاطونک تأیید خاطرہ سی ایچون سنلککر ، مراسم مخصوصہ ترتیب
ایلبوردی ۔ سرائنک باغچہ سنہ افلاطونک ہیکلی یابدیرمشدی ۔
رومادہ بابا ایکنجی ژول ادیسالک « عوام ایچون کموش ، زادکان
ایچون آتون ، پرنسلر ایچون الماس اولدیفنی ، سوبلوردی ۔ بشنجی
نیقولاً طرفندن تصور ایدیلن سن بیہر کلیسا سنک مجدداً انشاسنہ تثبت
ایدیور ؛ برامنت ، میشل آئر ، رافائل کی صنعتکارلری بانیہ جلب ایلبوردی ۔
ایکنجی ژولک خلی بابا اوتجی ٹون [۱۵۱۳ - ۱۵۲۳] - کہ مدیسس

خاندانندن ایدی - سلفنك ائرينه اقتفا ایتمشدی . حتی رافائلی صنایع
نقیسه ناظری کبی استیخدام ایتمش؛ اونی مراتب روحانیه نك الك یوکسکینه
چیقارمق ، قاردینال یاقمق ایسته مشدی .

ایمپراطور شارلکن (تیتیهن Titien) ه قونت پالانن ومشاوور ایمپرا-
طوری عنوان وحقوقنی ویرمشدی . برکون صنعتکارک آتلیه سنی زیارت
ایتدیکی صرهدده رسامک الندن دوشن فیرچه نی همان یردن قالدیرمش
وکندیسنه ویررکن : « تیتیهن قیصر طرفندن خدمت ایدلمک شایاندر » دیمشدی .
۱۲ نجی لوئیدن (قاترین دوم دیسیس) ه قدر بتون حکمدارلری
حمایه علم ومعرفت ایله شهرت قازانان فرانسه ده برنجی فرانسوا بوباده
الك زیاده ایلری یه کیتمشدر . حامی علما اولدینی ایچون (قوله ژدو فرانس) ی
احداث ایتدی . مؤلفلر کنديسنه « ادبیاتک باباسی » عنوانی ویردیله .
حامی صنعتکاران اولدینی ایچون (لوور) سراینک مجدداً انشاسنه قرار
ویردی و (شامبور) ، (آنبواز) ، (فونتبلو) شاتولرینک
انشآتنه تشبث ویا اولجه باشلایان انشآتده دوام ایلدی . ایتالیان اسکی
آثار هیکل تراشیدن مرکب برقولکسیون آلدی ؛ رافائله ، لئوناردو ونسی یه ،
آندره دل سارتویه تابلولر سپارش ایتدی ؛ بوضعتکارلردن صوگ ایکیسینی
فرانسه یه جلب ایلدی .

ایتالیاده رونه سانس

ایتالیاده اون دردنجی عصر دن اعتباراً دانته ، پترارق ،
بوقاس کبی مؤلفلر واون بشنجی عصرک نصف اولندن
اعتباراً کیه رتی ، اوناتهللو ، لوقاده للا روبیو ، فرا آنجه لیقو کبی هیکل تراش
ورساملرک آثار یله ادبیات وصنایع نفیسه ده بر تجمدد باشلامشدی .

ایتالیانک بیوک مؤلفرینک برنجیسی ، شاعرلرینک اک مشہوری ،
 اومیروسی فلورانسہلی دانتہ آلیکیہری Dante Alighieri [۱۲۶۵ -
 ۱۳۲۱] در۔ دانتہ بر آراق فلورانسہ رؤسای حکومتی میانندہ بولنش،
 غیبہلین فرقہسنہ منسوب اولسندن طولانی افکار سیاسیہسی خوشہ کیتیمہرک
 ۳۷ یاشندہ طرد ایدلمش ، وطنہ - حتی اولک ایچون بیلہ - عہدت
 ایدہ میہرک یکرمی سنہ قدر اوتہدہ بریدہ طولاشمشدی . بوزماندہ
 « Divine Comédie » نامیلہ معروف اولوب جہنم ، اعراف و جنت
 عنوانلی اوچ قسمدن مرکب اثر منظومنی یازمشدی . ہیچ بر لسانک
 ادبیاتندہ بر مثلی دہا بولنمان بو پارلاق وغریب اثردہ دانتہ بولونیا
 وپارس دارالفنونلرندہ اوکرندیکی الہیات ، حقوق ، فلسفہ و علومی ،
 نظریات واحترافات سیاسیہسی ، کین و محبتنی ، الم و امیدلرینی قاریشدیرمشدی .
 دانتہ کتابنی طوسقان لہجہسیلہ یازمش و بوسایہدہ لہجہ مذکورہ
 ایتالیانک لسان ادیبسی اولمشدر .

پترارق [۱۳۰۴ - ۱۳۷۴] و بوقاس [۱۳۱۳ - ۱۳۷۵] دخی
 فلورانسہلی ایدیلر . پترارق شعرلری ، صونہلری ، بوقاس (Décaméiron)
 عنوانلی یوز حکایہدن مرکب پارلاق اثری ایلہ ایتالیان ادبیاتنک شاہ
 اثرلرینی وجودہ کتیرمشلردی .

بواکی مؤلف یالکیز ایتالیانجہ یازمامشلردی . پترارقک حال حیاتندہ
 قازاندی شہرت صونہلرندن ، شرقیلرندن زیادہ پون محاربہلرندن باحث
 (آفریقا) عنوانلی لاتینجہ داستانن طولانی ایدی . بو اثری پترارق
 ایچون قرون قدیمہدہ اولدینی کبی قاپیتولہ مراسم فوق العادہ اجرا ایدلمسہ
 سبب اولمشدی . کک پترارق و کک بوقاس لاتین ادبیاتنک مفتونی ،
 حیرانی ایدیلر . ایکسیسہ مؤلفین قدیمہنک ال یازیسیلہ محرر اثرلرینی

بیوک بر احتیاط ایله آرامشلردی . مناستر کتبخانه لرینی آلت اوست ایتمشلردی . اونلرله برلکده دها بشقه مؤلفلر چالیشمشلردی . اوزمان بو کتبخانه لرده کی کتابلرک فاره لردن محافظه سی اکثریا خاطره بیله کتیریلزدی . پارشمن بهالی اولدینی ایچون چوق دفعه آثار قدیمه یی حاوی پارشمنلر اوزرنده کی یازیلر حک ایدیلیر ، یرینه دعالر یازیلیر ، کشیشلر طرفدن خرج عالم کتابلر وجوده کتیریلرک متعصبلره ساتیلیردی [*] . مؤلفلرک تحریاتی ایی نتیجه لر ویرمشدی . مثلاً ، پترارق لاتین مؤلفلرندن (قوینتیلیه Quintilien) ک بر اثرینی ، چیچهره نك بر چوق مکتوب ونطقلرینی بولمشدی .

عینی مراق یونان قدیم ادبیاتی حقنده دخی او یانمشمشدی . قرون وسطاده یونانجه غربی اوروپاده اوقدر مجهول ایدی که بر چوق دارالفنونلرده معلمین وطلبه یونان حروفنی بیله طانیمازلردی . بوقاس یونانجه اوکرنمش ، یونان آثار قدیمه سنی آرایه رق استسناخ ایتدیرمشدی . فقط یونان ادبیاتنه وقوف آنجق اون بشنچی عصرده تعمم ایتمشدی . بالخاصه عثمانیلرک قسطنطنیه یی ضبط ایلملرندن صوکره شرقدن اوروپایه پک چوق کتابلر نقل ایدلمشدی . ایتالیا ده اختیار اقامت ایتمش بر روم اولان قاردینال (بساریون) آلتی یوزقدر یونان اثری طوبلایه رق وندی که اهدا ایلمشدی . لاتین ویونان اثرلری مؤلفلرک انظار حیرتنی جلب ایتمشدی . بونلر آثار مذکورینی تقلیده ، خلقده دخی عینی حیرت و تقدیری او یاندرمغه چالیشمشلردی . دارالفنونلر خارجنده اوله رق یکی برتدقیق وتبعه میدان

[*] ۱۸۲۰ تاریخنده قاردینال (مه) اسمنده برزات ایجه حک ایدلمه مش اولان اسکی یازیلری میدانه چیقارمق ایچون بر چاره بولمش وبو صورتله مؤلفین قدیمه آثارندن بر چوق پارچه لری میدانه چیقارمشدیر .

آچشلردی. اساسی ادبیات قدیمہ اولان بوتدقیقات و تتبعاتہ لاتینجہ «پارلاق»، «ظریف» معناسہ «humanus» کلمہ سندن مأخوذ اوله رق (اومانیتہ Humanités) دینلدی و اربابنہ دہ (اومانیسٹ Humaniste) عنوانی ویرلدی. «اومانیزم» آتجق اون آلتنجی عصرده درجہ تکملہ واصل اولدی واسقولاستیکی، یعنی اوزمانکی دارا فنونلرک صرف ونحو، الہیات و فلسفہ تدریساتی میدانن قالدیردی. فقط اون دردنجی عصر واسطندن اعتباراً ایلک اومانیسٹلرک اثرلری یونان ولاتین مؤلفلرینک افکارینی خلقہ آکلاتدی. بوصورتہ رونہ سانس باشلادی.

قرون قدیمہ نک تأثیری متفکرین اوزرنده حس ایدلیدی زمان صنعتکارلرده دخی کورولمکہ باشلامشدی. ایتالیا روما مدینتک مرکزی اولدینی ایچون صنایع نفیسہ قدیمہ نک انقراض وبقایسی نقطہ نظرندن هر مملکتدن زنکین ایدی. ایتالیانلر بوراده بوندقلری نمونہ لری خارجدن کلنلرہ ترجیح ایتشلردی. چونکہ بونلرہ آثار ملیہ نظریلہ باقیلیوردی. معمارلر، رساملر، هیکل تراشلر قرون وسطی طرزینی براقهرق آثار قدیمہ یی تقلیدہ باشلامشلر؛ بوکا کندی دهالرینی دخی علاوه ایدرک دها مکمل، دها کوزل اثرلر وجودہ کتیرمشلردی.

ایتالیانک بیوک صنعتکارلرینک برنجیسی معمار ورسام جیوتو Giotto [۱۲۶۶ - ۱۳۳۶] ایدی. فلورانسده اون دردنجی عصرک ربع اخیرنده «رونہ سانس طرز» نامیلہ معروف طرز معمارینک موجدی اولان برونہ لسقو Brunellesco [۱۳۷۵ - ۱۴۴۱]، اونک رقیبی رسام و معمار کیه رتی Ghiberti [۱۳۷۸ - ۱۴۵۵]، اون بشنجی عصر هیکل تراشلرینک کثرت آثارجه برنجیسی بولنان دوناتللو Donatello [۱۳۸۳ - ۱۴۶۶]، آثار قدیمہ نک بتون اینجہ لکلرینی آکلامقده

هر کسدن ایلری به کیدن لوقاده لاروبیا Luca della Robia [۱۴۰۰ - ۱۴۸۲] ، خرستیانلق آثارینک اک بیوک رسامی عدایدیلن فرا آنجه ليقو Fra Angelico [۱۳۸۷ - ۱۴۵۵] ، ۲۶ یاشنده وفات ایتدیکی ایچون چوق اثر وجوده کتیره مین ، فقط صنایع نفیسه تاریخنده بر بیوک موقع احراز ایدن ماساچو Massaccio [۱۴۰۲ - ۱۴۲۸] یتیشمشلر ؛ صنعتلرنده اک ماهر استادلر اوله رق اون بشنجی عصرک نصف اولنی تاریخ مدیتک اک شانلی ، اک پارلاق بر دوره سی حالنه کتیر مشلرایدی .

اون بشنجی عصرده « اومانیزم » ک ایلک وطنی عدایدیلن ایتالیا ، بالطبع اون آلتنجی عصرده دخی بر چوق اومانیسیتلر یتیشدیردی . بتون پرنسler ، بتون پاپلر بو اومانیسیتلری - اکثریا کاتب صفتیه - خدمتلیینه آلدیلر ، بالخاصه مخبراتک قسم اعظمی کلیسا لسانی اولان لاتینجه ایله جریان ایدن پاپلرک سرایلرنده اومانیسیتلر خدمت کتابت خصوصیه ده مستخدم ایدیلر . بونلر قرون وسطانک باربار لاتینجه سی یرینه بیوک مؤلفلرک صاف لسانلری اقامه ایتمکه چالیشدیلر واک زیاده چیچه رونی نمونه اتخاذ ایتدیلر . حتی بعضیلری لاتینجه ادبی اثرلر یازدیلر .

دانتهدن ایکی عصر ، پترارقدن یوز اللی سنه صکره

مؤلفلر

اولمش بر لسانک احیاسی ایچون واقع اولان بوتشبلر آنجق بر مودا هوسندن عبارت اوله بیلیردی و حقیقت حالده دخی بویه ایدی . ایتالیا تاریخنه عائد اولدیی قدر ادبیات غربیه تاریخ عمومیسنه دخی تعلقی بولنان شاه اثرلر اون آلتنجی عصرده هپ ایتالیا نجه یازلمشدر . اووقت ایتالیانک درت بیوک مؤلفی واردی : ماکیاومل [۱۴۶۹ - ۱۵۳۰] وغیشاردن Guichardin [۱۴۸۲ - ۱۵۴۰] اسمنده ایکی نازر ، آریوست Arioste [۱۴۷۴ - ۱۵۳۵] وتاس Tasse [۱۵۴۴ - ۱۵۹۵] نامنده ایکی شاعر .

فلورانسہ لی مایاویل اوزون مدت فلورانسہ جمہوریتی خدمت کتابتہ بولنش ، متعدد دفعہ مهم دیپلوماسی خدمتترینہ تعیین ایدلش و آنجق ۴۵ یاشنہ طوغری نشر آثارہ باشلامشدر . برنجی واک مشهور اثری پک چوق زمان سیاسیاتک بر دستور لایتغیری ، بر کتاب مکر واستبداد عدایدلش اولان ، فقط حقیقت حالہ زماننک اخلاق وعادات ، بالخاصہ مشهور پاپا آلکساندر بورجیانک دھامشور اوغلی سزار بورجیانی مصور بر تابلودن عبارت بولنان (حکمدار Prince) عنوانی کتابیدر . (تیتہ لیوہ حقندہ نطق Discours sur Tite - Live) وبالخاصہ (فلور - انسہ تاریخی) عنوانی اثرلری سایہ سندہ مایاویل ایتالیاناثرلری آرہ سندہ برنجی درجہ بی فازامشدر .

مودہ نالی آریوستک الک مشهور ولایموت اثری شارلمانک اندلس عربلرینہ قارشی محارباتی واونک یکنی رولانک وقایع حیرت افزاسنی مصور قرق آلتی شرقیدن مرکب اولان (Roland furieux) عنوانی کتابیدر .

فلورانسہ لی غیشاردن صرہ سیلہ حقوق معلمی ، دیپلومات ، عسکر ، فلوراسہ نک اسپانیا سفیری ، اونجی لئون زمانندہ یاپالق مقامی اردو - لرینک لوازم رئیس اولمش ؛ حسب المأموریہ ایتالیا محارباتہ قاریشمشدر . بو محارباتی وفاتندن یکریمی سنہ صکرہ انتشار ایدن (ایتالیا تاریخی) عنوانی اثرندہ نقل ایشمشر .

لاتینجہ نامی (تورقوآ توتاسو Torquato Tasso) اولان (تاس) معتبر بر شاعرنک اوغلی ایدی . هنوز پک کنج ایکن شوالیہ عالمی مصور (Renaud) عنوانی ایلک اثر منظومی نشر ایدہ رک اون سکمز یاشندہ بیوک بر شہرت فازامشدر . شاه اثری اولان (Jérusalem délivré)

برنجی اهل صلیک قدسی ضبط ایتسنه متعلق بر داستان اولوب بادیه
اودرجه مظهر رغبت اولماش ایکن یواش یواش قیمتی آکلاشیلمش
و (ایلاده) ایله هم مرتبه طوئشدر .

اون آلتنجی عصرده ایتالیان ادبیاتنک پارلاقلی

صنعتکارلر

پک یوکسک بدرجهده اولمقله برابر-عینی زمانده کی

صنایع نفیسه نك رونق وحشمتی قارشیسنده سونوك قالیر . ماکیاوهل ،
آریوست وتاسک قارشیسنده معمار (برامانت) و (میشل آنژ) ، رسام
(لئوناردو ونسی) ، (رافائل) ، (قوره ژ) ، (تیتیهن) ، (پول وه -
رونه ز) کوریلور . بو داهیلرک دوننده اولمقله برابر - هیچ اولمازسه
رساملقده - ایتالیانک تفوقنی تأمین ایتمکه کافی درجهده قدرت ومهارتی
حائز (جورجیونه) ، (آندره دل سارتو) ، (تنوره) کلیرلر . هیچ بر
مملکت هیچ بر دورده نه بو قدر چوق ، نه ده بو قدر بیوک صنعتکار
یتیشدیرمه مشدر . اصل رونه سانس بطنی تشکیل ایدن بو آدملره مهارتلی
۱۴۵۰ و ۱۵۰۰ تاریخلری آره سنده حد غاییه واصل اولان و ۱۵۰۰
تاریخندن صکردهده بر حیات اوله رق اون بشنجی عصر اوائلنده یتیشن
پیوک رساملر ، (ماساچیو) و (فرا آنجه لیکو) کی استادلری ایله اون
آلتنجی عصر اوائلنده یتیشن شاگردلری آره سنده رابطه خدمتی کورن
دها بر چوق رساملرک - پک اوزون - بر جدول اسامیسنی علاوه
ایتمک اقتضا ایدر . یالکز اک مهملرینی اونوتماق ایچون « فرسکو
Fresque » دینلن دیوار نقشلرنده امثالسز برر استاد اولان به نوچو
غوجولی Benozzo Gozzoli [۱۴۲۰-۱۴۹۷] و کیرلانداو Ghirlandajo
[۱۴۴۹ - ۱۴۹۴] نك ، ظرافت ولطافه هر رسامدن زیاده اعتنا ایدن
ساندرو بوتیچلهالی Sandro Botticelli [۱۴۴۷ - ۱۵۱۵] نك ، قیافت

ومزیناتك اصلرینه مطابقتہ پك زیادہ اعتنا ایدن و آرکہ ٹولوژی رسا -
ملرینك برنجیسی صایلان مانتہ غنا Mantegna [۱۴۳۱ - ۱۵۰۶] نك،
فلامانرك یاغلی بویا اصولنی ایلک اوکجه ایتالیاده تطبیق ایدن ژان بهلینی
[۱۴۲۷ - ۱۵۱۶] نك، ینہ بو وادیدہ چالیشان پەروغن Perugin
[۱۴۴۶ - ۱۵۲۴] نك اسملرینی ذکر ایله اکتفا ایدہ جکز .

قدرت ومهارتلی جدا پارلاق اولان بو رساملردن هیچ بری هر
نقطہ نظردن اکمل، تنقیدہ محل براقیان وبتون عالمک حیرت وتقديرینی
جلب ایدن برشاہ اثر وجودہ کتیرہ مہمشدر. ایلک شاہ اثرلر (پەروغن) ک
آتہ لیہ آرقداشلرندن بری اولان (لئونارد دووہنسی Léonard de Vinci)
نك فیرچہ سندن چیقدی .

فلورانسہ لی لئونارد دووہنسی [۱۴۵۲ - ۱۵۱۹] اوتوزیاشندہ میلان
دوقہسی «ماوریتانیالی» لقبیلہ معروف (لودوویق) ک خدمتہ کیرمش،
فرانسزلرک دوقہلنی ایلک استیلاسی تاریخنہ قدر اورادہ چالیشمش،
شاہ اثرلرینک اک مشهوری اولق اوزرہ سنت ماری مناسترندہ حضرت
عیسانک حواریونہ ایتدیکی صوک طعاعی مصور (Cène) عنوانی
فرہسقویی میدانہ کتیرمش، بعدہ برنجی فرانسوانک دعوتی اوزرینہ
فرانسہ یہ کیدہرک اورادہ وفات ایتمشدر. اک کوزل تابلولری - (باکوس)
و (ژوقوند) - پارسک لوور موزہ سندنہ در .

لئونارد دووہنسی نك تابلولری آزدرد. سببی کندیسنک یالکز رسام
اولمیوب ہر شینہ مراق ایتمش، بتون علملری اوکرنمک ایستہ مش اولمسیدر.
قلمکارلق، معمارلق، مہندسلک ایتمش؛ فیزیق، تشریح، علم الارض،
ہیئت، ریاضیات ایلہ مشغول اولمشدر. آثار ہیکل تراشیسندن ہان هیچ
برشی قالمامشدر. مہندس صفیلہ لومباردیا اووہنسنک اسقاسی عملیاتنی قسماً

اجرا ایتشدرد. فرانسه انستیتوسنده موجود اولان کندی ال یازیسيله محرر کتابله نظراً تحت البحر سیر سفائن و سیاحت هوا ئیه کبی آنجق زمانزده- بر درجه یه قدر- حل ایدیلن مسائل ایله دخی اوغراشمشدر. انکلز طیبی (هاروهی) دن بر عصر دن اول دوران دمی آکلامش، آلمان هیئت شناسی (کپلر) دن یوز سنه اول جاذبه عمومی قانوتی حس ایتشدرد، که بونی آنجق ایکی عصر صکره (نیوتون) بر دستور شکله قویه بيلمشدر. علمده مشاهده و تجربه نك لزومنی اعلان و ادعا ایتدیکنه کوره علمای جدیده نك مبشری عد اولته بیلیر. فقط نتایج مساعیسی نشر ایتدیکی و کندی ال یازیسيله محرر کتابلرنده بر نوع کیزی یازی قوللانه جق درجه ده احتیاطده ایلری یه کیتدیکی ایچون بو نقطه نظر دن شهرت قازانه مامشدر.

معمار برامانت Bramante [۱۴۴۴ - ۱۵۱۴] اڭ کوزل اثر لرینی روماده وجوده کتیرمشدر. ایکنجی ژول زماننده (واتیقان) سراینک اکمال انشا آتته، باغچه لرینک طرح و تنظیمه مأمور اولمش و سن پیه ر کلیسا سنک ایلك پلانلرینی تنظیم و انشا آتته ابتدار ایتشدرد. انشات قبه یه قدر یوکسلدیکی صروده وفات ایلشدی. بو کلیسا آنجق بر عصر صکره [۱۶۱۴] و برامانتک دکل، اوکا پک زیاده حسد ایدن میشل آنزک پلانلرینه توفیقا اکمال ایدیه بيلمشدر.

برامانت درجه سنده قدرت علمییه صاحب اولمیان، فقط اوندن زیاده دهای شاعرانه سی بولنان میشل اثر [۱۴۷۵ - ۱۵۶۴] اصلاً هیکل تراشدی. فقط رسم، معماری، هندسه و شعر ایله ده اشتغال ایدرک جمله سنده ایلری یه وارمشدر. رونه سانسک اڭ مکمل، اڭ قوتلی دهاسی عد اولنور. فلورانسلی ایدی. اون اوچ یاشنده رسام (کیرلانداپو) نك، اون درت یاشنده هیکل تراش (دوناته لالو) نك شا کردی ایدی. یکرمی یاشنده هیکل لر یله شهرت قازانمغه باشلامشدی.

اوتوز یاشنده پاپا ایکنجی ژول طرفندن رومایه دعوت ایدلمش ووفاتنه قدر پاپالرك خدمتده بر سعی متمادی ایله چالیشمشدر . روماده «ایکنجی ژولك مزاری» ، «سیکستین کلیساسنك فره سقولری» ، «سن پیه ر کلیساسنك قبه سی» ، فلورانسه ده «مدیسیسارك کلیسا و مزارلری» میشل آنرك حیاتی طولدیران درت بیوك اثریدر . ایکنجی ژولك مزاری ایچون قرق سنه مشغول اولمش ، سیکستین کلیساسنك فره سقولری ایچون بلافاصله بر دفعه درت ، ایکنجی دفعه سنده بش سنه چالیشمشدر .

میشل آنر بیوك بر شرف و اعتباره نائل و غایت زنکین اولدینی حالد ۸۹ یاشنده وفات ایتمشدر . پاپا صنعتکاری سن پیه ر کلیساسنه دفن ایتك ایسته مشدی . فقط فلورانسه لیلر میشل آنرك - وصیتی موجبجه - نعلنی مسقط رأسی ارلان فلورانسه یه کوتورمکده اصرار ایتدیلر ؛ حتی نعلی چالدیلر ؛ اشیای تجاریه آرمسده فلورانسه یه کوتوروب حکمدارلره لایق مراسم و احتفالات ایله دفن ایتدیلر .

میشل آنرك آنارنده وصف میز قوت و اکثریا حزن و الم اولدینی حالد رافائل [۱۴۸۳-۱۵۲۰] اثرلرنده اك زیاده كوزللكه ، حسن ترکیه اهمیت ویرمشدر . رافائل (اورینو) شهرنده تولد ایتمش ، اون آلتی یاشنده (په روغن) ك آتیه سنه کیرمش ، صکره و هندی ایله میشل آنرك آثارینی تدقیق ایلش ، ۲۵ یاشنده رومایه کیدرك بیوك برشان و شهرت قازانمشدر . پاپا ایکنجی ژول طرفندن واتیقان سراینك متعدد صالونلرینی تزئینه مأمور اولمش و ایلک شاه اثرلرینی بوراده وجوده کتیرمشدر . رافائل اك زیاده مریم تصویرلرنده مهارتتی کوسترمش ، پاپالرك توجهلرینه نائل اولدینی ، پك چوق سپارشلر آلدینی ایچون پك چوق پاره قازانمش ، ۳۷ یاشنده فرط مساعیدن وفات ایتمشدر . اثرلرنده اشخاص مختلفه یی

بر يره طويلامق، بونلرك آرقه سنده واسع بر مسافه براقق، الحاصل حسن تركيه موفق اولمق خصوصنده رافائلي كچمش بر رسام يوقدر .

روما وفلورانسه ده يتيشن بوضعتكارلره مقابل همان جمله سى ونديكده يتيشمش وچاليشمش اولان بر زمرة صنعتكاران دها واردر، كه تابلولرنده رنگلره دها زياته اهميت ويرمشلر؛ كوى، اورمان، قير رسلرى وجوده كتره رك «Paysagiste» دنيلن رساملره پيشوا اولمشلردر. ديوار تريناننده دخى ياغلى بويا اصولنى تطبيق ايتمشلردر . بونلرك يالكز اسملرينى ذكر ايدى جكز: ۳۴ ياشنده وفات ايدن، فقط مسلك جديدك موجودى صاييلان جورجيو نه Giorgione [۱۴۷۷—۱۵۱۱]؛ درت بيكه ياقين تابلو ترسيم ايدن، ونديكده دوجلر سراينى تزيين ايلين و شارل كن ايله ايكنجى فيليك تصويرلرينى ياپان تيتيه Titien [۱۴۷۷ — ۱۵۷۶]؛ ونديكلى اولمدينى و عمرينك بر بيوك قسمى پاره ده كچيرديكى حلاله اصولى اعتباريله ونديكلى رساملر ميانه ادخال ايديلن وپارمه بيوك كليسا سنك قبه سنده كى عروج مرعى مصور اثريله شهرت قازانان قوره ژ Corrège [۱۴۹۴—۱۵۳۴]؛ رونه سانس دورينه عائدايتاليان رساملرينك صوكنجيسى صاييلان تئوره [۱۵۱۲—۱۵۹۴]؛ ونديك سراى، كليسا وكتبخانه لرينك ديوارلرينى تزيين ايتمش اولان پول وه رونه ز Paul Véronèse [۱۵۲۸—۱۵۸۸] .

يوقايردن برى ذكر ايتديكمز اسامى چوق اولقله برابر تاريخك رسام، هيكل تراش و معمار اوله رق قيد ايتديكى اسملر بوندن عبارت دكلدره . فضله اوله رق قلمكارلق، قيوچيلىق، موبيله جيلق و سائر كى صنعتلرده دخى پك چوق استادلر يتيشمش؛ بر سرايك ديوارنده كى دمير فناردن مغفرلره، زهرلره، قليجلره، سفره طاقيملرينه، اثاث يتيه يه، تابوتلره

و انچه قدر هر شیده مستننا بر اثر صنعت کورلمشدر . بو یولده کی صنعتکارلرک اک مشهوری بدایهٔ پاپالرک ، بعده برنجی فرانسوانک معیتده بولمش اولان قلمکار (بهن و ونوتو چه لینی) در .

رومناسی بو قدر پارلاق ، بودرجه نازک مدنیت درین بر اخلاق
زمانده اضراره قسزلق و منفور بر ظلم و وحشت ایله مترافق ایدی .
وعادات « ایتالیان روحلرنده آرتق خرستیانلق قالمشدر . »

دنیلوردی . بالخاصه ۱۶ نجی عصرک ایلک اوتوز سنه سی طرفنده صنایع نفیسه ده اولدینی کی اخلاق وعادته دخی بترستلک دورینه عودت ایدلمشدی . هر یرده ذوق وصفایه فوق العاده برانهماک ، اخلاق و نزا کتدن محرومیت ، بیوک بر وفاسزلق و خیانت ، بشقه سنک جاننه عدم رعایت وار ایدی . موفقیتی تأمین ایدن هر واسطه ای ایدی . زهر ، خنجر ، آرکه بوز بر معتاد استعمال ایدیلن وسائطدن بری ایدی . سزار بورجیا ، ماکیا و لک « پرنس » ی اون آلتنجی عصر اوائلنده کی بتون ظرافتلی ، بتون فناقلری ، جنایتلی نفسنده جمع ایشدی . بالذات ویا آدملی واسطه سیله ایقاع ایلدیکی قتلر تعداد ایدیله میه جک درجه ده چوق ایدی . جانی صیقان ویا وفاتلی کندیسنه بر فائده تأمین ایلین هر کسی زهرلر ، خنجرلر ، بوغازلر ، صویه آتاردی . هم دشمنلرندن قور تولمق ، هم ده اقرباسنک میراثه نائل اولمق ایچون اولدیرردی . یاننده دایما اجرت ایله طومش اولدینی قاتلرندن بری بولوردی . اقرباسنی بیله اولدیرمکدن چکینمزدی . پدری پاپا آلتنجی آکساندرک سراینده ، باباسنک کوزی اوکنده - بر قاچ کون اول جرح ایش اولدینی - انشته سنی اولدیردی . بر آقشام برادر یله بر لکده سوقاقده کیدرکن قرداشنی قتل ایتدیردی . جسدینی (تیر) نه رینه آتدیردی . مقتولی چوق زمان آرادیلر ؛ بوله مدیلر .

نهایت، جنایتی اوزاقدن کورمش اولان بر بالقجی مشاهداتی نقل ایتدی. بونی
دها اول یچون سویله مه مش اولدینی بالقجی یه صورلدینی زمان عینی یرده
یوزی متجاوز جسد نهره آتیلدینی حالد هیهچ کیمسه نك آدیرمدیغنی
جواباً بیان ایلدی .

فرانسه ده رونه سانس

ایتالیان و فرانسز رونه سانسلی آره سنده اساسلی
فرانسر رونه سانسك
فرقلر موجوددر. اولاً ، ایتالیا رونه سانسك رونق
اوصاف بمبزه سی
بالخاصه مؤلف و رساملرینك محمول مساعیسی اولدینی
حالد اون آلتنجی عصرده فرانسه ده (فرانسوا كلوئیه Francois Clouet) دن
بشقه مهم برسام یتیشمه مشدی. فرانسز مؤلفلرینه کلنجه ؛ بونلر چوق
ومتعدد ، حتی بر نقطه نظر دن، یوکسك اولمقله برابر کندیلر دن صکره
یتیشن ارباب دهانك مبشرلی حکمنده ایدیلر . فرانسز رونه سانسك
شرقی معمارلر ایله هیکل تراشلره عاڈدر .

دیگر طرف دن ایتالیاده رونه سانس كرك مبدأئده ، كرك اداوار تکاملیه سنده
صرف ملی و هر درلو تأثیر اجنیدن آزاده بر حرکت اولدینی حالد فرانسز
رونه سانسی اون اوچنجی عصر ك ایکنجی ثلثدن اعتباراً ایتالیانك اودرجه
نفوذی آلتنده قالمشدر، كه صنعتکارلر - کندی عرقلرینه خاص اولان
ذوق وضوحه ، ساده لك و ظرافت فکرینه رغماً - ملی صنعتك غعناتی
هان تماماً ترك ایتدیلر . بو ، ایتالیا محارباتنك نتایج مهمه سندن بریدر .
سکزنجی شارل، اون ایکنجی لوی و برنجی فرانسوا ایتالیایه کیردکلری
زمان مملکتك لطافت طبعیه سنه انضمام ایدن آبداتك کوزلکنه حیران
قالدیلر ؛ بو یکیلکه مفتون اولدیلر . فرانسه یه عودت ایدنجه ایتالیاده

حیرت‌نہی جلب ایدن شیرلی مملکت‌نہ کورمک ایستہ دیلر . سکزنجی شارن فلورانسہ یاریم ملیون فرانقلق آثار صناعیہ صانون آلمش و ۲۲ صنعتکاردن مرکب برہیتی پارسہ کوتورمشدی . برنجی فرانسوا برچوق ایتالیان رسام و مودلجیلرینی (فونتبلو) دہ یرلشدیردی . قرالریک صنایع نفیسہ یہ قارش کوستردکلری رغبت تبعہ یہ دخی سرایت ایتدی . صنایع نفیسہ مراقی مودا حالہ کیردی و ایتالیان صنعتی فرانسزلرک اون آلتنجی عصر طرزی اولدی .

ایکی رونہ سانس آرہ سندہ کی صوک فرق - کہ اولکینک نتیجہ سیدر - اون آلتنجی عصر دہ ایتالیان صنایع نفیسہ سندہ وحدت الہام و تکامل کورلادیکی و بتون آثار صناعیہ دہ بر رابطہ قرابت بولندینی حالہ فرانسہ دہ لاقول ایکی بیوک مکتب تفریق اولنہ بیلیر . بری عصرک اوائلندہ قرون وسطانک فرانسز صنایع نفیسہ سنہ صادق قالمش ؛ دیکری ، تقریباً ۱۵۴۰ تاریخندن اعتباراً ، قرون قدیمہ ایتالیان صنایعنی تقلید ایتشدر . بواکی مکتبک وجودہ کیتردیکی آثار آرہ سندہ طرز تلقی و منظرہ اعتباریلہ اودرجہ بیوک فرقلر واردرکہ عینی مملکت صنعتکارلرینک محصول مساعیسی اولدقلرینہ کوچ اینانیلیر و آرہ دہ عصر لرجہ زمان کچمش ظن ایدیلیر .

فرانسہ دہ ادبیات قدیمہ ہوسی اون بشنجی عصر فرانسہ دہ اومانیزم اواسطندہ او یاممشدی . پارسدہ ایلک دفعہ اولہرق آچیلان (سوربون) مطبعہ سنک چیقاردینی ایلک اثرلردن بری « یونان ولاتین منابع فیض بخشاسنہ » توفیقاً « ای سوز سویلہ مک صنعتنی » تعلیم ایچون یازلمش بر خطابت کتابی ایدی . مع مافیہ آثار قدیمہ یی فکر ، شکل ، ترکیب نقطہ نظرندن تقلید ایتمکک اکتفا اولنمیدی . فرانسز اومانیستری ادیب اولمقدن زیادہ عالم ، علم السنہ متخصصی ایدیلیر . آثار قدیمہ منتری -

علی الا کثر جاهل خطا طر طرفندن - استساخ ایدیه ایدیه خلی تغییراته
اوغرامشدی . بعض کله لر فنا نقل ایدلمش ویا بستیون قالدیرلمش ، حتی
جمله لر اونودلمش ایدی . اومانیتلر مختلف متلری مقایسه ، هر مؤلفک
طرز بیانی تدقیق ایدرک آثار قدیمه نك اصلری بولمغه چالیشدی لر بوضورتیه
« تنقید متون » اصولی وضع ایتدی لر .

دیگر طرفدن بعض اومانیتلر قدما نك آثارندن تاریخه ، اخلاق
وعاداته ، قوانینه وسائره یه دائر فقره لر طویلا یه رق بونلرک یاردیمیه یونان
وروما تشکیلاتی ، طرز معیشتی اوکرنمکه غیرت ایتدی لر . بویولده
چالیشان فرانسز علما سنك رنجیسی کیوم بوده [Guillaume Budè ۱۴۶۷-
۱۵۴۰] در .

اون آلتنجی عصرک نصف اخیرنده هازی استیه Henri Estienne
[۱۵۳۲ - ۱۵۹۸] کیوم بوده نی فرسخ فرسخ کجی . هازی استیه
کندیسی - ، اوغلی ، طورونی ، یکنی ، برادری داخل اولدیغی حالدیه برعائله
علما نك رئیس اولوب مطبعه جیلقی ایله اشتغال ایتمشدر . بوعائله برعصرده بیکی
متجاوز آثار قدیمه نی صحیح بر صورتده طبع ایتمشدر . هازی استیه یونان
قدیم محی ایدی . « خزینه لسان یونانی » عنوانلی اثری بوکون دخی
فرانسز علمنه شرف ویرن آتاردندر .

فرانسه ده اومانیزم تاریخنك باشلیجه وقعه سی Collège de France
نامیه معروف اولان « اوچ لسان مکتبی » نك تأسیسیدر . فی الحقیقه
بومکتب طرز تدریسی دکیشدر مشدر . اووقت دارالفنون ، عنعنا تنه صادق
قاله رق تدقیقات جدیدیه وبالخاصه یونانجه وعبرائیجه نك تدریسنه خصم
ایدی . رنجی فرانسوا - کیوم بوده نك تشویقیله - ۱۵۳۰ تاریخنده
لاتینجه ، یونانجه وعبرائیجه ایچون اوچ کرسی تدریس احداث ایتدی .

« اوج لسان مکتبی » دینسٹنک سببی بودر . قوله ژدو فرانس او قدر جابوق ترقی ایلدی که برنجی فرانسوانک وفاننده بر کوچک دارالقون حاله کلن بومکتبده اون ایکی کرسی تدریس بولمقده، السنه ثلثه دن ماعدا فلسفه ، ریاضیات ، جغرافیا وطب تدریس ایدلمکده ایدی .

اون بشتجی عصرک نصف اخیرنده فرانسه ده منظومه لر یله مؤلفلر
برییوک شاعره بکزه یین (فرانسوا ویلون) اسمنده
برحیدوددن، اون برنجی لوئی وسکزنجی شارل زماننده استخدام ایدلمش
وحقیقی برمودخ اولدیغنی « خاطرات » ی ايله اثبات ایتمش اولان (فیلیپ
دوقومین Phil Do Commynes) نامنده بر دیپلوماتدن بشقه مقتدر
مؤلف یتشمه مشدی . اون آلتنجی عصرده هر نوع مؤلفلر کثرتله کورلدی
بومیانده (مارو Marot) ، (دوبله du Bellay) و (رونسار Ronsard)
اسمنده اوج شاعر ، (روبله) ، (قالومن) و (مونته نی Montaigne)
نامنده اوج نائر دیکرلرینه تقدم ایدرک فرانسز شعر وانثرینک بانیسی
اولدیلر . مع مافیه ایتالیاده کی معاصرلری اولان مایاوهل ، آریوست
وتاسک ایتالیان ادبیاتنده احراز ایتدکری موقع درجه سنده مهم بر موقع
طوته مدیلر .

قله مان مارو [۱۴۹۷ — ۱۵۴۴] برنجی فرانسوانک سراینده
یشامش بر شاعر در . فرانسوا رابله [۱۴۹۵ — ۱۵۵۵] ایلک اوجکه
بردیلمجی کشیش ایکن ینه دیکتین طریقه کیرمش ، (مون په لیه) دارالقوننده
وقتسز برتحصیل نتیجه سنده طبیب اوئمش ، خدمت سفارت وتدریسدن
بولمش نهایت راهب ایکن وفات ایتمشدر . علم السنه ، آثار عتیقه وهیئت
ایله توغل ایتدیکندن عصرینک الک عالمردن بری ایدی « Gargantua »
عنوانلی رومانی اوزمانکی هیئت اجتماعیه نک امثالسمز بر هجویه سی اولوب

لایموت آئاردند. قال وەن [۱۵۰۹ - ۱۵۶۴] مذهب مخصوص صاحبی اولمقله برابر فرانسز ادبیاتنه تمّل قوران ئاثرلردن بریدر. بواوج مؤلف برنجی فرانسوانک معاصرلریدر.

۱۵۵۰ دن اون آلتنجی عصرک نهایتنه قدر مؤلفلرک عددی پک زیاده آرتدی. مذهب محاربه‌لری عادتا فعالیت فکریه‌یی آرتدیرمشدی. ادبیات قدیمه‌نک تأثیری قرون وسطانک بتون غنغاته صورت قطعیه‌ده غلبه ایتدی. رونسار، دوبله‌له ایله برلکده (پله‌یاد) دنیلن جمیع شعرائی تشکیل ایدن شاعرلر، (مونیه‌نی) کبی ئاثرلر قرون قدیمه ادبیاتنه مفتون اولوب اوراده کوردکلری افکار واشکالی فرانسز ادبیاتنه نقل اتمکک چالشدیلر.

یووا کیم دوبله [۱۵۲۴ - ۱۵۶۰] لاینجه ویونانجه‌یی فرانسزجه‌یه ترجیح ایدن مؤلفلر علیهنده بولنه‌رق شاید فرانسزجه‌ده اکسیک اولان کلمات وتعبیرات سالف‌الذکر ایکی لساندن آئیرسه فرانسزجه‌نک اک کوزل لسانلردن بری اوله‌جغنی ادعا ایتمش وبو ادعاسنی ادبیات قدیمه‌یه خاص اشکال تختنده یازدیغنی اثرلرله اثبات ایلشدر. فقط (دوبله‌نک) فکرینی اک‌زیاده موفقیتله موقع تطبیقه قویان پیه‌ر دورونسار [۱۵۲۴-۱۵۸۵] در. یکی مکتبک مؤسس حقیقیسی اولان رونسار هر شکلده بیکلرجه منظومه‌لر یازمش، اوتوز سنه بتون اوروپاده ملک‌الشعرا عد ایدلمشدر. اون آلتنجی عصرده یتیشن فرانسز شاعرلرینک اک مقتدرلرلردن بری اولمقله برابر بودرجه شهرت مزیتنک فوقنده ایدی. نته کیم وفاتندن صکره سریع برعکس‌العمل کورلدی؛ اون‌یدنجی عصرده - ینه حقسز اوله‌رق - بسبتون اونودلدی. میشل دومونته‌نی [۱۵۳۳-۱۵۹۲] نک شهرنی‌دها اساسلیدر. (Essais) عنوان عمومییسی آلتنده نشرایتدیکی آناری سکز

سنہ ۱۷۷۰ء بش بش دفعہ طبع ایدلشدر . وفاتندن صکرہ شہرتی آرتدی .
رونہ سانس دورینک صوگ بیوک محرری وداہی عد ایدیلن مؤفلرکدہ
برنجیسیدر .

مؤفلرقدرد چوق صنعتکار دخی یتیشمش ایدی . بونلرک
صنعتکارلر
آرہ سندن معمار (پیرلہ سکو Pierre Lescot) و
ہیکل تراش (ژان غوژون Jean Goujon) کبی صنعتکارلر مؤفلرک ادبیاتدہ
واصل اولہ مدقلری درجہ تکملہ وارہ بیلمشلردر . بونلرلہ برلکدہ اک
مشہور صنعتکارلر رسام (فرانسواقلوئہ) ؛ معمار (ژان بولان Bullant) ،
(فیلیبر دولورم Philibert Delorme) ؛ ہیکل تراش (میشل قولومب) ،
(لیژیہ ریشیہ Ligier Richier) ، (پیر بونتان Bontemps) ، (ژرمن-
پیلون Pilon) در .

پیرلہ سکو [۱۵۱۰-۱۵۷۸] فرانسدہ رونہ سانس طرز معمارینسک
اک مکمل اثری اولان لوور سرائینک معماریدر . ژان بولان [۱۵۱۲-
۱۵۷۸] ۱۸۷۱ دہ یامش اولان (توئیلری) سرائینی انشا ایتشدی .
فیلیبر دولورم [۱۵۱۵-۱۵۷۰] ژان بولان ایلہ برلکدہ توئیلری سرائینی
انشا ایدن و بوندن بشقہ متعدد شاتولر وجودہ کتیرن بر مقتدر معماردر .
یوقاریدہ ذکر ایدیلن ہیکل تراشلرک اک مقتدری اولان ژان غوژون
[۱۵۱۵-۱۵۷۶] قبارتمہ رسمدہ بتون امثالہ تفوق ایتش و اون سنہ
قدر لوور سرائینک تزینتہ چالیشمشدر . کرک بو و کرک ژرمن پیلون
[۱۵۳۵-۱۵۹۰] فرانسنک قیلاسیک ہیکل تراشلرندن معدوددرلر .

آلمانیا دہ رونہ سانس

اون آلتنجی عصر دہ آلمانیا دہ کوریلن تجدیدات ایتالیا و فرانسدہ کی

رونه سانسو نسبتله پك اهميتسزدر. بونك ده سببي ره فورمه نك توليد ايتديكي بحران ايله مذهب محاربه لريدر. آلمان ياده آنجق (روينخلين Reuchlin) وبالخاصه (اراسم Erasme) ك تمثيل ايلدكلري مقتدر اومانيسترلر ايله (آلبر دورر Dürer) و (هانس هولباين Hans Holbein) نامنده پك بيوك ايكي صنعتكار يتيشمشدر.

قرون وسطاده پك مترقي ومعمور اولان آلمان ياده پارلاق آلمان ياده اومانيزم بر مدريت وار ايدى. هر طرفده، فقط بالخاصه غرب وجنوب طرفلرنده، رن و طونه مملكتلرنده، استراسبورغ، قولونيائ، نوره نبرغ، راتسبون، اولم شهرلرنده فرانسر طرزنده محتشم بيوك كليسالر انشا ايدلمشدى. متعدد دارالفنونلر تاسيس اولنمشدى. اون آلتنجي عصر ابتدا سنده تعداد اولنان اون بشي متجاوز دارالفنونك سسكزي اون بشنجي عصر ك نصف اخيرنده آچيلمشدى. بورقملر او زمان آلمان فعاليت فكريه سنك نه درجده بولنديغنى پك كوزل كوسترر. هيچ بر مملكت، حتى ايتاليا بيله ادبيات قديمه تدقيقاتنه آلمانيا قدر هوس وجديتله كيريشمه مشدى. يونان ولاتين مؤلفين مشهوره سنك آنارى بتون تحصيلك اس اساسي اولمشدى. اومانيزم الك زياده آلمان ياده ترقى ايتمشدر، دنيا سبه مبالغه ايدلمش اولماز. اومانيسترلر ك مشهورلري (توبينكن Tubingen) دارالفنوننده معلم بولنان، يونان ادبياتنه وقوف تامي اولمقله برابر آلمان ياده لسان عبراني تدقيقاتنه تمل قويمش اولان روينخلين [۱۴۵۵ - ۱۵۲۲] ايله اراسمدر.

اراسم [۱۴۶۷ - ۱۵۳۶] بتون اومانيسترلر ك مشهوريدر. او زمان آلمانيا امپراطورلغنه داخل اولان روتردام شهرنده دنيايه كمش اولديغندن ولادت اعتباريله آلمان صايلير ايسه ده كنديسي مدت عمرنده

عالم ادبیاتدن بشقہ بروطن طانیامشدر . اڤک زیاده سودیکی بر شهر اولان پارس دارالفنوننده اوقومش ، هوس تحصیل ایله اوتوز یاشنده ایکن بر قوله ژہ قیامتش ، بعده بولونیا دارالفنونہ کچمشدر . بر آراق اسقوجیا قرالتک اوغلنه مربی اولمش ، ایتالیاہ سیاحت ایتمشدر . پاپا اوتجی لئون اراسی رومادہ آلیقویمغہ جالیشدینی حالہ موفق اولہ مامشدر . اراسم انکلز اومانستلرینک الیوکی اولان شانسلہ (طوماس مور More) ایله دوست اولدینی جہتہ اوقسفورد وقامبرج دارالفنونلرنده درس ویرمشدر . برنجی فرانسوا کندیسنه قوله ژدو فرانسک مدیریتی تکلیف ایتدیکی حالہ جواب رد ویرمش ونہایت (بال) ده یرلشہرک اورادہ وفات ایتمشدر .

بتون عمری سیاحت ایله کچن اراسم وفاتنہ قدر بلافاصلہ چالیشمشدر . بطلمیوسک جغرافیاسی کبی آثار قدیمہ یی مصحح منلریلہ نشر ایتدی . انجیلک یونانجہ متنی ایله برلکده لاتینجہ یی یکی بر ترجمہ سنی باصدیردی . حتی آبا ی نصرانیہ نک متعدد کتابلرینی نشرہ واسطہ اولدی . فقط بتون اوروپاہ انتشار ایدن شهرت عظیمہ سنہ سبب اولان کتابلری « مخبرات » ی ، « مکلمات » ی و « جنتک مدحی Eloge de la folie » عنوانی اثریدر . ہیئت اجتماعیه نک فالقلرینی تصویر ایدن بو صوک اثر ۱۵۰۸ ده نشر ایدلدیکی زمان بر قاچ آی ظرفده یدی دفعہ باصیلدی وبتون لسانلرہ دو حال ترجمہ ایدلدی . اراسم فنا کشیشلر علیمندہ کی هجوملری ، کلیسیاہ عارض اولان سوءاستعمالاتہ قارشى تنقیدلری ، اسقولاستیکہ پک مربوط اولان الہیات متخصصلری علیمندہ کی مطالعہ لری ایله بدایہ رہ فورمہ طرفدارلری آردہ سندہ کوروندی . فقط قتولیکلکہ مربوط قالدی . حتی لوترک افکاری علیمندہ بولندی . وفاتندن براز اول پاپا کندیسینی قاردینال

يا بمق ايسته مشدى . اراسم بتون اثر لرني لاتينجه يازديغندن آلمان ادبياتي تاريخنده بوداهينك يري يوقدر .

آلمانلر صنايع نفيسه بختنده عنعنه لرينه صادق قالديلر .
صنايع نفيسه معمارلر مدت مدیده (اوژیوال) طرز معماريسني

تعقيب ايتديلر و آنجق ترينياتك بعض تفرعاتي تعديل ايلديلر . ايتاليان طرزندن ملهم آبدلر آنجق اون آلتنجي عصرک نصف اخيرنده ياللمه باشلادی . بونلرک اک مشهورلری هايديلبرغ شاتوسي ايله قولونيا شهراماتي دائره سيدر .

هيكلتراشلقده يالكز ايكي اثر شايان ذكردر : اينسبروقده طونجندن معمول يكرمي سكرز جسم هيكل ايله مزين ايمپراطور ماقسيمليانك مزارى ؛ او زمان آلمانيانك باشليجه صنايع نفيسه مركزي اولان نوره نبرغده سن سه بالدك مزارى . بو ايكي آبده نه قدر قيمتدار اولورسه اولسون عيني زمانه عائد فرانسز و ايتاليان اثر لريله قابل قياس دكلدر . بوكا مقابل آلمانياده اون بشنجي عصرده بر خيلي ائي رساملر ، اون آلتنجي عصرده ايسه آلبر دورر و هولباين اسمده بك بيوك ايكي رسام يتشمشدر .

نوره نبرغده تولدايدن آلبر دورر [۱۴۷۱ - ۱۵۲۸] بر حجار قيوچينك اوغلى ايدى . ديني تابلولرى بك مهمدر . اليوم موخنده بولتان (حواريون) تابلوسى آلمان تابلولرينك اكايسي عد اولتور . دورر بيوك بر رسام اولدقدن بشقه ماهر بر حكاك ايدى .

دوره ردن يكرمي ياش دها كنچ اولان هانس هولباين [۱۴۹۷ - ۱۵۴۳] آئوغسبورغلى بر رسامك اوغلى اولوب (بال) شهرنده وبالخاصه انكلترده يشامش ، قرال سكرزنجي هازينك رسامى اولمش ، اوراده

وفات ایتشدہر . الیوم (لوور) موزہ سندہ بولنان اراسمک ، برلیندہ بولنان « برکنج تاجرک » رسملری هولباینک شہرتنہ سبب اولمشدر . برقاشک ویا بر کورکک آری آری قیللرینی کوسترہجک درجہدہ تفرعاتہ اعتنا ایدن هولباین بالخاصہ مودللرینک روحنہ نفوذ ایدرک قیافت خارجہ لرندن ماعدہ سیمای مغنویلرینی ترسیمدہ مہارت فوق العادہ صاحبی اولدیغندن داهی رساملر صرہ سندہ تعداد اولنور .

دورہر وهولبایندن صکرہ کلن لوقاس قراناخ Lucas Cranach [۱۴۷۲ - ۱۵۵۳] آلمان صنایع نفیسہ سی تاریخندہ بر موقع مہم احراز ایتمش ، رہ فورمہ زمانندہ یتیشن مجددلرک وبالخاصہ لوترک رسامی اولمشدر .



ره فورمه

اون آلتنجی عصرک نصف اولی تاریخده کوریلن اک مهم حرکات دینه دن بری ، ره فورمه ایله تمیز ایتشدرد. ره فورمه نك مسیبلری آلمانیده (لوتر) ، فرانسه ده (قالودن) اولمشدر . ره فورمه نك نتایج دینه و سیاسیه سی پک بیوکدر .

نتایج دینه سی غربی اوروپاده وحدت عیسویه نك بوزولمسی و قتولیک کلیسایی قارشینده لوتریه ن ء قالوینست ، آنغلیکان ، پرسیتیره ن کلیسارینک تأسیس ایدلمسیدر . دیگر طرفدن قتولیک کلیسایی دخی کندنجه برره فورمه ، اصلاحات یادی و (ترانت) مجلس روحانیسیله عقائد اساسیه سی ، انضباطنی تثبیت و تعیین ایتدی .

ره فورمه نك نتایج سیاسیه سی اولاً اون آلتنجی عصرک نصف اولنده آلمانیده ، ثانیاً عصر مذکورک نصف اخیرنده فرانسه ده ظهور ایدن محاربات داخلیه در . دیگر طرفدن ره فورمه پروسیه دوقه لنی ، اسوج قراللی ، ایالات متحده جمهوریتی کبی یکی دولترک تشکله سبب اولدی .

ره فورمه نك اسبابی ره فورمه نك اسبابی متعدددر . بونلرک ایکسی

بیایلیق بالخاصه مهمدر : اولاً ، اون آلتنجی عصر ابتداسنده کلیسانک حالی ؛ ثانیاً ، طباعت سایه سنده انجیل و تورات نسخهلرینک تکثیر و تعمیمی . اون آلتنجی عصرده کلیسانک حالی ره فورمه نك باشلیجه سببی اوله رق ایلك اوجک کوسترنلر قتولیک هیئت زهبانیدر .

دہا ۱۴۳۶ تاریخندہ ، (بال) مجلس روحانیسی اجتماع ایتدیکی
 صرہدہ قاردینال (ژولین چزارینی) پایاہ یازدینی بر مکتوبہ - عادتہ
 استقبالی کشف ایدرجہسنہ - کلیسانک اصلاحی لزومندن بحث ایتمش ،
 « کلیسانک رئیس واعضاسنی اصلاح ایتک » بر ضرورت مبرمہ اولدیغنی
 سویلہ مشدی . فی الحقیقہ بش یوز سنہ اول ، اون برنجی عصرده پایا
 یدنجی غرہ غوارک اصلاحاتنہ لزوم کوسترن « سیمونی » ، ثروت وسامانہ
 انہماک ، فساد اخلاق یکیدن ہیئت رهبان آرہ سندہ یرلشمشدی . معافیہ
 اون آلتنجی عصرده احوال اون برنجی عصرده کندن فنا ایدی . یدنجی
 غرہ غوار زمانندہ فساد اخلاق کلیسانک اعضاسندہ ، یعنی ممالک مختلفہ نک
 ہیئت رهبانندہ ایدی ؛ رئیس ، یعنی پاپالق بو فساد و اخلاقدن مصون
 ایدی .

اون آلتنجی عصرده ایسہ بالعکس قنالغک منبعی رومادہ ایدی . پاپا آلتنجی
 آلکساندر بورجیانک حیاتی ہر دولو رزائل وجایات ایلہ مالی ایدی . ایکنجی
 ژولک ، باشندہ مغفر ، اردولرہ قوماندا ایتدیکی کورلمشدر . اوننجی لئون
 ایلہ یدنجی قلمان عالم عیسویتک امور اخرویہ سندن زیادہ صنایع نفیسہ
 وادبیات ، منسوب اولدقلری (مدیسیس) خاندانک منافع مادیہ سی ایلہ
 مشغول اولمشلردی . پاپالک جملہ سی پارہ پیشندہ قوشیورلر ، اک چوق
 پارہ ویرنلرہ صاتمق ایچون یکی رتبہ ومنصلر احداث ایدیورلر ، تأمینات
 مقابلندہ پارہ اقراض ایدن ایتالیا و آلمانیاک بیوک بانکرلریلہ پیسدا
 مناسبات ایدہ رک پاپالق مقامنہ عائد ویرکولرک ، عائداک تحصیل وجایاتنی
 اونلرہ تودیع ایلورلردی . یا کندی عائلہ لرینی زنکینتمک ، یا خود
 صنعتکاران ومؤلفینک حامیلری صفتیلہ ترقی علم ومعرفتہ ویادبدبہ وداراتہ

صرف ایتمک ایچون بیک درلو واسطه یه مراجعت ایدرک پاره بولمغه چالیشورلردی .

آلمانیا ده هیئت

ره بانه

کلیسانک رئیسنه عارض اولان بوقالقی بتون اعضاسنه سرایت ایتمش ایدی . فقط هیچ بریرده فساد اخلاق آلمانیا ده کی درجه سنه وارمامشدی . اون آلتنجی عصر ابتداسنده آلمانیا ده کلیسا پک قوتلی ایدی . اراضینک بر ثلثی کلیسانک ایدی . مناصب عالیّه روحانیه نک توجیهی پاپارک الک مهم منابع وارداتندن بری ایدی . بو مناصب دائماً بیوک زادکانه توجیه ایدیلردی . حکمدارلر ، پرنس لر مناصب روحانیه یی آرزوایتدکلری زادکانه توجیه ایتدیرمک ایچون پاپالقی مقامی نزدنده تشبثاتده بولنورلر ، ذیقیمت هدیه لر ویرلردی . صاقسونیا دوقه سی (ژورژ) بوندن بحث ایتدیکی صره ده : « بیوک کوچک هیمز اوغلر مزه ، قرداشلر مزه ، دوستلر مزه بسقپوسلق پایه سنی توجیه ایتدیرمک ایچون رشوت ویریورز ... منسوبینمزی هر هاندکی بر صورتله ایستر قپودن ، ایستر باجادن - سلک روحانی یه ادخال ایتمکه چالیشورز . » دیمشدر . بو صورتله سلک روحانی یه داخل اولان زادکان ایچون سر - بسقپوسلق ، بسقپوسلق ، مناستر باش راهب لکی بررما کل ایدی . احتراض واشتالرینی تسکینه ، شاتولرینی تزیینه ، معیتلرینی اداره یه ، دبده واحتشاش ملرینی ادامه وتزییده ، آواکلنجه لر ی ، ضیافتلر ، بالورلر ، مسامره لر تریینه لازم اولان پاره لر ی بو منبعدن آلیرلردی . بوندن طولاییدر ، که زادکان مناصب عالیّه روحانیه یی استحصاله غایت خواهشکر ایدیلر . ایچلرندن بعضیلری بر منصب ایله قناعت ایتیه رک اوج ویا درت بسقپوسلغی ، بر اوقدرده مناستر باش راهب لکنی نفسلرنده جمع ایدرلردی . مناصب روحانیه اک چوق پاره ویرنه توجیه اولنور ؛ بونک اجنبی اولمسنه ،

آلمانجہدن برتک کلمہ بیلہ بیلہ مسنہ، حتی امی بولمنسنہ اہمیت ویرلمزدی۔
 بو صورتلہ تشکیل ایدیلن ہیئت رهبان اخلاقسزلق سبیلہ نفرته شایان
 ایدی۔ بیوک رهبان اجنبی اولدقلری ایچون هرکس کندیلرینه حسد ایدر؛
 ویردکلری رشوتلری چیقارمق مقصدیلہ خلقی صویدقلری ایچون هرکسک
 خصوصتہ هدف اولورایدی۔ بتون اہالی - معاصریندن برینک دیدیکی کبی -
 «سوریلرینی اوتلاتمقدن زیادہ ونلرک دریلرینی یوزن» بو نوع راہبلردن
 بیقمشلر، ارضاعمشلر ایدی۔

فرانسہ دہیئت

رهبانہ

فرانسہ دہ قنالق بشقہ درلورایدی۔ آلمانیاہ کی رفیققلری
 کی متعدد مناصب روحانیہ یی جمع ایدن بیوک راہبلر
 دائرۂ روحانیہ لری داخلندہ اقامت ایتزلردی۔ امور
 روحانیہ نک اداره سی معیت مأمورلرینہ براقہرق قرالک یانندہ، سرایدہ یشارلر؛
 ندیم، دیپلومات، رجل دولت، حتی قوماندان اولورلردی۔ اون ایکنجی
 لوی ۱۵۰۶ تاریخندہ میلانہ کیردیکی زمان ارکان حربیہ سی میانندہ اوچ
 قاردینال، ایکی سرپسقیوس و بش پسقیوس موجود ایدی۔
 بورژوا صنفنہ منسوب اولان وسط درجہ دہ کی راہبلر تحصیل
 کوردمش، ناموسلی کیمسہ لر ایدی۔ فقط بونلردہ - بیوک رهبان کبی -
 دائرۂ روحانیہ لرندہ اقامت ایتزلردی۔ بو صورتلہ بر جوق یرلردہ اہالی
 - رهبان یتیشدیرمک ایچون خصوصی مکتبلرک فقدانندن طولای -
 جاہل، قبا، اخلاقمز کوچک راہبلرک الندہ قالیردی۔ ۱۵۱۶ تاریخندن
 اعتبارآ - برنجی فرانسوا نک پاپا بق مقامیلہ عقدایتدیک قونقوردا موجبنجہ -
 پسقیوس و مناستر باش راہبلری قرال طرفندن تعین و پاپا بق مقامنجہ
 تصدیق ایدلدیکی جہتلہ سوء استعمالات بسبتون آرتدی۔ نہایت اوچنجی
 ہانری زمانندہ اون بش یاشندہ چوجقلرک پسقیوس تعینی، بر پسقو -

سلغك جهاز اوله رق بر كنچ قیزه ویرلمسی، یاخود بر ندیمك خدمته مقابل مكافات اوله رق توجیهی کبی رزالتر کورلمکه باشلادی. بو صورتله بر پستقوسلنی اله کچیرن کیمسه همان اونی صاعغه قالقار؛ بر اصیلزادهیه، یاخود بر كنچ قیزه دور ایدردی.

بوندن طولاییدر، که اون آلتنجی عصر ابتداسندن اعتباراً جداً دیندار کیمسه لر، حتی هیئت رهبانك بر قسمی - بالخاصه فرانسه ده - کلیسانك بو رزالتره نهایت ویرمسی، کوندن گونه دهها زیاده احتیاج حس ایدیلن اصلاحاتی اجرا ایتسنی عن صمیم القلب آرزو و تمنی ایدرلردی. ذاتاً هر کسك فکر نجه، یا پیله حق اصلاحات اعتقادیاته اصلاً طوقونیه رق یالکز انضباطه، یعنی هیئت رهبانك طرز معیشتی ایله کلیسانك صورت اداره سنه تعلق ایتلی ایدی.

ره فورمه نك دیگر بر سببی ده طباعت سایه سنده انجیل
انجیل و نورانك
و تورات نسخه لرینك تكثیر و تعمیمی، هر کسك
نشر و تعمیمی
انجیللری او قومسی امکانك حصولی و عقائد اساسیه

عیسویه نك منبع لرینه عمومك کسب و قوف ایتسیدر. ۱۴۵۷ دن ۱۵۱۷ تاریخنه قدر کچن زمان ظرفنده تورات دوت یوز دفعه دن زیاده باصیلمشدی. ازمنه جدیده ابتداسنده هر کسده تحصیل ایتك، او کر نمك هوسی اویا- نمشدی. و ندیکك پارس سفرا سندن بری: «نه قدر فقیر اولورسه اولسون هر کس او قویوب یازمه یی او کر نمك ایسته یور.» دیمشدی. آلمانیا ده ۱۵۰۰ تاریخنده بیك قدر مطبعه موجود اولدینی کبی هر سنه فرانقفورته بر کتاب پنایری آچیلیردی. انجیل و تورات نسخه لری هر یره کیردی. قارئینك قسم اعظمی انجیل و توراتی یکی کوردکلری ایچون بونك تأثیری پك بیسوك اولدی. اوزمانه قدر بتون خرستیانلر انجیلك انحق آیین

روحانیلرده تلاوت ایدیلن بر قاج فقره سنه واقف ایدیلر . نسخه لر
تکثر ایدنجه مسیحک سوزلرینی هر خرسیتان بالذات اوقومغه باشلادی .
حال بوکه مسیح رحم و شفقتی ، اذواق دنیویه دن اوزاق طورلمسنی ،
فقری ، حلم و ملایمتی ، تواضعی توصیه ایدیوردی . بو معلوم اولنجه
صفت روحانیه یی حائر پر نسلرک ، بیوک راهبرک زینتلی ، دبدبه
واحتشاملری ، ثروتلی نظرلرده ده افا کورونمکه باشلادی . آرزوی
اصلاحات کسب شدت ایتدی . هر کس بو اصلاحاتی ، - او زمانه
تعبیرنجه - کلیسانک اسکی سادکیسه ارجاعنی ایسته یوردی . ده فورمه
دنیلن انقلاب عظیم دینیک بدایتنده هیئت ره باندن بر قسمنک فساد
اخلاقی قارشینسندده بیوک براکثریتک شدت ایمانی ، صمیمیت وجدانی
کورلدی .

انجیله وقوف ، بعض کیمسه لرده ، دیکر لرلندن ده ا مهم بشقه برقیجه
حصوله کیتردی . قتولیک کلیسانک تشکیلاتی ، عقائد اساسیه سی هرشیدن
اولدرت انجیله ، بعده نقلیات و تفسیراته ، سن پیه رک و حواریونک اخلاقی
عد ایدیلن پاپالرایله مجالس روحانیه نک مقرراتنه مستندایدی . بعض کیمسه لر
صرف کتب مقدسه یه حرمت مقصدیله مادامکه اللهمک سوزی انجیلده
محرردر ، شو حالده اوسوز خارجنه چیقما ملیدر ، دیدیلر ویا لکزر نقلیات
و تفسیراته - انسان ایشی اولدینی ایچون - اهمیت و قیمت عطف ایتمه مک
لازم کلدیکنه قانع اولدیلر . هیچ اولمازسه پاپالرایله مجالس روحانیه نک
تفسیراتی هر هانکی بر خرسیتانک تفسیری فوقه چیقماز ، بناء علیه
هر کس کتب مقدسه یی وجداننه کوره تفسیر ایده بیلیر ادعا سنده بولنمه
باشلادیلر . ایشته ، لوترک وبالا آخره قال و نه نک نظریه سی بودر . بو نظریه
وحدت عیسویه یی اخلاله سبب اولدی .

لوترك ره فورمه سی

لوتر

لوتر ۱۰ تشرین ثانی ۱۴۸۳ تاریخده صاقسونیاده کاشن
(آیزله بن Eisleben) ده تولد ایتدی . کنجلیکی پک
مشقتلی کچدی . پدری بر فقیر اودونجی ایدی . والده سی جوارده کی
اورمانده طوبلادیغی چالی دمتلرینی قله لرینه کتیرردی . لوتر تحصیل
ایچون (ماغده بورغ)ه، (آیزه ناخ)ه کوندرلدی . اوراده - او زمانکی
طلبه دن چوغنک یاپدیغی کبی - آرقداش لرله برلکده قپو قپو طولاشه رق
شرقی سویلر، آتمک دیله نیردی . بومشکل ، مشقتلی زمانلرده بورژووا
صنفة منسوب (اورسول قوتا Ursule Cotta) اسمنده برزنکین قادینک
توجه و محبتی لوتری برمدت ایچون حیات سفیلانه دن قورتاردی . کنجلیکده
عائد الک مسعود خاطره سی بوایدی . (اورسول قوتا) نك معاونت تقدیه سی
سایه سنده حقوق تحصیلی ایچون (ارفورت) دارالفنوننه کیردی [۱۵۰۰].
پدری حقوق تحصیل ایتسنی ایسته مشدی . بعض اومانیتلرک آثارینی
او قوددی . فقط ادبیاتدن زیاده فلسفه یه مراقلی ایدی . اسقولاستیکلرک
رقیب مستقبل ایلك اوجکه اونلرک چالیشقان ومطیع برشا کردلری اولدی .
بو تحصیل (لوتر) ک فکرنده سیلنمسی غیرممکن برایز براقدی . بردن بره ،
اوغلنک ایلك موفقیات تحصیلیه سنه مغرور اولان پدرینک یأس ونومیدیسنه
رغمآ ، (لوتر) هنوزیکرمی ایکی یاشنده ایکن (ارفورت) ده کی (اوکوسته ن) لرک
مناسترینه کیردی [۱۷ تموز ۱۵۰۵] .

(لوتر) ک مناستره کیرمسی اسبابی آره سنده بر طاقم وقایع فحیغه
دخی ذکر ایدرلر . احباسندن بری دوئللوده اولمش . برقچ کون صکره
لوتر (ارفورت) شهری خارجنده شدتلی برفورطنه یه طوتولمش واوزینه

صاعقه دوشہ رك تلف اولہ جغندن قورقش. شاید قور تیلیر سہ مناسترہ کیرمکی
عهد و نذر ایتمش. وفی الحقیقہ براز صکرہ مناسترہ کیرمشدرد. فقط بووقایم
(لوتر) ک مناسترہ کیرمسنہ سبب اولاماش، بلکہ مناسترہ کیرمک قرارینی
تعجیل ایتمشدی. بوقرار پک چوق زماندن بری کندیسنی بحضور ایدن
اندیشہ معنویہ نک نتیجہ سی ایدی. (لوتر) عصرک فنا لغندن، کوتولکندن
مضطرب ایدی. خرسیتیانلغک آیین و مراسم ظاہریہ سیلہ روحلرندہ برتسلی
وسکون بولہ میوبدہ طبیعتلرینہ ویا تصادفہ کورہ یا فرط عبادتک ویا -
قتولیک کلیسا سنک تعیری و جملہ - رفض و بدعتک آغوشنہ آتیلمش
اولانلرک قبلرندہ حس ایتدکلری بوشلغی، اضطرابی (لوتر) دخی طویمش
ایدی. (لوتر) طبعہ مفرط و برمرض درونیہ مبتلا ایکن کنجلیکنندہ
چکدیکی اضطرابات، آلدیغی صیقی تربیہ حزن و کدرینی بسبتون آرتدیرمش
اولدیفندن نہ دنیانک، نہدہ مطالعہ نک کندیسنہ تأمین ایدہ مدیکی حضور
وجدانی مناستردہ آرامشدرد.

(لوتر) نمونہ امثال اتخا ذینہ شایان بر راہب اولدی. فقط مناستر
(لوتر) ک طاشقین طبعتندہ کی اضطراباتی بسبتون آرتیردی. نہ ریاضت
و تعذیب نفس، نہ مطالعہ، نہدہ رتبہ رہبانہ نک توجیہی [۱۵۰۷] بتون
بر ملتک یأس و نومیدیسنہ ترجان اولان (لوتر) ک آلام قلبیہ سنی تخفیف
ایدہ مدی. تقصیراتندن نفرت ایدیور، اللهم حدث و غضبندن قورقیور
ایدی. «الم واضطراب ایلہ یرتیلمش قلبمہ، دائمی ہیجانہ مبتلا اولان
وجدانمہ اللهم حضور و سکون بخش ایلمسی ایچون کندمی اولوم درجہ سنہ
قدر تعذیب ایتدم. فقط مدہش بر ظلمت ایلہ محاط اولدیغم ایچون بوسکون
و حضوری ہیچ بر یردہ بولہ مدم» دیور ایدی. جناب حقک
منتقم حقیقی اولمسی فکرینہ قارشى عصیان ایدیوردی. بالآخرہ: «بتون

کناهلرک انتقامنی آلان عادل مطلق سومیورددم، بلکه اوندن نفرت ایدیور، اوکا قارشی بر فکر خصومت بسلور ایدم.» دیمشدر. منسوب اولدینی طریقته وکیل عمومیس (ژان استاوپیتز Jean Staupitz) لوترک اندیشه وجدانیه سنی تسکینه چالیشمش ایدی. اوکا: «الله سزدن غیر ممنون دکل، سز اللهدن غیر ممنونسکز» دیور و «انسانلری تدهیش دکل، بلکه تسلیه ایدن» مسیحه اعتماد ایتسنی توصیه ایلور ایدی. (لوتر) ارباب تصوفک، (سنتو کوستهن) آنارینی، (سن پول) ک رساله لرینی و انجیلی اوقویه اوقویه لطف الهی به اعتمادک برنجی شرطی عبادت و ریاضت اولدینی آکلادی. (سن پول) ک روما خرسیتیانلرینه یازدینی بر مکتوبده: «رجل صالح ایمانی ایله قورتیلور.» عباره سنی کورنجه قلبه اطمئنان تام کلدی؛ مسیحه ایمان ایتدیکی ایچون سلامت اخرویه سنی تأمین ایتمش اولدیغنه قانع اولدی. بوصورتله یواش یواش «تبریر بالایمان Justification par la foi» اعتقاد اساسیینه یاقلاشیور ایدی. بواعتقاری کلیسا اوتهدن برر. محافظه ایتمش و پاپالقی هیچ بر زمان رد وانکار ایتهمش اولقله برابر یواش یواش عادتاً متروک و منسی حکمنه کیرمش، بر طاقم مراسم مرایانه ایله اورتولوب قالمشدی.

(لوتر) ک مرض مغنیدن افاقت بولمسی پک اوزون سوردی. کلیسانک صادق و مطیع بر خادمی اولمقده ثبات ایدیور، (رویخلین) طرفدارلرینک کلیسا علیهنده کی مناقشات شدیدله لرینی تقبیح ایلور ایدی. ۱۵۱۱ سنه سنده وقوعه کلن روما سیاحت مشهوره سی احتیاساتی دکیشدیرمه مشدی. بو سیاحت آنجق بالآخره، اسکی بر خاطره کبی ذهنه کلهرک، پاپالقی مقامنک زینت و احتشامنی، ایتالیان هیئت رهباننک فساد اخلاقی تخطر ایدرک روما علیهنده بولمسنه خیلی مدار اولدی. علمی، طلاقت بیانی

سایہ سنده (ویته نبرغ) دارالفنونہ الہیات معلمی اولدینی زمان غیرت فوق العادہ سی ، اخلاص وفدا کارلنی ایله طلبہ سنک محبتنی پک چابوق قازاندی . بونلره صلاح حالک افعال ایله دکل ، ایمان ، امید وشفقت ایله ممکن الحصول اولدینی ، رجل صالح نامنه آنجق جناب حقہ ایمان ایدرک ، اوندن امیدی کسمیه رک کسب لیاقت ایدیلہ بیلہ جکنی تعلیم ایتدی . انسان قانون الہی یی تطبیق وایفادن خلقه عاجز اولدینی حالدہ مسیحک بونی انسانلرایچون یامش اولدینی ، نوع بشرک کناهلرینی عفو ایتدیرمک املیلہ فدای نفس ایتدیکنی وبو صورتله انسانلره صلاح حال طریقنی کوستردیکنی بیان ایدیور ایدی . (لوتر) بوآندن اعتباراً قتولیک کلیسا سنجہ رفض وبدعت عد ایدیلن اعتقاداتک صوک حدودینه وارمش اولدیندن اک اوافق بر حادثہ حیات دینیه نک مرکزی دیکشدیرمک صورتیلہ هجوم ایتدیکی رسمی کلیسا ایله حال اختلافده قلمسی ایچون کفایت ایدہ بیلیر ایدی .

۱۵۱۳ تاریخندن بری روماده رونه سانس پاپا اونجی
 (لئون) ک حمایه مخصوصه سیلہ پک پارلاق بر دوره یه
 داخل اولمشدی . پاپانک منابع عادیه وارداتی نه زینت
 واحتشامنه ، نه ده احتیاجات سیاسیه سنه کفایت ایتیمورایدی . اونجی (لئون)
 عنقه قدیمه یه توفیقاً پاره تدارکی ایچون (اندولزانس) لرک فروخته وسعت
 ویرمکه باشلادی و (سن پیه ر) کلیسا سنک انشا آتته نقداً معاونت ایدن
 خرستیانلره مغفرت الہیه خزینہ لرینی آچدی .

خرستیانلرک ایلک زمانلرنده مذنبلر ایشلدکلری کناهلردن طولای
 ندامت ایتمکه ، کفارت وریاضته مجبور طوتولمشلردی . علنی کفارت
 وریاضتلردن ماعدا مثلاً برکون آج قالمق ، اکثریا اوزون بر مدت

ظرفنده بعض اغديه دن ، بعض مشروباذن محروميت کي بدني رياضتله دخي مراجعت ايديلير ایدی . مذنبير آنجق بوصورتله مظهر عفو اوله بيليرلر ایدی . حال بوکه ندامت بر امر وجدانی اولوب تفتيش و تحقيق ايديله مز ایدی . لکن کفارت و رياضت امر ظاهري ایدی . يواش يواش برنجیسی اونودلش ، ايکنجیسنه اهميت ویرلمشدی . بدایه کفارت و رياضت اذای جسمانی ویا توبه علیه دن عبارتدی . بتون قرون وسطاده دوام ایدن بو اصول اون آلتنجی عصر بدایتده دخي موجود ایدی . فقط کلیسا مذنبيره مستحق اولدقلری بر اذای جسمانیدن مقامات مبارکي زیارت ویا تصدق کي بر عمل صالح ايله ، تعير ديکرله پاره مقابلنده قورتولمق صلاحيتی بعض شرائط تحتنده بخش ایتمکده ایدی . ايشته ، بوکا (اندولترانس) دنيلمکده ایدی .

۱۵۱۶ تاریخه طوغری پاپا اونجی (لئون) روماده مرقده حواریونی ، سن پیه ر کلیسائی زیارته کلنلرک ویا بو زیارتی ایفا ایدمه میوبده مذکور کلیسانک اکل انشا آتته مدار اولمق اوزره تصدق ایلینلرک (اندولترانس) ه نائل اولملرینه قرار ویردی . بوصورتله استحصال ایدیلن اندولترانس لر اولجه وفات ایدوبده موقتاً اعرافده جزای الهی یه دوچار اولانلرک روحلری نه عذابدن قورتاره بيله جت ایدی . پاپانک بو قراری بتون قتولیک عالمده بتون خرستیانلره تبلیغ و اعلان ایديله جک و خلقی تشویق ایچون موعظه لر ایراد اولنه جق ایدی .

آلمانیا ده موعظه لرک ایرادینه (دومینکن) لر مأمور اولدی . (دومینکن) لرک رقیبلری اولان (اوکوستن) لر بوندن هیچ ممنون اولمدیلر . (اندولترانس) لرک فروختی معامله سی تجارت نقطه نظرندن پک کوزل ترتیب و تنظیم ایدلمشدی . (مایانس) سرپسقوسلغنده بولنان کنج (آلبردو براندبورغ)

فروخت معاملہ سنہ نظارت ایتدی . بوکی ایشلرده پک ماہر اولان دومینکن (تچل Tetzal) بیوک بر غیرتله ایشہ باشلادی . (آئوغسبورغ) ک بیوک بانکرلری اولان (فوکر) لر بر قومیسون مقابلنده وارداتی تحصیل وجبایته مأمور اولدیلر . بانکرلرک مداخلہ سی اندولژانس لر حقندہ کی موعظہ لری ، تشویقاتی بر معاملہ تجاریہ چوریدی . بر مدت صکرہ (اندولژانس) شہادتنامہ لری طبع اولتہرق بانقہ کیشہ لرنده صاتیلفہ چیقارلدی .

(تچل) عطف اولنان شارلاتانلقلرده ، زوز کلکلرده مبالغہ دخی اولسه پاره مقابلنده کناء عفو ایتدیرمک معاملہ سنہ ویریلن بووسعت مرحالده بر بیوک رزالت ایدی . اون اوچنجی عصردن بری تأسس ایدن (اندولژانس) نظریہ سی قتولیک عقائد اساسیہ سنہ پک موافق ایدی . هرکون کلیساده اجرای آیین ایدن راهب مادامکہ خالق ایله مخلوق آره سنده بر واسطہ ضروریہ اولہرق خلقت سلامت اخرویہ سی تأمین ایدیور ایدی ، شوخالده او راهبک ارتکاب ایدیلن معاصینک مجازاتندن تصدق ایله قوروتولق امکائی بخش ایلمی ده ممکن اولہ بیلیر ایدی . فقط مرور زمان ایله مذنبک ندامتہ دلیل ظاہری اولمی اقتضا ایدن تصدق اساس اعتباریلہ اولسه بیلہ فعلاً ندامت لزومنی اورتہدن قالدیرمش ، ندامتک یرینه قائم اولمشدی . اندولژانس مسئلہ سی ایکنجی درجہ ده حائر اهمیت اولمقلہ برابر ایمانہ متعلق شیلرہ بر شکل مادیت ویرمکلہ اتہام اولنان روما کلیساسی علیہندہ یکی بر وسیلہ تعریض اولور ایدی . بو نقطہ ده کی سوء استعمالات هر کسک آکلایہ بیلہ جکی درجہ ده آچیق اولدیفی ایچون واقع اولان هجومده او نسبتده تہلککلی ایدی .

سہایت (لوتر) ۳۱ تشرین اول ۱۵۱۷ تاریخندہ (ویتہ نبرغ) کلیساسی قپوسنہ ۹۵ مادہ بی حاوی بر مطالعہ نامہ تعلیق ایتدی . اولاً ،

اندولژانسلرک فروخته ، صکره اندولژانسلرک اساسنه اعتراض ایلدی .
 اندولژانس واعظلری آره سنده اک زیاده ایلری به کیدن دومینکن راهبی
 (ژان تچل) ایله بر مناقشه آجدی . بو مناقشه کیندکجه کسب شدت
 ایدرک آیلرجه سوردی . (لوتر) ، بدایه نه پاپالک مقامنک حکومته ،
 نه ده کلیسانک کناهلری عفو ایتک صلاحیتنه اعتراض ایتوردی . فقط
 بعض ادعایری ایله بلکه ده کندی ظن و تخمیندن چوق ایلری به وارییور
 ایدی . مثلاً : « حال حیاتده بولنان ویا وفات ایتش اولان هر حقیقی
 خرستیان محضاً لطف الهی ایله واندولژانسه حاجت قالمه دن مظهر مغفرت
 اوله بیلیر . » دییور ایدی . بویه بر ادعا بالطبع عبد ایله معبود آره سنده
 بشقه بر واسطه نك عدم لزومنی ، مخلوقك خالقه قارشى عبادتنده استقلالنی ،
 الحاصل قرون وسطاده تأسس ایتش اولان مسلك دیننك اضمحللانی
 انتاج ایدردی . احتراصات مختلفه نك تحت تأثیرنده بولنان ، فقط اک زیاده
 روما علیه کین وخصومت بسله یین بر مات آره سنده بوکبی بیانات عصیانه
 دعوت ایله مساوی ایدی . اونك ایچون دها ایلک کونده خلق (لوتر) ه
 پك چوق زماندن بری بکله دیکی خلاصکار صفیله باقمغه باشلادی .

(لوتر) پك چوق زمان بر انقلاب دینی به ریاست وظیفه سنی درعه ده
 ایتدی . پك چوق خاطرات ایله مربوط اولدینی قتولیک کلیساسندن آیرلمق
 فکری ، اونك نظرنده ، جنت ایدی . فقط آرتق کندی اثرینه صاحب دکلدی .
 اطرافنده بر فرقه تشکل ایتشدی . بوفرقه یی تشکیل ایدنلر (ویته نبرغ) ده کی
 رفیقلری ، دارالفنون طلبه سی ، (تچل) ک رقیبلری ایدی . لوترک دشمنی
 اولان دومینکنلر شدتلی هجوملریله کنديسنی تهییج و تحریک ایدیورلردی .
 بونلر مسئله یی شایان دقت بر بحریکسنلک ایله توسیع و مباحثه یی پاپالک
 مقامنک لایمخطیلکی ک، پك چوروك بر زمینه نقل ایلورلردی .

پاپا لوترک اندیشہ واضطرابی تسکینہ چالبشہ جفہ منابع وارداتہ خلل کتیرن بو کورولتودن جانی صیقیلدی وبتون قوت ونفوذنی لوتر طرفدارانی علیہندہ استعمالہ حاضرلانہرق ویتہ نبرغ راہبنی رومادہ پاپالق محکمہ سی حضورندہ اثبات وجودہ دعوت ایتدی . مع مافیہ صاقسونیا الکتوری (عادل فرہ دریق) لکرجاسی اوزرینہ پاپانک آئوغسبورغندہ کی وکیلی حضورندہ ایضاحات ویرمسنہ مساعدہ ایلدی . پاپانک وکیلی عقائد اساسیہ متعلق بعض نقطہ لردہ لوترایہ متحدالافکار اولقلہ برابر پاپالق حکومتک حیثیت واعتبارینی نہ اولورسہ اولسون محافظہ ایتک عزمنندہ ایدی . بناء علیہ ہر درلو مباحثہ دن اجتناب ایتدی ولوترہ « سزدن انجق شو آلتی حرفک تلفظنی ایسترم : revoco] یعنی سوزمدن نکول ایدیورم [. دیدی . لوتر جواب ویرہ رک رد حقایق احوالہ دہا زیادہ واقف اولمسی اقتضا ایدن پایاہ مراجمت ایتدی .

حال بوکہ آلمانیا احوالی پاپا وکیلنک حلم وملایمت ایلہ حرکت ایتسنہ لزوم کوسترہ جک درجہ دہ وخیم ایدی . افکار عمومیہ ہیجانندہ ایدی . شدیدالمال عجوبہ لر یازیلوردی . ملنک حسیاتنہ ترجان اولان وبوبجرانلی سنہ لردہ فوقالعادہ برنأثیر اجرا ایدن شوالیہ (اولریخ دوهوتن Ulrich de Hutten) : « خرستیان سوروسی قویونلرینک یوکنی قیریمقدن بشقہ برشی دوشونمہین چوباندن آرتق ہرکس بیقمش ، اوصانمشدر » دیہ یازمشدی . « ترکرہ قارشی حرب ایتک ایچون قسطنطنیہ دکل ، آلپ طاغلرینک اوتہ طرفہ ، ایتالیاہ ، رومایہ کیتمیدر . سز پاپالق مقامنک یاغدیدرینی ییلدیرملر آلتندہ تترہ یورسکز . مسیحک غضبندن قورقیکز ؛ فلورانسہ لینک ییلدیرملرینہ نظر استخفاف ایلہ باقیکز . » دییوردی . بوہیجان آرسندہ لوترک اہمیتی کوندن کونہ آرتمقدہ ایدی .

كرك پاپا اوتنجی لئون و كرك آلمانیاده کی وکیلی جبر و شدت ایله بر موفقیت تأمین ایدیه میه جگنی آکلاینجه حلم و ملایمت طریقنی طوطدیله . نهایت ، لوتره پاپالق مقامنه مطیع اولدیغنی و مباحثه یه مجبور ایدلمدجکه سکوت ایده جگنی متضمن غایت متواضعانه بر مکتوب یازدیرمغه موفق اولدیله . لوتر تعهدنده صمیمی ایدی . فقط اقتدارینک فوقنده بر تعهد آلتنه کیرمشدی . براز صکره بستیون میدان مبارزه یه آتیلیمی ایچون بر وسیله ظهور ایتدی .

اوزمانک اک مشهور اسقولاستیک علماسندن (ژاق نُق) لوترک اک مدهش رقیبی ایدی . لایپچیغده بر مناقشه دینه ترتیب ایتدی . بو مناقشه یه بالذات لوتر اشتراک ایلدی . (ژاق نُق) غلبه ایده میه جگنی آکلاینجه لوتره - رفض و بدعت ایله اتهامه وسیله اوله جق - سوزلر سویله تمک ایسته دی ؛ اونی کلیسا طرفندن صورت قطعیده رد و جرح ایدلمش اولان افکاری یکیدن نشره جالیشمق ، (و یقلیف) و (هوس) ک خطالری تکرار ایتمکله اتهام ایتدی . لوتر بوندن متأثر اولدی . روما کلیساسنک بعض عقائد اساسیه سنه معارض بولندی و او کوندن اعتباراً قتولیک کلیساسی خارجنده قالدی .

لوترک طرفدارلری کیتدجکه چوغالیور ؛ پاپالق مقامی علیهنده کی نشریات تدریجاً شدتلینوردی . بو هیجان عمومی آره سنده لوتر اک شایان دقت واک جرأتکارانه ایکی اثری اولان « بابل اسارتی » و « خرستیان دولتنک اصلاح احوالی حقنده آلمان ملتک خرستیان زادکانه مکتوب » عنوانی کتابلری نشر ایتدی . لوترک صوک ترددلری ده زائل اولمشدی . آرتق قتولیک دینک آیین و مراسمی فائده سز شیر اولدیغنی ، عبادت ایچون راهبک وساطتیه حاجت بولمیدیغنی صورت قطعیده سویلیور ؛

زیارت، اور راج، مناستر، اندولٹرانس و سائرہ کی اعتقاد لک واهی اولدیغنی بیان اییدیوردی . راهلره یالکیز تهذیب اخلاق ، وعظ ونصیحت کی وظائف طبعیه لرینی براقیور ؛ بونلری فساد اخلاق لرینه باعث اولان ثروتلرندن تجرید ایتمک ، تأهل ممنوعیتنی قالدیرمق ایسته یوردی .

پاپالق یکیدن شدت کوسترمکه قرار ویردی . اونجی لئون لوترک تکلیفاتی رد و جرح ایلدی . لوتر آلتش کون ظرفده سوزلرندن نکول ایتمزسه آفوروز ایدیله جک ایدی . لوتر پاپانک بتون عالم عیسویتک اشتراک ایده جکی عمومی بر مجلس روحانی حضورینه حقیقسنی تکلیف ایتمک صورتیه جواب رد ویردی و ۱۰ کانون اول ۱۵۲۰ تاریخده ویتہ نبرغده بر جم غفیر حضورنده پاپانک امرنامه سنی یاقدی . ایرتسی کونی « بو کونکی پاپالق دونکی پاپالق دکلدر . ایسترسه بنم یازیلر می آفوروز ایتسون ، یاقسون ، ایسترسه بکا اشکنجه ایتدیرسون ! هیچ طورمه دن ایلرله یین حقیقی آرتق توقیف ایدہ مز . خارق العاده وقایع ظهور ایتمک اوزرہ در ، دیدی .

او صرہ ده شارل کن ایمپراطور انتخاب ایدلمشدی .
لوترک محکومیتی منازعات دینیه یکی ایمپراطوری اندیشه ده دوشورمشدی . چونکہ اولاً ، متعصب بر قتولیک ایدی . ثانیاً ، منازعات دینیه بتون آلمانیاده بیسوک بر هیجانه سبب اولدیغندن ذاتاً حال انقسامده بولنان آلمانیا ایچون یکی بروسیله تفرقه اوله بیلیر، ایمپراطورلغک نفوذ و قدرتنه ققیصه ایراث ایلہ بیلردی . ثالثاً ، لوتر علیهنده برقرار قطعی اعطایدرسه حرب داخلی ظهور ایتسی ویا هیچ اولمازسه بعض آلمان پرنس لرینک کوجمنسی احتمالی موجودی . بناء علیہ پاپانک وکیلی لوترک آفوروزینه

متعلق فرمانك حرفياً موقع تطبیقه وضعی طلب ایتدیكى زمان شارل كن
لوتری (وورمس) دیت مجلسی حضورینه دعوت ایلمله اکتفا ایتدی .
لوترك دوستلری آرمسندە بیوك بر هیجان حكمرما ایدی . بونلر
وقتیله (ژان هوس) ك باشنه كلن فلاكتی تخطر ایدەرك لوترە دیت
مجلسنه كیتمە مسنی توصیه ایدیورلردی . لوتر ایسه : « قانون ونظامه
توفیقاً دعوت ایدلدم ؛ بناءً علیه - ایسترسه وورمسندە طاملرك اوزرندهكى
كرەمیدلر قدر چوق شیطان بئم علیهمه اتفاق ایتسونلر - كیده جكم . »
دیوردی .

(وورمس) كیدنجه یه قدر كچدیكى یرلرده كوردیكى حسن قبولدن حقفندەكى
محبت وتوجه عامەك پك قوتلی اولدیغنی آكلادی وبو سیاحت یواش
یواش بر ظفر آلاینه بكمزەدی .

۱۷ نیسان ۱۵۲۱ تاریخندە (دیت) مجلسی حضورینه چیقدی .
مجلسه اسپانیول قیافتندە اولان ایمپراطور ریاست ایتكده ایدی . ایمپراطورك
بولدیغنی موقعك آلت طرفندە پاپانك ایكى سفیری ، روحانی وغیر روحانی
بتون الكتورلر ، پرنسلر ، شوالیهلر ، طوغربدن طوغری یه ایمپراطوره
تابع شهرلرك بلدیە رؤسası علی مراتبهم اوتورمشلر ایدی . مجلس بناسنه
منتهی اولان جاده لردە بش بیك كشیدن فضلە بر غلبەك طوپلانمشدی .
بر رهاب ماصه اوزرینه وضع ایدیلن كتابلرك عنوانلرینی اوقویه رق
بو آثارك مؤلفی اولوب اولدیغنی وخطالرندن نكول ایتك ایستە یوب
ایستە مدیكنی (لوتر) دن صوردی . (لوتر) ماضی ایله عادتاً رسماً قطع
مناسبات ایدیله جکی بر صرەده طوپلانان وقرون وسطانك جانلی بر تمثالی
اولان بو محتشم مجلس حضورندە دوچار الم واضطراب اولدی ؛ اسکی
قورقولری ، شەهلری یکیدن اوپاندی ؛ قیصیق بر سسلە دوشونمك

ایچون مہلت ایستہ دی. مجدد دینی بشقہ درلو کورہ جکلرینی امید ایدنلرک
 جملہ سی عظیم برانکساز خیالہ اوغرا دیلر. (شارل کن) : « بنی قتولیک دیندن
 آیرہ بیلہ جک آدم ہر حالہ بوراہب دکلدی » دیدی (لوتر) اوکیجہ بی
 مدہش بربحران معنویک الم واضطرابی ایچندہ کچیدی. کندی کندینہ :
 « انسان نہ قدر عاجز ، شیطان نہ قدر قویدر ! » دیوردی. فقط ایرتسی
 کون (دیت) حضورینہ چققدینی زمان بتون ترددلی زائل اولمشدی.
 « شمدی یہ قدر یازدیغم شیلرک جملہ سندہ اللہہ حمد وشکردن وخرستیانلرک
 سلامت اخرویہ سندن بشقہ بر غایہ کوزہ تدم . » جوابی ویردی . بعدہ
 کتابلرینی اوچہ آیردی . بعضلی نہرقیلری ، نہدہ پایا طرفندن محکوم
 ایدلمدیکی ایچون نکول ایدیلہ جک برشیئی حاوی دکلدی . مناقشات
 ومجادلات قلمیہ یہ عائد اولان کتابلرنہ بلکہ حداعتدالی تجاوز ایتمشدی ،
 شاید معارضلری دہ عینی صورتہ حرکت ایدرلرسہ اظہار ندامت ایتمکہ
 حاضر ایدی . آثارینک اوچنچی قسمندہ آلمان ملتک پاپالق مقامی
 استبدادینہ قارشی اسباب شکایاتی ایضاح ایتمشدی . شمدی بونلری رد
 وانکار ایدرک ہم ملتہ ، ہم دہ حقیقتہ اہانت ایدہ مزایدی . ایمپراطور -
 پاپانک وکیلی (آلہ آندر) ہ واقع اولان وعدی وجملہ - مباحثہ ومنظرہ یہ
 مساعده ایتدی . (لوتر) سوزلرندن نکول ایدوب ایتدیکی سؤالہ
 « اوت ! » ویا « خیر ! » دیہرک قطعی بر جواب اعطاسنہ اجبار ایدلدی .
 (لوتر) شو جوابی ویردی : « حضرت عیسی بر کون سوز سویلرکن
 باش کاهنک خدمتکارلرندن بری طرفندن ضرب ایدلمسی اوزرینہ اوکا
 طوغری دونمش و : « اگر فنا برشی سویلدم ایسہ بکا او فنا شیئی
 کوستریکنز ، ایی سویلدم ایسہ نیچون اورییورسکنز ؟ » دیمشدی .
 بن دہ مسیحی تقلیددن بشقہ بر صورتہ کندی دہا ای مدافعہ ایدہم .

بن ایمانی نه پایایه ، نه ده بر مجلس روحانی به تسلیم قیله مام . چونکه
هرایکینسک ده اکثریا دوچار خطا اولدقلری کون کبی آشکاردر .
مدعیاتمک حق اولدیغنه کتاب مقدسک شهادت مندرجاتی ایله قانع اولمسه
بیله سوزلرمک هیچ برندن نکول ایده م ونکول ایتمک ده ایسته م ،
چونکه برخرستیانک وجدانی خلافتده سوز سویله مسی اینی برشی دکلدرد .
جناب حق بکا یاردم ایتسون . آمین . ، بو جواب اوقدر ساده بر
فداکارلنی متضمن ایدی که مجدد دینک بتون ضعف وخطالری اونک
قارشیسنده سیلندی ؛ اونودلدی . تاریخ بوندن ده کوزل ، معنأ بوندن
دها یوکسک بر منظره بی قید ایتمه مشدر . (لوتر) حریر وجدانک حقیقه
صادق قالمق ایچون اولومی استخفاف ایتمی کبی دنیاده اک نجیب ، اک
علوی بر شیئک تمالی اولمشدی .

(لوتر) ی اقناع ایچون واقع اولان بعض تشبثات دخی عقیم قالدی .
نهایت ، (لوتر) وورمس شهرندن عزیمت امرینی آلدی . ۲۶ مایس
۱۵۲۱ تاریخنده اصدار ایدیلن بر امرنامه ایله اهل رفض وبدعت صفیله
بالجمله حقوقدن محروم وپاپالق مقامنجه محکوم ایدلدیکی اعلان اولندی .
بو امرنامه موجبنجه بتون پرنسار (لوتر) ی توقیف وایمپراطوره تسلیم
ایتمک مجبور ایدیلر . طرفدارلرینه عائد اموال واملاک ضبط ومصادره ،
کتابلری احراق ایدیله جک وسانسورک مساعده سی اولدقجه الهیاته ویا
مسائل دینییه مباحثانه متعلق هیچ بر اثر نشر اولنه میه حق ایدی . بتون
بو تدابیر آلمانیانک وبتون اوروپانک اوزمانکی حالی اقتضاسنجه اجرایی
غیر ممکن تهدیداتدن عبارتدی .

لوتر دارنبرغمه ؛ (لوتر) رفض وبدعت ایله محکوم اولدیغندن
آلایجه نورات (ورمس) دیت مجلسنه کیتمک ایچون استحصال

ایش اولدنی اماننامه نك مدتی منقضی اولنجه توقیف ایدیه جك و احراق بالنار جزاسنه دوچار اوله جق ایدی . حامیلرندن بری اولان صاقسونیا الکتوری (لوتری) آنی برتوقیفدن قورتارمق ایچون (وورمس) دن عودتنده خدمتکارلرندن بر قاچنه قالدیرتدی و غایت کزلی اوله رق (وارتبورغ Wartbourg) شاتوسته نقل ایتدیردی . (لوتر) شوالیه ژورژ نام مستعاریله برسنه قدر [مایس ۱۵۲۱ - مارت ۱۵۲۲] بوراده خفياً یشادی . ۱۰۷۰ تاریخنده (تورینکه) اورمانك منتهای شمالنده کائن بر قیالو اوزرنده انشا اولنان (وارتبورغ) شاتوسی آلمانیانك قرون وسطی شانولرینك اك كوزلرندن بریدر . (لوتر) ك اقامت ایتدیكى او طه الیوم - روایتیه نظراً - اسکی حالیه طور مقده در .

« شوالیه ژورژ » یالکزلقدن، عطالتدن چوق مضطرب اولدی . بتون معاصرلری کبی شیطانك اغوا آتندن قورقیور ، خوف و شبهه لری آرتیور ، بر طاقم خیالدر کوریوردی .

اندیشه واضطرابی چالیشمق ایله تسکین ایتك ایسته دی و توراتك ترجمه سنه باشلادی . اون آلتنجی عصرده آلمان حیات فکریه سی تاریخك اك مهم وقعه سی بوتورات ترجمه سیدر . توراتك آلمانجه یه نقلی یکی برشی دکلدی . ۱۴۵۲ تاریخندن بری اون آلتی مختلف ترجمه انتشار ایتمشدی . فقط بونلرك جمله سی ثقلت بخش ، مؤلم ، مظلم بر لسان ایله یازلمش ، خلقك روحنه نفوذ ایتمه مشدی . (لوتر) توراتی عوام کتابلرینك اك مکملی حاله افراغ ایتدی ، بر چوق بطنلرك حیات فکریه سنده غدا ی روح اوله بیله جك بر شکه قویدی . بو ترجمه تام زماننده میدانه کلدی . یوز الی سنه دن بری جرمانیا دوائر رسمیه سی عناصر اصلیه سی ناویرا و وسطی آلمانیا لهجه لرندن آلمش یکنسق براسلوب بیانی تعمیمه چالیشیور

و بوا سلوب ياواش يواش مؤسسات علميه نك بعضلرنجه دخی قبول ایدیلرک هر مملکتده اهلینک سویلدکلری قباوغلط لسانک فوقده بر نوع لسان مشترک حالی آلیور ایدی . (لوتر) توحید اسلوبه طوغری واقع اولان بوسعیدن ، میلدن استفاده وهنوز دوام ایدن مخالقلره غلبه ایتدی . یکی آلمانجه نك حقیقی مؤسسی (لوتر) در . (ره فورمه) بتون ایمپراطورلنی بر برینه دشمن ایکی فرقه یه آیردیغی بر صروده بولسان مخاصم فرقه لر آره سنده بر واسطه ائتلاف و تقرب اوله رق استقبالی قورتاردی . شایان دقت بر حسن طالع اثری اوله رق یوقاری آلمانیا نك ، یعنی قتولیکلکک احراز غلبه ایتدیکی ، (ره فورمه) نك تحت تأثیر ونفودینه کیرمیدیکی حوالینک لهجه لری پروتستانلنک شمالده تعمیم ایلدیکی لسانک اساسنی تشکیل ایتدی . عقائد اساسیه اختلافاتی شدت ابتدائیه سنی غالب ایتدیکی کون رومانک مخاصم وخادم لری آره لرنده قوپمش اولان رابطه یی لسان مشترک سایه سنده یکیدن تأسیس ایتکده هیچ زحمت چکمدیلر . لوتر توراتنک خارق العاده بر تأثیر ادبی اجرا ایتمش اولمنسک سبی کرک لفظ ، کرک طرز تحریر اعتباریله حقیقه عمومه مخصوص بر اثر اولمسیدر . (لوتر) دوائر رسمیه محرراتنده کی صیقندیلی اسلوبی نمونه اتخاذا یتهمش ، بلکه « اوده کی والده نك ، سوقاقده کی چوجقلرک ، پنا یرده کی تاجر لرک » سوزلرینی دیکله مش واک طوغری ، اکمزین تعیراتی اولنلرک دوداقلرندن طوللامشدی . فوق العاده بر قوت سعی واک مدق بروجدان ایله وجوده کتیردیکی بو اثره بتون ایمانی ، ملتی حقنده طویدیغی بتون عشق و محبتی قویمشدی . لوتر تورات ترجمه سنه « عمرینک اک بیوک محصولی » نظریله باقاردی . زمانمز منقلرندن برینک دیدیکی کبی بو ترجمه یالکز داهیا نه بر ترجمه دکل ، بسبتون یکی بر ابداع ایدی . ۱۵۲۱ سنه می (نوئل)

کیجہ سندنہ باشلايان ترجمہ لوترک (ویته نبرغ) . عودت ایتدیکی زمان [مارت ۱۵۲۲] ختام بولمشدی . آلمانلرک (مینہ زینگر Minnesinger) دیدکلری قرون وسطی شاعرلرینک عاشقانه منظومه لرله شهرت قازانمش اولان (وارتبورغ) شاتوسی بو ترجمه دن صکره عادتا بر محل مقدس اولدی . توراتک ایلك تمام ترجمه سی ۱۵۳۴ سنه سندنه (ویته نبرغ) ده نشر ایدلدی .

پروتستان توراتنک اک بیوک تأثیری بوندن صکره کی بطنلر اوزرنده کوردلدی . (لوتر) معاصرلری اوزرنده ایلك اوکجه وعظملری ورساله لرلی ایله اجرای تأثیر ایتدی . فقط موسیقی حسنک پک عمومی وپک درین اولدیغی بر ملتده (لوتر) ک الہیلری مذهب جدیدک تعمیننه هرشیدن زیاده مدار اولدی . (لوتر) ایستر قتولیک الہیلرندن ، دعا لرندن اقتباس ایتمش اولسون ، ایستره کندی قلبنک تأثراته ترجمان اولسون بتون الہیلرنده الہنی آریان ویا ایمانک تأمین ایلدیکی امن واعتماد ایله تسلیتیاب اولمق ایسته یکن کنه کار بشریتک آلام روحیه سنی اک ساده ومؤثر سوزلر ، اک یوکسک نغمه لر ایله پک کوزل تصویره موفق اولمشدر . کفته ویسته سی بالذات لوترک اولدیغی بیان ایدیلن مشهور: «برمتین قلعه در، اللهمز!» الہیسی نه قدر پروتستان عسکرینی پرشوق وخواہش میدان حربه سور وکله مش ونه قدر محن ومشاقی اونلره اونوتدیرمشدر !

لوتر (وارتبورغ) شاتوسندن چیقدیغی زمان آلمانیا پک قاریشیق برحاله ایدی . لوترک مذهبی بتون هیئت اجتماعیه ی اساسندن صارصمشدی . هم لوترک محاربات اجتماعیه ؛ کلیسا رمناسمزلره عامر امدوک مخصوصات دنیویہ مصری افکارینی قبول ایتمکله قتولیت کلیسایی اساساتندن آیرلمش اولمیه جقلرینه

ذاهب اولان صمیمی دیندارلر، هم ده - ینه لوترک تعبیرنجه - تجدیدات
 دینیه یی غائله عبادتدن خلاص اولق معناسنه آلان کیمسه لر مذهب
 جدید صارلمش لر ایدی . پروسیه قرالی بیوک فره دریق : « ره فورمه نك
 ترقیسی اسبابی اساسات بسیطه یه ارجاع ایدیله جك اولورسه بونك آلمانیا ده
 صرف منفعتدن عبارت اولدینی کوریلور . » دیمشدر . فی الحقیقه بالذات
 لوتر بیله منفعت سائقه مراجعت ایتشدی . پاپالق مقامیله هنوز تماماً قطع
 مناسبت ایتمه مش اولدینی بر صر ده ده ، ۱۵۲۰ آغستوسنده ، متفقلر آرامغه
 باشلامش و « آلمان ملتك خرسیتان زادكانه » عنوانی کتابخی اوزمان
 نشر ایتشدی . بو کتابده کلیسائی اصلاح وصافیت ابتدائیه سنه ارجاع
 ایتك ایچون اونی ثروت وسامانندن تجرید ، یعنی کلیسایه عائد املاکی
 ضبط ایله خصوصات دنیویه یه حصر ایتك لازم کلدیکنی سویله مشدی .
 کلیسا املاكنك یغما ایدلمسی ایچون واقع اولان بو دعوت یوقاریدن
 آشاعیه طوغری هیئت اجتماعیه نك بتون صنوفی اشتراك ایتدی . اول
 ۱۵۲۲ سنه سنده زادكانك الك فقیرلری اولان شوالیه لر قیام ایدیلر . فقیر
 و عریده جو بر صنف تشکیل ایدن شوالیه لر زنکین اولان هر کسه ،
 بورژووا ویا رهبان صنفلرینه خصومت فوق العاده بسله مکده ایدیلر .
 جمله سی ره فورمه یی تأمین احتراصه وضبط اراضیه وسیله اتخاذا ایتمش
 اولان (فرانچ دو زیقینکن Franz de Sickingen) اسمنده کی رئیس لرینه
 بکزه مکده ایدی . شوالیه لرک بعضیلری (ترو) سر یسقپوسلغنك ، بعضیلری ده
 صوابك - شیمدیکی غربی وورتمبرغ ایله باویرانك - زنکین شهرلرینه
 هجوم ایتدیلر . فقط بیوک زادكانه مغلوب اولدیلر [۱۵۲۳] .

شوالیه لر اراضی و املاک ضبطه کیتدکلری صر ده ده کوییلر دخی
 عصیان باشلامش لر ایدی . آنغاریه ، عشر ، جزای نقدی کبی آغیر ویرکولر

آئندہ ازبیلن ، ہر نوع ظلم و تعدی یہ هدف اولان کویلیلر بر چوق دفعہ عصیانہ تشبہ ایتشلر ایدی .

صوک درجہ یہ واران فقر و سفاقتلری بونلرده دھالی بر طرز معیشتہ نائلیت امیدینی تولید ایلشدی . بر دورہ عدالتک ، دنیا یوزندہ مسیح حکومتک حلول و تأسسنہ انتظار اولئیور و بو دورہ رفاه و سعادتہ نہ قرال ، نہ درہ بکی ، نہدہ راہب بولمیکہ جنی ، بتون انسانلرک مساوی و اموال و املاک مشترک اولہ جنی امیدایدیلور ایدی . بعضلری ساعت خلاصک حلول ایتدیکنہ ذاہب اولمشلردی . کویلیلرک ، عوامک کین و خصومتی الک زیادہ اون آلتنجی عصر ابتداسندن اعتباراً همان دائمی عصیانلرہ محل ظهور اولان جنوبی و غربی آلمانیاہ شدتلی ایدی . ۱۵۲۴ سنہ سی حزیرانندہ (شافوز Schaffhouse) قربندہ (استولینکن Stuhlingen) کویلیلری درہ بکلر علیہنہ قیام ایتدیلر . سبب عصیان دین ایلہ ہیچ بر مناسبتی اولمیان بر چاک قلعہ سی مسئلہ سی ایدی . عددلری یکی التحاق ایدنلرہ خلیجہ آرتان عاصیلر آوستریانک (والدسوت Waldshut) بلدہ صغیرہ سنہ کیردیلر . بورانک رد فورمہ یہ طرفدار اولان اہالیسی والی علیہنہ عصیان ایتشلر ایدی . بوندن صکرہ کویلیلرک عصیانانی افکار مفرطہ دینیہ ایلہ قاریشدی . (زوریخ) اہالیسک مداخلہ سی ، ایمپراطور طرفدن دوقہ لغی لندن آلمش اولدینی جہتلہ مالکانہ لرینی استرداد ایتک املندہ بولنان و ورتمبرغ دوقہ سی (اولریخ) ک انتریقہ لری ، حکومت مرکزیہ نک ضعفی ، ایتالیا اموریلہ مشغول اولان (فردیناند)ک عطالتی عصیانک توسعی تسہیل ایتدی . سنہ نہایتندہ بتون یوقاری (صواب Souabe) قطعہ سی عاصیلر آئندہ ایدی . عاصیلرک پروغرامی اون ایکی مادہ دہ خلاصہ ایدلمشدی : آلفاریہ نک تنقیصی ، عشرک الغاسی ،

اورمان وصولردن سربستی، انتفاع، بعض تکالیفک تنزیلی وسائرہ .
 بناءً علیہ عاصیلرک مطالبی آرہ سندہ اک مهم موقعی مسائل مادیہ طوتمقدہ
 ایدی . فقط کویلیلر رفاه حاللرینک آنجق ره فورمہ نك غلبہ سیلہ تأمین
 اولنہ بیلہ جکئی ظن ایدیورلر وبونک ایچون قانون الہیہ وانجیلک
 سربستیسنہ رعایت اولنمسنی ایستہ یورلردی . منافع مادیہ ایلہ افکار
 دینہ نك قاریشمسی دها برچوق کیمسہ لک عصات طرفنہ کچملرینہ سبب
 اولمقدہ وعصیانہ بر ماہیت دینہ اعطا ایدہ رک اہمیتنی آرتیرمقدہ ، درہ .
 بککلرہ ہر درلو اثتلافی امکان خارجنہ چیقارمقدہ ایدی . فرانقونیا ،
 آلباس ، صاقسونیا و ہسدہ دخی بوکا بکزر عصیانلر وقوعہ کلدی .
 اک تہلہ کی جہت شہرلردہ کی فقیر عملہ نك کویلیلرہ معاونت ایتلری
 ایدی . مونسترده ، (اوسنابروک Osnabrück) دہ ، مولہاوزندہ وحقی
 قتولیک قالمش اولان قولونیا ، راتیسبون و مایانس شہرلرندہ عصیانلر ،
 قاریشقلقلر وقوعہ کلدی . یواش یواش فکرلر تہیج ایدیور ؛ اشتراک
 اموال ارزولری آرتیور ایدی . کویلیلر - اوتہدہ بریدہ اجرا ایدیلن
 مظالم مستثنا اولق اوزرہ - شخصہ طوقونمورلردی . فقط بر قاچ ہفتہ
 ظرفندہ یوزلر جہ مناسترلر ، شاتولر بیقلدی وزنکین کتبخانہ لر
 تخریب اولندی .

بعض پرنسہ کویلیلرک عصیانندن استفادہ ایتک ممکن اولوب اولمديغنی
 دوشونمشلر ایدی . عاقل فرہ دریقک لوترہ محب اولديغنی خبر آلان
 عاصیلر اک زیادہ بو پرنسہ کووہ نیورلر ایدی . فقط عاقل فرہ دریق
 عصاتک موفقیتنہ صبر وتحمل ایتسہ بیلہ اونلرہ معاوتی دینسزک ایلہ
 مساوی کورمکدہ ایدی . عصیان حد غایہ سنہ واصل اولديغنی زمان وفات
 ایدی [۶ مایس ۱۵۲۵] . الحاصل ، اون طقوزنجی عصرک آلمان

سوسیالیستلرندن مشہور (لاسال Lassalle) ك ایضاح ایلدیکی وجهله بو عاصیلر مرتجع ایدیلر واسکی اصولك اعاده سنی غایه امل اتخاذ ایتیشلر ایدی . اوزمان ترقی و آتی نی تمثیل ایدنلر شکل جدید دولتی قرون وسطانك قیودندن قورتارمق ایسته یین پرنس لرایدی . بنابرین وقایعك جریان طبعیسی کویلیلرک علیهنده ایدی . بوندن بشقه شوالیه لر کبی اونلرده رئیس بوله مدیلر ؛ کویلیلرک پروغرامی دخی معین وثابت دکلدی . اونك ایچون حرکتلری ربطسز و تصادفه تابع ایدی . پرنس لر هر طرفده غلبه ایتدیلر . کویلیلرک اك بیوک قوتلری (فرانکن هاوزن Frankenhausen) قریبنده محو اولدی [۱۵۲۵] . بوراده وقوعه کلن قتال پك مدهش ایدی . آلساس عصائی ایه حرب ایدن (لورن) دوقه سی (آلتوان) Saverne قریبنده ۱۸,۰۰۰ کویلی اولدیردی . ۱۵۲۵ سنه سی حزرانی اواخرنده عصیان ختام بولمشدی .

پرنس لر بر صورت مدهشده انتقام آلدیلر . یالکز (صواب) داخلنده ۱۵۲۶ سنه سی نهایتنه قدر اون بیکی متجاوز کویلی اعدام ایلدیکی روایت اولنور . کویلیلرک کندیلرینی قورتارمق ایسته دکلری بیوندروق مقاومتسوز برقوت وثقلت ایه یکیدن بیونلرینه کچدی . هیچ برقورقولری قالمیان زادکان کویلیلردن آلدقلری ویرکولری ، اونلره تحمیل ایتدکلری آنغاریه لری آرتیردیلر ؛ اوزمانه قدر محافظه ایلدکلری امتیازاتی قالدیردیلر و - معاصریندن برینك دیدیکی کبی - آلمان کویلیلرینی حال سفالت واسارته القای ایتدیلر . اولجه شوالیه لره طرفدار اولمق ایسته مین لوتر کویلیلرک عصیانی ده مرحمتسزجه تقییح ، پرنس لرک مظالم مدهشه سنی تصویب ، غالبلرک کین وخصومتلرینی تشدید ایتدی . پرنس لرک طلبلری اوزرینه « قودورمش کوپک » نامنی وپردیکی عصانك بلا مرحمت تعقیب

و تشکیل ایدملرینی توصیه ایلدی و : « پرنسler غدار و مرتضی اولسه لر بیله تبعه نك عصيان ایتمه سی ایجاب ایدر . » دیدی .

شوالیه لرله کویلیلره ممنوع اولان شی بیوک زادکان و پرنسler ایچون مباح عد ایدلدی . صاقسونیا ، براندبورغ ، پالاتینا الکتورلری ، هس لاندغرافی ، مکلمبورغ و پومهرانیا دوقه لری و دیگر پرنسler مملکتلری داخلنده بولان کلیسا مالکانه لرینه وضع ید ایتدیلر . بو معامله نك اك مشهور واک مهمی آلمانیا خارجنده بر آلمان ، هوهنزولرن خاندانه منسوب (آلبردو براندبورغ) طرفندن اجرا ایدلدی . نوتون طریقت روحانیه سنك استاد اعظمی اولان آلبر طریقت مذکور نك بتون مالکانه لرینی ضبط ایدرک اولادینه انتقال ایتک شرطیه پروسیه دوقه لغنی تشکیل ایتدی ، که بو دوقه لق بالاآ خره پروسیه قرالینی اولمشدر [نيسان ۱۵۲۵] .

بو بحران شدید ائساننده برنجی فرانسوا آئوغبورغ اعتقادنامه سی ایله حرب ایتمکه اولان شارل کن لوتر مذهب نك انتشارینی منعه وقت بوله مامشدی . فقط (قامبره) معاهده سنه منجر اولان مذاکرات صلحیه باشلار باشلاماز ایمپراطور (اسپیره) شهرنده دیت مجلسنی طویلا دی . بو مجلسده مذهب جدیدک زهرلرده انتشار ایتش ایسه اورالرده مظهر مساعده اولمسنه ، فقط بشقه یرلرده یکیدن انتشارینه میدان ویرلمه سنه قرار ویرلدی [۱۵۲۹] .

بش پرنس واون درت شهر بو قراری پروتستو ایتدکلرندن بوندن صکره قتولیک کلیساسندن آیرلمش اولان مذاهب جدیده اربانه « پروتستان » نامنی ویردیلر .

شارل کن اساسه تعلق ایدن شیلرک هیچ برینی ترک ایتمه مکه عزم

ایلمس اولمقلہ برابر ابراز شدت ایتمک دخی ایستہ میور ویا هیچ اولماز سہ بردفعہ دہا قتولیکرلہ پروتستانلر آره سندہ ائتلاف حصولنہ چالیشمق آرزو سندہ بولنیوردی . ائتلاف چارہ لرینی آرامغہ مأمور اولان دیت مجلسی آئوغسبورغده اجتماع ایتدی [حزیران - تشرین اول ۱۵۳۰] . بو تشبندن بر موفقیت حاصل اولمدی . فقط غایت مهم ایکی نتیجہ حصولہ کلدی .

اولا ، دیتده جریان ایدہ جک مذاکراتہ اساس اولمق اوزره نوتر طرفدارلری مذهب لرینی صورت قطعیدہ تعیین وتعریفہ مجبور اولدیلر . لوتر کندی مذهبک اعتقادنامہ سنی تحریر وتنظیم ایتمک وظیفہ سنی تلیڈلرینک اک معتدلی وائتلافہ شدتہ طرفدار اولان (ملانختون) تودیع ایتدی . یکریمی سکز مادہ دن مرکب اولان بو اعتقادنامہ پروتستان کلیسائی عقائدینک رکنی مثابہ سندہ در .

دیکر طرفدن آئوغسبورغ دیت مجلسی اولجہ اسماعالده اتفاق (وورمس) دیت مجلسی طرفدن لوترایله مذهبی و طرفدارلری علیہ نہ ویرلمش اولان مقرراتی تأیید ایتدی . امپراطور (وورمس) دیت مجلسی مقرراتنک تمامی تطبیق ایچون بر فرمان تسطیر ایلدی . هریرده پسقپوسلرک حق قضالری اعادہ اولنہ جق ، ضبط ومصادره ایدیلن کلیسامالکانه لر اسکی صاحب لرینہ ویریلہ جک ایدی . بو پروتستانلر علیہ نہ اعلان حرب دیمکدی . پروتستانلر کنڈیلرینی مدافعہ ایچون بر فرقہ سیاسیہ حائده برلشمک مجبوریتنی حس ایتدیلر .

صاقسونیا الکتوری ایلہ ہس لاندغرافنک تکلیفی اوزرینہ (اسماعالده) ده براتفاق عقد ایدلدی [کانون اول ۱۵۳۰ - کانون اول ۱۵۳۱] . بو اتفاقہ آلمانینک بر چوق شہرلری پیدرپی داخل اولدیلر . آلمانینک تشکیلات

سیاسیه سی اقتضاسنج، بو اتفاق پک مهم ایدی. چونکه شارل کسک آمال حریصانه سندن قورقان حکمدارلرک جمله سی - هانکی مذهبه اولورلرسه اولسونلر - هیئت اتفاقیه نك متفق طبعیلری ایدیلر. پروتستانلر خارجدن دخی مظهر معاونت اوله بیلرلردی.

فی الحقیقه اسمالقالده اتفاقک عقدینی متعاقب باویرانک (ویتلسباخ) خاندانی - متعصب قتولیک اولقله برابر - هابسبورغلر علیهنده بولمق ایچون هیئت متفقیه دخولی طلب ایتدیکی کبی ۱۵۳۲ سنه سی ایلك بهارنده صاقسونیا، هس، باویرا و فرانسه آره سنده بر اتفاق عقد ایدلدی. شو صورتله هم آلمانیا، همده اوروپا ایکی فرقه یه آیرلمش اولدی، که ره فورمه نك نتایج عظیمه سیاسیه سندن بری بودر.

آئوغسبورغ دیت مجلسنک ایکنجی نتیجه سی
 اسمالقالده هیئت متفقیه سنک تشککندن اون
 آتی سنه صکره بر محاربه دینه و داخله

شارل کن ایلد پروتستانلر
 آره سنده محاربات

ظهور ایتسیدر. شارل کن برنجی فرانسوا و سلطان سلیمان ایله یکیدن محارباته باشلامسی اوزرینه [۱۵۳۶ و ۱۵۳۸] آئوغسبورغ دیتی مقرراتنک موقع تطبیقه وضعی تأخیره مجبور اولمشدی. بوره نبرغه عقد ایدیلن مصالحه ایله پروتستان پرنسیرک یکی بر مجلس روحانی و یا هیچ اولمازسه کله جک دیت مجلسنک انعقادینه قدر راحتسز ایدلمه ملرینه و مسائل دینه دن طولانی اقامه ایدلمش اولان دعوالرک تأخیر اولنمسنه قرار ویرلدی. [۱۵۳۲]. بو مصالحه پروتستانلق ایچون بر موفقیت عظیمه ایدی ایلك دفعه اوله رق ایمپراطور قتولیک مذهبندن آریلانلرله عقد مقاوله ایدیوردی.

اخذنار فکرندن واز کچمین، بلکه خارجی دشمنلرینی ازمک ایچون

لازم اولان وقتی مساعدات مهمہ مقابلندہ صاتون آلان شارل کن رہ فورمہ بی تولیدیدن احتیاجات مشروعه بی تطمین واک زیادہ باعث رزالت سوء استعمالاتک رفعی پاپالق مقامہ قبول ایتدیرہ رک روما کلیسائی حاکمیتی یکیدن تأسیس ایله مدجکہ بحران دینی ازالہ یہ موفق اولہ میہ جغنی آکلامشدی . فقط ایمپراطورک پروتستانلری قتولیک کلیساسنہ جلب ایتمک ایچون تصور ایتدیکی اصلاحات پاپارک ثروت و سامانی تنقیص وادارہ مطلقہ سنی تحدید ایدہ جسکی جہتلہ پاپالق مقامجہ شایان قبول دکلدی . پاپا رہ فورمہ دن زیادہ شارل کنک طلب ایتدیکی مجلس روحانیک اجتماعدن قورقوردی . اصلاحات مذکورہ بی آنجق بویله بر مجلس روحانی قرارلشدیرہ رق موقع اجرایہ قویہ بیلیردی . بناءً علیہ پاپالر منافع جسمانہ لرینہ مغایر کوردکلری ایمپراطورک سیاستہ هر واسطہ ایله مانع اولمغہ چالیشدیلر و بو صورتلہ پروتستانلغک طولایسیلہ ، فقط غایت مؤثر متفقلری اولدیلر .

شارل کن بو تصورات ایله مشغول ایکن پروتستانلق کیتدککہ ایلریلہ مکدہ ایدی . آلمانیدان بشقہ انکلترة ، اسوج ، دانیمارقه ، لهستان و بوهمیادہ مذهب جدید انتشار ایتدکدہ ایدی . اسمالقالدہ اتفاقی وورتمبرغ ، پومہ رانیا و آنہالتدن بشقہ برقاج شہرک التحاقیلہ قوتلنمشدی . (قرہ بی) مصالحہ سنک عقدینی متعاقب شارل کن عزم و متانتلہ حرکتہ قرار ویردی و آلمانیاہ بر اسپانیول اردوسی جلب ایتدی .

شیمدی یہ قدر پروتستانلغی تہدید ایتمش اولان فورطنہ لریک الہ مدھشی ظهور ایدہ جسکی صرہ دہ متمادی و فوق العادہ بر سعی ایله وجودینی بیپراتان ، بر چوق سندن بری مٹانہ سندہ کی طاشدن مضطرب اولان لوتر وفات ایتدی [شباط ۱۵۴۶] . بشریت اوزرینہ لوتر قدر قطعی بر تأثیر

اجرا ایتمش پک آز آدم واردر . تاریخک اک مشهور آقتورلرندن پک آزی اونکله مقایسه ایدیه بیلیر .

ره فورمه ایچون ماتم کونلری حلول ایتشدی . شارل کن پروتستانلره بربرر آنسزین هجوم ایتمکی واولاهس ایله صاقسونیایی ازمکی دوشونیوزدی . هس و صاقسونیا یالکز باشلرینه قانجه ، هیچ شه سز ، مغلوب اوله جقلردی . آلمانیاک قسم متبایسی ایسه مقاومتیه بیله تشبث ایتمدن تحت اطاعته آلنه جق ایدی . ایمراطور حربیه برزنک سیاسی ویرمک ایسته یور ؛ قتولیک دیتندن آیرلش اولانلره قارشی دکل ، عاصیلره قارشی حرب ایدیور کبی کورونیوردی . حقیقت حالده ایسه - بالاخره اوتوز سنه محاربه سنده اولدینی کبی - دین وپولیتیکه بربرلینه صیق صیقیه مربوط ایدیلر . هابسبورغلر پروتستانلره غلبه ایدرلرسه پرنسیرک استقلاللرینی قالدیره جقلر ، ایمراطورلغک شکلنی دیکشدره جکلر ، آلمانیایی جهانشمول پر دولتک صاعلام اساسی یاپه جقلردی .

لوتر طرفدارلری شایر مشلردی . پالاتینا الکتوری ایسته میه ایسته میه پروتستانلره جزئی مقدار عسکر ویردی . براندبورغ الکتوری (ماغده-بورغ) (هالبرشتات Halberstadt) پسقپوسلقلرینی ضبط ایتمک ایچون شارل کن طرفته کچدی . ایمراطور اموال و املاکنک مصادره وکندیسنک اعدام اولنه جغنی اعلان ایتدیکی صاقسونیا الکتوری (ژان فره دریق)ک یکنی (موریس) . الکتورلکی وعد ایتدی . موریس هممذهبلری علیهنده حرب ایتمک ایچون عسکرلرینی شارل کنه کوتورمکده اصلا تردد ایتدی .

مع مافیه موفقیتک نه طرفده قاله جغنی بر مدت آکلاشیه مدی . خلق پرنسلردن زیاده خواهش وغیرت کوسترمکده ایدی . ایلک کونلرک شوق

وسروری تکرار اویانمشدی. نشر ایدیلن رساله‌لر، بیاننامه‌لر ملتی مدافعه حریت وایمانه دعوت ایلمکده ایدی. شارل کنک قدرت و قوتی حقیقی ایدی؛ فقط متین دکلدی. بر موفقیتسزلك متفقلرندن چوغنك آیرلمسنة واوروپادولتلی آرمسنة یکی بر اتفاق عقدینه سبب اوله بیلیردی. صاقسونیا الکتورینک عطالتی، پروتستان رؤسانک عدم اهلیتلی شارل کنه اگال تدارکات ایچون وقت بر اقدی واونک مظفریتنی تأمین ایتدی. صاقسونیا و هس اردولری شارل کنک اسپانیول وایتالیان عسکرینه مغلوب اولدیلر. بو مغلوبیت اوزرینه جنوبی آلمانیا شهرلری جرأتلرینی غائب ایتدیلر. بورژووا صنغی معتبرانک بر قسمی قتولیک قالمشردی. اسپانیا، ایتالیا و هندستان ایله مناسبات تجاریه‌نک انقطاعی بونلری عظیم ضررلرله دوچار ایتشدی. ایمپراطورک داینلری اولان بیوک بانکر عائله‌لرینک تشویقیله بر چوق شهرلر عرض اطاعت و جزا مقامنده کلیتی مبلغ تأدیة ایتدیلر. وورتمبرغ دوقسمی و پالاتینا الکتوری ایمپراطورک شرائطنی قبوله مجبور اولدیلر. ۱۵۴۷ سنه‌سند بتون جنوبی و غربی آلمانیا ایمپراطورک ایاغنه دوشمشدی.

(ژان فره‌دریق) مقاومت چالیشدی. فقط ایمپراطورک عدداً فائق اردوسنه (مولبرغ) موقعنده مغلوب اولدی [نيسان ۱۵۴۷]؛ مجروحاً اسیر دوشدی. هس لاند غرافی (فیلیپ) بلاقید و شرط تسلیم اولدی. بوندن صکره شمالی آلمانیا شهرلری دخی عرض اطاعت ایتدیلر. شارل کن مغلوب برنسلر حقنده ظلم و شدت کوستردی. آلمانیا ده قتولیک دینک غلبه‌سندن امین ایدی. پروتستانلر علمنده تداییر تضییقه اجرا سنه باشلادی. لکن (موریس دو صاقس) ایمپراطوردن آلدینی الکتورلکک کندیسنه یک بهالی یه مال اولدیغنی آکلامشدی. قتولیک آیین روحانیلرنده

حاضر بولمقدن چکینمور، فقط قتولیک دینک اعاده قوتی شدته التزام ایدرک یکی تبعه سنک خصوصتی آرتیرمق ایسته میوردی . ایمپراطوره امنیت ایدمور، اونی وعدلرینی انجاز ایتمه مکه اتمام ایلور، قاین پدری (فیلیپ دو هس) ک محبوسیتی تمادی ایلسنه حدتانیوردی . دیگر طرفدن (ژان فره دریق) ک الکتورالکی استرداد ایلسنی انتاج ایدم جک براختالادن قورقیوردی . بونک ایچون لو تر مذهبنه عودت ایلیمه جک اولورسه پروتستانلرله باریشه جفنی و امید موفقیتک آرته جفنی دوشوندی؛ ایمپراطور علمنه دوندی . پروتستان هیئت متفقه سی یکیدن تشکل ایتدی . بوهیئت متفقه (فریدوالد) معاهده سنی عقد ایدم رک فرانسه قرالی ایکنجی هانری ایله اتفاق ایتدکن صکره محاربه یه باشلادی . ایکنجی هانری (میچ) شهرینی اشغال ایتدیکی ورن نهرینه قدر ایلرلیدیکی صمرده ایمپراطور (اینسبروک) ده خسته ، عاقل ، اردودن محروم برحاله بولئیوردی . (موریس) آز قالسون شارل کنی شهر مذکورده اسیر ایدم جک ایدی . ایمپراطور کمال مشکلات ایله طاغیر آرمسندن قاچوب قورتیله بیلدی [مایس ۱۵۵۲] .

پروتستانلر حرباً پک بیوک موفقیات استحصال ایتمه مش اولمقله برابر فرانسه قرالی علمینده کی محاربه سنده سربست قالمق ایسته ین ایمپراطور آلمانیا ده مساعد طاورامق لزومنی حس ایتشدی . (پاساو) ده طرفین آرمسند مذاکرات باشلادی . شارل کن پروتستانلرله بر مصالحه قطعیه عقد ایتمه رک بتون مسائل سیاسی و دینی نه ک تسویه سی خصوصنک کله جک دیت مجلسی اجتماعنه تأخیر اولمسنی طلب ایتدی و مذهب جدید سالک لرینه - موقتاً - سربستی آیین حقنی ویردی .

آئوگسبورغ

مصلحتی

اوپ سنہ صکرہ - مچ پیشکاهندہ کی مغلوبیتندن

مایوس اولان و سعی متمادیسی حسیلہ یورغون

دوشن - شارل کن ترک سلطنتہ قرار ویردیکی جہتلہ

آلمانیادہ کی بحران دینیہ خاتمہ چکمک ایستہ دی .

آئوگسبورغده اجتماع ایدن دیت مجلسندہ [آگستوس ۱۵۵۵]

پروتستان پرنسلرہ حریت آیین حق بخش ایدلی . بوندن بشقہ ۱۵۵۲

تاریخندن اول ضبط ایدلمش اولان کلیسا مالکانہ لرنده پرنسلرک حق

تصرفی تصدیق اولندی . بوکا مقابل *réserve ecclésiastique* دنیان

بر مادہ ایلہ آتیا لوتر مذہبی قبول ایدہ جک صفت روحانیہ یی حائر

پرنسلرک مأموریت روحانیہ لرینہ مربوط اولان بالجلہ املاک و اموالی ترک

ایلمری قرار لاشدیرلدی .

بو کی موادی حاوی اولان آئوگسبورغ مصلحتی آنجق بر

متارکدن عبارت اولہ بیلیردی . بو مصلحہ - اکثریا بیان ایدلیکی کی -

حریت دینہ اساسی اصلا قبول ایتہ مشدی . قالوینستلر کی لوتر مذہبندن

بشقہ بر مذہبہ مالک اولانلر مصلحہ نامہ دہ اصلا موضوع بحث اولمدقندن

بشقہ حکمدارلرینک مذہبی قبول ایتین تبعہ یی هجرت ایتمکدن بشقہ بر

حق ویرلیوردی . دیمک کہ ویریلن حریت یالکز پرنسلرہ عائدی .

تبعہ حریت وجداندن محروم بر اقلیم مشدی . بو نقطہ دہ پروتستانلرلہ

قتولیکلر همفکر ایدیلر . واقعا (لوتر) پاپالوق مقامنک حاکمیتی رد وانکار

ایدلیکی زمان بدایہ هرکسک وجدانہ کورہ انجیلی تفہیم ایتک حقہ

مالکیتی قبول واعلان ایتمش ایدیسہ دہ بوفکرندن پک چابوق وازچشمش

و ۱۵۲۴ سنہ سندہ : « اکر یداقدار مزده بولنورسہ بر حکومت داخلندہ

مختلف مذہبلرک بولمنسہ مساعدہ ایتہ ملی یز وپک چوق قنالقلرک اوکنی

آلمق ایچون دینه اینانیمانلری بيله معبد کیتمه وولوکه ظاهرأ اولسون ایجابات دینه یه تبعیه مجبور ایلملی یز. « دیمشدی. بوقاعده اساسیه استناداً آئوغبورغ دیتی تبعه لرینه کندی مذهبلرینی قبول ایتدیرمک پرنس لرك حق ووظیفه سی اولدیغنه قرار ویردی. «تبعه حکمدارک مذهبی قبوله مجبوردر» دستوری عمومیتله قبول ایدلدی. بو دستورک حرفیاً تطبیقی - پالاتینا الکتورلری ۱۵۵۹ دن ۱۵۸۳ تاریخنه قدر یکریمی بش سنه ظیفده تبعه لرینی اوچ دفعه تبدیل مذهبه مجبور ایتمشلردر - آتیاً بالطبع اختلافاتی موجب اوله جقدی.

آئوغبورغ مصالحه سیله پاپاق مقامی ده بیوک بره زیتمه دوچار اولدی. آلمانیا نك نصفی روما کلیسای حاکمیتدن قورتولمش، ایمراطور لنگ و حدتی بوزولمش، آلمان حکومتلری پروتستان و قتولیکر نامیله ایکی قسمة آیرلمشدی. پروتستانلر یواش یواش توسیع نفوذ ایده جکلرینی امید ایدیورلردی. حتی بوا میده بناء درکه بر قتولیک پرنسک تبعه سی پروتستانلی قبول ایدرلر سه مذهب جدیدلرینی محافظه ده حر اولملرینی تکلیف ایتشلر و صفت روحانیه یی حائز قتولیک پرنس لرك ره فورمه یی قبول ایده بیلملری حقنی طلب ایتشلردی. فقط رقیبدرینک مخالفت شدید لری قارشیسنده برنجی تکلیفک یالکز بر بیاننامه ایمراطوری ایله تصدیق و اعلاتی قبوله مجبور اولدیلر. قتولیکر بالطبع بونی قبول ایتدیلر. پروتستانلر مصالحه نامه یه réservat ecclesiastique دینلن ماده نك درجنه مانع اوله مدیلر. فقط کلیسا مالکانه لرینک ضیطی کی برکارلی ایشه مانع اولان بو ماده ایله مقید اوله میه جقلرینی بیان ایدرک اعتراض ایتدیلر. بناء علیه معاهده ایکی مهم نقطه یی حاوی دیمکدی. بوندن تولد ایده جک اختلافاتک یکی بر مصادمه یی انتاج ایتسی پک محتملدی. فی الحقیقه او توز

سنہ محاربہ سنک تخمی آٹوغبورغ مصالحہ نامہ سندہ در. یالکز بوم مصالحہ
حربی یاریم عصر دن فضلہ بر زمان تأخیر ایدہ بیلدی .

مصلحہ نامہ نک ایمپراطورلق تشکیلاتنہ متعلق مواد سائرہ سی ایمپراطورک
حقوق و صلاحیتی تحدید ایتمکده ایدی. شارل کنک جهانشمول بردولت
تأسیسی و آلمانیاہ ایمپراطورلغک ترصین و تقویہ سی خصوصندہ کی تشبثاتی
نہایت پرنسلرک توسیع استقلاللری نتیجہ سنی حاصل ایتشدی. هابسبورغلرک
حکومتی آلمانیاہ حاکم دکلدی. عصر لرحہ زماندن بری آلمان تاریخنک
اساسنی تشکیل ایدن اولیغارشی بحران دینی ایله کسب قوت ایتشدی .
بتون حادثاتدن پرنسلر مستفید اولمشلردی . ملت هر کون دها زیاده
آغیرلاشان پرنسلرک حاکمیتی موقع مناقشہ قویہ بیله جک درجہ دہ قوتہ
مالک اولمدقن بشقہ حتی بویله رفیکرہ میال بیله دکلدی . دیت مجلسلرنده
حائز اعتبار اولیان و منافع تجاریہ لری پک زیاده مختل اولان شهرلر نفوذ
سیاسیلرینی غائب ایتدکدن ماعدا اوزمانہ قدر محافظہ ایدہ بیلدکری نفوذ
معنوی و فکری یی دہ الدن قاجیر مشلر ایدی . آوستریا هابسبورغلری
خاندانلرینک منافعنی محافظہ اندیشہ سندہ و کوندن کونہ ترقی ایدن مذهب
جدیدک تہدید ایتندہ بولندقلری ایچون آرتق آلمانیاہ آنجق لفظی
بر حاکمیت ایله اکتفا ایدیورلردی . غصب ایلدکاری کلیسا مالکانہ لریله
زنکینلہشن و تبعہ لرینک ماللری کی وجدانلرینہ دخی حاکم اولان پرنسلر
عادتا رقیب سر قالمشلر ایدی. اوکلرنده آچیق و سربست بر میدان کوردکری
ایچون حکومت مسئلہ سندہ کی غایہ خیالارینی ساحہ حقیقتہ ایصال ایدہ بیلرلر
وہر نقطہ نظر دن تمامیلہ مستقل یکی دولتر تأسیس ایلہ بیلرلر ایدی .

پرنسلر یالکز کندی کوچک حکومتلرینی دوشوندکلرندن نظرلری
پک طار براق ایله محدود ایدی. جرمان و طننک منافع عمومیہ سنی اکثریتلہ

کندی حرص وطمع لرینه، خود بینلک لرینه فدا ایتدیلر. اولیغارشینک غلبه سی ۱۸نجی عصر اواسطنه قدر دوام ایدن آنارشی یی و خارجاً انحطاطی استاج ایتدی. آلمانیا اجنبی نفوذ لری آلتنده قالدی. اوروپا هکمه مونیاسنی ادعا ایدن قومشو قراللرک حرب میدانی اولدی. اخلاق بوزولدی، فکر لر طارلاشدی، اون بشنجی واون آلتنجی عصر لرده پک فعال اولان ترقیات فکریه توقف ایتدی. ادبیات و صنایع نفیسه ماهیت خصوصیه سنی غائب ایدره رک لاتین صنایع نفیسه سی ایله ادبیاتنک سونوک بر تقلیدندن عبارت قالدی. اکثریتله ره فورمه یه عطف ایدیلن بو انحطاط حقیقت حالده اونندن چوق زمان اول باشلامشدی و اسباب مختلفه دن ایلری کلیوردی. پروتستانلرک پرنس لرک غلبه سنی تسهیل ایتک صورتیه بو انحطاطی تسریع ایلدیکی طوغری اولسه بيله آلمان ملتینک تأسسی ایچون ایمپراطورلرک انفساخیده الزم اولدیغنی ده اونو تماملیدر. پرنس لرک کوچک حکومتلری یواش یواش آلمان ملتینی تأسیس و تشکیل ایدن برر مرکز اولدیلر. ترقیات ملیه یه ده پک چوق زمان مقاومت ایدن عنعنات قدیمه یه، قرون وسطادن قالمه مقدس جرمان ایمپراطورلغنه مهلک بر ضربه ایندیرمش اولمسندن طولانی لوتری اتهام ایتک غریب اولور.

ساحه سیاسیاتده اولدیغی کبی معنویات ساحه سنده دخی بحران دینینک نتایج مسعوده سی پک آغیر بر صورتده تظاهر ایتدی. پروتستان مملکتلری اون آلتنجی عصر اواخرنده قتولیک مؤلفرک هجوملرینی حقلی کوستره جک بر حال اسف اشمالده بولنمقده ایدی. پک درین بحرانلردن صکره دائماً کورلدیکی اوزره بو دفعه ده پروتستانلر هنوز امور دینی ده قاریشیق لقدن قورتیه مامش لردی. لکن بو قاریشیق لقلر بر ایلک بهار صبا حنده کونشی اورتن و براز صکره طاغیلان خفیف بلوط لر کبی ایدی. لوتر یالکز

قومی بر اجنبی کلیسانک تحت حاکمیتدن قورتارماش، بلکه خریستانلغی بر طاقم اشکال ماده دن، معاسز آیین و مراسمدن قورتارده رق ملتته حقوق وجدانی، معنای حیاتی تعلیم ایتشدی. بوندن صکره یتیشن بظنر لوترک اثرندن تحریر حقیقی، حس مسئولیتی، وظیفه دینی بی او کندیلر. (لایبنیچ Leibnitz) دن (شیلر Schiller)، (کانت Kant) دن (گوته Goethe) یه قدر یکی آلمانیاک بیوک مؤسسری اوزرنده لوترک تأثیر عظیمی کوردی. بویکی آلمانیا لوترک اکدیکی تخمک محصولی کیدر.

لوتر مذهبی آلمانیا حدودینی پک چابوق کچدی
 اسقاندیناریا حکومتلرنده
 واون بش سنه دن آزر زمانده اسقاندیناویا
 ره فورمه حکومتلرنده، دایمارقه، اسوج ونوروجده
 انتشار ایتدی. ره فورمه نیک ممالک مذکورده بودرجه سرعتله تعمیمی هان
 صرف اسباب سیاسیهدن ایلری کلشدر.

اون دردنجی عصر اواخرندن بری عقد اولنان (قلمار) اتحاد
 معاهده نامه سی [۱۳۹۷] موجبنجه اسوج ونوروج فعلاً دایمارقه یه
 تابع ایدیلر. اسوج زادکانی غائب ایتدکری استقلالیه ده ایتک
 ایسته یورلردی. دایمارقه قرالی ایکسجی قریستان [۱۵۱۳ - ۱۵۳۳]
 برچوق محاربات شیدیه دن صکره اسوجلیلری تحت اطاعت آله بیلیمشدی.
 بو محاربات ائناسنده او قدر چوق آدم تلف ایتشدر، که «شمال نرونی»
 لقبه استحقاق قازانمشدر. یالکز بردفعه ده ۹۴ کشی بی اعدام ایتدیرمشدی.
 ۱۵۲۲ ده اسوج زادکانندن کوستاو وازا [۱۴۹۶ - ۱۵۶۰] وسطی
 اسوجده ساکن معدنجیلری وکویلیری عصیان ایتدیردی و براز صکره
 اسوج تحته جلوس ایتدی [۱۵۲۳].

اسوجك دانيمارقه دن آيرلسنى انتاج ايدن محاربات مملكتى فقر وسفالتنه دوچار ايتمشدى . كوستاو حكومتك ايلك سنه نرنده پك چوق پاره مه محتاج ايدى . حال بوكه شاتولر ، قلعه لر خراب اولمش ، واردات دولت آزالمش ، كمر كردن حاصلات آلمانغه باشلامش ، باقير وكوش معدنلرى انحطاطه دوچار اولمش ، شهرلرده كى صنايع عادتاً محو اولمشدى . مصارف دولت وارداتك اوچ مثلندن فضله سنه بالغ اولمقده ايدى . (استقھولم) ده بيله خانه لرك نصفى بوم بوش ايدى . عصر ك بدايته نسبتله نفوس درت مثلى آزالمشدى .

اسوجك كندىنى طوپلايه بيلمسى ايچون بر قوتلى قراله احتياجي واردى . حال بوكه (كوستاو) بيوك بر نفوذ صاحبي دكلدى . استقلال ملي استحصا ايتمش اولان كويلرلر نه ويركو ، نه ده حكومت مركزيه دن بحث ايدلمسى بيله اينسته ميورلر ايدى . كوستاوى تخته اجلاس ايتمش اولان زادكان محاربات داخليله وخارجيه نك ايجاب ايدى كى مالى فداكارلقلره قاتلامقن چكينيورلر ايدى . شو حالده كوستاو اجراى حكومت ايچون لازم اولان پاره يى نروده بوله جق ايدى ؟

هر كس فقير وسفيل اولدينى حالده يالكز هيئت رهبان زنكين ايدى . روايته نظراً اسوج طوپراغك ثنائى كليسانك مالكانه سى ايدى . بودرجه زنكين اولان هيئت رهبان دانيمارقه ليلر ك اسوجدن طرد و اخراجلرينى انتاج ايدن قيام مليه يابستون لاقيد قالمش ، ياخود مخالف بولمش ايدى . دانيمارقه ليلر ك طرد و اخراجدن صكره بعض بيوك رهبان دانيمارقه طرفى التزام ايتك كى بر بيوك تدبير سزلكده بولنديلر . ۱۵۲۴ ده (اوپسال) سرپسقبوسى ايله ديكر بر شهر ك پسقبوسى حكومت عليهنده كى حركتلرندن طولايى بالمحا كه اعدام ايدلديلر . اسوج كليساسى اركانك

الک بیوکلرینی بو درجه شدتله تأدیب ایدن کوستاو وازا - لوترک مذهبی ظهور ایتزدن پک چوق زمان اول اسوجده تصور ایدیلن بر تدبیره تبعاً - کلیسا مالکانه لرینی ضبطه پک میال ایدی .

لوتر مذهبی ۱۵۱۸ تاریخنده اسوجه کیرمشدی . (ویتہ نبرغ) ده تحصیل ایتمش اولان اسوج راهب لرندن (اولائوس ولورانتیوس پتری Olaüs et Laurentius Petri) اسمنده ایکی برادر سنه مذکورہ طرفده استقہولمده مذهب جدیدی نشره باشلامشلردی . ۱۵۲۳ تاریخنده بوایکی راهب موعظه لرله اوقدر بیوک موفقیت استحصال ایتشلرایدی ، که قتولیک هیئت رهبانی انکیزسیونک یکیدن تأسیسنی یکی قرالدن طلب ایتدی . فقط کوستاو بوکا موافقت ایتدکن ماعدا ایکی راهبدن برینی استقہولمده حاکم ، دیکرینی اوپسالده معلم تعیین ایلدی . معافیہ مذهب جدید ناشرلرینه کوستردیکی بوحمایہ کلیساری یغنا ایتک ایستہین استقہولم اہالیسنی شدتله تأدیب ایلمسنه مانع اولمادی .

(اولائوس پتری) ۱۵۲۳ ده تأهل ایتمشدی . پک چوق رهبان اونک کبی حرکت ایتدیلر . مناستر راهب وراہبہ لری مناسترلرینی ترکہ باشلادیلر . ۱۵۲۶ ده قرال مناستردن قاجانلرک جملہ سنی حمایہ سی آلتنه آلدی . شہرلر مذهب جدیدہ پک متایل ایدیلر . استقہولم ارکان حکومتی آیین دینیلرہ لاتینجه نک استعمالنی منع ایتشلردی . فقط کویلیرلریکی مذهبہ بودرجه مساعد دکلدیلر . قرال کویلیرلرک حسیات دینہ لرینی رنجیدہ ایتک ایستہمدی . طوغریدن طوغریہ کلیسایہ هجوم ایتزدن اول غیر ممنونلرہ خوش کورونمک ایستہدی ؛ اہالیہ خطاباً نشرایلدیکی بر بیاننامہ ده دیوردی کہ : « بعض راہبہلر دینک قواعد اساسیہ سنہ مخالف حرکتده بولنملرینہ مانع اولدیغمز ایچون بزی سوء نیت ایله اہام

ایدیورلر . کندیلرینه بورجی اولانلره مراسم ضروریه دینه یی ایفادن امتناع ایدیورلر ؛ کلیسا قانونی موجبجه بر فقیر بازار کونی بر قوش طوتار ویا بالی صید ایدرسه سبته حرمت ایتمه مکه اتهام اولنه رق پسقپوسه ویا کوی پاپاسنه بر جزای نقدی تأدیه سنه مجبور ایکن راهبر بوقانونه رعایت ایتمورلر .. هیئت رهبانك قرالغه عائد املا کدن زیاده مالکانه سی واردر وقرالك بعض ویرکولرده کی حصه سنی راهبر آلیورلر .

۱۶۲۷ سنه سنده (وهسته راس Vesteras) شهرته اجتماع ایدن دیت مجلسنده ویته نبرغ دارالفنوننده تحصیل ایتیش اولان شانسلیه (لورانتیوس آندره) بر اوزون نطق ایراد ایدرک مضایقه مالیه دن ، تبعه نك غوائل مالیه یی ازاله ایچون فداکارلق اختیارینه میال اولمامسندن ، بالخاصه مملکتک بتون منابع ثروتنه مالک اولدیغی حالده هیچ بر شی ویرمک ایسته مین وعصیان چیقارمقدن بیله قورقیان هیئت رهبانك مخالفتدن شکایت ایتدی . بو مخالفتلری ازاله ایتمک ، هرکسک آرتق ییقوب اوصاندیغی سوء استعمالاتی میداندن قالدیرمق ، قرالك احتیاجات مملکته صرف ایتمک اوزره دولته هیچ بر فائده تأمین ایتین منابع ثروتدن استفاده سنی تأمین ایتلک لازم کلدیکنی سویلدی .

بونطق دیت مجلسنجه اولدجه باردانه تلقی ایدلدی . سناتونك الكقدملی اعضای اکر سوء استعمالات وار ایسه کلیسانك تشکیلات اساسیه سنه ، آیین و مراسم دینه یه طوقونمده دن بو سوء استعمالاتی اصلاح ایتمک لازم کلدیکنی وقراله قارشی وظائفك پاییه قارشی وظائفی اونوتدیرمامسی ایجاب ایتدیکنی جواباً بیان ایتدی . صنوف مختلفه اکثریتك فکرینه ترجان اولان بو جواب قرالی مشکل بر موقعده براقدی . کوستاونه رد ایدیلن تکلیفنده اصرار ، نهده هم صنف رهبان ، همده صنوف سائر علمهنده

برضربہ حکومتہ جرأت ایلہ بیلیرایدی . ترک سلطنت ایتمش کبی طاوراندی .
 قرالک بو قرارندن متحیر قالان مجلس درت کون مذاکرہ ایتدی ،
 هیچ بر قرار قطعی اتخاذا ایدہمدی . بورژووالر قرال طرفندہ ایدیلر .
 زادکان کلیسا مالکانہ لرندن حصہ داراومنی امید ایدیورلر ، فقط ترددندن
 قورتیلہ میورلر ایدی . پسقوسلر ایسہ هیچ کیمسہ یہ سوز دیکلہ تہ میورلر
 ایدی . نہایت ، اکثریت قرالندن ترک سلطنت ایتہمسنی رجایہ قرار
 ویردی . کندیسنہ بر خیلی رجارلر ایدلدکن وبتون تسکلیفلرینک مجلسجہ
 قبول ایدیلہ جکنہ قانع اولدقندن صکرہ قراللقدہ قالمغہ راضی اولدی .

برقاج کون صکرہ مجلس قرالک ہیئت رہبانہ عائد املاک و اراضی یہ ،
 مناسترلرہ وضع یدایلمکہ و زادکانک اولجہ اجدادلری اندہ بولندیغی حالہ بالآخرہ
 ہیئت رہبانہ کچمش اولان مالکانہ لری استرداد ایتکہ صلاحیتدار اولدقلرینہ
 قرار ویردی . بوصورتلہ کلیسا مالکانہ لری قرال ایلہ زادکان طرفندن
 ضبط ایدلدی و مذهب جدیدک تشکیلات روحانیہ سی یواش یواش موقع
 تطبیقہ قوندی .

اسوجلیلرک عصیان واستقلاللری دانیمارقہدہ بیوک بر تاثیر اجرا
 ایتدی . دانیمارقہ زادکانی قرال ایکنجی (قریستیان) ک اداره شدیدہ سنہ
 تحمل ایدہ میورلر وبالخاصہ درہ بکلرک معاملات استبدادکارانہ لرینہ قارشی
 کوبیلیری حمایہ ایچون اتخاذا ایلدیکی تدابیردن هیچ ممنون اولمیورلر ایدی .
 نہایت ، وقوعہ کلن بر عصیان نتیجہ سندہ ایکنجی قریستیان خلع ایدلدی ؛
 رہ فورمہ یی قبول ایتمش اولان فرہ دریق اولدنبورغ قرال اولدی
 [کانون ثانی ۱۵۲۳] . فرہ دریق اولا لوتر مذہبی سالکترینہ سربستی
 آیین حقنی ویرمکہ اکتفا ایتدی ؛ بعدہ ، ۱۵۳۶ دە ، خلقی اوچنجی

قریستان دانیارته ونور ووجه هیئت رهبانک مالکانه لرینی ضبط وقتولیک دینی منع ایلدی .

لوتر مذهبک قبول ایدلدیکی مملکتلرده کلیسارک وهیئت رهبانک تشکیلات اساسیه لری بوجه آتی ایدی : آیین **نکبونی** عوام لسانیه محرر آلپلرک ، دعالرک اوقونمسندن و وعظ ونصیحتدن عبارت قالمشدی . یالکز (قومونیون) دنیلن آیین روحانی ابقا ایدلمشدی . کلیسار داخلنده هر درلو تصاویر قالدیرلمش ، یالکز محرابده بر صلیب براقلمش ایدی .

مناسیر راهبکی ، رهبانک تأهلدن منعی کی شیر قالدیرلمشدی . بر سلسله مراتب روحانیه موجود ایدی ؛ پروتستانلر روحانی مأمورلرک انتخابه اشتراک ایتکده ایدیلر . فقط هر درلو مراتب روحانیه نک توجیهی پرنسارک موافقیته ممکن اوله بیلیمکده ایدی . بنابرین پرنسار امور دینه ده حاکم مطلق ، عادتاً بر رد محلی پاپا ، اولمشلردی .

قالوینیزم ، آنغلیقانیزم و پره سبیته رییه ن مذهب لری

آلمانیا نک بر قسمی لوترک مذهبنی قبول ایتدیکی صروده **قالوه نک کجلمکی** (قالوه ن) اسمنده بر فرانسرک تکلیف ایلدیکی ده ا اساسلی بر ره فورمه اسویچرده ، جنورده تطبیق ایدلمکده باشلامشدی . قالوه ن ویا اصل اسمی ایله (قووه ن Cauvin) ۱۵۰۹ تاریخنده (پیقار دیا) ده کاشن (نیون) شهرنده تولد ایتمشدی . لوتردن یکرمی آلتی یاش ده ا کنجدی . پدری (نیون) پسقوسنک وکیل معاملاتی ایدی . ایلک اوکجه سلک رهبانه کیرمکه حاضر لندی . هنوز اون ایکی یاشنده ایکن پسقوسنک حمایه سی

سایہ سندنہ بر بہ نہ فیس صاحب اولمش ، یکرمی یاشندنہ ایکی منصب روحانی اشغال ایتمشدی . مع مافیہ پدری (قالون) ایچون بشقہ بر مسلکی دھامناسب کور مکہ باشلامش ، کندی تعبیر نجہ اوغلنہ « نائل ثروت واعتبار اولمق ایچون یکانہ طریق اولان » حقوق تحصیل ایتدیر مکہ قرار ویرمشدی : قالون تحصیل تالیسی پارسده (مونته کو Montegu) قولژندنہ اکمال ایتدکدن سکرہ [۱۵۲۳ - ۱۵۲۷] اوزمان حتوق درسارندنہ بیوک بر شهرت قزاقمش اولان (اورلٹان) و (بورژ) دارالفنونلرینہ کیردی . (بورژ) دارالفنوننہ آلمانیادن دخی طلبہ ومعلم کلیردی . قالون اوراده (ملخویر فولمار Melchior Volmar) اسمندنہ آثار قدیمہ یونانیہده متخصص بر آلمان عالمی ایله کوروشدی و اونک تلقیناتیلہ لوتر مذهبہ میل ایتدی . سلک رهبانہ کیرمدی . یکرمی بش یاشندنہ کلیسانک ویردیکی بہ نہ فیسلری ترک ایلدی [۱۵۳۴] . او صردهده برنجی (فرانسوا) مذهب جدید طرفدارلرینی تعقیبہ باشلامش اولدیغندن قالون فرانسهدن چیقدی ؛ (بال) شهرینہ التجا ایتدی . اوراده افکار دینینہ سن (Institution chrétienne) عنوانی بر کتابده خلاصہ ایدہ رک اثرینی برنجی فرانسوا یہ اتحاد ایلدی و ۱۵۳۵ تاریخندنہ باصدیردی . لاتینجہ یازیلان و آلتی سنہ صکرہ قالون طرفندن فرانسوزجہ یہ ترجمہ ایدیلن بو کتاب رد فورمینی قبول ایدنلر آرسندنہ پک بیوک بر تأثیر حصولہ کتیردی .

قالونک (انسایتوسیزن قرہ تینہ) ایله آثار سائرہ سندنہ

قالونہ مذهبی ایضاح ایلدیکی مذهب جدیدک خطوط اساسیہ سی

بروجہ آتی ایدی : قالون ، لوتر کبی ، امور دینینہده کتاب مقدسندن بشقہ بر قانون طانییوردی . ینہ لوتر کبی آیین ومراسم دینینک فائدہ . سزلیکنہ قانع بولئیور و انسانک آنجق ایمان ایله سلامت اخرویہ یہ

نائل اوله بيله جگنی ادعا ایدیوردی . فقط فضله اوله رق ایمانک سعادت ابدیه لری من الازل مقدر اولان کیمسه لر . بخش ایدلمش بر لطف الهی اولدیغنه قانع ایدی . بو قناعته کوره انسانلرک نه کناهلری ، نه ده خیر و ثوابلری تقدیر الهی بی دیکشدره مز ایدی . مع مافیه قالوه نک وضع ایلدیکی یواساس بالا خره قالوینستلر طرفندن رد اولنمشدر .

قالون یالکیز وافتیز ایله قومونیونی قبول ایتمش و آیین دینی دعا و عظم و آلهیدن عبارت بر اقمشدر . بتون مراسمی قالدرمشدر . معبد نامنی ویردیکی کلیساده هیچ بر تزینات ، محراب ، تصویر و حتی صلیب بر اقامشدر . پاستور [pasteur] ویا مینیستر [ministre] نامنی ویردیکی رؤسای روحانیه آره سنده هیچ بر سلسله مراتب احداث ایتمه مشدر . بو رؤسای روحانیه دعالری او قومق ، وعظ ایتمک ایچون معتبران اهالی طرفندن منتخب کیمسه لر ایدی .

قالون کندیسنک الهام ربانییه مظهر اولدیغی قناعتنده بولندیغی ایچون افکار دینه سنی مدفعه ده پک مصر و متعصب ایدی . بر اثرنده : « بکا کلنجه ؛ بن تعلیم و تحریر ایتدیکم شیلری الهام ربانی ایله یاپدیغمه وجداناً قانع اولدیغم ایچون حقیقه خیانت ایتمه مک اوزره بونلری حرفیاً محافظه و مدافعه ایتمک لکم ایجاب ایدر . » دیمشدی . بناء علیه لوتر کبی ، قاتولیکلر کبی اوده حریت وجدان اساسی قبول ایتموردی . قالونه نظراً مذهب اصلیدن انحراف ایدنلرک قیلیج ایله تأدیب و تنکیلی لازم ایدی . قالون : « هرکیم مذهب اصلیدن انحراف ایدنلرک تأدینه حقسزلق نظریله باقارسه اللهه مخالفت ایتمش اولور . الله دین حق ایچون مبارزه موضوع بحث اولدیغی زمان بتون بشریتک اونودلمسنی ایستر . » دیمشدر .

جنوره

قالون (انستیتوسیون قره تیهن) ك نشرندن بر سنه صكره
ایتالیا سیاحتندن (بال) شهرینه عودت ایدرکن جنوره دن
کچدی [تموز ۱۵۳۴] . او زمان جنوره اون بش بیك نفوسلی بر شهر
ایدی . اهالیسی ذوق وصفایه مجلوب ، شن وشاطر ایدی . هم سیاسی ،
هم ده دینی بر بحران نهایت بولمق اوزره ایدی . حریتی مدافعه ده پك
مصر بر کوچك جمهوریت اولان جنوره اوزون مدت هم پسقوسلرك ،
هم ده صاووا دوقه نرینك تحت حاکمیتنده قالمشدی . ۱۵۲۷ تاریخنده
جنوره لیلر قومشولری اولان (برن) و (فریبورغ) قانتونلرینك
معاونت لرینی تأمین ایدرک صاووا دوقه سنك حاکمیتندن کندی لرینی قورتا-
ردیلر . ۱۵۳۳ ده پسقوسی شهری ترکه مجبور ایتدیلر . بو انقلاب
سیاسی بر انقلاب دینی ایله اکمال ایدلدی . لوتر مذهبی اسو یچره
قانتونلرینك بر چوغنده انتشار ایتمشدی . حتی (زوریخ) قانتوننده
(چوینغله Zwingli) اسمنده بر صاحب مذهب بیله ظهور ایلشدی .
تجددات دینه ده لوتر دن دها ایلری یه کیدن (چوینغله) مذهبی هرکسه
قبول ایتدیرمك خصوصنده پك ایلری یه وارمش وقانتونلر آره سننده
ظهورینه سبب اولدیغی بر محاربه ده تلف ایلشدی [۱۵۳۱] . جنوره نك
متفق اولان (برن) قانتونی لوتر مذهبی قبول ایلشدی . مذاهب جدیده
سالک لری جنوره یه دخی کلمشردی . بونلرك اك مشهوری کیوم فارل
اسمنده بر فرانسز ایدی . فارل اك ایکی سنه دوام ایدن مساعیسی نتیجه .
سند مذهب جدید قبول ایدلمش و حتی قالوده نك موصلتندن آلتی یدی
هفته اول جنوره مجلس عمومیسنده پاپالق مقامنك احداث ایلدیکی بالمله
آیین و مراسمك الغاسنه و صرف احکام انجیلیه یه رعایت اولنسنه قرار
ویرلمکک یمین ایدلمشدی [۲۱ مایس ۱۵۳۶] . فارل بو ییمنه رعایت

اولنسنی تأمین ایچون معاونت و مظاهرتیه محتاج ایدی . قالوئنگ شهره کلدیکنی خبر آلتجه اونی بولدی و جنوردهه قالمنی اقتناع ایتدی .

قالوئنگ هنوز یکر می آلتی یاشنده ایدی . کنجنگ
قالوئنگه جنوردهه وایمانک بخش ایلدیکی برخواست و فعالیت فوق العاده ایله (فارهل) ک یاننده مذهب جدیدک مراسم و آییننی تعیین ایتدکدن صکره جنورده لیلرک اخلاقی اصلاحه دخی تشبث ایلدی . پاستورلرک اخلاق عمومیه بی تصفیه دخی مأمور اولدقلری فکرنده ایدی .

مجدد دینک کوسه تردیکی شدت جنوره اهالیسنه ناقابل تحمل بر درجهده فضلّه کوروندی . اونک ایچون اهالی قالوئنگ بر آیین مسئله - سنده کی عناد و اصرارینی بهانه اتخاذا ایدرک کندیسنی - جنوردهه یرلشدیکی تاریخدن ایکی سنه صکره - فارهل ایله برلکده طرد ایتدیلر [نیسان ۱۵۳۳] .

مع مافیه قالوئنگ جنوردهه طرفدارلری واردی . بونلر برخیلی منازعات و مصادماتدن صکره حکومتی ضبط ایتدیلر و قالوئنی چاغیردیلر . قالوئنگ بعض شرائطی تکلیف و قبول ایتدیررک شهره عودت ایلدی [۱۳ ایلول ۱۵۴۱] . شرائط مذکورنگ باشلیجه سی هم پاستورلری انتخاب و عزل ایتمکه مأمور بر هیئت دینیّه ، همده مغایر اخلاق حرکاتده بولنانلری تعقیب ، ترصد و حکومته تسلیم وظيفه سیله مکلف بر نوع محافظه اخلاق محکمه سی اولمق اوزره ارکان حکومت و پاستورلردن مرکب بر (مجلس روحانی Consistoire) تشکیلی ایدی . بو صورتله قالوئنگ جنوره اهالیسنک هم سلامت اخرویه لرینی ، همده حسن اخلاقلرینی تأمین ایتمک ایسته یوردی . مقصده وصول ایچون هر شیئی ، وعظ ، قیافت ، سرپوش ، طعام ، کلنجه ، رقص و سائرینی نظام آلتنه آلدی . هر کسک احوال خصوصیه سی ،

طرز معیشتی بیلہ تفتیش و نظارت آلتندہ ایدی . مغایر نظام حرکتندہ بولنلر جزای نقدیہ، علنی توبہ واستغفار، حبس کبی جزالہ دوچار اولمقدہ ایدیلر . بو استبداد بلا اعتراض و مخالفت قبول ایدلمدی . قالون رقیلرینی واعتقاداتنه اشتراك ایتیلری بلا مرحمت ازدی . بش سمنده جنوره کبی اون بش بیک نفوسلی بر شهرده آلتش سکز کشی جزای اعدامه محکوم اولدی . برنورتک اوغلی اولان (ژاق غروئہ Gruet) قالوننی ریا و حرص و طمع ایله اتهام ایتدیکی ، بقای روح حقندہ کی بر اترینک کنارینه « دلیک » کلمه سنی یازمش اولدینی ایچون بر چوق اشکنجه دن صکره اعدام ایدلدی . دوران دمی قسماً کشف ایتدیکی اثرلرندن آکلاشیلان (میشل سروه Servet) اسمندہ بر مقتدر اسپانیول طیب و ندیکده طبع ایتدیردیکی بر کتابده مسیحک الوهیتی انکار ایتشدی . قالون : « اگر بوشهره کلیرسه صاغ اوله رق چیقمنه تحمل ایدم . » دیمشدی . قالون اسپانیول طیبیک کندیسنه یازمش اولدینی مکتوبلری و بعض اثرلرینی فرانسه ده (ویهن) پسقپوسنه کوندرمش و بوصورتله (سروه) پی فرانسه دن چیقمنه مجبور ایلشدی . (سروه) جنوره یه کیتمک کبی بر تدبیر سزلکده بولندی . شهره موصلتی کونی توقیف اولندی ؛ اوزون بر محاکمه دن صکره « کفر و الحادی ایله دنیای تلویث ایدمه مسی ایچون » احراق بالنار جزاسنه محکوم اولدی .

قالون کندی فرقه سنک قوتی آرتدیرمق ایچون بر چوق فرانسز ملتجیلرینه اهل وطن حقوق و یردیردی . بویکی بورژووالر سایه سنده شدتی تزید ایتدی ؛ نهایت ، جنوره نک حاکم یکانه سی اولدی . مذهب جدید طرفدارلری هپ جنوره یه التجا ایتدکلرندن بو شهر پروتستانلک روماسی حالی آلدی . « جنوره پاپاسی » نامیله یاد ایدیلن قالون بلده مذکورہ پی

ره فورمه نك مركز فمكريسي يابدى. بالاخره (قادىمى) ناميله ياد ايديلن
بر مکتب آچدى. بومکتب کشادىنى متعاقب سکنز يوز طلبه بولدى.
جدیت تدریساتى سایه سنده بیوک بر شهرت قازاندى. نهایت، مذهب
جدیدی نشره خادم بر چوق میسیونرله مخرج اولدى. پروتستانلق
آلمانیدن دکل، جنوره دن فرانسه یه، پهی بایه، اسقوجیایه ادخال ایدلدى.
قالوهن شهر مذکورده یکر مى اوچ سنه اقامت ایتدکن صکره ۱۵۶۴
تاریخنده وفات ایلدیكى زمان تلمیذلى یالکیز فرانسه داخلنده ایکی بیکی
متجاوز کلیسا تأسیسنه موافق اولمشلر ایدی.

انکلتزده ره فورمه؛ آلمانیا و فرانسه یه ره فورمه افراد طرفندن
سکنزنجی هازى ادخال ایدلدىكى حالده اسوج ونور و جده اولدیغی
کبی انکلتزده دخى حکمدار ره فورمه یه اوک آیاق اولمشدر. انکلیزلى
قتولیک کلیسا سندن آیران و (آغلیقان) کلیسا سنى تأسیس ایدن قرال
سکنزنجی هازیدر.

یدنجی (هازى) انکلتزده (تودور) خاندانك اداره مطلقه سنى
تأسیس ایتمشدى. یتهاونك زماننده (اوقسفورد) ده یشایان (جون قوله
John Folet)، (اراسم)، (طوماس مور) اسمنده اوچ اومانیت
سکنزنجی هازینك جلوسنى متعاقب انکلتزده رونه سانس وره فورمه
طریقه ادخال ایتدیلر. بونلرک اوچی ده قتولیک کلیسا سنى اصلاحنى
شدتله التزام ایتمکده ایدیلر. (قانتوربه رى) سرپسقه پوسى کبی بعض
رؤسای روحانیه دخى بوفکرى قبول ایدیورلردى.

سکنزنجی هازى قدر حین جلوسنده تبعه سنى کوزل امیدلره دوشورمش
بر حکمدار احتمالکده یوقدر. ۱۵۰۹ ده بتون اوروپا حکمدارلى،

آلمانیایمپراطوری ماقسیملیان، فرانسه قرالی اون ایکنجی لوی، اسپانیا قرالی فردیناند یا اختیارلامشور، یاخود تمدائی حرب ایله مضایقه مالیه به دوچار اولمشور، یورغون دوشمشور ایدی . پدرینک تصرفی سایه سنده زنکین اولان سکزنجی هانری ایسه کنج ، کوزل ، خلقت محبتنه مظهر ایدی . انکلزلر ممارسات بدنیه به مراقی، حشمت و داراتی سبیلہ حکمدا . لرلینی سویورلردی . فی الحقیقه هانری غایت ماهر برینجی و تیرانداز ایدی . جلوس ایدر ایتمز سرایده ا کلنجه لر ، شنکک لر ، بالور ، ماسک لی رقص لر، تورنوالر بر برینی ولی و تعقیب ایتمکه باشلادی . سرایک قطیفه ، احجار ثمنه ، آت ، تیاترو آلاتی آلمق ایچون صرفیاتی پک زیاده آرتدی . هانری حرومنور فکری کوروندیکی ایچون عالم لر و مجددلر دخی کندیسینی سورلردی . قرال لاتینجه ، فرانسه زجه ، اسپانیولجه وایتالیانجه بیلیردی . لائوطه و سنطورچالقمده فوق العاده ماهر ایدی . زمانک بتون حکمدارلرندن زیادای کتابلری او قومقدن لذت آلیردی . چالیشقان ایدی . اوقسفور دده کی علما وادادان چوغنک شخصاً احبابی ایدی . ادبانک هانرینک جلوسنی آلقیشلامقده نه قدر حقلی اولدقلرینی کوسترمک ایچون قرال اولور اولماز (قوله) یی سرای واعظلغنه ، (طوماس مور) یی لوندرده بیوک بر مأموریته ، ایتالیا ده بولسان اراسمی (قامبریچ) دارالفنوننده برکرسینی و بوذواتک احباسندن هر برینی ده برر مناسب موقعه تعیین ایتمش اولدیغنی سویله مک کافیدر .

سکزنجی هانرینک ایلک دوره سلطنتنده برچوق سنه لر حکومت (طوماس وولسه ی Wolsey) اسمنده برقاردینالک النده بولندی . هم انکلتره شانسلیه سی ، هم ده پاپانک انکلتره وکیلی اولان وولسه ی مسائل دینیه احتیاجات سیاسیه به موافق برمسلك اتخاذا ایتشدی . حتی بعض

مناسترلى الغا ايدرك بونلرك اموال واملا كنى اوقس فورده تاسيس ايلدىكى
برمكتبه تخصيص ايتدى. پاپا اوتجى لئونك وبالا خره يدنجى قله مانك وفاتلرنده
كندىنى پاپالىق مقامنه انتخاب ايتديرمك ايچون چوق چاليشدى ؛ فقط
موفق اولمىدى . پاپالغه نامزد اولان بوقاردىنالك پاپالىق عليهدارلر ليله
برلشمسى ، بىدايه ، ممكن دكلدى . ذاتا وولسەى لوتر مذهبك قرالارك
حكومت مطلقه لرى ايچون تهلەكلى اولمىسندن قورقيوردى . كرك او ،
كرك سكرنجى هازى منفعت دولت نقطه نظرندن قتوليكلكه صادق قالمق
فكرنده وبناء عليه تجددات دينيه لاقيد بولنيورلرايدى .

يدنجى هازى اسپانيانك قتلى حكمدارى فرديناندك اتفاقيله خاندانى
تقويه ايچون ولى عهدى (آرتور) ه فرديناندك قىزى (قاترين داراغون) ى
تزوج ايتمك ايسته مشدى . آرتور - حتمال كه زفافدن اول - وفات
ايتدىكى جەتله پرنسس برادرى هازى يە تزويج ايدلدى [۱۵۰۹] .
فقط توراتك سفرلويينده بولتان بر فقره سنده ينكه نك [تزوجى ممنوع
اولدىغى بيان ايدلمش اولديغندن كتاب مقدسك بو ممنوعيتنى قاترين وهازرينك
ازدواجنده رفع ايتمك ايچون پاپالىق مقامندن بر فرمان استحصال ايدلدى .
لوتر روما كليسامى رئيسك بو بابده كى قرارينه توراتك متنى ايله استشهاد
ايدرك تعريض ايتدىكى زمان سكرنجى هازى مجدد دين عليهنده بولمىغى
منفعتى اقتضاسندن كوردى . كندىسندن بش ياش بيوك اولان وهىچده
كوزل اولميان قاترينى سومه مكله برابر اوندن آيرلمىغى هنوز دوشونمىوردى .
اسپانيا ايله اتفاق هنوز سياستك محوريكى تشكيل ايتمكده ايدى . قاتريندن
تولد ايدن چوجقلرندن حىيائده قالان يكانه اولادى پرنسس ماري يە
وراثت مشروعه يى تامين ايتمك اونك ايچون حائز اهميت بر مسئله ايدى .
بوندن طولاي (هازى) و (وولسەى) پاپالىق مقامنى التزام ومدافعه

ایتدیلر . (وورمس) دتی عقد اجتماع ایتدیکی صرہ ده انکلتزه قرالی
 پاپا ایله ایمپراطورک یالکیز فرانسه علمنه دکل، لوترک علمنه دخی تشکیل
 ایتمش اولدقلری اتفاقه داخل اولدی . شارل کنه قیزی مارینک دست
 ازدواجی وعد ایتدی . فقط ۱۵۲۷ ده هرشی دیکشیدی . شارل کن
 پرنسس ماری بی آله جغه پورتیکیز پرنسسی ایله ازدواج ایدرک سکزننجی
 هازی بی اتفاقدن صغوتدینی کی (پلویه) محاربه سندن صکره برنجی
 فرانسوایی براققله کندیسنی فرانسه وانکلتزه قرالی عداتمکه باشلامش اولان
 هازی بی کوجندیردی . (تودور) خاندانک پلانلرینی موقع تطبیقه قویق میسر
 اوله مدی . هازی کندیسنه اهانت ایتمش اولان ایمپراطور و ایمپراطورک النده بر
 آلت اولان پاپا ایله بوزوشدی و سیاستی ایچون یکی بروجئه استقامت آرادى .
 بو وجهه استقامتی بولمق ایچون ذوق و آرزوسنه تبعیت ایتدی . (قاترین)
 اقرباسندن قورقسنه آرتق بر سبب قالمامشدی . قرالیچه نک احوال صیه سی
 چوجق صاحبی اولمسنه مانع ایدی . حال بوکه هازی ارکک ولی عهد آرزو
 ایدیوردی . زوجهنی تطلیقه قرار ویردی . (قاترین داراغون) ی
 تطلیق پروژهنی سکزننجی هازی یله ایمپراطور آره سنده وقوعه کلن
 طلاق سیاسینک نتیجه طبعیه سی کی اولدی .

(قاترین) ایله یکرمی سنه یشادقدن صکره بردن بره سفر لوینده
 مندرج دلیلی بو بیچاره قادین علمنده استعمال ایتک غدارانه بر حرکت
 ایدی . فقط سکزننجی هازی جداً غدار بر آدم ایدی . ذاتاً بو حقسنزلی
 (روچستر) پسقوسی (فیشر) جسورانه تعیب ایتدی . ملتک اکثریتی
 دخی بو فیکرده ایدی . قرالاک اطرافنده کیلر ایسه بالعکس بو ظلمی
 آلفیشلادیلر . فرانسه ایله اتفاقک خفیاً طرفدارى اولان (وولسهی)
 طلاقه اسپانیایی تحقیر ایچون بر واسطه نظریله باقدی . کوزدن دوشن

قرالیهچهنک یرینه بر فرانسز پرنسیسی اقامه ایتکی دوشونیور ایدی .
 فقط هازینک تکلیفسز احبابلری اولان اخلاقسز و وجدانسز زادکان
 قرالی هم قرالیهچه ، همده (وولسهی) علیه تحریک ایتمکده ایدیلر .
 بونلردن سیر (طوماس بولهین Boleyn) ک قیزی (آن) حسن و آن
 فوقالعاده سیله مشهور بر ایرلاندا کوزلی ایدی . ۱۵۲۲ ده هنوز اون
 آلتی یاشنده ایکن سرایه تقدیم ایدلمشدی . همان کافهسی بو قیزک اقرباسی
 اولان کوزدهلر قرالی کندیلرینه قوی بر صورتده باغلامق و بتون مناصب
 مهمه دولتی ید انحصاره آلان (وولسهی) ک ریاستی آلتنده کی روحانی
 رجال دولتی کوردن دوشورمک ایچون (آن بولهین) دن استفاده
 ایتک ایسته دیلر . قرال بو طوزاغه طوتولدی . کنج قیزک کوزللیکنه ،
 خرافت و نزا کتنه مفتون اوله رق برکون اونی تزوج ایتک ایسته دیکنی
 (وولسهی) . بیلدیردی .

طلاق ایچون ایکی طریق واردی . یا قرال بر انکلیز محکمه عالیسنه
 طلاق قراری و یردیره جک و قرالیهچهنک کندینی مدافعه ایچون حضور
 محکمه یه چیقمسنی طلب ایده بیلمسنه میدان و یرمه مک اوزره سرعت
 ومهارت ایله کیزلیجه حرکت اوله رق غیاباً اعطای حکم اولنه جق ،
 یا خود قرال (قاترین) ایله منعقد نکاح دکل ، و قتیله پاپانک سلفی
 طرفدن تورات منته مغایر اوله رق اصدار ایدیلن فرمانک فسخنی پاپالق
 مفامندن طلب ایله جک ایدی . سکزننجی هازییه قالسه برنجی طریق
 ترجیح ایده جمکدی . فقط (وولسهی) ایکنجی ، یعنی انکلتره قرالنک
 و قتیله بالذات رومادن طلب واستحصال ایلدیکی فرمانک فسخنه چالشیلمسی
 صورتنی توصیه ایتدی . بناء علیه پاپالق مقامیله مذاکراته کیریشیلدی .
 پاپا سکزننجی هازینک آرزوسی وجهله حرکت ایده مزیدی . چونکه

اولا آرہ یرده فدا ایدلمکده اولان بدبخت قادینک یکنی ایمپراطورک الی آلتندہ ایدی . ثانیاً ، بودرجه آچیق برحقسزلق ارتکاب ایتدیکی حالده نفوذ مغویسی بسبتون مختل اولوردی . بناءً علیه ایکی سنه قرالک آرزوسنه قارشى طورمغه چالیشدی . پاپالق مقامیلہ ظهور ایدن بو اختلاف انکلتزنک روما کلیساسندن ایرلمسنه مقدمه حکمنده ایدی .

اوصرهده رولسهی سقوط ایتدی . خلفی ده طلاق مسئله سندن طولای ظهور ایدن اختلافی حل ایدمدی . نہایت ، باش وکالتہ کچن (طوماس قرومول) طلاق ایچون پاپانک قرارینہ احتیاج اولدیغنی سویلیہرک قرالی پارلمنتونک معاونتیلہ انکلتزه ملی کلیساسی ریاستنی درعهده ایلمکہ تشویق ایتدی . بوندن صکرہ سکزنجی ہازینک سیاستی انکلتزه کلیسانسی تاماً قرالہ تابع قیلمغه ، پاپالق مقامیلہ قطع مناسبت اسبابی تہیہ ایتمکہ معطوف اولدی .

نہایت ، کمبریج آلہیات متخصصلرندن ایکن (قانتورہری) سرپسقیوسلغنه تعین ایدیلن (طوماس قرانمر Cranmer) قاترین و ہازینک نکاحنی سرپسقیوسلق محکمہ روحانیہسی قراریلہ فسخ ایتدی [۵۳۳] . اوچ ہفتہ صکرہ (آن بولہین) قرالیچہ اولدی . برقاج آی صکرہده پاپا ہازی بی آفوروز ایتدی .

بوندن صکرہ سکزنجی ہازی و وکلاسی قرال انکلتزه کلیسانک رئیس و ہامبسی اولبور . انکلتزهده روما کلیسانک حاکمیتنی یقمغه چالیشدیلر . اگر تطلیق ایدلمش اولان قرالیچہ روما سراینہ مراجعت ایدرک ہازینک ایکی زوجہ یہ صاحب اولدیغنی ادعاسیلہ اقامہ دعوی ایدرسہ بو مراجعتک ہیچ حکمی اولماسی لازم ایدی . انکلتزه پارلمنتوسی ۱۵۳۳ تاریخندہ روما سراینہ استینافاً وقوع بولہحق

مراجعتلرک کان لم یکن حکمنده اولدیغی حقننده کی قراریله پاپالقی مقامنه ایلمک
ضربه قطعیه یی ایندیردی. فی الحقیقه اوزمانه قدر قراللق داخامده یالکز پاپانک
حکم ونفوذی تحدید ایدلمش، رومایه کیدن بعض واردات الفا اولمشدی.
حال بوکه شمدی پاپالقی مقامنک حق قضاسی الفا ایدیلور ایدی. آراتق
پاپانک حکم ونفوذینی تحدید ایتمک دکل، بستیون قالدیرمق ایسته یورلردی.
۱۵۳۴ سنه سنده پارلمنتو روما کلیسای علینه بعض مقررات ده اتخاذا
ایتدی. ایکی سنه اوله کنبجه یه «پاپا» تعبیری قوللانیلدیغی حالده شمدی
«روما پستقوسی» عنوانی ویریایور ایدی. انکلز کلیسای مجالس
روحانیه سی کندی قرارلرینک مرعی الاجرا اولسی ایچون قرالک تصدیقی
لازم وکافی اولدیغی قبوله مجبور اولدیلر. قرالک - پاپالقی مقامنجه
تصدیقه حاجت قالمه دن - پستقوسلر تعیین وحقی عزل ایتمک صلاحیتی
میین بر قانون نشر ایدلدی. نهایت، پارلمنتو (Acte de Suprématie)
عنوانلی قانونی قبول ایتدی. بو قانون موجبجه قرال انکلز کلیساسنک
یر یوزنده یکانه رئیس اولور وهیئت روحانیه نک حق قضا وصلاحیتی
دائرة سنه کیرن هر درلو احوال حقننده حکم ویرمک حقنی حازر بولئیوردی.
شو حالده هیئت ره بان بعدازین هر خصوصه قرالک اوامر و تعلیماته کوره
حرکت ایتمکه مجبور ایدی.

سکزنجی هازی روما کلیساسندن ایرملقه برابر قوتلیک

مظالم

مذهبنه صادق قالدیغی ادعا ایدیوردی. اون اوچ سنه

اول، ۱۵۲۱ ده، اندولژانسلر مسئله سی زماننده لوتر علینه بر رساله
نشر ایتمش وحق پاپا کندیسنه «مدافع دین» عنوانی ویرمش ایدی.
بو عنوانی محافظه ایتمک آرزوسنده ایدی. ۱۵۳۹ سنه سنده تبعه سنه قبول
ایتدیرمک ایستدیکی اعتقاداتی میین بر قانون نشر ایتدی. بو اعتقادات

قتولیک دینه هان تماماً موافق ایدی. قانونه رعایت ایتینلر اعدامه محکوم اولدیلر .

هم قتولیکلر، هم ده پروتستانلر قرالک کلیسایرئیس و حامیسی اولمسی قبول ایتیمورلردی. چونکه قتولیکلرجه یکانه رئیس روحانی پاپا ایدی. پروتستانلر ایسه سکنجی هازینک قتولیک مذهبی اساساتی هان عیناً محافظه ایتیمسه معارض ایدیلر. هازی قتولیکلری خائن صفتیله آصدیردی؛ پروتستانلری رفض ایله اتهام ایدرک یاقیدیردی. بیکلرجه مشاهیر قتل ایدلدیلر. برآراق باش وکالتده بولنان مشهور اومانیستلردن (طوماس مور) بیله جزای اعدامه محکوم اولدی. زنکین مناسترلرک املاکی ضبط و مصادره ایدلدی.

سکنجی هازینک وفاتی متعاقب اون بش سنه ظرفده
 ره فورمه انکلتزده پک بیوک اغتشاشلره، ظلملره سبب
 اولدی. هازینک یکدیگری متعاقب جلوس ایدن اوچ
 اولادینک اوچی ده بربرینه مخالف سیاست دینه تعقیب ایتدکلرندن زمان
 سلطنتلری هپ منازعات دینه ایله کچمشدر .

هنوز طقوز یاشنده قرال اولان آلتنجی ادوارد [۱۵۴۷ - ۱۵۵۳]
 زمانده قالوینیستلردن ترکب ایدن سرای ارکانی انکلیزلره قالوون مذهبی
 جبراً قبول ایتدیرمکه چالیشدیلر. یرچوق تدابیر شدید اخذ ایدلدی؛
 ظلملر یاپیلدی؛ بتون قتولیک آیینلری قالدیرلدی؛ الحاصل بتون انکلیز
 کلیسایر قالدوون مذهبی قبوله مجبور طوتولدی. وقوعه کلن عصیانلر
 باصدیرلدی. الحاصل، آلتنجی ادواردک زمانی او قدر قاریشیق کچدی، که
 معاصرلر بونک یاننده سکنجی هازینک دور سلطنته قانون و عدالت
 دوری نظریله باقمشلردر .

آلتنجی ادوارددن صکره تحته کچن قاترین داراغونک قیزی ماری

تودور [۱۵۵۳ - ۱۵۵۸] ایسه متعصب بر قتولیک ایدی . یکنی اولان اسپانیا قرالی ایکنجی فیلیپک زوجه سی ایدی . انکلتربی جبراً قتولیک یایمق ایسته دی . بومناسبتله او قدر چوق مغالم اجرا ایدلدی ، که قرالیچه یه « قانلی ماری » لقبی ویرلندی .

ماري اعتدال ایله حرکت ایتسه بلکه موفق اولوردی . فقط پاپانک آرزوسنه تبعاً حرکت ایدرک طلاقدن اولکی حاله عودت ایلک ایسته دی ؛ پاپالق مقامیله باریشدی . بو ایسه بر چوق عصیانلره ، قانلی وقعelere سبب اولدی .

نهایت ، (آن بوله یین) ک قیزی قرالیچه الیزابت [۱۵۵۸-۱۶۰۳] زمانده انکلترونک سیاست دینه سی قرر و آنغلیقانیزم کلیساسی صورت قطعیه ده تشکک ایتدی ، که بونک تفصیلاتی انکلترونه بحثده آریجه کوریه جکدر .

انکلترونه ره فورمه حکمدار لر طرفندن واونلرک منفعتنه
 به سبب ریبره اوله رق نشر ایدلدیکی حالده اسقوجیاده حکمدارلرک
 دخلی اولمده دن واونلرک آرزولری خلافتده تبعه طرفندن تطبیق اولندی .
 اسقوجیا ره فورمه سی خصوصی بر ماهیتی حائز اولیوب قالوینیزم مذهبک
 ساده جه تطبیقندن عبارت اولمقله برابر بوکا Réforme presbytérienne نام
 مخصوصی ویرلمشدر . بوضورتله یکی اسقوجیا کلیساسنک آنغلیقان کلیساسندن
 هانکی اساسلی نقطه لرده آیرلینی کوسترلک ایسته نمش ایدی . فی الحقیقه
 آنغلیقان کلیساسی قتولیک سلسله مراتب روحانیه سی محافظه ایتدیکی
 و حکمدار طرفندن اداره اولندیگی حالده اسقوجیا کلیساسی قالمون اصولنه
 توفیقاً جمله سی مساوی اولان معتبران وپاستورلردن مرکب بر مجلس
 [لاتینجه presbyteri] طرفندن اداره اولنمقله ایدی .

اسقوجیا قرالی بشنجی ژاق استوآرت ۱۵۴۲ سنہ سندنہ وفاب ایتدیکی زمان هنوز آلتی کونلک بر قیزاولان ماری استوارتدن بشقه اولاد بر اقامشدی. بو چوجوق نامنه والده سی ماری دولورهن - که بالاخره قاله ومچ قلعه لرینی ضبط ایتمش اولان دوق دوکیزک یکنی ایدی - نائبه حکومت تعیین ایدلای. حکومتک بر قادین النده بولمسی ره فورمه یه میل ایتمه باشلامش اولان اسقوجیا زادکاننک آمال استقلال پرورانه لرینه برقات دها وسعت ویردی. بوزادکان عمومیتله فقیر اولدقلری حالده اسقوجیا کلیسای مالکانه جهندن پک زنکین ایدی. اونک ایچون اصیلزاده لر کلیسا مالکانه لرینک ضبط و تفسیمنی انتاج ایدمک تجددات دینییه طرفدار ایدیلر. ره فورمه نیک ایلک واعظ و ناشری جون قنوقس John Knox [۱۵۷۲ - ۱۵۰۵] اولدی. بر نوترک اوغلی اولان جون قنوقس سلاک روحانیده ایدی. حیاتی بر چوق قاریشیق سرگذشتلر آره سندنه چکمشدی. ۱۵۴۷ ده زادکاندن بر قسمنک عصیاننه قاریشمش، اسیر دوشمش، فرانسیه نی ایدلمش، اوراده حرب کیمیلرنده کورک چکممش، بعده تخایه ایدیلهرک انکلترده آلتنجی ادواردک راهبی اولمشدی. ماری تودورک جلوسندن صکره جنورده ده قالونه ک یاننه کیتدی [۱۵۵۳]. براز صکره اسقوجیایه عودت ایتدی و (ماری دولورهن) علیهنده بولنهرق قراللق داخلند ره فورمه نیک تأسیسی مقصدیله بعض زادکاندن مرکب بر جمعیت تشکیل ایلدی. ۱۵۵۹ ده قیام ایدن بوزادکان الیزابتک کوندردیکی انکلیز عسکرینک معاونتیه (ماری دولورهن) غلبه ایتدیلر. درحال عقد اجتماعه دعوت ایدیلن بر پارلمنتو قنوقسک تأثیریه قالونه مذهبنی قبول ایتدی وقتولیک آیینلرینک اجرا سندنه اصرار ایدنلرک اعدام اولنه جقلرینی مبین بر قانون نشر اولندی [۱۵۶۰].

اسقوچياده قالوينيزم مذهبك قبولی بالاخره انكلتره ايجون حائر
اهميت بر مسئله اولمشدر . پره سييته رييائيزم يواش يواش انكلتره يه ده
داخل اولمش و آنغليقائيزم ايله بو مذهب آره سنده جدي بر مبارزه
باشلامشدر . بومبارزه اون يدنجي عصرده اختلافات عظيمه يه و بر اختلافه
سبب اولمشدر .

پروتستانلغك آلمانيا ، اسقانديناويا حكوماتي و انكلتره ده كي نتايج
سياسيه سي تدقيق ايديله جك اولورسه كوريلوركه اولاكليسا املاكك
حكمداران طرفدن ضبطي صورتيله بيوك مالكانه لرك صاحبلي تبدل
ايتمش ، ثانياً حكومت جسمانيه لرينه ديني بر حكم و نفوذ علاوه ايدن
حكمدارلرك قوتي آرتمشدر . اولجه يالكز رؤساي سياسي اولان حكمدارلر
رئيس ديني دخي اولديلر . اون آلتنجي عصرده ره فورمه يالكز حريته
دكل ، اداره مطلقه يه دخي فائده لي اولمشدر .

پروتستان ره فورمه سنك آلمانيا ده ، اسقانديناويا
حكومتلرنده و انكلتره ده باشليجه نتايج سياسي سي
سياسيه سي بروجه آتيدر : اولاً ؛ كليسا مالكانه لرينك حكمدارلر
طرفدن كندى منفعتلرينه ضبط و مصادره سي . ثانياً ؛ حكمدارلرك حكومت
جسمانيه لرينه حكومت روحانيه يي دخي علاوه ايتملي صورتيله كسب
قوت و قدرت ايتملي ؛ عادتاً هم قرال ، هم ده پاپا اولملي .

شوالده اون آلتنجي عصرده پروتستانلق ره فورمه سي حريته دكل ،
اداره مطلقه يه فائده لي اولمش ديمكدر .

قتولیک رده فورمه سی ، جزویتلر ، ترانت مجلس روحانیسی

لوترک سبب اولدینی بحران دینی قتولیک کلیسای ایچون ایکی نتیجه حاصل ایتدی : اولاً ، اسکی مناسٹر طریقتلری اصلاح ورفض و بدعتہ قارشى مبارزه مقصديه یکی طریقتلر احداث اولندی . بونلرک المشهورى جزویت طریقتدر . ثانیاً ، (ترانت) ده اجتماع ایدن بر مجلس عمومى روحانى قتولیک کلیسای اساساتی تأیید وسوء استعمالتک میدانن قالدیرلمسنه تشبث ایتدی .

شیمدی یه قدر قتولیک کلیساسنده وقوعه کلن بحرانلرک روحانی طریقتلر هر برى نتیجه اعتباريله حیات دینییه یکی بر فعالیت ویرمش ، پاپالره تماميله مطیع یکیدن طریقتلر احداثه ویا موجودلرینک اصلاحنه سبب اولمشدر . اون برنجی عصرده یدنجی (غره غووار) اصلاحات دینیهدہ (کلونی Cluny) مناستری راهبلینک معاونته نائل اولمشدی . ایکی یوز سنه صکره ، اون اوچنجی عصرده اوچنجی اینوسانه (فرانسیسکن) و (دومینیکن) لر معاونت ایتشلردی . اون آلتنجی عصرده دخی اسکی طریقتلرک قسم اعظمی قانونلرینی تعدیل و اصلاح ایتدیلر و یکیدن بعض طریقتلر تأسیس اولندی .

مناسٹر حیانتک نه درجه انحطاطه دوچار اولدینی لوتر زماننده برچوق راهب و راهبہ لرک بردن بره مذهب جدیدی قبول و مناسترلری ترک ایتملريله میدانه چقمشدی . بوانحطاط او درجه ده ایدی ، که ۱۵۳۸ تاریخنده قاردينال لر وسائر رؤسای روحانیه دن مرکب بر قومیسون طریقت روحانیه لرک الغاسنی تکلیف ایتمشدی . ترانت مجلس روحانیسی بوضوئله حرکت ایتک ایسته مدی .

مناسرتلری، طریققتلری اصلاحه مدار اوله جق تدابیر شدیدہ اتخاذینی دها موافق کوردی. بعض طریققتلر، از جمله فرانسیسکنلرله قارمه لیتلر بواصلاحاتی کندی کندیلرینه اجرا ایتدیلر.

فرانسیسکن طریققتک اصلاحنه ۱۵۲۸ تاریخنده باشلامشدی. اصلاح ایدیلن فرانسیسکنلر دیکر لرندن صقال صالیویرمک و سیوری بر Capuchon یعنی سرپوش کیمک ایله دیکر لرندن تفریق اولندقلرندن Capucin نامنی آلدیلر. قاپوسه ن رؤساسندن برینک برکنج قیزی اغفال واونیکله ازدواج ایدہ بیلیمک ایچون لو تر مذهبنی قبول ایتمی بر آراق اصلاحاتی عقیم براقه جق کبی کورونمش اولمقله برابر قاپوسه نلر پک چابوق کندیلرینی طویلادیلر وایتالیا، آلمانیا، اسویچره و فرانسیه یاییلدیلر. ۱۶۱۹ ده پاپالق مقامی بونلره آریجه برجنرال تعین ایتدی. بوندن صکره قاپوسه نلر سن فرانسیوا طریققتک آیری بر شعبه سی اوله رق فقر و ضرورت ایچنده یشامغه وبالخاصه وعظ ونصیحت ایله اشتغاله وقف وجود ایلدیلر. برچوق مشاهیر بویکی طریفته کیردیلر.

قارمه لیت دنیلن راهب لر اسپانیا زادکانندن برینک قیزی اولان سنت تهره ز طرفندن اصلاح ایدلدی. بوندن صکره بو طریفته منسوب راهب و راهب لر جاهل لری تعلیم و تربیه و خستکافی تدایوی ایله تمیز ایتدیلر. ینه اوصره ده طریقت روحانیه لک اسکیمی واک بیوکی اولان بنه دیکت لرجه اصلاحات اجرا ایدلدی.

دیکر طرفدن یکی طریققتلر احداث اولندی. ۱۵۲۴ دن ۱۶۴۱ تاریخنه قدر ۱۲۰ سنه ظرفنده تأسیس ایدیلن وقسم اعظمی ارککلره مخصوص اولان طریققتلر اون بشی تجاوز ایتدی. بوباده کی فعالیت اک زیاده مذاهب جدیدہ دن آلمانیا وحتی فرانسه درجه سنده متأثر اولیان

یوقاری ایتالیادہ کورلدی۔ اورادہ تأسیس ایدیلن طریققتلر میانندہ اصحاب خیرک تبرعاتیلہ کچین ، بالخاصہ ہیئت رهبانک اصلاحیلہ مشغول اولہرق وعظ ونصیحتدہ تمیز ایدن (Théatin) لر ، ایتامک تربیہ سی ایلہ مشغول اولان ورومادہ ، پاویدہ مکتبلر تأسیس ایلین (Somasque) لر ، دارالفنونلردہ تدریساتہ حصر وجود ایدن وممالک اجنبیہ میسیونر کوندرن (Barnabite) لر شایان ذکر در .

Ursuline دنیلن راہبہلر فقیرخستہلرک تداویسنہ ، نسوانک تربیہسنہ وقف وجود ایتدیلر . Oratoire طریقتی ایسہ کنجملرک تعلیم وتربیہ سی وخستہ خانہلردہ کی خستہلرک تداویسی ایلہ مشغول اولدیلر .

بوندن بشقہ عینی مقصد ایلہ مناستر خارجندہ کی رهبان آرہ سندہ بر طاقم جمعیات مخصوصہ تشکیل ایدلدی . بتون بوتشکیلات بالخاصہ ایتالیا واسپانیادہ باشلامشدی . فرانسه قرالی دردنجی ہانری زمانندن اعتباراً عینی فعالیت بلکہدہ دہا واسع بر مقیاسدہ اولمق اوزرہ فرانسدہ کورلدی . فرانسدہ ہیئت رهبانک اصلاح احوال وتربیہ سی ایچون متشکل Oratoire de Jésus ، بر خیلی آلہیات و تاریخ علماسی یتیشدیرن Congrégation de Saint-Maur ، فقرا وخستکانی زیارت ایلہ مکلف اولان Visitation ، ینہ فقرا وخستکانہ معاونت مقصدیلہ سن وہ نسان دوپول طرفندن تأسیس ایدیلن Compagnie des filles de la charité الک مشہور طریققتلردر .

فقط ۱۵۲۴ دن ۱۶۴۱ تاریخہ قدر

ایتالیا، فرانسه واسپانیادہ بر برینی متعاقب تأسیس ایدیلن بو طریققتلر میانندہ

ہزوبت بمعنی؛ صورت

تأسیسی و تشکیلاتی

تشکیلاتنک قوتی، مقداراتنک عظمتی، مساعیسنک وسعتی، تولید ایلدیکی

حدث و نفرتك دوام ايدوب كيتمسيله اك زياده شهرت واهميت قازانان
 طريقت شبهه سزكه (جزويت Jésuite) لرك طريقتيدر . اونك ايچون
 بو طريقت حقنده مختلف نقطه نظر دن براز تفصيلات و يرمك اقتضا ايدر .
 جزويت جمعيتك [Compagnie de Jésus] مؤسسى سن ايغناس
 Ignace ۱۴۹۱ تاريخنده اسپانياده Loyola شاتوسنده تولد ايتديكندن
 (ايغناس دولويولا) ناميله ده معروفدر . غايت قديم بر باسق خاندانندن
 براصيلزاده نك سكرنجي اوغلى ايدى . اسپانيا قرالى (فرديناند قنوليک) ك
 سراينده تعليم و تربيه ايدلادكن صكره ضابط اولدى . شجاعتيه شهرت
 قازاندى . ۱۵۲۱ ده فرانسزلرك بالهجوم ضبط ايتدكلى (پامپلونه Pamplune)
 محاصره سنده وخيم صورتده يارالاندى ، باجاقلىرى قيريلدى . بر سنه خسته
 ياتدى . باجاغلك برى ديكردن قيصه قالدينى ايچون عسكركلكن واز
 كچدى . دوره نقاهتنده كتاب مقدس ايله عزه نصارانك تراجم احوالى
 او قودى . فطرة متهيج ايدى . اون اوچنچى عصرده احداث ايديلن
 بيوك طريقتلرك مؤسسلىرى اولان (سن فرانسو داسيز François d'Assise)
 ايله (سن دومينيک Dominique) ك مساعى و اجرا آتته مفتون اولدى .
 اونلر كې حركت ايتمه ك قرار وىردى . اون سنه قدر اسپانيا قرالنه
 عسكركل ايتمشدى ؛ بوندن صكره عيسانك عسكرى اولمق ايسته دى .
 اعاده عافيت ايدر ايتز كندينى خدمت عيسايه حصر ايتدى ؛ بر آراق
 (مانرزه Manrèse) مغاره سنده منزويانه يشادى . صكره قدسه كيتدى .
 فقط پك چابوق عودت ايلدى ؛ سن دومينيك ياپدينى كې وعظ و نصيحتنه
 حصر وجود ايتمه ك قرار وىردى . اول باول تحصيل ايتك ايسته دى .
 اوزمان ۳۷ ياشنده ايدى . اسپانيا دارالفنونلرنده او قودى . ايكي دفعه
 انكيزيسونك تعقيبنه دوچار اولدى . بونك اوزرينه پارس دارالفنوننه

کیتدی [۱۵۲۸] . اوراده آلتی سنه قالدی . او تاریخده قالون دخی پارس دارالفنوننده ایدی . ایغناس تحصیلنی دوقنورایه قدر تعقیب ایتدی . آرقداشلی آره سنده عادتا بر واعظ کبی حرکت ایدیوردی . بولردن آلتی کشی ایله صیقی بر مناسبت پیدا یلدی . یدی آرقداش ۱۵ آغستوس ۱۵۳۴ تاریخنده ، عروج مریم یورطیسنه مصادف بر جمعه ایرتسی کونی (Montmartre) تپه سنده بولنان مریم آنا کلیسایسنده برلشدیلر . اوراده بوندن صکره خدمت الیهیه وقف وجودایتمکه ، فقیر یشامغه ، ارض مقدسه کیدوب مسلمانلری خرستان ایتمکه ، بو ممکن اوله مدینی تقدیرده پاپانک آرزوسی وجهله کندیلرینی استخدام ایلسنه یمین ایتدیلر . ایغناس اوزمان ۴۳ یاشنده ایدی .

ایکی سنه صکره عینلرینی یرینه کتیرمک ایچون ایغناس رفیقعلری ارض مقدسه کیتمک اوزره کمی یه بینمکه حاضرلندقلری صروده ترکلرله حال حربدن طولایی تأخیر عزیمتلی حقنده رومادن برخبر آلدقلرندن فلسطینه عزیمتدن واز کچدیلر . رومایه کیتدیلر . فقر ، عفت ، پاپایه اطاعت مطلقه یی عهد ونذر ایتدکدن صکره پاپا هر نریمه کوندیررسه عزیمته مهیا بولندقلرینی بیان ایتدیلر . اوچنجی پول یدی آرقداشیدن مرکب هیئته « جمعیت عیسی » نامنی ویردی ؛ فقط جمعیت افرادینک آلتش کشییی تجاوز ایله مسنی امرایتدی [۱۵۴۰] . اوچ سنه صکره جزویتلرک ایلك موفقیتلری اوزرینه اعضانک عددینی تحدید ایدن بوقرار رفع ایدلدی . ایغناس یکی طریقه رئیس تعیین اولندی . ۱۵۵۶ تاریخنده وفات ایتدیکی زمان جزویت جمعیتی تمامیه تأسس ایتشدی . جمعیتک اسپانیا وپورتگیز ایله مستملکه لرنده ۱۴ ولایتی موجود ایدی .

ایغناس جزویت جمعیتی ایچون دیگر طریقت روحانیلرک نظاماتندن

خیلی فرقی بر قانون اساسی بر اقامت شدی . بو قانون اوندن صکره رئیس اولان (له نز) طرفندن تعدیل و اصلاح ایدلدی . قانون اساسی جزویتلری نه مناسرت راهبرینه مخصوص البسه یی کیمکه ، نه مشترکاً اجرای آینه مجبور طوتمیور واونلره وعظ ، اعتراف ذنوب ، اهل رفض و بدعت ایله مناقشه وبالخاصه کنجلیک تربیه سی ایله همجنس لرینک وکندی کندینه دعاء ، تدقیق وجدان ، مطالعه کتب ایله کندیلرینک سلامت اخرویه لرینی تأمین ایچون وقت بر اقیور ایدی .

ایغناس جزویت جمعیتک غایه سنی شو صورتله تعریف ایتشدرد : « بتون قوتی ، لطف الهی ایله ، ابنای جنسک سلامت و تکملنه صرف ایتمک . » بو غایه وصول ایچون مراجعت ایدیله جک وسائط تدریسات دینیّه ، وعظ ، اعتراف ذنوب ، مؤسسات خیریه ، فقرا و خستکانه معاونت ایدی . بر عسکر طرفندن مبارزه ایچون تأسیس ایدلمش اولان بو جمعیتک تشکیلاتی بعض اساساتجه ماهیت عسکریه یی حائز ایدی . قاعده اساسیه عسکر لکده اولدینی کبی اطاعت مطلقه ایدی . عیسانک عسکری ، یعنی جزویت اولمق ایسته ین هر کس رئیسینک آرزو و اراده سندن بشقه بر شیده تابع اوله مازدی . بتون بنلکنی بر طرفه بر اقمسی لازم دی . قانون اساسی قضا سنجه بر جسد بیروح و یا بر کیمسه نک النده کی باستون کبی اراده شخصیّه دن محروم بولمنسی مقتضی ایدی .

عسکر لکه آنجق صحیح یرنده آدم لر قبول ایدلدیکی کبی جزویت جمعیت قانون اساسی ده متانت و ثباتدن محروم کیمسه لری کندی ایچنه قبول ایتمیور . یکی طریقه آنجق فکر آمتین ، ای بر تحصیل کورمش واوزون و مشکل تجربه و ملازمت دوره لرینی کچیرمش آدم لر کیره بیلیرلر . جزویت اولمق ایسته ین کیمسه ایکی سنه ملازمته مجبور در . بومدت طرفنده تحصیل

تعطیل ایدیلیر، یکی کیرن کیمسه نك فكر آتربیه سنه اعتنا اولنور. ایکی سنه صکره بش سنه دوام ایدن بر تحصیل باشلار. بش سنه نك ختامنده بر قولژم کوندریلیر. اوراده الك آشاغی صنفلردن باشلامق اوزره بش ویا آلتی سنه قدر اجرای تدریسات ایدر. بعده لا اقل درت سنه آلهیات تحصیلی ایله مشغول اولور. بتون بو دوره لری موفقیتله کچیردکن صکره جزویته راهبلك رتبه سی ویریایر. بوندن صکره ده بر سنه سورن یکی بر ملازمت دوره سی باشلاور. بو بر سنه نك ختامنده Coadjuteur ویا Profès اولور. جزویتلرک اکثریتی تشکیل ایدن Coadjuteur لر قوله ژلرده ویا رهبان مکتبلرندہ تدریسات ایله مکلفدرلر. Profès لر آز مقدارده اولوب آلهیات معلملری و جمعیتک ارکانی بونلر میانندن انتخاب ایدیلیر.

جمعیتک باشنده قید حیات ایله منتخب بر جنرال ایله بونی نظارت و تفتیش وظیفه سیله مکلف بر Admoniteur و آلتی Assistant بولنور. بونلر آلمانیا، فرانسه، پورتکیز، ایتالیا و لهستانده بولنان جزویت مجالس عمومیه سی طرفندن انتخاب ایدیلیرلر. جنرال آمر مطلق صفتیله جمعیتی اداره ایدر. جمعیت Province، یعنی ولایتلره منقسمدر. هر بر ولایتک باشنده جنرال طرفندن تعیین اولنان و اوکا قارشی مسئول اولان بر Provincial موجوددر. انتریقہ لره مانع اولمق ایچون طریقتک بتون ارکانی اوچ سنه مدتله جنرال طرفندن تعیین اولنور. جنرالک اداره مطلقه سی آنجق جمعیتک قانون اساسیسنه رعایت ایله مشروطدر. بو قانونی یالکز بر مجلس عمومی تعدیل ایده بیلیر. جنرال قید حیات ایله منتخب اولمقله برابر مجالس عمومیه واحوال مستعجله ده آسستانلر طرفندن عزل اولنه بیلیر. بو صورتله تأسیس ایدیلن جزویت جمعیتک تشکیلاتی عادتاً بر دولت مشروطه نك تشکیلاتی آندیرر. اون آلتنجی عصرده پاپالر جزویتلره بر چوق امتیازلر ویردیلر.

جزویتلر هر یرده بسقپوسخانه محکمه لرینه تابع دکلدیلر . جزویتلردن ویرکو آلمق ایسته ینلر ویا اونلرک ، عافیتلرینی اخلاصه تصدی ایدنلر یا خود جزویت جمعیتنه دخولی منع ایلینلر آفوروز ایدلیر . ۱۵۷۵ سنه سنده پاپا سکزنجی غره غووار اسکی طریقت روحانیه لره مخصوص بالجمله امتیازاتی اعطا و جزویت طریقتنه و امتیازاتنه تعرض ایدنلری آفوروز ایله تهدید ایتدی . پاپالرک بو توجه لرینه سبب جزویتلرک پاپالق مقامی و کلیسا منافعه تمامیه صادق اولملری ایدی . پاپالر جزویتلر سایه سنده پروتستانلغه قارشی موفقیتله مبارزه یه کیریشدیلر و خرستیانلغی ممالک بعیده ده نشره موقق اولدیلر .

جزویتلر هر یرده قتولیک عالمنک منافع عمومیه سنی نظر دقته آلدیلر . بر حکمدارک ویا بردولتک منافعه هیچ اهمیت ویرمدیلر . حقیقه عیسانک عسکری ، بناء علیه وکیل عیسی عد ایدیلن پاپانک خادم لری اولدیلر . مسلک لرینی : « Pour la plus grande gloire de Dieu » جمله سیله اجمال ایتمشلردی . بو نقطه نظر دن جزویتلر هیچ بر ملت و مملکتنه منسوب دکلدلرلر . ایشته ، اوروپاده بر چوق حکومتلرک جزویتلره امنیت ایدمه ملرینه ، خصومت کو سترملرینه سبب بوذر .

میزویتلرک زرقبانی

جمعیت قانوننک شدتنه رغماً جزویتلر پک چابوق چوغاله رق بر رئیسه تابع منتظم بر اردو وجوده کتیردیلر . ۱۵۴۰ ده جزویتلر اون کشیدن عبارت ایکن صورت قطعیه ده تشکلندن اون آلتی سنه صکره بش یوز کشیه بالغ اولدیلر . ژاپونیا و چینده بیله برر ولایتلری وار ایدی . بو اردو پاپالق مقامنه خدمت ، مذاهب سائره یه هجوم ایچون تشکیل ایدلمش اولدیغدن ایلك اوجکه پروتستانلغک ک زیاده ترقی ایتمش اولدیغی

آلمانیادہ ایشہ باشلادی۔ ایغناس دولویولا جمعیتک پاپالقی مقامنبجہ تصدیقنی
 متعاقب (لوفہور) ی رن حوالیسنہ کوندردی [۱۵۴۰]۔ براز صکرہ
 (ژہی Jay) و (قانیسیوس Canisius) باویرایہ کیتدیلر و ۱۵۴۹ دە
 (اینگولشتات Ingolstadt) دارالفنونہ الہیات معامی اولدیلر۔ ۱۵۵۱ دە
 (قانیسیوس) ویانہ دارالفنونی تشکیلاتی تعدیل واصلح ایتدی۔ ایرتسی
 سنہ ایغناس آلمانیایچون «جرمان قولہژری» نامیلہ رومادہ بر مکتب
 تأسیس ایلدی۔ پک آز زمان ظرفندہ جزویتلر همان ہریردہ، حتی
 پروتستان مملکتلردہ مکتبلر آچدیلر۔ ۱۵۵۶ دن ۱۵۷۲ تاریخنہ قدر
 اون بش سنہ ظرفندہ قولونیا، مونیک، ترہو، مایانس، آٹوگسبورغ،
 دیلینکن، وورچبورغ، پوزن شہرلرندہ یرلشدیلر۔ ۱۵۸۵ دن عصر
 نہایتہ قدر کچن زمان ظرفندہ راتیسبون، مونستر، سالچبورغ، یامبرغ،
 ہیلدہسہایم Hildesheim، بادہربورن Paderborn، پراغ شہرلریلہ آلمانیانک
 سائر بیوک قتولیک شہرلرندہ، پینی بادہ، اسویچرہ دہ قولہ ژلر تأسیس ایتدیلر۔
 مع مافیہ باشلیجہ مرکز فعالیتلری ویانہ، قولونیا، ترہو، اینگولشتات ایدی۔
 آلمانیادہ لوتر مذہبی عالمہ ظہور ایدن جریانی بتون قوتلریلہ تشدیدہ
 چالیشدیلر۔ جزویتلر اوروپادہ تدریسات تالیہنک مؤسسہلریدر۔ تدریسات
 تالیہیہ السنہ قدیمہی، یونان ولاتین ادبیاتی اساس اتخاڈ ایتدیلر۔
 مکتبلری او قدر چابوق ترقی ایتدی، کہ ۱۵۵۶ تاریخندہ یالکز آلمانیادہ
 ۳۶ جزویت مکتبنہ آلتی بیک قدر شا کرد دوام ایدیوردی۔ بو مکتبلرہ
 زادکان چوجقلرینی وحتی حکمدار زادہلری جلبہ موفق اولدیلر۔
 شا کردلرینی قتولیکلکہ ربط ایلدیلر۔

فرانسہ دہ جزویتلر برچوق مشکلاتہ اوغرا دیلر، خیلی زحمت چکدیلر۔
 خصم بی امانلری اولان هوغنو Huguenot لردن ماعدہ سیاسیون وغالیقانلر، یعنی

فرانسیس کلیسیا سنک استقلال طر فدار لری، تعیر دیگر لہ پارلمنتولر، حقوق شناسلر،
 سوربون، دارالفنون پاپالق مقامنک مطیع خادم لری اولان جزویتلرک
 علینده ایدیلر. دارالفنون ۱۵۵۴ سنه سنده جزویتلرک فرانسیس یه دخول لری
 منع ایتدیردی. فقط براز صکره جزویتلر فرانسیس یه کیرمک ایچون مساعده
 ایلر و ۱۵۶۴ سنه سنده مشهور (قلمون) قولرینی تأسیس ایتدیلر.
 فرانسیسده ظهور ایدن دین محاربه لرینه اشترا کلرندن طولای ۱۵۹۴ سنه سنده
 طرد و تبعید ایدیلر. قرال دردنجی هانری پاپالق مقامیلہ خوش کچنمک
 آرزو سنده بولندی ایچون ۱۶۰۳ تاریخده جزویتلری فرانسیس یه چاغیردی
 وحتی ایچلرندن برینی Confesseur آلدی. بوندن صکره بتون فرانسیس
 قرال لری قونفہ سورلرینی جزویتلردن انتخاب ایتملر در.

جزویتلر انکلتريہ دخی کیرمک چالیشدیلر. ۱۵۸۰ ده تبدیل قیافت
 ایدن اون اوچ جزویت بریتانیا آطه سنه چقیدی. فقط بونلرک موفقیاتلری
 قرالیچه الیزابتی تلاشہ دوشوردیکندن جزویتلر تعقیب و تضیق ایدیلر.
 حتی ایچلرندن بری اعدام اولندی. «باروت وقعہ بی» نامیلہ معروف
 اولان سوہ قصد مناسبتیلہ اوچ جزویت دها اعدام ایدلدی. بو جزویتلر
 اعتراف ذنوب مناسبتیلہ سوہ قصددن خبردار اولدقلری حالده حکومتہ اخبار
 کیفیت ایتہ مشلر ایدی.

قاردينال هوزیوس Hosius ۱۵۶۵ ده جزویتلری لهستانہ چاغیردی.
 جزویتلر بورادہ موفقیات عظیمہ یه نائل اولدیلر. قرال اوچنجی سکیز موندک
 توجهنی قزاندیلر و پولونیا ولایت و آبیاده کی اورتودوکسلرک قسم اعظمی قتولیک
 مذهبہ ارجاع ایتدیلر [۱۵۹۰ - ۱۵۹۶].

فقط جزویت جمعیتک توسع و ترقی فوق العاده سی ایسہ ریا شبہ جزیرہ
 سندہ کورلدی. ایغناس جمعیتک بدایت تشکیلندہ آرقداشلرندن (فرانسوا افزاویہ)

ایلہ (رودریکز) ی پورٹکیزہ کوندرمشدی . فرانسوا قزاویہ ۱۵۴۱ء .
 ہند شرقیہ کیتدی . فقط رودریکز پورٹکیزہ قالدی و ۱۵۴۳ء .
 ولی عہد سلطنت مرہیسی اولدی . موقع ونفوذی سایہ سندنہ مکتبلر آجدی .
 بونلردن صکرہ جزویتلر لیزبون صراپندنہ بیوک بر حکم ونفوذہ صاحب
 اولدیلر .

اسپانیادہ جزویتلر دومینیکنلرک رقابتلرینہ معروض قالدقلى
 وشارلکنک توجہنہ نائل اولہ مدقلى ایچون بودرجہ سرعتلہ تأمین موفقیت
 ایدہ مدیلر . فقط ۱۵۴۸ء تاریخنہ قاتالونیا والی عمومیسى اولوب دوق
 دوغاندی عنوانی حائر بولنان فرانسوا دوبورجیا - کہ بالاخرہ جمعیتک
 اوچنچى جنرالی اولمشدر - غانیدہ تأسیس ایلدیکی دارالفنونک اداره سنى
 جزویتلرہ تودیع ایلدیکندن بوندن صکرہ جزویتلر صورت قطعہ دہ
 اسپانیادہ یرلشدیلر .

یکی طریقت روحانیہ نک ترقیسی یالکز جزویتلرک فرط غیرت ،
 فعالیت و مہارتلردن ایلری کلپوردی . جزویتلر آرسندنہ پک مشہور
 المہیات متخصصلری ، عالملر ، مورخلر یتیشمش ، نشر دین و تدریسات
 ایلہ مشغول اولانلرک بر قسمی پابلق مقامنجه اہنہ تصارا صرہ سندنہ
 کچرلمشدر . ایشتہ جمعیت موفقیاتى بوکی مشاہیرہ مدیوندر .

جزویتلرک بحر محیطلرک اوتہ طرفندہ کی ممالکہ میسیونر صفیلہ کیتملری
 فرانسوا قزاویہ نک ہند شرقیہ عزیمتی ایلہ باشلامشدی . قتولیک دینک
 ممالک بعیدہ دہ انتشاری دخی ۱۶ نجی عصر دہ اجرا ایدیلن اصلاحاتک
 نمرہ سیدر .

جزویتلر پروتستانلغہ قارشى ایلک موفقیاتلری
 ترانت مجلس روحانیی احرازایتدکلری صرہ دہ قتولیک کلیسایى ترانت

مجلس روحانیسندہ کندی احوالی اصلاح ایتمک ایچون تدابیر لازمه اتخاذ ایتمکده ایدی .

لوتر پاپا ایله آره سندہ اختلاف ظهور ایتدیکی زماندن بری بر مجلس روحانی اجتماعنی طلب ایتمشدی . (وورمس) دیت مجلسندہ لوترک محکومیتدن صکره دخی شارل کن ایله قتولیکلر بویله بر مجلس ایسته مشلردی . ۱۵۲۲ سنه سندہ پاپا آلتیجی (آدریهن) مجلس روحانینک اجتماعی اسبابنی تهیه باشلامشدی . مجلس هم رفض وبدعتی منع ایده جک، هم ده قتولیک کلیسایی اصلاح ایلیه جک ایدی . فقط برچوق احوال واز جمله شارل کن وبرنجی فرانسوا آره سندہ کی محاربات مجلسک اجتماعی یکرمی اوچ سنه، ۱۵۴۵ تاریخنه قدر تأخیر ایتدی .

مجلس مذاکراته باشلادقدن صکره دخی احوال حربیه نک تأثیریه ایکی دفعه تأخیر ایدلدی . ۱۵۴۹ دن ۱۵۵۱ تاریخنه قدر مذاکرات منقطع اولدقدن صکره ۱۵۵۲ ده تکرار باشلایوب ۱۵۶۰ سنه سنه قدر دوام ایتدی . بوضورتله ایلك وصوک جلسهلر آره سندہ اون سکز سنه کچدی ایسه ده حقیقت حالده مجلسک مدت دوامی آنجق سکز سنه در . بتون قتولیک مملکتلری بو مجلس عمومیه اشتراک ایتدیلر . اعضائک عددی تقریباً ۲۵۰ ایدی . (ترانت) شهری ایتالیا و آلمانیا حدودنده بولندیغدن اک زیاده بو ایکی مملکت رؤسای روحانیه سی حاضر بولندیلر . فرانسزلر آنجق صوک جلسهلر ده مهم بر رول اوینادیلر .

برچوق دفعهلر مجلسه دعوت ایدیلن پروتستانلر اشتراک ایتدیلر . فراتسه ایله ایمپراطور فردیناندک مأمورلری طرفندن واقع اولان تألیف بین تشبثلرندن هیچ برفانده حاصل اولمدی .

ترانت مجلس روحانیسی الہم قرارلرینی صوڪ
 دررہ اجتماعیہ ده [۱۵۶۰ - ۱۵۶۳] ویردی .
 بوقرارلر ایکی نوع ایدی . بر قسمی اساس
 مقرراتی

اعتقاده متعلق ایدی ؛ بتون قتولیک دولتر بنوع مقرراتی قبول ایتدیلر .
 بر قسمی انضباطه، یعنی کلیسانک تشکیلاتنه، هیئت رهبانک احوال و شرائط
 معیشتنه و پاپالق مقامی ایله مناسباتنه دا ارایدی . بنوع مقررات بتون قتولیک
 مملکتلرنجه قبول ایدلمدی و فرانسه ده اوزون مدت شدتلی بر مخالفته معروض
 قالدی .

مجلس روحانی اولاً توراتک بتون قتولیکلرجه لایتغیر و موثوق عد
 ایدیلن متنی قرارلشدیردی . بونک ایچوندہ دردنجی عصرده سن ژہ روم
 طرفدن یونانجه متندن لاتینجه به نقل ایدلمش ترجمہی قبول ایتدی .
 پروتستانلرک ایکی یه ایندیرمک ایسته دکلری یدی آیین روحانی ب ابقا ایلدی .
 Eucharistie دنیلن آیینده مسیحک لحم و دمنه تمثیلاً تقدیس ایدیلهرک اکل
 اولنان شرابه باتیرلمش اکمکده مسیحک حقیقه موجود اولدیغنه - که لو تر
 مذہبنجه قسماً قبول ایدلمش ، قالوهن طرفدن بسبتون رد و انکار
 اولنمشدی - قرار ویردی . کلیسا اعتقاداتنک کتب مقدسه یه مستند
 اولدیغنی و نقلیاتنک کتب مذکورہ احکامی اکمال ایلدیکنی، روما کلیسانک
 دیگرلرینه متفوق بولندیغنی، بتون قتولیکلرک سن پیهرک خلفی و مسیحک
 وکیلی اولان پاپانک حکومت روحانیسنه مطیع اولملری لازم کله جکنی
 اعلان ایتدی . ایشته ، « ترانت مجلس روحانیسی اعتقادنامہ سی » عنوانی
 آلتندہ نشر ایدیلن عقائدہ متعلق مقرراتک باشلیجه لری بونلر ایدی .

انضباط مسئلہ سنده مجلس روحانی دعالرده و آیین روحانیلرده بتون
 عالمه شامل بر لسان عد ایدیلن لاتینجه نک کافی السابق استعمالنه قرار

ویردی. پروتستانلر طرفندن طلب ایدیلن ویدنجی غره غووار زماندنبری ممنوع اولان رهبانك تاهللرینه مساعده ایتدی. بر راهبك ایکی ویا متعدد مناصب روحانیه یی درعهده ایلمنی منع ایتدی. راهب وپسقیوسلرك دائره روحانیه لری داخلنده اقامت ولاقلا هفته ده بر دفعه، بازار کونی وعظ ونصیحت ایتلری قرارلشدیرلدی. اوتوز یاشنده اولیان بر راهب پسقیوس، یکرمی بش یاشنی اکمال ایتمه مش اولان کیمسه لر راهب اولیه جق ایدی. هیئت رهبانك ایی تحصیل کورمش ذواتدن مرکب اولمسه اعتنا ایدلمتی، بونك ایچونده مکاتب خصوصیه تأسیس اولنمی قرارکیر اولدی. بوندن بشقه مجلس هر برده رهبان طرفندن مجانی تحصیل ایچون ابتدائی مکتبلری کشادینه قرار ویردی.

تفصیلات سابقه دن آ کلاشیلدیغی اوزره ترانت مجلس روحانیسی هم رفض وبدعتی ازاله ایتك، همده اخلاقی تصفیه ایتك غایه سنی تعقیب ایتشدی. هرایکی درلو مقررات عمومی وبناء علیه بتون عالم عیسویته شامل بر مجلس روحانیدن صادر اولدیغی ایچون بتون خرسیتیانلرجه واجب الرعایه ایدی. یالکزر آرده شو فرق وار ایدی که اساس اعتقاده تعلق ایدن مقرراتك عدم قبولی قتولیک دیندن ایرلمنی ورفض وبدعتی انتاج ایتدیکی حالده انضباط واصلاته متعلق قرارلر زمان وممالك ایجاباته کوره دکیشدیکندن بونلرك رد وانکاری مطلقا آفوروزی مستلرم دکلدی. بوقرارلره رعایت ایتمه مك کلیسایه قارشی بر جرأت، بر عصیان، حتی اعتزال اوله بیلیردی. فقط رفض وبدعت دکلدی. بعض قتولیک دولتلرك ترانت مجلس روحانیسی مقرراتندن بعضلرینی قبول ایتك ایسته مدکاری تدقیق اولندیغی زمان بو فرقلری نظر دفته آلمق ایجاب ایدر.

پاپالر ترانت مجلسی مقرراتك موقع تطبیقه وضعی ایچون تدابیر مختلفه

اتحاد ایتدیلر . قتولیکلرجه اوقونمسی ممنوع اولان کتابلرک اسامیسنی
مین بر قتالوغ نشر ایلدیلر . دردنجی پول انکیز یسیونو اصلاح ورهبانه
نظارت ، قتولیک عقائد اساسیه سنه مغایر مذاهب و مسائلی نشر ایدنلری
تعقیب و حتی احراق بالنار جزاسنه محکوم ایتمک وظیفه سیله مکلف ایتدی .
پاپالر اصلاحاتده هر کسه نمونه امثال اولمق ایسته دیلر . روما سرایندن
زینت و سفاهت قالقدی . پاپا بشنچی پی [۱۵۶۶ - ۱۵۷۲] نك مناستر
راهبرلی کبی ساده جه پشادینی و روماده دینی آلایلری آیقلری چیپلاق
اولدینی حالده تعقیب ایلدیکی کورلدی . پاپانک کوستردیکی بو حال عمومیتله
تقلید ایدلدی . قتولیک هیئت رهباننده وقوعه کلن تحولات پروتستانلغ
ترقیسنه خیلی مانع اولدی .

پروتستان ره فورمه سی قتولیک کلیساسندن
قتولیک ره فورمه سنک
آیری متعدد خصوصی کلیسالرک تأسیسنه
ارصاف ممبره سی و آوروپانک مذهب نقطه نظرندن انقسامنه

سبب اولدینی حالده قتولیک ره فورمه سی بالعکس وحدت اساسی محافظه
مدار اولدی . بتون قتولیک مملکتلر آرمسنده وحدت اعتقاددن طولانی
موجود اولان روابطی ده صیقی ، ده صیمی برشکله قویدی . بو
نقطه نظر دندر ، که آینلرده لسان ملینک استعمالنه مساعدده ایدلمیه رک
کافی السابق لاینجه محافظه اولندی . ینه محافظه وحدت مقصدیله درکه
پاپانک ممالک مختلفه کلیسالرینه تفوق و تقدیمی اساسی ترک ایدلدی . بتون
قتولیک کلیسالری بر وجود تشکیل ایدمک و بو وجودک بر باشی
بولنه حق ایدی . ترانت مجلس روحانیسی پاپای عمومی کلیسانک و بتون
هیئت رهبانک رئیس اعلان ایتدیکی کبی کتب مقدسه یی تفسیر ایتمک

حقتك يالكىز اوکا عائد اولديغى ، پاپانك بتون مجالس روحانيه‌نك فوقنده يولنديغى قبول ايتدى . الحاصل ، کلیساده هرشيئك مبدأ و منتهاسی پاپا ایدی ؛ پاپانق مقاضك نفوذی بواصلاحات ايله او قدر آرتدی ، که سکنجی قله‌مان [۱۵۹۲ - ۱۶۰۵] زماننده کی Jubilé مراسمنده رومایه کن زوارك مقداری اوچ میلیونه بالغ اولدی .

۵

فرانسه‌ده مذهب محاربه‌لری

و

منازعات داخلیه

فرانسه‌ده ره فورم ۱۵۶۳ دن ۱۵۹۳ تاریخته اوتوز سنه قدر فرانسه‌ی تخریب ایتش اولان مذهب محاربه‌لریله منازعات داخلیه‌ی آکلامق ایچون بوملکتنده ره فورمه‌نك بدایه فصل باشلادیغی ، بعده مذاهب جدیدنه‌نك نه‌صورتله انتشار ایلدیکنی تدقیق ایتك ایجاب ایدر . « کلیسانك بیوک قیزی » اولان فرانسه‌ده اون آلتنجی عصر ایتداسنده دین هرملکتندها صمیمی وقوتلی ، هیئت رهبان دها ای ایدی . فرانسز راهب‌لری اکثریتله ملتك افکار منوره صاحب‌لری آره‌سندن یتیشورلر ، رومایه طوغرویدن طوغری به‌تابع اولمدق‌لری ایچون وظیفه‌لرینی منافع وطنیه و ملیه به‌توفیقاً ایفا ایدیورلر ایدی . مع مافیه اوراده دخی کلیسا سوء استعمالاتی موجود ایدی . بو سوء استعمالات تجدد دینی فکرینه زمین

حاضر لامشدی . لوفہ وردہ تاپل Lefevre d' Etaples [۱۴۵۵-۱۵۳۶] اسمندہ مشہور بر ریاضی وفلسوف لوتر دن آلتی سنہ اول دینی کتب مقدسہ احکامنہ توفیقاً اصلاح وصافیت ابتدائیسنہ ارجاع لزومندن بحث ایتمش وانجیلی فرانسیزجہیہ ترجمہ ایلشدی .

بنابرین فرانسیہ نک اوزمانکی حالی لوتر مذہبنک انتشارینہ پک مساعد ایدی . لوتر مذہبی ایلک اوکجہ قوندرہ جی، مرانغوز وسائرہ کبی آشاغی صنف خلق آرسندہ انتشار ایتدی . صکرہ ، بعض راہبلر دخی مذہب جدیدی قبول ایتدیلر .

بدایہ پروتستانلری تعقیب وتضیق ایتدیلر . برنجی فرانسوا احتمال کہ شارل کنہ قارشی آلمانیدہ کی پروتستانلرک معاونتی تأمین ایتمک امیدندہ بولندیغی ایچون اسباب سیاسیه مبنی، یاخود بلکہدہ مذہب جدید اربابنک کلیسا ایلہ باریشہ جقلرینی ظن وتخمین ایلدیکی ایچون شدت کوسترمه مک مقصدیلہ ۱۵۳۴ تاریخنہ قدر رہ فورمہیہ ہان ہان مساعد طاوراندی . فرانسوانک ہمشیرہ سی وناوار قرالیچہ سی (مارگریٹ دانغولہم) پروتستانلری حمایہ وکندی شاتوسنہ قبول ایتمکدہ ایدی . فرانسوا (ملانختون) ایلہ مخبرہ ایدیور واونی (قولہ ژ دو فرانس) ہ مدیر یامق ایستہ یوردی . برچوق دفعہ پارلمتویی پروتستانلر علیہندہ اتخاذ تدابیردن منع ایتدی . فقط مذہب جدید اربابی کلیسالردہ مریم آنا واعزہ نصارا استاتولرینی قیریورلر ، قتولیکلری حدتلندیوریورلردی . حتی ۱۵۳۴ سنہ سندہ بر کون بتون شہرلردہ قتولیک آیینلرینہ اعتقادانہ حقارتی متضمن یافته لر یاپیشدیرلدی . بونلردن بری قرالک اوطہسی قپوسنہ تعلیق ایدلمشدی . بو ، قرال علیہنہ بر حرکت عد اولندی ؛ برنجی فرانسوا شدت کوسترمکہ قرار ویردی . برقاچ آیدہ پارسدہ قرق

قدر پروتستان اعدامه محکوم اوله رق دیری دیری یاقیدیلر .
 برنجی فرانسوانک اواخر حکومتده دها نجیع وقایع کورلدی .
 جنوبی فرانسه‌ده (ووقلوز Vaucuse) طاغلرنده اقامت ایدن اهالی
 اون اوچنچی عصردن بری قتولیک اساساتنه مغایر بر مذهب سالک ایدیلر .
 بو مذهب مؤسسسی (پیهروو Pierre Vaux) اسمنده بر آدم اولدیغندن
 سالکترینده مؤسسینک فامنه نسبتله (وودووالر Vaudois) نامی ویرلمشدی .
 اوزمانه قدر هیچ کیمسه بونلری راحتسز ایتمه‌مش ایکن ۱۵۴۵-سنه‌سندمه
 متعصب قتولیکلر وودووالرک مملکتلرینه هجوم ایدرک اوچ کوچک شهر
 ویکرمی ایکی کوی یاقیدیلر ، اوچ بیک کشی یی اولدیردیلر ، یوزلرجه
 کیمسه‌لری کیلرده فورسه صفیله قولاندیلر ، چوجقلری اسیرکی صا‌تدیلر .
 بوفجایع پک چوق کیمسه‌لری هیچ متأثر ایتدکن ماعدا بسقپوسلری
 ارباب رفض و بدعتک تعقیبنده بطائله حرکت ایتدکلرندن طولای تعیب
 ایدنلر دخی وار ایدی . ایکنجی هازی بوجمله‌دن ایدی . قرال اولور
 اولماز تعقیبات شدیدده بولمغه باشلادی . پروتستانلره قراللغک دشمنی ،
 عاداتا عاصی نظریله باقیور ایدی . اوصردهه قالوینیزم مذهبی فرانسه‌ده
 تعم ایتکه ولوتر مذهبک مقامنه قائم اولمغه باشلامشدی . اوچ سنه‌ده
 یالکیز پارس پارلمتوسی آلتشی اعدام ایدمک اوزره تقریباً بشیوزکشیی
 محکوم ایتدی .

مذهب جدید اربابنه ویریلن جزالریا بر الده موم اولدیغی حالده
 بر کلیسا قپوسی اوکنده دیز چوکوب علناً توبه ایتک و جزای نقدی
 ویرمک ، بر مدت‌ده حبس‌خانه‌یه کیرمک ؛ یاخود طار بر زندانده الی‌البد
 محبوس قالمق ویا دیری دیری یاقیلمق ایدی . احراق بالنار جزاسنه
 محکوم اولان کیمسه بر اودون ییغنی اوستنه تصادف ایده‌جک صورتده

زنجیر ایلہ بر دیرکہ آویلردی . اکر خلقہ خطاباً سوز سویلہ میہ جگنی
تعهد ایدرسہ یاقیلمازدن اول اخناق ایدلمک لطفنہ نائل اولوردی . اکر بونی
تعهد ایتمز ایسہ جلاد اولادیلنی قوپاریر ؛ صکرہ دیری دیری یاقاردی .
احراق بالئار مستثنا بر جزا اولیوب علی العادہ جنایتلر حقنہ دخی
تطیق ایدیلردی .

بوکی مظالم دائماً عینی نتیجہ یی حاصل ایدر : مظلومین یکی دینلرینہ
دہا زیادہ مربوط اولورلر ، بودینی یکیدن یکیہ برچوق کیمسہ لر قبول
ایدر . فرانسدہ دخی بویلہ اولدی . پک چوق شدت کوسترلیدی وحتی
۱۵۵۹ دہ رفض وبدعت اربابنہ اعدامدن بشقہ جزا ویرلمہ سی امر
ایدلیکی حالده فرانسنک ہر طرفندہ قالوینیستلر چوغالدی ؛ تاریخ مذکورده
۷۲ قالوینیست کلیسائی وار ایکن ایکی سنہ صکرہ ایکی بیگ کلیسائی
تجاوز ایتدی . عینی زماندہ بالخاصہ غرب وجنوب طرفلرنده پک چوق
زادکان مذهب جدیدہ داخل اولدیلر .

بدایۃً قالوینیستلر آشانی صنف اہالیدن ، فقرادن عبارت ایکن
ہردرلو مظالمہ سسزجہ بیون اکمکدہ ایدیلر . صکرہ دن زادکانک مذهب
جدیدی قبول ایتلری اوزرینہ ایش دیکشیدی . زادکانک مذہبلرینی
قلیج ایلہ مدافعہ ایدہ جکلری شہہ سز ایدی . اونلرک مذهب جدیدی
قبول ایتلری قالوینیستلری سیاسی وعسکری بر فرقہ حالتہ قویدی .
بونک نتیجہ سی اولہ رقندہ مذهب محاربہ لری ظہور ایتدی .

فرانسدہ قالوینیزم مذہبی انتشار وتکامل ایتدیکی
یکنجی فرانسوا دسرای
صرمدہ ایکنجی ہانزی وفات ایتدی . ایلک ایکی
خانی واوغلی صبی ایکن تختہ چیقیدیلر . ایکنجی
فرانسوا [۱۵۵۹ - ۱۵۶۰] اون آلتی یاشندہ ایدی . وفاتی متعاقب

یرینه کچن طقوزنجی شارل اون یاشنده ایدی . بوحال نفوذ حکومتی اله کچیرمک ایسته یین سرای زادکانی آره سنده رقابتلر ، خصوصتیلر ، انتریقهلر تولید ایلدی ؛ هم منافع شخصییه ، هم ده منافع سیاسییه و دینییه ایچون بربرلیله چاریشمغه مهیا فرقلرک تشکله سبب اولدی .

اوزمان سرایده حکومتی اله کچیرمکه مقتدر اوچ عائله واردی : بوربونلر ، مونمورانسیلر ، کیزلر .

بوربونلر قرالک اقرباسی ایدیلر . بیوکلری آنطوان دوبوربون (مارگریت دانغولم) ک قیزی (ژان دالبه Jeanne d'Albret) ایله ازدواجندن طولانی ناوار قرالی اولمشدی . ایکنجیلری شارل دوبوربون صنف روحانییه منسوب اولوب روان سرپسقیوسی وقاردینال ایدی . اوچنجیلری واک حریص وفعالی لوی (پرنس دوکونده) عنواتی حائز اولوب برادری آنطوان ایله برلکده قالوینیست ایدی .

قراللغک اک اسکی ، اک زنکین ، اک غلبهلق خاندانی اولان مونمورانسیلرک رئیس قونه تابل دوق دومونمورانسی بر چوق محارباتده بولنمش ، ایکنجی هازرییه مشاورلک ایتمش متعصب برقتولیک ایدی . حال بوکه یکنلری اولان وایکیسی ده مشهور قوماندان بولسان امیرال دوقولینی ایله (آدهلو) قالوینیست ایدیلر .

کیزلر (لورهن) دوقلرینک اولاد واحفادی ایدی . لورهن اوزمان آلمانیا ایمپراطورلغنه مربوط ایدی . فقط کیزلرک مالکانه لری فرانسه ده اولدینی کبی بوخاندان ایله بوربونلر آره سنده روابط قرابت موجودایدی . ایکنجی هازری زماننده قراللغه خدمات فوق العاده سی سبق ایتمش اولان فرانسوا دوکیز ایله کوچک برادری وره نس سرپسقیوسی قاردینال شارل دوکیز قتولیکلکه غایت مربوط ایدیلر .

بوربونلر ایله قولینی قالوینیست اولدقلری ایچون متفق ایدیلر . قالوینیستلر بونلری رئیس طانیورلردی . مونمورانسی وکیز خاندانلرینک متحداً حرکت ایتملری اقتضا ایدرکن آرده کی رقابت اتفاقه مانع اولیوردی . هربرائله نك کندینه مخصوص برسیاست دینه سی وار ایدی . بدایت مخاصماتدن اعتباراً کیزلر غایت متعصب قتولیکلر کی حرکت ایتدیلر ، مونمورانسیلر ایسه اعتدال ایله طاورانیدیلر وحتی مسامحه و مساعدیه طرفدار کوروندیلر .

ایکنجی فرانسوانک جلوسی اوزرینه کیزلر حکومتی اله کیزلرک حکومتی آدیلر . قرالک زوجہ سی ماری استوارت کیزلرک یکنی ایدی . فرانسوا حکومتی فرانسوا وشارل دوکیزه براقدی . پروتستانلر علیهنه تعقیبات شدیدہ باشلادی . پروتستانلرک کثرتله اعدام و احراق اولملری ، (قاتوقامبریزی) معاهده سندن صکره بی لزوم قالان عسکرلرک قسماً ترخیص ایدملری بیوک خشنودسزلقلره سبب اولدی . حکومتی کیزلرک نفوذندن قورتارمق مقصدیلہ قرالی قالدیرمق ایچون برجمیت خفیہ تشکل ایتدی . بوجمیتک رئیس خفییسی پرنس دو قونده ایدی . بو تصوردن خبردار اولان قالوون جمعیت خفیہ یی تعیب ایدیور و« دوکوله جک بردامله قاندن فرانسه یی باشند باشه قانه غرق ایده جک نهرلر حاصل اولور » دییوردی . فقط سوزینی دیکله تمہدی . مع مافیہ جمعیت خفیہ - اعضا سندن برینک اهانیتله - میدانہ چیقارلدی . کیزلر قرالی تحت امنیتده بولندیرمق ایچون (آمبواز) شاتوسنه کوتوردیلر . جوارده کی اورمانده آنسزین اله کچیریلن جمعیت خفیہ اعضاسی اعدام ایدلدیلر [۱۵۶۰] . « آمبواز سوء قصدی » عقیم قالمقله برابر قالوینیستلرک فرانسه ده نه قدر قوت قازانمش اولدقلرخی میدانہ چیقاردی . کیزلر دها

زیاده شدت ، ظلم کو سترمکه قرار و یردیلر . قالو نیست فرقه سنی ال
 فعال و قوتلی رئیسندن محروم برامق ایچون (قونده) یی توقیف ، محاکمه
 و اعدامه محکوم ایتدیردیلر . اکر اوصرمده ایکنجی فرانسا و فات ایتمه مش
 اولسه یدی شه سز جزای اعدام موقع تطبیقه قونه جق ایدی .

طغوزنجی مارل قراللق اون یاشنده برچوجق اولان طغوزنجی شارله
 و قالدی . والدءسی (قاترین دوم دیسیس) نائبه حکومت
 قاترین دوم دیسی اولدی . اوزمانه قدر امور دولته بیکانه قالان قاترین
 ۴۱ یاشنده ، فعال و جسور ایدی . بالخاصه اجرای حکومت حریص ،
 انتزیه لرده ماهر ایدی . قالو نیستلر ایله قتولیکلر آرسنده کی مبارزاتک
 قراللق نفوذنی خللدار ایده جکنه قانع ایدی . کن دیسی دین مسئله سنده
 لاقید ایدی . حکم و نفوذی اله الملق ایچون کاه فرقه لردن برینی ، کاه
 دیگرینی التزام ایتدی . پرنس دو قونده یی جزای اعدامدن عفو ایتک
 صورتیله کیزلره قارشى بوربونلرک معاونتی تأمین ایلدی . قرال ایله قراللق
 منافعی نامه قالو نیستلر ایله قتولیکلری باریشدیرمه و مساعده کارانه برمسلك
 تعقیبه چالیشدی .

بویکی سیاستده باشلیجه معاونی باش وکیلی (میشل دولوپیتال
 Michel de l'Hôpital) ایدی . ترقی سن ایله تجربه صاحبی اولان
 میشل عاقل و معتدل برذات ایدی . تدابیر شدید علیه بولنیور و :
 « یحاق فکره قارشى برشی پایه ماز » دییوردی . پروتستانلره حلم و شفقتله
 معامله ایدلمسنى ؛ افراد ملت آرسندن فرقه ، جمعیت ، لوتر طرفدارى ،
 هوغنو ، پاپا طرفدارى کبی اسملرک آرتق قالدیرلمسنى و هر کسک خرستیان
 نامی آلتنده ال اله ویرمسنى ایسته یوردی .

قاترین دوم دیسیس و میشل دولوپیتال ، بدایه ، طرفینی باریشدیرمه

چالیشدیلر ؛ (پوواسی Poissy) ده قتولیک و قالوینیست رؤسای روحانیه- سندن مرکب بر مجلس طوپلادیلر [۱۵۶۱]. مسائل اعتقادی ده ائتلاف حاصل اولدی. بونک اوزرینه قاترین «کانون ثانی فرمانی» نامیله معروف اولان فرمانی [۱۷ کانون ثانی ۱۵۶۲] نشر ایدرک پروتستانلره علناً اجرای آیین ایدیه بیلیمک ایچون شهرلرک طیش محلاتنده و کویلر ده طوپلانمق حقنی بخش ایتدی.

بر یاست مسامحه کارانه بی متضمن اولان کانون ثانی فرمانی
 واسی قنالی صلح و مسالمت داخلیه بی تأمین ایدیه بیلیردی. فقط فکر مسامحه یه قتولیک و قالوینیست همان هر کس دشمن ایدی. قالوینیستلر اکثریتی احراز ایلدکلری جنوب طرفلرلر ده قتولیکلره مذهب جدیدی جبراً قبول ایتدیرمک ایسته دیلر. (مونتبان) ده قتولیکلری جبراً پروتستان کلیسا سینه کوتوردیلر، (مون به لیه) ده بیوک کلیسای یغما و تخریب ایتدکن صکره اوتوز قدر قتولیک اولدیردیلر. (نیم) ده دخی بعض جنايتلر وقوعه کلدی.

۱۵۶۲ سنه سی مارتنده لورندن پارسه عودت ایدن دوق دوکیز (واسی) دن کچموردی. بازار کونی ایدی. بش یوز قدر قالوینیست برصمانلقده اجرای آیین ایدیورلردی. قیوده دوقک معیتده کی آدملر ایله قالوینیستلر آره سنده برغوغا چیقدی. قالوینیستلر کندیلرخی تهلکه ده صانه رق طاش آتمغه باشلادیلر؛ قتولیکلر آرکه بوز ایله مقابله ایتدیلر. نتیجه ده قالوینیستلر دن ۲۳ کشی تلف، یوزی متجاوز آدم مجروح اولدی. بشقه یرلرده دخی قتال وقوعه کلدی. از جمله (تور) ده ایکی یوز قالوینیست اولدیرلر. پارس پارلمنتوسی پروتستانلرک قانون خارجنده عد اولنه جقلرینه دائر برقرار اتخاذایدنجه آرتق حرب داخلینک اوکنی آلمق ممکن اولدی.

سکز مذهب محاربه سی وقوعه کلدی . بونلرک
 مذهب محاربه لربنک
 دوردی طقوزنجی شارل زماننده [۱۵۶۲-۱۵۷۴]
 اوصاف مجزه سی

اولوب دین مسئله سی هر شینه حاکم اولدینی ایچون
 اودرجه قاریشیق دکلدر. دیکر دوردی اوچنجی هانری زمانی [۱۵۷۴-
 ۱۵۸۹] ایله دوردنجی هانرینک دور حکومتیه [۱۵۸۹-۱۵۹۳] مصادف
 اوله رق دین مسئله سنه پولیتیکه و خاندان حکمداریه متعلق مسائل دخی
 انضمام ایتدیکندن غایت قاریشیقدر .

دین محاربه لری ، بالخاصه اولکیلر ، غایت ظالمانه و وحشیانه اولمشدر .
 بو وحشت هم احتراصات دینه ده کی شدتی ، همده اون آلتنجی عصر
 آدملرینک طبیعتی کوسترر . بو آدملر قتلدن ، جنایتدن هیچ چکینمورلردی .
 ۱۵۹۵ تاریخنده اسپانیولر (دولهن Doullens) ی بلا حرب اشغال
 ایتدکلری زمان درت بیکی متجاوز اهالی یی اولدیردیلر . اوزمان اسپانیول
 ضابطانندن بری : « نه یاهلم ، ده آ از اولسه لر ایدی ده آ از کیمسه
 اولدیریلر ایدی . » دیمشدی . شومثال اون آلتنجی عصرده اوروپالیلرک
 اخلاق و طبیعتی ارانه یه کافیدر .

قالوینیستلر ایله قتولیکلر مقابله بالمثل بهانه سیله غایت مرحمتسز طاووراندیلر .
 قالوینیست رؤساسندن بری (دوفینه) قطعه سنی خوف و دهشت ایچنده
 براقدی . (مون بریزون Montbrison) ی ضبط ایتدیکی زمان قلعه
 مدافع لرینی برقله نك اوستندن کندی عسکرلرینک مزاراقلری اوزرینه
 آتیلمغه مجبور ایتدی . ۱۵۶۹ ده ظلم و شدتده آرقداشلری قدرایلری یه
 کیمه یین (قولینی) بیله برشاتوده ۲۶۰ قتولیک کویلی یی قتل ایتدیردی .
 ۱۵۶۷ ده (نیم) ده بسقپوسخانه حولیسنده سکسان قتولیک قتل اولندی ؛
 نعلشری بر قویویه آتیلدقدن صکره قویو طوپراق ایله تولدیرلدی .

قالوینیستلر بالخاصہ قتولیک راہبیری علیہندہ شدت کوستریورلر واونلرہ ظالمانہ اشکنجہلر یاپیورلر ایدی .

قتولیکلر دخی عینی وحشتلہ حرکت ایتمکدہ ایدیلر . (کویہن Guyenne) قطعہ سمدہ اجرای مظالم ایدن قتولیک رؤسائندن بری دائماً یانندہ برجلاد بولندیرر و آغا جلرہ آصیلی اولان جسدلرہ باقہ رق کچدیکی یولی آ کلامق ممکن اولہ بیلہ جکنی سویلر ایدی . برکون قالوینیستلری آغز آغزہ طولنجہ یہ قدر برقویوہ آتدیردی . مع مافیہ فرانسه تاریخی لککدار ایدن اک مدہش جنایت اولان سن بارتلمی قتالی بتون بومظالمی کریدہ براقشدر .

مذہب محاربہ لرینک ایکنجی وصف ممیزی قراللق نفوذینک خللدار اومسی ، قرالک قدرت حکومتک بیلہ انکار ایدلمسیدر . جنوب ولایتندہ پروتستان حرکت دینیہ سی عینی زماندہ سیاسی ، حریت پرورانه و دہ موقراتیک بر حرکت ایدی . قتولیکلرک افادہ سنہ نظر آ پروتستان رؤسای روحانیہ سندن بعضلری وعظلمندہ قراللرک ملتک آرزوسنی یرینہ کتیرمکدن بشقہ برشی یاپہ میہ جقلرینی ، بعضلری ایسہ زادکانک ہیچ بر مزیت ورجحانلری اولہ میہ جقنی بیان ایدیورلرایدی . بعض کویلیلر قرالدن ہیچ قورقمیورلرایدی . دیگر بر مهم وصف ممیز دخی ہراییکی طرفک اجانبندن استمداد ایتیش اولمسیدر . ہراییکی طرف انکلترہ قرالیچہ سی ، اسپانیا قرالی ، آلمانیہ پرنسلی کی اجنبی حکمدارلردن یاردم ایستہ یور ؛ یاخود ایتالیانلردن ، سویچرہ لیلردن ، آلمانلردن اجرتلی عسکر تدارک ایدیوردی . دین مسئلہ سنہ تمامیلہ بیکانہ اولان بو عسکرلر لدی الایجاب دہا چوق اجرت ویرن رقیب طرفہ کچیورپیورلرایدی . (ایوری Ivry) محاربہ سندہ قتولیک

اردوسنك نصفی فلامان، ایتالیان، آرناوود، اسپانیول، والون، آلمان
عسکرندن مرکب ایدی .

طرفین اردولرینك عددی او زمانه قدر يك مهم ایدی . درو
Dreux [۱۵۶۲]، آرق Arques [۱۵۸۹]، ایوری [۱۵۹۰] محاربه‌لرنده
۲۹,۰۰۰، ۳۷,۰۰۰، ۲۸,۰۰۰ محارب وار ایدی. فقط طرفیندن هیچ
بری دیکرینه صورت قطعیده غلبه ایدمه‌دیکندن محاربات چوق اوزون
سوردی . اقلیتده قالان قالوینیستلر ملتک قسم اعظمندن مرکب اولان
قتولیکلره غلبه ایدمه‌بیله‌جک حالده دکلیدلر . قتولیکلر دخی قالوینیستلری
مغلوبیت قطعییه دوچار ایدمه‌میورلردی . چونکه مذهب جدید اربابی
فرانسه‌نك هر طرفه طاغیلمشدی . یالکیز برضربه ایله احما ایدیه‌بیله‌جک
بر مرکز یوق ایدی . اونک ایچون حرکات حربیه نه قدر اوزارسه
اوزاسونینه بر نتیجه‌ده ایدیه‌میوردی . بو حال دردنجی هاترینك
پارسی ضبطنه قدر دوام ایتدی .

ایلك محاربه باشلار باشلاماز اجانبیدن استمداد ایدلدی .
ایلك محاربه قاترین اسپانیا قرالی ایکنجی فیلیپدن امداد ایسته‌دی .
پرنس دو قونده و آمیرال دو قولینی انکلتره قرالیچه‌سی الیزابتدن پاره
وعسکر طلب ایتدیلر . الیزابت بومعاونته مقابل - برنجی فرانسوا زماننده
تأسیس ایدلمش اولان - هاور لیمانك تسلیمنی شرط قویدی . حرب آلتی
آی قدر سوردی .

باشلیجه حرکات حربیه سن ولووار نهرلری آره‌سنده وقوعه‌کلدی .
قتولیکلر رو آتی ضبط ایتدیلر . قتولیکلکه عودت ایتمش اولان ناوار قرالی
بومحاربه‌ده مجروح اولدی . درو محاربه‌سنده (قونده) کیزلرک اله‌اسیردوشدی .
برقاج هفته مکره اورلثانی محاصره ایتمکده اولان فرانسوا دو کیز بر متعصب

پروتستان طرفدن قتل ایدلدی . اوغلی هازی دوکیز باباسنک قتلندن
(قولینی) یی مسئول طوتمق ایسته دی .

برای صکره «آموواز فرمانی» ایله حرب نهایت ویرلدی [۱۵۶۳].
پروتستانلره کانون ثانی فرمانی درجه سنده سربستی ویرمین بوفرمان درت
سنه قدر صلح و مسالمتی تأمین ایتدی . قتولیکلر و پروتستانلر آرده کی
ائتلافی تقویه ایچون مشترکاً حرب ایدرک هاور لیمانی انکیزلردن استرداد
ایتدیلر [۱۵۶۳] .

سرایده بولنان پروتستان و قتولیک رؤسا آرده سنده کی
ایکینجی واریمجی رقابت و امنیتسزک ، پرنس دو قونده نک طقوزنجی
محارب لر شارلی قالدیرمغه تشبث ایتسی ۱۵۶۷ سنه سنده مخاصماته
یکیدن باشلامسینه سبب اولدی . بوصورتله ظهور ایدن ایکینجی و اوچنجی
محارب لر بلافاصله اوچ سنه سوردی [۱۵۶۷-۱۵۷۰] . قونده پاریسی
محاصره یه تشبث ایتدی ؛ فقط مغلوب اولدی . بونک اوزرینه قالوینستلر
لووار نهرینک جنوب طرفلرنده تحشد ایتدیلر . (لاروشل) پروتستانلرک
اک بیوک و قوتلی قلعه لر ایدی . قالوینست اردوسی ایکی دفعه منهزم
اوله رق مجروحاً تسلیم اولان قونده قتولیکلر طرفندن قتل ایدلدی . مع مافیه
پروتستانلرینه حرب دوام ایدیورلردی . قاترین «سن ژرمن فرمانی»
ایله آموواز فرمانی تجدید ایتدی .

سن ژرمن فرمانی فرانسه یه ایکی سنه قدر صلح و مسالمت تأمین ایلدی .
قتولیکلرله پروتستانلر آرده سنده ائتلاف تام حاصل اولمش کی کورونیوردی .
بوائتلافی تأیید ایچون طقوزنجی شارلک همشیره سی مارگریت دووالووانک
ناوار قرالی اولوب پرنس دو قونده نک وفاقی اوزرینه پروتستانلرک رئیس
اولان کنج هازی دوبوربون ایله ازدواجنه قرار ویرلمشدی . سرایده

پك چوق پروتستان زادكان موجود ایدی . سرایه دعوت ایدلمش اولان
 آمیرال دو قولینی قرال اوزرنده بیوك بر نفوذ صاحبی اولمشدی .
 قولینی طقوزنجی شارلی آوستریا خاندانه قارشى اعلان حرب ایله
 آرتووا وفلاندر قطعه لرینك ضبطنه تشویق ایلمكده و قرال دخی بوكا
 میال بولمقده ایدی . فقط قاترین انكلتره دن قورقیدینی ایچون بو حرب
 قطعاً طرفدار دكلدی . بوندن بشقه آمیرال دو قولینیك كوندن كونه
 دها زیاده نفوذ قازانمىندن ، حكومتی بسبتون لندن آلمىندن قورقوردی .
 نهایت ، هازری دو كیز ایله بالاتفاق قولینی بی قتل ایتدیركه قرار ویردی .
 هازری دو بوربونك مارغریت دووالووا ایله ازدواجندن دوت كون
 صكره قولینی سوقاقده بر سوء قصده اوغرا دی ؛ فقط تلف اولمدی ، یالكز
 صول قولندن یاره لندی [۱۵۷۲] . قرال بو جنايتدن فوق العاده متأثر
 اوله رق بر صورت مده شه ده اخذنار ایده جكنی قولینی به تأمین ایتدی .
 بوسوء قصد تاریخك قید ایلدیكى اك جیج قتلردن برینی
 سربارتملى تولید ایلدی . قرال اك امریله هان باشلایان تحقیقات عدلیه
 نتیجه سنده باشلیجه مجرمك هازری دو كیز اولدیغی آكلا شیلدی . هازری
 اختفا ایتمه مش اولسه یدى توقیف ایدیله جك ایدی . قاترین دو مدیسیس
 تحقیقات دوام ایتدیكى حالد كندیسی ایچون ده تهاكلى اولمىندن قورقغه
 باشلادی . بو مشكل موقعدن قورتولمه نك یكانه چاره سی عمومی بر قتال
 اوله جغه قرار ویردی . اوغلی دوق دائر وایله هازری دو كیزه فكرینی
 سویلدی . حقى روايته نظراً بر آقشام طعامدن صكره آمیرال قولینی
 علیهنده كى سوء قصدك كندی امریله اجرا ایدلدىكنی طقوزنجی شارله
 اعتراف ایتدی . هو غنولرك دولت علیهنده سلاح بدست عصیان اولدقلىرندن ،
 صلح و مسالمتك ، حتى قرال اك حیاتك تهلكه ده اولدیغندن ، پروتستان

رؤسائی قتل و امحا ایدلزلرایسہ سلامت عمومیہ نک تأمین ایدیلہ میہ جکندن بحث ایلدی ؛ قرالی خیلی زمان مخالفت کوستردی ؛ نہایت ، والدہ سنک اعترافاندن قورقہ رق : « اولدیریکز ، فقط قتالدن صکرہ بنی مواخذہ ایدہ جک هیچ کیمسہ قالماسی ایچون هپسنی اولدیریکز ! » دیدی . دوق دوکیز پارس بلدیہ سیلہ مشترکاً تدابیر لازمہ یی اتخاذ ایتدی . نصف الیلدہ هر طرفہ لازم کلن امرلر ویرلدی .

قتال سن بارتہلمی یورطیسنہ مصادف ۲۴ آغستوس ۱۵۷۲ بازار کیجہ سی باشلادی . هازی دوکیز قولینینی اقامتکاهنہ قوشدی . آدملردن اوچی مجروحاً یاتان امیرالک اوطہسنہ گیردیلر . کندیسنی قلیج ایلہ اولدیرہ رک نعمتی پنجرہ دن سوقاغہ آتدیلر . دوق دوکیز خصم جانک اولدیرلدیکنہ قانع اولدقدن صکرہ قتالہ نظارت ایچون بشقہ یرہ کیتدی .

لوور سرایندہ پروتستان زادکان قتل ایدلکلری صرمدہ قرالک انشہ سی هازی دوبوربون طقوزنجی شارلک اوطہسنہ کوتورلمش واولوم ایلہ قتولیک مذهبندن برینی انتخابہ اجبار ایدلمشدی . پروتستان زادکانندن بری مارغیت دووالووانک یتاق اوطہسنہ التجا ایتدیکی حالده ینہ حیاتی قورتارہمدی ؛ ناوار قرالیچہ سنک قاریولہ سی یانندہ اتلاف اولندی .

بدایہ ویریلن قرارہ کورہ یالکز رؤسا اولدیریلہ جک ایدی . فقط براز صکرہ عوام ناس دخی عسکرلرہ التحاق ایتدیکندن قتال عمومی بر شکل آلدی . چوجوقلری بیلہ اولدیردیلر . اوکلہ دن اولن ایکی بیگ کشی تلف اولمشدی . پروتستانلر هم قتل اولنیور ، همده خانہ لری یغما واشیالری سرقت ایدیلیور ایدی . قرال ایلہ بلدیہ دائرہ سی بیہودہ یرہ قتالہ نہایت ویرمک ایستہ دیلر . قتال ۲۶ آغستوس صالی کونہ قدر دوام ایتدی .

بیوک شهرلرده دخی قتال اولدی . اورلئانده اوچ کون پروتستانلر اولدیرلدی . لیونده یدی سکز یوز مقتول وارایدی . بتون مقتولینک عددی سکز بیکه چیقدی . برچوق ولایاتده والیر پارسدن آلدقلى امری اجرا ایتیه‌رک پروتستانلری قورتاردیلر .

حریص بر قادی‌نک شخصی جنایتی اولان سن‌بارتلمی قتالی فرانسلرله خطاباً نشرایدیلن بیاننامه‌لرایله آوروپا حکمدارلرینه کوندریلن مکتوبلرده آمیرال ایله طرفدارلرینک تشکیل ایتیش اولدقلى بر جمعیت خفیه‌دن مملکتی قورتارمق ایچون اتخاذایدلمش بر تدبیر عادلانه کبی کوستردی . رؤساسنی غائب ایدن ، فقط یأس و فتوره دوچار اولیان

دردنجی محاربه : قالوینیستلر جملهٔ سلاحلاندیلر . سن‌بارتلمی قتالینک انتاج ایتدیکی دردنجی محاربه برسنه سوردی . قالوینیستلرک قلعه‌سی وعادتا پایتختی اولان لاروشل محاصره ایدلدی ، فقط ضبط اولنه‌مدی [تشرین ثانی ۱۵۷۲ - حزیران ۱۵۷۳] . پروتستانلر سکز آی مدافعه ایدرک بتون هجومری دفع ایتدیلر ونهایت قرال‌دن سربستی و جدان وصلح ومسالت استحصالنه موفق اولدیلر .

اومینجی هازی : طقوزنجی شارل - سبب اولدینی قتال‌دن طولایی متأثر و وجداناً پک معذب اولدیغندن - اون آی صکره ۲۴ یاشنده وفات ایتدی [۳۰ مایس ۱۵۷۴] . یالکیز بر قیزی وارایدی . بنام‌علیه قرالمق - اولجه آنزو دوقه‌سی اولان - برادری اوچنجی هازی‌یه انتقال ایتدی . هازی بر سنه اول لهستان قرال‌لغنه اتخاب ایدلمش اولدینی ایچون اوصرمده لهستانده ایدی . طقوزنجی شارلک وفاتی خبر آنجه فرانسه‌یه عودت ایچون کبزیلجه قاچدی . یکی قران ذکی ومنورالفکر ایدی . فقط اخلاقسز ، متلون ایدی . بعضاً غایت دیندار کورونور ،

بعضاً ایسه پک سفیه اولور ایدی . بوندن طولای تبعه سنک محبتی قازانه مدی .

اوچنجی هازی زماننده قرالغک حالی و محاربات پروتستانه و قتولیک مذهبه ده ازیاده قایلشیق برشکه کیردی . بوقاریشیقلاق انقاعلری اسباب آتیه دن نشأت ایتشدی :

پروتستانلر دردنجی محاربه دن صکره « Union Calviniste » نامیله معروف بر اتفاق تأسیس ایتمشلردی . پروتستانلرک کثرتله بولاندقلری یرلری « حکومت » نامیله قسملره آیرمشلر و هر بر حکومتک باشنه بر « رئیس حرب » ایله بر « مجلس » قویمشلردی . بومجاسلر بالخاصه امور مالیه ایله مشغول اولوب قتولیک و پروتستان بتون اهالیدن ویرکو آلیورلردی . ویرکولرک حاصلاتی مصارف حربیه تخصیص ایدلایکندن قالوینیستلر یالکیز (لانغدوق) ایالتندن یکریمی بیگ عسکر چیقاره بیله جک درجه ده قوتلندیلر . بومحورتله پروتستانلر عادتاً دولت ایچنده بر دولت تأسیس ایتمشن ایدی . رئیسلری ناوار قرالی هازی ایدی .

قتولیکلر ایکی فرقه یه آیرلمشلردی . بعضلری قتالدن ، محاربات داخلیه نك سبب اولدیغی فنالقلردن قورقیورلر ؛ بومحاربه نك فرانسه یی خارجاً ضعیف دوشوردیکنی کوریورلر ؛ سربستی دین قاعده سنک قبولیله صلح و مسالمتک اعاده سنی ایسته یورلر ایدی . بو فرقه نك رئیس « موسیو Monsieur » ، یعنی اوچنجی هازینک برادری فرانسوا دوق دالانسون ایدی .

فقط فرانسزلرک اکثریت عظیمه سی قالوینیستلرک تمامیله احساسی طرفداری ایدیلر . بونلرده بر اتفاق عقد ایدرک قوتلی بر جمعیت تشکیل ایتمشلر ، هازی دوکیزی رئیس انتخاب ایتمشلر ایدی .

فرانسه بویله اوچ فرقه یه آیرلمش ایکن دوق دالانسونک وقاتی ایشی ایشی بسبتون قاریشیدردی [۱۵۸۴] . چونکه قرالک برادری وفات ایدنجه ناوار قرالی هازی ولی عهد سلطنت اولمش، یعنی فرانسه نك برپروتستان قرالک زیر اداره سنه کچمسی احتمالی میدان چیقمش ایدی. بونک اوزرینه قتولیکلر ایله قالوینستلر آره سنده کی خصومت بسبتون کسب شدت ایتدی. اوچنجی هازینک جلوسنی متعاقب بشنجی محاربه باشلادی وایکی سنه سوردی [۱۵۷۴-۱۵۷۶] .

بشنجی محاربه روسیو

مصالحه سی

دوق دالانسون ایله هازی دوناوار اتفاق ایتمشلردی . بونلر آلمانلار یکریمی یک قدر اجرتلی عسکر تدارک ایدرک قتولیکلری مغلوب ایتدکن صکره پارس اوزرینه یوریدیلر. اوچنجی هازی مقاومت ایده جک بر حالده بولمیدیغدن « موسیو مصالحه سی paix de Monsieur » نامیله معروف اولان مصالحه نامه یی ، دها طوغریسی فرمانی امضا ایتدی . بوفرمان موجبجه دوق دالانسون آثرو، تورن ، بهری ایالتلرینی آلدی . پروتستانلر پارس مستثنا اوله رق فرانسه نك هر طرفده سربستی آیین حقنه نائل اولدیلر . تأمینات اولمق اوزرده سکز قلعه پروتستانلرک تحت محافظه سنده بولنه جقدی . سکز یرده اعضاسنک نصفی قالوینست، نصفی قتولیک اولمق شرطیله خصوصی محکمه لر تأسیس ایدلای. هازی دوناوار (کویهن) قطعه سنک ، یکنی کنج پرنس دوقونده (بیقازدیا) نك اداره سنی آلدیلر . شمیدی یه قدر پروتستانلر بودرجه واسع حقوق و امتیازاته نائل اولماشلردی .

فقط فرانسلرلک اکثریت عظیمه سی بوفرماندن اصلا ممنون اولمدیلر. اوصرمده اجتماع ایدن (اتارنه رو) فرانسه ده بر دین بولمنسه، پروتستانلردن سربستی آیین حقنک نزعنه ، پروتستانلری قتولیک یا بمق ایچون بتون

پروتستان رؤسای روحانیه سنک طرد و تبعیدلرینه قرار ویردیکی کبی هان بتون ولایاتده قتولیکلر بالاتفاق بفرقه سیاسیه حالنده برلشدیلر .

قالوینیستلر (اتازنه‌رو) نك قرارینه سلاحه صاریلقله

آلتنجی ویدنجی جواب ویردیلر. آلتنجی محاربه باشلادی [۱۵۷۷] .

محاربه لر
بوحرب پروتستانلره مساعد اولمادی . عقد ایدیلن

مصالحهده اولجه تأمین ایلش اولدقلری بعض حقوقی ترك ایتدیلر. یدنجی

محاربه دخی پروتستانلر ایچون ایی بر نتیجه ویرمدی [۱۵۸۰] .

یدنجی محاربه دن صکره درت سنه صلح و مسالمت

ورانت مسندسی جاری اولدی . فقط ۱۵۸۴ ده دوق دالانسونك

وفات ایلشی وناوار قرالی هازینك ولیعهد اولمقی خصوصتی تشدید

ایتدی . هازری دوکیز بر پروتستان قرالک تحتیه جلوس ایتسنه هیچ

بر صورتیه راضی اولمقی ایسته‌مین قتولیکلرک اتفاقی قوتلندیردی . قتولیکلر

هازری یه قارشى هازینك عمجه‌سی اختیار قاردینال دوبوربونك وارث

سلطنت اعلان ایدلمسنى طلب ایدیورلردی . فقط حقیقت حالده هازری

دوکیز قراللی کنديسی ایچون ایسته‌یوردی . اسپانیا قرالی ایکنجی فیلیپ

ایله اویوشه‌رق براتفاق عقد ایتدی [۱۵۸۴] . پاپالق مقامنی دخی کندی

طرفه جلب ایتدیکندن پاپا (سیکست کن) هازری دوناوارك فرانسه‌تختیه

چیقه‌میه‌جغنی مبین بر فرمان نشر ایلدی [۱۵۸۵] .

دیگر طرفدن قتولیکلر قرالی فرانسه‌ده قتولیکلکدن ماعدا بر مذهبیه

مساعده ایتهمکه ، پروتستان رؤسای روحانیه‌سنى طرد و پروتستانلری

خدمت دولتن اخراج ایلکه اجبار ایدیورلردی . اوچنجی هازری

قتولیکلرک مطالبنی قبول و بوبابده تأمینات اولمقی اوزره طغوز قلعه‌یی

کندیلرینه تسلیم ایتدی . نشر ایدیلن بر فرمانده پروتستانلره ویرلن

بتون مساعدات کریه آلندی و آلتی آی ظرفنده قالوینستلرک یاقتولیک اولملری ویا فرانسه دن چیقوب کیتملری لزومی اعلان اولندی .

بونک اوزرینه ظهورایدن سکزنجی محاربه تام سکزنه
سکزنجی محاربه سوردی [۱۵۸۵ - ۱۵۹۳]. بوکاحکومات اجنیه دخی
مداخله ایتدی. اسپانیاقرالی ایکنجی فیلیپ قتولیکلری وانکلتزه قرالچه سی
الیزابت ، دانیارقه قرالی وپالاتینا لکتوری هازی دوناوارى التزام ایدرک
فرانسه نك محاربات داخله سته قاریشورلر وبوصورتله انکلتزه واسپانیا
آره سنده کی رقابت ، قتولیکلک ایله ره فورمه آره سنده کی مصادمات دوام
ایدیور ایدی .

سکزنجی محاربه وقایعک طرز جریانی اعتباریله ایکی دوریه آریلیر .
اوچ سنه دوام ایدن ایلک دورمه قرال ایله بتون قتولیکلر متفقاً هازی
دوناوار ایله قالوینستلر علیه نه حرب ایتدیلر . هازی دوکیزک قلی
[۱۵۸۸] ایله باشلایان ایکنجی دورمه قتولیکلر ایکیه آیرلیدیلر. محاربات
مذهبی دن بیقمش اولانلر اوچنجی هازینک وفاتی [۱۵۸۹] اوزرینه
حکمدار مشروع اولان هازی دوناوار ایله قالوینستلر یاریم ایدرک
پروتستانلرک احساسی طرفدارى اولان دیگر قتولیکلر قارشى حرب
ایتدیلر .

محاربه نك ایلک اوچ سنه سی ظرفنده هازی دوکیزقتولیکلرک
هازی دوکیز بیوک برقه رمانی اولدی. کیزک هازی دوناوار ایله وقوعه
وارمیشی هازی کلن محارباتده احراز ایلدیکی برقاچ اهمیتسز موفقیت بیوک
مظفیرتیلرکی کوسترلدى؛ پارسده بر شهرت عظیمة قازانمسه سبب اولدی .
قتولیکلرک بر قسمی اوچنجی هازی بی خلع ایدرک یرینه هازی دوکیزی
قرال یا یعنی دوشونیورلر ایدی. قرال بوتهلک کی آکلادی، دوق دوکیزک

پارسیہ کلکسی منع ایتدی . فقط طرفدارلرینک دعوتی اوزرینه هازی دوکیز قرالک امرینه رغماً پارسیہ کیردی واهالی طرفندن بر منجی کبی آلقیشلرله استقبال ایدلدی . اوصرمده قرال پارسیہ اسویچره لیلردن مرکب بر آلائی عسکر ادخال ایتدیکندن پارسلیلر سلاحه صاریلدیلر؛ اسویچره . لیلردن آلتش کشی بی اولدیردیلر؛ سواقلرده باریقادرلر یابدیلر [۱۵۸۸] . اوچنچی هازی عصیان بی باصدیرمق ایچون دوق دوکیزه مراجعه مجبور اولدی .

عصیانک ظهورینی متعاقب قرال پارسدن (شارتر) ه قاجدی . فقط دوق دوکیزی قراللق قائممقاملغنه تعینه مجبور اولدی . براز صکره مضایقه مالیه چاره بولمق ایچون اجتماعه دعوت ایدیلن (آنازه نرو) ده هازی دوکیز حقیقی بر حکمدار کبی حرکت ایتدی . ارال مجلس عمومینک جلسه افتتاحیه سنده حکومت خارجنده تشکل ایتش اولان اتفاقلرک دوامنه آرتق مساعده ایدمه جگنی سویلدیکی حالده دوق دوکیز نطق طبع ایدیلیرکن بو سوزلرک ملی اولمنسی طلب ایتش و قرال ده بالجبوریه راضی اولمشدی . (آنازه نرو) ده دوق ده دوکیزک طرفدار . لری حاکم اولدقلرندن مجلس عمومی قراله تخصیصات اعطاسندن امتناع ایتدیکی کبی بعض ویرکولرک تنزیلنی طلب و مجلس مقرراتنک قرالک آرزوسنه مغایر اولسه بیله قانون حکم وقوتنده عد ایدلمسنی ادعا ایدلدی . قرالک جبراً قالدیروب پارسیه کتیریله جکندن ویا خلع اولنه جغندن دخی بحث ایدیلور ایدی .

قرال محو اوله جغنی آکلادی . بر صباح (بلووا) شاتوسنده مجلس قرالی اجتماع ایتمشدی . قرال کمندی دائره سنده ایدی . دوق دوکیزی یانه چاغیرتدی . دوق قرالک او طه سندن کچرکن سرای محافظلرندن سکزر

اصیلزاده بردن بره اوزرینه هجوم ایدرك كندیسنی اولدیردیلر . دوقك برادری قاردینال دولورنده ایرتسی کونی قتل ایدلدی . بواکی قتل ایله اك زیاده فعالیت کوسترن (اٹاژنه رو) اعضاسنك توقیفی مجلس عمومی یی قورقوتدی ، یوله کتیردی [۱۵۸۹] .

اوچنجی هازی دوق دوکیزك قتل اولدینی کون سفرای اجنیه دن برینه یازدینی مکتوبده « شمعی قرال بئم » دیمشدی . ایرتسی آقشام پارسده برعصیان ظهور ایتدی . قتولیک اتفاقی اوزمانه قدر بالخاصه زادکان وزنکین بورژووالردن مرکبدی . بوندن صکره عوام ناس دخی اتفاقه داخل اوله رق حکم ونفوذی اله آلدیلر . پارسك اون آلتی محله سی طرفدن انتخاب ایدیلن وکیللر برحکومت اختلالیه تشکیل ایدرك اوچنجی هازینك « حاث ، قاتل ، جانی ، خزینة دولتک غاصبی ووطنک دشمنی » اولدیغنی اعلان ایتدیلر . پارس پارلمنتوسنده قرال علیهنه دوقك وبرادرینك قتلدن طولایی اقامة دعوی ایلدیلر . بعده ، قاردینال شارل دوبوربونی قرال یاپدیلر . فقط قاردینال اوچنجی هازی طرفدن حبس ایدلمش اولدینی ایچون هازی دوکیزك برادری دوق دوبایه فی قراللق قائممقامی تعیین ایتدیلر . ولایاتک قسم اعظمی پارس حکومت اختلالیه سنك بومقرراتی قبول ایلدی .

بوندن صکره اوچنجی هازی ایچون هازی دوناوار ایله باریشوب برلکده حرکت ایتمکدن بشقه برچاره قالمامشدی . فرانسه وناوارقراللری آره لرنده حصوله کلن ائتلاف اوزرینه پارس اوزرینه یوریدیلر [۱۵۸۹] و ۳۰,۰۰۰ کشتی ایله شهری تحت محاصره یه آلدیلر . پارسدن اردویه کلن وقراله بر مکتوب تودیغنه مأمور اولدیغنی سویله یین (ژان قله مان) اسمنده یکریمی ایکی یاشنده بر راهب اوچنجی هازینك حضورینه قبول

ایدلدی وقرالی خنچرله اولدیردی . کندیسیدی درعقب اتلاف ایدلدی . اوچنجی هازی وفات ایدرکن ناوار قرالی هازی دوبوربونک وارث سلطنت اولدیغنی تصدیق ایتدی . بونک اوزرینه هازی دوناواردردنجی هازی نامیله قرال اولدی .

دردنجی هازی قراللیقک قسم اعظمی باشه
دردنجی هازینک
یکیدن فتح ایتمک مجبوریتی قارشیسنده بولندی . برپروتستان
قرالک زیر اداره سنده یشامقدن ایسه اولمکی ترجیح
ایدن ، قتولیک زادکانک چوغی هازی بی ترک ایتدیلر . یکی قرال نشر
ایلدیکی بریاننامه ده فرانسه ده قتولیک مذهبی محافظه و ادامه ایده جکنی ،
ضبط اولنه حق شهرلری قتولیکلرک اداره سنه ویره جکنی اعلان ایتدیکندن
قالوینیستلرک برقسیمی ده کندیسندن آیرلایلر .

دردنجی هازینک اردوسی یاریه ایندیکی ایچون پارس محاصره سی
رفع اولندی . فقط هازی قالوینیستلرک قوای اصلیه سنک بولندیغنی جنوب
طرفلرینه طوغری چکیله جکنه پارسه یاقین بولمق ایچون (سن) حوالیسندن
آیرلادی . بعده ، انکلتزه دن معاونت کورمک امیدیه نورماندیا به چکیلدی .
دردت سنه پارسى ضبط ایتمکدن بشقه برشی دوشونمندی . پارس پایتخت
اولدیغنی وباشلیجه رقیبلرینک مرکزی بولندیغنی ایچون بوراسنی ضبط ایتمک
هازری نظرندک مهم برمسئله ایدی . دردنجی هازی کندیسینی تعقیب
ایدن دوق دومایه نی (آرق) ده وقوعه کلن محارباتده مغلوب ایتدکدن
سکره پارسى آنسزین ضبطه تشبث ایتدی ، فقط موفق اوله مدی .

۱۵۹۰ سنه سنده (ایوری) ده دوق دومایه نک عسکريله اسپانیوللردن
مرکب براردویه غلبه ایتدی . اون سکز بیک کشیدن مرکب اولان

قتولیک اردوسنک ضایعاتی یدی بیک کشی ایدی. حال بوکه هازینک معیتند
آنچق ۱۱,۰۰۰ عسکر واردی.

هازی بو پارلاق موفیقی اوزرینه پارسی محاصره ایتدی. عسکری
هجوم ایله شهرى ضبط ایده جک قدر چوق اولمديغدن پارسلیلری آج براقه رق
تسلیمه مجبور ایلک فکرند ایدی. فقط باشلرند مقرر، صیرت لرنده
زره بولنان متعصب راهبرک تشویقله اهالی قحط و غلابه رغماً درت آی
طایاندی. قادینلر بیله حرب ایدیورلر و آجلق سببیه تسلیم اولمقدن
ایسه چوجقلرینی یمی ترجیح ایتدکلرینی «سویلیورلردی. پارس اهالیسی
نا قابل تصویر صیقندیلر چکدیلر. ایکی یوز بیک اهالیدن اون اوچ بیک
محاصره ائناسنده آجلقدن، اوتوز بیک محاصره نک رفعندن صکره
چکدکلری سفالت مدهشه دن تلف اولدیلر.

پارسلیلرک قهرمانجه مقاومتلری پارمه دوقه سی (آلکساندر فارنزه) ک
په پی بادن براردو ایله امداده کلکسنه وقت براقدی. دردنجی هازی
تکرار نورماندیا به چکیلیمکه مجبور اولدی.

حرکات حربیه ایکی سنه ده سوردی. اسپانیا قرالی ایکنجی فیلیپ
فرانسزلرک محاربات داخلیه سنه کیتدکجه دهه زیاده مداخله ایتمکده ایدی.
پارس حکومت اختلالیه سنک طلبی اوزرینه شهره اسپانیول عسکری ادخال
ایتدی. (آلکساندر فارنزه) نورماندیا ده دردنجی هازی ایله حربیه
دوام واونی (روآن) محاصره سنی رفته مجبور ایلدی. فقط قطعی بر مظفریت
قازانه مدی و بر محاربه ده مجروح اوله رق وفات ایتدی.

۱۵۹۳ سنه سننده قتولیکلرک قرال انتخاب ایتیش

هازینک نبیل اولدقلری قاردینال دو بوربون وفات ایتدیکندن

دین اتمی کندیسنه برخلف تعیینی ایچون (ااثزه روه) پارسده

اجتماع ایتدی. اسپانیا قرالی ایکنجی فیلیپ قیزی ایزابلی فرانسه تختنه

چیقارمق ایستہ یوردی . حکومت اختلائیہ اعضاسی آردہ سندنہ اسپانیا قرالتک برآراق فرانسه نک حامیسی اولسنی قبول ایدنلر بولنش اولقلہ برابر مجلس عمومیدہ کی مبعوثلرک اکثریت عظیمہ سندنہ حسیات وطنپرورانہ حسیات دینیہ درجہ سندنہ قوتلی ایدی . ایزابل فرانسه تختہ اجلاس ایدیلیرسہ اجنبی بر پرنس ایلہ ازدواجندن طولای فرانسه نک برکون بر حکمدار اجنبی النہ کچمسی احتمالی واردی . بو احتمال وطنپرورلری قورقوتدی . دوق دومایہ نک تکلیفی اوزرینہ (اتازہ نرو) شوقراری وردی : « قوانین وعاداتمزمزدن اولیان برپرنسی تختہ دعوت وقرالغہ انتخاب ایلمککمزہ مانعدر » .

فرانسه دہ کی یوزاون سکزیسقبوسدن یوزی دردنجی ہازینک حکمدار مشروع اولدیغی تصدیق ایتمشلردی . (اتازہ نرو) سالف الذکرقراری اتحاد ایتدیکی صرمدہ دردنجی ہازی (بورژ) شہرندہ پروتستانلغی ترک ایلہ تکرار قتولیک اولدی . صلح ومسالمتہ پک زیادہ محتاج اولان مملکت بووقعہ یی مسرتلہ تلقی ایتدی . تبدیل دینی متعاقب برمقاولہ عقد ایدلدی وفرانسه نک قسم اعظمی ہازی یی قرال اولہرق طانیدی . ہازی ولایاتی حرب ایلہ تخریب ایتمکدن ایسہ اکثریا پارہ ویرہرک اہالینک اطاعتنی تأمین ایدیورایدی . بوایش ایچون ۱۲۰ میلیون فرانق صرف ایتمشدی . پارس قوماندانی دوق دو (بریساق Brissac) دخی مارشاللق عصاسی و ۱,۸۰۰,۰۰۰ فرانق مقابلندہ شہری تسلیم ایتدی [۱۵۹۴] .

دردنجی ہازی قرالغی پارہ ایلہ صاتون آلدیغی صرمدہ۔

اسپانیا ایلہ محاربہ اوزمانہ قدر قتولیکلرہ معاونت ایتک ایچون حرب

ایتمش اولان - ایکنجی فلیپ کندی حسابنہ حرب ایتمکہ باشلامشدی . دردنجی ہازی اسپانیا قرالہ اعلان حرب ایتدی . بو صورتلہ مذهب محاربائی

فرانسه و آوستریا خاندانی آرم‌سنده کی محارباتک تجدیدینه سبب اولدی . محاربه اوج سنه سوردی . اسپایوللر بورغونیا و پیقاردیا طرفلرینه کیردیلر . (فونتهن فرانسهز Fontaine-Française) موقعنده وقوعه کلن محاربه‌ده هازی پارلاق برظفره نائل اولدی . نهایت (وه‌روهون Vervins) مصالحه‌سی عقد ایدلدی [۱۵۹۸] . بومصالحه شرائطی (قاتوقامبره‌زی) معاهده‌سی شرائطک عینیدر .

دردنجی هازی اسپانیا ایله عقد صلح ایتدیکی
نانت فرمانی
 صروده مذهب مسئله‌سی صورت قطعی‌ده حل ایدرک صلح و مسالمت داخلیه‌یی دخی تأمین ایتک ایسته‌دی .

هازی قتولیک مذهبنه عودت ایلکله قتولیکلری کندیسنه جلب ایتش ، فقط اسکی هم‌مذهبلرینک بر قسمنی اوزاقلاشدیرمشدی . قالوینیستلرک اکثریت عظیمه‌سی تلاش و اندیشه ایچنده ایدیلر . پروتستان اتفاقنی یکی بر شکه قویمشلدی . اسپانیا ایله وقوعه کلن محارباتده پروتستانلرک بعضلری قرالک اردوسنی ترک ایتمشلر ، بعضلری ایسه بواردویه التحاق ایتمه مشلر ایدی .

دردنجی هازی پروتستانلرک امنیتسزلیکلرینی ازاله ایتک و محاربات داخلیه‌نک تکررینه مانع اولمق ایچون (وه‌روهون) معاهده‌سنک عقدندن برای اول « نانت فرمانی » نشر ایتدی .

بوفرمان پروتستانلره بتون قراللق داخلنده سربستی و جدانی ، ۱۵۹۷ تاریخندن اول پروتستانلغک موجود اولدینی شهر و کویلرده سربستی آیینی تأمین ایتمکده ایدی . پروتستانلر قتولیکلرله حقوقه مساوات تامه‌یه نائل اوله جقلر و بالجمله مناصبه تعیین ایدیه جکلردی . عدالتک حسن جریاننی خصوصنده پروتستانلری تأمین ایچون هر بر پارلمتوده اعضاسی

یاری یاری یہ قتولیک و پروتستان اولمق اوزره خصوصی محکمہ لر تأسیس اولنہ جقدی .

بوندن بشقہ نانت فرمانی پروتستانلرک کندیلرینه عائد خصوصاتی مذاکرہ وادارہ ایچون مجالس عمومیه وروحانیہ تشکیل ایتلرینه مساعده ایلور و تأمینات اولمق اوزره یوز قدر قلعہ یی اولنلرہ تسلیم ایدیوردی . بواکی مادہ حقیقی امتیازات ایدی . قالوینستلر بوسایہ دہ حکومت ایچندہ بر نوع حکومت اولمقدہ دوام ایتدیلر . اوتوز سنہ صکرہ ، دردنجی ہازینک اوغلی اون اوچنجی لوئی زمانندہ بوکی امتیازاتک تہلکہ سی آ کلاشیلہ جقدر .

ہیئت عمومیه سی اعتباریلہ محق و معقول اولان نانت فرمانی برچوق قتولیکلری ممنون ایتدی . پارس پارلمنتوسی فرمانک نشرینہ مانع اولمغہ چالیشدی . دردنجی ہازی پارلمنتو اعضاسنی سراینہ چاغیرہ رق بوفرمان نشر ایدلر ایسہ فرانسدہ محاربات داخلہ و خارجہ نک دوام ایلہ جکنی ایضاح ایدرک جملہ سنی اقناع ایتدی .

نانت فرمانک امور دینہ دہ مساعده دورینی کشاد ایتش اولدینی بیان ایدیلر . بونک قیمت و اہمیتی تقدیر ایتک ایچون اوزمان دیگر اوروپا دولتلرینک احوال مذہبیہ سنی خاطرہ کتیرمک ایجاب ایدر . مریدہ ، آلمانیا دہ ، انکلتزہ دہ ، اسپانیادہ بتون تبعہ حکمدارک دینی قبولہ مجبور ایدی ؛ قتولیک اولمیانلر یانفی و تغریب ایدیلرلر ، یا خود اعدام اولنورلردی . فرانسدہ ایلک دفعہ اولہ رق حریت دینیہ اصولنی قبول و تطبیق ایتدی . واقعا بو اصولی بالا اختیار و سربستی وجدان قاعدہ اساسیہ سنی تطبیق ایتک فکریلہ دکل ، دردنجی ہازینک تدبیر و کیاستی تأثیریلہ قبول ایلدی ؛ یعنی قبولہ مجبور اولدی . بر عصر صکرہ پروتستانلغہ

ینه مساعده ایدلیه جک و فرمان فسخ اولنه جقدر . بویله اولقله برابر
تانت فرمانی اون یدنجی عصرک بیوک بر قسمنده فرانسه ده صلح و مسالمت
داخلیه بی تأمین ایتدی . حال بوکه او زمان منازعات مذهبییه آلمانیا
وانکلتزه ده دوام ایدیور ایدی .

۶

۱۶ و ۱۷ نجی عصر لرده انکلتزه

الیزابت
پروتستانلره ظلمندن طولانی « قانلی ماری » لقبی
آلمش اولان (ماری تودور) دن صکره انکلتزه تخته
چیقان الیزابتک قرق بش سنه لک دور سلطنتی [۱۵۵۸-۱۶۰۳] انکلتزه
تاریخنک ادوار مهمه سندن بریدر . بودوره سلطنتده داخله ره فورمه
و آنغلیقان کلیسای صورت قطعیده تشکل ایتدی . خارجاً الیزابت
قتولیکلک رکن قویسی اولان ایکنجی فیلیپه قارتی - غیرت دینه نک تأثیریه
دکل ، بلکه منافع سیاسییه اقتضاسنجه پروتستانلغک حامیسی اولدی . فرانسه ده ،
په بی باده مذهب جدید طرفدارلریله معاونتدن کری قالمدی . دیگر طرفدن
اسپانیادونمسانک تعرضه قارشى انکلتزه بی مدافعه ایتمک مجبور تی انکلیز قوای
بحریه سنک تزیدینه و په بی با تجارتنک محوی دخی انکلیز لیمانلرینک ترقیسیله
قدرت اقتصادیه سنک توسعنه سبب اولدی .

۲۵ یاشنده انکلتزه قرا لیچه سی اولان الیزابت (آن بوله یین) ک قیزی
ایدی . والده سی اعدام ایدلیکی زمان هنوز اوچ یاشنده ایدی . پدری

سکزنجی هانری بر آراق کنديسني حق وراثت سلطنتدن محروم
 براقني دوشونمشدی . يکرميدن يکرمی بش ياشنه قدر ، اوکی همشيره سی
 مارينک زمان سلطنتده همان حال محبوسيتده يشامش واعدام اولنمقدن دائماً
 قورقمش ایدی . فی الحقیقه قاترين داراغونک سکزنجی هانری ایله نکاحنی
 فسخ ایدن سرپسقبوس (قرانمر) ی دیری دیری یاقديرمش اولان ماری
 تودور (آن بوله ين) . منسوب اولانلرک جمله سی حقنده پک بيوک برکين
 وخصومت کوسترمکدن خالی قالمامشدی . کنجلکننده معروض قالدیغی
 بو مهالکدن طولاييدر ، که اليزابت افکار و آمانتی کيزله مکده ماهر بر
 مرائی اولمش ایدی . انگليز مورخی (غرين Green) اليزابتی کستاخانه ،
 ناقابل تداوی بر ریا ایله اتهام ايدييور ودييورکه : « طولاشیق وکيزلی
 يوللردن يوريه رک نائل امل اولمغی سوردی . سياسی يالانه عموميتله جواز
 کوسترلديکی بر عرصده يالانلرينک کثرتی وکستاخلغی ایله بتون معاصر لرینه
 غلبه ايتمشدر . » حريص وطمعکار ، سرت ومرتحنسز ، علو جناب
 کوسترمک مزيتدن محروم برقادين ایدی . بر مورخک دیديکی کبی « چلیک
 طبيعتی » ایدی . هرکسک بتون آرزولرینه سرفرو ایتسنی ایستردی .
 بعضاً هرکسه ، حتی وکلاسنه قارشی بيله تربيه سز و آغزینه کلنی سويلر
 قادينلر کبی حدتله رک سوکوب صایمقدن ، حتی طياق آتمقدن چکينمز
 ایدی . بر دفعه انگلتره مک اک بيوک زادکانندن برینی علناً طوقاتلامش
 ایدی . بونکله برار ای بر تحصیل کورمشدی . اسکی يونانجه یی اوکور ؛
 لاتينجه یی ، فرانسه زجه یی ، ايتاليانجه یی انگليزجه کبی سهولته او قوبوب
 يازاردی . سياساتده اعتدال و متانتی هيچ بر زمان غائب ايتمز ، دائماً
 وقور و پراتیک ایدی . بيوک مصرفلری ، عظیم فداکارلقلری مستلزم
 بيوک پروژهلری-سومن ؛ ممکن الاجرا واک مناسب اولان شيلری اک آز

فداکارلق و مصرف مقابلنده الده ایتک ایستردی . بر مورخ «سیاسی وقایعه منتظر ویا احوال دن مستفید اولمقدن عبارت ایدی» دیور . فی الحقیقه الیزابتک دور سلطنتده انکلتزهک تأمین ایلدیکی منافع عظیمهک نه صورتله استحصال اولندیغی تدقیق ایدیله جک اولورسه بوبابده الیزابتک تشبث شخصیسنک هان هیچ بر تأثیری اولمدیغی میدانه چیقار . نه انکلتزه قدرت اقتصادیه سنک سبب توسعی اولان په یی با عصبانی ، نه ده انکلتزه قوهٔ بحریه سنک منشأ سطوتی اولان اسپانیا حربی مسئله سنده الیزابتک تأثیری کورلمز . الیزابت احوال وقایع دن استفاده ایتدی ؛ فقط بو احوال و وقایعی احداثه اصلاً چالیشمدی . مع مافیه احتیاطکارانه واعوجاجلی دیپلوماسیسندن دائماً اعظمی استفاده یی تأمینه موفق اولدی . سعی متمادی ، صبر و تحمل ، فکر تعقیب ، ثبات و متانت الیزابتک مزیات مخصوصه سیدر . الیزابت الک تهلکه لی زمانلرده الک جسور ارککلر کی جرأت و فعالیت کوستردی . بو سایه ده درکه الیزابت تبعه سنک محبتی قازاندی . وینه بو سایه ده درکه مورخ پاستور (غرین) ک «مسلمی تفرعاتیله کوزدن کچیرلدیکی زمان حس نفرت طویماق غیر ممکن اولدیغی» بویلدیکی بر قادین عادتاً انکلیزلرک بر ملی عزیزه سی اولدی .

الیزابت پک مشکل بر زمانده جلوس ایتشدی
الیزابت و مسئلهٔ دینیه [۱۷ تشرین ثانی ۱۵۵۸] . خارجاً فرانسه ایله حرب دوام ایدیوردی ؛ دوق دوکیز (قاله) قلعه سنی آلمشدی ؛ حربه دوام ایتک اقتضا ایلدیکی حالد خزینهٔ دولت بوم بوش ایدی . مع مافیه مذاکرات صلحیه کیریشیلمش ایدی . بر قاج آی صکره (قاتوقامبره زی) معاهده سی عقد ایلدی [۳ نیسان ۱۵۵۹] . داخلاً یکرمی بش سنه اول سکزننجی هانری سنک سبب اولدیغی بحران دینی آلتنجی ادوارد زمانده

قتولیکر ، ماری تودور زمانندہ پروتستانلر علیہنہ اجرا ایدیلن مظالم ایلہ کسب وخامت ایتمش ، طرفینک یکدیگری علیہندہ کی کین وخصوصی آرتمشدی . الیزابت جلوسنی متعاقب بر طرفی التزام ایدرسہ ہم داخلی عصیانلرہ معروض قالیر ، ہمدہ غوائل خارجیہ دوجار اولہ بیلیرایدی . فی الحقیقہ قتولیکلکی مدافعہ ایدرسہ پروتستانلرک قیام عمومیسسی محقق ایدی . رہ فورمہ بی حمایہ ایلرسہ (آن بولہ یں) ایلہ سکزنجی ہازینک نکاحی کآن لم یکن حکمندہ عد ایتدکلری ایچون کندیسہ ولد غیر مشروع نظریلہ باقان وبناء علیہ انکلتزہ تاجندہ ہیچ بر حق اولمدیغنی ادعاہ مہیا بولنان . قتولیکلری کندی علیہنہ جویرمش اولوردی . بکذلک اسپانیا قرالی ایکنجی فیلیپ ایلہ قطع مناسبات تہلکہ سہنہ معروض قالیردی . حال بوکہ یدنجی ہازینک حنفید زادہ سی وسکزنجی ہازینک یکنی اسقوجیا وفرانسہ قرالیچہ سی ماری استوارت قتولیکر نظرندہ ماری تودورک یکانہ وارث مشروعی عد ایدلیدیکندن بونک انکلتزہ تختہ ادعای حق ایلسنہ قارشی اسپانیانک معاونت ومظاہرتہ محتاج ایدی . ایشہ ، بوقدر مشکلات وغوائل اورتہ سندہ قالان الیزابت ایکی طرفی دہ حسن ادارہ موقوف اولدی . مارینک قتولیک وکلا ومشاورلرینی مأموریتلرندہ ابقا ایدی . یالکز بونلرہ علاوہ پروتستان مشاورلر آلدی . شخصاً مسائل دینہ دہ تمامیلہ لاقید ایدی . اونک ایچون ایکی طرفی دہ ممنون ایدہ جک بر زمین ائتلاف بولمغہ جالیشدی . موقعنی کافی درجہ دہ ترصین ایدنجہ وقوجہ سی فرانسه قرالی ایکنجی فرانسوانک وفاتندن اطولای اسقوجیا تاجیلہ اکتفایہ مجبور اولان ماری استوارتدن بر قورقوسی قالمینجہ بحران دینی نہ نہایت ویرمک ایستہ دی . پارلمنتویہ بری « ۳۹ مادہ » نامیلہ معروف ودیکری امور دینہ دہ وحدت وتساوی بی متضمن اولان ایکی قانون قبول ایتدیردی .

بونلرک برنجیمی آنغلیقان کلیساسنک عقائد اساسیه سنه و انضباطنه متعلق ایدی .
ایکنجیمی بالجمله معابدده عینی دعا کتابنک استعمالی و عینی مراسم و آیین
دیننک رسمی کلیسا اساساتنه موافق صورتده اجرایی مجبوری اولدیغنی .
اعلان ایدیوردی .

آنغلیقانیزم قتولیکلک ایله قالوینیزمک مزجندن حاصل اولمش بر مذهب
مخصوصدر . دبدبه و آلایشه مقتون اولان الیزابت قتولیکلکک بعض
مراسم خارجیه سنی ، انکلیزجهیه ترجمه ایدلمش دعا لیرنی ، رهبانک البسه
روحانیه سنی ، سلسله مراتب روحانیه یی محافظه ایتشدی . فقط اساس
اعتقاد قالوینیزم مذهبنک عینی اولوب یالکیز و افتیز ایله قومونیون آیینلری
قبول ایدلمش ، دیگر آیینلر منع اولنمشدی . دیگر طرفدن الیزابت پدری کبی
کلیسانک رئیس عنوانی المق ایسته مدی . فقط فعلاً امور دینیه نک
اداره سنی ده بر اقدی .

بدایه الیزابت Non – conformiste و Dissident دینلر حقیقی
قتولیکلرله حقیقی قالوینیزم حقه ده یک مساعده کارانه طاووراندی . فقط
براز صکره مرکسی رسمی کلیسایه تابع طوتمق ایسته دی . آنغلیقان آیین
و مراسمنه اشتراک ایتینلردن شم دیکی حساب ایله شهری اوچ درت بیک
فرانغه بالغ اولان آغیر بر جزای نقدی آلدی . قتولیکلرک ولو که صورت
خصوصیه ده اولسون آنغلیقان کلیساسنجه ممنوع آیینلری اجرا ایتلمی منع
ایدلدی . آنغلیقانیزم مذهبنی ترک ایله قتولیک اولانلر و قتولیک عقائد اساسیه سنی
نشره چالیشانلر وطنه اهانت جرمیله اتهام و اعدام اولندیلر . آنغلیقان
مذهبنی قبول ایتینلرک محاکمه لری ایچون بر محکمه مخصوصه تشکل ایتدی
ویوزلرجه قتولیک راهبیلر درلو درلو اشکنجه لره دوچار اولدیلر .

« ۳۹ ماده » قانونی نشر ایدیلر ایدلمز قتولیکلر اولکندن

زیاده ماری استوارته ربطامید ایتدیلر . بونک اوزرینه

ایکی قرالیچه آره سنده مدھش بر رقابت حاصل اولدی و بورقابت ماری استوارتک محبوسیتی واعدامی ایله نتیجه لندی .

اسقوجیا قرالی بشنجی ژاقل قیزی اولان ماری استوارت هنوز بش یاشنده ایکن فرانسه قرالی ایکنجی هانرینک بیوک اوغلی وولی عهدینه که بالا آخره ایکنجی فرانسوانامیله قرال اولمشدر - نشانلانمشدی . فرانسه ده قاین پدرینک سراینده تربیه ایدلمش ایدی . حسن فوق العاده سی ، ظرافت طبعی معلوماتی ، مجلس آرائی ، نشئه و شطارتی ، جسارتی ایله هر کسی ، حتی دشمنلرینی بیله مقتون ایدر ایدی . ایکنجی فرانسوانک و قسز وفاقی اوزرینه اسقوجیا قرالیچه سی اولدی . فرانسه یی محزونانه ترک ایتدی ؛ پره سیته ریه نلرک غلبه سی ائناسنده اسقوجیا به اصل اولدی [آغستوس ۱۵۶۱] . اسقوجیا زادکانی دائما کورولتی واختلاف چقارمغه مهیا ، اھالیسی پک قبا ایدی . عوام ناس دین مسئله سنده اودرجه متعصب ایدی ، که بردفعه اھالی قرالیچه نک سراینه کیدرک مارینک حضورنده سمرایک قتولیک راهبنی تحقیر ایتدیلر . بونک اوزرینه ماری استوارت کندیسنه معاونت ایدمک بر آدم آرادای . کندیسسی کبی (تودور) خاندانندن اولان (دارنله ی Darnley) ی انتخاب ایتدی . اونکله اولندی [۱۵۶۵] . دارنله ی هنوز اون طقوز یاشنده ، احق ، فضله اوله ورق ده سفیه ایدی . ماری اداره حکومتده اوندن بر معاونت کورده میه جکنی پک چابوق آکلادیغندن کندیسنی امور دولته قاریشدیرمدی . فقط بو احق جریص اقبال ایدی . قرالیچه نک یالکیز زوجی اولمقله اکتفا ایتیمورده قراللق تاجنی کیملک و قرالیچه ایله برلکده اجرای

حکومت ایتک ایسته یوردی . بوکا موفق اوله مینجه قرالیچه نك ممانعتی
(داوید ریچو David Rizzio) اسمنده برایتالیان کاتبک نفوذینه عطف
ایتدی و ازدواجندن بر سنه صکره بعض زادکان ایله بالاتفاق رقیبنی
ازالیه قرار ویردی . بر آقشام قرالیچه بعض احباسبی ایله طعام ایدرکن
دارنله ی ورفقاسی ایجریه کیردیلر ؛ (ریچو) نك بوینه براب آدیلر ؛
قرالیچه نك اتکنه صاریلان کاتبی طیشاریه چکوب اولدیردیلر .

بوجنایت اجرا ایدلیکی ائنده قاتلردن بری قرالیچه نك بوغازینه
بر خنجر طیاوب ماری استوارتی بی حرکت طورمه مجبور اتمشدی .
ماری اخذ ناره یمن ایتدی . اون بر آی صکره (دارنله ی) ادیمبورغ
خارجنده بر کوچک اوده اولدیرلدی وجنایتی ستر ایچون خانه برهوا
ایدلی [۱۵۶۷] . افکار عمومیه بو جنایتک قرالیچه نك امریله اجرا
ایدلیکنه قانع اولدی . فی الحقیقه دارنله یك قاتلرندن قونت دو (بوت و هل
Bothwell) جنایتدن اوچ آی صکره قرالیچه ایله ازدواج ایتدی .
بو ازدواج اسقوچیانک عصیانیه سبب اولدی . ماری استوارت عصاته
مغلوب اولدیغندن انکلتیره التجا ایلدی [۱۵۶۸] .

ماری یکنی الزابت طرفندن بر قرالیچه کبی قبول ایدیه جکسی امید
ایدیوردی . حال بوکه الزابت کندیسنه بر مجرم کبی معامله ایدرک اونی
اقامتگاه اوله رق تخصیص ایدیلن مختلف شاتولرده حبس ایتدیردی .
مارینک انکلترده بولنمی انکلز قتولیکلرینک امیدلرینی آرتدیردی .
بونلر الزابتی تختدن ایندیرمک مقصدیه ایکی دفعه جمعیت خفیه تشکیله
ایکی دفعه ده علنی عصیانیه تشبث ایتدیلر [۱۵۶۹ - ۱۵۷۲] . الزابت
مارینک کوزلاکنه حسد ایدیور و کندیسنه وارث اوله جغنی

دوشوندجہ نفرت و خصومتی آرئیور ایدی . بواسبا بدن طولای ماری بی
حبس ایتکده کندینی حقلی بولیور ایدی .

محبوسیت اون طقوز سنه سوردی . ۱۵۸۶ ده الیزابتک اولدیرلمسی
ایچون تشکل ایتمش بر جمعیت خفیہ کشف ایدلدی . بوجعیتہ ماری
استوارتی دخی قاریشیدیردیلر . عدالتک اک ابتدائی اشکالنه بیلہ رعایت
ایدلمه دن ، ماری استوارت کندی علیهنه ایفای شهادت ایلین کیمسه لرله
مواجهه اولنمہ دن متعصب پروتستان حاکمر اسقوجیا قرالیچه سنی اعدامه
محکوم ایتدیلر . حکم اعدام اوچ آی صکره اجرا ایدلدی [۱۵۸۷] .
ماری استوارت اولوم قارشیسینده ، ایلک ضریه سی بوینده مدہش
بر یاره آچان جلادک بالطه سی آلتندہ پک یوکسک بر جسارت و متانت
کوستردی . الیزابت اعدام قرارندن خبری یوقش کبی پک متأثر و مہتور
کوروندی . حال بوکہ رقیہ سنی - اتحارایله تاویل ایدیله بیلہ جک صورتده -
کیزلیجه قتل ایتدیرمکہ چالیشان ، نہایت اعدامه محکوم ایتدیرن الیزابت ایدی .

الیزابتک بتون دور سلطنتده انکلترة خارجاً
الیزابتک سیاست خارمیسی دائماً پروتستانلر لهنده حرکت ایتدی . فقط
بو سیاسی اسباب دینہ دن طولای قبول و تطبیق ایتہ مش ایدی . امور دینہ ده
شخصاً لاقید اولان الیزابت سیاسی بر غایہ دن بشقه بر مقصد تعقیب
ایتمدی ؛ حکومتک منافع مادیہ و خصوصیه سندن ماعدا هیچ برشی
دوشونمدی . فرانسه ده کی مذهب محاربه لرینک بدایتندہ ، ۱۵۶۲ سنه سنده
طقوزنجی شارل علیهنه عصیان ایتمش اولان پروتستانلرہ بومقصد ایلہ
یاردیم ایتدی . فرانسز پروتستانلرہ معاونت ایلہ ایکی منفعت سیاسیہ
استحصال ایدیور ایدی . فرانسه ده محاربه داخلہ بی اوزاتہ رق دشمن

قدیمی ضعیف دوشوریور و درت سنه اول (قاله) یی ترکه مجبور اولان انکلزلرک انتقامی آلیوردی . انتقام آلدقدن ماعدا تعویضات دخی آلدی . فی الحقیقه پروتستانلره معاوتی مقابلنده هاور لیمانی اشغاله موفق اولدی . یکریمی سکیز سنه صکره ، ۱۵۹۰ ده ، دردنجی هانری به عسکر وپاره تدارک ایتدیکی زمان دخی پروتستان قراله معاوتی دوشونمور ، بلکه اسپانیا قرالی ایکنجی فیلیپک رقیبه یاردیم ایتک سیاستنی تعقیب ایلور ایدی .

اسپانیا ایله حرب الیزابتک سیاست خارجه سنده اک
اسپانیا ایله حرب مهم موقعی طوتمشدر . بو حرب کیزلیجه ، اعلان ایدلمه دن باشلادی و قرالیچه دن زیاده انکلزلر طرفندن آرزو ایدلدی ؛ قرالیچه آرزوی عمومی به تابع اولدی . ایلک اوکجه ، ۱۵۶۸ دن اعتباراً ، اسپانیا علیه نه قیام ایدن (په یی با) عاصیلری انکلتره لیماندرینه التجا ایتمکه باشلادیلر . صکره ، اولاً آوروپا دکزلرنده و بالا آخره بحر محیط آطلاسی ایله بتون مستملکات سواحلنده انکلزلر اسپانیانک تجارت کمیلرینه قارشی قورصانلق ایتدیلر . قورصانلغک براقدینی کاردن قرالیچه دخی بر حصه آلدی . بالخاصه ۱۵۷۷ سنه سنده پک بیوک کار براقان قورصانلق (دراق Drake) ک زیر اداره سنده اوچ سنه سوردی . (دراق) جسور بر کمچی ، ماهر بر قبودان ایدی ؛ ۲۸ یاشنده ایکن ایکی دفعه پاناما بر زخنده کی اسپانیول تجارت مغازه لرینی یغما ایتشدی . ۱۵۷۷ ده بش کمی ایله انکلتره دن حرکت ایلدی ؛ کندیسندن اول هیچ کیمسه نک کچمه مش اولدینی (هورن) برونندن طولاً شه رق بحر محیط کیره داخل اولدی ، شیلی و پهرو سواحلنی یغما ایتدی . بومفر اثناسنده (لیما) نک لیمانی اولان (تالاو) اوکنده اینجی ، الماس ، بیوک زمرد و ساثره کی

ذیقیمت طاشلردن ماعدا ۵۸۰ لیبرہ آلتونی و ۱۶ ملیون کموش سکینی حامل اولان اوچ قالیونی ضبطہ موفق اوله رق امید برونی طریقہ اوروپاہہ دوندی و ۱۵۸۰ دە (پلیموت) لیمانہ عودت ایتدی . اسپانیا سفیری بوخیدودلقری پروتستوائیتیکی صرہده الیزابت بالذات (دراق) ک کیسنہ کیدیور ، جرأتکار قورصانه شوالیه لك توجیه ایدیور وانکلترہ تاجنی (تالائو) دە غصب ایدیلن اک کوزل زمردلرله ترین ایلورایدی . بش سنہ صکرہ ، ۱۵۸۵ دە ، (دراق) شمیدی قولوجیاده کی (قارتازمن) شهرینی ، (سن دومه نق) ک بر قسمنی ، (فلوریدا) سواحلی تخریب ایتدی . عینی زمانده الیزابت ایکنجی فیلیپ ایله آچقندن آچیغہ حربہ قرارویردی و (پہی با) یه کوزده سی قونت دو (لایچستر Leicester) ک قومانداسندہ بر کوچک اردو کوندردی . اسباب حرب پک چوق ایدی . ایکنجی فیلیپ ۱۵۸۸ سنہ سندہ انکلترہ یه « نامغلوب آمادا » یی کوندردی . انکلز کیجیلرینک وبالخاصہ (دراق) ک جرأتی ، دها زیادہ فورطنہ لرک شدتی انکلترہ یی استیلا تہلکہ سندن قورتاردی . سکزسنہ صکرہ ۱۵،۰۰۰ انکلز عسکرندن مرکب بر اردو اسپانیا سواحله چیقدی و اسپانیانک اک معمور و مترقی لیمانی اولان (قادیکس) ایله اک زنکین شہرلرندن بری بولتان (سہویل) ی یغما ایتدی .

اسپانیا محاربه سیلہ پہی با وقایعی انکلز بحریہ سنک ،
انکلز بحریہ سنک صنایع و تجارتنک ترقیسنہ پک زیارہ مدار اولدی .
و تجارتنک ترقی انکلترہ نک قدرت و سطوت بحریہ سی اون آلتنجی عصرک نصف اخیرندہ باشلامشدر . انکلترہ دە پک چوق جسور کیجیلر یتیشدی . (دراق) بونلرک اک جرأتکاری ایدی . بو کیجیلر بتون دکزلردہ سیر و سفرایتدیلر . آلتون وفیل دیشی مملکتی اولان (کینہ) دە

انکلیز کمپجیلری پک چوق ایدی . بولردن (هاو کینس Hawkins)
 اسرای زنجیه تجارتی انکلیزلره مخصوص بر انحصار شکنه قومیشدی .
 انکلیزلر (کینه) دن بحر منجمد شمالی یه قدر بتون دکزلرده طولاشورلر
 و بحر ابیض طریقله روسیه اقوامی ایله طوغریدن طوغری یه مناسبات
 تجاریه ده بولنیورلر ایدی . بر جدیدده (والتر رالیف Walter Raleigh)
 فلوریدانک شمالنده ایلک انکلیز مستملکسی اولان (ویرژینیا) مستعمره سنی
 تأسیس ایتدی . (ترنوو) ده صید ماهی ایچون مؤسسهر و جوده کتیرلدی .
 (فروبیشر Frobisher) شمالده طوغریدن طوغری یه آسیایه ایصال ایده جک
 بر یول آرادى . (دراق) بر آراق بحر محیط کیر ساحلنده قالیفورنیا یه
 صاحب اولدی .

اسپانیایه قارشى عصياندن اول انکلتړه نك هر سنه تقريباً اللى مليون
 فرانلق يوك اذخال ايتديكى (به يى با) دن - ۱۵۶۷ دن اعتباراً - ظلم
 كورن پروتستانلر ، فلامان چوخه صنعتكارلرى ، آنورس تاجرلرى
 اون بيكلرجه كشليك قافله لرله انكلتړه يه هجرت ايتديلر . بو مهاجرلر
 سايه سنده انكلتړه ده صنايع نسجه ترقى ايتدى ؛ (لانقاستر) قونتلغى
 صنايع نسجه نك مركزى اولدى . آنورس تاجرلردن ثلثنك هجرت
 ايتديكى لوندره تجارت شركتلى و - ۱۵۷۰ سنده (طوماس
 غره سهام Thomas Gresham) طرفدن تأسيس ايديلن - مشهور
 بورسسى ايله غربى اوروپانك اك بيوك مراکز تجارتندن برى واك
 مهم ماليه مركزى حالته كيردى . ثروت عموميه نك سرعتله وبر صورت
 عموميه ده ترقيسى طرز معيشتجه تبدل حصوله كتيردى . بتون صنوف
 اهالیده دها مرفه يشامق احتياجي ، راحت ايتك آرزوسى حاصل اولدى
 وبر اصيلزاده نك شاتوسندن اورته حاللى بر عالمه نك خانه سنه وحتى كويلی

قبلہ سنہ قدر ہر طرفہ طرز معیشتک دیکشمکہ باشلادینی کورلدی .
 الیزابت دورینک شے شے سنی نقصان بر اقامق ایستہ یورمش کی
 انکلترنک اک مشہور مؤلفی و تاریخ ادبیات عالمک اک بیوک داهیلرندن
 یری اولان (ویلیام شکسپیر) دخی بوزماندہ یتیشدی .

الیزابتدن صکرہ ، یعنی اون یدنجی عصر دہ انکلترنہ تاریخی
 شکلیات سیاسیہ آکلامق ایچون اولابو عصر ابتداسندہ کی تشکیلات
 و احوال دینیہ سیاسیہ بی و احوال دینیہ بی تدقیق ایتک ایجاب ایدر .
 انکلترنہ ارثی بر قراللق ایلہ اداره اولنیوردی . حق حرب و صلح
 حکمدارہ عاندایدی . بتون مأمورینی ، قونتلقلردہ ، یعنی ولایاتدہ ہم حاکم ،
 ہمدہ والی وظیفہ سنی ایفا ایدن « شہر یف Cherif » لری او نصب
 و عزل ایدیوردی . فقط انکلیز حکمدار لری مملکتلرندہ آمر مطلق
 دکلدیلر ؛ آرزولری قانون حکم و قوتی حائر دکلدی . انکلیز ملتی تقریباً
 ۳۵۰ سنہ دن ، یعنی اون اوچنجی عصر دن بری مبعوثلری واسطہ سیلہ اداره
 دولتہ اشتراک ایتکدہ ایدی . مبعوثلرک تشکیل ایتدکلری پارلمنتو بیوک
 زادکان ورہباندن مرکب لوردلر قمارہ سی ویا مجلس اعیان ایلہ قونتلقلردہ کی
 اصیلزادہ لرک وکوی و مالکانہ صاحب لرینک انتخاب ایلدکلری مبعوثلردن
 متشکل عوام قمارہ سی ویا مجلس مبعوثان نامیلہ ایکی مجلسہ آیرلمشدی .

پارلمنتو ہر سنہ اجتماع ایدردی . حکمدار تنظیم قوانیندہ و ویرکو
 طرح و تحصیلندہ پارلمنتونک موافقتی استحصا ایتک مجبور ایدی .
 لوردلر و عوام قمارہ لری مذاکرہ ، قبول و تصدیق ایتدکجہ ہیچ بر فرمان
 قانون حکم و قوتی اکتساب ایدہ من ، ہیچ بر ویرکو تحصیل اولنہ ماز
 ایدی . بوندن بشقہ پارلمنتو حکومتک اداره عمومیہ سی ، مأمورینک انتخابی ،
 قراللق طرز اداره سی وحتی سیاست خارجیہ حقندہ حکمدارہ بیان

مطالعات ، یعنی ملتک حسیاتی اظهار ایتک حقنی حائر ایدی . فقط بو مطالعاتک حکمدار طرفدن حضورنده قرائته مساعده ویرلمدجه واصابت وحقانیق تصدیق اولمقدجه بر قیمت عملیه سی یوق ایدی .

الحاصل حکمدارک حقوق ايله ملتک حقوق و وظائفی ایجه تفريق ایدلمشدی . اون آلتنجی عصرده ، تودورلر زمانده ملتک حقوقی صرف نظری برحاله قالمش و سکزننجی هاتری ايله الیزابت هماندا آرزولرینه کوره حکومتی اداره ایتمشدی . فقط الیزابت زمانده ثروت عمومیه نك ترقیسی - سعی و فعالیتلریله بوترقینک الک مهم عامللری اولان - بورژوا صنفده امور دولتک اداره سنه اشتراک ایتک واستبداد حکمداری یه قارشی بعض تأمینات الیه ایلک آرزوسنی میدانه چیقاردی .

احوال دینه بک قاریشیق ایدی . انکلترده آنغلیقانلر ، پرمسیته ریه نلر ویا پوریته نلر ، قتولیکلر و مستقللر نامیله درت مذهب اربابی موجود ایدی . انکلیز ملتک اکثریت عظیمه سی تشکیل ایدن آنغلیقانلر ايله ايله پوریته نلر آرمه سنده اعتقادجه فرق یوقدی . یالکز آنغلیقان کلیساسی قتولیکلکک اشکال خارجه سی ، آیینلرک طرز اجراسی ايله سلسله مراتب روحانیه یی محافظه ایتمش و حکمداری کلیسا رئیس عد ایلش اولدیغی حالده پوریته نلر بونلرک هیچ برینی قبول ایتمورلر ، پروتستانلکک بتون ساده لکی ايله تطبیق اولمسنی ایسته یورلر ایدی . قرال طرفدن تعیین ایدیلن پستپوسلرک وسائر رهبانک یرینه ملتجه منتخب رؤسای روحانیه نك ایفای خدمت ایلسنی و حکومتک هر کسک حیات خصوصیه سنه نظارت ، کناهکارلری دوچار جزا ایتک ایچون بورؤسای روحانیه یه معاونت ایتسنی آرزو ایلورلردی . بدایه پک آز ایکن صکرمه لری کسب قوت ایدن مستقللر ایسه رؤسای روحانیه یه حاجت کورمیه رک هر کسک طوغریدن

طوغری یہ انجیل احکامی تطبیق ایلمنی طلب ایدیورلر ایدی .
 بو مختلف مذاہدن یالکیز آنغلیقان کلیساسی قانوناً طانمشدی .
 بتون انکلیزلر حکومتک مذهب رسمیمی اولان بو کلیسانک حاکمیتی
 تصدیق ایتک مجبوریتده ایدیلر . بونی رد ایدنلر، یعنی قتولیکلر، پوریتہ نلر
 ومستقللر عاصی عد اولنورلر، تحت نظارتده بولندیریلرلر، تعقیب وتضیق
 ایدیلرلر ایدی . آنغلیقان کلیساسنه ال زیادہ شدتلہ هجوم ایدنلر پوریتہ نلر ایدی .
 بونلر کندی مذهب لرینک مذهب رسمی دولت اتخاذایدلمسی دعواسنده ایدیلر .
 بوتشکیلات سیاسیہ وبواحوال دینہ دن
استوارت نرک برورہ لری طولاییدر، کہ اون یدنجی عصرده استوارت
 خاندانندن انکلتزده اجرای حکومت ایدن درت قرال، یعنی برنجی
 ژاق [۱۶۰۳ - ۱۶۲۵]، برنجی شارل [۱۶۲۵ - ۱۶۴۹]، ایکنجی
 شارل [۱۶۶۰ - ۱۶۸۵] وایکنجی ژاق [۱۶۸۵ - ۱۶۸۸] اداره دولتمده
 ایکی غایہ تعقیب ایتدیلر . سیاسیاتده تودورلرک فعلاً اخلال ایتمش اولدقلری
 حقوق ملتی بسبتون قالدیرمق ایستہ دیلر؛ پارلمتوسز اداره ایتک، یالکیز
 کندی فرمانلریلہ ویرکو طرح وجایت و سیاست خارجیہ بی آرزولرینہ
 کورہ تدویر ایلک فکرنده بولندیلر . امور دینہ ده آنغلیقان تشکیلاتی
 توسیع وبالخاصہ ہیئت رهبانک سلسلہ مراتبی محافظہ ایتک ایستہ دیلر .
 قراللر کندی طرفلرندن تعیین اولنان ہیئت رهبان سایہ سندہ تبعہ لری
 اوزرنده بیوک برنفوذ معنوی وعادتا پاپا وضعیتنی احراز ایدیورلر ایدی .
 ایشته، بومسلک سیاسی ودینی برچوق منازعات واختلالاتہ سبب اولدی .
 الیزابتک وفاتندہ یرینہ کچن برنجی ژاق استوارت اسقوجیا
برنجی ژاق قرالی ایدی . انکلتزہ تختہ جلوسی ایکی قراللفک اتحادینہ
 زمین حاضرلادی . فقط قرالقلر اتحاد ایتدی . آرمده بر حکمدارہ

تابع اولمقدن بشقه بر رابطه یوقدی ؛ انکلتزه واسقوجیا آری آری حکومت قالدیلر .

برنجی ژاق قرال لرك طرف الهمیدن اجرای حکومته مأمور اولدقلری و بناءً علیه ایستدکلری کبی حرکت ایده بیله جکلری فکرنده ایدی . حتی بوفکری ایضاح و تأیید ایچون بر کتاب بیله یازمشدی . ژاق پارلمنتونک قونترولنی اصلاً قبول ایتیمور و : « قرال وجدانندن بشقه سنه تابع اوله ماز » دیوردی .

قتولیک ماری استوارتک اوغلی اولمق و پرده سیپته رییه ن مذهبده تربیه ایدلمش بولمقله برابر برنجی ژاق متعصب بر آنغلیقان اولدی و قتولیکلر ایله پوریته نلره ظلم ایتدی . ایلك سنه حکومتده آلتی بیک قتولیک تعقیب ایدیلره رک محکوم اولدیلر . بونک اوزرینه قتولیکلر « باروت وقعه سی » نامیله معروف اولان سوء قصدی ترتیب ایلدیلر .

عقیم قالان بو سوء قصدک نتایجی انکلتزه تاریخنده پک مهمدر . بتون خاندان حکمداری ایله پارلمنتو اعضاسنک برهوا ایدلمسی احتمالی هر کسده او درجه بئوک بر نفرت او یانیدردی ، که بر قاج شخصک جنایتدن قتولیک مذهبی مسئول طوتولدی ؛ بتون ملت قتولیکلکه دشمن بی امان اولدی . حتی قتولیکلر ایکی عصردن فضله بر مدت ، ۱۸۲۹ تاریخنه قدر قانون خارجنده عد اولندیلر ؛ مناصب حکومتدن اخراج ایدلدیلر ؛ قتولیک ابونیک اولادی اوزرینه هیچ بر حتی اولمدیغی بیان ایدیلره رک قتولیک چو ققلمینک پروتستان مذهبده تعلیم و تربیه لری مجبوری طوتولدی . قتولیکلکک بعض اشکال خارجه سنی محافظه ایتمش اولان آنغلیقانیزم بیله متأثر اولدی . برچوق آنغلیقانلر پوریته نلره التحاق ایتدیلر . بوندن بشقه امور خارجه ده قتولیک بر دولت وبالخاصه فرانسه

ایله اتفاق انکلیزلره پک منفور بر حرکت کبی کورونمکه باشلادی. استوار تیرک فرانسه ایله اتفاقی آرزو ایتلمی خلقک غیظ و نفرتنی آرتدیردی.

پوریتہ نلر قتولیکلر درجه سنده ظلم کورمه مکله برابر ای بر حالده دکلدیلر. ژاقل بدایت سلطنتده بونلر پره سبیتہ ریهن مذهبک اک زیاده تعمم ایتمش اولدیغی اسقوچیان کلن بر قرالک کندیلرینه خیر خواہ اولدیغی ظن ایتشلر و - سکز یوز امضای حاوی اولقلہ برابر - « بیکلر عریضالی » نامیلہ معروف بر عریضہ بی حکمدار جدیدہ تقدیم ایلشیلر ایدی. فقط ژاق پره سبیتہ ریهن نلرک انغلیقان مذهبده کی سلسله مراتب روحانیہ بی ایستہ مدکلرینی، پسقوسلقلرک الغاسی طرفداری اولدقلرینی دوشونہرک اولره ابراز خصوصت ایدیور و « پسقوسلر اولمازسه قرالده اولماز » دیوردی. پره سبیتہ ریهن مذہبی ایله قراللغک غیر قابل تألیف اولدیغی فکرندہ ایدی. عریضہ بی تقدیم ایدنلرہ خاتمہ کلام اولہرق : « یاتحت اطاعتہ کیرہ جکسکز ، یاخود ہیکزی قراللق خارجہ نفی ایدہ جکم ، دیدی . حبس خانہ لره آتیاق تہلکہ سنہ معروض اولان پوریتہ نلر قافلہ قافلہ بحر محیط آطلاسینک اوتہ طرفہ ہجرت ایتدیلر . شمالی آمریقانک شرق ساحلندہ متعدد مستملکہلر وجودہ کتیردیلر . بوصورتلہ ظلم دینی انکلترونک قوت وسطوت خارجہ سنی ترییدہ مدار اولدی . بومستملکہلر ، بالآخرہ ، شمیدیکی جہاہیر متفقہ نک ایلک عنصرلری اولہ جقلردر .

پوریتہ نلر علیہندہ کی تعقیبات انکلیزلرک بیوک بر قسمی نمون ایتیوردی . برنجی ژاقل پارلمنتویہ قارشی اتخاذ ایلدیکی مسلک خشنود سزلنی برقات دہا آرتدیردی . ژاق پارلمنتویہ ویرلش اولان حقوق وصلاحیتک قرالک لطفندن بشقہ برشی اولمیدیغی و بناء علیہ قرال آرزو ایدرسہ ہر زمانہ بوحقوق وصلاحیتی کریہ آلہ بیلہ جکنی مبعوثلرہ تکرار ایتمکدن خالی

قالیوردی . عوام ولوردلر قماره سی قرالک نظریه سنه اعتراضه تشبث ایدنجه
یا تعطیل ویا فسخ ایدیلورلر ایدی . ۱۶۱۴ دن ۱۶۲۱ تاریخه قدریدی
سنه ظرفنده پارلمنتو بردفمه بيله اجتماعه دعوت اولمدی .

مع مافیه ژاق پارلمنتونک قراری اولمده دن یکی ویرکولر طرح وجایته
جسارت ایده میور ایدی . بونک ایچون ، پاره سزلقدن طولایي خارجاً
هرنه اولورسه اولسون صلحچوروانه برسیاست تعقیبنه مجبور اولدی .
اوتوزسنه محاربه سنده دامادی اولان پالاتینا الکتورینی یالکزباشنه براقدی .
یکرمی سنه اول الیزابتک آوروپاده نه بیوک بر رول اوینادیغنی تخطر
ایدن انکلیزلر ژاقک سیاست مجتنبانه سندن اصلا نمون دکدیلر . فضله
اوله رق ژاق اوغلی و ولی عهدی پرنس دوغالی - که کندیسندن صکره
برنجی شارل عنوانيله قرال اولمشدر - بر قتولیک واسپانیول پرنسیسی
ایله ، فرانسه قرالیچه سی (آن دوتریش) ک همشیره سیله اولندیرمک
ایسته دی . بوکا موفق اولمده . فقط بشقه بر قتولیک پرنسس ارادی .
پرنس دوغال فرانسه قرالی اون اوچنجی لوئینک همشیره سی (هانریه)
ایله نشانلاندیغنی صروده برنجی ژاق وفات ایتدی [۲۷ مارت ۱۶۲۵] .
ژاق تبعه سنه کندیسنی اصلا سودیره مه مشدی . اداره مطلقه یه میلی
تبعه سنی قورقوتمق شویله طورسون بالعکس انکلیزلرک کوزلرینی آچلرینه ،
تهلکه ده قالان حقوق ملتی محافظه یه دها زیاده عزم ایملرینه ، کندیلرینی
مدافعه وملتک حقوقی ایله قرالک حقوقی دها واضح بر صورتده تعیین
تفریق وضرورتی حس ایتملرینه سبب اولدی .

برنجی ژاقک اوغلی برنجی شارلک جلوسی بتون
برنجی شارل دیارلمنتو انکلتړه ده پک بیوک بر مسرت ایله تلقی ایدلدی .
بوکا سبب حکمدار جدیدک پک وقور ونجیب کورونمی ، هنوز یکرمی

بش یا شدہ کوزل، جسور، عقیف اولسی وبالخاصہ پدرینک وفات ایتسی
ایدی . برنجی ژاقده موجود اولیان بتون مزیتلره برنجی شارلک صاحب
اولدینی روایت ایدیلوردی . فقط شارل دخی باباسی کی اداره مطلقه
طرفداری ایدی ؛ ملته و پارلمنتویه قارشی واقع اوله جق تعهداته رعایت
ایتمک ایسته میوردی . قروموهل ، بالاخره برنجی شارلک سنجیه سنی
شو سوزلرله پک کوزل تصویر ایتشدیر : « قرال ذکیدر، بیوک مزیتلره
صاحبدر . فقط کندیسنه هیچ امنیت ایدیلره من : یالانجیلرک الکجسوریدر » .
شارلک شهرت واعتباری پک آز سوردی . (هانزیهت) ایله ازدواجی
ایلمک خشنودسزلغه سبب اولدی . بوندن بشقه پدرینک کوزده لرندن
دوق دو بوکینگام اخلاقسزلنی ، غیرک حقوقنی غضب ایدرک الدہ ایدلمش
ثروتی ، اسراف وسفاهتی ایله بتون انکیزلرک منفوری ایکن شارل
بو آدمی سراینده وبر موقع ممتازده بولندیریور ایدی . طرز اداره ده
هیچ بر تبدل وقوعه کلمه مشدی . پوریتلرکما فی السابق مملکتدن
چیقاریلورلر ایدی . پارلمنتو اوچ سنه ده ایکی دفعه ، اولاجلوس سنه سی
بولان ۱۶۲۵ ده امور مالیہ یی قونترول ایتمک حقنه مالک اولدیننی قراله
اخطار ایتدیکی ایچون ، بعده ۱۶۲۶ ده دوق دو بوکینگامک اتہامنہ
قرار ویردیکندن طولای فسخ ایدلدی . قرال پاره بولمق ایچون جبری
استقراضلر عقد ایدیور ایدی .

برنجی شارل افکار عمومیه یی قازانمق مقصدیلہ فرانسیہ اعلان حرب
ایتدی و بوکینگام (روشل) ده عاصی پروتستانلره امداد کوتورمک مأمور
اولدی [۱۶۲۷] . فقط انکیز فیلوسی مغلوب اولدینندن حربہ دوام
ایده بیلیمک اوزره پاره ایسته مک ایچون اوچنجی برپارلمنتو اجتماعه دعوت
ایدلدی . مبعوثلر مشهور « بیوک شارت » . مشاہیر بر فرمانی قراله قبول

ایتدیرمدکجه تخصیصات اعطاسنه راضی اولمیدیلر . بو فرمانده « بیوک شارت » زمانندن بری انکلیزملتنه ویرلمش اولان حقوق تعداد ایدلدکن صکره ویرکونک آنجق پارلمتونک موافقتله طرح وجایت ایدیله بیله جکی ، جبری استقراضلرک ممنوع اولدینی ، هیچ کیمسه نیکینی بر صورتده توقیف وحبس ایدیله میه جکی بیان اولنیور ایدی . مبعوثلر بو فرمانه آتیا دخی رعایت ایدم جکینی تأمین ایلمسینی قرالدن طلب ایتدیلر . قرال وعد ایلدی [۱۶۲۸] . فقط ایرتسی سنه عوام قماره سی پارلمتونک قراری اولمهدن غیر قانونی بر صورتده وضع اولنان کمرک رسومنه اعتراض ایتدیکی زمان برنجی شارل پارلمنتوی فسخ ایتدی . « پارلمتونک یکیدن طویلانیسی ایچون اولدن بر تاریخ تعیینی قدرت حکومتزه اورولمش بر ضربه کبی تلقی ایدرز » دیدی . بوندن صکره شارل حکمدار مطلق صفتیه اداره دولته تشبث ایلدی [۱۰ مارت ۱۶۲۹] .

اداره مطلقه و نتایجی طرفنده پارلمنتو بردفعه بیله اجتماعه دعوت ایدلادی . برنجی شارل اولجه مخالفلردن و سالف الذکر فرمانک مرتبلردن ایکن بالا آخره قرال طرفه کچمش اولان لورد (استرافورد) ایله قانتوربه ری سرپسپوسی (لود) ی رأس کاره کتیردی .

(استرافورد) انکلتزه قرالنی « دنیانک الک مطلق حکمداری » یایمق ایسته دیکنی سویلیور ، (لود) ایسه بتون انکلیزلری آنغلیقان کلیساسنه ادخال ایتمک ادعاسنده بولنیوردی . استرافورد قراله پاره بولمق ایچون کینی ویرکولر طرح ایدیور ؛ دانتلادن ساردالیه بالغنه قدر صابون ، شراب ، طوز ، کور کبی هر درلو اشیانک فروختنی تحت انحصاره آلیور ؛ پک چوق زماندن بری ترک ایدلمش اولان اسکی

ویرکولری میدانہ چیقاریوردی . (استرافورد) و (لود) ملٹک مخالفتی قیرمق ایچون ایکی محکمہ فرق العادہ تأسیس ایتدیلر . بونلرک بری جرائم سیاسیہ ، دیکری جرائم دینہ اربابنہ مخصوص ایدی . بو محکمہ لر پک ظالمانہ حکملر ویردیلر . پوریتہ نلردن (لایتون Leighton) اسمندہ بری آنغلیقان کلیسا سنجہ قبول ایدلمش اولان قتولیک سلسلہ مراتب روحانیہ سی علیہندہ نشر ایلدیکی بر کتابدن طولانی شمیدیکی حساب ایله تقریباً بر میلیون فرانق جزای نقدی یه ، تشہیر دیرکنہ باغلامغہ محکوم اولدی . بو دیرکده قامچی ایله دوکولدی ، برونی کسیدلی ، آلتہ قیرمزی دمیرلہ تمغا اورولدی [۱۶۳۰] .

بو مظالم بر چوق انکلز لڑک یکیدن آمریقایہ ہجرت ایتلمرینہ سبب اولدی . فقط انکلز ملٹک اکثریت عظیمہ سی آغیر جزای نقدیلر ، حبس و توقیف لر تہلکہ سی قارشیسندہ استبدادہ تحمل ایدیورلردی . حق « کمی رسمی » نامیلہ معروف ویرکویی ویرمکدن امتناع ایدن (جون ہامپدن) ک محاکمہ سی ہرکس مراق ایله تعقیب ایتدیکی حالده ہیچ کیمسہ اونک کی حرکتہ جرأت ایدہ مدی .

نہایت انکلترہ خارجندہ وقوعہ کلن بر بحران ، اسقوجیانک عصیان استبداد ادارہ یہ خاتمہ چکدی . اسقوجیا انکلترہ دن تمامیلہ آیری اولملقہ برابر ہر ایکی مملکت عینی وکلا طرفندن ادارہ اولنمقدہ ایدی . (لود) تمامیلہ پرہ سبتہ ریینہ کلیسا سنہ تابع اولان اسقوجیادہ آنغلیقان کلیسا سنک عاداتی ، مراسم دینہ سی تطبیق ایتک ایستہ دی . ۱۶۳۷ دہ برکون ادیمبورغ بیوک کلیسا سندہ رئیس روحانی قتولیک دعالرینک ترجمہ سی اولان آنغلیقان دعالرینی او قومغہ باشلادینی صرمدہ کلیسادہ بولنان قادیلر کورولتی چیقاردیلر ، صندالیہ لری رئیس روحانینک باشنہ آتدیلر . کلیسا

یغما و تخریب ایدلدی. اسقوچیا ده عمومی برعصیان باشلادی. اسقوچیا لیلر بر اردو تشکیل ایدرک ۱۶۳۸ ده شمالی انکلتربه کیردیلر .

آنسزین بو عصیان و هجوم قارشیشنده قالمش **قیصه وارلنتو** پارلمنتور اولان شارلک عسکری آرزو قنا ایدی . یکی عسکر تدارک ایدم بیلیمک ایچون لازم کلن پاره سی یوقدی. قرال انکلترونک دخی آرتق صبر و تحملی قالمیه رق عصیان جاضر اولدیفنی حس ایدیوردی . ایکی سنه قدر تردلدن ، موقت تدبیرلردن صکره پارلمنتوی دعوته قرار ویردی [۱۶۴۰] . شورای امتک دوره اجتماعیه سی اوچ هفته بیله سورمدی . مبعوثلر قراله تخصیصات اعطاسندن اول صوک فرمان ایله تعهد ایدیلن موادک تطبیق و اجراسنی طلب ایتدیلر . بونک اوزرینه « قیصه پارلمنتو » فتح ایدلدی . فقط اوچ ای صکره (استرافورد) ک بیک درلو مشکلات ایله طویلایه بیلدیکی عسکرلر (تاین) کنارنده اسقوچیا لیلرک قارشیشنه کلیرکلز فرار ایتدکلرندن قرالک یکی بر پارلمنتوی اجتماعه دعوتدن بشقه چاره سی قالمدی .

۱۶۴۰ تاریخنده اجتماعه دعوت ایدیلن پارلمنتو ۱۶۵۳ سنه سنه قدر اون اوچ سنه اجتماع ایتدیکندن « اوزون پارلمنتو » نامیله معروفدر . مبعوثلر استبداد اداره یه نهایت ویرمهک و مطلقیت اداره نک عودتنه مانع اولمغه قرار ویرمشلردی . آغلیقان کلیساسنک پوریته نلرک آرزوسی وجهله اصلاح و تعدیلنی دخی ایسته یورلردی . پارلمنتو ، برنجی ژاق زماننده مخالف مبعوثلردن اولان (پیم Pym) اسمنده بر پوریتن آووقاتک نفوذی آلتنده ایدی . بو آووقات عوام قماره سنی بعض تدابیر اختلالیه اتحادینه تشویق ایتدی . پارلمنتونک کشادن درت کون صکره پارلمنتونک قرالک فوقنده اولدیفنی قاعده سیاسییه سنی وضع ایدرک « بیوک مجرم »

استرافوردك اتہامنہ قرار ویردیدی . استرافورد همان توقیف ایدلدی . قانون خارجہ کی معاملاتندن طولانی وطنہ اہانت جرمیلہ بالاتہام لوردلر قمارہ سندہ تحت محاکمہ یہ آلدی . انکلز قانونی موجبہ اہانت جرمی آنحق قرالہ قارشی ایقاع ایدلمش بر جرم ایدی ؛ حال بوکہ (استرافورد) حکمدارینک آرزولرینہ صادقانہ خدمت ایتمکدن بشقہ برشی یامامشدی . بناء علیہ پارلمنتو (استرافورد) ی محکوم ایدہ بیلیمک ایچون کندیسینک قانون خارجہ معاملہ کورمسی حقندہ یکی بر قانون قبول ایتدی . استرافورد ، برنجی شارل طرفندن قورتارلمسی ایچون ہیچ بر تشبث واقع اولمہ دن ، اعدام ایدلدی [۱۶۴۱] . استرافورددن براز صکرہ توقیف ایدیلن (لود) درت سنہ صکرہ اعدامہ محکوم اولدی .

پارلمنتو شارلک باشلیجہ ناظرلرینی ازالہ ایتسنی متعاقب شورای امتی قرالک معاملات کیفیہ سندن قورتارمق ایستہدی . عوام قمارہ سی مبعوثانک قراری اولدقہ طاعیدیلہ میہ جغہ قرار ویردی . اوصردہ انکلزلردن ظلم کورن قتولیک ایرلاندا لیلر عصیان و بیکلر جہ پروتستانلری قتل ایتدیلر . بو عصیانک قرالک اوامر خفیہ سیلہ ظہور ایتدیکی روایت اولندی . بونک اوزرینہ پارلمنتو برنجی شارلہ اون سنہ دن بری یابدینی غیر قانونی معاملات ی تعداد و اخطار ایدن بر بیاننامہ ویردی . عینی زمانہ پارلمنتونک قراری اولقسزین ہیچ براردو تشکیل ایدیلہ مہ مسنہ و ضابطانک تعینی مسئلہ سندہ شورای امتک رأینہ مراجعت اولمسنہ قرار ویردی .

برسنہ دن بری پارلمنتونک ہر قرارینہ تابع اولان برنجی شارل مبعوثلری قود قوتحق ایستہدی . فرقہ مخالفہ رؤاسندن اوچنی - مبعوثلرک مصونیت شخصیلری قاعدہ سنہ رغماً - اہانتلہ بالاتہام توقیف ایتدیرمک ایچون عوام قمارہ سنہ کیتدی . فقط کیفیتدن خبردار اولان اوچ مبعوث فرار

ایتمشدی . قرالک بوتشبی افکار عمومیه سوء تأثیر ایتدی ؛ لوندره اهاالیسی وبالخاصه قایقچیلر جمعیتی ملت وکیلرینک حریتی سلاح ایله مدافعهیه حاضر لاندیلر . برنجی شارل اهاالینک بویه برحرکنده بولنه جفته اصلا احتمال ویرمديکندن قورقدی ؛ لوندره دن چيقوب کيتدی [۱۶۴۲] .

بوندن صکره بر محاربه داخلیه ظهور ایتدی . آنغلیقانلر ، **محاربه داهلیه** قتولیکلر و عمومیتله زادکان قرال طرفدارای ایدیلر .

پارلمنتو ایسه شرقی و جنوبی انکلتره اهاالیسندن ، بورژووالردن ، صنعتکار ، تجار و سفینه صاحبلرندن ، پوریته نلردن ، مستقللردن معاونت کوردی .

هرایکی طرف متفق آرادى . قرال ایرلندا قتولیکلرینه ، پارلمنتو

اسقوجیا پره سیته ریه نلرینه مراجعت ایتدیلر . ۱۶۴۳ ده اسقوجیا لیلر

ایله انکلیزلر بر اتفاق عقد ایدرک پوریتن مذهبی احکامنک موقع تطبیقه

وضعی ، پارلمنتو حقوق و امتیازاتنک ، حریات ملیه نک محافظه سی وایکی

قراللغک صیقی بر اتفاق ایله اتحادی ایچون یمین ایتدیلر .

بوسیاسی و دینی معاهده عقد ایدلایکی زمان محاربه داخلیه برسنه دن

یری دوام ایدیوردی ؛ اوچ سنه سوردی . برنجی شارل قومانداسی

آلنده سلاح استعمالنه آلیشمش ، مکمل سواری اولان زادکان بولندیغی

ایچون بدایه غلبه ایتدی . پارلمنتونک عسکری ضبط وربطدن محروم

عوام ناسدن عبارتدی . دیگر طرفدن پارلمنتو ایله عصات قوماندانلرینک

قراله حرمت ایتملری قراللق طرفدارلرینک احراز موفقیت ایللری تسهیل

ایتدی . اداره مطلقه یی هیچ کیمسه ایسته میور ، فقط هرکس قراللقدن

بشقه بر شکل حکومته راضی اولیوردی . قرومو ملک دیدیکی کبی عاصیلر

« عادتاً قرالی مغلوب ایتمکدن قورقورلری » .

۱۶۴۴ تارینچندن اعتباراً قرومو مل احوال حربیه یی دیکشیدردی .

آز بر ثروتہ مالک کوی زاد کانندن وعوام قمارہ سنک غیر معروف اعضا سندن
اولان (اولیوہ قروموہل) ۴۳ یاشندہ حقیقی بر حرب آدمی اولہ رق
میدانہ چقیدی. تعصب دینیک بر قوت اولدیغنی و بو قوت حسن استعمال
ایدیلیرسہ پارلمتو اردو سنک تعلیم و تربیہ جہ مشاہدہ اولٹان نقصانی یرینہ
قائم اولہ جغنی آ کلامشدی. مصرفنی کیسہ سندن ویرہ رک کندی مملکتندہ
غایت دیندار «مستقللر» دن بر سواری آلای تشکیل ایتشدی. بونلر
آرہ سندہ انضباط پک صیقی ایدی؛ سرخوشلفہ، دین علیہندہ سوز
سویلہ مکہ قطعاً مساعدہ ایدیلور، کلیسا الہیلرندن بشقہ بر شرقی
ایشیدیلوردی. بونلرک نظرندہ قرالہ قارشی حرب بر «حرب مقدس»
ایدی. کندیلرینی دین حق یولندہ حرب ایدن مجاہد لرہ، تور اتدہ تصویر
ایدیلن بنی اسرائیلہ، دشمنلری اولان آنغلیقانلر ایلہ قرالک عسکرینی
ایسہ فلسطینلرہ، عمالقہ یہ بکزہ تیورلردی. بوندن بشقہ زادکاندن
غیر یسنک ضابط اولسی اوزمانہ قدر کورلمش برشی دکل ایکن قروموہل
بو آلایدہ ضابطلک رتبہ لرینی مزیت، معلومات وجسارتلرینہ کورہ
پلا تفریق ہر کسہ ویرمشدی. بوصورتلہ تشکیل ایدلمش اولان آلایک
غایت کزیدہ بر عسکر اولہ جغنی شبہہ سز ایدی. اونلرہ قوماند ایدن
قروموہل مادامکہ برنجی شارلہ قارشی حرب ایدیلوردی، شو حالہ قرالہ
آرتق حرمت ایتہ مک و ممکنسہ کندیسنی مغلوب ایتمک لازم کلدیکنہ قانع
ایدی. «قاریشیقلاق آرہ سندہ قرالہ راست کلیرسہم طبانجہم ایلہ همان نشان
آلیر وعادی بر شخص کچی کندیسنی اولدیریرم» دیوردی.

قروموہلک سواری آلای ایلک مصادمہ دہ، مارستون مور - Marston Moor
محاربہ سندہ [۲ تموز ۱۶۴۴] مظفریتنی قازاندی. بوموفقیت اوزرینہ
پارلمتو بتون اردونک قروموہلک آلای طرزنندہ اصلاح وتنسیق ایدلمسہ

قرار ویردی . « دیندار قوماندانلر ویکرمی بیک ناموسلی عسکر » ایسته نیلدی ؛ بونلری « مستقلر » آره سنده بولایلر . مارستون مور محاربه سندن بر سنه کچمه مش ایدی، که قروموهل یکی اردویی قومانداسی آلتنه آلهرق (ناسبی Naseby) موقعنده برنجی شارلی مدهش برهزیمته دوچار ایتدی. قروموهل قرالک اله کچیریلن اوراقی میاننده برنجی شارلک ایرلاندا قتولیکرله مناسباتی و اونلرک عصیاننده معنا مشترک اولدیغنی مؤید بعض دلائل بولدی .

قرال بر سنه قدر یکی بر اردو تدارکنه بیهوده چالیشدی . نهایت ، انکلز تبعه سندن زیاده اسقوچیلی تبعه سیله ده قولا ی او یوشه جغنی امید ایتدیکندن اسقوچیا اردوسی قرارگاهنه کیدرک تسلیم اولدی. اسقوچیا لیلر قرال به بعض تکلیفلرده بولندیلر . شارل جواب رد ویردیکندن کنديسینی درت یوز بیک لیرا مقابلنده انکلزلره تسلیم ایتدیلر [۱۶۴۷] . محاربه داخلیه ختام بولمشدی .

تبعه سی الیه اسیر دوشن قرال اکر صمیمی برمسلك قرالک اسارت ، اتحاد ایتسه ویا پارلمنتو ویا اردو ایله - خفی بر مقصد محکومیت و اعدامی تعقیب ایتمه مک اوزره - عقدائتلاف ایلسه ینه حکومتنه صاحب اوله جق ایدی. فی الحقیقه محاربه داخلیه ختام بولنجه دین مسئله سندن طولایی پارلمنتو ایله اردو آره سنده بر اختلاف ظهور ایتمشدی . پارلمنتو اعضاسنک اکثریتی پوریتن ایدی . اردو ایسه « مستقلر » دن مرکب دی. پوریتنلر مستقلردن نفرت ایدرلر و اونلری - ولو که اشکنجه و حبس ایله اولسون - پوریتن کلیساسنه عودته اجبار ایتمک ایستلردی . بونک ایچون اولا اردویی میداندن قالدیر مقایجاب ایدیوردی . پارلمنتو، بومقصد ایله ، اردویی ترخیصه حاضر لانیوردی . مستقلر ایسه بالعکس امور

دینہ دہ مساعده کارانہ طاورانہ یلمسنی وحق قنولیکلرہ بیلہ بر درجہ یہ قدر مسامحہ کوسترلمسنی ، پارلمنتونک اونلرہ سربستی آیینی تأمین ایلمسنی ایستہ یورلردی .

ہر ایک طرف قراک معاونتی تأمینہ چالیشدی . پارلمنتو یالکز پرہ سبتہ رییہ نلرک اصول اداره سنی قبول ایتمک شرطیلہ برنجی شارلہ اعادہ حکومتی تکلیف اییدی . اردو قرالی اقامت ایتمیکی شاتودن قالدیردی ، دیگر بر شاتویہ کوتورہ رک کنڈیسنہ حکمدار معاملہ سی یادی . اردونک ہر بر آلایدن منتخب ایکیشر مأموردن مرکب اولان بر مجلسی واردی . یو مجلس اکر امور دینہ دہ مساعده کارانہ طاورانہ ورجال حکومتک - اون سنہ ایچون - پارلمنتو طرفدن انتخاب ایلمسنی قبول ایدرسہ کنڈیسنی قرال طانیہ جغنی برنجی شارلہ تبلیع اییدی . دیگر طرفدن قرومول اردویی ، پارلمنتوی وقرالی باریشدرمق چارہ لرینی آرایوردی .

شارل بو حال قارشیسندہ ایکی فرقہ بی دہ برینی دیکری علیہنہ قوللانمق صورتیلہ محوایتمک ایستہ دی وهر کسی آلامق ایچون ہرکس ایلمذا کرہ یہ کیریشدی . ال آلتندن دہ محاربہ داخایہ نک یکیدن باشلامی ، بیوک شہرلردہ عصیانلر وقوعی ، انکلترہ نک اسقوجیالیر طرفدن استیلاسی اسبابی تہیہ چالیشیوردی . اسقوجیالیر قرال لرینی تسلیم ایتمکدن صکرہ اونکلہ باریشمیشلر ، شمدی اونک طرفنی التزام اییدیورلردی . ایکنجی محاربہ داخلہ باشلادی . فقط عصیانلرک پک چابوق اوکی آلتدی ؛ قرومول اسقوجیالیری مغلوب وادیمبورغ شہرینی ضبط اییدی .

بو وقایع آرمندہ قراک (وایت) آطہ سنہ فراری وجزیرہ والیسی طرفدن همان توقینی ، بر مدت صکرہ دہ مکتوبلرینک ضبطی شارلک ایکی یوزلیلکنہ ، عاصیلرہ اشتراکنہ آرتق ہیچ شہہ براقدی . بو آندن

اعتباراً اردو قرالی دوچار جزا ایتمکه قرار ویردی ؛ « اغتشاشاتک اک بیوک و باشلیجه مسینک - اهانمتدن و کندی امریله دوکیلن قاندن طولای جزاسنی کورمک ایچون - محکمه حضورینه جلب ایدلمسنی ، پارلمتودن طلب ایتدی .

پارلمتو بوطله جواب اولمق اوزره قرال ایله عقد صلح ایلدی .
 بونک اوزرینه اردو ضابطلری برنجی شارله طرفدار اولان ۱۴۰ مبعوثی طرد ایدرک پارلمنتوی « تصفیہ ، ایتدیلر [۱۶۴۸] . شورای امتده قالان اقلیت قرالک تحت محاکمه آلمسنه قرار ویردی . شارل دشمنلرندن مرکب اولان بر انجمن فوق العاده حضورینه جلب ایلدی . مع مافیه ۱۳۵ اعضادن آنجق آلتمش یدییی حاضر بولندیلر . محاکمه طقوزکون سوردی [۳۰ کانون نانی - ۸ شباط ۱۶۴۹] . شارل غیر قانونی بر صورتده تشکل ایتمش اولان محکمه نیک سؤالرینه جواب ویرمکدن امتناع ایتدی .
 عسکرلرک کین و نفرت صدارلی و : « جناب حق ذات حشمتناهیلرینی قورتارسون ! » دین اهاالینک متأثرانه اطوار واقوالی آره سنده قرال « مستبد ، خائن ، قاتل و دشمن مملکت ، صفیله اعدامه محکوم اولدی .
 ایرتمی کونی حکم اعدام (وایتھال Whitheall) سرای قرالیسی قارشیسنده اجرا ایلدی . اوکله وقتی - ایکی ساعتدن بری او طه سنده مرشپینک حاضر اولمسنی بکله یین - قرال سیاستگاهه کتیرلدی . میدانده طولانمش اولان عسکره واهالییه قوتلی بر سس و نازک بر طور ایله خطاب ایدرک مسلک و آمالی حقنده ایضاحات ویردی و نطقنک پک مختصر اولمسندن طولای اعتذار ایتدی . سوزینی بیتیردیکی زمان یاننده کیلرله قونوشه رق کندی کندینه صویوندی . صاچلرینی قالدیروب ایپکدن بر تاکیه کیدی و « اعدام طومروغنک صاغلام اولوب اولمیدیغنی ، سوردی .

جلاده : « قیصه بر دعا اوقویه جنم ، اللرمی اوزاتدیغم زمان بالطهینی ایندیریکنز . فقط دها اول یایمیکز . » دیدی . دیز چوکدی ؛ بوینی اوزاتدی ؛ قیصه بر دعا اوقودی ؛ اللرینی اوزاتهرق جلاده اشارت ویردی .

قراک اعدامی متعاقب - تصفیهدن صکره - Parlement « مهوریت Croupion یعنی پارچه لاش پارلمنتو نامی آلمش اولان - اوزون پارلمنتو حاکمیت ملیه اساسنی اعلان ، قراللی الغا وجمهوریتی تأسیس ایتدی . لوردلر قماره سی قالدیلدی و قوه تشریعیه عوام قماره سنه ، قوه اجرائیه بوقماره طرفندن منتخب قرق بر اعضادن مرکب اولان بر شورای دولته ویرلدی .

قروموهل شورای دولت اعضاسی میانه کیردی . بو طرز اداره بش سنه سوردی . بومدت طرفنده باشلیجه وقایع ایرلاندا سفری ، اسقوجیالیر ایله حرب ، سیرسفاژن قانوننک نشری ، هولاندا محاربه سیدر .

ایرلاندا سفری ۱۶۴۱ سنه سنده وقوعه کلمش اولان عصیان و قتاللر بهانه سیله اجرا ایدلمشدر . بوسفری اداره ایدن قروموهل ایرلاندا قتلایکترینه - وقتیه عبرانیلرک کنگانیلره یاپدقلری - معامله یی یاپدی . برانکلیمورخی « ملل جدیدنه دن هیچ بری بودرجه مدهش ظلملره معروض قالمامشدر . » دییور . جزیره نک هر طرفنده وبالخاصه (دروغه دا Drogheda) ده جداً مدهش قتاللر وقوعه کلدی . یوزلرجه قیزلر وقادینلر قالدیریلهرق آمریقا ده اسیر صفتیه ساتیلدیلر . ایرلاندا لیرانکلیمور مستعمرلرینک ضبط ایتدکلری چیفتلکلردن طرد ایدلدیلر ؛ جزیره نک هواجه الکفا واک غیرمنبت یرلری اولان غربه ، (قوناوت Connaught) چکیلدیلر . مملکتک آنجق آلتیده برنده بارینه بیلدیلر ؛ کندی تارالارنده کراجی اولدیلر .

یعنی انکلیز غاصبرینک حساب ومنفعته چالیشدیلو. هنوز زمانزده تعمیر ایدلین بو حقسزلق عصر حاضر انکلتږه سی ایچون باعث عار وحجاب اولان ایرلاندا مسئله سنک مبدئیدر .

اسقوجیا محاربه سی ایرلاندا سفرینی متعاقب وقوعه کلدی . جربدن مقصد برنجی شارلک اوغلی اولوب اسقوجیالیر طرفدن قرالغه قبول ایدلمش اولان ایکنجی شارلی طرد ایتک واسقوجیالیری جمهوریت اعلانه وانکلیز جمهوریتله برلکده بر هیئت متحده تشکیلنه اجبار ایلک ایدی . قرومول ادمبورغی آلدی واولا (دومبار Dumbar) ده ، بعده (وورچستر Worcester) ده ایکنجی شارلک اردولرینی محو ایتدی . ایکنجی شارل پک کوجلکله قاچه بیلدی ؛ اوروپایه کیتدی [۱۶۵۱] . اسقوجیالیر انکلتږه ایله اتحادی قبول ایدیلر .

اسقوجیاده کی موفقیاتی متعاقب پارلمنتو سیر سفائن قانونتی قبول ایتدی [۹ تشرین اول ۱۶۵۱] . بو قانون موجبجه انکلتږه به کلن هر هانکی بر آوروپالی کمی آنحق منسوب اولدینی مملکتک محصولاتی کتیره بیله جک ایدی . آسیا ، آفریقا و آمریکا محصولاتی یالکز انکلیز کیلریله ادخال ایدیله بیله جک ایدی . بو قانون قدر انکلتږه ایچون نتایج عظیمه تولید ایتش بر قانون یوق یوق کیدر . صوک عصرک واسطنه ، ۱ کانون ثانی ۱۸۵۰ تاریخه قدر تطبیق ایدیلن سیر سفائن قانونی انکلیز لری کنیدلرینه الزم اولان شیلری بالذات بشقه مملکتلره کیدوب آلمغه مجبور ایتدی . بونک ایچون ده تجارت کیلری یامق و بو کیلری مملکتک احتیاجاتی آرتدینی نسبتده چوغالتمق ایجاب ایلدی . انکلتږه نک سطوت بحریه سی سیر سفائن قانونندن حیقدی .

بو قانون هولاندالیرله حربه سبب اولدی . چونکه هولاندالیرک

باشلیجہ صنعتلری اولان نقلیات بحریہ یہ مہلک بر ضربه اورمشدی . محاربہ ایکی سنہ سوردی [۱۶۵۲ - ۱۶۵۴] . هولاندالیر مظفر اولہ جقلرندن امین ایدیلر . معافیہ (ترومپ Tromp) و (روئتر Ruyter) کبی الہمقتدر هولاندا امیراللری (دوور) پیشکاہندہ و (هوغ Hougue) برونندہ بر سواری ضابطی ایکن بحریہ قوماندانی اولان (بلاک Blake) قومانداسی آلتندہ کی انکلیر دونماسنہ قارشى ہیسچ برشی پایہ مدیلر . ایالات متحدہ جمہوریتی، نہایت ، صلح طلبنہ و التجا ایدن استوارتلری طردہ مجبور اولدی [۱۶۵۴] .

هولاندالیرلہ عقد صلح ایدلہ کی زمان اوزون قرومہلک ادارہ سی پارلمنتو بر سنہ دن بری موجود دکلدی . فی الحقیقہ اسقوجیا محاربہ سنی متعاقب پارلمنتو ایلہ اردو آرمندہ یکیدن اختلاف ظہور ایتشدی . قرومومل واردو عوام قمارہ سنک فسختی آرزو ایدیورلردی . چونکہ اون ایکی سنہ دن بری اجتماع ایدن بومجلس محاربہ داخلہ و « تصفیہ » دن طولانی یوزدن دہا آز اعضادن مرکب قالمش اولدینی ایچون آرتق انکلترہنک مثل حقیقیسی اولق صفتی و ہر درلو نفوذ و اعتباری غائب ایتشدی . عوام قمارہ سی ایسہ ، بالعکس ، محافظہ قوت فکرنندہ ایدی وحتی محاربہ ختام بولدینی ایچون اردونک ترخیصی دوشونیور ایدی .

قرومومل ایکی سنہ قدر تردد دن صکرہ ضابطان ایلہ بالاتفاق « کوزہ لری صوصدیرمغہ » ، یعنی مبعوثانی طاغیتمغہ قرار ویردی . اردونک ترخیصی حقدہ کی قانونک قبول ایدیلہ جکی کون - مبعوث صفتی حائز اولدینی ایچون - مذاکرہ سالوننہ کیردی . رایلر طویلانہ جنی صرمدہ یرندن قالقدی ؛ سالونک بر باشندن اوتہ کی باشنہ کیدرک بر نطق ایراد ایتدی ؛

حد تلندی ، باغیر مغه باشلادی . رفقاسندن بعضلرینه سرخوش ، مفسد ، اخلاقسز دیدی . بونلرک مبعوثان آره سنده بولملری « انجیله بر حقارت ، اولدیغنی سوبلدی . آیاغنی یرم اوره رق : « اللهم ملت متخبه سی اولان بر ملتک مبعوثلری اولیورسکنز ، ها ! دفع اولیکنز ، کیدیکنز ، آرتق سزدن بحث ایدلیدیکنی هیچ کیمسه ایشیتمسون ! » دیه باغیردی . او صروده اوتوز سلا حشور مجلس سالوننه کیردیلر . مبعوثلر سالوندن چیقیدیلر ؛ قرومول شورای امت دائرہ سنی مهرلدی ؛ قپوسنه : « موبیلیه سز کراالق خانه ، لوحه سنی آصدی . شورای دولت دخی فسخ ایدلدی [۱۶۵۳] .

بو جرأتکارانه حرکت نتیجه سنده انکلتره اردونک النده قالدی . اردو قروموله « جمهوریتک حامی لوردی Lord Protecteur de la République » عنوانیه صلاحیت تامه اعطاسنی تکلیف ایلدی ؛ قرومولده قبول ایتدی .

قرومول بش سنه ، وفاته قدر [۱۶۵۸] حقیقی بر دقتاتور اولدی . اردو سایه سنده - (استرافورد) و (لود) ک زمانده برنجی شارلدن دها مستبد - بر حکمدار مطلق کی حرکت ایتدی . هیچ بر مخالفتہ تحمل ایدمزدی . اجتماعه دعوت ایتدیکی دوت پارلمنتوی - مبعوثلرده براز استقلال افکار آثاری کوریر کورمز - فسخ ایتدی . انکلتره نک هیچ بر طرفنده عصیان اولدی . چونکه مملکت بر حکومت عسکریه تابع ایدی واون قسمه آریله رق هر بر قسم بر جنرالک قومانداسنده بولنیوردی . حتی ۱۶۵۷ ده پارلمنتو قروموله قرال عنوانی المسنی تکلیف ایتدی . ققط قرومول اردویی کندی علیهنه دوندیرمه مک ایچون بو تکلیفی رد ایلدی . یالکمز خلفنی تعین ایتک حقی استحصا ایتدیکندن وراثت حکومت بوصورتله فعلاً قبول ایدلمش اولدی .

قروموہلک سیاست خارجیہ می انکلیز لک عزت نفس لری اوقشامش وعسکری دیقتاتور لکہ تحمل ایللرینہ خلیجہ مدار اولمشدر. بو سیاستک اک مهم صفحہ می اسپانیایہ قارشی فرانسه ایله اتفاق فرانسزلک اسپانیوللرہ غلبہ سنی تأمین ایتدیکی کبی انکلیزلرہ فرانسه ساحلندہ (دونکرک) لیمانی و آمریقاده آنتیل آطہ لرندن (ژامایق) جزیرہ سنی قازاندیردی. قروموہل الیزابت کبی حرکت ایتک، انکلیترہ ی پروتستانلرک حامیسی یا بق ایستہ یوردی. «انکلیز نامنی رومالی نامندن دہا بیوک یاپہ جنم، دیور ایدی. فی الحقیقہ قروموہلک یالکز براخطاری اوزرینہ صاووادوقہ می آلپ طاغلرندہ کی (وودووا) لرہ ظلم ایتکدن واز چکدی. بوهیا پروتستانلری آلمانیا ایمراطوری نزدندہ توسط ایتک ایچون قروموہلہ مراجعت ایتدیلر. انکلیز دونمالری بتون ملتہرہ منسوب کیملری کندیلرینی سلاملا مغہ مجبور ایدیورلردی. عادتاً بحر سفیدک امور ضابطہ سنی درعہدہ ایتشلر کبی تونس و جزایر قورصانلرینی تعقیب ایلورلردی.

قروموہل ۵۹ یاشندہ وفات ایتدیکی زمان [۱۳ ایلول ۱۶۵۸] اوروپا حکمدارلرینک اکثری، حتی برنجی شارلک یکنی اولان فرانسه قرالی بیلہ سرایلرندہ مآمی امر ایتدیلر.

قروموہل وفاتندن براز اول اوغلی ریشاردی کندیسنہ خلف تعین ایتشدی. ریشارد قروموہل مخالفتہ معروض قالمہدن حکومتی الہ آلدی. فقط «حامی لورد» وظیفہ سنی ایفا ایچون حاضر لانا مشدی. ذوق وصفایہ مفتون، سحیہ ضعیف وقورقاق ایدی. نہ عسکر، نہ دہ متعصب اولمدیقندن براردوایله متعدد مذهب سالکلرینک دائماً قاریشیدردقلری برملکتی اداره ایدہ مز ایدی. اونک ایچون سکرز آی صکرہ استعفا ایتدی [مایس ۱۶۵۹].

ريشارد قروموه لك استعفا سنی تعقيب ايدن سنه
 استوارتلك اعاده
 طرفنده انكلتزه احوالى بك زياده قاريشدى .
 ملكوتى
 حكم ونفوذ پارلمنتو ايله اردوده ايدى . اردو
 ايكي قسمه آيرلمشدى: (ژورژمونق Monk) ك قومانداسنده كي اسقوجيا
 اردوسى ، لوندره جوارنده بولنان و (لامبر Lambert) ك قومانداسنده
 اولان انكلتزه اردوسى .

لامبر ايله معيتمده كي ضابطان قروموه طرفندن غير قانونى برصورتده
 فسخ ايدلمش اولان اوزون پارلمنتو اعضاسنى اجتماعه دعوت ايتديلر .
 بوجاس اعضاسندن ۷۰ مبعوث قالمشدى . بونلر حكومتى تماميله كندى
 اللرينه آلق وضابطان ايله اردويى تحت اطاعته طوتمق ايسته ديلر . احتمال كه
 ايكنجى بر قروموه اولمى تخيل ايدن لامبر مبعوثلرك اجتماعنى منع ايتدى .
 لامبرك ضابطانندن مركب بر « انجمن حكومت » تشكيل ايدلدى .

بونك اوزرينه (مونق) اسقوجيا اردوسيله ايشه مداخله ايتدى .
 لوندره يه كيردى ؛ لامبرى حبسخانه يه آتدى ، تشكيلات حكومتى تنظيمه
 مأمور اولق اوزره يكي بر پارلمنتو انتخاب ايتديردى . « اختيار عسكرلرك »
 حاكيتندن آرتق نفرت ايتمش اولان انكليزلر همان بتون مبعوثلرى قراللىق
 طرفدارلرى آره سندن انتخاب ايتديلر . ديكر طرفدن (مونق) هولانداده
 بولنان ايكنجى شارل ايله مذاكره يه كيريشمش ايدى . شارلك هنوز هولانداده
 ايكن عفوعومومى يى وامور دينيه ده مساعده كارلنى متضمن بر بياننامه نشر
 ايتمشى پارلمنتونك قراللى اعاده يه واستواترلى دعوته قرار وىرمى ايچون
 كفايت ايتدى . ۲۵ مائس ۱۶۶۰ تاريخنده ايكنجى شارل اهلينك
 شدتلى آلقيشلرى آره سنده لوندره يه داخل اولدى .

استوار تارک عودتی خصوصندہ هیچ بر شرط در میان ایدلمہ مشدی ۔
 قراللق حقوقی تمامیلہ ایکنجی شارلہ ویرلمشدی ۔ بالخاصہ پارلمنتوی ایستہ ۔
 دیکی زمان اجتماعہ دعوت ، تعطیل ویا فسخ ایتمک حق حقوق حکمداری
 جملہ سندن ایدی ۔ حق پارلمنتو دها ایلری یه کیتدی واوزمانہ قدر انکلترہ
 حکمدار لرندن هیچ برینہ ویرلمہ مش بر امتیاز اولمق اوزرہ ایکنجی شارلہ
 سنوی ۱,۲۰۰,۰۰۰ انکلز لیراسی تخصیصات اعطاسنہ قرار ویردی ، کہ
 بو پارہ زمانمز حسابیلہ ۱۲۰ ملیون فرانق ایدر ۔ اگر قرال مصارفی
 تنقیص ایتمک مہارتی کوسترر ایسہ بو قدر چوق بر پارہ ایلہ ایستہ دیکی کبی
 ادارہ امور ایدہ بیلیر وپارلمنتوی اجتماعہ دعوت احتیاجندن وارستہ قالہ
 بیلیردی ۔ الحاصل ، پارلمنتو اخذ ناراملندن دخی وازکچہ مدی ۔ قرومولک
 جسدینک قبرندن چیقاریلہ رق دار آغاجنہ آسيلمسنی امر ایتدی ۔ برنجی
 شارلی اعدامہ محکوم ایتمس اولانلرک تحت محاکمہ یه آلملرینہ قرار ویردی ۔
 بونلردن اون اوچ مبعوث سابق اعدام ایدلدی ؛ دیکرلری خدمات
 عمومیه دن مؤبدأ طرد اولندیلر ۔

ایکنجی شارل
 یکی قرال اوتوز یاشندہ ایدی ۔ ظریف ، کبار واصل
 ایدی ۔ پدینک اعدامندن صکرہ وقوعہ کلن اسقوجیا
 محاربه سندہ هنوز یکرمی یاشندہ ایکن جرأت ، شجاعت واعتدال دمنی
 پارلاق دلائل ایلہ اثبات ایتمشدی ۔ ذکی ایدی ؛ ہر شیئی آکلامفہ
 حریص ایدی ۔ فقط چالیشمقدن نفرت ایدردی ۔ ہر شیدن اول ذوق
 وصفا آدمی ، سفیہ ایدی ۔ یکرمی بش سنہ لک ادارہ حکومتنده انکلز
 سرائی بتون اوروپا سرائلرینک الک کلنجه لیس ایدی ۔ سیاساتدہ پدري
 ویسوک پدري کبی ادارہ مطلقہ طرفداری اولوب پارلمنتونک قوتنرولنی
 قبول ایتمیور و : مجلس عمومی حالندہ طویلانان بعض اشخاص قرالک

ایشلریله مشغول اولدجه واونک حساباتی ، وکلاسنک اجرا آتی تدقیق و تفحص ایتدجه کندیمه حکمدار نظریله باقمام « دیور » کندیسنه مخالفت ایدیلن و وکلاسی پارلمنتو حضورینه جلب اولنه بیلن بر قرال آنجق اسماً قرالدر « سوزلریده علاوه ایدیور ایدی .

مع مافیه بر چوق دفعه پارلمنتونک ، افکار عمومیه نك آرزوسنه تابع اولمق احتیاطکارلغنی کوستردی . بونک سببی مرفه و مسعود یشامق ایسته مسیدر . قرال اولمازدن اول ممالک اجنبیهده یشامش ، چوق صیقندی چکمشدی . بو محرومیتله تکرار قاتلانغنی آصلا آرزو ایتیموردی . خودکاملق تأثیریه ممکن مرتبه خوش کچنیمکه چالیشه رق یکریمی بش سنه اجرای حکومت و قرال اوله رق اولمکه موفق اولدی .

ایکنجی شارلک ایلک سنه حکومتده منازعات دینه

سیاست راجهیه باشلادی . ۱۶۶۱ده انتخاب ایدیلن پارلمنتو اودرجه

و غارمیه قراللق طرفداری ایدی ، که شارل بو پارلمنتوی

۱۸ سنه محافظه ایتدی . پارلمنتو آنغلیقانیزم مذهبنی بتون انکلیزلره قبول ایتدیرمک طرفداری اولدیغدن آنغلیقان اولمیانلرک خدمات عمومیه دن هیچ برینه قبول ایدلمه ملرینه ، آنغلیقان کلیساسی دعا کتابلرینک استعمالی هرکس ایچون مجبوری اولمسنه و آنغلیقان پستقوسلرینی طایبق ایسته . مینلرک خدمات روحانیه دن اخراج ایدلملرینه قراز ویردی . عادتاً (لود) زمانه عودت ایدلمشدی . پوریتن مأمورین روحانیه سندن ایکی بیک قدری دائرة روحانیه لرندن طرد اولندیلر .

پوریتنلر علیهنده کی تدابیر قتولیکلره دخی تطبیق اولنغه باشلادی . قتولیک (هاریهت)ک اوغلی و قتولیک پورتکیز قرالک قیزی (قاترین)ک زوجی اولان ایکنجی شارل میل طبعیه سی حسیله قتولیکلره مساعد بولمق

ایستہ یوردی . بعض اسباب خارجیہ ومالیہ دخی بویہ بر مسلك اتحاد ایتسنی ایجاب ایلکده ایدی . قرال - پارلمنتونك کنديسنه سنوی اوتوز میلیون فرانك تخصیص ایتش اولسنه رغماً - اکثریا پاره سز قالیورایدی . لازم اولان پاره یی کنديسنی فرانسه قرالی اون دردنجی لوی ئی یه صامق صورتیله تدارك ایدیوردی . ایلک دفعه ، ۱۶۶۲ تاریخده ، و قتیله قروموه لك ضبط ایتش اولدینی (دونكرك) لیمانی ۲۰ میلیون فرانك مقابلنده فرانسه یه فروخت ایتدی . بوصایتش انکلیز لری هیچ نمون ایتدی . شارل تبعه سنك خوشنودسز لغی ازاله ایتك ایچون (کینه) ساحلنده کی تجارت موقعلری مسئله سندن طولای هولاندالیره اعلان حرب ایتدی [۱۶۶۴] . بالاخره ایکنجی ژاق عنوانیله تخته چقان دوق دیورقك قومانداسی آئنده پارلاق بر مظفریت ایله باشلایان حرب فنا بر شکل آلدی ؛ هولاندا دونماسی (تامیز) نهری منصبندن کیره رك لوندره جوارینه قدر ایلریلدی [۱۶۶۷] . عقد ایدیلن معاهده نامه موجبجه هولاندالیرك شمالی آمریقاده هنوز تأسیس ایدوب اوزمان پك اهمیتسز عد ایدیلن مستملكات انکلتزمه ترك ایدمك شرطیله سیر صفائ قانونك شدتی هولاندا کیلری حقنده تعدیل ایدلدی . قرال بودفعه انکلیزلرك حدتی تسکین ایتك ایچون باش وکیلی (قلا رندون Clarendon) ی فدا ایتدی و (قلا رندون) قرالک سیاستنی بتون شدتیله تقییح ایتدیکی حالده بو سیاستدن طولای مسئول ومحکوم اولدی . اون دردنجی لوی پهی بانك اسپانیا اداره سنده کی قسمی ضبط ایتمکه باشلادینی زمان شارل محضا افکار عمومیه یه خوش کورونمك ایچون فرانسز اردولرینی توقیفه جالیشان هولاندالیرك اتفاق تکلیفی قبول وهولاندا ، اسوج وانکلتزمه آره سنده بر اتفاق مثلث عقد ایتدی [۱۶۶۸] .

ایکی سنه صکره ایکنجی شارل پاره یه احتیاجندن طولای اوون دردنجی لوئی ایله باریشه رق ایکی میلیون لیرا مقابلنده هولاندا علیه فرانسه ایله بر معاهده اتفاقیه عقد ایلدی . شارل بو معاهده ایله وینه پاره مقابلنده ممکن اولدینی آنده قتولیک مذهبی قبول ایلجه جکنی تعهد ایلوردی . اوون دردنجی لوئی تبدیل دینی تسهیل ایچون شمدیکی حساب ایله ۱۸ میلیون فرانت ویره جکدی .

(دوورده) ده عقد ایدیلان بو معاهده موجبجه ایکنجی شارل ۱۶۷۲ تاریخنده پوریتن و قتولیکر علیهنده کی قانونلرک تطبیق - صلاحیتی اولمدینی حالد - تأخیر ایدلدیکنه دائر بر بیاننامه نشر ایتدی . بعده اوون دردنجی لوئی ایله برلکده هولاندا یه اعلان حرب ایلدی .

برازاول قرالک برادری و ولی عهدی دوق دییورق قتولیک مذهبی قبول ایتسندن طولای ذاتاً تلاش ایتکه باشلایان انکلیزلر قرالک سالف الذکر ایکی تدبیری اوزرینه بسبتون حدتلدیلر . قتولیک مذهبک اعاده سنه میدان ویرمه مک ایچون پوریتنلرله آنغلیقانلر برلشدیلر . شارل بیاننامه یی کری آلمغه مجبور اولدی [۱۶۷۳] . بو بیاننامه مک ملتک قرال حقنده کی امنیتلکنی آر تیرمقدن ، قتولیکره خصومتی تشدیددن واونلر علیه تدابیر جدیده اتخاذهدن بشقه بر فائده سی اولدی .

پارلمنتونک قراری اوزرینه بتون مأمورلر قتولیک اعتقاداتی مع القسم انکاره و آنغلیقان آیینی موجبجه عبادت ایتدکری میین منسوب اولدقاری دائره روحانیه دن ویرلش بر وثیقه ابرازینه مجبور طوتولدیلر . قتولیک مأمورلرک جمله سی - آمرال دوق دییورق دخی داخل اولق اوزره - مجبوراً ترک خدمت ایتدیلر .

ایکنجی شارل افکار عمومیہ دہ کی ہیجانی تسکین ایچون ہولاندا ایلہ عقد صلح ایتدی [۱۶۷۴] ، برادرینک بیوک قیزی (ماری دیورق) ی اون دردنجی لوئینک دشمنی (کیوم دورائر) ویردی وحقی بر آراق فرانسیہ اعلان حرب ایدہ جک قدر ایلری یہ واردی [۱۶۷۷] ؛ فقط بو تدابیردن هیچ بر فائده حاصل اولمدی . جزویتلر طرفندن گویا بر جمعیت تشکیل ایدلمش اولدیغنه دائر وقوع بولان بر اخبار قتولیکلر علیہندہ کی خصومتی آرتیردی . جمعیت خفیہ نک لوندرہ یی یاقہ جنی ، قرالیچہ نک معاونتیلہ ایکنجی شارلی خلع ویا تسمیم ایدہ جکی ، دوق دیورقی اجلاس ایتک صورتیلہ قتولیک مذہبنی دین رسمی حکومت یاپہ جنی روایت اولندی . اصلی اولمان بوروایت اوزرینہ ایکی بیک کشی حبس ایدلدی ؛ بر چوقلری آصیلدی . انکلتزہ دہ اقامت ویا اورایہ مواصلت ایدن بتون قتولیک راہبرینک اعدام اولمنسہ قرار ویرلدی ؛ قتولیک مبعوثلر ولوردلر پارلمنتودن چیقارلایلر .

بونک اوزرینہ شارل عوام قمارہ سنی فسخہ قرار ویردی [۱۶۷۹] . فقط یکی انتخاب اولمان مبعوثلر دہا زیادہ شدت کوستردیلر ؛ قتولیک اولان دوق دیورقک حق سلطنتدن محروم بر اقلسمی ایچون بر قانون حاضر لادیلر . بعدہ ، کیفی توقیف وحبس لہ مانع اولمق ایچون انکلیز قانونلرینک اک مشہور لرندن بری اولان وحریت شخصیہ یی اون یدنجی عصر دہ انکلتزہ دہ - الیوم فرانسیہ دہ کندن دہا واسع وامین بر صورتہ - تأمین ایدن « Habeas corpus » قانون مشہورینی قبول ایتدیلر . بو قانون موجبہ توقیف ایدیلن ہر شخص یکر می درت ساعت ظرفندہ عائد اولدینی محکمہ حضورینہ چیقہ جق واکر محکمہ توقیفہ لزوم کور - مرزہ ہان تخلیہ ایدیلہ جک ایدی . قرال بوقانونی تصدیق ایلدی . فقط

برادرینک حق سلطنتدن محرومیتی حقنده کی قانونی رد ایدرک عوام قماره سنی طاغیتدی [۱۶۷۹] .

دوق دیورقک حق سلطنتدن محرومیتی مسئلهسی
 طوریلر ، ویغلا مملکتی ایکی فرقهیه آیردی . بو فرقهلر بربرلرینه
 حقارت آمیز اسملر ویردیلر . حقوق حکمدارینک محافظه‌سی اساسنه
 صادق قالان بر چوق آنغلیقلار و عمومیتله قتولیکلر قرالک برادرینی حق
 سلطنتدن محروم برافنی قبول ایتیمورلردی . رقیلری بونلره اوزمان
 ایرلاندا قتولیک حیدودلرک اسمی اولان « طوری » نامی ویردیلر .
 طوریلر حق سلطنتدن اسقاط طرفداری اولانلری اسقوجیالی پره سبیتله
 ریپهن حیدودلرینک نامی اولان « ویغ » اسمی ایله یادایتکه باشلادیلر .
 پوریتنه‌لر ، آنغلیقان کلیسایی خارجنده کی دیگر پروتستانلر ، زادکانک
 بعضلری ، زنکین بورژووالرک اکثریتی ویغ فرقه‌سندن ایدیلر . ویغ
 وطوری ناملری دوام ایتمش والآن دخی استعمال ایدلمکده بولنمشدره
 اون دردنجی عصر اواخرنده واون سکزننجی عصرده طوریلر اداره
 دولته قرالک تفوق ، ویغلا پارلمنتونک قراله فائیتی طرفداری اولدیلر .
 ۱۶۸۰ ده انتخاب ایدیلان عوام قماره‌سنده اکثریت ویغلرده ایدی .

اونک ایچون دوق دیورقک حق سلطنتدن محروم ایدلمسی حقنده کی
 قانون عوام قماره‌سنجه قبول ایدلدی . فقط لوردلر - قرالک اصراری
 اوزرینه - بو قانونی رد ایتدیلر . ویغ فرقه‌سنه منسوب بعض کیمسه‌لر
 ایکنجی شارلی اولدیروب یرینه اولاد طبعیه سندن بری اولان دوق دو
 (مونموت Monmouth) ی اجلاس ایچون بر جمعیت خفیه تشکیل
 ایتیمش اولسه‌لر ایدی ویغلرک دوق دیورقک حق سلطنتدن اسقاطه
 موفق اولملری محتمل ایدی . فقط بو جمعیت خفیه‌نک ظاهره چیقارلمسی

افکار عمومی بی قرال لہنہ چویردی . ایکنجی شارل بوفرصدن بالاستفادہ دائمی برکوچک اردو تشکیل ایتدی [۱۶۸۳] . عینی زمانہ اون دردنجی لوئی ایلہ خفی معاہدہ لر عقد ایدرک پارہ تدارکی چارہ سنی بولدی . پارلمنتوی طاغیتدی واو آندن اعتباراً وفاتنہ قدر [۱۶۸۵ شباط ۱۶] حکمدار مطلق کی ادارہ امورہ موفق اولدی . مرض موتندہ کیزلیجہ قتولیک اولہ رق وفات ایتدی . دوق دییورق ایکنجی ژاق عنوانیلہ ، بلا مشکلات ، یرینہ کچدی .

ایکنجی ژاق ۵۲ یاشندہ ایدی . جسور ، محدود
ایکنجی ژاق الفکر ، معند ایدی . خلوص وصفوت ایلہ شہرت بولشدی . بتون انکیزلری قتولیک یامق عزم قطعیسندہ ایدی . جلوسندن ایکی کون صکرہ تبعہ سنک حدت وخصومتی جلب ایلہ جکنہ اصلا اہمیت ویرمیرک سرایدہ قتولیک مذہبی موجبنجہ بر آیین مخصوص اجرا ایتدیردی . فرانسدہ نانت فرماننک فسخی وپروتستانلر علیہندہ کی مظالمک تشدیددی حسیلہ انکلتزدہ قتولیک دینہ خصوصتک اک غلیانلی زمانندہ بویلہ بر نمایشدہ بولمق پک تدبیرسزجہ سنہ بر حرکت ایدی .

دوق دو (مونموت) ک جنوب غربی قونتلقلرنندہ برعصیان چیقارمش اولمسنن استفادہ ایدن ژاق دائمی اردوینی یکرمی بیگ کشی یہ ابلاغ ایتدی وانکلتزہی مدہش بر ظلم وتضییق ایلہ قورقوتمق ایستہدی . بکنی دوق دو (مونموت) ی اعدام ایتدیردی [۱۶۸۵] . عاصی قونتاقلر داخلندہ اوج یوزی متجاوز شخص شایان تلغین اشکنجہ لرلہ اعدام طقوز یوز کشی نفی وآنتیل آطہ لرندہ اسیر صفتیلہ فروخت ایدلدی . ژاق انکلتزہی کافی درجہدہ قورقوتدیغہ حکم ایتدکدن صکرہ قتولیک مأمورلر حقندہ کی قانونی ضابطانہ تطبیق ایتدی ؛ آنغلیقان دواثر

روحانیه سنه قتولیک راهبر تعیین ایتدی ؛ جزویتلرک انکلتزه یه کیرملرینه مساعده ویردی . حتی جزویتلردن بری شورای قرالی یه اعضا اولدی . پاپایه بر هیئت سفارت کوندردی . پاپانک سفیرنی (ویندسور) سراینده فوق العاده مظنن مراسم ایله قبول ایدرک پاپالق مقامی حقنده کی حرمتی سفیرک حضورنده دیز چوکمک درجه سنه واردیردی و بو حرکتلریله انکلیزلری صوک درجه حدتاندیردی .

روماده بیله ایکنجی ژاقه دهها زیاده احتیاط ایله حرکت ایتمی ، تبعه سنک افکار و آمالنی نظر دفته آلمسی توصیه اولیوردی . پاپانک نصیحتلرینه اهمیت ویرلیدی . ژاق ۱۶۸۷ ده قتولیکلر و پوریتلر حقنده بر بیاننامه نشر و ایرتسی سنه بونی تأیید ایتدی . بتون پروتستانلر بیاننامه یه اعتراض ایتدیلر . پروتستان رؤسای روحانیه سی بازار کونکی آینده بو بیاننامه یی قرائته مأمور اولدیلر . اکثری اطاعت ایتدی .
یدی پسقبوس بیاننامه نك غیر قانونی اولدیغنی قراله اخطار ایتدیلر ؛ محکمه یه تسلیم ایدلایلر ؛ فقط برائت قازاندیلر . بتون ملت و حتی بتون اردو پسقبوسلرک تخلیه سنی شوق و سرور ایله آلیشلادیلر [تموز ۱۶۸۸] .

۱۶۸۸ انفدرنك مقدماتی مع مافیه پك چوق زمان انکلیزلر قرال علیه عصیان ایتمک ایسته مدیلر . چونکه ،

اولا ، آنغلیقان کایساسی قراللق علیه هر هانکی برسبله اولورسه اولسون عصیانک بیوک برکنه اولدیغنی تعلیم ایتمکده ایدی . ثانیاً ، ژاقک سنی ایلریله مشدی : وارثلری اولان و برنجی زوجہ سی ایکنجی شارلک باش وکیلی (قلازدون) ک قیزدن تولد ایدن ایکی قیزی پروتستان ایدیلر و پروتستانلره تزویج ایدلمشلردی . بیوکی ماری (کیوم دورائر) ک ، کوچکی (آن) دانیمارقه قرالک برادری پرنس (ژورژ) ک زوجہ سی

ایدی . بناءً عليه ژاقك وفاتنده آرتق قتوليكلكك اعادهسى قورقوسى
قاليه جق ايدى . بومطالعات واوكا منضم اولان (كيوم دوراثر) ك
نصايحي انكليزلى صبر وتحملة سوق ايتمشدى . بعض رجال مهمه كيومك
انكلتره تخته جلوس احتمالى نظر دفته آلهرق آنكله مخبره ومناسبته
بولمقده ايديلر .

فقط ۱۶۸۸ ده ايكنجى ژاقك ايكنجى زوجهسى اولان قتوليك
ايتاليان پرنسىسى (ماري دهسته Marie d'Este) براركك چوجق دنياه
كتيردى [۲۱ حزيان ۱۶۸۸] . بونك اوزرينه انكلتره تخته برپرولستان
حكمدارك چيقمسى اميدى منقطع اولدى . پرنس دوغالك تولندن اون
كون صكره ، پسقوسلرك برائت قازاندقلى كوناك فرداسى آنغليقان ،
پوريتن ، طورى ، ويغ مذهب وفرقهلرينه منسوب باشليجه لوردلر
پرولستان مذهبك سربستى وحمايه سنى تايمين ايجون مداخلة ايتمى (كيوم
دوراثر) دن رجا ايتديلر . حتى براز صكره بونلرك برقسى (لاهى) ه
كيتديلر ؛ كيوم عسكر وكى طوپلامغه باشلادى .

اون دردنجى لوى ايكنجى ژاقك بيوك برتهلكيه معروض قالدیغنى
آكلادى . ژاق فرانسه قرائلك اخبارات واطهاراتنه اهميت ويرمدى .
اون دردنجى لوى انكلتره قرالى - آرزوسنه رغماً - قورتامغه قرار
ويرهرك ايكنجى ژاقه قارشى واقع اوله جق هر درلو هجوم وتجاوزى
فرانسه يه اعلان حرب مقامنده تلقى ايدى جكنى (اتازنه رو) ده بيان
ايتدى . ايكنجى ژاق بونى خبر آلنجه متأثر اولدى ؛ كنديسنك بر
حاميه عرض احتياج ايدى جك قدر كوچك بر قرال اولمديغنى بيان
ايتدى وفرانسه قرالى نزدنده كى سفيرنى كرى يه چاغيردى .
مع مافيه (كيوم دوراثر) محضا اون دردنجى لويىنك اردولردن

قورقديغی ایچون ژاق علینه حرکت باشلاماقده ایدی. هولاندا مجلس عمومی فرانسزلرک آنی استیلالرندن قورقور وکیومک هولاندان ایرلسنه مساعده ایتیموردی. فقط اون دردنجی لوئی شمال جهنده بر ضربه اوره جغه رن اوزرنده کی حرکات حربیه سیله دشمنی شاشیرتمق ایسته دی؛ عسکرینی پالاتینیه قرر ایلریتدی. هولاندا مجلس عمومی استیلا تهلکه سنک بر طرف اولدیغی کورنجه کیوم دورانژی انکلتريه عزیزمتده سربست براقدی.

کیوم دورانژ ۶۰۰ کمی ایله نقل ایتدیکی ۱۴,۰۰۰
۱۶۸۸ انقلابی عسکری ۵ تشرین ثانی ۱۶۸۸ تاریخنده (طوبای Torbay) ده قرهیه چقاردی. ۲۷ تشرین ثانیده لوندریه کیردی. کچدیکی یرلرده بتون اهالی قرال علینه قیام ایدینور ایدی. ایکنجی ژاق، متحیر و مأیوس، محاربیه تشبث بیله ایتدی. قزی (آن)، دامادی پرنس (ژورژ) ضابطانک قسم اعظمی ایله برلکده کندیسنی ترک ایتمش ایدی. فرانسه یه کیتمک نیتله لوندره دن قاچدی. بر آراق بالقجیلر کندیسنی تبدیل قیافت ایتمش بر جزویت ظنیه توقیف ایتدیلر، هویتی آکلانجه همان براقدیلر و کندیسنه غایت احترامکارانه معامله ایلدیلر. ژاق امیده دوشدی، لوندریه عودت ایتدی. انقلابک قان دولوکولمه دن وقوعی آرزو ایدن کیوم دورانژ قاین پدرینی قورقوتدی؛ فرادینی تسهیل ایلدی. ژاق فرانسه یه کیتدی. قرالیچه ایله پرنس دوغال اولجه اورایه قاچمشلردی. اون دردنجی لوئی ژاقه قرال معامله سی یاپه رق (سن ژرمن) شاتوسنی اقامتگاه اوله رق کندیسنه ویردی.

ژاق فراری مشکلاتی رفع، انقلابی تسهیل ایتمشدی. پارلمنتور اقل فرار ایتمه که حق سلطنتدن کندیسنی اسقاط ایلش اولدیغنه، اوغلی پرنس

دوگالک حقیقی اولادی اولدیغنک شهبهلی بولندیغنه ، بناءً علیه تخت قرالینک انحلالنه قرار ویردی . بعض کیمسه لر کیوم دورانژک زوجه سی مارینک اجلاسی فکرنده ایدیلر . فقط کیوم نائب حکومت صفتی قبول ایدمه جکنی بیلیدردی . مبعوثلر کیوم وماریی قران وقرالیچه اعلان ایتدیلر .

مبعوثلر ۱۶۶۰ ده ایکنجی شارلی بلاقیدوشرط تخته دعوت ایتدکلری زمان یاپدقلری خطایی بودفعه تکرار ایتدیلر . پارلمتو حقوق ملتی صورت قطعیه ده تعین و تثبیت ، حکمدار مستقبدن بو حقوقه رعایت تعهدینی استحصال ایتک ایچون لازم کلن تدابیری اتخاذ ایتدی . « بیاننامه حقوق » ی تنظیم ایلدی . بو بیاننامه کرک « بیوک شارت » و کرک برنجی شارل زماننده قراله قبول ایتدیرلمش اولان قانونده تصدیق ایدیلن حریاتی تأیید ایتمکده ایدی . بیاننامه نک مقدمه سنده ایکنجی ژاقل حرکات تجاوزکارانه سی تعداد ، انکلیز قوانین وحریاتی نه صورته اخلاص ایدلدیکی افاده اولندقدن صکره اساسات آتیه ذکر ایدلمشدر :

قرال پارلمتونک موافقتی منضم اولمدجیه قوانینک تطبیق احکامنی تعطیل ، بر ویرکو طرح ، وقت صلحده دائمی براردو تشکیل واداره ایدمه مز . مبعوثان انتخابی ، پارلمتو مذاکراتی سربستدر . پارلمتو صیق صیق اجتماع ایدمه جکدر . هیچ کیمسه قراله تقدیم ایتدیکی عرضحالردن طولایی تعقیب اولنه ماز . محاکمات عدالت محض ایله اجرا اولنه جقدر . بتون پروتستان مذاهی سربستدر .

بیاننامه حقوق ۱۳ شباط ۱۶۸۹ تاریخنده ، پارلمتوده ، ماری وکیوم دورانژک حضورنده قرائت ایدلدی . کیوم کندی وزوجه سی نامه اوله رق بیاننامه ده ذکر ایدیلن اساساتی قبول ایتدیکنی بیان ایلدی .

پرنس و پرنسس دوراثر اوچنجی کیوم وایکنجی ماری عنوانلریله قرال وقرالیچه اعلان اولندیلر .

۱۶۸۸ انقلابی بر طامله بیله قان دوکولمه دن وقوعه
انقلابك اوصاف کلدی . حکمدار مطلق اولمق ایستهین ومن طرف الله
مهمزه سی و نتایجی اداره دولته مأمور اولدیغنی ادعا ایلین قراللق ایله
 مقدراتنه صاحب اولمق و وکیللری واسطه سیله اداره حکومت ایلمک
 ادعاسنده بولنان ملت آرسنده تقریباً برعصردن بری دوام ایدن مبارزه
 بو انقلاب ایله ختام بولدی . ۱۶۴۹ ده اعلان ایدیلن حاکمیت ملیه اساسی
 ۱۶۸۸ ده غلبه ایتدی .

بناءً علیه ۱۶۸۸ انقلابی منازعات سیاسییه نهایت ویرمشدی . عینی
 زمانده قتولیکلر خارج اولمق اوزره آغلیقان ، پوریتن و سائر پروتستان
 مذاهی ایچون سربستی آیین اساسنی قبول ایتمک صورتیله منازعات دینییه
 دخی خاتمه چکمشدی . بوندن صکره انکلتزه همان دائماً صلح و مسالمت
 ایچنده یشادی .

بو داخلی صلح و مسالمتک سیاست خارجه ده کی نتایجی پک مهمدر .
 انکلتزه خارجه باقغه وقت بوله بیلدی و ۱۶ نجی عصر نهایتنده اوروپا
 پولیتیکه سسنده حائز بولندیغنی موقع رجحانی ۱۷ نجی عصر او اخرنده
 استرداد موفق اولدی . اوچنجی کیوم [۱۶۸۸-۱۷۰۲] اون دردنجی
 لونی علیهنده متشکل اتفاقلرک دائماً باشنده بولمادی . ماری و کیوم دوراثرک
 خلفی اولان قرالیچه آن زماننده [۱۷۰۲-۱۷۱۳] انکلتزه اوروپا
 سیاسیات عمومیه سنده حکم وظیفه سنی ایفا و ۱۷۱۳ ده اوترهخت مصالحه سنی ،
 اسپانیا میراننک تقسیمنی آرزوسی وجهله تنظیم ایتدی .

اوپنچی کیوم ۳۹ یاشنده ایدی . صحتی شدتلی وصیق
 کیومک اراره سی اوکسور وکلرله مختل اولقله برابر فعالیت فوق العاده سیله
 ضعف بدنسنه غلبه ایتشدی . جسور ، فعال ، اعتدال دم صاحبی ،
 معند ، کتوم ایدی . هانکی فکرده اولدیغنی هیچ کیمسه یه قطعاً سزدرمه دن
 آیلرجه بر مقصدی تعقیب ایدر ونهایت موفق اولوردی . ذاتاً اون یدی
 یاشندن بری شانلی برپرس ایدی ؛ هولاندایی اون دردنجی لویئک آمال
 حریرسانه وفتوحاتجویانه سنه قارشی او حمایه ایتشدی . اونک ایچون
 هولانداده (استاتودر) ایکن عادتاً بر حکمدار قدر قدرت ونفوذ
 قازانمشدی .

فقط انکلترده بودرجه قدرت ونفوذ صاحبی اوله مدی . حتی قرالغنی
 مملکتک هر طرفده قبول ایتدیرمک ایچون خیلی اوغراشدی . ایرلاندایلر
 ایکنجی ژاق لهنده عصیان ایتدیلر . اون دردنجی لویئ ایرلاندایه چیقهرق
 انکلتره یی ضبطه تشبث ایچون ژاقه کمی واردو ویرمشدی . ایکنجی ژاقی
 طرد وعصاتی تحت اطاعته ادخال ایچون ایکی سنه حرب ایدلدی
 [۱۶۸۹ - ۱۶۹۱] .

دیگر طرفدن کیوم اروپا سیاست عمومیه سنه دائماً مداخله ایدرک
 بهی بای اون دردنجی لوییه قارشی بالذات مدافعه ایتدی .
 انکلیزلر آمال سیاسیه لرینی تأمین خصوصنده بو احوال دن پک زیاده
 استفاده ایتدیلر . بیاننامه حقوقک کاغد اوزرنده قالمسنی ایسته میورلردی .
 بونی بر قانون شکنه قویدیلر . قرالک قدرت حکومتنی قعلاً تحدید ایدرک
 برچوق تدابیر منضمه اتحاد ایلدیلر . بوصورتله پارلمنتو قراله درت سنه
 ایچون ویریلن تخصیصاتی بر سنه یه ایندیردی . حربیه بودجه سی دخی
 آنجق بر سنه یه منحصر اولدی . بوسایه ده قرال پارلمنتوی هر سنه اجتماعه
 دعوته مجبور اولدی .

پارلمنتو ۱۶۸۸ ده ، ایکنجی ژاڤك فرارندن
برکون صکره نشر ایلدیکي بریاینامه ده «تجربه
پروتستان برقرالغك قتوليك برقرال طرفندن

حکمدارلرک برنستانه
اولمیری قانونی


ادارمسی موافق اوله میه جغنی کوسترمشد . « دیمشدی . انکلتزه تاجنی
ماري و کیوم دورائزه ویررکن بونلرک بلاولد وفاتیری احتمالی نظردقته
آلهرق قرالغك ژاڤك ایکنجی قزی (آن) ه انتقال ایتسنه قرار ویرمشدی .
بو قرار ۱۷۰۱ ده یکی برقانون ایله ا کمال ایدلی . ماری ۱۶۹۵ ده اولاد
براقه دن وفات ایلدیکندن و (آن) دخی طول قالمش اولدیغندن اوندن
صکره حکمدارلغك برنجی ژاڤك حفیده سی ، ایکنجی ژاڤك یکنی اولان
برآلمان پرنسسنه ، (صوفی دوهانوور) ه ویا اونك وفاتنده اولادینه انتقال
ایلمسی قانون مذکور اقتضاسدن ایدی [۱] . پارلمنتو صوفی بی پروتستان
اولدیغی ایچون انتخاب ایتشدی .

قتولیکلکه خصوصیتدن طولانی (ماری) و (آن) ک برادرینی ، تولدی
اوزرینه ۱۶۸۸ انقلابی وقوعه کان بو پرنس دوغالی صورت قطعی ده
حق سلطنتدن محروم براقشدی .

[۱] هانووره خاندانك پارلمنتوجه تصدیق ایدیلن حق سلطنتنی ایضاح

ایدن جدول :

برنجی ژاڤ



برنجی ژورژ [۱۷۲۷-۱۷۱۴] مدعی سلطنت اوچنجی ژاڤ آن [۱۷۰۲-۱۷۱۴]

اوجنچی کیومک وفاتی اوزرینہ ۱۷۰۲ دە قرالیچہ اولان آن سالف۔
الذکر قانون خلافتہ اولہرق انکلترہ تاجنی برادرینہ ترک ایتک فکرنده
ایدی۔ انکلترہ ایچون پک شانلی اولان اوترہخت معاہدہ نامہ سنک فردای
عقدندہ وکلاسیلہ برلکدہ یکی بر اصول وراثت حاضر لامغہ باشلادی .
فقط فجئہ وفات ایتدی . بناءً علیہ قانون تطبیق ایدلدی وصوفینک اوغلی
هانوورہ الکتوری ژورژ انکلترہ قرالی اولدی .

آن استوارتک دور سلطنتندہ انکلترہ واسقوچیا قراللقاری
یوک بریتانیا قرالیت صورت قطعیدہ برلشدیریلہرک بوکونکی انکلترہ
محموسی اتحادی ، بریتانیا قرالنی تأسس ایتدی . اسقوچیا

حکمداری اولان استارتلرک انکلترہ تختہ کچملریلہ بو اتحاد اونی دنجی عصر
ابتداسندہ حاضر لائمشدی . فقط اوزمانکی اتحاد شخصی ایدی ؛ یعنی
ایکی مملکتک یالکز قرالری مشترک ایدی . حقیقی براتحاد تشبثی ۱۶۴۳
محاربه داخلہسی ائناسندہ وقوعہ کلشدی . برنجی شارلک اعدامندن
صکرہ بوزیلان اتحاد یکیدن تأسیس ایدلشدی . فقط بودفعہ ۱۶۵۱ دە
اسقوچیا لیلرہ غلبہ ایدن قروموہل اتحادی جبراً وجودہ کتیرمشدی .
۱۶۶۰ دە قراللق اعادہ ایدلدیکی زمان اسقوچیا وانکلترہ بربرلرندن
بستون آیرلشلر ایدی . قرالیچہ آنک زمان سلطنتندہ اسقوچیا لیلرک
قانون وراثتی قبول ایتہرک ژاق استوارتی اسقوچیا تختہ دعوت ایللری
وبوصورتلہ ینہ بر محاربه داخلہ ظهوری قورقوسی انکلزلرک اسقوچیا
لیلرہ اتحادی تکلیف ایتلرینہ سبب اولدی . اسقوچیانک ملی پرہ سیترینہ
کلیساسنی ، قانونلرینی ، محکمہ لرینی محافظہ ایتسی ، فقط ایکی مملکت
پارلمنتوسنک براولسی واسقوچیا وانکلترہ مبعوثلرینک برلکدہ اجتماع ایلسی
تقرر ایتدی . ۲۵ مارت ۱۷۰۷ تاریخندہ اتحاد قانونی قبول ایدلدی .
بوندن صکرہ انکلترہ یہ «یوک بریتانیا قرالیت متحدہ سی» نامی ویرلدی .

اون یدنجی عصرده فرانسه

اون ۱۸۰۴-۱۸۱۵ ایلده فرانسه
 سیاست، ماده خراب بر حالدده براقشدی.
 فرانسه نك اموالی برنجی فرانسوا وایکنجی هانزینک اداره مطلقه.

سندن اثر بیلده قالمش، حتی فرانسه نك وحدت بیلده تهلکده دوچار اولمشدی. معاصریندن برینک دیدیکی کبی «زادکانک اکثریتی آرتق قرالی ایسته میوردی. ملت ایسه نه حکمداری، نه زادکانی ایسته میوردی. اک عادی کویلیرله وارنجیه قدر هرکس حکمدارک، زادکانک حاکمیتدن قورتولمق املنده ایدی.» وایلر ولایتلری داخلنده حکمدار کبی حرکت ایدیورلر، عسکر طوپلایورلر، ویرکوالیورلر، اجرای عدالت ایلورلر و مأموریتلرینی ارثی بر منصب حاله افراغه چالیشورلر ایدی.

مملکت مدھش بر صورتده تخریب ایدلمشدی. چیفتلکله و همان بتون کویلر ایصنر قالمشدی. حتی کویلیرلر زراعتدن بیلده واز کچمشلردی. آج قالدقلری ایچون عصیان و هر طرفی یغما ایدیورلرایدی. برچوق ولایاتده زادکان واغنیایا علیهنده قیاملر وقوعه کلدی. یوللر بوزولمش، کوپریلر ییقلمش ایدی. شهرلرده صنعت و تجارت محو اولمشدی. حکومتک بورجی پک بیوکدی. ویرکولرک حاصلاتی آنجق بورجلری تأدیه کفی کلور؛ مصارف ضروریه دولت ایچون هیچ برشی قالمیور ایدی.

دردنجی هانزی نانت فرماننک نشرندن و (وهروهن)
 معاهده سنک عقدندن صکره فرانسه نی باشدن باشه
 دردنجی هانزی
 اصلاحه وقراللق نفوذینی اعاده چالیشدی. هانزی
 رسولی

قرق بش یاشنده، جسور، ذکی بر حکمدار ایدی. انسانلری پک ایی

طایر و هر کسك درجه اقتدارینی كشف ایتكده مهارت كوستردی .
 كیندار دكلدی . اونك ایچون بركون اولی دشمنلرنده اقتدار كوری ایه
 اولری اداره دولته استخدام خصوصنده اصلا تردد ایتزدی . هر فرقه دن
 آدملی ، پروتستانلری وقتولیکلری استخدام ایتدی .

جبرو شدن خوشلانماز ، ظاهرآ رجایه بکزه یں امرلر ویرر ، فقط
 امور دولته هر کسك کنديسندن قورقسنی ایسترایدی . قرالنگ قدرت
 وقوتی بك چابوق اعادهیه موفق اولدی . اغتشاش دورینك آرتق كچمش
 اولدیغنی بیوك زادكانه مدھش بر مثال ایله كوستردی : اوتوز ایکی دفعه
 یاره لانمش جسور بر عسکراولان ، دردنجی هازینك اك اسکی بر حرب
 آرقداشی اولوب ایکی دفعه قرالک حیاتی قورتاران بورغونیا والیسی
 مارشال دو (بیرون Biron) نصلسه اولا صاوا دوقه سی ، صکره اسپانیا
 قرالی ایله هازی علیهنه بر اتفاق عقد ایتشدی . بو اتفاق دن مقصد
 هازی ایله اوغلنی اولدیرمکدی . دردنجی هازی ایلك دفعه سنده عفو
 ایتدی . فقط مارشال ایکنجی بر جمعیت خفیه ترتیب ایلدی . هازی :
 « بندن هیچ برشی صاقلانماز ، هرشیئ سویلر ایه ینه عفو ایدرم . »
 دیدی . بیرون اعتراف ایتك ایسته مدی ؛ اعدامه محکوم اولدی .

دردنجی هازی اصلاحات ایچون برچوق معاونلر بولدی . بونلرک
 اك مشهوری دوق دو (سولی Sully) در . هازیدن یدی یاش کوچك
 ایدی . اون بر یاشندن بری هازینك یاننده ایدی . پروتستان ایدی . قرالک
 اك صمیمی دوستی ایدی . غایت پراتیک ، اداره امورده جرأتکار و ماهر
 ایدی . مذهب محارباتی اثناسنده کندی حسابنه کارلی ایشلر یامش ،
 اکثریا پاره سز قالان دردنجی هازینك احتیاجنی او ازاله ایتشدی .
 هازی (سولی) یی صرهمیله مالیه ، نافع و حربیه ایشلرینی اصلاحه
 مأمور ایتدی .

سولینک اڤ بئوک اجرا آتی امورمالیه نڤ اصلاحنده کورلدی. مالیه بی صوڤ درجه ناموسکارانه و فوق العاده تصرفکارانه اداره ایلدی. قرائک مصارف بی لزوم و یا فضله کوردیکی زمان اوکا بيله ایستدیکي تخصیصاتی ویرمزدی. حساباتک منتظم اولمسی، مالیه مأمورلرینک اختلاساتنه میدان ویرلمه مسنی ایستردی. برچوق بورج اوده دی. زمان اداره سنده بودجه آچینی کورلمدی. هر درلو مصارفی منتظماً تسویه ایتدکن ماعدا هر سنه (باستیل) مخزنلرنده بوکونکی حساب ايله آلتی میلیون فرانق بیریکدیردی. مع مافیه آغیر ویرکولری تنقیصه دخی موفق اولدی.

هازی و سولی واردات دولتی تکثیر ایچون کوی و شهرلر اهالیسنک، چیفتجی، صنعتکار و تاجرلرک زنکین اولملرینی تسهیله چالیشدیله. هازی - بلکه چوجق لغنده (به آن) کویلیری آده سنده یشادینی ایچون، فقط ده زاده - کویلیله دولتک باشلیجه قوتی نظریله باقدینی ایچون اونلرک ترفیه احواله اهمیت ویرر؛ دولتی بسلهین، دولته اڤ ای عسکر ویرن کویلیله اولدیغنی سویله ایدی. سولی دخی عینی فکرده ایدی. «مرعا و تارالا فرانسه بی بسلهین ایکی ممددر» دیر ایدی. کویلیله لهنده پڤ چوق تداییر اتخاڤ اولندی. زادکانک تارالا و باغلرده آوه چیقملرینی منع ایتمک، عسکرلر طرفدن کوییلرک یغما ایدلمه سنه مانع اولمق، ویرکولرینی تأدیه ایده مین کوییلرک چیفت حیوانات و آلاتک مصادره و فروخت ایدلمسی اصولی قالدیرمق کبی تداییر ايله کوییلرک راحتجه چالیشملری اسبابی تأمین ایدلدی. قرائک مساعیسی سایه سنده کوییلر اون ایکی سنه صلح و آسایش ایچنده یشادیلر. بو حال هر درلو تدیردن زیاده کوییلرک ترفیه احواله مدار اولدی.

عینی زمانده قرائل زادکانی سرایدن اوزا قلاشدیرییور؛ اونلری

کویلرده، مالکانه لری داخلنده یشامغه اجارایدیور ایدی. اصلزاده لرك چيفتلكلرینی براقوب بتون ثروتلرینی پارسده ذوق وسفاخته صرف ایتلرینی، عطالت ایله وقت کچیرملرینی ایسته میوردی .

دردنچی هانزی چوخه جیلق، خاليجیلق کبی منقرض اولان فرانسز صنایعنی جانلاندیرمق، یکی صنایع تأسیس ایتک ایسته دی. بالخاصه ایپکلی قاشلر، قطیفه لر اعمالی ایچون (طور) و (لیون) ده فابریقه لر آچدیردی. بوصورتله فرانسه دن ایتالایه پاره چیقمنه مانع اولمغه چالیشدی . فقط سولی بوتشباتی تصویب ایتیمور؛ ایپکلی، قطیفه کبی زینت اشیاسنک اعمالنه اهمیت ویرلمسنی انی کور میوردی . بالخاصه فابریقه لر چوغالیرسه کویلرک تارالارینی براقه رق شهرلره کیتلرندن قورقوردی. قرال بشقه بر مأمورک معاونتیه فابریقه لره اهمیت ویردی ایسه ده زینت اشیاسنه مخصوص اعمالاتخانله هانزینک وفاتندن صکره دوام ایدمه رک قانديلر .

سولی تسهیل وتوسیع تجارت ایچون یوللری، کوپریلری یکیدن یاپدیردی . (سن) ایله (لوار) آره سنده بر قنال آچیلدی . انکلتره ودوات عثمانیه ایله تجارت معاهده لری عقد ایدلدی . شمالی آمریقادا، (سن لوران) کنارنده «یکی فرانسه» نامیه بر مستملکه تأسیسنه تشبث اولندی؛ فرانسز قبودانلرندن (ساموئل شامپلن Samuel Champlain) ۱۶۰۸ ده (کبک) شهرینی تأسیس ایتدی .

سولی بدایه چوق پاره صرفنی استلزام ایدن وموفقیتله نتیجه لنه جکی براز شهبه لی اولان ایشلرک کافه -نده صوگ درجه احتیاط ایله، عادنا ایسته مه ایسته مه یه حرکت ایتدی . اونک ایچون بر مؤلفک «فرانسه نک اصلاحی شرفی فرانسه یه عائددر» سوزی پک طوغریدر . دیگر بر مورخک دیدیکی کبی «دردنچی هانزی داخلأ نظام وانتظامی، خارجأ صلح ومسالمتی تأمین ایتدی . اوته طرفنی ملت کندیسی یاپدی .»

دردنجی هازی (وده ورون) معاهده سندن بری - ۱۶۰۲

هانزینک سیاست

تاریخنده صاووا دوقه سی علیه و قوعه کلوب بر قاج

مارمیه سی

موقعک فرانسه یه الحاقیه نتیجه لنن قیسه بر محاربه

مستثنا اولق اوزره - خارجاً دائماً صلح پرورانه واحتیاطکارانه برسیاست

تعقیب ایتشدی . ۱۶۰۹ ده مسلکنی دکشیدردی: (قله و) و (ژولیه)

دوقه سنک اراضیسی اوزرنده ادعای حق ایدرک آلمانیا امورینه مداخله

ایتدی و ۱۶۱۰ سنه سی ابتداسنده آلمانیا ایمپراطوری واسپانیا قرالی ایله

حرب ایتک ایچون تدارکات عظیمه یه باشلادی .

سولی خاطراتنده هانزینک متعدد دولتلرله قرارلشدیرلمش اولان

بیوک بر پروژده یی موقع تطبیقه قویمق ایچون حرب ایتک ایسته دیکنی و

بویوک پروژهنک دخی آوستریا خانداتی میدانن قالدیرمق ، ترکیزی

آسیایه طرد و تبعید ایتک ، اروپا خریطه سنی دکشیدیره رک بتون

حکومتلری بر « اروپا حکومت متحده سی » حاله قویمق اولدیغنی حکایه

ایدیور . بتون بوتصورات فطرةً مبالغه جی اولان سولینک خیالخانه سندن

چیقمشدی . بویله بر پروژده ایچون هازی هیچ بر دولت ایله مذاکره یه

کیریشمه مشدی . هانزینک ۱۶۱۰ تاریخنده حاضرلاندیغنی حرب تهلکه لی ،

جراتکارانه برتشدن بشقه برشی دکلدی . انکلتره ، هولاندا ، وندیك

بوحریده هازی ایله اتفافی صراحةً رد ایتشلردی . تدارکات حربیه یکی

ویرکولر طرحنه سبب اولدیغنی ، حربک آلمانیا پروتستانلری لهنه وحتی

پاپا علیه و قوعه کله جکی روایت ایدلیدیکی جهتله فرانسه ده هیچ کیمسه

محاربه یی آرزو ایتیوردی . بوروایات بعض متعصبلی هیجانه دوشوردی .

نتیجه ده (راوایاق) دردنجی هازی یی اولدیردی .

قراک قتل بتون فرانسه ده تأثرات عظیمه یی موجب اولدی . خلق

ہازینک محاربہ تصوراتی اونوتدی ؛ اون ایکی سنہ فرانسیسی صلح و آسایشہ نائل ایدرکرفاہ عمومی تأمین ایدن قرالک ضیاعنہ تأسف ایتدی۔

دردنجی ہازینک بیوک اوغلی اون اوچنجی لوی [۱۶۱۰-۱۶۴۲] جلوس ایتدیکی زمان طقوز یاشندہ اولدیغندن ماری دومدیسبک و صابی والدہ سی (ماری دومدیسس) پارس پارلمنتوسی قراریلہ

نائبہ حکومت تعین ایدلدی . مارینک ذکاسی محدود ایدی؛ امور دولت ایلہ اشتغالہ مقتدر دکلدی . بشقہ لرینک نفوذینہ قایلیدی . سوت همشیرہ سی (لئونورا) ایلہ اونک زوجی (قونجینی) اسمندہ ایکی انتریقہ جی ایتالیان نائبہ حکومتی تمامیلہ نفوذلری آلتنہ آلہرق زنکین اولمق یولنی طوتدیلر؛ ایستہ دکلرینی قرالیچہ ایلہ کوروشدیرلر، ایستہ مدکلرینک حضورہ کیرمسنہ مانع اولورلر؛ رتبہ و مأموریتلری صاتارلر ایدی . پک آرزماندہ اوتوز بش قرق میلیون فراقلق برثروت طوپلادیلر . (قونجینی) مارکی عنوانی آلدی ؛ عمرندہ حربہ کیتہ مش ایکن مارشال اولدی . نہایت، باش وکیل اولہرق (ماری دومدیسس) نامی آلتندہ فرانسیسی ایستہ دیکی کبی اداره ایتدی .

صنف زادکانہ منسوب اولمان براجنینک حکومتی قرالک اقباسنی وبالخاصہ یکنی پرنس دو (قوندہ) بی صوک درجہ حدتلندیرمکدہ ایدی . دیگر طرفدن (کیز) ، (مایہن) و سائرہ کبی بیوک خاندانلرہ منسوب درہ بکلر برقادینک نائبہ حکومت اولمسندن بالاستفادہ - دردنجی ہازی زمانندہ غائب ایتمش اولدقلری - استقلاللرینی اعادہ ایتک ایستہ یورلر ، « قرالک زمانی کچدی ؛ بیوکلرک ، پرنسلرک زمانی کلدی » دیورلر ایدی .

اولا ، کندیلرینہ بیوک بیوک تخصیصات آدلیر . سولینک تصرفی

سایه‌سنده جمع ایدلمش اولان خزینه‌نك قسم اعظمی ذی نفوذ زادگاه ویریلن تخصیصات ایله صرف اولندی . فقط ۱۶۱۴ ده خزینه‌ده پاره قالمدیغندن ماری اولکی قدر سماحت کوستره‌مه‌مه‌که باشلادی . بونك اوزرینه (قونده) نك ریاستنده طوپلاناتان بیوکلر منافع عمومی نامنه‌سلاحه صاریلدیلر . قونده بو عصبانی حقلی کوستره‌مک ایچون نشر ایلدیکی بریانه‌نامه‌ده نائبه حکومتی برچوق یولسزلقلردن ماعدا « قرالک خزینه‌سنى اسراف و یغما ایتمه‌که » اتهام ایلوردی . بیوکلر (ااثزه‌نرو) نك اجتماعه دعوت اولمىنى ده طلب ایدیورلردی .

قونجینی عاصیلری تأدیپ ایدمه‌جکینه اونلرله مذاکره یه کیریشدی . (قونده) یه تقریباً ایکی میلیون فرانقلق تخصیصات ویردی؛ دیگر زادگاه دخی تخصیصات، والیک و سائره کبی مأموریتلر توزیع ایتدی . بوسورتله املرینه نائل اولان پرنس‌لر اکر (ااثزه‌نرو) نك اجتماعه لزوم کورمرسه اعتراض ایتیه‌جکلرینی قرالیچه‌یه تبلیغ ایلدیلر .

مع‌مافیه (ااثزه‌نرو) ۱۶۱۴ تشرین اولنده طوپلاندی . ۱۷۸۹ انقلابندن اول طوپلاناتان صوڪ (ااثزه‌نرو) بودر . درت آی اجتماع ایتمه‌که برابر زادگان و عوام مبعوثلری آردسنده کی منازعاتدن طولانی هیچ بر نتیجه حاصل اولمدی . نهایت ، مبعوثلر مملکتلرینه اعاده ایلدیلر .

(ااثزه‌نرو) نك اجتماعندن اول اون اوچنجی لویئنك
اونده اریجنی لویئنك
سن‌رشته وصولی اعلان ایدلمشدی . مع‌مافیه حکومت
اوائل حکومتی
بوندن صکرده قرالک والده‌سی ایله قونجینی نك‌الده

قالدی . (قونده) ایله بیوکلر تکرار عصبیان ایتدیلر . بوکا - اسپانیا
قرالی ایکنجی فلیپک قیزی (آندوتریش) ک اون اوچنجی لویئ ایله
ازدواجندن تلاش ایدن - جنوب پروتستانلرینک عصبانی منضم اولدی .

قونجینی ینہ زادکان ایله اویوشدی . قونده آلتی یدی میایون ، رفقاسی
یکرمی بش اوتوز میلیون فرانق آلدیلر . قونده انترقیه لرینه دوام ایتدیکندن
قونجینی کنديسی توقیف ایتدیردی [۱۶۱۶] . بوندن صکره سکون
حاصل اولدی وقونجینی آمر مطلق کسیدلی .

اون اوچنجی لوئی بی اداره دولتن اوزاق طوتیورلر، هیچ برایشه
قاریشدیرمیورلر ، هیچ کیمسه ایله کوروشمسنه مساعده ایتیورلر ایدی .
اون آلتی یاشنده اولان قرال بو حالدن صیقیلیوردی . بیوکلر اون
اوچنجی لوئی بی خفیاً قونجینی علینه تشویق ایدیورلر ایدی . قرال او
قوشلرینی تربیه ایتک صورتیه توجهنی قازانمش اولان (آلبر دولوئین) ی
محرم اسرار اتخاذایدرک اونک واسطه سیله قونجینی توقیف ایتدیرمکه ،
پارلمنتوده تحت محاکمه آلمغه قرار ویردی . عساکر محافظه ضابطانندن
مارکی دو (ویتری Vitry) نک دخی معاونتنی تأمین ایتدی . قونجینی بر
کون (لوور) سرایی قبوسندن کچرکن (ویتری) طرفندن قتل ایدلی
[آغستوس ۱۶۱۷] . قونجینیک قتل پارسده مسرت ایله تلقی اولندی .

ماری دومدیسسه آرتق امور دولته مداخله ایتمه مسی لزومی اخطار
ایدلی . اون اوچنجی لوئی حکومتی بالذات اداره ایتک ایسته یوردی .
(آلبر دولوئین) ی دوق ومارشال یابدقندن صکره باش وکلنه کتیردی .
قاریشیق قلقلر تکرار باشلادی . اولاماری دومدیسسک تشویقیله زادکان ،
صکره پروتستانلر عصیان ایتدیلر . زادکان قرالک بالذات بولندیخی بر محاربه ده
مغلوب اولدقلرندن اونلرله آرزمانده عقد صلح ایدلی [۱۶۲۰] .

پروتستانلرک عصیانی ده اجدی ایدی . بونلر ، قانونیستلرک کندی
مذهب لرندن ماعدا بر مذهبه مساعده ایتک ایسته مدکلری (به آرن) قطعه سنده
قتولیک دیتک اعاده اولنمسنی بهانه اتخاذایدرک عصیان ایتدیلر . (لاروشل) دم

طوپلانیان پروتستان مجلس عمومیسنده عسکر طوپلانسنه ، حکومت
سندقلرنده بولان مبالغه ضبطنه قرار ویرلدی . مع مافیه شمال پروتستانلری
بوعصیانہ اشتراک ایتدیلر . لوئین پروتستانلرله حربہ باشلادی ؛ فقط پک آز
زمان صکره وفات ایتدی [۱۶۲۱] . قرال ایله قونده حربہ شدتله دوام
ایدرك پروتستانلری تحت اطاعتہ آلمغه موفق اولدیلر [۱۶۲۲] .

(لوئین) ک وفاتندن صکره اوچ سنه درلو درلوانتریقہ لرله

ریشلیو کچدی . بو مدت ظرفنده پرنس دو قونده ایله ماری
دومدیسس مناوبه قرال اوزرنده نفوذ صاحبی اولدیلر . ۱۶۲۴ ده ماری
دومدیسس قاردینال دو (ریشلیو) بی شورای قرالی یه ادخال ایتدی .
ریشلیو اوچ آی صکره شورای قرالی رئیس ، یعنی باش وکیل اولدی ؛
وفاتنه قدر [۱۶۴۲] ، اون صکر سنه بو مقامده قالدی .

(آرمان دوپلہسی دوریشلیو Armand du Plessis de Richelieu)

۱۵۸۵ تاریخنده پارسده تولد ایتشدی . چوجقلغنده عسکر اولمق ایچون
تربیہ سنه باشلانیدی حالده ۱۶۰۶ ده - ملک رهبانہ کیردی . یکر می ایکی
باشنده پسقپوس اولدی . پروتستانلری قتولیک ایتمکه چالیشیر ، فقط بوبابده
جبروشدت استعمال ایتزدی . ۱۶۱۴ ده (اتارہ نورو) یه مبعوث اوله رق
هیئت رهبانک باشلیجه ناطقه پردازی اولمق اوزره شهرت بولدی . ماری
دومدیسس کندیسینی سرایه آلدی . قونجینی (ریشلیو) بی اموردولتده
استخدام ایتدی . قونجینیک وفاتندن صکره ریشلیو (ماری دومدیسس)
ایله پارسدن آیرلدی . مارینک اوغلی اون اوچنجی لوئی ایله باریشمنه
سبب اولدی . بو خدمته مکافاة ۱۶۲۲ ده قاردینالغه ترفیع ایدلدی .

باش وکیل اولدینی زمان ۳۹ یاشنده ایدی . اوزمانه قدر غایت ملایم
کورونمک وهرشیئه اویمقله برابریشلیو مغرور ، شدید ، مستبد ، قاتی یورکلی ،

مرحمتسز بر آدم ایدی . قرالغک قدرت حکومتی حقندہ پک یوکسک بر فکرہ صاحب ایدی . اونک نظرندہ قرالغر « الوہیتک تمثال ذی حیاتی ایدیلر ؛ الوہیتدن صکرہ حشمت حکمداری ایکنجی مرتبہ بی حائر ایدی . »

بناءً علیہ قراللق داخلندہ بلااستثنا ہرکسک قرالہ اطاعت ایلہ مکلف اولدیغنی بیان ایدردی . « قرالک اوغللری ، برادرلری و دیگر اقرباسی اشخاص سائرہ کبی قانونہ تابعدرلر . بالخاصہ قراللق علیہندہ برجرم موضوع بحث اولور ایسہ . » دیر ایدی . فقط بوکا مقابل قرالک وظائفی حقندہ دخی پک یوکسک بر فکرہ صاحب ایدی .^۱ بر مکتوبندہ « حکمدارک و مشاورلرینک تعقیب ایتدکلری غایہ یکانہ منافع عمومیہ اولملیدر » دیمشدی . ریشلیو رأس کارہ کچدیکی زمان قرالغک احوال داخلہ و خارجہ سنی پک انی کورمش ، آ کلامشدی . بالاخرہ وصیتنامہ سیاسیسنده بو احوالی شو صورتلہ تصویر ایتمشدر : « هوغونلر دولتی قرال ایلہ کندی آورلندہ تقسیم ایتشلردی . بیوکلر قرالک تبعہ سی دکلمرمش کبی ، اک ذی نفوذ والیلر حقیقی حکمدارلرمش کبی حرکت ایدیورلردی . دول اجنبیہ ایلہ عقد اولنہ بیلہ جک اتفاقلرہ نظر حقارتلہ باقیلیور ، منافع خصوصیہ منافع عمومیہ ترجیح ایدیلیور ایدی . الحاصل قرالغک شرف و حیثیتی اودرجہ مختل اولمش و بولنمسی ایجاب ایدن حالدن اوقدر اوزاقلاشدیرلمش ایدی ، کہ نفوذ حکمداری بی کورمک ، آ کلامق غیر ممکن اولمش ایدی . »

ریشلیو بو حالہ چارہ ساز اولمق ایچون قرالہ آتیدہ کی پروغرائی تکلیف ایتدی : « هوغونو فرقسہ سنی اورتہ دن قالدیرمق ، بیوکلرک کبر و غرورنی قیرمق ، بتون تبعہ بی وظیفہ لری دائرہ سنہ ادخال و قرالک نامنی ملل اجنبیہ آرمسندہ اعلا ایتک . » ریشلیو بو پروغرامک اوچ

ماده سنده ، یعنی پروتستان فرقه سنک احساسده ، زادكانك اطاعتی تأمینده ، فرانسه نك قوت وسطوت خارجیه سی اعاده ده موفق اولدی .

ریشلیو ایلک اوکجه پروتستانلره هجوم ایتدی . چونکه ،
پروتستانلر

اولا ، صاغلام آشکیلاتلرندن طولایی پروتستانلری دهاتمالکلی کوریوردی . ثانیاً ، پروتستانلر ریشلیونك تداییرینه انتظار ایتمدن جنوب طرفلرنده عصیان ایتدیلر [۱۶۲۵] . ریشلیو پروتستانلرک عادتاً پایتختلری حاله کلن (لاروشل) ی محاصره ایده بیلمک اوزره انکلیزلردن ، هولاندالیلردن کمی ایسته دی . فقط بو ملتلرک ایکیمی ده پروتستان اولدقلرندن کندیلرینه امنیت ایده میوردی . دیگر طرفدن سرای انترقه لری کندیسنی راحتسز ایتمکده ایدی . بوندن طولایی پک ایلری به وارمق ایسته مدی ؛ پروتستانلره عقد مقاوله ایتدی .

ایکی سنه صکره محاربه تکرار باشلادی . بودفعه پروتستانلر انکلیزلره اتفاق ایتشلر ایدی . فقط ریشلیو تدارکات مهمه ده بولمنش وبر دونما وجوده کتیرمکه باشلامشدی . (لاروشل) محاصره مشوره سی بوسره ده وقوعه کلدی .

لاروشل تسلیم اولدقدن صکره جنوب پروتستانلری ده ترك سلاح ایتدیلر . بونك اوزرینه ریشلیو « آله عفونامه سی Grâce D'Alais » نی نشر ایلدی [تموز ۱۶۲۹] . عفونامه تعبیری شایان دقت ایدی . آرتق اولک کبی پروتستانلره عادتاً بر دولت کبی مذاکره کیریشیلیمه مش ، معاهده عقد ایدلمه مشدی . حکمدار عاصی تبعه سیله معاهده عقد ایتز ، بلکه تنسیب ایلدیکی شرائط داخلنده عفو عمومی اعلان ایدر . ایشته ، ریشلیو بوقاعده اساسیه رعایت ایلشدی . نانت فرمانك پروتستانلره بخش ایلش اولدیغی فرقه سیاسییه تشکیلی ، مجالس عمومیه حقنی ، تأمینات

مقامندہ ویریان قلعہ لری وسائر امتیازاتی استرداد و بو مقابل سربستی
آیین و قتولیکرله مساوات نامہ حقوقی تأمین ایدیورایدی . ریشلیو
« آله عفونامہ سی » احکامنه حرفیاً رعایت ایتدی . هر درلو جبر و شدتک
اوکنی آلدی و قتولیکلری بروستان و طنداشلرینک سربستی وجدانلرینه
رعایتہ مجبور ایلدی .

بیوکار علمہندہ کی مبارزہ دہا اوزون ، یعنی ۱۶۴۲
تاریخندہ ریشلیونک وفاتندن پک آزا اولہ قدر دوام ایتدی .
ریشلیو بعضاً کندی علمہنہ ترتیب ایدیان جمعیت خفیہ لره ، بعضاً دہ مسلحاً
وقوعہ کلن عصیانلره قارشی طورمنہ مجبور اولدی . بتون انتریقہ لره
مرتبی قرائک برادری دوق (غاستون دورلٹان) ایدی . خیانت و اہانتیلہ
اون یدنجی عصری لیکہ دار ایدن بو آدمک اہمیتی ۱۶۳۸ تاریخنہ قدر
ولی عہد سلطنت مقامندہ بولنمش اولسندن ایلری کایوردی . فی الحقیقہ
اون اوچنجی لوئیک او تاریخنہ قدر چوچنی یوق ایدی . اونک ایچون
بتون غیر ممنولر ، ریشلیونک و سیاستنک بتون رقیلری غاستونک اطرافدہ
طوپلانمشلر ایدی . قرائلچہ آن دو تریش ایہ آرزوسنہ تابع اولمدینی
ایچون ریشلیویہ طارلمش اولان ماری دوم دیسیس دخی غاستونہ التحاق
ایدرک قاردینالک دشمنلری صردسنہ کچمشلر ایدی .

ترتیبات خفیہ و عصیانلر بلا رحم و شفقت احما ایلدی . ۱۶۲۶ دہ
ریشلیونک آرزوسنہ توفیقاً غاستون ایہ مادموازل دومونپانسیہنک ازدواجنہ
مانع اولمق ایچون بر جمعیت خفیہ تشکل ایتسی اوزرینہ قاردینال قرائک
ایکی برادرینی توقیف و باش و کیلی اولدیرمک ایستہ یں قونت دو (شالہ) یی
اعدام ایتدیردی .

۱۶۳۰ قرائل ایوندہ خستہ بولمدینی صردہ ماری دوم دیسیس

قاردینالی عزل ایتمی ایچون اوغلندن سوز آلمغه موفق اولمشدی . اون اوچنجی لوئی اییلمشدی ، پارسه عودت ایتدی . برمدت صکره ماری وعدک اجراسنی طلب ایلدی . آرتق قاردینالی بر طرف ایده جکنه قانع ایدی . ریشلیو قرالک حضورنده ایکن ماری دومدیسس طرفندن تحقیر ایلدی ؛ آرتق کوزدن دوشدیکنه حکم ایتدی . فقط او آقشام اون اوچنجی لوئی قاردینالی سرابه چاغیره رق کافی السابق امنیت واعتمادینه مظهر اولدیغنه دائر تأمینات ویردی . ایرتسی کونی (ماری دومدیسس) ک طرفدارلری حبس ویانفی اولندیلر . بر قاچ آی صکره ده قرالک والده سی (قومپهن) ه نفی ایلدی . اورادن ممالک اجنبیه قاچدی ؛ اون ایکی سنه صیقتی ایچنده یشایه زق قولونیا ده وفات ایتدی .

۱۶۳۲ ده (لاندوق) والیسی دوق دوو (مونمورانسی) اسپانیوللرک متفی اولان (غاستون دورلئان) ایله برلکده عصیانه تشبث ایلدی . فرانسه نك، الك بیوک اصیلزاده سی وقرالک بر یکنک زوجی اولان دوق محاربه ده اسیر ایلدیله رک اعدامه محکوم اولدی وحکم اعدام - بتون فرانسه زادکاننک استرحامانه رغماً - طولوزده اجرا ایلدی . بوشدت سایه سنده ریشلیو اون سنه قدر راحتجه اداره اموره مأمور اولدی . کندیسنک دخی اعدام اولمنسندن قورقان غاستون بتون شرکای جرمنک اسامیسنی خبر ویردکن صکره آتیا واقف اوله بیله چکی هر درلو ترتیبات خفیه یی اخبار ایله جکنی امضا ایله تعهد وه قراله ودولته صداقتی دائماً تقدیر ایلدیکی قاردینال جنابلرینی سوه جکنه « یمین ایتدی .

الحاصل ، ۱۶۴۲ ده ، ریشلیونک وفاتندن بر قاچ آی اول فرانسز اردوسی اوزمان اسپانیاه عائد اولان (پرینیان) قلعه سنی محاصره ایدرکن اون اوچنجی لوئیک کوزده سی وقاردینالک احباسندن برینک

اوغلی اولان یکریمی ایکی یاشنده مارکی (دہیا) قاردینالی اسقاط ایچونہ
تشبثانده بولندی ؛ حتی اسپانیا ایلہ بر معاهدہ خفیہ عقد ایلدی . ریشلیو
بومعاهدہ نك صورتی الہ کچیرہ رك (دہیا) یی بر آرقداشیلہ برلکدم
اعدام ایتدیردی .

ریشلیو قرالک اوامرینہ رعایت ایتینلری واجراآت حکومتہ مخالفت
کوسترنلری دخی بلا مرحمت ازدی . ۱۶۲۷ دہ دوللوی منع ایدن
وخلافنده حرکت ایدنلرہ اعدام جزاسنی ویرن فرمانک نشرندن برکون
صکرہ . قونت دو (مونمورانسی بوت ویل Montmorency-Bouteville)
ایلہ قونت دہ (شاپل) اعدام اولندیلر . مارشال دو (ماریاق) اختلاسندن
طولایی ، فقط حقیقت حالہ (ماری دومدیسس) طرفداری بولندی
ایچون اعدام ایلدی . اوچ مارشال (باستیل) دہ حبس اولندیلر . بر
چوق کیمسلر بلا محاکمہ محبوس ایدیلر . بعضلری محاکم عدلیہ تسلیم
ایدیلرہ رك محاکمہ لوی قاردینالک آدملرندن مرکب اولان وحق کندی
نظارتی آلتندہ خانہ سنده اجتماع ایدن «فوق العادہ قومیسسیون» لودہ
اجرا اولنوردی . سلامت دولت نامنہ کیفی ومستبد بر اداره تأسیس
ایدلمشدی . معاصریندن برینک دیدیکی کبی «ریشلیو انسانلری اداره دن
زیادہ ییلدیرملہ اورمشدر» .

فرانسہ یی قدیم غالیانک احتوا ایتدیکی یرلورہ
ربشلیونک اداره سی قدر توسیع ایتک عزمنده بولنان ریشلیو
سیاست خارجیه سنده آوستریا خاندانی علیہنہ یکی رقیبلر تدارک ، اوتوز
سنہ محاربہ سنہ اشتراک و (وہستفالیہ) معاهداتنک اساساتی احضار ایتدیکی
کبی داخلاً مهم مهم اجرا آتہ دخی موفق اولمشدر . داخلہ قالدونیستلرہ ،
خارجہ آوستریا واسپانیا خاندانہ قارشى حرب ایچون فرانسز اردو

ودونماسنی یکی باشند اصلاح وعادتا تأسیس ایتدی . ۱۶۱۰ ده اردو ۱۰,۰۰ کشی وبش پیاده آلایندن عبارت ایکن ۱۶۴۰ ده ۱۴۰,۰۰۰ پیاده و ۲۲,۰۰۰ سواریدن مرکب ایدی . ریشلیو دونمائی دخی اصلاحه موفق اولدی . (برهست) و (طولون) ده ترسانه لر یاپیلدی . ۱۶۲۰ ده ریشلیو (لاروشل) ی محاصره ایچون انکلتزه وهولاندان کمی آلفه مجبور اولمشدی . اون آلتی سنه صکره مساعی متدایه سایه سنده فرانسمز دونماسی سکسانی متجاوز حرب کمیسندن مرکب اولمش . اسپانیا دونماسنه متعدد دفعه لر غلبه ایتمشدی .

ریشلیو اک زیاده اردو ودونما ایله مشغول اولدینی ایچون دولتك دیگر شعبات اداره سنده اصلاحات مهمه اجراسنه وقت بوله مدی . عمومی بر پلان تعقیب ایتیمه رك آنجق حال وزمانك احتیاجنه کوره حرکت ایتدی . ولایاتده مذهب محاربه لرندن استفاده ایدن والیر عادتا برر حکمدار مستقل کی حرکت ایتمکه باشلامشردی . ریشلیو بونلری تبدیل مأموریت، عزل ویا حبس ایله بوله کتیردی .

اون اوچنجی لوئی زماننده ویرکولر پك آغیردی . آلمانیا ایمراطوری واسپانیا قرالنه قارشى وقوعه کلن محاربات یکی ویرکولر طرحنی ایجاب ایتمش ، بودجه دائماً آجیق قالمشدر . فقر وسفالت ایچنده قالان کویلیلر مختلف محللرده عصیان ایتدیلر ؛ فقط شدتله تأدیب اولندیلر . مضایقه مالیه کیتدکجه آرتدی . اونك ایچون ریشلیو خلق نظرنده منفور اوله رق وفات ایتدی . آنجق بالاخره مشکلات مالیه مقابلنده خارجاً مظفریتلر قازانیلدینی وریشلیونك مملکتته (روسیون) ، (آرتووا) و (آلساس) مملکتلرینی قازانديرمش اولدینی آکلاشیلدی . او زمان کندیسنه « بیوک قاردینال » عنوانی ویرلدى .

زمانہ زدہ بسمارق نصل آلمانیا ایمپراطوری برنجی وبلہامی کولکدہ
 براقش ایسہ ریشلیو دخی اون آلتنجی لوئی بی اولیلہ جہ کولکدہ براقشدر.
 حال بوکہ لوئی حقیقی بر قرال ایدی . مکمل بر عسکر ، ذکی و غایت
 چالیشان ایدی . قرالغک قدرت حکومتہ خلل ایراث ایدلمہ مسنہ صوک
 درجہ اعتنا ایدردی . ریشلیو : « قرالک درت قدم تربیعندہ کی او طہ سندہ
 اجرای نفوذ ایتمک ہم ایچون بتون اوروپا محاربہ میدانلرنده احراز
 ظفردن دھا کوجدر . » دیردی . قرالک موافقتی اولمہ دن هیچ برشی
 پایلہ مازدی . ریشلیو ہر بر ایش ایچون قرالہ اوزون راپورلر تقدیمہ
 وبتون تفرعاتی غایت واضح بر صورتہ اراٹمہ ، اتخاذا ایدیلہ جک تدبیرک
 لہ وعلینہدہ بیان . مطالعہ یہ مجبور ایدی . قرالک امنیتنی آنجق بو صورتہ
 قازانہ بیامشدی . مع مافیہ اون اوچنجی لوئی دخی باش وکیلنک قیمتنی
 تقدیر ایدرک ہر شئیہ رغماً کندیسنی موقع اقتداردہ براقدی .

ریشلیو وفات ایتدیکی زمان [۷ کانون اول ۱۶۴۲] اون اوچنجی لوئی
 قاردینالک سیاستہ صادق قالہ جغنی بیان وریشلیو طرفدن توصیه ایدیلن
 قاردینال (مازارن) ی رأس کارہ . دعوت ایتدی . یدی آی صکرہ بش
 یاشندہ بر چوجق - ۱۴ نجی لوئی - براقہ رق وفات ایلدی .

اون اوچنجی لوئی وصیتنامہ سندہ زوجہ سی آن دو تریشی
 نائبہ حکومت تعیین ایتشدی . فقط اونک یالکز باشنہ

ادارہ حکومتہ مقتدر اولہ جغنہ امنیت ایدہ مدیکندن بر مجلس نیابت تشکیل
 ایلشدی . آن دو تریش ہر ایشدہ بو مجلسک رأی آلہ حق و ویرہ جی قرارہ
 اتباع ایدہ جک ایدی .

اون اوچنجی لوئینک وفاندن ایکی کون صکرہ پارس پارلمتوسی
 - آن دو تریشک طلبی اوزرینہ - وصیتنامہ بی فسخ ایتدی وقرالیچہنک

استقلال تام ایله نائبه حکومت اولسنه قرار ویردی . ریشلیونک خصم قدیمی اولان آن دوتریش ریشلیونک محرم اسراری قاردینال مازارنی موقع اقتدارده محافظه ایدرک تبدل سلطنتدن استفاده ایتک ایسته ین بر چوق کیمسه لری حیرتده براقدی .

مازارن ایتالان ایدی . بدایه پاپالق اردوسنده ضابط صفیله بولمیش و ۱۶۳۰ تاریخته طوغری دیپلوماسی مسلکته کیرمشدی . ینه اوتاریخده راهب اولماقله برابر قیافت روحانیده کز مکه باشلامشدی . پاپا مازارنی سفیر صفیله اون اوچنجی لوتی نزدینه کوندرمشدی [۱۶۳۴] . ایکی سنه صکوره مزارن فرانسه قرالمک خدمته کیردی و فرانسر اولدی . خدمات کنزیده سنه بناء ریشلیو کنه دیسنه قاردینال رتبه سنی آلدی . اوزمان مازارن قرق یاشنده ایدی .

مازارن ریشلیویه بکزم مزدی . غایت ساده یشاردی . ریشلیو بر حکمدار کبی دبدبه ودارات ایچنده یشادینجی ، سوقاغه پک غلبه لک بر معیت ایله چیقدیغی حالده مازارن یالکزجه کزر ، هر کسه التفات ایدردی . نه انتقاجو ، نه ده حدید ایدی . رقیبلرنی هیچ بر زمان اعدام ایتدیرمک ایسته مدی . واقعا ماده جسور دکلدی ؛ فقط معناً پک متین ایدی .

اوروپا سیاستک غوامضنه واقف ، ماهر برسیاسی ایدی . بالخاصه مذاکرات سیاسیه بیوک برزکا ودرایت اثری کوستردی . ریشلیونک توجهنی بو درایت و مهارتی سایه سنده قازانمشدی . فقط ریشلیو کبی بر رجل دولت دکلدی . اداره داخلیه دن بر شی آکلامزدی . ثروت شخصیه سی مستثنا اولق اوزره امور مالیه ده دخی موفقیتی یوق ایدی . خسیس ، طمعکار ایدی . فرانسه یی اداره ایتدیکی مدتجه مدهش بر خرسز اولدی .

حکومت مشکلات ایچندہ ایدی . ریشلیونک تأدیپ
اموال مملکت ایلمش اولدینی زادکان اولکی استقلاللارینی ،
 نفوذلارینی استردادہ خواہشکر ایدیلر . بعض زادکان امید ایتدکری
 مناصب عالیہینی الہ کچیردینجه مازارنی اسقاطہ تشبث ایتدیلر . حتی باش
 وکیلک قتل ایدیله جکی ده روایت اولندی . عصات ریشی دوق دو
 (بوفور Beaufort) ک توقینی زادکانی یوله کتیرمکه کافی کلدی .

کویلیر آغیر ویرکولردن طولانی فقر وسفالت ایچندہ قلمشردی .
 مضایقہ مالیه صوک درجهینی بولمشدی . بودجه آچینی هر سنه وسطی
 اوله رق ۲۸۰ میلیون فرانغه بالغ اولدیغندن ۱۶۴۶ تاریخنه قدر درت سنه لک
 ویرکولر بروجہ پشین تحصیل ایدلمشدی . بونکله برابر آلمانیا ایمراطوری
 واسپانیا قرالی ایله حربہ دوام ایتک ، اردولرک مصارفنی تدارک ایلک ،
 اسوجہ وفرانسه نک دیگر متفقلرینه پاره ویرمک ایجاب ایدیوردی .

مازارن پاره بولمق ایچون امورمالیہده مهارتی اولان بر ایتالیانی مالیه
 نظارتنه کتیردی . اولاً ، بعض مأموریتلر صاتیلدی ؛ صاتیلماق اوزرم
 یکی منصبلر احداث اولندی . بعده ، جبری استقراضلرم مشابہ بعض
 ویرکولر طرح ایدلدی . تقریباً آلتی سنه دوام ایدن بو تدابیرک زیادہ
 پارسلیلری حدتلمدیرمکده ایدی . ۱۶۴۸ ده پارس اھالیسی قرالیچه
 ایله مازارن علیھنہ عصبان ایتدیلر .

عصبان مأمورین دولت ایله پارس پارلمنتوسی حکامی طرفدن تشویق
 وادارہ اولندی . پارلمنتو اعضاسی پارلمنتونک موافقتی منضم اولمدیجه
 حکومتک یکی بر ویرکو طرح ایدمه مسنی وقرالک تبعہ سندن هرھانکی
 بر کیمسہ نک استنطاق وحاکم طبعیسینہ تسلیم ایدلمکسزین یکرمی درت
 ساعتدن فضلہ حبس ایدیله مه مسنی طلب ایتدی . بو طلب اداره مطلقہینی

تحميد ديمك اولديني ايجون پارس اهاليسنيجه مسرتله تلقى ايدلى .
حكومتك پارسده عسكرى بولنديغندن نائبه حكومت خلكك آرزوسى
خلافتده حركتى مناسب كورمدى ؛ پارلمنتو قرارينك نظر دقته آلنه جغنى
وعد ايدلى .

بر قاچ هفته صكره (قونده) نك قومانداسنده كي فرانسر اردوسى
(لنس Lens) موقعنده اسپانيوللر غلبه ايتدى . بومظفريتدن جسارت
آلان (آن دوتريش) پارلمنتو اعضاسندن بر چونك توقيفى ايجون امر
ويردى . بونلردن ناموس وقاعتي ايله بين الخلق بيوك بر شهرت قازانمش
اولان (بروسل Broussel) ك توقيفى اوزرينه درحال برعصيان چيقدى .
سوقاقلرده فيجي ، آرابه ، قالدريم طاشى وسائر ايله يوزلرجه باريقادلر
ياپيلدى . عسكركو مانعهلردن طولايي پارس داخلنده قولايجه حركت
ايدميوردي . پالهر وواييال ايكي كون محاصره اولندى . پارلمنتو هيئتجه
سرايه كلهرك (بروسل) ك تخليه سنى طلب ايتدى . قراليجه فوق العاده
حدتلندى ؛ « اونى تخليه ايتمكدن ايسه كندى ايله بوغه جغنى » سويلدى .
فقط مازارن مخاطر نك اهميتنى آكلامشدى . (آن دوتريش) ك اك
زياده كوونديكي بورژوا ميليسلرى عصانه التحاق ايتمشدى . قاردينال
قراليجهي (بروسل) ك تخليه سنه اقناع ايتدى .

ايكي آي صكره آلمانيا امپراطورى ايله (ووستفاليه) ده
پارلمنتو فرومى عقد صلح ايدلى [۲۴ تشرين اول ۱۶۴۸] .

نائبه حكومت سربست قالان قونده اردوسنى پارسه جلب ايدلى . عسكركو
پايخته ياقلاشديني صرهدده (آن دوتريش) اون دردنجي لوتى ومازارن
ايله برلكده پارسدن قاچدى ، (سن ژرمن) شاتوسنه كيتدى . قونده
اون بش بيك كشى ايله پارسى محاصره ايتدى . پارلمنتو - پارس

سرپسقیوس معاونی اولوب بالاخرہ قاردینال دو (رہ چ) نامیلہ شہرت قازانان (پول دوغوندی Paul de Gondi) نك معاونتیلہ - مقاومتہ حاضرلاندى . محاربہ داخلہ باشلادی . بوكا صاپان اویونی معناسنہ « فروند Fronde » دنیلیمشدر . مع مافیہ پارلمنتو فروندی چوق سورمدی . بدایت محاصرہ دن اوچ آی صکرہ پارلمنتو صلحہ راضی اولدی . مصالحہ نامہ پارس قربندہ امضا ایدلدى [۳۰ مارت ۱۶۴۹] .

پارلمنتونك آز زمانده مغلوب اولمسی ایکی سبیدن نشأت ایتمشدى : اولاً ، پارسلیلر محاصرہ نك تولید ایلدیکی محرومیتلرہ قاتلانہ مدیلر . ثانیاً ، بر چوق زادکان وحقی قونده نك برادری پرنس دو (قوتی Conti) کبی خاندان حکمدای یه منسوب پرنسیر مازارنہ اولان خصوصیتلرندن طولای و اغتشاش ائسانسده منافع ذاتیہ لرینی تأمین ایتمک املیلہ (آن دو تریش) ی ترک ایتمشلر ایدی . پارلمنتو اعضاسیلہ برلشمک ایچون پارسہ عودت ایتدکری زمان اسپانیوللردن امداد ایستہ مکی تکلیف ایتدیلر . دشمن اجنبیدن استمداد پارلمنتو اعضاسنك حسیات و طنپوررانہ سنی تہییج ایتدی . بونلر بر دولت اجنبیہ دن امداد ایستہ مکدن ایسہ نائبہ حکومت ایلہ مصالحہ یی ترجیح ایلدیلر .

فقط پارلمنتونك موفق اولہ مامسنك اصل سببی امور دولته غیرقانونی برصورتده مداخلہ ایتسی و پارسدن بشقہ بتون فرانسه نك لاقید قالمسیدر . قرالک ویرکو طرحندہ کی صلاحیتنك تحدیدی و ادارہ کیفیہ یه قارشی حریت شخصیه نك تأمین حقیقہ پارلمنتو طرفندن اتخاذا ایدلمش اولان قرار آنجق فرافیمز ملتك وکیللرندن مرکب اولان (اتارہ نہرو) مجلسنجہ مذاکرہ و قبول ایدلکدن صکرہ مرعی الاجرا اولہ بیلیردی . پارس پارلمنتوسی انکلترہ پارلمنتوسی تقلید ایتمک ایستہ یوردی . فقط ایکی

پارلمنتو آره سنده اسمدن بشقه بر نقطه مشابهت یوقدی . انکلیز پارلمنتوسی ملئک مبعوثلرندن مرکب اولدینی حالده پارس پارلمنتوسی بر محکمه دن عبارتدی . (اآژنه رو) نك صلاحیتنی غصب ایلمشدی . اعضاسی فرانسز ملئک مبعوثلری دکل ، بلکه حکومه قارشی اطاعت مطلقه ایله مکلف مأمورین ایدی . بناءً علیه پارلمنتونك حرکتی عصیاندن بشقه بر شی دکلدی . فرانسه پارس عصاتنی تعقیب ایتدی و قراله صادق قالدی .

پارلمنتو فروندی ختام بولور بولماز پرنس دو پرنسلك فروندی قونده نك ، عائله سنك و طرفدارلرینك سبب اولدقلری بر طاقم یکی مشکلات ظهور ایتدی . قونده ۲۷ یاشنده ایدی . ۱۶۱۴ سنه سی وقایعنده مخالفینی اداره ایتمش اولان پرنس دو قونده نك اوغلی ایدی . ۲۴ یاشنده اسپانیولار ایله وقوعه کلن (روقرووا) محاربه سنده پارلاق بر مظفریت قازانه رق ماهر بر قوماندان شهرتی اکتساب ایتمشدی . (لنس) مظفرتی بو شهرتی آرتیردی . جسور اولدینی قدر مغرور ایدی . ایفا ایلدیکی خدماتك پك بیوک اولدیغنه ، هیچ بر مکافاتك بو خدمتله تقابل ایده میه جکنه قانع ایدی . (بورغونیا) و (کوبن) ولایتلری والیلکینی آلمشدی . فقط ده ا بیوک موقعلر ایسته یوردی . مازارنك مقامه کوز دیکمشدی . مطالب مفرطه سی ، کبر و غروری ایله (آن دوتریش) ی حدتلدیردی . نائبه حکومت بر کون کنديسینی توقیف و (وهنسان) شاتومنه حبس ایتدیردی [کانون ثانی ۱۶۵۰] . بونك اوزرینه قونده نك زوجه سی ، همشیره سی ، بعض دوستلری ، از جمله مارشال دو (تورن) کبی مشاهیر زادگان نورماندیا ، کوبن ، بورغونیا ، پوواتو ولایتلرنده عصیان چیقاردیلر . « پرنسلك فروندی » ویا « ایکنجی فروند » بوضورتله باشلادی .

مازارن عاصیلرہ شدتہ ہجوم ایتدی . عصیانى تمامیلہ ازالہ ایدمہ جک درجہ دہ موفقیت کوستردیکی صرہ دہ - مازارن طرفدن وعد ایدیلن قاردیناللق رتبہ سنہ نائل اولہ مدیغدن طولای باش وکیلہ دشمن اولان - (پول دوغوندی) پارسده پارلمنتو اعضاسنى واهالى یی یکیدن قیام ایتدیرمکہ موفق اولدی . پارسایلر سلا حلا ندیلر . پارلمنتو مازارنک عزل ونفینى طلب ایتدی [شباط ۱۶۵۱] .

مازارن ایکی فروندک برلشسمسى اوزرینه مقاومتدن واز کچدی ؛ قونده یی تخلیه ایتدیردی وکندیسی آلمانیاہ ، قولونیا الکتورینک یانہ کیتدی . فقط (آن دوتریش) ایلہ دائما مخبارہ ایدیور و اداره امور ایچون رأى ویرمکدن خالی قالیور ایدی . (غوندی) و (قونده) آرسندہ کی اتفاق پک آز دوام ایدمہ جکنى وھرایکی طرفک آمال حریصانہ سندن طولای آرمہ مطلقا اختلاف حقیقہ جغنى آ کلامشدى . فی الحقیقہ قونده نک کبر و غرورى پارسایلری پک چابوق کوچدیردی . دیگر طرفدن (آن دوتریش) مازارنک مقامنى اوکا ویرمہ مشدی . قونده باش وکالتی آلہ مینجہ بردن برہ پارسدن چیقدی ؛ (کویہن) کیدرک ینہ محاربہ داخلہ یہ باشلادی . فقط - بر عصر اول دوق دو بوربونک یاپدینى کبی - مملکتہ اھانت ایدرک اسپانیا قرالیلہ عقد اتفاق ایتدی [ایلول ۱۶۵۱] . مازارن درحال فرانسیہ عودت ایلدی .

اوزمان فرانسیہ پک قاریشیق بر حالہ ایدی . پارسایلر (قونده) دن آیرلمشلدی . لکن مازارنک باشنى کتیرمہ جک کیمسیہ مکافات وعد ایتمشلر ، قاردینالک یانہ کیتمش اولان کنج قرال پاتختہ عودت ایتک ایستہ دیکی زمان شہر قبولرینى قامشلر ایدی . مازارن مصارفنى کندى کيسہ سندن ویرہرک بر کوچک اردو طوپلامشدى . بو اردو قرال طرفدارلرینہ

التحاق ایتیش اولان (تورهن) ك قومانداسنده ایدی . اورلئانه کیتمهک
چالیشیرکن (قونده) نك آنی بر هجومه اوغراددی . آز قالسون قرال،
آن دوتریش و مازارن عصات الله اسیر دوشه جکلردی . (تورهن) ك
مهارتی اردویی هزیمتدن قورتاردی [نیسان ۱۶۵۲] .

ایکی اردو پارسه یاقلاشدیلر . (تورهن) پارسك طیش محلاتندن
سن آنطووان محله سنده (قونده) یه هجوم ایتدی . قرالك اردوسی
ایله پارس سوری آره سنده قالمش اولان قونده نك محو اوله جنی محقق
ایکن باستیل قلعه سنك طوپلری قرالك عسکری اوزرینه آتش ایتمه
باشلادی . عینی زمانده سور قپوسی آچیلهرق قونده شهره التجا ایتدی .
هیچ کیسه نك انتظار ایتدیکی بو حاده قرالك اقراسندن و (غاستون
دورلئان) ك قیزی اولوب بیولك بر ایش کورمك هوسنه قابیلشمش اولان
مادموازل دو (مونپانسیه Montpensier) اسمنده یکریمی بش یاشنده
بر قیزك اثری ایدی .

قونده اوچ آی پارسده قالدی . پارسیلر ، نهایت ، اغتشاشادن
اوصاندیلر ؛ قونده نك عسکرینه ارزاق ویرمدیلر . بونك اوزرینه قونده
پارسدن چیقمغه مجبور اولدی . بتون طرفدارلری کندیسنی ترك ایتیش
اولدقلرندن (پهیی با) ده اسپانیوللره التجا ایتدی . یدی سنه ، (پیره نه)
مصالحه سنه قدر اسپانیا قرالنك خدمتنده بولندی . مصالحه نامه نك عقدنده
فرانسه یه عودت مساعده سنی قرال دن بك زیاده مشکلات ایله استحضال
ایده بیلدی .

قونده نك فراری حرب داخلیه نهایت ویردی . برسنه اول سن
رده وصولی اعلان ایدلمش اولان قرال پارلمنتونك طلبی اوزرینه
والده سیله برلکده پایتخته عودت ایتدی و اهالی طرفندن شوق و سرور

ایله استقبال ایدلدی [تشرین اول ۱۶۵۲] . مازارن افکار عمومیه نك
كسب سكون ایتسنی بکلیه رك بر قاج آی صکره پارسه کیردی ؛ اوزمان
مظفر بر قوماندان کبی آلفیشلره نائل اولدی .

بوندن صکره سکرز سنه ده‌ها حیاته ده و باش وکالتده
قالان مازارن سکون ایچنده اداره حکومته موفق

مازارنك صوك

اولدی . اون دردنجی لوی بتون ایشلری اوکا
سدری
براقشدی . مازارن بالخاصه اسپانیا ایله حربیه نهایت ویرمکه و (پیره نه)
مصالحه سنی عقده چالیشدی . داخلا بیوک بر ایش یاپمادی .

مازارن اك زیاده کندیسنه وعائله سنه بیوک بر ثروت تأمین ایتك
ایچون اوغراشدی . برادر و همشیره زاده لری اولان یدی کنج قیزی
قرانسه یه کیتیردی . بونلرك جمله سنی فرانسه نك اك بیوک زادكانه تزویجه
موفق اولدی . حتی اون دردنجی لوی بر آراتق بو قیزلردن برینی ،
(ماری مانچینی) یی تزوج ایتك ایسته دی . فقط والده سی مانع اولدی .
مازارن مأموریت صاتمق ، واردات دولته اختلاس ایتك کبی وسائط غیر
مشروعه ایله سکرز سنه ده پك بیوک بر ثروت تأمین ایتدی . بدایه پك
ساده یشارکن صکره لری حکمدارلره لایق دبدبه و احتشام ایچنده وقت
کچیردی . مکلف ضیافتلر ویرردی . بر دفعه بر ضیافتده مدعوینه
برمیلیون فرانق قیمتده هدیه لر طاعتتمشدی . الیوم پارسده کتبخانه ملی
اولان سرایی غایت قیمتدار آثار صنایعه ایله طولو ایدی . سراینده
بولنان تابلولر بالا خره لوور موزه سنك اساسنی تشکیل ایتمشدر . وفات
ایتدیکی زمان [۸مارت ۱۶۶۱] خزینه دولت بوم بوش ایدی ؛ فقط مازارن
ورنه سنه - بو کونکی حساب ایله - ایکیوز ملیون فرانق متجاوز ثروت
براقشدی . خزینه دولتك بودرجه حیا منرجه سنه یغما ایدلمسی مسبوق دکلدی .

اون دزدنجی لوئیک تحت وصایتده بولندینی دورده کی
فروندلرک نایبی اغتشاشاتک مادی و سیاسی نتایجی حائر اهمیتدر .
 هرایکی فروند وبالخاصه پرنسلك فروندی فرانسه یی خرابه زاره چویردی .
 اغتشاشات ظهور ایتدیکی زمان اوتوز سنه محاربه سی ختام بولمشدی .
 وه استفالیه معاهداتنک عقدی اوزرینه ایشسز قالان سرسریرلر ، عسکرلر
 ایلک عصیان وقاریشیقلق خبرینی آلتجه فرانسه یه قوشدیلر . شمال و شرق
 ولایاتی درت سنه درلو درلو یغمالره ، قتالره ، احمای محصولاته ، قیتلغه
 معروض قالدی . قیشین مدھش بر قحط ظهور ایتدی . سفالت عمومی
 هرکسی متأثر ایتدی . ایشته ، اوزمان (سن و نسان دوپول) اسمنده کی
 اختیار و اھب چوجقلره ، اختیارلره ، سفالتزده لره معاونت ایچون بر
 چوق مؤسسات خیریه آجدی .

نتایج سیاسیه کلنجه ؛ فروندلر فرانسه ده حکومت مطلقه نك قوتلی
 بر صورتده تأسسنه سبب اولدی . هیئت رهبان ، شهرلر اھالیسی ، کوییلر
 وحقی زادگان حرب داخلیدن ، اغتشاشادن آرتق یورولمشلر ایدی .
 قراله مخالفت فکری ترك ایدلمشدی . هیچ کیمسه بوندن بحث ایدلمسفی
 ایسته میوردی . راحت ، نظام وامنیت ایچنده یشامق آرزوسی عمومی
 ایدی . فرانسه صلح داخلی شدتله آرزوایدیور وبونی قرالدن بکله یوردی .
 دیگر طرفدن اون دزدنجی لوئی اغتشاشادن شخصاً متأثر اولمشدی .
 هنوز اون یاشنده ایکن بر قیش کیجه سی صباحه قارشى یتاغدن قالدیرلمش ،
 سرایندن چیقارلمش ، پارلمنتو عصاتنک حاکم اولدقلری پارسدن اوزاقلال-
 شدیرلمشدی . (سن ژرمن) شاتوسنه کیدلدیکی زمان اوطه لرك اشیاسز ،
 چرچیوه لرك جامسز اولدینی کورلمش ، صاماندن بشقه یتاق بولنه مامشدی .
 بوندن صکره لوئی درت سنه ولایتدن ولایته کیتمکه ، عسکرلر آره سندمه
 سیار بر حیات کچیرمکه مجبور اولمشدی .

لوئی چوققلغنگ بوآجی خاطرہ لرینی دائما محافظہ ایتدی . هنوز پک کوچک ایکن قرالغک حیثیت ونفوذی حقندہ پک یوکسک بر فکر پیدا ایتمش، هرکسک قرالہ بلااعتراض اطاعت ایتسی لزومنی آ کلامش اولدینی ایچون بوندن صکرہ ارادہ لرینہ هر هانکی صورتدہ اولورسه اولسون مخالفت ایدلمسنہ مساعدہ ایتمه مکہ قرار ویرمشدی . فرانسه تأمین سکون ایچون قرالہ اطاعتہ مهیا بولندینی صرہ دہ اون دردنجی لوئی بر حکمدار مطلق اولق عزم قطعینسندہ ایدی .

اون دردنجی لوئی مازارنک فردای وفاتندہ وکلای دولتی **اوبہ دردنجی لوئی** یانہ چاغیردی وکندیلرینہ : « شمدی یه قدر دولتمه عائد **سلطنتی** ایشلرک وکلا طرفدن اداره ایدلمسنہ مساعدہ ایتشدم .

بوندن صکرہ کندیمک باش وکیلی اوله جفم . رأیکزه مراجعت ایتدیکم زمان بیان مطالعات ایلهرک بکا یاردیم ایدرسکز . امرم اولمدجہ هیچ بر شئی مهرله مه مکز و موافقت اولمدجہ هیچ بر کاغدی امضالاماکزی رجا وامر ایدرم . دیدی . بو آچیق ، قطعی سوزلرله حقیق بر قرال اولق ، حکومتی بالذات اداره ایتک عزمنده اولدینقی کوستردی . اوزمان ۲۲ یاشنده ایدی . ۷۷ یاشنده وفات ایدہ جک . الی بش سنه لک زمان ظرفندہ [۸ مارت ۱۶۶۱ - ۱ ایلول ۱۷۱۵] ایلک کونی اظهار ایلدیکی عزم وقراری بر آن بیلہ ترک ایتدی ؛ باش وکیل استخدام ایتیه رک کندی ایشنی کندی کوردی . اغتشاشات داخلیه دن بیقمش ، یورولمش اولان ملت ایسه بوندن پک زیاده نمون اولدی .

اون دردنجی لوئی اون آلتی یاشندن اعتباراً محضاً کندیسینی امور حکومتہ آلیشدیرمق ایچون عقد ایدیلن شورای قرالی اجتماعلرنده حاضر بولنق ، هر صباح مازارن ویا وکلادن دیگر بریلہ کوروشمک سایه سندہ

اداره دولته حاضر لائمشدی . بالخاصه عسکر لکه مراق ایتمشدی . مازارن سیاست خارجیه بی کندیسنه پک کوزل تعلیم ایله مشدی . ینه مازارن وکلاسنی مشاور کبی استخدام ایدرک صولک قراری ویرمک حقنی کندیسنه صاقلامسنی اوکر تمشدی .

اون دردنجی لوئی اورتیه بویلی ایدی . فقط هر حال وحر کنندم اصالت وحشمت کوریلور ؛ زرده وهانکی قیافتده اولسه قرال اولدینی آکلاشیلردی . ذکاسی علی العاده ایدی ؛ فکرأ او قدر پارلاق دکلدی . لکن عقل سلیم صاحبی ایدی . هیچ برشی حقنده عجله برقرار ویرمز ؛ هر هانکی برایش موضوع بحث اولدینی زمان اونی بیلنلردن معلومات آلدقجه برشی سویله مز ایدی . فطرة مستقیم ایدی . حقیقی ، عدالتی ، نظام وانتظامی سوردی . مصأ پک جسور ، قلبأ پک متین ایدی . بالخاصه حیانتک صولک سنه لرنده ، اسپانیا وراثتی حربنک فلا کترلره مالی زمانلرنده بیوک بر متانت کوسترمشدر . او وقت اردولری مغلوب اولمش ، فرانسه استیلا ایدلمش ، پایتخت تهلکه ده قالمش وبرقاچ کون ظرفنده ولی عهد اولان اوغلی ، حفیدی ، حفیده سی و حفیدزاده سی وفات ایتمشدی . بو قدر فلا کترلردن پک متأثر اولدی ، فقط یأس وفور کتیرمدی ، امور دولتی بر آن بیله ترک ایتدی ؛ الحاصل ، بتون دشمنلرینی متانت واصلتیه حیران براقدی .

اون دردنجی لوئی چوجقلغندن بری آلدینی تربیه اقتضاسنجه اللهک یر یوزنده تمثالی اولدیغنه ، قرال لک اللهدن بشقه هیچ کیمسه یه حساب ویرمکه مجبور اولدقلرینه قانع ایدی . اوزمان بوفکر عموماً قبول ایدلمشدی . بناء علیه اون دردنجی لوئی حاکم مطلق ایدی ؛ تبعه سنک مالنه ، حریتنه وحق جاننه ایسته دیکی کبی تصرف ایده بیلردی . فقط بو نامحدود قدرت

حکومتی دولتک منفعت و سلامتی ایچون صرف واستعمال ایتک لازم
کلدیکنی ده بیان ایدردی .

اونک ایچون بتون عمر نده « حکمدارلق صنعتی » حسن ایفایه چالیشدی .
« آنجق چالیشمق ایله اجرای حکومت ایدیلیر ، دین اون دردنجی لوئی
دولتک بتون ایشلرینی بالذات رؤیت ایدر ، هر کون بلاستنا سکز ساعت
چالیشیر ایدی .

ریوزنده اللهم وکیلی اولدینی قناعتی اون دردنجی لوئی بی پک مغرور
یامیشدی . کونش کندیسنک علامت مخصوصه سی ایدی . بوندن طولای
لوئی به « Roi Soleil » لقبی ویرلشدر . معاصریندن بری « اکر شیطاندن
قورقسهیدی کندیسنه پرستش ایتدیرردی . » دیمشدر . فی الحقیقه بویه
برشیئه تشبث ایتسه پرستشکارلر بوله جفی شبهه سز ایدی . ندیملر قرالک
بوش او طه سندن کچرکن شایقه لرینی چیقاریرلر ، قرالک یتاغی ویا اشیاسنی
حاوی بر طولاب اوکنده - طبق کلیسارده کی تصاویر مقدسه اوکنده
یاپیلدینی کبی - ره وه رانس یاپارلر ایدی . سراینک مشهور عالم اولان
حشمت وداراتی ، اک اوافق تفرعاته قدر تعیین ایدلمش اولان تشریفات
قرون قدیمه معبودلرینه یاپیلان مراسمی خاطره کتیرر .

اون دردنجی لوئی بتون زادکانی یا خدمت شخصیه سنده ، یا خوداردو
ودونماسنده استخدام ایتدی ویا سراینده عاطل بر حالده بر اقدی . اداره
دولته اصیل زادکانی اصلا قوللانمیدی . رجال و مأمورین حکومت میاننده
برایکی کشیدن ماعدا زادکان یوقدی . اون دردنجی لوئی دولتی بورژوا
صنفي واسطه سیله اداره ایتدی . مع مافیه بونلره عنوان اصالت ویرر و بو
صورتله قرالک ایسترسه هر شیئی یاپه بیله جکفی کوستردی .

اون دردنجی لوئی نیک وکلاسی میاننده پک کزیده ذوات واریادی .

خارجيه نظارتی اداره ايتش اولان هوغ دوليون Hugues de Lionne [۱۶۶۳-۱۶۷۱] و آرنود پومپون Arnauld de Pomponne [۱۶۷۷-۱۶۷۹] ايله قولبر [۱۶۶۱-۱۶۸۳] ولوووا [۱۶۶۶-۱۶۹۱] بوجله دندر. وکلالق قولبر ولوووا عائله لرنده خيلي زمان پدردن اولاده انتقال ايتدی. مثلاً، لوووا پدرينک يرينه حربه ناظری اولمش و وفاتنده اوغلی بوماموريتيه کچمشدر. قولبر عائله سندن قولبرک اوغلی، برادری ويکنلری اولمق اوزره بش ناظر فرانسه يي اداره ايتمشدر.

اون دردنجي لويئنک وکلا سندن اک مهمی قولبر [۱۶۱۹-۱۶۸۲]

قولبر

[۱۶۸۲] در. ژان باتيست قولبر (ره نس) شهرنده چوخه تاجر لرندن برينک اوغلی ایدی. کنج ايکن پارسه کلدی؛ مدير امور صفتيله مازانک خدمته کيردی. قاردينالک ناموس سزجه سنه قازانمش اولديني ثروتی حسن اداره ايتدی. اونک ايچون مازارن وصيتنامه سنده قولبرک غایت مستقيم و صادق اولديغندن بحث ايدرك خدمت دولته استخدام ايلسنی قراله توصيه ايتمشدی.

قولبر ماليه خدمته قبول ايدلدي. ماليه ناظری (فوکه Fouquet) نک اختلاساتی ميدانه چيقاردی. فوکه خزينه دولتن چالديني پاره لر ايله زمانر حسابنجه قرق ميلون فرانغه برسرای ياپدير مقده ایدی. باش وکیل اوله جغنی امید ايتديکی برصرده توقيف ايدلدي [۱۶۶۱]؛ اوچ سنه سورن محاکمه سی نتیجه سنده مؤيد حبسه محکوم اولدی. توقيفنی متعاقب قولبر ماليه نظارتنه کچدی.

قولبر او زمان ۴۲ ياشنده ایدی. غایت چاليشقان ایدی. بوتون قرانسه ده هر کسک چاليشمسنی ايستردی. «عطالته ويا معتدل برچاليشمه يه محکوم اولورسه آلتی سنه يشايه ميه جغنی، سويلردی. هر صباح ساعت بش

بحقہ نظر آئے۔ کی اوطہ سنہ کیرد یکی زمان اگر ماصہ سی اوزرنده بیغینلرجه اوراق کوریرسه - اطعمه نفیسه یی حاوی بر سفره قارشینده بولان بر شکمپرور کبی - فوق العاده ممنون اولور؛ ممنونیدن اللرینی اوغوشدیره رق همان چالیشمغه باشلاردی . یومیه اون آلتی ساعتدن آشغی یه چالیشدینی یوقدی . چالیشیرکن برشی استرحام ایتمکه کلنره حسن معامله ایتزدی . بو کیلری او قدر صفوق قبول ایدردی ، که کندیسنه « شمال » ، یعنی « بوز » لقبی ویرلمشدی . بر کون قولبر اوطه سنده چالیشیرکن بر قادین ایجری یه کیرر ، بر شی رجا ایدره ناظر دن جواب بیله آله ماز . بونک اوزرینه دیز اوستی یره کله رک هیچ اولمازسه سوزلرینی ایشیتدیکنی بر اشارت ایله آ کلاتمسی استرحام ایلر . قولبر در حال قادینک قارشینده دیز چوکر و : « مادام ، رجا ایدرم ، بنی راحت براقکز ، جوابی ویرره وضوح افکار صاحبی ایدی . اک قاریشیق ایشلری حل ایتمک یولی بیلیر و بویله بر ایشه تصادف ایدنجه ممنون اولوردی . در عهده ایلدیکی وظائف پک واسع ایدی . یکر می ایکی سنه ، وفاتی تاریخنه قدر شمیدیکی مالیه ، داخلیه ، تجارت و صنایع ، زراعت ، نافعہ ، بحریه ، مستملکات ، صنایع نفیسه و قسماً عدلیه نظارتلرینه عائد امورک کافه سنی بالذات اداره ایتدی . مورخ (میشله) نک دیدیکی کبی « قولبر اون دردنجی لوئینک چیفت اوکوزی ایدی . » قولبر صرف چالیشمقدن ذوق آلدینی ایچون دکل ، بلکه بالخاصه وطنپرور لکندن ، منافع عمومیه یی تأمین ایتمک حرصندن ، قراله و فرانسه یه صداقتندن طولایی چالیشدی . قرالنی اوروپانک اک بیوک حکمداری ، مملکتنی اوروپانک اک بیوک حکومتی یایمق ایستردی . قولبرک دستور اجرا آتی « فرانسه یی دنیانک اک زنکین مملکتی یایمق ، ایدی . بونک ایچون ده پاره نک خارجه چیقمسنه مانع و ممالک

اجنبیه دن ممکن مرتبه چوق پاره ادخال ایتک ایسته دی . بو صورتله فرانسه نك سیاست تعالیسی تأمین ایلجه جك ، قومشودولتلی فقیردوشوره رك فرانسه یی دنیانك اك زنکین ، اك قوتلی حکومتی یابه جق ایدی .

امور مالیه ده مازارنه امثالاً خزینه دولتی صومش اولانلری تعقیب ایتمکله ایشه باشلادی . یوزلرجه کیمسه لری بوکونکی حساب ایل ۴۴۰ میلیون فرانسی خزینه یه اعاده یه مجبور ایتدی .

اوزمانه قدر پك قاریشیق اولان اداره مالیه یی انتظام آلتنه آلدی . امور مالیه اوتهدن بری قراللیك الكضعیف نقطه سی ایدی . حتی انقلاب کبیرك ظهورینه ، قراللیك سقوطنه مضایقه مالیه سبب اولمشدر . مضایقه اك زیاده قراللیك فردای دوشونمه دن ، حتی وارداتك مصارفاته تقابل ایدوب ایتدیکنی تدقیق ایلمه دن صرفیاتده بولنلری ایدی . قرالک اعتبار مالیه یی اودرجه بوزولمش ایدی ، که ۱۶۵۷ تاریخنده اسپانیا محاربه سی مصارفی تدارك ایتک لازم کلدیکی وقت بانکرلر قراله اقراضاتده بولنق ایسته مه مشلر ؛ مالیه ناظری (فوکه) آنجق امضای ذاتیه یی ایل پاره بوله بیلمش ایدی .

قولبر حساباتک کونی کونه ومنتظماً طوتولمسی ، واردات و مصارفاتک موازنه سی تأمین ایتک و آرتق استقراض عقدینه مجبور اولماق ایچون نه لازم ایسه یاپدی . لکن بو حسن اداره آنجق اؤن سنه قدر دوام ایتدی . ۱۶۷۲ دن صکره محاربات دائمه ، ورسای سراینک انشای مصارفی فوق الحد آرتدیردی . واردات کافی کلدی ودها بر مدت کچنجه قولبرک تداییر حکیمانہ سندن اثر بیلله قالمدی .

قولبر صنایعک ترقیسی تأمین ایتک خصوصنده کی مساعیسنده دها زیاده موفق اولدی . فرانسه ، قولبر سایه نده ، صنعتکار بر مملکت

اولمشد. قولبر دردنجی هازینک باشلامش اولدینی ایثی اکمال ایتدی؛ اولجه موجود اولان قماش، خالی، ایپک صنایعنی توسیع وجام، پورسلن دانستلا، چلیک کبی بستون یکی صنعتلری فرانسه یه ادخال ایلدی. بونک ایچونده پاره ویا امتیازات ویره رک ممالک اجنبیه دن پک چوق صنعتکار و عمله جلب ایتدیردی. اعمالاتخانه لک انشاسی، مواد ابتدائیه نک تدارکی ایچون لازم کلن سرمایه یی بونلره ویردی. چوق عمله قوللانان اعمالاتخانه لک صاحب لرینه مکافاتلر طاغیتدی.

اوزمانه قدر عددی پک آز اولان عمله کوچک آتلیه لرده، عادتاً عائله جه چالیشیرلر ایدی. بو آتلیه لر باقی قالمقله برابر مصارف عظیمه ایله وجوده کلن، بیوک سرمایه لره محتاج اولان واسع اعمالاتخانه لر میدانه چیقدی. بونلرک بعضلری آلتی یدی یوز عمله استخدام ایتمکده ایدی. الحاصل، بیوک صنایع، صنایع جدیده میدانه چیقمنغه باشلامشدی. قولبر یالکزر فرانسه نک ممالک اجنبیه دن هیچ برشی آلاماسیله اکتفا ایتیور، ممالک اجنبیه نک فرانسه دن چوق مال آلملرینی ایسته یور ایدی. بومشتریلری بولمق ایچون فرانسه صنایعی معمولاتنک بتون دنیا معمولاتندن ده کوزل، دهامتین ودها ظریف اولسی لازم کله جکنه قانع ایدی. بوقناعندن طولاییدر، که اعمالاتی حکومتک نظارتی آلتیه قویدی. اعمالاتحقده اوتوزایکی نظامنامه ویوزاللی فرمان تنظیم واصدار ایتدی. مثلاً، هر بر قماشک جنسنه کوره هانکی طول وعرضده اوله جفته، هر بر ایش وارغاجده قاچ ایپک بولنه جفته، قاشلرک صورت تلویته دائر غایت مفصل نظامنامه لر یاپدی. هر بر عمله وفابریقه توری یاپدینی شیئه بر مارقه قویمنغه مجبور طوتدی. اعمالاتخانه مفتشلی نظام خارچنده یاپیلمش، قصورلی برشی بولورلرسه همان مصادره ایدرلر، فابریقه تور

وتاجرك اسملريله برلكده سوقاقده بر ديركده شهر ايلرلر ، بعده ياقارلردى . تكرر وقوعنده فابريقه تور وتاجرلر - ياپدقلى فنا ماللك نمونه لرى بيونلرينه تعليق ايدلمش اولدينى حالد - ايكي ساعت قدر شهر ايديلرلر ايدى .

بو شدتلى تدابير سايه سنده قولبر مقصدينه نائل اولدى . فرانسر صنايعك ظريف اشيا اعمال ايتك خصوصنده كي شهرتى قولبر زمانندن باشلار .

قولبر معمولاتك **صاत्मन्** تسهيل ايچونده چوق چاليشدى . ممالك اجنيهدن كلن اشيايه غايت آغير كمرك رسمى وضع ايتمكه برابر تجارت داخله يي اصلاحه ، تجارت خارجيه وبالحاصه تجارت بحريه يه بيوك بر وسعت ويرمكه دخى غيرت ايتدى .

اوزمان فرانسه ولاياتندن هربرى ديكر بر ولايتدن كلن اشيا دن كمرك رسمى آليردى . اوزان و اكيال ولايتلرده بشقه بشقه ايدى . بو اصول فرانسه يي مستقل قونتلقلره ، دوقه لقلره آيرمش اولان دره بلكل زمانندن قالمشدى . بوندن بشقه يوللر غايت فنا ايدى . قولبر داخلى كمركلرك هېسنى قالديره مدى . فقط منتظم يوللر ، قنالر انشاسنه موفق اولدى .

قولبرك نظرند تجارت بحريه اك كارلى و بناء عليه اهمم بر تجارت ايدى . فرانسلرلى كمى انشاسنه تشويق ايتدى . فرانسه نك كندى معمولات و محصولاتى كندى كيلريله نقل ايتمىنى كافى كورمبور ؛ آسيا و آمريقادن كلن اشيا نك دخى فرانسر كيلريله نقلنى تأمين ايتمك ايسته يوردى . فى الحقيقه هولانداليلر آنجق بو اشيا نك نقلى سايه سنده زنكين اولملاردى . قولبر آمريكا ، هندستان و آفريقايله تجارت ايچون

قومانیالر تاسیسنہ تثبت ایتدی ایسده بوخصوصده موفق اوله مدی .
 یالکزر فرانسز تجارت کمیلرینک عددینی آرتدیردی . مازارن دونمایه
 اهمیت ویرمه مش ، فرانسز حرب کمیلری اون سکزہ اینمش ایدی .
 قولبر وفات ایتدیکی زمان بو دونما ۲۷۶۰ کمیدن مرکب ایدی . بوسایه ده ،
 اون دردنجی لوئی دور سلطنتنک ایلک یکریمی بش سنه سنده فرانسه
 حاکمیت بحریه بی محافظه ایتدی .

قولبر مساعیسنک آنجق بر قسمی مالیه ، صنایع ، تجارت و بحریه
 حصر ایلمش ایدی . عینی زمانده زراعت ، تنظیم قوانین ، ادبیات ،
 علوم و صنایع نفیسه ایله دخی اوغراشدی . مکافات ویرمک و حارالر
 تاسیس ایتمک صورتیله حیوان یتیشدیرمکه تشویق ، بطاقلقلرک قورودلمسنی ،
 دوتلق و باغ یتیشدیرلمسنی تسهیل ایتدی ؛ صولردن واورمانلردن تأمین
 استفاده ایچون - نقاط اساسیه سی الیوم دخی فرانسه ده جاری اولان -
 نظاماتی تنظیم ایلدی . اصول محاکمه ، بحریه و مستملکات امورینه ،
 سائر ایشلره متعلق متعدد قانونلر یاپدی . ریشلیونک تاسیس ایتدیکی
 فرانسه آقاده میسندن بشقه اوله رق محکوکات ، علوم ، موسیقی ، رسم
 و هیکل تراشی ، معماری آقاده میلرینی تاسیس ، کتبخانه عمومیده کی آناری
 تزئید ایتدی . الحاصل ، فرانسه نک علمی ، ادبی ، صناعی مؤسساتندن
 هیچ بری قولبرک نظر تدقیقندن قاجمدی .

قولبرک میدانہ قویدینی اثر پک بیوک اولقله برابر تصوراتنه نسبتله
 تام دکلدی . عطالته تحمل ایده مین ، دائماً چالیشان ، بیک درلوشی ایله
 اوغراشان قولبرک پروژهلری پک واسع ایدی . اون دردنجی لوئینک
 سیاست حر بحویانه سی ، مصارف فوق العاده سی بو پروژهلردن بعضلرینک
 تطبیقنه بیله مانع اولدی . سعی ایله نتیجه نسبتسز ، موفقیتسز لکلر چوق

ایدی . بونکله برابر قولبر کندیسندن صکرده پایدراولان پک چوق اجرا آت نافعده موفق اولمش ، اون دردنجی لوئینک شان وشهرتی هرکسدن زیاده آرتدیرمشدر .

مع مافیه قولبراواخر عمرنده قرال اوزرنده کی نفوذینی غائب ایتمشدی . برچوق دفعه لر وبالخاصه ۱۶۶۶ ده قراله جسورانه مطالعات بیاننه جرأت ایتمش ؛ مصارف فوق الماده سنک ، بی لزوم زینت وسفاهتک تهلکه لرینی کوسترمش ؛ حتی قرالی امور دولتدن زیاده ذوق وصفا ، اکلنجه ایله مشغول اولمسندن طولانی تمییب ایلش ایدی . فقط اون دردنجی لوئی کبر وغرورینی کیتدکجه آرتیزمش اولدیضدن بوکی صادقانه نصیحتلره آرتق اهمیت ویرمیوردی . قولبر سعی تمادی ایله یورولدی ؛ امورمالیه نک کیتدکجه فنالاشدیغنی ، قرالک اسراف وسفاهتی کیتدکجه آرتدیغنی کوردرک مایوس اولدی ؛ نهایت ، وفات ایتدی [۶ ایلول ۱۶۸۳] .

اون دردنجی لوئینک دور سلطنتده امور دینه مهم بر موقع سیاست دینه طوتار : اون دردنجی لوئی پاپالق مقامیله براختلاف چیقاردی وبرخیلی زمان غالیقان کلیساسنک مختاریتی نظریه سنی تعقیب ایتدی . بوکا مقابل قتولیک کلیسائی نامنه ژانسه نیستلری تضییق و(پور روواییال) مناسرتینی تخریب ایتدیردی . الحاصل ، پروتستانلره ظلم ایدرک نانت فرماتی فسخ ایلدی .

اون دردنجی لوئینک مسائل دینه ده کی مسلکی کندیسنک طبعی ، زماننده جاری اولان افکارایله ایضاح ایدیله بیلیر . قرالک قدرت مطلقه سی ، کبر وغروری قرالنی داخلنده وهرهانتکی بر مسئله ده ایسته دیکی کبی اجرای نفوذ ایدمه مکه متحمل دکلدی . بو ، پاپا ایله اختلاف ظهورینه سبب اولدی . قرال کندیسنی یوزنده اللهک تمثالی عد ایتدیکنندن

تبعہ سنک بشقہ بر مذہبہ سالک اولماری قبول ایدہ مزیدی . ژانسه نیستلر
ایله پروتستانلر علیہندہ کی تعقیباتک سببی ده بودر .

اون یدنجی عصرده عموماً قبول ایدیلن فکرہ کورہ هر مملکتده
تبعہ قرالک مذہبی قبولہ مجبور و قرال کندی مذہبی تبعہ سنہ جبراً قبول
ایتدیرمک حقنی حائز ایدی . بو مسلك یالکیز اسباب دینہ دن طولای
دکل ، بعض اسباب سیاسیہ مبنی اتخاذ ایدلمکده ؛ وحدت سیاسیہ ایچون
وحدت دینہ ضروری عد اولمقده ایدی .

وه ستفالیہ معاهداتی آلمانیا ده حکمدارلرک کندی مذہبیرینی تبعہ لرینہ
قبول ایتدیرمک حقنی حائز اولدقلرینی تصدیق و تأیید ایتمش ایدی .
پروتستان انکلتزہ قتولیکلرہ ، قتولیک آلمانیا ایمپراطوری پروتستانلرہ ظلم
ایدیورلردی . دردنجی هازی ، اون اوچنجی لوی ، ریشلیو و مازان
زمانندہ فرانسه نك هر کسی ایستہ دیکی کی اللہ عبادتده سربست براقسی
مستثنا بر حال ایدی .

اون دردنجی لوی نك قتولیک مذہبندن آیرلمش اولانلر حقندہ تعقیب
ایلدیکی مسلك ۱۶۸۱ تاریخندن اعتباراً تبدل ایتدی . دور سلطنتک
ایلک یکریمی سنہ سی ظرفندہ قرالک حیات خصوصیه سی قیل و قالی
موجب اولہ حق درجہ یه وارمش ؛ بالخاصہ مادموازل دو (لاوالیہر
La Valière) ، مادموازل دو (فونتائز Fontanges) ، مادام دو
(مونتسپان Montespan) ایله مناسباتی نظر دقتی جلب ایلشدی .
۱۶۸۱ دن صکرہ مادام دو (منتہون Maintenon) اسمنده غایت دیندار
وذکی برقادین ایله پیدای مناسبات ایتدی . مادام دو (مہنتہون)
کندی تعبیری وجہله « قرالک روحنی و شرفنی قورتارمق » ایستہ یور ،
حیات خصوصیه سندہ کی انتظامسزلقلری ازالہ ایدرک اونی تام برخرستیان

کبی یشاقی آرزوسنده بولنیور ایدی . قرالیچه ماری تهره زک وفاتندن
برقاج آی صکره اون دردنجی لوئی مادام دومه نته نون ایله ازدواج ایتدی؛
غایت متعصب اولدی : کنج لکنده کی کنه لرینی عفو ایتدیرمک ایچون
دیندارلغه قوت ویردی .

۱۶۸۲ ده باشلا یوب اون آلتی سنه دوام ایدن
پایاله مقامی ایله اختلاف سببی اون دردنجی لوئیک حکومتک بتون
اقتسامی اوزرنده بلا قید و شرط اجرای حکم ونفوذ

ایلمسی آرزوسندن نشأت ایتمشدر . سرپسقبوسلر ، پسقبوسلر وسائر
رهبان دولندن معاش ویا تخصیصات آمازلر ، هر بر دائرة روحانیه ده
بولنان املاک وارداتی ایله کچنیرلر ایدی . بر دائرة روحانیه نک اریسی اولان
سرپسقبوس ویا پسقبوس وفات ایتدیکي زمان قرال شهاب و وسط دوائر
روحانیه سنده - ۱۵۱۶ تاریخنده منعقد قونقور داموجنجه - یکی پسقبوسک
تعیننه قدر کچن مدت ظرفنده املاک مذکور هک وارداتی آیردی .
بوندن بشقه پسقبوسلرک منحل اولدینی زمان ظرفنده قرال او دائرة
روحانیه نک باش پاپاسی ، کوی پاپاسی وسائر کبی ایکنجی درجه ده کی
رهبانی تعین ایدردی .

جنوب پسقبوسلقلری داخلنده قرالک نه وارداتی آلق ، نه ده رهبانی
تعین ایتک حق یوق ایدی . اون دردنجی لوئی بومستثنای دخی اورته دن
قالدیر مق وحقنی بتون قراللق داخلنده سویاً استعمال ایتک ایسته دی . جنوب
پسقبوسلرندن بعضلری قرالک یالکیز باشنه کوی راهبکی وسائر کبی
مأموریت روحانیه لره ایسته دیکنی تعین ایلمس نه صلاحیتدار اولدیفنی بیان
ایدرك اعتراض ایتدیلر .

اون دردنجی لوئی هیئت رهبانندن مرکب بر مجلس طویلادی . بومجلس

قرالک سالف الذکر حقندن واز کچمسنی رجایہ قرار ویردی . قرال بعض مساعدتہ بولندی . فقط پاپا بومساعدتی غیر کافی بولدیغندن اون دردنجی لوئی فرانسز ہیئت رهبانی غالیقان کلیسائنک سربستیسنی تصدیق وتأییدہ دعوت ایلدی . غالیقانیزم دنیلن وقرون وسطادہ ظہورایدن نظریہیہ کورہ مختلف مملکتلرک کلیسائی پاپالق مقامنہ قارشی واسع مختاریتہ نائل اولمق اقتضا ایدیوردی . پاپالق مقامنہ حرمتدہ قصور ایدلمور ، فقط بو مقامک فوقدہ بتون عالم عیسویتہ شامل برقتولیک کلیسائی بولندیغنی بیان اولنیور ایدی . ترانت مجلس روحانیسی بو نظریہی رد وتصحیح ایتشدی .

فرانسز ہیئت رهبانندن متشکل مجلس مشہور (بوسوئہ) طرفندن قلمہ آلتوب « درت مادہ بیاننامہسی Déclaration des quatre articles » نامیلہ معروف اولان مواد آتیہی - خیلی تردددن صکرہ - قبول ایتدی : اولاً ، پاپانک حکم ونفوذی امور روحانیہیہ منحصر اولوب قرالر امور جسمانیہیہ ہیچ بر صورتلہ پاپالق مقامنہ تابع دکلدلر . ثانیاً ، مجالس عمومیہ روحانیہ مقرراتنہ پاپالرک تابع اولملری اقتضا ایدر . ثالثاً ، غالیقان کلیسائندہ قبول ایدلمش اولان قواعد ، عادات ونظامات واجب الرعاہیہ در . رابعاً ، مسائل دینیہیہ پاپانک امرنامہلری بتون کلیسائر ایچون واجب الرعاہیہ ایسہدہ بو امرنامہلر بتون کلیسائرک موافقتلری اولمدقہ تعدیل وتغییر اولنہ ماز .

فرانسز ہیئت رهبانی مواد مذکورہی قبول ایتمککہ دائرہ صلاحیتی تجاوز ایتیش اولیوردی . بالخاصہ ایکنجی ودردنچی مادہلرہ آنحق بر مجلس عمومی روحانی قرار ویرہ بیلیر ایدی . فرانسز راہلرینک برقسعی اعتراض ایتمککہ برابر اون دردنجی لوئی مواد اربعہی موقع تطبیقہ قویدی . پاپا دخی بونلرک کاں لمیکن حکمنده اولدیغنی اعلان ایلدی .

اون دردنجی لوئی پسپوس تعین ایتدیکی زمان دایما مواد اربعه‌یی قبول ایتش اولان رهبانی انتخاب ایلور ، پاپا بق مقامی ایسه لازم کلن فرمانی ویرمیور ایدی . پاپانك فرمانی اولمدجه تعین ایدیلن پسپوسلرك دیناً هیچ بر صلاحیتلری اوله مازدی . پاپا اون برنجی اینوسان وفات ایتدیکی زمان [۱۶۸۹] فرانسز پسپوسلردن اوتوز بشنك مأموریت روحانیه‌سی پاپا بق مقامجه تصدیق ایدلمه مشدی . نهایت ، ۱۶۹۳ سنه سنده اون دردنجی لوئی مواد اربعه‌نك تطبیقندن وازچکدی . بوکا مقابل پاپا اون ایکنجی اینوسان قرالک بتون قراللق داخلنده منحل قالان پسپوسلق املاکی وارداتی آلق حقنه مالک اولدیغنی تصدیق ایتدی .

اون دردنجی لوئی پاپا ایله باریشدیغنی وقت ژانسه‌نیستلر ژانسه‌نیستلر
علیه‌نده کی تعقیبات پك چوق زمان اول باشلامش
ونانت فرمانی فسخ ایدیله لی سکز سنه اولمش ایدی .

اون دردنجی لوئی نك چوجقغنی زماننده همان جمله‌سی پارلمنتو اعضاسندن اولان (آنطوان آرنو Antoine Arnaud) ، (نیکول Nicole) ، (لانسله لو Lancelot) ، (آنطوان لومه‌تر A. Lemaître) کبی علم وفضیلتلریله مشهور بعض ذوات پارس قربنده (پورروویال ده‌شان Port-Royal des Champs) مناسترینه چکیله‌رك برلکده یشامغه باشلا- مشلر ایدی . بو منزویلر دعا وچالیشمق ، چیفتجیلک ایتك ، یازمق ودرس ویرمك ایله وقت کچیریورلر ایدی . بیوك شاعر (راسین) بونلرك شا کردلردن ایدی . طرز معیشتلری حسیله هر کسك محبتنی ، حتی دشمنلرینك تقدیراتی قازانمشلر ایدی .

کندیلرینه « ژانسه‌نیست » دنیلوردی . چونکه (ایپر Ypres) پسپوسی (ژانسه‌ن) ك برکتابنده ایضاح ایدیلن بر مذهبی قبول ایتشلر

ایدی . ژانسنہ نك مذهبی ایسہ ہان ہان (قالون) مذهبك عینی ایدی . دیگر طرفدن ژانسنہ نیستلر « غالیقان » ایدیلر ؛ یعنی پاپالرك مجالس عمومیہ روحانیہ مقررانہ تابع اولملری لازم كلہ جكنہ قانع بولنیورلر ایدی .

جزویتلر ، بالطبع ، ژانسنہ نیستلرہ دشمن ایدیلر . بونلرك مراجعتلری اوزرینہ پاپا ژانسنہ نیست مذهبك خرسیتانلغہ مغایر اولدیغنی اعلان ایتدی [۱۶۵۳] . بونك اوزرینہ شدتلی بر مناقشہ باشلادی . اون یدنجی عصر ك اك بیوك داهیلرندن بری اولان (بلہز پاسقال Blaise Pascal) ژانسنہ نیستلری مدافعہ ایتدی . (Provinciales) عنوانیلہ معروف اولوب فرانسیز نثرینك اك مكمل نمونہ لرندن بری عدا ایدیلن مکتوبلری سایہ سنده افكار عمومیہ نی جزویتلر علیہنہ چویردی .

اوصردہ ژانسنہ نیستلر وقتیلہ (فروند) وقایعندہ ذیمدخل اولان بعض کیمسہ لر وازجلہ رومایہ نفی ایدلمش اولان قاروینال دو (رہچ) ایلہ مناسباتہ کیریشمك خطاسنده بولندیلر . بو آندن اعتباراً قرال ژانسنہ نیستلردن شہہ ایتمكہ باشلادی . اوللری قراللق ایچون مضر کوریبور ؛ پروتستانلردن فرقلری اولمادیغنی سویلہ یورایدی . ۱۶۶۰ دە (پرووہ نیسال) نسخہ لری یاقیلدی ؛ منزویلر طاغیلمغہ مجبور اولدیلر . سکنز طقوز سنہ صکرہ بر چوغنی حبس ویان نفی ایدلدی .

مع مافیہ ژانسنہ نیستلرینہ موجود ایدی . ۱۷۰۲ دە جزویتلر یکیدن ایشہ باشلادیلر . پاپا ژانسنہ نیستلری تکرار محکوم ایتدی . اك کنجی ۶۵ باشندہ اولان یکرمی ایکی راہبہ قوہ جبریہ ایلہ (پورروویال) مناسترندن طرد اولندیلر [۱۷۰۹] . ایرتسی کونی مناستر ہدم اولندی ؛ جوارندہ کی مزارلق بیلہ تخریب ایدلدی . جزویتلرك نفوذی

آلنده بولسان اون دردنجی لوئی وفات ایتدیکی زمان ایکی بیک کشی ژانسه نیست اولمق تهمتله حبسخانه ده بولیوردی .

«ژانسه نیزم» ک تأثیر مغنوسی بیو کدر . منزویلرک علم و فضیلتلری هر کسی مقتون ایتشدی . فرانسه قتولیکلری اونلرک تأثیرله اخلاق و طرز معیشتلرینی اصلاح ایتدیلر . هر شیئه رغماً دوام ایدن ژانسه نیزم اون سکرنجی عصرده قراللق علیهنده بر فرقه مخالفه حاله کیردی . اون بشنجی لوئی زمانده ژانسه نیستلره جزویتلر آره سنده تکرار باشلایان مبارزه جزویتلرک مغلوبیتی و فرانسه دن طرد و اخراج اولملری ایله ختام بولدی . ژانسه نیزم اختلال کبیر زمانده دخی کلیسا تشکیلاتنده مهم بر رول اوینادی .

نانت فرمانی حقیقهٔ فرانسه ده کی دین منازعه لرینه خاتمه برنستاندلر چکمشدی . قتولیکلرک پروتستانلر علیهنده کی کین و خصو- متلری سکونت بولمشدی . پروتستانلر قرالک صادق تبعه سی اوله رق ایقاع اغتشاشدن وازچکمشلر ، (فروند) قاریشیق قلقرینه اصلا قاریشما مشلر ایدی . اون دردنجی لوئی پروتستانلرک صداقتندن پک ممنون ایدی و قتولیک ، پروتستان بتون تبعه سنه عینی صورته معامله ایدلمسی لزومی ۱۶۶۶ ده علناً بیان ایتشدی . مع مافیه لوئی بدایت سلطنتندن اعتباراً فرانسه ده موجود اولان بر میلیون ایکی یوزبیک پروتستانی قتولیک مذهبه اعاده ایلکی دوشونیور ؛ فقط بو باده جبر و شدت کوسترلمه مسنی ، نانت فرمانک کندی تعبیری وجهله « آنجق عدالت و آدابک مساعده سی درجه سنده » تطبیق اولمنسی ایسته یوردی . « یالکز قراله عا ند بر حق اولان » لطف و مکافاتنه کلنجه ؛ بونلرک پروتستانلردن تمامیه دریغ اولمنسی طرفداری ایدی .

اون دردنجی لوئینک بو مرانیانہ مسلکی یکر می بش سنہ سورن
 ظلم و اعتسافہ سبب اولدی . نانت فرمانی احکامنک « عدالت و آدابک
 مساعده سی درجه سنده » تطبیقی بهانه سیله پروتستانلر فرمانده صراحة
 ذکر ایدلمش تأمینندن محروم براقیدیلر . مثلاً ، پروتستانلرک اولولرینی
 ایسته دکلری زمان و ایسته دکلری کبی دفن ایده بیله جکلری ، نکاح و وافیز
 مراسمنده قاچ کشی اولورسه اولسون حاضر بولنه بیله جکلری ، هر
 صنعتہ چراق صفیله کیره بیله جکلری . . . الخ صراحة مذکور دکلدی .
 بوکا استناداً پروتستانلردن وفات ایدنلرک مراسم تدفینہ سی صباح ساعت
 آلتیدن آقشام ساعت آلتی یه قدر اولان زمانده اجرا ایدیلہ میه جکنه و جنازه
 مراسمنده اوتوز کشیدن فضله غلبه لک اولہ میه جغه ، وافیز ویا نکاح
 مراسمنده اون کشیدن زیاده پروتستانک اجتماع ایده میه جکنه دائر امر
 نامه لر نشر ایدلدی . نانت فرمانک نشرندن صکره انشا ایدلمش معبدلر ییقلدی ؛
 پروتستان مکتبلرنده قرائت و یازیدن ماعدا درسلرک تدریسی منع اولندی .
 صکره ، دها شدید تدابیرہ صره کلدی . پروتستان چوجقلری یدی
 یاشندن اعتباراً - ابویلری مخالفت دخی ایتمه لر - تبدیل مذهبہ مأذون
 عد ایدلایلر . بوبابده نشر ایدیلن فرمانده « یدی یاشنده انسانک عقل
 سلیم صاحبی اولوب مذهبنی انتخابه صلاحیتدار بولندیغی » بیان اولنمشدی .
 تبدیل مذهب ایدن چوجقلر ایستورسه عائله لرینی ترک ایده بیله جکلر
 و پدر و والده لرندن تخصیصات آله بیله جکلرایدی . بعده ، پروتستانلرک
 سرای خدمتندہ ، دولت مأموریتندہ ، آووقاتلق و طیبیلک کبی حرملکلرده
 استخدام اولنه میه جقلرینه دائر امر نامه لر انتشار ایتدی . پروتستانلرہ
 یالکز تجارت و صنایع براقیلمشدی . اولرده تجارت و صنایعہ آتیلایلر
 وزنکین اولدیلر .

تدابیر شدیده دن ماعدا افساد اخلاقه دخی چالیشلدی . ۱۶۷۶ سنه سنده پروتستان ایکن قتولیک اولان وقعه نویس (پهلیسون Pellisson) ایله اون آلتنجی عصرک اک مشهور پروتستانلرندن برینک حفیده سی بولنان مادام دو (مهنته نون) ک اداره سنده اولمق اوزره بر «تبدیل مذهب صدقی» احداث ایدلدی . برقاچ یوز سفیل، آدم باشنه آلتی فرانق آلمق ایچون تبدیل مذهب ایتدیلر . تبدیل مذهب ایدنلر ویرکودن معاف طوتولدیلر . بونک اوزرینه براز موفقیت کوزلدی . فقط پروتستانلرک کتله اصلیه سی مذهب لرینه صادقانه مربوط ایدی . (بوسوئه) باشده اولدینی حالد قتولیک هیئت رهبانندن بر قسمک مساعیسی (تورهن) کبی بر قاچ مشهور ذاتک تبدیل مذهب ایلمسنی تأمین ایتمکه برابر نتیجه سز قالدی .

۱۶۸۰ ده (پوواتو) ولایتده تبدیل مذهبی تسریع ایتک ایچون پروتستانلرک اقامتگاه لرینه دراغون عسکرلری یرلشیدیلدی . او زمان اردویه داخل اولان نفرات اکثریتله عوام ناسک اک فنا و اخلاق سز قسمی ایدی . دراغونلر اقامت ایتدک لری خانه لری تخریب ، مال صاحب لرینی تضییق و تحقیر ایدیورلر ایدی . بوبلایه دوچار اولانلر همان تبدیل مذهبه راضی اولیورلردی . (دراغوناد Dragonades) دنیلن بو اصول پروتستانلرک بولندینی بتون ولایاته تشمیل ایدلدی . عسکرلردن او درجه قورقولمش ایدی ، که پروتستانلرک خانه لرنده اسکان ایچون دراغونلرک یوله چیقدفلری خبر آلنیر آلیناز بعض کویلرده ، حتی شهرلرده بتون اهالینک همان تبدیل مذهب ایتدک لری کورلدی . یالکز بر ولایتده ایکی هفته ده ۶۰،۰۰۰ پروتستان قتولیک اولمشدی .

بر مدت صکره اون دردنجی لوئی فرانسه ده آرتق پروتستان قالمدیغنه

قانع اولہرق نانت فرمانی فسخ ایتدی [۱۸ تشرین اول ۱۶۸۵] .
 بتون معبدلر ہدم ایدیلہ جکدی . پروتستان رؤسای روحانیہ سی اون بش
 کون ظرفندہ فرانسدن چیقوب کیدہ جکلر ، عکس تقدیردہ کورک
 جزاسنہ محکوم اولہ جقلرایدی . هنوز قتولیک اولیان پروتستانلر راحتسنر
 ایدیلیہ جک ؛ فقط ہجرتہ تشبث ایدرلرسہ کورک جزاسنہ محکوم اولہ جقلر ،
 چو جقلری دہ قتولیک مذہبی موجنبجہ تربیہ اولنہ جق ایدی .
 فرمانک فسخی ہان بتون ملت طرفندن شوق وسرورایلہ آلفیشلانیدی .
 ہیئت رہبان ذاتاً چوق زماندن بری سربستی وجدان علیہندہ ایدی .
 (بوسوئہ) ، (راسین) ، (لاروئیہر) ، (لافونتن) کبی او عصرک
 اک یوکسک ذاتی دخی عینی فکردہ ایدی . مادام دو (سہوینہ)
 پروتستانلرہ یابیلاں مظالمی : « شمیدیہ قدر تصور واجرا ایدلمش شیلرک
 اک بیوکی واک کوزلی ، دیہ تعریف ایدیور . یالکز ایکی کشی ، (سن
 سیمون) ایلہ (ووبان) ، حریت وجدان علیہنہ ارتکاب ایدیلن بوجناتی
 تقییح ونتایجنک پک مشئوم اولہ جغنی ادراک ایتدیلر . (ووبان) شویلہ
 دیمشدی : « قرالر تبعہ لرینک جان وماللرینہ صاحبدرلر ، فقط فکریلرینہ
 حکم ایدہ مزلر ؛ چونکہ درونی حسیات حکمدارلرک قدرت وقوتی
 خارجندہ در . » اون دردنجی لوئی فردای فسخدہ بوسوزلرک طوغری
 اولدیغنی آکلادی .

پروتستانلرک قسم اعظمی دراغونلرک ظلمندن قورتولمق ایچون
 تبدیل مذہب ایتمش وفورطنہنک کچہ جکی وحریت دینیہ دورینک عودت
 ایدہ جکی امید خفینسی بسلمکدہ بولنمش ایدی . فرمانک فسخی بوامیدی
 ازالہ ایتدیکی زمان برچوق پروتستانلر شایان تقدیر برجسارت کوستردیلر .
 تبدیل مذہبک جبری اولدیغنی بیان ایدرک دینلرینہ صادق قالدقلرینی

اعلان ایتدیلر . بونک اوزرینه ظلم واعتساف وحشیانه بر شکل آلدی .
 قرال صوک شدتک کوسترلمسنی امر ایتدی ؛ « دراغوناد » تکرار
 باشلادی . خسته لقلری زماننده قتولیک راهبرینک حالت احتضارده
 بولنانلره اجرا ایتدکلی آیین دینی رد ایدن پروتستانلردن اکتساب
 عافیت ایدنلر کورکه کوندرلدی . فرانسه یه عودت ایدن پروتستان
 رؤسای روحانیه سی ایله بونلرک وعظملرنده حاضر بولنانلر اعدام اولندیلر .
 پروتستانلر ایچون فرانسه ده یشامق غیر ممکن برحاله کلکشدی . ممالک
 اجنبیه قاجقدن باشقه بر چاره قالمامشدی . فقط هجرت ایتک بدایه
 کورک و ۱۶۸۷ دن اعتباراً اعدام جزاسنی مستلزم بر جنایت ایدی .
 پروتستانلری هیچ بر مانعه توقیف ایده مدی . حدود وسواحلك صیق
 بر نظارت آلتنده بولندیرلمسره رغماً بیکلرجه پروتستانلر فرانسه دن چیقوب
 کیتدیلر . اوچ یوز بیک واحتمال که ده اچوق پروتستان دینلرینی
 قورتارمق ایچون ثروتلرندن ، مسکنلرندن ، وطنلرندن واز کچدیلر ؛
 حریتلرینی ، حیاتلرینی تهله کیه قویدیلر . بو قدر فداکارلی اختیار
 ایدن ، بو قدر متانت صاحبی اولان کیمسه لر شهه سز ملتک کزیده
 آدملری ایدیلر . اونلرک هجرتیله فرانسه چوق ضرر ایتدی . (ووبان)
 فرمانک فسخندن طولایی قراللفک غائب ایتدیکی کزیده عسکری ۹,۰۰۰
 کیچی ، ۶۰۰ ضابط و ۱۲,۰۰۰ نفر اوله رق تخمین ایدیور . مهاجرلر
 کندیلرینی قبول ایدن مملکتلرده ، انکلترده ، هولانداده ، بالخاصه براندبورغده
 بر عنصر فعالیت وقوت اولدیلر . یالکیز براندبورغه یکریمی بیک فرانسه
 کیتمشدر . پروسیه قراللفک پایتخت مستقبل اولان برلین شهری عادتاً فرانسه
 ملتجیلری طرفندن تأسیس ایدیلرجه سنه اکتساب معموریت ایتدی . بو
 کون پروسیه اردوسی ضابطانی میاننده بو پروتستانلرک احفادی خیلی چوقدر .

بوکا مقابل فرانسه نك بعض طرفلى، (سنتونژ Saintonge)، (پواتو)، (تورن)، (ليونه) ولايتلى قسماً خراب و برچوق صنايع خللدار اولدى . يالكز ايلك ايكي ولايتدن يوزبيك پروتستان هجرت ايتمشدى . نتايج اقتصاديه منضم اولان نتايج سياسيه دخى فرانسه ايچون فلاكتى موجب اولدى . نانت فرمانك فسخى آوروپاده بولنان پروتستان دولترك فرانسه عليه كين و خصومت بسله مه لرينه سبب اولدقن ماعدا اون دردنجى لوتى عليه تشكىل ايدن اتفاق دولترك اك مدهشى اولان « آئوغبورغ اتفاقى » نى توليد ايتدى .

بتون بومظالمه رغماً پروتستانلى فرانسه دن صورت قطيعه ده ازاله ايديله مدى؛ آلپ طرفلرنده، بالخاصه (سه و ه ن) جهتلرنده دوام ايتدى . اوراده، ۱۷۰۳ سنه سنده، اسپانيا وراثى محاربه سنك ابتدا سنده قالوينيست كويلير عصيان ايلدiler . بربرلىنى طاميق ايچون لباسلى اوزرينه بر بياض كوملك كيدكلى ايچون بويلره (قاميزارلر Camisards) دنيلمشدر . (زان قاواليه Jean Cavalier) اسمنده بر فرونجى چراغك اداره سنده بولنان عصيان ايكي سنه سوردى . (قاواليه) ميرالايلى رتبه سيله اطماع اولنه رق ترك سلاح وعرض اطاعت ايتديكى كونه قدر عاصيلر مقاومت كوسترديلر . بو عصيانى ازاله ايتك ايچون قرال پك چوق عسكر طويلامغه مجبور اولدى . بونقطه نظر دن قاميزارلر فرانسه نك دشمنلرينه خدمت ايتمشلردر .

اوروپانك الكيوك واك قوتلى حكمدارى اولق
سياست خارجه و محاربات ادعاسنده بولنان اون دردنجى لوتينك ۷۲

سنه لك دور سلطنتك ۴۶ سنه سى محاربات ايله كچمشدر . نيابت حكومت ومازارنك باش وكالتى زماننده آوستريا واسپانيا هابسبورغلرينه قارشى وقوعه كلوب اون اوچنجى لوتى دورنده باشلامش اولان و (مونستر)

و (پیره نه) معاهده لریله فرانسه یه (آلساس) ، (آرتووا) و (روسیون) قطعه لرینی قازانديران محاربه لراستنا ایدیلیرسه اون دردنچی لوئیک حکومت شخصی سی زمانه عايد محاربات تقریباً اوتوز سنه سورمش اولور . محاربات مذکوره درده آریلیر : نقل وراثت محاربه سی La guerre de Dévolution [۱۶۶۷-۱۶۶۸] ؛ هولاندا محاربه سی [۱۶۷۲-۱۶۷۸] آئوگسبورغ اتفاقی محاربه سی [۱۶۸۸-۱۶۹۷] ؛ اسپانیا وراثتی محاربه سی [۱۷۰۱-۱۷۱۴] .

ایلك ایکی محاربه دوره سنده فرانسه بتون آوروپاده تفوق ایتدی و مهم اراضی الحاقیله بیودی . صوك ایکی محاربه دوره سنده ایسه آوروپا دولتلری اون دردنچی لوئیک هکمونیا سنه نهایت ویرمک ایچون کندی آرهلرنده اتفاق ایتدیله ؛ نتیجه ده فرانسه مغلوب اولدی . هرايکی دوره ده دولتلر آرهلرنده منازع فیه اولان مسئله - اساس اعتباریله - عینیدر . بوده اسپانیا وراثتی مسئله سیدر .

دردنچی حرب مستتنا اولمق اوزره اون دردنچی لوئیک بالجمله محارباتنده تعقیب ایدیلن غایه « فرانسه یی اسکی غالیانک حدودینه ارجاع ایتمک » سیاستدر . فرانسه قرالی و قتیله فرانسه یه عايد ایکن آیرلمش اولان بتون ولایتلری ، اهالیسی فرانسر عرقه منسوب و فرانسر لسانیه متکلم اولدیغی حالده اجنبی پرنسلرک اداره سنده قالان بتون مملکتلری الحاق ایتمک ، تعبیر مخصوصی ایله « حدود طبعیه یی الیه ایدرک فرانسه نك وحدت سیاسیه سنی اکمال ایتمک » ایسته یوردی .

بو تصورک موقع تطبیقه وضعی ایچون په یی با ، فرانش قونته ، لورن ، صاووا قطعه لرینی ضبط ایتمک ایجاب ایدیوردی . بوکونکی بلجیقا ولوکسمبورگدن عبارت اولان په یی با و فرانش قونته اسپانیا قرالنه

تابع ایدی . اون دردنجی لوئی بو مملکتلری قوهٔ عسکریه ایلہ دکل ، بلکه زوجہ سی ماری تہرہ زک اسپانیا قرالی دردنجی فیلیپ بیوک قیزی واسپانیا تاجنک وارث مشروعی اولسنہ استناداً آلمق املندہ ایدی . لورہن و صاووایہ کلنجہ ؛ بوقطعہ لک صاحبزینہ اسپانیا میراندن نائل اولدینی بعض زنکین و کوزل پارچہ لری ترک ایدرک اونلری مبادلہ صورتیلہ فرانسیہ الحاق ایتمک تصورندہ ایدی . شو حالہ اسپانیا وراثی اون دردنجی لوئی سیاست خارجہ سنک محوری اولمش اولور .

اون دردنجی لوئی قسماً نائل امل اولہ بیلدی . دردنجی فیلیپ ایکنجی قیزی (مارگریت تہرہ ز) ک زوجی اولمسندن طولانی لوئینک باجناغی اولان آلمانیا ایمپراطوری برنجی لئوبولد فرانسیہ قرالہ رقیب ایدی . پھیلی بای آلدینی تقدیردہ فرانسنک پک زیادہ کسب قوت ایدہ جکندن قورقان هولاندالیرلہ انکلیزلر اون دردنجی لوئینک تصوراتہ بتون قوتلریلہ مخالفت ایتدیلر . هولاندا و آئوگسبورغ اتفاقی محاربه لرینک سببی بودر . اون دردنجی لوئی اسپانیا ایلہ اوچ دفعہ حرب ایتدکدن صوکرہ فلاندرک بر قسمی و فرانش قونتهی الحاق ایتدی . بوکا مقابل دورہ سلطنتک صوکلرنده توسیع حدود آرزوسندن واز کچہرک و دائماً مغلوب ایتمش اولدینی اسپانیا ایلہ حرب ایدرک حفیدلرندن بریخی ، دوق فیلیپ دائیرونی (بشنجی فیلیپ) عنوانیلہ اسپانیا تختہ اجلاس ایتدی و اونی اورادہ طوتہ بیلیمک ایچون اون اوچ سنہ سورن برحربہ کیریشدی ؛ فرانسنک بتون منابعی توکندی .

اون دردنجی لوئی امور خارجہ پی بالذات اداره ایدردی . سفرایہ کوندریلن محرراتی کوزدن کچیرر ؛ کندی ایلہ حاشیلر یازار ، جوابلرک خلاصہ لرینی ترتیب ایدردی . دائماً فعالیت واکثریا مهارت ایلہ اداره

ایتدیکسی سیاست خارجیہ تمامیلہ ناموسکارانہ دکلدی. مثلاً ، انکلترة قرالی
ایکنجی شارلہ خفیاً پاره ویردیکسی خالدہ شارل علیهنده کی رؤسای مخالفینہ
دخی نقداً معاونت ایلردی. فرانسه قرالنک اک ماهر دیپلوماتلری (لیون)
ایله (پومپون) ایدی. اک کزیده جنراللری دخی (قونده) ، (تورهن) ،
مارشال دو (لوکسمبورغ) ، دوق دو (واندوم) ، (ویلار) ایدی .
اون دردنچی لوئی محارباتنک جملہ سی عینی اوصاف ممیزہ بی حائزدر .
نقل وراثت حربی مستتنا اولمق اوزره هپسی اوزون سوردی ؛
هپسی محاصره محارباتی اولدی . (تورهن) و (ویلار) مستتنا اولمق
اوزره اوزمان هیچ کیمسه حربک غایه سی دشمن اردولرینی محو ایتمک
اولدیغنه قانع دکلدی . اون دردنچی لوئی ایله معاصرلری نظرندہ
حرب اصولی دائرہ سنده وتدریجی صورتده فتح ممالکدن ، عادتاً دشمن
اراضیسنی ، قلعه لرینی خطوه بخطوه ضبط ایتمکدن عبارتدی. کذرکاھده
بولسان قلعه لر برز برر محاصره وضبط ایدلمدکجه ایلری به کیدلزدی .
بوندن طولای اوں دردنچی لوئی محارباتنده یوزلرجه محاصره لر موجوددر .
محاصره حربی بالطبع اردولرک تشکیلاتجه تبدیلی دخی موجب اولدی .

اون دردنچی لوئی ۱۶۶۱ ده دولتی بالذات اداره به باشلادی

اسیایا وراثتی زمان اوروپانک بتون رجال سیاسیہ سی شارل کنک ارکک
اولاد جهتندن نسلنک قریباً منقرض اولسنه انتظار ایدیورلر ایدی .
دردنچی فیلیپک ایکنجی زوجہ سندن اوغلی اولان ایکنجی شارل اودرجه
ضعیف و خسته لقی ایدی، که یشامسنه احتمال ویرلیور ایدی . حقیقت
خالدہ ایسه شارل قرق بریاشنده وفات ایتدی .


اونک میراثنه ایکی کشی ادعای حق ایدہ بیلرہ ی: ایکسی ده دردنچی
فیلیپک دامادی وعینی زمانده قرداش چوجقلری اولان فرانسه قرالی

لوئی ایلہ آلمانیایمپراطوری لٹوپولد . فقط اون دردنجی لوئیک والدہسی (آن دوتریش) وزوجہسی (ماری تہرز) ک ایکسی دہ اسپانیا قرالارینک بیوک قیزلری ایدیلر . لٹوپولدک والدہ وزوجہسی ایسہ کوچک قیزلری ایدیلر . بناء علیہ اون دردنجی لوئیک حق لٹوپولدک حقندن دہا قوتلی ایدی [*] .

واقعا ماری تہرز ۱۶۵۹ دہ لوئی ایلہ ازدواج ایدہ جکی زمان حق وراثتدن واز کچمکہ مجبور ایدلمشدی . فقط بوفراغت - دردنجی فیلیک اعترافی وجملہ - کاں لم یکن حکمنده ایدی . فی الحقیقہ فیلیپ فراغت حقوق حقندہ کی وثیقہ یی او قودینی زمان : « بو بر چوجقلقدر . اگر ولی عہد [ایکنجی شارل] بولنمازسہ قیزم وارث سلطنت اولہ جقدر . » دیمشدی . فی الحقیقہ حق وراثتدن واز کچمک اسپانیانک وراثت قانونہ مغایر ایدی ؛ قرالک آرزوسی بوبادہ کی قواعد اساسیہ یی تعدیلہ کافی [۱] اون دردنجی لوئی ایلہ لٹوپولدک قرابتلرینی کوسترن واسپانیا تحتہ ادعای حق ایللری اسبابی ایضاح ایدن جدول :

اسپانیا قرالی اوچنجی فیلیپ

[۱۵۹۸ — ۱۶۲۱]



دکلی . دیگر طرفدن پیره نه معاهده سنده فراغت حقوقک اسپانیانک (قورتس) مجلسلرنجه تصدیق ایدیله چی صراحتاً مذکور اولدینی حالده مسئله بوجلسلره عرض ایدلمه مشدی . بوندن بشقه فراغتیه مقابل ۵۰۰,۰۰۰ آلتون جهاز ویرلسی مقرر ایکن دردنجی فیلیپ بونی ده تأدیه ایتمه مشدی . اسپانیا میراثی پک جسم ویکرمی ایکی تاجدن مرکب دی : اوروپاده اسپانیا، باله آر، ساردنیا، سیچلیا، ناپولی ، میلان ، فرانیش قونته، پینی با حکومتری؛ اوروپا خارچنده پورو ومکسیقا معدنلریله برلکده آمریقانک نصفی، اوکیانوسیانک بر بیوک قسمی، آفریقا مستملکاتی .

اون دردنجی لوئی بومملکتلرک جمله سنی کندیسی ایچون آلمق ایسته . میوردی . «فرانسز ولایتی» دیدیکی مملکتلری ، برده لورده و صاواو ایله مبادله ایتک اوزره ایتالیا ده بعضرلری آلمق، قسم متباقیسنی، یعنی اسپانیا ومستملکاتی باجانغی لئوپولده ترک ایتک املنده ایدی . دردنجی فیلیپک وفاتی متعاقب ، ۱۶۶۵ ده اسپانیا میراثنک بو صورتله آرله رنده تقسیم ایدلسنی ایمراطوره تکلیف ایتدی . فقط لئوپولده غایت خیالی ، مترده ، متلون بر آدم ایدی . ایکی سنه دوشوندکن صکره اون دردنجی لوئینک تکلیفی قبول وایکنجی شارلک وفاتیه کنیدلرینه قالدیه حق میراثک تقسیمی ایچون ۱۹ کانون ثانی ۱۶۶۸ تاریخنده بر معاهده امضا ایتدی .

حال بوکه اوتاریخده اون دردنجی لوئی حربیه باشلایه لی

ایچه زمان اولمش ، میراثک بر جزئی اولان فلاندری «نقل وراثت حقنه» استناداً قسماً ضبط ایتمشدی .

نقل وراثت
محاسبه سی

نقل وراثت حق (برابان) قطعه سنده جاری بر تعامل ایدی . بو تعامل موجبجه - ماری تهرز کی - ایلک زوجه دن طوغان اولاد پدر و والد لرینک یکانه وارثی اولورلر ؛ - اسپانیا قرالی ایکنجی شارل کی - ایکنجی

زوجہ دن طوغان چو جقلر میراندن محروم قالیرلرایدی . ۱۶۶۷ ده (تورهن)ك قومانداسنده بولتان ۶۰,۰۰۰ كشیك بر فرانسز اردوسی اعلان حرب ایدلمه دن فلاندره کیرمش ، (لیل) داخل اولمق اوزره بتون فلامان قلعه لرینی ضبط ایتمشدی .

اون دردنجی لوئی فلاندری ضبط ایتدکدن صوکره ده ایلری به کیتیمیه رك - ایکنجی شارلك صغرسندن طولانی نائبه حکومت اولان - اسپانیا قرالیچه سندن فلاندرك ترکینی طلب ایتدی . قرالیچه جواب ویرمدی . اسپانیایی قبوله مجبور ایتك ایچون قوندهك قومانداسنده بر بفرانسز اردوسی (فرانش قونته) به داخل اوله رق اون درت کونده بوقطعه بی اشغال ایتدی [شباط ۱۶۶۸] .

فلاندرك سرعتله ضبطی هولاندا وانکلتیره بی قورقوتدی . پك بیوك فدا کارلقلرله استحصال ایده بیلمش اولدقلری استقلاللرینك خللدار اولمسندن قورقان هولاندایلر فرانسه کبی قوتلی بردولتك په بی بایی آله رق کندیلرینه قومشواولمسنی ایسته میورلرایدی . حال بوکه کندیلری اوقطعه بی ضبط ایتك آرزوسنده ایدیلر . په بی با فرانسهك اولورسه تهلکه لی کوردکلری فرانسز قومشولغنی په بی با کندی اللرنده بولندیغی تقدیرده - بالعکس - فائده لی عد ایلورلرایدی . انکلیزلره کلنجه ؛ اولر - یوزسنه مجار به سنده قبول ایتدکلری ، انقلاب کیر وناپولئون زماننده دخی قبول ایده میه جکلری کبی - ۱۶۶۸ ده دخی (اسقو) نه ری منصبنده فرانسزلرك یرلشمیرینه قطعاً معارض ایدیلر .

هولاندایلر ایله انکلیزلر اتفاق ایتدیلر . بعده ، پاره ایله اطماع ایتدکلری اسوجك معاونتنی تأمین و « لاهی اتفاق مثلثی » تأسیس ایدیلر [کانون ثانی ۱۶۶۸] . بواتفاق مثلث بوندن صکره فرانسه علیهنده تشکل

ایده جک اتفاقلرک برنجیسیدر. فرانسه نك قوتلی بردولت صفیله قومشولرینی قورقوتدینی و بناء علیه اوروپاده تشکل ایده بیله جک اتفاقلره قارشى طورمغه حاضر لائمی ایجاب ایتدیكى آ کلاشیلور ایدی . دیگر طرفدن آنجق یوزسنه لك بر حیات استقلاله مالک اولان هولاندانك - وقیله ونديك جمهوریتی کبی - فعالیت تجاریه سی سایه سنده و مملکتك کوچککنه رغماً اوروپا دول معظمه سی میانسه داخل اولدینی کوریلور ایدی .

متفقلرک ظاهری مقصدلری فرانسه واسپانیاه توسط تکلیفنده بولنق ایدی؛ فقط امل خفیلری اون دردنجی لوئی پی اسپانیا میراندن وازچمکه اجبار و پهنی بایى ضبطدن منع ایلک ایدی .

مع مافیه صلح متوسطلرک خارچنده عقد ایدلدى . هولاندالیرک همان فرانسه یه اعلان خصومت ایتدکلرندن طولایى حدتلتن واونلردن انتقام آلمق ایسته ین اسپانیا نائبه حکومتی طوغریدن طوغری به اون دردنجی لوئی ایله مذاکره یه کیریشدی ؛ فرانش قونته ویا فلاندر قطعه لرندن برینی ترک ایتک مجبورتی قارشیسنده بولندیغندن فلاندری بر اقدی . متوسطلر اکس لاشاپل معاهده سیله بونی تصدیقه مجبور اولدیلر [۲ مایس ۱۶۶۸] . فرانسه قرالی (دوئه) و (لیل) داخل اولمق اوزره اون بر فلامان قلعه سیله ایوم شمال ده پارتمانتی تشکیل ایدن اراضی پی الحاق ایتدی .

هولاندالیرک مداخله سی اون دردنجی لوئی پی حدتلند . هولاندالیرک سی یرمشدی . قرال اونلرله همان حرب به باشلامق ایسته یوردی . لوئی (لاهی) اتفاقک مواد خفیه سنه واقف اولدینی و بوندن بشقه هولاندالیرک اکس لاشاپل معاهده سنك محافظه احکامی ایچون انکلتزه واسوج ایله دائمی بر اتفاق عقد ایتدکلرینی خبر آلدینی زمان پهنی بایى اشغال ایتک

ایچون اول باول هولاندائی محو ایتک لازم کلدیکنہ قانع اولدی . ذاتاً
 قالوینست وجمهوریت طرفدارى اولان هولاندالیرى اوتهدن برى سوميور؛
 « پینر تاجرلرینک » حکومتدن نفرت ایدیور ایدی . هولاندالیر یکر می
 سنه اول (مونستر) معاهده سنده فرانسه یی ترک ایدرک اسپانیا حربنک
 اوزون مدت دوامنه سبب اولدقلى ایچون بتون فرانسرلر قراک
 افکار وحسیاتنه اشتراک ایتمکده ایدیلر . (قولبر) فرانسر امتعه سنه پک
 آغیر کمرک رسمی وضع ایتمش اولان هولاندانک ازیلمسنى آرزو ایدیور
 و : « کمرک مانعه لرینى طوپ مر میلرله قیرمیلدر » دیوردی .

اون دردنجی لوئی حربه باشلامازدن اول هولاندائی متفقلربدن
 آیره رق یالکز براقق ، اوکا قارشى هر طرفده رقیب بولمق ایستهدی .
 بوبابده کی مذاکرات اوچ سنه سوردی وهولاندا ثروتنک سبب اولدینى
 حسد عمومى فرانسه قرائنک نهایت نائل امل اولمسنى تأمین ایتدی . اون
 دردنجی لوئی (دوور) معاهده سیله انکلتزنه ک، هولاندالیرک ویردکلری
 پاره دن ۲۰۰,۰۰۰ آلتون فضله ویرمک صورتیله اسوجیلیرک ، قولونیا
 الکتوری ایله رن کنارنده کی آلمان پرنسلرک اتفاقنى تأمین ایتدی ؛ حتی
 وکلاسندن برینک « تجره سنى قایناتمق ایچون » لازم کلن پاره دن محروم
 اولدینى سویلدیکی ایمپراطور لئوپولدک بیطرفلغنى دخی صاتون آلدی .

اون دردنجی لوئی بوصورتله حربه حاضرلاندینى صرهده هولاندالیر
 مملکتلرینک اسباب مدافعه سنى تأمین ایتکی بیله دوشونمورلردی .
 صرف منافع تجاریه لرله مشغول اولوب دائمی براردو ایچون صرف ایدیلن
 پاره یه هبا اولمش نظریله باقیورلرایدی . بوندن طولانی قوه عسکریه لری
 پک اهمیتسز ایدی . تهلکه یی آکلایان رئیس جمهور (ژان دو ویت
 Jean de Witt) ک مساعدینه رغماً مجلس عمومى عسکر جعنه بر درلو

قرار ویره میوردی . تجارت حرصی اودرجه ده ایدی، که اعلان حربدن بر قاچ کون اول ایالات متحده داخلنده بولسان باروتلر اون دردنجی لوئینک مأمورلرینه ساتیلمش ایدی . هولاندایلر هیچ امید ایتدکلری زمانده حرب قارشیسنده بولندیلر .

۱۶۷۲ مایسند . اون دردنجی لوئی تورهن وقونده نك قومانداسنده کی ۱۲۰,۰۰۰ کشی ایله بالذات هولاندایه کیتدی ؛ ون نهرندن کچدی . باشلیجه « اقلوز » لرك بولندیغی (موئیدن Muyden) قلعه سی درحال ضبط ایدلمش اولسه هولاندانك استیلاسی ا کمال ایدلمش اوله جقدی . فقط اون دردنجی لوئی بو فرصتی فوت ایتدی وهولاندایلرک بیوک بر قهرمانلق وفداکارلق ایله مملکتلرینی قورتارملرینه میدان براقدی .

هولاندا اراضیسینک بر بیوک قسمی سطح بچردن آشاغی اولدیغی ایچون دکزک استیلاسندن آنجق بر طاقم سدلر، اقلوزلر ایله قورتارلمشدی . هولاندایلر اقلوزلری آچدیلر، سدلری ییقدیلر ، عصرلرجه زماندنبری دوام ایدن مساعی سایه سنده دکزدن خطوه بخطوه ضبط ایتمش اولدقلری مملکتلرینی استقلاللرینی محافظه ایچون بحر محیطه تسلیم ایتدیلر . درت کونده هولاندا صو آلتنده قالدی ؛ شهرلر دکز اورتیه سنده برر آطه اولدی . فرانسزلر صویه غرق اولان مملت کنارنده توقف ایتدیلر .

مع مافیه هولاندایلر بر مقدار اراضی ترکی وتضمینات اعطاسی مقابلنده صلح ایسته دیلر . فرانسزلر دها چوق مطالبانده بولندقلرندن نهایت الامر صوکنه قدر حربه قرار ویردیلر . فلا کندن بغير حق مسئول طوتیلان (ژان دوویت) قتل ایدلدی ؛ کیوم دورانثر رئیس جمهور اوله رق اردونك باشه کچدی . هنوز یکریمی یکی یاشنده بولنان بوباش قوماندان جسور بر عسکر، ماهر بر دیپلومات ایدی . حیاتنک صوکنه قدر اون

دردنجی لوئیک مدھش بر رقیبی اولدی و فرانسه علیہ تشکل ایدن اتفاقلرک دائما باشنه کجدی .

فرانسز اردوسنک بردن برہ توقفی دولتر آرمسندہ کی اتفاقلری تبدیل ایتدی . اون دردنجی لوئیہ معاونت وعدایتمش اولانلرکندیسنی ترک ایلدیلر . براندبورغ الکتوری ، آلمانیا ایمپراطوری واسپانیا قرالی هولاندای التزام ایتمکک باشلادیلر . لاهیدہ بر اتفاق دولی عقدایدلکیندن هولاندا محاربہ سی بر آوروپا محاربہ سی حالنی آلدی .

بونک اوزرینہ اون دردنجی لوئی هولاندای تخریب ایتک فکرندن واز کچہرک اسپانیا علیہ دوندی . فرانش قونته یی ایکنجی دفعہ ضبط ایتدی ؛ پھی با قلعہ لرینی برر برر محاصرہ و ضبطہ باشلادی . آلمانیا ایمپراطورینہ قارشى تدافعی بر وضعیت آلدی . ۱۶۷۴ - ۷۵ قیش موسمندہ تورن - شہرتنہ سبب اولان - ماہرانہ حرکات عسکریہ سیلہ بتون آلساسی اشغالہ موفق اولدی . فقط کنیدیسی دہ بر محاربہ دہ وفات ایتدی [تموز ۱۶۷۵] .

دیگر طرفدن اسپانیایہ عائد اولان سیچلیا آطہ سی جوارندہ هولاندایلر ایلہ فرانسزلر آرمسندہ اوچ درت محاربہ بحریہ وقوعہ کلہرک غلبہ فرانسزلردہ قالدی .

حرب بش سنہ دوام ایتدیکی حالده متفقلر غلبہ قطعہ یہ نائل اولہ مدقدن ماعدا یورغون دوشدیلر . نہایت (نیمہ غ) مصالحہ سی عقد ایلدی [۱۶۷۸] . هولاندا هیچ بر شی غائب ایتدی ، بالعکس فرانسه ایلہ بر تجارت معاہدہ سی عقدینہ موفق اولدی . اسپانیا فرانش قونته یی ، فلاندر قطعہ سندہ کی اون ایکی قلعہ یی [والانسین ، موبوژ ، قامبرہ ، ... الخ] فرانسیہ ترک ایتدی . بصورتلہ فرانسنہ نک شمال

حدودی منتظم برشکه قوندی؛ (ووبان) طرفدن انشاایدیلن استحکامات ایله تقویه وترصین اولندی .

نیمهغ مصالحهسی اون دردنجی لوئینک مرتبه قصوای اقباله واصل اولدیغنی کوسترر . بوندن صکره « بیوک لوئی » عنوانیه یاد ایدلدی و ۱۶۷۸ دن ۱۶۸۸ تاریخه قدر اون سنه غربی آوروپایه ایسته‌دیکی کبی حکم ایتدی . کبر و غروری کیتدکجه آرتدیغندن وقت صاحده برحق مملکتلری الحاق ایده‌جک درجه‌ده جرأت کوستردی .

وہستفایه ونیمهغ معاهده‌لرنده فرانسیه ترک‌ایدیلن قطع‌لرک ملحق‌تایله برلکده تسلیم ایدیله‌جکی محرر ایدی . ملحق‌تدن مقصد ، شبه‌سز ، معاهداتک عقدی تاریخنده مذکور قطع‌لره عائد اولان یرلر ایدی . اون دردنجی لوئی بونی بشقه درلو آکلامق ایسته‌دی و اخیراً الحاق ایدیلن قطع‌لره وقیله ، غیرمعین بر تاریخده هانکی یرلرک ملحق اولدیغنی تدقیق ایچون « Chambres de réunion » نامیله معروف محکمه‌لر تأسیس ایتدی . (میچ) ، (به‌زانسون) و (بریساخ) ده تشکل ایدن بو محکمه‌لر مه‌رووه نژییه‌نلر زمانه ، فرائق قرالی داغور دورینه قدر چیق‌دیلر ! (مون‌به‌لیار) ، (سار) شهرلرنی ، (دوپون Deux Ponts) ی ، لوکسمبورگک قسم اعظمی اون دردنجی لوئییه ویردیلر . بویرلرک برقمی اون دردنجی لوئینک متفق‌لری اولان اسوج قرالی ایله تره و پسقوسنه ، برقمی اسپانیا قرالنه عائد ایدی . فرانسه قرالی بو حکمدارلردن اسکی دره‌بکک اصولی موجبجه اراضی مذکورده دن طولایی و اسال کبی کندیسنه عرض تعظیفات اولنمسنی طاب ایتدی . بالطبع جواب ردآلدی . بونک اوزرینه ممالک مذکوریه‌ی الحاق ایلدی . دیگر طرفدن استراسبورغ قلعهنی فرانسز عسکرلری آنسزین محاصره و ضبط ایتدیلر . دن نه‌ری

کنارندہ بر موقع مهم عسکری اولان بو قلعه بیطرف و سربست بر شهر ایدی . جمهوریت حالندہ اداره اولئیوردی . هولاندا محاربه سی ائناسندہ آلمانلرک رن نهرندن کچملرینه معاونت ایتشدی . لوئی بونی بهانه اتخاذ ایدرک « آلمانلرک فرانسه یه کیرملرینه مانع اولمق ایچون » شهری فرانسه یه الحاق ایتدی .

بوملککتلرک ضبطی دولتلری قورقوش ایدی . فقط اون دردنجی لوئی پک کوتلی اولدیغندن هیچ بر حکومت حربہ جسارت ایدہ مدی . آلمانیا ایمپراطوری ویانہ اوکلرینه قدر کیدن عثمانلی استیلا سندن طولای شرقده مشغول اولدیغندن اسپانیا قرالیله برلکده اون دردنجی لوئینک آلدینی مملکتلرک الحاقی موقتاً، یکریمی سنہ ایچون تصدیقه مجبور اولدی [۱۶۸۴] . فقط فرانسه دن قورقان دولتر آره لرندہ اتفاقلر عقدینه باشلامش ایدی .

نانت فرماننک فسخی [۱۶۸۵] بتون پروتستان دولترینی فرانسه علیہ چویردی و خصومت سیاسیہ
 محاربه سی خصومت دینہ نک انضمام ایتہ سنہ سبب اولدی .

کیوم دورانز اولجه تشکل ایدن مختلف اتفاق زمهرلرینی یکی بر اتفاق دولی حالہ قویمق ایچون چوق زحمت چکمدی . ۱۶۸۸ ده اسپانیا واسوج قرالری ، آلمانیا ایمپراطوری ، آلمانیا الکتورلرینک برچوغی ، صاووا دوقہ سی اون دردنجی لوئینک تعرضات محتمله سنہ قارشى « آئوغسبورغ اتفاقی » نامیلہ معروف اولان اتفاق دولی یی عقد ایتدیلر . اتفاق تدافعی بر ماهیتده ایدی .

براز صکرہ پاپا دخی اتفاقہ داخل اولدی . رومادہ کی سفارتخانہ لر اوتہ دنبری کندیلرینه بخش ایدیلن خارج از مملکت امتیازاتی سوء استعمال

ايدرلردى . پاپالىق حكومتك ضابطه مأمورلرى سفارتخانه لرك بولندينى محلاته كيرمه دكلرندن بو محله لر برچوق ارباب جرائمه ملجأ خدمتى كورمكه ايدى . پاپانك مراجعتى اوزرينه آروپا حكمدارلرى امتيازات مذكوره دن واز كچدكلرى حالده يالكلز اون دردنجي لوئى واز كچمك ايسته مه مشدى . بونك اوزرينه پاپا فرانسه سفير جديدى رومايه قبول ايتمه مشدى . سفير دخى - قرالدين آلايى امره تبعاً - بر مفرزه عسكر ايله جبراً شهره كيرمشدى .

اون دردنجي لوئى كنديسنى هر شيئه مقتدر ظن ايدىيور وديكر دولتله قارشى تعرضاتنى كوندن كونه آرتدرييور ايدى . ۱۶۸۸ ده قولونيا الكتورلكى منحل قالدیغدن باويرا پرئسى (قله مان) اصولى دائره سنده انتخاب ايدلمشدى . فرانسه قرالى بو پرئسى طائىق ايسته مدى ؛ كندى نامزدى اولان استراسبورغ پسقپوسنى قوه جبريه ايله الكتورلكه تعيين ايتدردى . عيى زمانده اقرباسندن دوشس (دورلئان) ك حق وراثتى محافظه ايتك بهانه سيله پالاتينايه بر اردو كوندردى . بونك اوزرينه حرب عمومى باشلادى .

اكر حرب باشلاديغى زمان انكلتره ده ۱۶۸۸ انقلابى وقوعه كلهرك كييوم دوراثر انكلتره قرالى اولماش اولسه يدى بودفعه ده اون دردنجي لوئىك غلبه ايتمى محتمل ايدى . چونكه شمدي يه قدر اون دردنجي لوئى ماهرانه سياستى سايه سنده انكلتره نك يا بيطرفلغى ويا فرانسه ايله اتفاقى تأمين ايتمشدى ؛ انكليزلر آروپا مسائلنده مهم بر رول اوينا مامشلر ايدى . ۱۶۸۸ دن اعتباراً كييوم دوراثر ك اداره سنه كچن انكلتره بتون قوتى فرانسه عليه نه قوللاندى . بوسايله ده متفقلك قوتيله اون آلنجي لوئىك قوتى آره سنده بر موازنه حاصل اولدى .

اون دردنجی لوئی یالکز باشنه بتون آروپایه قارشی طور دی .
محاربه فرانسه نك بتون حدود لری اوزرنده طقوز سنه سوردی : پیرنه ده
اسپانیوللره ، آلپلرده صاووا دوقه سنه ، رن کنارنده وپینی باده آلمانلره ،
هولاندایلره ، انگلیزلره قارشی .

اون دردنجی لوئی توسیع حدود ایچون دکل ، بلکه اولجه آلمش
اولدینی مملکتلری محافظه ایتک وایکنجی ژاقی انکلتزمه تختنه چیقارمق
ایچون حرب ایتدی . بوندن طولایی باشلیجه محاربات پینی با ایله ایرلانداده
وقوعه کلدی . رن طرفنده فرانسه یی مدافعه ایدم بیلک ایچون شمالی
آلساس تخریب ایدلدی ؛ پالاتیناده شهر ، کوی ، باغ ، باغچه قالمدی ؛
مملکت چول حائله کلدی . بو تخریبات آلمانیاده ناقابل ازاله برکین
وخصومت اوایندیردی .

ایکنجی ژاقه انکلتزمه تختی اعاده ایچون ۱۶۸۹ ده ایرلاندایه برفرانسز
اردوسی چیقاردی . ژاق اوراده کی طرفدارلری سایه سنده برسنه قدر
جزیره یه صاحب اولدی . فقط انکلتزمه یه کچه جکنه انگلیزلر ائده قالمش
صوک ایرلاند قلعه سی اولان (لوندون ده ری) یی ۳۰ اصره ایله وقت
کچیردی و بوضورتله کیوم دورا نژک قوتلی بر اردو ایله ایرلاندایه
کچمسنه میدان بر اقدی . ژاق مغلوب اوله رق تکرار فرانسه یه التجا ایتدی
[۱۶۹۰] . اون دردنجی لوئی نك انکلتزمه یه عسکر چیقارمق ایچون واقع
اولان تشبثی دخی عقیم قالدی .

پینی باده مارشال دولوکسمبورغک قومانداسنده کی فرانسز اردوسی
(فلوروس) ، (اشتاینکرك) ، (زونیدن) محاربه لرنده آلمانلر ایله
هولاندایلری مغلوب ایتدی [۱۶۹۰] . آلپ حدودنده فرانسزلر
صاووا دوقه سنی مغلوب ایدرک صاووا وپیه مونته قطعه لرینی اشغال ایلدیلر .

صاوو ادوقه سی متفقلردن آریله رق ۱۶۹۶ ده (تورینو) مصالحه سنی عقدایتدی .
محارب لر تمادیء حرب ایله یورغون دوشمشلر ایدی . فرانسه ده
- بر مؤلفك دیدیكى كې - « احراز ایدیلن مظفریتلر ایچون تشكر
دعالری او قونوركن خلق آجلقدن اولیوردی . » فرانسز قورصانلری
هولاندایلر ایله انكلیزلك تجارت كمیلرینی ضبط و غرق ایدیورلردی .
هولاندانك دیون عمومیه سی آرتمشدی . ایمپراطور عثمانلیلرله حرب
ایتمكده ایدی مصالحه لاهی قربنده كائن (ریسویق) شاتوسنده عقد
ایدلی [۱۶۹۷] .

اون دردنجی لوئی بو مصالحه ده معتدلانه حرکت ایدرك کیوم
دوراثتلك انكلتره قرالغنی تصدیق ، نیمه غ مصالحه سندن بری الحاق ایدلمش
اولان اراضیدن قسم اعظمنك اعاده سنه موافقت ایتدی ؛ یالكز
استراسبورغك فرانسه یه تركنك ایمپراطور طرفدن صورت قطعیه ده
تصدیق ایدلمسندمه اصرار کوستردی .

اون آلتنجی لوئینك ریسویق مصالحه سنده معتدلانه
اسپانیا میراثك تقسیمی
حرکت ایتمنك سببی اردوینی وامور مالیه یی
مسئله سی
اصلاح ایچون صلحه محتاج اولمسندن ، اسپانیا
قرالی ایکنجی شارلك امید وانتظار ایدلیکی وجهله قریباً وفاتی اوزرینه
میدانه چیقه جق اسپانیا وراثتی مسئله سنده قوتلی بولمق ایسته مسندن
ایلری ککشدی . آئوغسبورغ اتفاقی بوزمق ، هولاندا وانكلتره یی
آیرمق ، اسپانیا میراثی مسئله سنی بوجه پشین اولنرله حل وتسویه
ایتمك ایسته یوردی . انكلتره وهولاندا فرانسه نك قوت وسطوتی تجربه
ایتمش اولدقلردن میراثی مذاکره ایچون اون آلتنجی لوئی طرفندن
واقع اولان تکلیفی مع الممنونیه قبول ایتدیلر .

لاہیدہ عقد ایدیلن ایلک معاہدہ موجبہ اسپانیا میراثہ داخل اولان ممالکدن قسم اعظمنک ایمپراطور لئوپولدک طورونی و باویرا الکتورینک اوغلی اولان درت یاشندہ بر چوجفہ ویرلسی قرارگیر اولدی . بو چوجفک وفاقی اوزرینہ تکرار مذاکرہ باشلامق ایجاب ایتدی .

نہایت ، لوندرہدہ ایکنجی بر تقسیم معاہدہ نامہ سی امضا ایدلدی [۱۷۰۰] . بو معاہدہدہ ناپولی قرالنی ، سیچلیا و میلان مستتنا اولمق اولمق اوزرہ اسپانیا میراثی ایمپراطورک ایکنجی اوغلی آرشیدوق شارلہ ویرلدی . سالف الذکر ممالکی اون دردنجی لوئی آلہ حق ؛ فقط صاوا و لورن ایلہ مبادلہ ایدہ جک ایدی . بو صورتلہ فرانسه قرالی اسپانیا میراثندن بالاستفادہ فرانسز ممالکنی توحید ایتک ایستہ یوردی .

ایمپراطور کنڈیسی ایچون پک فائدہ لی اولان بو صورت تسویہ یی قبول ایتدی . ایکنجی شارل ایمپراطورک بالڈیزینی تزوج ایتیش اولدیغندن لئوپولد بو سایہدہ میراثک تمامنہ نائل اولہ بیلہ جکنی امید ایتمکدہ ایدی . ایکنجی شارل وفاتندن صکرہ اسپانیا دولتنک دوچار تقسام اولسنی ایستہ میوردی . تقسیم پروژہ لرینہ واقف ایدی . اسپانیا دولتنک تمامیت ملکیتہ سی آنجق اون دردنجی لوئینک بتون قوتیلہ مدافعہ ایدہ جکی بر فرانسز پرنسک اسپانیا تختہ چقمسیلہ تأمین ایدیلہ بیلہ جکنہ قانع ایدی . لئوپولد حقنہ کی محبتی نہ درجہدہ اولورسہ اولسون وطنپرورلک حسنہ تبعاً فرانسه قرالک ایکنجی حفیدی دوق (فیلیپ دانٹرو) یی کنڈیسنہ وارث اتخاڈ و بو بابدہ بر وصیتنامہ ترتیب ایتدی . بر آی صکرہ وفات ایددی [تشرین ثانی ۱۷۰۰] .

اون دردنجی لوئی شارلک وصیتنامہ سنی قبول ایدوب ایتہ مکدہ متردد

ایدی . منافع ملیه فرانسه نك وحدتی تأمین ایدن لوندره معاهده نامه سنه رعایت لزومی امر ایتمکده ایدی . فقط خاندان حکمدارینك 'منفعی دینانك اك بیوک بر دولتک قرالغنه حیدلرندن برینك کچمسنی تأمین ایلین وصیتنامه احکامنك قبولی توصیه ایلکده ایدی . نهایت اون آلتنجی لوی ایکنجی شق اختیار ایدی . معاهده نك بخش ایلدیکی منافعدن واز کچرسه صلح و مسالمتی محافظه ایده جکی ملاحظه سی ده بوبابده اجرای تأثیر ایتشدی . فی الحقیقه انکلتزه وهولاندا دخی بر آراق بوملاحظه یه تبعاً حرکت ایتدکلرندن دوق دانژونك بشنجی فیلیپ عنوانیه اسپانیا قرالغی - ایمپراطور مستننا اولق اوزره - بتون دولتر طرفندن تصدیق ایدلدی .

اون آی صکره احوال بسبتون دیکشدی . ۱۷۰۱

اسباب حرب سنه سی ایلولنده انکلتزه ، هولاندا ، آلمان پرنسیرینك اکثری لاهیده ایمپراطور ایل « بیوک اتفاق » نامیله معروف اولان اتفاقی عقد وبشنجی فیلیپه قارشی حرب به باشلامش اولان ایمپراطوره معاوتی تعهد ایلدیلر .

انکلتزه قرالی کیوم اون دردنجی لویئنك لوندره معاهده نامه سی احکامنه رعایت ایده جکنه ایکنجی شارلک وصیتنامه سنی قبول ایلسنی کندی شخصنه بر حقارت کبی تلقی ایتمکده ایدی . انتقام آلق ایچون محاربه به قرار ویردی . کندی فکرینی هولاندا حکومتنه قولایجه قبول ایتدیردی . فقط حکومتلر حرب ایسته دکلی حالده ملتلر صلح ایسته یورلردی . کیوم ملتک تمایلات صلح پرورانه سنه بناء بشنجی فیلیپ قرالغنی تصدیقه مجبور اولمشدی . مع مافیه ایمپراطور ایل مذکوره وتدارکات مهمه عسکریه به باشلامشدی . بوندن بشقه یالان حوادث ، ساخته و نائق کبی وساطه مراجعت ایدرک انکلتزه وهولاندا افکار عمومیه سنی لزوم حرب به اقناعه چالیشیوردی .

از جمله کویا لوندرده اله کچیریلن بر مکتوبده ایکنجی ژاقی انکلتزه تختنه چیقارمق ایچون بر جمعیت خفیه کشف ایدلمش اولدیغنی اشاعه ایتشدی . اون دردنجی لوئیک بعضری احتیاطسزجه یاپیلمش حرکاتدن ، بعضری حقی تشبثاتدن عبارت اولان تدابیر مختلفه سی کیومک ایشنه چوق یارادی . فرانسه قرالی بر کون نصلسه بشنجی فیلپک فرانسه تختنده کی حقوقک تحت تأمینه آلمش اولدیغنی علناً سویله مک کی بر تدبیرسز لکده بولندی . شو حالده بر کون کلوب فرانسه واسپانیا تاجلرینک برلشهرک غایت واسع وقوتلی بردولتک تشکلی محتمل دیمکدی . اوزمان اون دردنجی لوئیک اولادی ، احفادی ، حفید زاده لری موجود اولدیغندن اسپانیا وفرانسه نک برلشمری صرف بر احتمالدن عبارتدی . فقط بوا احتمال پک چوق کیمسه لری ، حکومتلری قورقوتمقده ایدی .

بر مدت صکره اون دردنجی لوئی - بشنجی فیلپک مراجعتی اوزرینه - پهی بانک اسپانیاه عائد اولان قسمنده کی قلعه لره فرانسز عسکری اقامه ایتدی . هولاندایلر ریسویق مصالحه سندن صکره بو قلعه لره محافظه سنی - ایکنجی شارلک مساعدده سنه بناء - درعهده ایتشلر ایدی . هولاندا عسکری قلعه لردن چیقاردی ؛ مملکتنه اعاده ایدلدی . بو تدبیر طبعی و محق ایدی . چونکه هولاندایلر هنوز بشنجی فیلپک قرالغنی تصدیق ایتمه مش اولدقلرندن اسپانیاه دشمن عد اولته بیلیرلر ایدی . دیگر طرفدن اون دردنجی لوئی هولاندانک آمال خصومتکارانه سنه ، انتریقه لرینه واقف ایدی . مع مافیه هولاندایلر قلعه لره فرانسز عسکرینک اقامه سنی کندیلری علیهنده بر تدبیر واستقلال لرینی تهلکه یه دوشورن بر حرکت اولمق اوزره تلقی ایتدیلر .

الحاصل انکلتزه حکمدار سابق ایکنجی ژاق فرانسه ده (سن ژرمن)

شاتونسنده وفات ایتدی . اون آلتنجی لوی ریسویق معاهده سیله کیوم دورانک قرالغی تصدیق ایتمش اولمسنه رغماً ایکنجی ژاقل اوغلی اوچنجی ژاقله قرال عنوانیه خطاب ایلدی . بو ، طقوز کون اول عقد ایدلمش اولان « بیوک اتفاق » بر مقابله ایدی . مع مافیه کیوم بوندن بالاستفاده انکلز افکار عمومیه سنده درین بر حس نفرت او یاندرمغه وبو سایهده محتاج اولدینی عسکر وتخصیصاتی پارلمتودن آلمغه موفق اولدی . مع مافیه فرانسه یه رسماً اعلان حرب ایتهدن حیواندن دوشهرک وفات ایتدی [۱۹ مارت ۱۷۰۲] .

حرب رسماً اعلان ایدلمه مش اولقله برابر مخاصمات **اسپانیا و راتی مربی** باشلامش و ایمراطور تقریباً بر سنه اول [تموز ۱۷۰۱] اردولرینی ایتالیا یه کوندرمشدی .

اسپانیا و راتی حربی اون دردنجی لویئنک دور حکومتنده کی محارباتک اک اوزونی واک مدهشیدر . تقریباً ۱۳ سنه سورمش و آنجق ۶ مارت ۱۷۱۴ ده ختام بولمشدر . بو حربده فرانسه یالکز کندی حدودینی دکل ، اسپانیانک غایت واسع اولان حدودلرینی ده مدافعه وقامیزارلر عصیاننی باصیرمق ایچون قوتنک بر قسمنی ایکی سنه قدر داخلده استخدام ایتک مجبوریتده بولندیغندن پک مشکل بر موقعده قالدی . دیگر طرفدن آوستریانک عثمانیلردن قورقوسی قلامش ایدی . عثمانیلر محارساتنی براقهرق صاوا نهرینه قدر چکلمشلا ایدی . محاربه لر اسپانیا ، ایتالیا ، آلمانیا ، پهنی با ، شمالی و شرقی فرانسهده وقوعه کلدی . متفق اردولری ایکی بیوک قوماندان ، انکلز (مارلبوروغ) ایله پرنس (اوژن دوصاوا) اداره ایتدیلر .

حربک بدایتده ۳۸ یاشنده بر قوماندان اولان پرنس اوژن

[۱۷۳۲ - ۱۶۶۳] والدہ سی جھندن مازارن عائہ سہ ، پدری طرفدن صاووا خاندانہ منسوب ایدی . پارسده تولد ایتشدی . سلك رهبانہ کیرہ جك ایکن بالآخرہ عسکر اولمشدی . یکر می یاشنده (لوووا) دن طلب ایتدیکی رتبہ عسکر یه بی آله مدیغندن آوستریا خدمتہ کیرمش و عثمانیلرله وقوعه کلن محارباتده مزیت فوق العاده کوستردیکی جھتله ۲۴ یاشنده مارشالغه ترفیع ایتشدی . اون دردنجی لوئی ۱۶۹۸ ده پرنس اوژہنی فرانسیہ کتیرمکه چوق چالیشدیغی حالده موفق اوله ماشدی . پك ماہر بر قوماندان ایدی .

انکلترة قرالی ایکنجی ژاقل ندیملرندن ایکن ۱۶۸۸ ده اوکا اہانت ایتش اولان دوق دومارلبوروغ [۱۷۲۲ - ۱۶۵۰] قوندہ وتورہنك شا کردی ایدی . نقل وراثت وهولاندا حربلرنده بوفرانسز جنراللرینك معیتندہ خدمت ایتشدی . زوجہ سنك قرالیچہ آن اوزرنده کی نفوذندن بالاستفاده اسپانیا وراثتی حربنك ایلک اون سنہ سی ظرفندہ انکلز سیاستہ اجرای تاثیر ایتدی وایستہدیکی قوای امدادیہ بی انکلترة دن آلمغه دائما موفق اولدی .

حربك بدایتندہ پورتکیز قرالی ، صاووا دوقہ سی وباویرا الکتوری اون دردنجی لوئی ایلہ بشنجی فیلیک متفقلری ایدیلز . فرانسه قرالی بو اتفاقلر سایہ سندہ ایتالیا و آلمانیاہ حرکات تجاوزیہ باشلادی .

فرانسز قوماندانی (ویلار) بری تبرول طریقہ ایتالیان ، دیکری طونہ طریقہ فرانسه دن کلہ جك ایکی اردوی باویرادہ تحشید ایتدکدن صکرہ ویانہ اوزرینہ یوریوب ایمپراطوری طلب صلحہ مجبور ایتک کبی جرأتکارانہ بر پلان ترتیب ایتشدی . بو پلانك موقع تطبیقہ وضعنه باشلادی . (واندوم) لوچارا Luzzara موقعندہ پرنس اوژہنك قوماندا .

سندہ کی اوسٹریالیلری مغلوب ایتدی [۱۵ آگستوس ۱۷۰۲] . ویلار (رن) ک صاغ ساحلندہ ، فریدلینکن محاربہ سندہ ایمپراطور اردوسنہ غلبہ ایلدی [۱۴ تشرین اول ۱۷۰۲] . فقط قیشک شدتلی اولسی ویا زین دخی صاواوا دوقه سنک متفقنہ اہانت ایدرک ایمپراطور طرفنہ کچمسی فرانسزلرک پلانلری بوزدی . یالکز کندی اردوسیله باوریاہ داخل اولان ویلار (ہوشتہد) مظفریتی احراز ایتدی [۲۰ ایلول ۱۷۰۳] . فقط باویرا الکتوری ایلہ او یوشہ مدیغندن فرانسیہ جلب ایدلسنی طلب ایلدی .

ایرتمی سنہ متفقلر طونہ وادیسنده تحشیداتده بولندیلر . پرنس اوژن ایتالیادہ کی اوستریا اردوسنی طونہ وادیسنہ کتیرمک انکلیر - هولاندیز اردوسیله پھی بادن کلن (مارلبوروغ) ہ التحاق ایتدی . ایکسی بردن ینہ (ہوشتہد) موقعندہ ویلارک اقتدارسز خلفلری طرفندن اداره ایدیلن فرانسز اردوسنی بوزدیلر [۱۴ آگستوس ۱۷۰۴] فرانسزلر آلمانیا جہتندہ رن کنارینہ ، ایتالیا طرفندہ آلپ اتکلرینہ چکیلدیلر . فرانسزلرک حرکات تجاوزیہ سی آنجق ایکی سنہ سورمشدی . بوندن صکرہ اون برسنہ فرانسز اردولری جنوبی اسپانیادہ ، پھی بانک اسپانیایہ عائد قسمندہ ، فلاندرک فرانسیہ الحاق ایدلمش اولان طرفلرندہ حال تدافعیہدہ بولندیلر .

صاواوا دوقه سی ایمپراطور طرفنہ کچدیکی صرہدہ پورتکیز قرالی دخی بشنجی فیلیپی ترک ایدرک انکلیزلرلہ اتفاق ایتمش ، انکلترہ اسپانیایہ شبہ جزیرہ سنہ عسکر چقارمشدی . متفقینک اسپانیایہ تختہ چقارمق ایستہ - دکبری ایمپراطورک ایکنجی اوغلی آرشیدوق شارل دخی اسپانیایہ کیدرک انکلیزلرلہ برلشدی . اسپانیایک بر چوق ولایاتی آرشیدوق طرفنی التزام ایتدیلر . بشنجی فیلیپ ایکی دفعہ مادریددن طردایدلی [۱۷۰۶-۱۷۱۰] .

فقط ۱۷۱۰ سنه سی اواخرنده (واندوم) ویلاویچیوزا Villaviciosa محاربه سنده انکلتزه - آوستریا اردوسنی مغلوب ایتدی . بشنجی فیلیپ محاربه دن بر کون صکره دشمندن آلمش بایراقلردن یاپیلان بر شیلته اوزرنده اویودی . بومظفريت بشنجی فیلیپک اسپانیاده قلمسنی تأمین ایلدی . فرانسزلر په بی بانک اسپانیایه عائدقسمنده خیلی زمان مقاومت ایتدیلر ایسه ده نهایت پرنس اوژن ایله مارلبوروغک اردولرینه مغلوب اوله رق ۱۷۰۶ سنه سنده په بی بانی تخلیه یه مجبور اولدیلر . بعده استرداد چالیشدیلر ؛ لکن موفق اوله مدیلر .

۱۷۰۹ قیشی فرانسه ده پک مدهش اولدی . بتون مملکت آج قالدی . اون دردنجی لوئی صلح طلب ایتدی و لاهیده مذاکرات باشلادی . متفقلر فرانسه نك اسپانیا میراثندن و ازچمه سنی ، آلساس قطعه سنی و شمالده بولنان قطعه لرك كافه سنی ترك ایتسنی طلب ایتدکرندن مذاکرات منقطع اولدی . اون دردنجی لوئی ملته خطاباً یازدیغی مکتوبی بتون کلیسالرده او قوته رق متفقلرك آغیر شرائطنی ایضاح ایتدی . فرانسزلر حربه دوامه قرار ویردیلر . اکثری کویلی اولمق اوزره بیکلرجه کوکلی یازلدی .

۱۱ ایلول ۱۷۰۹ تادیخنده بو کوکلولردن مرکب اولان فرانسز اردوسی ویلارک قومانداسنده اوله رق شمیدیکی شمالده پارتماننده کائن برکوچوک کوی اولان (مال پلاکه) موقعنده پرنس اوژن ایله مارلبوروغک اردوسنه هجوم ایتدی . اسپانیا وراثی حربنك امدهش محاربه سی بودر . فرانسزلر ۱۱,۰۰۰ ، متفقلر ۲۳,۰۰۰ مقتول براقدیلر . فرانسز اردوسی کری یه چکلدی . فقط متفقلر تعقیبه و یکیدن حربه جسارت ایده مه دیلر .

اون دردنجی لوئی بر دفعه ده اصالح طلب ایتدی . متفقلر ده اآغیر شرائط قویدیلر ؛ آلساس وفلاندرک ترکندن ماعدا بشنجی فیلیپک خلعتی

ایسته دیلر . اون دردنجی لوئی آلساس ایله فلاندری ترکه موافقت ایتدیکی حالده حفیدینی کندی ایله خلع ایتکه راضی اولدی و : «مادامکه حرب ایتک لازم ؛ او حالده چوجقلریمزه قارشی حرب ایتمکن ایسه دشمنلریمز ایله اوغراشمق ده ایدر .» دیدی [نموز ۱۷۱۰] .

بوندن صکره فرانسه یی استیلادن قورتارمق ایجاب ایدیوردی . محاربات فلاندر قطعه سنده وقوعه کلدی . پاریسی مدافعه ایچون (ووبان) ک تأسیس ایتمش اولدینی اوچ صره قلعه لر متفق لک ایکی سنه قدر ایلری یه یورو ملرینه مانع اولدی . فقط ۱۷۱۲ ده پرمنس اوژن بوقلعه لری بربرر ضبط ایتکه باشلادی . پارس طریقنی آحق اوژره ایکن (ویلارک) ک ماهرانه حرکاتی قارشیسنده (دونهن) محاربه سنی غائب ایدرک کری یه چکیلیمکه مجبور اولدی .

ازره منت وراشتات
معاشرانی

(دونهن) محاربه سی فرانسه یی قورتاردی وعقد صالحی تسریع ایتدی . ذاتاً بر چوق آی اول انکلیرلرک تکلیفی اوژرینه (اوترخت) ده مذاکرات صلحیه باشلامشدی . مصارف حربیه نک کثرتندن طولای انکلتره نک دیون عمومیه سی آرتمشدی . ملت حرب ایتک ایسته میوردی . حربیه طرفدار اولان (ویغ) قایینه سی دوشمش ، صالح طرفداری اولان (طوری) لر موقع اقتداره کچمشدی .

۱۷۱۱ سنه سی نیساننده آرشیدوق شارل - برادری برنجی ژوزفه فک وفاتندن طولای - آلتنجی شارل نامیله آلمانیا ایمپراطوری اولمشدی . فرانسه واسپانیا تاجلرینک بر حکمدارده برلشمسنه امکان ویرمه مک ایچون حرب ایدن انکلیرلر بالطبع آوستریا واسپانیا تاجلرینک برلشمسندن بشقه بر نتیجه حاصل ایتیه جک اولان حربیه دوام ایده منزلر ایدی .

بوندن طولایی اتفاقدن آیرلمغه قرار ویرمشر ایدی . مارلبوروغ اردوسنی انکلتزمیه جلب ایتمشلردی [ایلول ۱۷۱۱] . اولا لوندرمهده ، بعده اوتره خنده مقدمات صلحیه مذکراتنه باشلانمشدی . (دونن) مظفریتی مذاکراته تأثیر ایتدی . هولاندالیر دخی اتفاقدن آیرلدیلر [۱۷۱۳] . ایمپراطور یالکزر قالدی . ویلارک (رن) کنارنده پرنس اوژنه تکرار غلبه ایتیمی اوزرینه آلتنجی شارل (راشات) ده مصالحه نامه بی امضا ایتمه مجبور اولدی [۱۷۱۴] .

اوترهخت وراشات معاهداتی اسپانیا وراثتی مسئلهسنی شو صورتله حل ایتمکده ایدی : بشنجی فیلیپ اسپانیا ایله مستملکاتی محافظه ایتدی . فرانسه تاجنده کی حقوقدن واز کچدی . بو فراغت قولایلقه وقوعه کمدی . اون دردنجی لوئی حفیدنی اقناع ایچون متفقلر قارشیننده یالکزر براقق ایله تهدیده مجبور اولدی . ایمپراطور آلتنجی شارل پهبی بایی ، میلان دوقه لغنی ، ساردنیایی ، ناپولی قرالغنی آلدی . صاووا دوقه سی ایکنجی ویقتور آمده سیچلیا آطسیله « سیچلیا قرالی » عنوانه صاحب اولدی . انکلتزه اسپانیادن مستملکه کرده غایت مهم امتیازات تجاریه استحصال ایتدکن ماعدا مینورقهیه ، جبل الطارقه وضعید ایتدی . فرانسه دن دخی آمریقاده کائن (ترنوو) و (آقادی) بی آلدی .

بو معاهدات اسپانیا وراثتی مسئلهسنی صورت قطعیهده میداندن قالدیرمدی . آلتنجی شارل و بشنجی فیلیپ سالف الذکر شرائطی قبولدن امتناع ایتدیلر . ایمپراطور بشنجی فیلیپی اسپانیا قرالی اوله رق طانییور ، بشنجی فیلیپده پهبی بانک و بالخاصه ایتالیا نیک ترکنه راضی اولمیوردی . بو حال اون بشنجی لوئی دورنده یکیدن اختلاف ظهورینه سبب اوله جقدر . حرب ، نتایج عمومیه سی اعتباریله ، انکلتزه نیک غلبه سنی تأمین ایتمشدی .

فی الحقیقه انکلتزه غربی اوروپا مسائلنده حاکم طورینی طاقینمش ، دکزلرده حاکمیتنی تأمین ایده جک و سائطی الده ایلشدی . فرانسه مغلوب اولمشدی . واقعا اون دردنجی لوئی دور سلطنتنده ضبط ایدیلن ممالیکک جمله سنی محافظه ایدیوردی . فقط قان و پاره جه چوق ضایعاته ارغرامشدی . اسپانیاه بر فرانسز پرئسنی قرال یامق ایچون اون اوچ سنه بتون قوتی صرف ایتمش ، مع مافیه اسپانیانک تمامیت ملکیه سنی تأمین ایده مه مشدی . دیگر طرفدن اطرافده کی دولتلرک هپسی بیودیکی حالده فرانسه عینی حالده قالمشدی . اون دردنجی لوئی اسپانیا میراثنک تقسیمی مقاوله نامه سنی ترک ایتمکه کندی سیاستنی دکیشدیرمش ، یعنی فرانسه نک وحدتی تأمیندن وازچکمشدی . اونک ایچون فرانسز مورخلری ایکنجی شارلک وصیتنا - مه سنی قبول ایتمکه اون دردنجی لوئینک فرانسه نک باشنه بر فلاکت کتیرمش اولدیغنی بیان ایدرلر .

اون یدنجی عصرده فرانسز هیئت اجتماعیه سی قرون وسطی
هیئت اجتماعیه هیئت اجتماعیه سنه پک مشابه ایدی . هیئت اجتماعیه ده اساس « غیر مساوات » ایدی . افراد ملت رهبان ، زادگان ، صنف ثالث ، یعنی عوام نامیله اوچ صنفه آیرلمشدی . قرون وسطاده اولدیغی کبی صنوف ممتازه و صنوف غیر ممتازه موجود ایدی . صنوف ممتازه پک خفیف تکالیفه تابع ایدی . دولتک ، هیئت اجتماعیه نک بتون احتیاجاتی تأمین ایدن ، بار تکالیف آلتنده ازیلن صنوف غیر ممتازه ، یعنی عوام ایدی .

مع مافیه قرون جدیدده خیلی تبدلات وقوعه کلشدی . اولاً ، افراد ملتک قسم اعظمی حر ایدی . سرف اصولی آنجق کلیسایه عائد بعض مالکانه لرده قالمشدی . ثانیاً ، صنوف ممتازه آرتشمشدی . صنف

زادگانہ منسوب اولمیان مأمورین دولت دخی زادگان ورہبان کی تکالیفدن معافیتہ نائل اولمشردی . بوکا مقابل تاجر ، عملہ ، کوپلی صیرتنہ یوکلہ نن بار تکالیف کیتدجکہ آغیر لاشمشدی . بالخاصہ کوپیلر بو نقطہ نظر دن پک آجینہ حق بر حالده ایدیلر . ثالثاً ، بیوک رہبان و بیوک زادگان قرون وسطانک بر قسمندہ قرالغہ قارشی حائز اولدقلری قدرت واستقلال سیاسی یہ ارتق مالک دکل ایدیلر . قرالک حکومت مطلقہ سی قارشیسندہ ممتاز ، غیر ممتاز اوج صنف افرادی ده اطاعت نقطہ نظر دن مساوی ایدیلر .

اون یدنجی عصر نہایتندہ اوج صنفک ہیئت مجموعہ سی ۱۹ میلیون کشی اولوب بونک یاریم میلیونی رہبان و زادگان ، قسم متباقیسی عوام ایدی . عوامک ۱۷ میلیونی ده عملہ ویا کوپلی ایدی .

تشکیلاتی الک مکمل اولان صنف ہیئت رہبان ایدی . ہیئت رہبانک خصوصی محکمہ لری الآن موجود ایدی . فقط بو محکمہ لری صلاحیتی ہیئت رہبانک انضباطنہ و تکاملنہ متعلق مسائلہ منحصر قالمشدی . محکمہ روحانیہ نک قراری پارلمنتودہ استیناف ایدیہ بیلیر ایدی . مناسترلر ده اقامت ایدن ، مختلف طریقہ لره منسوب اولان ہیئت رہباندن ماعدا سرپسقپوسلری و پسقپوسلری قرال تعیین ایدردی . بونلرک مأموریتلری پاپالق مقامنجه تصدیق اولنوردی . پسقپوسلرک اکثریت عظیمہ سی زادگان صنفندن ایدی . کوپیلر ده کی کوچک راہلر عوام صنفندن اولوب اکثریا فقر و ضرورت ایچندہ یشارلردی . تولدات ، نکاح ، وفیات معاملاتی بونلر طرفندن ایضا ایدیلردی . حکومتک اوامر و مقررات مهمہ سنی کوی راہلری اہالی یہ تبلیغ ایدرلردی .

هیئت رہبان کلیسیاہ عائداراضی و مستقات وارداتی و اہالیدن آلان

مختلف ویرکولر حاصلاتی ایله کچینردی . فرانسه طوپراغنک تقریباً بر ربعی هیئت رهبانک ایدی . بواراضینک وارداتنه هیئت رهبانک هر نوع محصولات ارضیه دن آلدیغی عشرک ، کلیسا مالکانه لرنده ساکن اهالیدن آلدیغی رسوم سائرهنک حاصلاتی علاوه اولنورسه صنف روحانینک واردات سنویه سی وسطی اوله رق شمیدیکی حساب ایله بر ملیار فرانکی بولور ایدی .

بوکا مقابل کلیسا ، خسته خانه وسائر مؤسسات دینه وخیریه نک ، بعض مکتبلرک اداره سی هیئت رهبانه عائد ایدی . بوندن بشقه هیئت رهبان بعض ویرکولر اعطاسنه مجبور ایدی . بو ویرکولرک مقداری ۶۰ الی ۸۰ میلیونه بالغ اولوردی .

صنف زادکان قرالغک صاغ قولی مثابه سنده ایدی . زادکان شخصی ویرکودن معفوایدی . سرایک بیوک مأموریتلری ، اردو قوماندانقلری ، سفیرلک ، والیک زادکانه منحصر ایدی . مالکانه لری داخلنده کی اشخاص اوزرنده حقوق حکمرانیلری قالماش اولمقله برابر کویلیلردن آغاریه ایسته مک ، محصولاتک بر قسمی آلق ، دکرمن ، فرون ، تعصیرخانه ایچون بر رسم تحصیل ایتمک ، کویلیلرک اراضیمی اوزرنده سربستهجه آوه چیقمق حقنه مالک ایدیلر .

صنایع زجاجیه مستثنا اولمق اوزره هر درلو صنعت ، تجارت بحریه خارجه قالمق اوزره هر درلو تجارت زادکانه ممنوع ایدی . ممنوعیت خلافتده حرکت ایدنلر عنوان اصالتدن محروم قالیرلردی . بناءً علیه زادکان عطالت ایچنده وقت کچیرلر ایدی . اون دردنجی لوئینک صوک زمانلرنده زادکانه طفیلی وهیج برایشه یاراماز بر صنف نظریله باقیلمغه باشلامشدی . ایکی درلو زادکان واردی : اباً عن جد اصیلزاده اولانلر [Nobles

[d'épée] ، عدلیہ و مالیہ مأموریتلرینہ تعینلری اوزرینہ قرال طرفدن کندیلرینہ عنوان اصالت ویریلن زادکان [Nobles de robe] .

دوق ، مارکی ، قونت و بارونلردن متشکل اولان برنجی قسم بیوک و کوچک زادکان نامیلہ ایکی یه آریلردی . بیوک زادکان قرالک سراینده، قرالک ویردیکی تخصیصات ایله چکینرلردی . کوچک زادکان ولایتده کی چیفتلکلرینده کویلیلر کی یشارلرایدی . فقط بونلر دره بکلک زمانندن قالمش آغیر ویرکولر ، آنغاریلر آلئنده اصل کویلیلری ازرلردی . قرالدن عنوان اصالت آلانلر مبالغہ مهمه مقابلنده پارلمنتو رئیسکی ، شورای دولت اعضاکی کی مناصب عالیہ یکن بورژووالرایدی . عنوانلری اوغلرینہ دخی انتقال ایدردی . قرالک امور دولئده استخدام ایلدیکی بو صنف ملتک اک منورالفکر ، اک ایی تحصیل کورمش قسمی ایدی .

صنف ثالث بورژووالردن ، اصناف و صنعتکارلردن ، کویلیلردن مرکبدی . آووقات ، معلم ، طیب ، ایکنجی درجہده کی مأمورلر ، زنکین تاجرلر ، بلدیہ مأمورلری و سائرہ بورژووالردن معدود ایدی . بونلرک بر قسمی صفت مأموریتلرندن طولای بعض ویرکولردن مستثنا اولدقلرندن دولئک بتون بارتکالیفی اصناف و صنعتکارلرایله کویلیلرہ تحمیل ایدلمشدی . پاپیلان بر حسابہ نظراً یوز فرائق قازانان برکویلی قرالہ ، زادکانہ ، رهبانہ عائد ویرکولری ویردکدن صکرہ کندیسنه آنجق یکریمی بش فرائق قالیردی . بوندن باشقه بالواسطه آلنان ویرکولری تأدییه مجبور ایدی . بناءً علیہ کویلیلر پک فئابر حالده یشایورلردی . اسپانیاوراتی محاربه سی وخامت احوالی بستیون آرتدیردی . آجلغک ، سفالتک تأثیریلہ فرانسه نک اون طقوز میلیون نفوسی اون یدی میلیونه دوشدی ؛ اراضینک بر قسمی غیر مزروع قالدی . حکومت تزید واردات ایچون ویرکولرہ ضم ایتدی .

واقعا بوسایه ده واردات دولت ایکی مثلنه بالغ اولدی؛ لکن مصارف عمومی اوج مثلی آرتدی. جبری استقراضلردن، موقت تدبیرلردن بر فائده کورلمدی. دولت افلاسه طوغری کیدیوردی.

اون دردنجی لوئی عمرینک صوک زماننده سفالت عمومی دن کندیسنک مسئول اولدیغنی حس ایتدی؛ نادم اولدی. فقط بوندامتک هیچ بر فائده سی اوله ماز ایدی. اون دردنجی لوئی حال احتضارده ایکن اون بشنجی لوئی نامیله کندیسنه خلف اوله جق حفید زاده سنی، بش یاشنده کی چوجنی یانه جلب ایدرک دیمشدرکه: «اوغلم، بیوک بر قرال اوله جقسکز. بنم کی نه انشا آته مراق ایدیکز، نه ده محاربه یه. ملتک فلا کتلیخی تحفیه چالیشیکز. بن بوکا چالیشه مدیغمن طولای کنیدی پک بد بخت بولیورم.»

۸

اون یدنجی عصرده شرقی اوروپا

آوستریا

آوستریا: ماتیاس؛ ایکنجی
برادری ایکنجی رودولف [۱۵۷۶ —
۱۶۱۲] دن صکره آوستریا، بوهمیا و مجا-
رومینی فریدیناند
رستانه صاحب اولان ماتیاس [۱۶۱۲ —

۱۶۱۹] اک زیاده آوستریا مالککنده پروتستانلک منع انتشارینه و بوهمیا ایله مجارستانده قراللق تاجنی یکانه وارثی اولان برادری ایکنجی فریدیناند تأمین ایتکه چالیشدی. مجارلر ایله چهلر هنوز باقی اولان عثمانلی استیلاسی تهلکه سنه قارشی آلمانیا ایمپراطورلغنی دخی حائز اولان آوستریا خانداندن بیوک منفعتلر بکله دکلری حاله بو خاندان تجددات مذهبییه

مانع اولق ایچون پروتستانلرله اوغراشمغی ترجیح ونتیجہده ہر درلو حریتی ازالہ ومطلقیت ادارہ بی سیاستہ اساس اتخاذایتدی .

ایکنجی فردیناند [۱۶۱۹ — ۱۶۳۷] غایت متعصب ومستبد ایدی . جزویتلر طرفدن تربیہ ایدلمشدی . بر قاج دفعہ جزویت اولق ایستہ مش ، ماتیاسک یرینہ ایمپراطورلغہ کچمزدن اول ، استیریادہ اجرای حکومت ایدرکن پروتستانلر حقندہ بیوک بر ظلم ووحشت کوسترمشدی . پروتستانلغک خیلی ترقی ایتمش اولدینی بوہمایا ایلہ مجارستان فردیناند غیرت دینیہ سی ایچون پک واسع برر میدان اجراآت ایدی . فی الحقیقہ چہلرہ قارشنی دینی بر حرب آچدی . عصیان ایدن کویلیلری بلامرحت ازدی . ایکنجی فردیناندک دور حکومتی قتولیک کلیسائی ایچون بر دورہ موفقیاتدر . فردیناند برچوق مناسترلر تأسیس ، ہیئت رہبانک مالکانہ لرینی تزئید ایتدی . سلاک رہبانہ کیرمکہ حاضرلاناں ایکنجی اوغلنہ ہنوز اون بر یاشندہ ایکن ایکی بسقپوسلق ودرت مناستر باش راہبلیکی ویردی . وفات ایتدیکی زمان خلفی اوچنجی فردیناند [۱۶۳۷ — ۱۶۵۷] ہ اوتوز سنہ محاربہ سنی میراث بر اقدی . بو محاربہ اوستریا خاندانک آلمانیادہ کی موقعنی خیلی صارصدی . وہستفالیہ معاہداتی آلمانیادہ سربستی وجدانی تامين ایتدیکی حالہ اوستریا ممالکنندہ پروتستانلر کافی السابق شدتلہ تعقیب وتضییق ایدلدیلر .

اوچنجی فردیناند وفات ایتدیکی زمان یرینہ برادری برنجی لئوپولد کچدی . لئوپولدک دور حکومتی اون یدنجی عصرک نصف اخیرنی تماماً اشغال ایتمشدر [۱۶۵۷ — ۱۷۰۵] .

برنجی لئوپولدک جلوسندہ اوستریا دولتی شیمدیکندن
برنجی لئوپولد دہا کوچک ایدی . غالچیا لہستانہ عائد ایدی .
استریا ، دالماتیا سواحلی ونڈیک جمہوریتک ایدی . تیرول قطعہ سی

آوستریا خانداننك دیگر بر شعبه سنده ایدی . مجارستانك آنجق بر ثلثی
 لئوپولده تابع ایدی . یالکیز شمدی تماماً پروسیه یه عائد اولان سیلزی
 قطعه سنك قسم اعظمی بوهیمیا تاجنه مربوط ایدی . لئوپولد تیرونده
 اجرای حکومت ایدن شعبه نك انقراضی اوزرینه بو قطعه یی ؛ پرنس
 اوژنك عثمانلیره غلبه سی نتیجه سی اوله رق هان بتون مجارستانی ،
 خرواتستانی ، اسلاوونیایی ، ترانسیلوونیایی آلدی . آوستریا خاندانه
 عائد ممالکک هیئت مجموعه سی لئوپولدك جلوسنده ۶،۸۰۰ میل مربعی
 ایکن وفاتنده ۹،۱۰۰ میل مربعنه حیقدی .

اجدادندن قالان مملکتلری بر ثلث نسبته تزیید ایدن لئوپولداصلا
 حربجو دکلدی ، حتی هیچ بر زمان بر اردویه قوماندا ایتمه مشدی .
 جزویتلر طرفندن تربیه ایدلمش ، سلک رهبانه کیرمکه حاضر لاشدی .
 زماننده هیئت رهبانك نفوذی فوق العاده آرتدی . لئوپولد بتون مملکتلری
 داخلنده قتولیک مذهبندن بشقه بر مذهبك بولنمسی ایسته میوردی . ویانه
 سراینده یکنسق ، حزن انکیز بر حیات کچیریور ؛ آلهیات ، موسیقی ،
 رسم ، ادبیات ، سیمیا ونجوم ایله مشغول اولیور ایدی . سرایک قیو-
 لرینه بر چوق دفعه : « لئوپولد ، قیصر اول ، موسیقی شناس دکل ؛
 قیصر اول ، جزویت دکل . » عباره سی حاوی یافته لر یاپیشدرلشدی .
 لئوپولد حضورینه قبول ایتدیکی ذواته رفق وملایمت ایله معامله دن ،
 فقیرلر ایله مناسباتنده پدرانہ بر خیر خواهلحق کوسترکدن کری طورماز ؛
 فقط قدرت حکومتی خللدار ایده بیله جک تشبثاته قارشى پک غدارانه
 طاورانیردی . لئوپولد بری بره سلاوده ، دیکری اینسبروقده اولمق
 اوزره ایکی دارالفنون تأسیس ، محاکمی اصلاح ، اوزمانه قدر لسان

رسمی اولان لاتینجہ یرینہ آمانجہ بی اقامہ ، ویانہ دہ منتظم بر ضابطہ اداره سی احداث ایتدی .

ربانہ محاصرہ سی لئوپولدک آلمانیا ایمپراطوری صفتیلہ آوروپا مسائلندہ اوینادینی رولی خارج براقیر ایسہک آوستریادہ کی دور حکومتندہ یالکز ویانہ نک عثمانیلر طرفدن محاصرہ سندن عبارت بروقعہ مهمہ کوریرز . ۱۶۸۳ دہ وزیر اعظم قرہ مصطفی پاشا بحارلرک معاونتیلہ ویانہ اوزرینہ یوریدی . ایمپراطور عائہ سی ، سرای ، زادکانک بیوک بر قسمی ایلہ شہری ترک ایدوب (لینچ) ہ چکیلدی . قسماً یقلمش استحکا- ماتی و جزئی بر مقدار عسکر ایلہ حکمدار طرفدن ترک ایدلمش اولان شہر چوق زمان مقاومت ایدہ میہ جک کی کورونیوردی . لورہن دوقہ سی شارل وقوت اشتارہ نبرغ ویانہ بی قابل مدافعہ بر حالہ قویدیلر . شہر اہالیسی بیوک بر جسارت کوستردی . دارالفنون طلبہ سی ، تاجرلر ، بورژووالر عسکر اولدیلر ومحاصرلرک تحصن ایتسنہ مساعد اولان طیش محلاتی یاقدیلر .

عثمانیلر براز صکرہ استحکامات خارجہ بی ضبط ایدرک شہری تحت محاصرہ آلدیلر . آجلق باش کوستردی . پاپانک توسطیلہ لئوپولدلہستان قرالی ژان صوبیہ سیکی ایلہ بر اتفاق عقد ایتدی . لئوپولد ۶۰,۰۰۰ ، صوبیہ سیکی ۴۰,۰۰۰ عسکر طویلامنی تعہد ایدیوردی . ایکی حکمداردن ہانکیسنک یاتختی محاصرہ اولنورسہ دیکری ہان امدادہ قوشہ جق ایدی . بتون خرسیان حکمدارلر وبالخاصہ روسیہ چاری بو اتفاقہ داخل اولغہ دعوت ایدیلہ جک ایدی . صوبیہ سیکی تعہداتنہ صادق قالدی . کوپرلی زادہ فاضل احمد پاشا زمانندہ ، (بوچاش) معاہدہ سندن صکرہ ظہور ایدن محاربہ دہ خوتینہ هجوم و عثمانیلرلہ مظفرانہ حرب ایتمش

اولان صوبیه‌سیکی بیوک بر شهرت قازانمشدی . (قاله نبرغ) محاربه‌سی بو شهرتی برفات دها آرتدیردی .

صوبیه‌سیکی ویانه‌یه کیردیکی زمان اولجه ایمپراطورک شهری کندی حاله بر اقوب عزیزمتنی کورمش اولان اهالی طرفدن بیوک بر مسرت وشکران ایله استقبال ایدلدی . بر مدت صکره لئوپولد دخی پایتخته‌عودت ایدلدی . صوبیه‌سیکی‌یه منتدار اوله‌جغه حسود ایدی . اوله ، لهستان قرالی ایله ملاقات ایتک ایسته‌مدی ؛ صکره شانلی رقیبنی کوچولتمکه چالیشدی . بر آلمانیا ایمپراطورینک لهستان جمهوریتنک منتخب قرالی نه صورتله قبول ایتسی لازم کله‌جکنی دوشونمک ایله وقت کچیردی . لورهن دوقه‌سی : « قوللرینی آچهرق ! » جوابی ویردی . فقط لئوپولدک نظرنده صوبیه‌سکینک صاغ ویا صول طرفده اخذ موقع ایتسی مهم بر مسئله ایدی . ملاقاتک بر میسدانده وآت اوزرنده وقوعه کلسی ، ایکی حکمدارک قارشی قارشی‌یه طورمسی قرارگیر اولدی . صوبیه‌سیکی برقاج بیاغی سوزدن صکره حیواننک دیزکیننی چویردی وشاید اردوسنی کورمک ایسترسه جنراللرینی بو ایشه مأمور ایتدیکنی سویلیه‌رک ایمپراطوردن آیرلدی . زوجیه‌سی (ماری قازیمیر) ه یازدینی مکتوبلرده لئوپولدک نانکورلکنی شو صورتله تصویر ایدیور :

قیرمنی روسیه پالاتی اردومنی ایمپراطوره کوستردی . فقط عسکرلرمن شمدی‌یه قدر چکدکلری محن ومشاقدن ، قاتلانقلری محرومیتلردن طولای ایپرا . طورک - ولوکه شاپقه‌سنی چیقاروب کندیلرینی سلاملاق صورتیه اولسون - تشکره تنزل ایتمه‌مسندن شکایت ایدیورلر . بزه نه حیوانات ایچون اوت ، نه‌ده ارزاق ویریورلر . خسته‌لرمن کوبره ییغینلری اوزرنده یاتورلر . پک چوق اولان مجروحلرمنک پره‌سبورغه قدر کوتورلرلی ایچون لازم کلن کیلری ویر-

میورلر. اورایہ کیدہ بیلسک مجروحین و عسکری کندی کیسہ مدن تداوی و اعاشہ یہ موفق اولور ایدم .

اولولرمنی ، حتی بیوک رتبہ دہ کی ضابطانک نعلشرینی مزارقلرہ دفن ایتمک ایستہ میورلر ... اشیارلرمنی یغما لیدیورلر . کریدہ قالمش بارکیرلرمنی آلوب کوتوربیورلر ... ترک اردو کاہندہ بولدیفغیز یولافلر اولمسہ یدی بارکیرلرمنک ہپسی تلف اولہ جقدی . اگر طونہ اوزرنندہ برکوپری انشا ایدرک دشمن مملکتہ مرورمنی تأمین ایتمش اولسہ لردی اورادہ دہا ای یشایہ بیلیردک . اورادہ ارزاق بولہ بیلیردک . فقط ویانہ رجال حکومتی ہرشیئی تأخیر و تعویق ایدیورلر . شمدی تہلکہ دن قورتولمش اولدقلری ایچون ہردرلو سفاہتہ تکرار باشلادیلر . حال بوکہ جناب حق بوندن طولانی اولنرک باشنہ برفلاکت کتیرمشدی . ویانہ قوماندانی قیرلردہ آجلقدن اولن عسکرلرمندن برازیہ جک بولق امیدیلہ شہرہ طوغری کیدنرک ویانہ یہ کیرملرینہ مانع اولق و اولنرک اوزرینہ آتش ایتمک ایچون امر ویرمشدر . اک مشہور عائلہ لر ارکانندن بوقدر کیسہ لری غائب ایلدیکمز حرب عظیمدن صکرہ کویا وبایہ دوچار اولمشز کبی ہرکس بزدن قاچیور . شمدی بزم ایچون یاپہ جق شی اردومزک دشمن هجوملری قارشیدندہ دکل ، ہرشیئی بزدہ مدیون اولانلرک قصور و قباحتلری نتیجہ سندہ اریوب محو اولدیفغی کورہ رک متالم اولقندن عبارتدر . بوندن طولانی بوکون حرکت ایدیورم . احتمال کہ کیدہ جکم یردہ دہا بیوک بر آجلق بزی بکلہ یور . فقط عسکرلرمنک اوزرینہ آتش ایدن بوویانہ شہرندن برآن اول اوزاقلاشمق ایستہ یورم . وقتیلہ بنی اسرائیل فرات کنارندہ نہ حالہ بولمش ایسہ بزدہ بورادہ طونہ کنارندہ اویلہ بر حالہ یز . تلف اولان بارکیرلرمنہ ؛ قورتاردیفغیز کیسہ لرک نانکورلکنہ ، الدن قاچیریلان پک چوق فرصتلرہ آغلایورز . الحاصل ، ہرکس مایوسدر ؛ ہرکس ایمراطورہ امداد ایلدیکمز دن طولانی تأسف ایدہ جک درجہ دہ ایلری یہ واریور [*] .

[*] ایکی عصر صوکرہ مجارستان عصائی تأدیب ایدرک آوستریا خاندانی قورتارمش اولان روسیہ ایمراطوری نیکولا برکون شاعر (رزہ وووسکی Rzewuski) یہ « بدن اول لہستان قرالارینک اک بدلاسی کیمدر ؟ » دیہ صورمش . شاعر جواب ویرمکدہ تردد ایتمش . ایمراطور : « بن سویلیہیم ؛ صویہ سکیدر . چونکہ ایکیمزدن بشقہ آوستریایہ معاونت ایدن اولما مشدر . » دیتشد .

صوبیه سکی ایمپراطوری ویانه ده ترک ایتد کدن صکره عثمانیلری مجار-
ستانده تعقیب ایدرک غران [استرغون] ی ضبط ایتدی ؛ بعده پایتختی
اولان قراقووییه عودت ایلدی .

برنجی لئوپولد زماننده آلمانیا ایمپراطورلغنک وبوهمیا،
مجارستان قراللقرینک امور داخلیه سندن صرف نظر
ایدرک یالکز آوستریانک طرز اداره سنه دأربعض معلومات
آوستریا

مجمله ویره جکز: امور سیاسیه وعدلیه، امور مالیه وتجاریه، امور عسکریه
ایچون اوج مجلس ویا هیئت موجود ایدی . شیمدیکی کبی نظارتلرهنوز
تأسیس ایدلمه مشدی . لئوپولد بالجمله امور مهمه نك مذاکره سنده حاضر
بولنوردی .

اوزمان آوستریا اردوسنده ایتالیان (مونه قوقوللی)، فرانسر (صوش
Souches) ایله (شارل دو لورهن) و (اوژن دو صاووا) کبی مشهور
قوماندانلر موجود ایدی. لئوپولدک بدایت جلوسنده دائمی آوستریا اردوسی
یوقدی. عساکر دائمه اوزمان تأسیس ایدلدی. لئوپولدک وفاتنده آوستریا
اردوسی هربری ۲,۰۰۰ الی ۲,۵۰۰ کشیک ۳۶ پیاده، هربری ۵۰۰
الی ۱,۰۰۰ کشیدن مرکب ۳۱ سواری آلاپی موجود ایدی . عساکر
غیر منتظمه بونک خارجنده ایدی. اخذ عسکر اصولی کنجلیری یوکسک
برمعاش ویا مال غنائم ایله اطماع ایدرک طابورلره یازدیرمقدن عبارتدی.
لدی الایجاب ولایاتدن قوه جبریه ایله عسکر طوپلانیر؛ سرسریلر، اسرای
حربیه جبراً عسکره ادخال ایدیلیردی . طونه اوزرنده برکوچک فیلو
دخی تأسیس اولمئشدی . عسکرلر اکثریا معاش آله مدقلمدن همان دأئماً
ممالک عثمانیهیه آقین ایدرک راست کلدکلری کویلیری یغما ایدرلردی .
بوتجاوزلر کثیرالوقوع ایدی . حتی دولت عثمانیه حدودی تجاوز ایدنلر

بش یوزدن فضلہ اولمازویانلرنده طوپ بولنمازایسه سبب حرب عدایدله مسنی قبول ایتشدی .

اردونك معاشی وقتیه ویريله مه مسندن طولای ا کثریا عصیانلر وقوعه کلردی . ضابطان جاهل ایدی . مکتب حریه یوقدی . مجروحینك تدایسنه اعتنا ایديله مزدی . بتون بو نقصانلر امور مالیه نك یولنده کیتمه مسندن ایلری کلیور ایدی .

آوستریا ، مجارستان و بوهیمیا مالککندن هر برنده زادکان ، رهبان و شهرلرک وکیللرندن مرکب مجالس عمومیه بولندیغی حالده حکومت اکثریا تنظیم قوانین ویا امور اقتصادی و تجاریه ایچون بومجلسلرک رأینه مراجعت ایتمز ، اونلردن یالکز ویرکو ایستردی . ولایاتک اداره داخلیه سی مجلسلره براقیلمشدی . بتون ولایتلر آره سنده کمرکلر واردی . بو حال تجارتی صوڪ درجه تضعیب ایتکده ایدی .

بعض قانونلر پک غریب ایدی . مثلاً ، ۱۶۷۱ ده نشر ایدیان بر ضابطه قانوننده اهالی بش صنفه آیرلمش و هر بر صنفک نه کبی البسه کییه جکی ، نه کبی طعاملر ییه جکی تفرعاتیله برلکده قرارلشدیرلمشدی . ترزیلر ، آشجیلر قانون خلافده حرکت ایدنلری حکومته اخبار ایتکده مجبور ایدیلر . ویانه اوزمان پیس بر شهر ایدی . ۱۶۷۹ ده ظهور ایدن وبادن الی بیک کشی تلف اولمشدی .

استبداد اداره یه منضم اولان محاربات دائمه ، مضایقه مالیه ، جزویتلرک تحکمی آوستریایی ادبیات و صنایع نفیسه نقطه نظرندن دخی دون بر موقعده براقمشدی .

مجارستان

اون یدنجی عصرک نصف اولنده مجارستانک آوستریا
جاء منانه: اونه یدنجی اداره سی آلتنده کی قسمی پک فنا برحاله ایدی .
عصرک نصف اولنده محاربات اکسیک اولیوردی . عسا کرملیه غیر کافی
 اولدیغندن آوستریا حکمدارلری مملکتی آلمان، ایتالیا و اسپانیول عسکرله
 طولدریورلر؛ بواجنیلر ایسه مجارلرہ ظلم ایتمکدن کری طور میورلر ایدی .
 بودورده الکشیان دقت وقعه ره فورمه نك مجارلر آره سنده انتشاریدر .
 بوهمیاده ظهور ایدن (ژان هوس) مذهبی یواش یواش مجارستانه داخل
 اوله رق افکاری تجدیدات دینیه یه حاضر لاش ، بالاخره مجارستانک
 بریوک قسمی عثمانیلرک الہ کچنجه ره فورمه ایچون بر زمین مساعدمیدانه
 چیقمشدی . وسطی مجارستانده ، تاپس وادیسندہ قالیونیزم منتشر اولمشدی .
 ایکنجی رودولفک دور حکومتندہ [۱۵۷۶ - ۱۶۱۲] مجارلر
 آوستریا خاندانندن نفرت ایدیورلر؛ حقوق ملیه لرینه رعایت اولمیدیغندن،
 آلمان حاکمیتی آلتندہ قالدقلرندن طولایی شکایت ایلورلر ایدی . مع مافیه
 عثمانیلرله محاربات دوام ایتمکده ایدی . رودولف حدودی عثمانیلرک
 تجاوزلرینه قارشى مدافعه ایچون (اوننا) ایله (قولپا) آره سنده کی قضالره
 صرب مستعمرلرینی یرلشدیردی . هم چیفتجی ، همده محارب اولان
 صربلر بوضورتله مجارستانده یرلشدیلر وعصر مزه قدر دوام ایدن «حدود
 عسکریه» تشکیلاتی وجوده کتیردیلر .

۱۵۷۷ ده خرواتستانی عثمانیلرله قارشى مدافعه ایچون قارلوواج
 [قارلشتات] قلعه سی انشا ایدلدى . ۱۵۹۲ ده بوسنه بکربکی حسن پاشا
 (سیسهک) ده مغلوب اولدی . ۱۵۹۵ ده غران شهری آلمانیا ایمراطورلغی
 و مجارستان عسکرى طرفندن ضبط اولندی . بالاخره عثمانیلر اکری بی

آل دیلر . سلطان محمد ثالث ترانسیلوانیادہ خاج اووہ مظفریتنی قازاندی . عثمانیلر قیژرہدہ آلمانیا ایمپراطورلغٹک بیوک براردوسنی بوزدیلر [۱۶۰۱] . ۱۶۱۰ دە زیدو طوروق معاهدہسی عقد اولندی . بوندن صکرہ عثمانیلر مجارستاندن زیادہ ترانسیلوانیایہ اہمیت ویرمکہ باشلا دیلر .

فی الحقیقہ بوندن صکرہ مجارستانک مقدراتی ترانسیلوانیا وقایعہ مربوط ایدی . ترانسیلوانیا وویوودہ لغنہ تعیین ایدلمش اولان بوچقای [۱۶۰۴] - [۱۶۰۶] ہم دولت عثمانیہنک معاونتنی قازانمش ، ہمہدہ ترانسیلوانیا بکلککندن ماعدہا شمالی مجارستانک بر قسمی اوزرنده حاکمیتنی آوستریایہ تصدیق ایتدیر مشدی . بوبادہ عقد ایدیلان معاهدہ موجبہ بوچقای وارث براقہدن وفات ایدرسہ مملکتی آوستریا خاندانہ قالہ جق ؛ مجار پروتستانلرینہ سربستی و وجدان ویرلمسی ، قوماندانقلر ایلہ خدمات عمومیہ یہ یالکیز مجارلرک تعیین ایدلمسی کبی مجارستانہ بعض تأمینات ویریلہ جکدی .

اوزمان مجارستان قرالغی ترانسیلوانیا ، خروانستان ، اسلاوونیا ودالماسیا ایلہ برلکدہ ۵،۱۶۳ میل مربعندہ ایدی . بونک ۱،۲۲۲ میل مربعی آوستریا خاندانہ ، ۱،۸۵۹ میل مربعی دولت عثمانیہ یہ ، ۲،۰۸۲ میل مربعی بوچقایہ عائد ایدی .

بوچقایک بردن برہ وفاتی اوزرینہ آوستریا خاندانی سالف الذکر معاهدہ یہ استناداً ترانسیلوانیایی ضبط ایتمک ایستہدی ایسہدہ دیت مجلسی اولاسکیز موند راقوقچی یی ، بعدہ اونک استعفا سندن صکرہ غابرییل باتوری یی پرنس انتخاب ایتدی [۱۶۰۸] .

ایکنجی رودولفک خلفی ماتیاس مجارلرک حقوق ملیہ لرینہ رعایت ایتمک صورتیلہ مجارستانی آوستریا خاندانہ بند ایتمک ایستہدی . باتورینک وفاتندن صکرہ ترانسیلوانیادہ ظهور ایدن قاریشیققلرہ مداخلہ ایدرک

بر آراق بومملکتی ضبط ایده جکنی امید ایتدی . فقط حریت وجدان واستقلال سیاسیرینه پک مربوط اولان ترانسیلوانیالیر پروتستان مذهبنده بولنان غابرییل بهتلن [بهتلن غابور] ی پرنس انتخاب ایتدیلر . بهتلن غابور [۱۶۱۳ - ۱۶۲۹] حریت مذهبییه ، اردوده انضباطی ، اداره مملکتده انتظامی تأمین ایلدی . پروتستانلر ایله قتولیکلر ، آوستریالیرله عثمانیلر آره سنده موازنه یی محافظه یه چالیشدی .

فقط ایکنجی فردیناند [۱۶۱۹ - ۱۶۳۷] تحته چیقدینی و اوتوز سنه محاربه سی باشلادینی زمان بهتلن غابور پروتستانلنی و مجار ملتنی تهلکه ده کوره رک ایمپراطور علیه نه حرکت ایتدی ؛ بوهیمیه یاردم ایتک ایسته دی . فقط نه فرانسه نك، نه ده لهستانك معاونته نائل اوله مدی . دیگر طرفدن دولت عثمانیه مجارستان امورنده علاقه دار کورونموردی . چهلرک مغلوبیتی اوزرینه بهتلن غابور دخی فردیناند ایله مصالحه یه ، مجارستان تاجندن فراغت ایدرک ترانسیلوانیا ایله اکتفایه مجبور اولدی . بوندن صکره کی مساعیسندن هیچ بر فائده حاصل اولمدی .

بتلن غابورک یرینه ترانسیلوانیا پرنسلکنه انتخاب ایدیلن ژورژ راقوچی اوتوز سنه محاربه سنك اسوج دوره سنده صلحچرورانه برمسلك اتخاذایتدی . اوچنجی فردیناندك ۱۶۳۷ سنه سنده جلوسنی متعاقب جزویتلرک تأثیریه مجار پروتستانلرینه ظلم ایدلایکندن فرانسه واسوج ایله اتفاق مذاکراتنه کیریشدکن صکره آوستریا یه اعلان حرب ایلدی ؛ مجارستانه کیردی ؛ فقط ایمپراطورلق اردوسی قارشیسنده رجعته مجبور اولدی . معافیه ایمپراطوردن بعض قلعه لر آلدی .

بونك اوغلی و خلفی ایکنجی ژورژ راقوچی [۱۶۴۸ - ۱۶۶۰] اسوجك معاونتیه لهستان تاجنه نائل اولق ایسته دی . حال بوکه دولت

عثمانیہ حدودی اوزرنده ترانسیلوانیا ولہستاندن متشکل قوی بر دولتك
تأسسنه راضی اوله مازدی . بو سبیلہ ظهور ایدن محارباتده ژورژ تلف
اولدی . عثمانلی اردولری ترانسیلوانیایه کیردیلر . نهایت ترانسیلوانیالیلر
دولت عثمانیه نك نامزد کوستردیکی میخال آپایی وویووده لغه قبول ایتدیلر .

برنجی لئوپولدک دور حکومتی [۱۶۵۷-۱۷۰۵]
اوسه برنجی عصرک نصف
مجارستانده پک فناخاطره لر بر اقمشدر . مجارستان
اضیرنده مجارستانه
دیت مجلسی لئوپولدک رسم تتوجنده حقوق

ملیه رعایت و عساکر اجنبیه نك مملکتدن تبعید ایدلمسی ،
پروستانلر دخی سربستی و جدانک تأمین اولمسنی طلب ایتشلردی .
اوسره ده کوپرلی زاده فاضل احمد پاشانک من غوتار محاربه سیله
نتیجه لنن سفری وقوعه کلشدی . بو حرب مجارستان ایله ایمپراطورلق
قوتلرینک بر آراق برلشمسنی موجب اولدی . فقط (واسوار)
معاهده سی مجارستانه هیچ بر فائده تأمین ایتدی ؛ بالعکس بعض قلعه لر
وازجمله (غروس وارادین) دولت عثمانیه ترک ایدلدی .

لئوپولد مجارستانده هم ره فورمه یی بسبتون قالدیرمق ، همده مجار
ملتنک حقوق و امتیازاتندن هیچ برشی بر اقامق مسلکنی اتخاذا ایتدی .
مجارلر بوکا تحمل ایده مزلر ایدی . فقط اجنبی معاونتدن بشقه امیدلری
یوقدی . معتبران مملکتدن بری مایانس الکتورینه یازدینی بر مکتوبده
شویله دییوردی : « مجارستان قرالغی اوילה براضمحلال وسفالته دوچار
اولمشدر ، که اگر جناب حق خرستیان پرنسلره اونی مدافعه ایتک
فکرنی الهام ایتز ایسه عالم عیسویتک وبتون ملتک عثمانیلره قارشی
قلعه سی حکمنده اولان بو حکومت محو اوله جقدر . مجارستانک یوقاری
ولایتلری اودرجه یأسه دوشمشلردر ، که ترکلرک حمایه سنه التجادن بشقه

چاره سلامت كوره ميورلر . مجارلر ، آردهده كي خصومت مليه دن طولاني ، تركرك حاكيتدن دائمانفرت ايتملر در . فقط بوكون بالضروره بو حاكيت قاتلانغه حاضر درلر .

مجارلر ك مراجعت ايتدكلري فرانسه عايلره معاونتدن امتناع ايتدي ؛ آفاني لا قيد طوردي . مع مافيه مجارلر عصيان ايتديلر . لكن ايمپراطور رؤساي عصاني توقف واعدام ايتديرمكه موفق اولدي . بوندن صكره وطنپرورلره ، پروتستانلره اجرا ايديلن مظالم بك مدهشدر . فقط بو ظلملر مجارلر ك فكرندن آرزوي استقلالي اخراج ايده مدي . عصاتك باشنه چكن (امرنج دوتوكولي) بر اردو طوللادي ؛ براق دفعه مورواويه تجاوز ايتدي . كندي رسمي حاوي سكه ضرب ايتدير ميور ، بر حكمدار مستقل كي اجراي حكومت ايلور ايدى . ايمپراطور ك ويرمك ايسته ديكي بعض مساعدات ايله اكتفا ايتك ايسته مدي ؛ مستقل مجارستانك قرالى اولمق املنده ايدى .

توكه لينك اميدي قره مصطفى پاشانك قومانداسنده ويانه يه طوغري ايلريه ين عثمانلي اردوسنده ايدى . فقط عثمانيلر ك مغلوبتي اوزرينه ايمپراطورلق اردوسي مجارستانه كيردي ؛ عثمانلي اردوسنى مهاج موقعنه قدر تعقيب ايتدي . قره مصطفى پاشا دوچار اولديغي هزيمتلردن توكه لي بي مسئول طوته رق بلغراده حبس ايتديردي . توكه لينك محبوسيتي اوزرينه مجارستان عصياني ده ختام بولدي . « قرص قرالئك » طرفدارلري طاغيلدي ؛ قلعه لري تسليم اولدي .

لئوپولدك عصياني بر طرف ايتدكدن و مجارستانك بر قسمنى عثمانيلردن آلدقدن صكره عادلانه بر اداره تاسيس ايتمى لازم كليركن بالعكس ظلم وشدته بك ايلريه واردى . اعلان ايديلن عفو عمومى كرى

آلندی ؛ (نہ پوری) ده اوتوز کون اوتوز جلا، معصوم ویا مجرم
بر چوق مجار معتبرانی الك مدھش اشکنجہ لرلہ اولدیردیلر .

لئوپولد بوقدر ظلمدن صکرہ مجارلردن ہر درلو مساعداتہ انتظار
ایدہ بیلیردی . اوزمانہ قدر مجارستان قرالغی اتخابی ایدی . یعنی قراللق
دیت مجلسنک قراریلہ توجیہ ایدیلوردی . لئوپولد بو اصولی قالدیرہ رق
مجار قرالغی ہابسبورغ خاندانہ حصر ایتک ایستہدی . ۱۶۸۷ ده
اجتماع ایدن دیت مجلسی مجار تاجنک ہابسبورغ خانداننک ارکک اولاد
شعبہ سندہ ارثاً انتقال ایلمسنہ قرار ویردی . قرال قوانین اصلیتہ مملکتہ
یمین ایتمکہ مجبور ایدی . ایکنجی آندره زمانندہ تنظیم ایدلمش اولان
قانون اساسینک، (آتون فرمان Bulle d'or) ک مشہور ۳۱ نجی مادہ سی
الغا ایدلمشدی . بو مادہ قرال لر قانون اساسی یہ عدم رعایتی حائدہ ملتہ
قرال علہ بندہ عصیان حقنی ویرمکدہ ایدی . دیت مجلسی بتون بومساعداتہ
مقابل اشکنجہ لرہ نہایت ویرلمسنی ، محبوسینک اخلائی سیلینی طلب
ایتدی . عفو عمومی اعلان اولندی .

بوندن صکرہ آوستریا مجارستانک عثمانیلرک اداره سندہ قالان قسمنی
استردادہ چالیشدی . (لوئی دوباد) ک قومانداسندہ کی آوستریا اردوسی
طونہ نک جنوبنہ قدر ایلریلہ دی . کوپرلی زادہ فاضل مصطفی پاشانک
زمانندہ کری یہ چکیلن آوستریا لیلر ۱۶۹۱ ده (صالاتقامہن) محاربہ سنی
قازاندیلر . معافیہ عثمانیلر ازمیددہ کی منافسندن ترانسیلوانیایہ عودت
ایتمش اولان توکہ لینک معاونتیلہ زانتا محاربہ سنہ قدر طایاندیلر . پرنس
اوژہن دوصاووا بو محاربہ دہ اردومزی مغلوب ایتدی . نہایت، قارلوفچہ
معادہ سی عقد اولنہ رق دولہ عثمانیہ مجارلرہ معاونت و ترانسیلوانیا

اوزرنده ادعاى حق ايتيه جكني تعهد ايلدى . مجارستاندن آنجق تاييس ايله ماريوس آرمسند بر كوچك پارچه دولت عثمانيه ده قالدى .
 بو محاربات ائناسنده آوستريا خاندانى ممالك عثمانيه ده كي صربلردن چوق فائده كوردى . مجارستان طوپراغنه هجرت ايدن صربلر آوستريا اردوسنه داخل اولديلر . لئوپولد قديم مجارستان قراللىق اسكى بوسنه وبلغارستان اوزرنده كي حقوقدن بحث ايدرك تركيانك اسلاو اهاالىسى دولت عثمانيه عليه عسيانه تشويق ايتدى ؛ ايمپراطورك دعوتى اوزرينه ايك صرب بطريقى اوتوزبش ، قرق بيك عائله ايله مجارستانه كچدى . بو صربلر ، كنديلرينه ويريلن امتيازات موجبجه ، آريجه برملت تشكيل وعثمانليرك ، مجارلرك عليه وقوعه كلن محارباتده لئوپولد ايله اخلاقه پك چوق خدمت ايتديلر . صرب مهاجرلرينك اخلافي اليوم جنوبى مجارستانده مهم بر موقع طوتمقده درلر .

اسوج

اون يدنجي عصرده آوروپا دول معظمه سى
 صره سنه كچن اسوج دولتنك قانون اساسيسى
 موجبجه قدرت حكومت قرالده ، سناتوده ،
 اوده يدنجي عصرك
 نصف اولنده اسوج
 ديت مجلسنده ايدى .

اسوج لساننده (Riksdag) دنيلن ديت مجلسى درت
 صنف خلقك ، يعنى زادكان ، رهبان ، بورژوا و كويليرك و كيللرندن
 مركب ايدى . قرالك آرزو ايتديكى زمان اجتماع ايتمكه برابر حقوق

وصلاحتی واسع ایدی. یکی قانونلرک تنظیمی، اعلان حرب ویا عقد صلح ایتک خصوصندہ بو مجلسک انضمام موافقتی شرط اولدینی کبی قرال ویرکو طرح ویا عسکر جمع ایتک ایچونده دیت مجلسنه مراجعت ایدردی. زادکان دیگر اوچ صنفک فوقندہ ایدی. عدلیه جه، ویرکوجه برچوق معافیتی حائز ایدی. حکمدار خدمات عمومیهده زادکانی ترجیح ایتدیکندن اداره دولت تمامیلہ زادکان النده ایدی.

اسوج لساننده مجلس قرالی معناسنه (ریقسرائاد Riksråd) دنیلن سناتو درت بش بیوک مأمور ایله اک بیوک عائله لره منسوب برقاچ اعضاءد مرکبدی. بو مجلس دخی دیت کبی اجتماع ایدر وقانون تنظیمی، حرب و صلح، ویرکو، عسکر مسئله لرینی مذاکره ایلردی. حقوق نقطه نظرندن پک واسع اولان بو ایکی مجلسک صلاحیتی بحث ایلدیکمز زمانده فعلاً محدود ایدی؛ بتون قدرت حکومت قرالده طویلانمشدی.

فی الحقیقه اوزمانکی قرال ایکنجی کوستاو آدولف [۱۶۱۱-۱۶۳۲] داخلاً قرالک قدرت حکومتنی تحدید ایدن موانعی قالدیرمغه چالیشدی؛ شهرتندن، مظفریات خارجیه سندن بالاستفاده هرایکی مجلسه تحکم ایتدی. خارجاً اوتوز سنه محاربه سنه اشتراک ایدرک شمدیکی اسوجک وسطوشمال طرفلریله فلانڈیا واستونیا قطعہ لرندن عبارت اولان دولته روسلردن آلدینی (اینگریا) و (قاره لیا) یی، لهستاندن ضبط ایتدیکی (لیوونیا) یی الحاقه موفق اولدی. بومظفریاتدن بالاستفاده اسوجک تشکیلات اداریه سنی ایسته دیکی شکله قویدی.

ولایاتده قوای ملکیه وعسکریه بیی تفریق، حکومت مرکزیه نک نفوذینی تزئید، امور عدلیه بیی اصلاح ایتدی. اساساً ماهر بر قوماندان اولدینی ایچون اک زیاده اردو ودونما ایله اوغراشدی. تجارت و صنایعی

دخی ترقی ایتدیرمک ایسته‌دی. لکن نه بو ایشلره وقوفی اولان آدم‌لر، نه‌ده لازم کان سرمایه‌لر اسوجده یوقدی. اوزمان اسوج پک فقیر بر مملکت ایدی. اعتبار مالیهی هیچ منابه‌سنده ایدی. کوستاو آدولف امور مالیهی اصلاحه اهمیت ویرمکله برابر پک چوق دفعه‌لر جدی مشکلات قارشیسنده بولندی واکثریا یوکسک فائض ایله پاره استقراضه مجبور اولدی.

کوستاو آدولفک وفاتنده آلتی یاشنده قریستین قرالیجه قریستین اسمنده بر قیزی قالمشدی. دیت و سناتو مجلسلری قریستینی قرالیجه اعلان و بر هیئت نیابت تشکیل ایتدیلر. کوستاو آدولفک زماننده کی رجال حکومتدن مرکب اولان وبالخاصه (اوقران استیرنا Oxenstierna) نک نفوذی آلتنده بولسان هیئت نیابت متوفی قرالک سیاستنی تعقیب ایتدی. یالکزر سناتو صورت دائمده پایتخته اجتماع ایدر بر مجلس اولدی.

قریستین زماننده اسوج اوتوز سنه محاربه‌سنه دوام ایدرک (اوده‌ر) منصبی ایله پومه‌رانیا، شمال دگری ساحلنک بر قسمی، (وه‌زه‌ر) منصبی، (برم) و (وه‌ردن) پسقوسلقلری اراضیسنی آلدی. ده‌ا اول دانیمارقه ایله وقوعه کان محاربات نتیجه‌سنده غوتلاند، داغو، اوزهل آطه‌لرینی ضبط ایتمشدی. بوضورتله اسوج بالطق سواحلی دولترینک اک قوتلیسی اولدی.

کوستاو آدولف و قریستین اردولرینک اوتوز سنه محاربه‌سنه اشتراک‌لری، دانیمارقه قارشی محاربه‌لری اسوجده اخلاق، عادات و افکار اوزرنده خیلی مهم تأثیرات بر اقدقندن ماعدا تبدلات سیاسیه‌یه

دخی سبب اولدی . آلمانیا محاربائی اسوجلیلرک اخلاق وعاداتی دیکشیدردی . آلمانیساده یغما ایدیلن بی نهایت ثروتلر ، قیمتدار آثار صناعیه اسوجه نقل ایدلدی . اوزمانه قدر غایت ساده وقاعتکار یشایان اسوجلیلر اوروپانک ممالک ساثرمنده کی طرز معیشتی کوردیلر ؛ مدنیت وسفاهته هوس ایتدیلر . دیگر طرفدن محاربه ومعاہدات اسوجک اوروپا دولتلری وبالخاصہ فرانسه ایله طوغریدن طوغری یه مناسبته بولمنی تأمین ایدلدی . افکاراجنبیہ مملکتده یاییلمغه باشلادی . بواحوالدن بتون ملت ، فقط بالخاصہ زادکان مستفید اولدی . یغما وغارتدن بالطبع اک زیادہ قوماندانلر استفاده ایتشلر ایدی . طرز معیشتلرینی اک زیادہ یوکسک صنفلر دیکشیدردی . اوروپانک اہمیتی حکمدارلری میانہ کچن اسوج قراللری متفقلری اولان فرانسه قرالنی تقلیدہ میل ایتدیلر ؛ اونک کبی محتشم برسرایہ ، پارلاق صنف زادکانہ مالک اولمق ایستہ دیلر . معافیہ افکار اجنبیہ زادکانک حقوق سیاسیہ سنی تحدیدہ میال ایدی . چونکہ اسوجده دخی اوروپانک قسم متبایسنده حکمفرما اولان مطلقیت اداره فکری کیرمشدی .

اسوج محاربه دن مظفر چیقمقلہ برابر پک بیوک مشکلات وغوائل مالیه قارشیسندنہ بولندی . فرانسه نک ویردیکی تخصیصات اردونک اداره سنہ کفایت ایتوردی . حکومت پاره بولہ بیلیمک ایچون بعض فنا تدبیرلرہ مراجعت ایتدی . ازجملہ قرالک املاک خصوصیہ سی صاتیلدی ، زادکان الہ کچدی . زادکانک قوتی آرتدی ؛ براز صکرہ زادکان قرالہ ویرہ جکلری ویرکولری کوییلردن آلمغہ چالیشدیلر وبوصورتلہ کوییلری «سرف» یاقین بر حالہ کتیردیلر . بوندن طولانی مملکتده عمومی بر خشنودسزلق حاصل اولدی .

۱۶۴۴ ده سن رشنده وصولی اعلان ایدیلن قرالیچه قریستینک طرز حکومتی بو خشنودسزلنی بستیون آرتدیردی . قریستین ذکی ، معلوماتلی ایدی ؛ بر چوق نقطه نظر دن مکمل بر حکمدار اوله بیلیردی . فقط طبیعتی پک غریب ایدی . امور حکومتدن پک چابوق اوصاندی ؛ ممکن مرتبه پارلاق ، محتشم بر سرایده اکنمکدن بشقه بر شی دوشونمه مکه باشلادی . زادکانک عددینی کولونج اوله جق درجه ده چوغالتدی ؛ اونلری نم والطافه غرق ایتدی ؛ بو صورتله خزینه دولت بوم بوش قالدی .

اسوجک حسن طالعی اثری اوله جق ، که قریستین قرالیچه لکدن پک چابوق اوصاندی . ۱۶۴۹ سنه سنده ترک سلطنته قرار ویرمش اولدیغنه سنه مذکورهدن اعتباراً وراثت مسئله سیله اشتغال ایلکه باشلامسی دلالت ایدر . اولنک ایسته مه مشدی . (وازا) خادانک صوک ومارشی ایدی . یکنی (شارل کوستاو) ی ولی عهد سلطنت اتخاذا ایتدی . شارل کوستاو (کوستاو آدولف) ک همشیره سنک اوغلی ایدی . قرالیچه ۱۶۵۴ ده اسوج تختنی اوکا براقده دن صکره ممالک اجنبیه کیتدی ؛ پک چوق سنه لر بر حیات قالدی .

دوره سلطنتی پک قیصه اولان [۱۶۵۴-۱۶۶۰] اوننجی شارل کوستاو
شارل کوستاو لهستان ودانیمارقه محارباتنده کی مظفریات قهرمانانه سیله مشهوردر . بالخاصه بو محاربه لرله مشغول اولدی . فقط شارل کوستاوک دور حکومتی سیاست داخلیه نقطه نظرندن دخی مهمدر .

قریستینک بوزدینی اداره نی یولنه قویمق ایجاب ایدیور ایدی . مضایقه مالیه صوک درجه ده ایدی . هر شیدن اول پاره بولمق ایچون

اولجہ زادگانہ ویرلمش اولان قرالک املاک خصوصیه سنک بر قسمی استرداد ایدلدی . استرداد ایدیلن املاک وارداتیله سرایک، اردونک، صنایع معدنیہ نک احتیاجی تأمین اولندی .

بو تدابیر سایه سنده مملکت کندینی طوپلارکن اوننجی شارل وفات ایتدی [شباط ۱۶۶۰] ؛ هنوز بش یاشنده برچوجق براقدی . بوچوجق اون برنجی شارل ایدی [۱۶۶۰ - ۱۶۹۷] .

شارل کوستاو وصیتنامہ سنده رجال دولتن بش ذات **اونه برنجی شارل** ایله کنج قرالک والده می و عمجه سندن مرکب بر هیئت نیابت تأسیس ایتشدی . فقط تبدل سلطنت اسوجک لهستان ودانیارقه ایله حرب ایتدیکی، هولاندالیرک دانیارقه یه معاونت ایتدکلری و آلمانیا امپراطورینک اسوج علیهنده متشکل اتفاقه داخل اولمغه حاضرلاندینی بر صروده وقوعه کلشدی . دیت و سناتو مجلسلری بوندن استفاده ایتمک ایسته دیلر . اولاً ، متوفی قرالک برادرینی هیئت نیابتدن چیقاردیلر . صکره ، قانون اساسی یی تعدیل ایدرک هرایکی مجلسک صلاحیتی توسیع و هیئت نیابتک قدرت حکومتی تحدید ایتدیلر .

هیئت نیابت کندیسنه براقیلان حقوق و صلاحیتی دخی حسن استعمال ایدمه مدی . هیئت ارکانی آره سنده اتحاد افکار اولماسندن طولانی سناتونک تفوق و نفوذی کوندن کونه آرتدی . غوائل مالیہ هر زمانکندن زیاده ایدی . وقت صلحه دول اجنیه نک ویردیکی تخصیصات ایله مصارفی قیامق ایجاب ایدیوردی . بو حال غایت متلون و قرارسز بر سیاست خارجیه تعقیبه سبب اولدی .

فی الحقیقه ۱۶۶۸ ده اسوج هولاندالیرله برلشهرک اون دردنجی

لوتی علیهنده کی اتفاق مثله داخل اولدی . صکره ، اون دردنجی لوتی ایله اتفاق ایدوب هولاندالیرله حربه کیریشدی .

قرال ۱۶۷۲ ده سنرشدی واصل اولدی . اداره اموریه اله آملهه احوال دیکشمده ؛ بالعکس فالشده . او زمان اون برنجی شارل بالاخره کوستردیکی مزیتله صاحب دکلش کی کورونیوردی . هیئت نیابتک وقیله تعقیب ایلدیکي متلون سیاست خارجه نك نتیجه سی اولمق اوزره اسوج مشکل بر موقعده قالدی . هولاندا محاربه سی اثناسنده براندبورخ الکتوری فره دریق کیوم اسوجلیری (فربه لین) موقعده قانلی بر هزیمته اوغراتدی [۱۶۷۵] . بو هزیمتدن صکره اسوج پومه رانیای ترکه مجبور اولدی . واقعا اون دردنجی لوتینک توسطیله دانیمارقه اسقاندیناویا شبه جزیره سنده وبالطرق ساحلنده ضبط ایتمش اولدینی ممالکی اعاده ایتدی ایسه ده مملکتک احوال داخلیه سی پك فنا ایدی .

دولتک اعتبار مالیسی محو اولمش ، بورجی آرتمش ایدی . لازم کلن وارداتی بولمق ممکن دکلدی . چونکه اراضینک اک بیوک قسمی زادکان النده بولندینی ایچون ویرکودن مستنا ایدی . قرا له عائد املاک خصوصیه نك استردادی معامله سی شارل کوستاوک وفاتی متعاقب تعطیل ایدلمش ایدی . سناتو بو معامله یه معارض ایدی . صنف زادکانک کیتدکجه متزاید نفوذی مملکتک اصلاحنه مانع اولمقده ایدی . دیگر صنفلر بونی آ کلامقده وزادکانه ، سناتویه قارشى هر کون ده ا فضلہ بر کین وخصومت بسله مکده ایدی .

اون برنجی شارل واسع بر اصلاحات پلانی ترتیب ایتمشدی . اسوجه مستقل وملی بر سیاست خارجه تأمین ایتک ، داخلأ قراللغک قدرت حکومتی تحدید ایدن قوتلری ازمک ایسته یوردی . بونک ایچون ده اولاه

سناتونک ، زادکانک نفوذنی تنقیص ایتک لازم ایدی . زادکاندن ماعدا صنفلر ایله کوچک زادکان بوبابده قراله معاونت ایتمکه حاضر ایدیلر . قرال دیت مجلسنک قراریلہ سناتوی برہیئت مشاورہ درکسنہ ایندیردی . ایکئی سنہ صکرہ دیت مجلسندہ صنوف مختلفہ وکیللری آرسندہ ظهور ایدن اختلافادن بالاستفادہ منازع فیہ مسائلی بالذات حل ایتک صلاحیتنی استحصال وبر مدت صکرہ هیچ بر قونترولہ تابع اولمہدن قانون تنظیمی حقنی قراله حصر ایتدی . بو صورتلہ مطلقیت اداره تأسس ایتمش اولدی .

اون برنجی شارل استحصال ایلدیکی حقوق وصلاحیتی حسن استعمالہ موفق اولدی . محاربات خارجہ دن هیچ برینہ اشتراک ایتک ایستہمدی وملتکتنہ اوزون بر دورہ صلح ومسالت تأمین ایتدی [*] . بو سایہدہ اسوج او زمانہ قدر کورمیدیکی رفاه ومعموریتہ نائل اولدی . قرالک قدرت حکومتی توسع ایدنجه بالطبع شعبات اداره دولتہ تبدلات وقوعه کلدی . حکمدارک حکم ونفوذی بتون دولت ایشلرنده حس ایدلمکه باشلادی . اداره حکومتده نظام ، انتظام واعتنا اثرلری کورولدی . اسوجک باشہ بر چوق فلاکتلر کتیرمش اولان ہیئت نیابت اعضاسی محاکمہ ایدلایلر ؛ خزینہ دولدن آلمش اولدقلری ادعا

[*] اون برنجی شارلک پدری باویراده کائن (دوپون Deux-Ponts) دوقهسی ژان قازیمیر ایدی . اون دردنجی لوئینک بو دوقه لئی الحاق ایتسندن حدتله نن اون برنجی شارل ۱۶۸۶ ده انکلیر ، هولانڈیز وآوسترایلیرلہ عقد ایتدیکی معاهدات ایله آئوگسبورغ اتفاقنه داخل اولدی وهیئت متفقہیہ ۹,۰۰۰ عسکر وعد ایتدی . فقط ۱۶۹۲ دن اعتباراً اون دردنجی لوئینک تکلیفی وجهلہ محاربلر آرسندہ توسطہ چالیشدی . وفات ایتدیکی زمان (ریسویق) مذاکرات صلحہ سنہ مأمور ایتمش اولدینی مرخصلر وظیفہ توسطی ایفا ایتشلر ایدی .

ایدیلن مبالغ مهمه بی اعاده یه مجبور اولدیلر . املاک خصوصیه استرداد اولندی . زادگان طرفدن حال اسارتیه القا ایدلک اوزره بولنان کویلیلرک مال و جانی تأمین ایدلدی . واردات دولت آرتدی . فضله واردات اردونک و دونمانک اصلاحنه ، تزیدینه صرف ایدلدی . اون برنجی شارلک صوک سنه لرده بالخاصه امور مالیه پک یولنده ایددی . وولترک دیدبکی کی اون برنجی شارل ۱۶۹۷ سنه سی نیساننده وفات ایلدیکی زمان اون بش یاشنده اوغلی اون ایکنجی شارل داخل صاغلام ، خارجاً حرمته مظهر برتخت ، فقیر ، فقط قراله قارشی احترامکار و مطیع تبعه ، ماهر وکلا طرفدن اداره اولنان منتظم بر اداره مالیه ترک ایتدی .

روسیه

اون یدنجی عصر باشلادیغی زمان روسیه اغتشاشات **بوریس غودونوف** وخیمه ایچنده ایدی . ۱۵۸۴ ده وفات ایتمش اولان چار دردنجی ایوان (فهئودور) و (دیمتری) اسمنده ایکی اوغل براقشدی . دیمتری هنوز ایکی یاشنده ایدی . فهئودور چار اعلان اولندی . فقط عقلاً ضعیف اولدیغی ایچون حکومت حقیقت حالده بویارلردن مرکب اولان (دوما) مجلسنده قالدی . بومجلسده اک زیاده صاحب نفوذ اولان زادگان دیمتری و والدہ سی و والدہ سنک اقرباسیلہ برلکده بر مناستره کوندردیلر . بوزادگان آره سنده بولسان بوریس غودونوف Boris Godounof بتون رقیلرینه غلبه ایتدی ؛ همشیره سنی چاره ویره رک خاندان حکمداریه داخل اولدی و حکومتی بالذات اداره یه باشلادی .

سیاست خارجیہ دہ خلی مہارت کوسترن ، قریم تاتارلرینک تجاوزلرینی منعه موفق اولان وسیبریا فتوحاتنه دوام ایلین غودونوفک سیاست داخلہ سی انشته سنک وفاتی متعاقب تحتہ حیقہ منسی تأمین مقصدینہ معطوف ایدی . بویارلرہ ، بیوک زادکان استناد ایدہ مدیکی ایچون کوچک املاک صاحب لرینک منونیتنی جلبہ چالیشدی . بونلرک اراضیلری داخلندہ کی کویلیلری طوپراغہ ربط ایدرک میلیونلرجه آدملری حان اسارتہ القایا ایتدی .

اوزمانہ قدر روس کلیسا سنک رئیس روحانیسی موسقووه متروپولیدی ایدی . بو متروپولید لهستان قرالہ تابع اولان کیف پسقوسی ایلہ ہمرتبہ ودولت عثمانیہ تابع قسطنطنیہ بطریقک ایسہ دونندہ ایدی . غودونوف موسقووه متروپولیدینی بطریقککہ ترفیع وبو مقامہ کندی آدملرندن برینی تعیین ایتدی .

چار (فہ ئودور) ک وفاتندن صکرہ غودونوفک تحتہ حیقہ منسہ یکانہ مانع والہ سیلہ برلکدہ برمناستردہ یشایان سکزیاشندہ کی دیمتری ایدی . ۱۵۹۱ سنہ سنفدہ دیمترینک وفات ایتمش اولدینی موسقووه دہ خبر آلدی . ولی عہدک صورت وفاتی مجهول قالمقلہ برابر بوریسک آدملری طرفندن اولدیرلیدی محققدر . بو صورتلہ فہ ئودورک وفاتندہ غودونوفک تحتہ حیقہ منسہ بر مانع قالمامشدی .

۱۵۹۸ دہ فہ ئودور وفات ایتدی . موسقووه چارلرینک ، روسیہ دولتی مؤسسلرینک سلالہ سی منقطع اولمشدی . چاریچہ ایرہن کندیسہ تکلیف ایدیلن حکومتی قبول ایتدی . غودونوف برچوق انتریقہ لردن صکرہ مجلس عمومیدہ حکمدارلغنی اعلان ایتدیرمکہ موفق اولدی .

ایمپراطور اولنجه بو یارلری صوک درجه تضییق ایتدی . اک مشهور زادگان عائله لرینی نفی و تغریبدن چکینمدی .

دوره اغتشاشات بوریس غودونوف اداره دولتمده کی مهارتنه رغماً هر کسک نفرتی قازانمشدی . بو یارلر کندیلرینه ظلم ایتدیکی ، موسقووه اهالیسی اجبیلره یوز ویره رک تجارت ملیه یی حمایه ایتدیکی ایچون ، کوییلر کندیلرینی حال اسارته القا ایدن قانوندن ، کوچک املاک صاحب لری بار تکالیفک آغیرلغندن طولایی چارک علیهنده ایدیلر . وقیله لیتوانیا مملکتی اولان نوو غورود و پسقوف اهالیسی ، دون و وولغا قازاقلری اداره مستبدیه آلیشه مامش لرایدی . وولغا کنارنده کی تاتار وفین قبائلی مملکتلرینه کلن روس مستعمرلرینک تجاوازا تندن ، وویووده لرک سوء استعمالاتندن ، میسیونرلرک غیرت دینه لرندن طولایی عصیان ایچون بر فرصته انتظار ایدیورلر ایدی . موسقووه اهالیسی قتل ایدیان ولی عهدده تأسف ایدیورلر ایدی . ۱۶۰۱دن ۱۶۰۴ تاریخه قدر دوام ایدن و ۵۰۰,۰۰۰ کشینک تلف اولسنی انتاج ایلین قحطلر ، وبالرا هالی یی بسبتون یأسه القا ایتدیکی ، هر کس بومصیبتلری تحتی ضبط و ولی عهد مشروعی قتل ایتدیرمش اولان چاره طرف الیه دن ویرلمش بر جزا کبی تلقی ایلدیکی صروده دیمترینک وفات ایتدیکی ، سلاح بدست اوله رق پدرینک تحتی ایستدیکی شایع اولدی .

دردنجی ایوانک اوغلی دیمتری نامنی آلمش اولان شخصک کیم اولدینی هنوز تمامیه معلوم دکدر . غربی روسیه اهالیسندن و کوچک زادکندن اولسی محتملدر . پولونیا قرالی اوچنجی سکیز موندک معاونت خفیه سی ایاه لهستانده لهردن ، قازاقلردن ، روسلردن خیلی طرفدار

بولمشدی . قتولیک مذہبی قبول ایدہرک پاپالک مقامنک توجہ و معاوتنی دہ
تأمین ایتشدی . ۱۶۰۴ دہ طرفدارلریلہ برلکدہ روسیہ کیردی .

بوریس قورقادی . مدعی سلطنت ایوانک اوغلی اولسہ بیلہ روسلرک
بویلہ ظن ایدہرک کندیسہ تابع اولملری احتمالی واردی . حکومت بو
شخصک (اوترہ پیہف Outrépief) اسمندہ سلک روحایدن مطرود
بر راہب اولدیغنی اعلان ایتدی . مع مافیہ دیمتری حدودی کچر کچمز
بر چوق شہرلر اہالیسی کندیسنی حکمدار مشروع طائیشلر ، عصیان
ایتمشلر ایدی .

بوریس غودونوف عاصیلرہ قارشنی اردولر ترتیب ایتدکی صرمہ دہ
وفات ایلدی [۱۶۰۵] . اون آلتی یاشندہ بر اوغلی و بردہ قزی واردی .
قوماندانلردن بعضلری غودونوف عائلسی ایچون حرب ایتک ایستہ میہرک
دیمتری طرفہ کچمکی منفعلترینہ دہا موافق بولدیلر . دیمتری موسقوویہ
کیردی ؛ غودونوف عائلسنی - قیزی مستنا اولمق اوزوہ - توقیف
واعدام ایتدیردی .

بوصورتلہ چار اولان دیمتری اردوسنی اصلاح ایتدی . پولونیا
قرالی ایلہ روما کلیساہنہ قارشنی اولجہ واقع اولان تعہداتنی ایفا ایتدی .
لہستان قرانلک ایستہ دیککی اراضی بی ویرمدی ؛ پاپالک مقامنہ روسلرک
قتولیک اولملری شمڈیلک ممکن بولمندیغنی بیلدیردی . تعہداتنک یالکیز
برمادہ سندہ ثبات ایلدی : عثمانلیرلہ تاتارلرہ قارشنی اہل صلیب طررندہ
حرب ایتک ایچون تدارکات عظیمہ حربیہ دہ بولندی .

مع مافیہ چارک بعض حرکاتی روسلرک خوشنہ کیتیموردی . پولونیالی
بر قیز ایلہ ازدواجی ، بو مناسبتلہ لہلردن مرکب بر معیت تشکیل ایتمی
غیر ممنونلری آرتدیردی . قتولیک لہلرک اطہر مغرورانہلری استرہ لیچ

عسکری آره سنده عصیان ظهورینه بيله ساب اولدی . بعض رؤسا تارلره قارشى كوندريك اوزره جمع ايديلن ۱۸,۰۰۰ عسکرى چارى لهلك الندن قورتارمق بهانه سيله موسقوويه ادخال ايتديلر . ديمتري سراي محاصره ايدن عاصيلر الندن قورتولمق ايجون پنجره دن آتلادی ، باجاقلىرى قيرلدى ، بعده اتلاف ايدلدى . بيك اوچ يوز قدر پولونيا لى تلف اولدى . بو عصيانك باشليجه محركرندن برى روريك سلاله سندن اولان واسيلي شويئسكى Vassili Chouiski اسمنده برپرس ايدى . موسقووه ليلر اوني چار اتخاب ايتديلر . فقط بعض ولايات ايله شهرلر يالكز موسقووه شهرينك اتخاب ايتديكى چارى قبول ايتديلر . ديمتريك بو دفعه ده وفات ايتديكى شايع اولدى . مملكت داخلنده بيوك برقاريشيقلق وقوعه كلدى . ايكنجى بر ساخته ديمتري دها ظهور ايتدى . پولونيا ليلر تكرار ايشه قاريشديلر . عاصيلر بر چوق شهرلره صاحب اولدقدن صكره موسقووه ي محاصره يه باشلاديلر .

چار اسوج قرالى طقوزنجى شارله (قاره ليا) قطعه سنى براقه رق ۵,۰۰۰ اسوجلى عسكر جلب ايتدى . بو قوه امداديه سايه سنده شمال شهرلرينى تحت اطاعته آلدى ؛ موسقووه ي قورتاردى . ساخته ديمتري قاجدينى صره ده اغتشاشادن استفاده ايتك ايسته ين لهستان قرالى براردو ايله روسيه يه كيردى ؛ چارك عسكرينه غلبه ايتدى [۱۶۱۰] . بويارلر واسيلي ي ترك سلطته مجبور ايلديلر . فقط چار اتخابنده اتفاق ايده مديلر . بوندن بالاستفاده لهستان قرالى موسقووه يه عسكر ادخال ايتدى . روس معتبرانندن بعضلى قرالى چار اتخاب ايتمكه ميال ايديلر . بونى بهانه اتخاذايدن اسوجليلر روسيه عليه دنونه لك (قاره ليا) و (اينغريا) قطعه لرني ضبط ايتديلر .

قاریشقلق صوگ درجہ بی بولدی . هر طرفه کویلر یاقیلور ، اهالی قتل ایدیلوردی . نهایت ، بوفلا کتیر حسیات ملیه بی اویاندیردی . هیئت رهبان روسیه بی اجنبیلرک الندن ، قاریشقلقدن قورتارمق ایسته یئرلرک باشنه کچدی . مختلف ولایتلردن طویلانان عسکرله عسکرینک مدافعه ایتدیکی موسقووه بی محاصره وضبط ایتدی . اسیر ایدیلن لهلر کوله صفتیه ولایاته کوندرلدی .

میخائیل رومانوف موسقووه ده بتون مملکتک مبعوثلردن مرکب بر مجلس عمومی اجتماع ایتدی . بو مجلس اسکی چار عالمه سنه مناسبتی اولان روستوف متروپولیدی (فیلاروت) ک اوغلی کنج میخائیل رومانوفی چار انتخاب ایلدی [۱۶۱۳] . یکی چار اول باول ولایانده اجرای شقاوت ایدن رؤسای اورتهدن قالدیردی . صکره ، لهستان ایله مذاکره کیریشدی . لهلر میخائیلی طانیمورلر ، لهستان قرائنک اوغلی ولادیسلوگ چار انتخاب اولمنسی ایسته یورلردی . اسوجلیلر دخی هنوز حرب ایتمکده ایدیلر . فقط اسوج حکمدار جدیدی (کوستاو آدولف) آلمانیا جهنده سربست قالمق ایسته دیکندن مذاکره کیریشدی . ایوانغورود ، یام ، قوپوریه ، اورده شق شهرلرینک اسوجه ترک ایدلمسی صورتیه عقد صلحه راضی اولدی [۱۶۱۷] .

بوندن صکره روسلر بتون قوتلرینی لهستان علیه استعمال ایتدیلر . لهلر بدایه بعض موفقیاته نائل اوله رق موسقووه به تقرب ایلدیلر ایسه ده شهری ضبط ایده مدیلر . بونک اوزرینه اوندرت یچق سنه ک برمتارکه عقد ایلدی [۱۶۱۹] . بو متارکه موجبجه اسمولنسق ایله سه وه ریا لهستانده قالدی . ولادیسلو چارلقدن واز کچمدی . یالکز طرفینک النده کی اسرا مبادله اولندی . بو میانده لهستانده موقوف اولان چارک بدری فیلاروت دخی موسقووه به عودت ایلدی .

چار تجربه سز، کنج، سجهٔ ضعیف وهان امی دینه جک درجه ده جاهل ایدی. بویارلرک نفوذی آلتنه کیرمشدی. فیلاره تک عودتی چار ایچون پک ایی اولدی. روستوف متروبولیدلکندن روسیه بطریقلکنه ترفیع ایدیلن فیلارهت ادارهٔ حکومته اشتراک ایدره بویارلری تأدیپ، چارک قدرت حکومتی توسیع ایتدی.

لهستانه قارشی اسوج حکومتی ایله اتفاق ایدن، انکلتزه و فرانسه ایله مناسبات تجاریه تأسیسه چالیشان میخائیل زماننده آز قالسون دولت عثمانیه ایله بر حرب ظهور ایدره جک ایدی: ۱۶۳۷ سنه سنده دون قازاقلری آزاق قلعه سنی آنسزین بر هجوم ایله ضبط ایتمشلر ایدی. بالآخره بوراسنی موسقووه چارینه هدیه ایتک ایسته مشردی [۱۶۴۲]. چار مجلس عمومی بی اجتماعه دعوت ایلدی. زادکان قازاقلرک تقدیمه سنی همان قبول ایتک ایچون رأی ویردیلر؛ فقط تاجرلریکی بر حربک مصارفی تأمین ایدرمیه جکلرینی بیلدیردیلر. بوندن بشقه آزاق استحکاماتنک پک فنا بر حالده اولدینی خبر آلمش ایدی. دیگر طرفدن لهستان ایله هنوز مصالحهٔ قطعیه عقد ایدلمدن دولت عثمانیه ایله حربه کیریشمک تدبیرسزک ایدی. بونک ایچون قازاقلره آزاقی تخلیه ایتک ایچون امر ویرلدی. قازاقلر شهری تخریب ایتدیلر [۱۶۴۳].

۱۶۳۲ده لهستان قرالی سکیزموند وفات ایتدی. روسلریکی قرالک انتخابنه قدر کچن مدت ظرفنده لهستانده دائماً ظهور ایدن اغتشاشاندن بالاستفاده لهلره ترک ایدلمش اولان شهرلرک بر قسمی استرداد ایلدیلر. اسمولنسکی محاصره ایتدکلری صرمده قرالغه انتخاب ایدیلن ولادیسلاو شهری محاصره دن قورتاردی. فقط بوندن باشقه بر موفقیت کوسترمدی. عقد ایدیلن معاهده ایله طرفین ممالکنک حال حاضری محافظه ایدلدی. ولادیسلاو چار عنوانه ادعای حقندن واز کچدی [۱۶۳۵].

رومانوف سلالہ سنک ایکنجی حکمداری و چار
 آلکسی میخائیلویچ میخائیلک اوغلی آلکسی اون آلتی یاشندہ جلوس
 ایتدی . دور حکومتی ۳۱ سنہدر [۱۶۴۵ - ۱۶۷۶] .

حکمدار جدید پدرندن دهاذکی ، دها فعال و بوندن اولکی سلالہ
 چارلرندن دها حلیم و ملایم ایدی . بریطریقک طورونی اولان آلکسی
 دیندار ایدی . کتب مقدسہ یی دائما اوقور ، اثنای مصاحبہ دہ دائما کتب
 مذکورہ دن از برلدیکی جملہ لری تکرار ایدر ، صباحین ساعت درتدہ
 دعاہہ قالقار ، ہر کون بش ساعت روس کلیساسنک بیتمز توکنمز
 آیینلرندہ حاضر بولنور ایدی . اخلاقاً ایی و غایت قناعتکار ایدی . سرای
 مراسم و تشریفاتنی سور ایدی . سرای پک محترم ایدی .

بدایت حکومتندہ سابق مربیسی (بوریس موروزوف Boris Morozof)
 اسمندہ بر بویارک تحت نفوذندہ قالدی . بوریس چاریچہنک بر ہمیشہ سنی
 تزوج ایتدیکندن نفوذینی کوندن کونہ آرتدیردی . خلق کندیسینی
 سومز ایدی . چونکہ ویرکولری تزیدایتمش ایدی ؛ طرفدار و محمیلرینک
 مظالمنی جزاسز براقیر ایدی .

موروزوف علیہنہ موسقووہ ، نوو غورود و پسقوف شہرلرندہ بر قاج
 دفعہ عصیانلر وقوعہ کلدیلر . عاصیلر کمال شدتہ تأدیب اولندیلر . آلکسی
 نفسنی مدافعہ ایچون (قرہ ملین) ہ قوتلی بر فرقہ عسکریہ یرلشدیردی ؛
 بورایہ دخولی منع ایتدی ؛ ضابطہ مأمورلری ، خفیہ لہر کسی ترصد
 آلتندہ بولندیرمغہ باشلادی . جزا قانونی احکامی تشدید ایدلدی .

اوزمان او قرائنا قطعہ سی ایکی قسمہ آیرلشدی .
 دبگیر و درودہ قازاقلری خطمان (دوروشنقو) نک اداره سندنہ بولنان
 غربی او قرائنا دولت عثمانیہ ایلہ لہستان آرہ سندنہ منازع فیہ ایدی .

هرایکی طرفك اردولری بوراده حرب ایدیورلر ایدی. شرقی اوقراینایا اکثریا موسقوویه صادق ایدی.

شرقی اوقراینایی اداره ایدن (بریوخووه تسکی Brioukhovétski) یالکز لفظاً موسقوویه تابع اولوب بر حکمدار مستقل کی اجرای حکومت ایدیوردی. دیگر طرفدن کیف متروپولیدی نه چاره، نه ده موسقووه بطریقه دکل، استانبول بطریق لکنه تابع اولدیغی ادعایتمکده ایدی. اونك فکر نجه اوقراینایلر آریجه بر ملت اولدقلری ایچون مستقل بر کلیسا تأسیسنه احتیاج واردی. متروپولید شرقی و غربی اوقراینایا رؤساسنك آرسنی بولدی. عقد ایدیلن بر مجلس عمومیده هرایکی قسمك برلشهرك پادشاهك تابعیته کیرلمسینه قرار ویرلدی [۱۶۶۸]. بر مدت صکره (دوروشنقو) شرقی اوقراینایا خطمانی قتل ایتدیر. رك بتون مملکته صاحب اولدی.

دولت عثمانیه، موسقووه چارلنی، لهستان قرالنی کی اوچ بیوک قومشو آرسنده قالمش اولان اوقراین ملتنك مستقل اولسی همان امکان خارجنده ایدی. غربی اوقراینایا کافی السابق عثمانیلر ایله لهلر آرسنده بر میدان حرب اوله جقدر. دینه پرک صول ساحنه کلنجه؛ موسقووه نك بورادن کف ید ایتسی ملحوظ دکلدی. بوراسی ده روسلرله قریم تاتارلری آرسنده کی محارباته صحنه اوله جقدر. براز صکره، مملکتده بر روس فرقه سی تشکل ایتدی. بونلر کندیلرینه موسقوویه تابع اولق اوزره آریجه بر خطمان تعیین ایلدیلر. دوروشنقو پایتخت اتخاذ ایلدیکی (جهیرین Tchiguirine) ده یرلشدی. شو حالده اوقراینایا تکرار ایکیه آیرلمش دیمکدی.

دینه بر قازاقلری کوچك روس؛ دون، وولفا، یاییق، تهرهك

قازاقلری - ترك ویا - تار قانیله قاریشیق اوله رق - بیسوک روس
جنسندن ایدیلر . موسقووه دولتی قوتلندکجه ، کویلیر اصحاب املاک
اسیرلری درکسنه ایندکجه روسیه دن پک چوق فراریلر دون قازا -
قلرینه التحاق ایدیورلر ؛ اورالرده ، صاحبسز واسع اراضیده غایت
سربست اوله رق یشایورلر ایدی . خطمانلرک زیر اداره سنده جمله سی
مساوی اولق اوزره یشایان قازاقلر مسلمانلره قارشی حرب ، نهرلرده
قورصانلق ، یوللرده حیدودلق ایتمکله مشغول ایدیلر . دولت عثمانیه یی ،
روسیه یی خیلی اوغراشدیرمش اولان بو قازاقلر آراسنده ظهور ایدن
(استه نقو Stenko) اسمنده بر رئیس ۱۶۵۷ تاریخندن اعتباراً باشنه
طوپلادیغی محاربلر ایله بتون دون وولغا وادیلرینی ضبط ایتدی .
قازاقلر موسقووه قولرینه ، بحراییض کنارلرینه قدر کیدیورلر ایدی .
استه نقو عادتاً بر دولت تشکیل ایتشدی . لکن بو دولت چوق زمان
دوام ایتدی ؛ روس اردوسنک ایلك غلبه سی اوزرینه قازاقلر طاغیلدی ؛
استه نقو توقیف وموسقووده وحشیانه اشکنجه لر ایله اعدام ایدلدی
[۱۶۷۰] .

آلکسینک دور حکومتده روسیه
آلکسینک دور حکومتده ملی اهمیت لهستاندن انتقام آلق ، اون
آلتنجی عصرده لهلرک ضبط ایتدکلری ولایات استرداد ایتک ایسته دی .
۱۶۵۴ ده اعلان حرب ایتدی . روس اردولری پولوتسک ، موهیله ف ،
ویته پسق ، اسمولنسق ، غرودنو ، قوونو شهرلرندن ماعدا جنوبی
لهستانک بعض طرفلرینی ضبط ایلدیلر . او صرده لهستان بستیون محو
اوله حق کی کوروندی . اسوج قرالی اوتنجی شارل دخی لهستانه اعلان
حرب ایدمک پوزمن ، وارشووه ، قراقووی شهرلرینی ضبط ایتشدی .

بونکله ده قناعت ایتیه رك روس فتوحاتی چاردن آلمق ایسته یور ،
 لیتوآ نیا اوزرنده ادعای حق ایلیور ایدی . آ لکسی لهستانی دها زیاده
 ضعیف دوشوریر ایسه بوندن اسوجك استفاده ایده جکني ، بلکهده ایکی
 مملکتك بر قرالک اداره سی آلتنده برلشه جکني آکلادی ؛ لهستان
 ایله مذا کره یه کیریشدی ؛ اسوجلیلرک علیه دوندی .

آ لکسی لیوونیایی اسوجدن آله رق بالطق ساحله چیقمه چالیشدی .
 لکن موفق اوله مدی . لهستان اسوج ایله (اولیوا) معاهده سی عقد
 ایتدکن صکره روسیه چاری دخی بتون لیوونیادن وازچمک صورتیله
 عقد صلح ایتدی [۱۶۶۱] .

مع مافیه بر قاچ سنه صکره لهلر ایله تکرار محاربه باشلادی .
 داخلآ ظهور ایدن برعصیانی باصدیرمق ، دیگر طرفدن (دوروشقو)
 مسئله سندن طولایی دولت عثمانیه ایله او ضرده ده ظهور ایدن حربی
 اداره ایتک مجبوریتنده قالان لهستان نهایت الامر دینه پرک صاغ
 ساحلنده کی اسمولنسق ایله کیفی ونهرک بتون صول ساحلی صورت
 قطعیه ده ترک ایتدی .

چارا لکسینک خیلی اوزون سورن دورسلطنتی محاربات وفتوحاتدن
 زیاده داخلآ بر دوره استحاله اولمسندن طولایی مهمدر . بو دورده
 روس کلیساسنده (راسقول) دنیلن افتراقه سبب اولان اصلاحات دینه نك
 مروچی بطریق (نیقون) دن ماعدا بر قاچ شاعر ، محرر ، مورخ ،
 دیپلومات یتیشمش ؛ بونلر یواش یواش غربی اوروپایی طانیغه باشلامشدر .
 دیگر طرفدن چار برنجی زوجه سنک وفاتندن صکره (مات و ماتف
 Matvéef) عائله سندن (ناتالی) اسمنده بر قیزی تزوج ایتدی . بو عائله
 ایسه موسقووه نك اوروبا طرزنده امرار حیات ایدن بر عائله سی

ایدی . چونکہ ماتوہنہ فک زوجہ سی اسقوچالی ایدی . اوروپا طرز معیشتی قوجہ سنک سراینہ ادخال ایتشدی . حالوکہ اوزمان روس قادینلری سواقادہ یوزلرینی اورترلر و خانہ دہ حرم جہتندہ اوتوریرلر ، ارکک جمعیتلرینہ داخل اولہ مازلر ایدی . یکی چاریچہ دخی اوروپا تربیہ سنی آلمش ایدی . چار اوزرنده کی نفوذندن بالاستفادہ سرائک طرز معیشتی دیکشدر مکہ موفق اولدی و غربی اوروپانک تأثیری ہر خصوصہ حس ایدلمکہ باشلادی . موسقووہدہ برتیا ترو تأسیس ایدلدی . ویریلن اویونلردہ چار حاضر بولنور ایدی .

رہسہ اوتوز سنہ محاربہ سنہ اشتراک ایتہ مشدی . مع مافیہ بدورردہ دول غربیہ ایلہ مناسباتی آرتدی . ۱۶۵۴ دہ چار لہستان ایلہ موسقووہ حکومتی آرمہ سندہ توسطنی رجا ایچون فرانسه قرالی اون دردنجی لوی نزدیکہ بر سفیر کوندردیکی کبی بر مدت صکرہ روسیہ ایلچیلری اسپانیاء فرانسه و هولاندائی زیارت ایتدیلر . ۱۶۷۳ دہ آلکسی فرانسیہ کوندردیکی سفیر واسطہ سیلہ فرانسه قرالنک ایالات متحدہ جمہوریتیلہ عقد صلح ایدہ رک بتون خرسیتان حکومتلرک دولت عثمانیہ قارشی قوتلرینی برلشدرملرینی تکلیف ایلدی . فقط بوتشبتدن بر نتیجہ حاصل اولدی . انکلترہ ایلہ روسیہ مناسباتی دہا قاریشیق ایدی . چارک لوندرہ یہ کوندردیکی ہیئت سفارتک وصولی ۱۶۴۴ اختلالی زمانہ تصادف ایتمش ، قرال برنجی شارل لوندرہدہ بولمہدینی ایچون روس ایلچسی متبوعنک نامہ سنی تقدیمہ موفق اولہ میہرق عودت ایلشدر . بالآخرہ شارلک اعدامی موسقووہدہ خبر آلدینی زمان روسیہ شہرلرنده بولنان بتون انکلزلر طرد و تبعید ایدلمشلردہ .

آلکسی ایکنجی ازدواجندن بش سنہ صکرہ وفات ایتدی . وفات

ايدجكني آكلاديني زمان سلطنتي بيوك اوغلي فەئودورە ترك وك
 كوچك اوغلي پتروني (مات وەئەف) عائەسىلە زادكانە توصيه ايلدى .
 آلكسينك ايلك زوجهسندن (فەئودور) و
 فەئودور آلکسيە ويچ (ايوان) اسمندە ايكي وغلې و - اك مشهورى
 صوفيه اولمق اوزرە - آلتى قىزى ؛ ايكنجى زوجهسى (نانالى ناريشكين)
 دن پترو اسمندە براوغلى ايله ايكي قىزى قالمشدى . عقلاً و بدنآ پك ضعيف
 اولان فەئودورك جلوسى اوزرينە [١٦٧٢ - ١٦٨٢] ايلك زوجهسك
 منسوب اولديني (ميلوسلاوسكى Miloslavski) عائەسى پك بيوك برنفوذ
 قازاندى . بونلر كنديلرينە رقيب كوردكلرى (مات وەئەف) و (ناريشكين)
 عائەلرى اركانتى سحر ايله ، چار آلکسيى تسميم ايله اتھام ايدرك بر
 قسمنى اعدام ، بر قسمنى نفى ايتديرديلر . حكومت ميلوسلاوسكيلرك
 وبالخاصه ذكى و جراتكار صوفيهك التە قالدى . مع مافيه فەئودورك
 تزوج ايتديكي بولونيالى بر قىز چار اوزرندە بيوك بر نفوذ قازاندى ؛
 حتى مات وەئەف عائەسە مناسبندن طولاي بونلردن اولجە نفى ايدلمش
 اولانلرى منفالردن كيتيردى . فەئودور ، اولاد براقەدن ، وفات ايتدى .
 فەئودورك زمان حكومتندە روسلر (دوروشنقو) نى دينه برنهرينك
 صاغ ساحلندن طرد ايدرك هر ايكي اوقرايناي تابيعلرى آلتە آلديلر .
 بونك اوزرينە عثمانيلر و تاتارلرلە حرب ايتمك مجبوريتندە قالديلر . عثمانيلر
 (جهرين) . قدر ايلرلە ديلر . فقط نهايت ، باغچە سراى معاهدەسى عقد
 اولنەرق ايكي اوقراينا ايله دينه برمنصبيلرينە ياقين اولان بعض يرلر موسقو وەيە
 ترك ايدلدى [١٦٨١] .

آلكسينك حياتدە بولنان ايكي اوغلندن
 صرفينك نيايت مكمونى بيوكى ايوانك تخته چيقمسى لازم كليورايدى .

فقط ایوان همان همان برآبدال ایدی . بطریق ایله بویارلر ناتالینک اوغلی پتروی - طقوزیاشنده اولسنه رغماً چاراعلان ایتدیلر . فقط ایوانک منسوب اولدینی میولوسلاوسکی عائله سی بوکا راضی اولدی . سرایک حرم دائره سنده ایوانک آلتی ، آلكسينك كذا آلتی همشیره سی بولمقده ایدی . بو قادینلر ، بالخاصه صوفیه حکومتی اللرندن قاجیر مامق ایچون انتریقهرلر چوریمکده ایدیلر .

اوزمان استرملیچلر بزم یکیکچریلر گکنه مشابه بر حال انحطاطده ایدیلر . علوفه لری آرتدیرلمش ، تجارت و صنایع ایله اشتغاللرینه مساعده ایدلمش اولدیغندن موسقووده صیرمه لی قفتانلری ، قیرمزی ماروکن چیزمه لری ایله کززلر ؛ هردرلو اختلافات و اغتشاشاته سبب اولورلر ایدی . صوفیه بونلری عصیانہ تشویق ایتدی .

۱۶۸۲ سنه سنده ۲۰,۰۰۰ استرملیچ طوپلری سوروکله یه رک چاریچه نك سراينه کیتدیلر . « ایوان قتل ایدلمش ، اونك انتقامنی آله جغز! » دیه باغیردیلر . چاریچه ناتالی اوغللری پتروایله ایوانی یانه آلدی ؛ مردیون باشنه کله رک عاصیلر کوروندی . عاصیلر ایوانک قتل ایدلمه مش اولدیغنی آکلادیلر ایسه ده محرک رک تشویقیله برچوق بویارلری ، از جمله ناتالینک اقرباسنی سرایده اولدیردیلر . دیگر طرفدن موسقووده اسافل ناس قیام ایتدیکندن شهر بیوک بر قاریشیقلاق ایچنده قالدی .

استرملیچلرک طلبی اوزرینه ایوان برنجی ، پترو ایکنجی چار اولدی . هر ایکسینک کنجکلکنه بناء صوفیه نائبه حکومت تعیین ایدلدی . بوندن صکره صوفیه استرملیچلر ایله راسقولیقلرک علیهنده شدت کوسترمکه مجبور اولدی . استرملیچلر کافی درجه ده نائل مکافات اولدقلرینی ادعا ایتدکلری کی راسقولیقلر طرافدار ایدیلر . متعدد عصیانلر وقوعه

کلدی؛ نهایت، صوفیه رؤسای عصائی برربرر میداندن قالدیره رق موقعی تقویه موفق اولدی .

صوفیه کوزده سی و محرم اسراری پرنس واسیلی غالیچین ایله اداره حکومت ایتدی . غالیچین هم امور خارجه یی ، هم ده مصالح عسکریه یی رؤیت ایتکده ایدی . صوفیه و غالیچین دولت عثمانیه ایله قریم تاتارلری علیه روسیه ، لهستان ، وندیک و آوستریادن مرکب براتفاق تأسیسنه و غربی اوروپا دولترینی ده بو اتفاقه ادخاله چالیشدیلر ؛ فرانسه ایله یی کوندردیلر . فقط فرانسه قرالی ترکر و یانه یی محاصره یه کیتدکلری صرده لوکسمبورگی محاصره ایله مشغول اولدیغندن آلمانیا ایمپراطوریه برلشمک ایسته مدی . صوفیه دولت عثمانیه و تاتارلر علیه نه کی حربده موفق اوله مدی . غالیچینک قومانداسنده یوز بیک موسقوف والی بیک قازاقدن مرکب اولان بر روس اردوسی قریمه کیرمک ایسته دی . فقط جنوب استپلرنده پک بیوک مشکلاته معروض قالدیغندن بلا حرب کری یه دوندی [۱۶۸۷] . برمدت صکره [۱۶۸۹] قریمه سوقا یدیلن دیکر بر اردو بهره قوپه واصل اولدی ؛ لکن بو خط مستحکم کی کجه مدی ؛ ضایعات ایله عودت ایلدی . مع مافیه صوفیه کوزده سی غالیچینی مظفر بر قوماندان کی استقبال ایتکدن اوتانمدی . پترو سرایدن چیقمنی منع ایتدیکی حالده صوفیه - اوزمانه قدر کورولمه مش بروقه اولمق اوزره - بیوک بر آ لایله ، هیئت رهبانی و تصاویر مقدسه یی یانه آله رق قریم اردوسنی استقباله کیتدی ؛ قوماندانلره ال اوپدیردی ، ضابطانه ووتقا طاغیتدی . پترو بوندن مغبر اوله رق موسقووه دن (پره او برایه نسقویه Préobrajenskoé) قریمه سنه چکیلدی .

چار فہ ٹودورک وفاتندہ پترو آلکسیہ ویچ اون یاشندہ
پترو نیک کنسکی ایدی [۱۶۸۲] . والدہ سی جھندن افرباسی اولان
 زادگانک قتل ایدلایکنی ، والدہ سنک تحقیر اولندیغنی کورمشدی . استرمہ -
 لیچلرک سرایہ هجوملری کونی سنیلہ غیر متناسب بر جرأت کوسترمشدی .
 پترو نیک تربیہ سنہ اعتنا اولنماشدی . معلمی آلمان یادن کلن رنکلی رسملری
 کوسترمہ رک کنج چاردہ تاریخ مراقفی او یاندیرمش ؛ باباسی آلکسینک ،
 مدھش ایوانک موفقیتائی اوکا اوکرہ تمشدی . مع مافیہ سرای تشریفاتندن
 ا زادہ قالان پترو حیات حقیقیہ ، علوم واختراعات غریبہ یہ کسب
 وقوف ایتمشدی . موسقو وودہ اجنبی تاجر وصنعتکارلرینک اقامت ایتدہ -
 کلری محلہ یہ دوام ایدردی ؛ آلمان و هولاندا لسانلرینی اوکر نمکہ باشلامشدی .
 تصادف پترو نیک تربیہ سنہ چوق یاردیم ایتدی . فرانسیہ کیدن برروس
 ایلچیسی پترو یہ براسطرلاب کتیرمشدی . پترو بوآ لتک صورت استعمالنی
 برآلمان طیبیدن اوکرندیکی کبی حساب و هندسیہ ، بالآخرہ استحکامات
 وبالیستیک فلرینہ مراق ایتدی . والدہ سنک برکوچک ایرماق کنارندہ کی
 مالکانہ سندہ برکون اسکی بریلکنلی صندال بولمشدی . بو صندالی
 هولاندالیرہ تعمیر ایتدیرہ رک ایرماقدہ کزدی ؛ صکرہ کوللردہ صندال
 ایلہ کزیمکہ باشلادی . بو صورتلہ امور بحریہ یہ مراق ایتدی ؛ بر
 مؤلفک دیدیکی کبی بو اسکی صندال « روس دونماسنک بیوک باباسی ،
 اولدی . بعدہ ، هولاندالیر (پەرہ یاسلاول Péréiaslavl) کولندہ دھا
 بیوک قایققلر انشا ایتدیلر . دیگر طرفدن ۱۶۸۲ تاریخہ طوغری پترو
 آرقداشریلہ عسکراویونی اوینایہ اوینایہ بر « اکلنجه طابوری ، تشکیل
 ایتمشدی . برآلمان بو طابوری اوروپا اصولندہ تعلیم و تربیہ ایتدی .
 روسیہ نیک یکی اردوسنک منشای بودر . ۱۶۸۷ تاریخلرندہ پترو اکلنجه

عسکر یله مسقووہ جوارنده کی کویلرده مانوورہ لر یامغه هجوم و محاصرہ لر ترتینہ باشلادی . بالآخرہ روسیہ تاریخنده بر موقع مهم احراز ایدن اجنبی وروس ضابطانی ۱۶۸۸ دن اعتباراً پترونک معیتده خدمت ایتمکده ایدیلر .

صوفیہ ایله چار ایوان موسقووہده قرهملینده اجرای حکومت ایدرلرکن پترو والده سیله برلکده رومانوفلرک ولایاتده کی مالکانه لرنده وبالخاصه (پره اوبرایه نسقویہ) ده اقامت ایتمکده ایدی . بیودکجه ذکی وجسور بر دلیقانی اوله جنی آکلاشیلوردی . صوفیہ آتیدن اندیشناک ایدی . ایوانک ارکک چوجنی دنیایه کله مشدی . بعض رؤسا ناتالی ایله اوغلنی میداندن فالدیرتوب ایمراطورلق تاجنی کیمسنی توصیه ایدیورلردی . لکن بر قادینک بالفعل ایمراطور یچه اولمسنی اوزمان روسیه افکار عمومیه سنه قبول ایتدیرمک ممکن دکلدی . اونک ایچون استرہ لیچلرہ مراجعت ایتمکدن بشقه چاره یوقدی .

صوفیہ نک طرفدارلری چار ایله همشیره سنک حیاتلرینی تهلکده کوسترہ رک ، حتی صوفیہ بالذات استرہ لیچلرک قشله سنه کیده رک عسکری تشویق ایتدیلر . آنجق استرہ لیچلردن پک آزی قرهملینده طوبلانیدیلر . پترونک، صوفیہ علیهنده بر حرکت اجرا ایتمسندن قورقولدینی ایچون (پره اوبرایه نسقویہ) طرفلرینه استکشاف مفرزه لری کوندرلدی . پترو بونی خبر آلنجه والده سی ، زوجہ سی وبتون اقرباسی ایله «اکلنجه طابورلرینی» یانه آله رق (ترویتسا Troitsa) مناسترینه کیتدی . کندیسنه طرفدار اولان زادکان دخی التحاق ایتدیلر . پترو بورادن استرہ لیچ ضابطانی، باشلیجه رؤسای یانه جلب ایتدیردی . صوفیہ نک استرہ لیچلری، افکار عمومیه یی پترو علیهنه چویرمک ایچون واقع اولان بتون مساعیسی

عقیم قالدی . نہایت ، صوفیہ بر مناسترہ حبس ایدلدی . چار ایوان ینہ
مقامندہ قالدی [۱۶۹۶ تاریخہ قدر یشامشدر] .

پترو نک اوزرندہ اک زیادہ نفوذ صاحبی اولان مشاور بالآخرہ
« آمیرال و جنرال » اولان اسویجر ملی (فرانسوا لوفور) ایدی . لوفور
ممالک اجنیہدن ممکن مرتبہدہ چوق ارباب علم و معرفت جلب ، آزا ق
قلعہ سنی ضبط ، غربی اوروپایہ سیاحت ایتسنی پترویہ توصیه ایتدی .

چار پترو کافی السابق (پروا برایہ نسقویہ) دہ قالدی . عسکر اکنجہ-
لری کیندجکے کسب اہمیت ایتدی . تعلیم لردہ ، مانوورہ لردہ ، هجوم
و محاصرہ اویونلرندہ تلفات و مجروحین کورلمکے باشلامشدی . پترو پک
زیادہ اہمیت و یردیکی عسکریخی اون بش بیک کشیہ ابلاغ ایلدی .

پترو دکز اکنجہ لریندہ وسعت و یرہ رک (پہرہ یاسلاول) کولندہ
انشا ایتدیرمش اولدیغی بر کمی بی بحر ابیض کنارندہ آرقانژہل لمانسہ
نقل ایتدیردی [۱۶۹۳] . اورادہ بر انشاءات بحریہ دستکاهی تأسیس
ایدرک دیگر بر کمی انشاسنہ باشلادی . هولاندایہ برسفیئہ حربیہ سپارش
ایتدی . نفسی تہلکمہ قویہ رق بحر ابیضدہ طولاشیور ایدی . اردوسندہ
« خبرہ جی » ، دونماسندہ « قودان » ایدی . دونما ہیئت ضابطانی
تشکیل ایدلمشدی . نہایت ، هولاندادہ یاپیلان ۴۸ طوبلی بر فرقین
بحر ابیضہ کلدی .

شمدی بو عسکر و دکز اکنجہ لرینک بیہودہ شیلر
آزا ق مضرلی اولدیغی ملتہ ، غیر ممنولرہ ، اسکی اصولہ پک مربوط
اولان استرہ لیچلرہ ، ہر درلو تجددہ اظہار خصومت ایلین راسقولیقارہ
اثبات ایتک ایجاب ایدیور ایدی . پترو وولغا طریقہ بحر حزرہ اینوب
اورادہ تجارت کیلری یاپغی و بوسایہدہ آسیانک قیمتدار محصولاتنی

موسقووهیه کتیره رک اوروپا - آسیا آره سنده واسطه تجارت اولغی دوشوندی. دیکر بعض اسباب پتروی آزاق و قره دکزه طوغری جذب ایدیور ایدی. دولت عثمانیه نك اداره سنده کی بعض اورتودوقسلرک شکایاتی طویمشدی. مثلاً، قدس بطریق (دوسیتیه Dosithée) یالکز ترکردن دکل، - پادشاهک فرمانلری سایه سنده مقامات مقدسه نك بر قسمی روم اورتودوقسلردن ضبط ایتیش اولان - فرانسلردن دخی شکایت و چار ایله مخبره ایتکده ایدی. بوشکایتلر، مراجعتلر مقامات مقدسه و ملل شرقیه مسئله لرینک مقدماتی حکمنده ایدی. دیکر طرفدن پترو همشیره سی صوفیه نی تختندن ایندیرمکه برابر اونک سیاست خارجه سنی تعقییدن واز کجه مش، دولت عثمانیه علیه متشکل اتفاق دولیه بادیق قالمشدی.

پترونک مقصدی آزاق قلعہ سنی ضبط ایتمک ایدی. قازاقلری دینه پرک منصب طرفلرینه کوندره رک مقصد خفینسی سترایتمک ایسته دی. کندیس ده ۳۱,۰۰۰ کشیلک براردو ایله دون نهرینی تعقیباً جنوبه ایندی. اجنبی ضابطان چارک یانده ایدی. آزاق محافظلری ۸,۰۰۰ کشیدن عبارتدی. قلعہ جوارنده کی ایکی قله روسلر طرفدن ضبط ایدلدی. عساکر محافظه نك اوزون مدت طایانملری مشکوک ایدی. پترو برعیش و عشرت کیجه سنده اردوسنک الک انی مهندس اولان هولاندالی (ژانسن) . سوء معامله ایتیش ایدی. (ژانسن) بوندن دلگیر اوله رق عثمانیلره التجا و قلعہ نك مدافعه سنه نظارت ایتدی. پترو هجوملرنده موفق اوله مدی. رجعت ایدلدی. فقط بومغلوبیتی افکار عمومی دن صاقلامق ایجاب ایدیورودی. موسقووهیه بر ظفر آلا ییله کیردی [۱۶۹۵].

آزاق مغلوبیتی حربدن زیاده سیاست داخلیه نقطه نظرندن پک

مہم ایدی . اصلاح ایدلمش اولان اردو اسکی اردو قدر موفقیت کوسترہ من ایسہ بالطبع ملت نظرندہ اصلاحات و تجدداً تک ہیچ اہمیتی قالماز ایدی .

موفقیتسزلکی ممکن مرتبہ چابوق تعمیر ایتک لازم کلیوردی . پترو کیجہ کوندوز چالیشمغہ باشلادی . آلمانیا ایمپراطوری، وندیک، پروسیہ، هولاندا حکومتلری روسیہ یہ طویجی ضابطی، مهندس، لغمعی، جراح، کمیجی کوندردیلر . دون نہری کنارندہ تأسیس ایدیلن انشاآت بحریہ دستکالہرندہ ۲۶,۰۰۰ عملہ چالیشیوردی . هنوزیاش کرستہ ایلہ ۱,۷۰۰ قاییق، ۳۰۰ صندال، ۱۰۰ سال پاییلدی . مع مافیہ چوق مشکلات چکیلدی . چوق چالیشدیریلان، آ زاجرت آلان عملہ صیق صیق قاجیور ایدی . کراستہ اعمالاتخانہ سی بردفعہ یاندی . صفوق ویاغموردن چوق عسکر تلف اولدی . لوفور حتی چار دخی خستہ لندیلر . نہایت، ایلک بہارده حرکت ایدلدی . آزاق قلعه سنہ هجوم ایدلدی . سورده بررخنہ آچیلدی . ایجری یہ هجوم ایدیلہ جکی صرہ دہ عساکر محافظہ تسلیم اولدیلر . بوموفقیت عساکر جدیدہ نک قیمت و اہمیتی نظرلرده اثبات ایتدی [۱۶۹۶] .

بودفعہ موسقوویہ دخول مراسمی پک پارلاق اولدی : رکزایدیلن طاق ظفرلر اوستندہ آیاقلری آلتندہ ترک پاشالرینی و تاتار میرزالرینی چیکنہ یں ہرکولک، مارسک، نپتونک ہیکلکری وار ایدی . آزاق سفرندہ آمیرال اولان لوفور، باش قوماندانلق وظیفہ سنی ایفا ایدن (شہین Chein) غایت مزین و مکلف قیزاقلر اوزرندہ بولنیورلر ایدی . یوز باشیلغہ ترفیع ایدیلن پترو ایسہ بو قوماندانلرک آرقہ سندن یایا یوریور ایدی .

آزاقده ۳,۰۰۰ روس، ۴۰۰ قالموق ٹائلہ سیلہ بر مقدار استرہ لیچ

عسکری یرلشدیرلدی. همان بر دوتما انشامنه باشلاندی. بطریق ، بیوک راهبر ، مناسترلر سکز بیک ارک کویلی باشنه بر کمی ، اصحاب املاک ایله مأمورین هر اون بیک کشتی ایچون کذا بر سفینه انشامنه مجبور طوتولایلر . ممالک غریبه دن کیجیلر ، صنعتکارلر جلب اولندی . ۵۰ کنج روس اوروپا صنایعنی اوکرنمک ایچون وندیکه ، انکلتره یه ، هولاندایه کوندرلدی . فقط بوکنجلر روسیه یه عودت ایتدکلری زمان وقوف و ترقیلرینک درجاتی کیم تقدیر ایدم جک ایدی ؟ تبعه یی تعلیم و تربیه ایتمک ایی برشیدی ؛ لکن بالذات چارک دخی توسیع معلومات ایتیمی لازم دکلمی ایدی ؟ روسلری خواب غفلت و عطالتدن قورتارمق ایچون پترونک نمونه امثال اولدی ایجاب ایتزمی ایدی ؟ ایشته ، بویله دوشونن پترو ممالک غریبه یه سیاحت مراقنه دوشدی .

شمالی آلمانیا ، هولاندا ، انکلتره ، وندیک ، روما ایلمک غرب سیاحتی و آوستریایی زیارت ایتمک اوزره بر « بیوک هیئت سفارت » تشکیل ایدلدی . بو هیئتک معینی تشکیل ایدن ۲۷۰ کشتی آرمسند (پترومیخائیلوف) نامنده برضابط و قودان دخی بولنمقده ایدی . بو آدم پترو ایدی ، کندیسنک غیوبتده اداوه امور ایچون پترسبورغده بویارلردن مرکب بر هیئت نیابت بر اقلیدی . ۱۶۹۷ سنه سی مارتنده هیئت سفارت قونیغسبرغه کیتدی . چار اوراده الکتورایله کوروشدی . پروسیه میر آلایلرندن بری پترو میخائیلوفی امتحان ایدرک کندیسنه طویجی ضابطی شهادتنامه سنی ویردی . هانورده دن کچیلوب هولاندایه تقرب ایدلایکی صرمده پترو میخائیلوف هیئت سفارتی بر اقره رق (ساردام) شهرینه کیتدی . اوراده انشا آت بحریه دستگاهلرنده چالیشمق ایچون هولاندالی عمله قیافته کیردی . مع مافیه ساردامده آنجق سکز کون قالدی .

آمستردامدہ ہند شرقی قومپانیاسی انشاآت بحریہ دستکاہلرینہ کیردی .
 یالکز اورادہ چالیشمقلہ اکتفا ایتہرک اعمالاتخانہلری زیارت ایتدی .
 ارباب فن ایلہ کوروشدی . ہرشیئی اوکرنمکہ او قدر حریص ایدی ، کہ
 شارلاتان دیشجیلرلہ بیلہ کوروشہرک دیش چکمکی اوکرندی . متصل :
 « کورملیم ! » جملہ سی تکرار ایدردی . اوتہدن بری تعقیب ایلدیکی
 فکری بر آن بیلہ ترک ایتہمش ؛ موسقووه بطریقہ یازدیغی برمکتوبدہ
 « جناب حقک حضرت آدمہ امر ایتدیکی وجہلہ » چالیشدیغی بیان
 ایلدکن صکرہ بوقدر مساعیدن مقصدی « مملکتہ عودت ایتدکن
 صکرہ مسلمانلرہ غلبہ ایتکہ و مسلمان مملکتلرنده کی خرسیتانلری لطف
 حق ایلہ قورتارمغہ موفق اولق ایچون فن بحری بی اوکرنمک اولدیغی ،
 یازمشدی .

برمدت صکرہ هولاندایلرک انشاآت بحریہ دہ سرعت کوسترہ مدکلرینی ،
 بونک دہ کورہنکہ تابع اولمقدن ایلری کلدیکنی آکلادی . انکلترہ دہ
 ہرشیئک قواعد ریاضیہ توفیقاً یاپیلدیغی ، درت آیدہ بر کمی انشاسی
 ممکن اولدیغی ایشیتدی . همان لوندرہ قوشدی . شہری زیارتدن صکرہ
 انکلترہنک باشلیجہ قودانلری ، قیوچیلری ، معدنجیلری ، معمارلری ،
 طوبجیلری ایلہ کوروشدی . بعدہ هولاندایہ عودت ایتدی [۱۶۹۸] .
 لایبجیغ ، درسد طریقہ ویانہ کیتدی . اوزمان - پرنس اوژہنک
 مساعیسی سایہ سندی - آوستریا فن حربک اک بیوک مکتبی کبی ایدی .
 ایمراطور ایلہ ملاقات ایتدیکی زمان دولت عثمانیہ ایلہ عقد صلح ایلمہ کی
 توصیه ایتدی . وندیکہ عزیمتہ حاضرلاندینی صرمدہ روسیہ دن الدینی
 فنا خبرلر اوزرینہ موسقووه دوندی .

استرهلچلرک عصبانی

والخاسی

پترو دها آوروپا سیاحتنه تشبث ایتزدن اول
استرهلچلر عصبان ایتشلردی. مجرملرک اعدامی
صورتیله عصیانک اوکی آلمشدی [۱۶۹۴].

چارک اوزون مدت مملکتندن غیوبتی غیر ممنونلر ایچون فرصت حکمنه
کیردی. استرهلچلر اصلاحات عسکریه یی ایسته میورلردی. راسقولنیقلر
چارک احکام دینه یی آباق آلتنه آلهرق توتون استعمالنه مساعدده ایتسندن
شکایت ایدیورلردی [۱۶۹۷]. موسقووه اهلینسک اکثریت عظیمه سی
چارک نهدن طولانی اجنیلره حرمت ایتدیکنی، بر آلمان کبی حرکت
ایلدیکنی آکلایه میورایدی. بر روسیه چارینک آلمانلر کبی قیصه اثواب
کیمسی، صقالنی تراش ایتسی، دکزده کزمسی، اوزاق مملکتلرده
سیاحت ایلسی پک بیوک بر رذالت عد اولنیوردی. پترونک بوکبی
رذالته تمایلی اسبابی ایضاح ایچون چار آلکسینک دکل، بر آلمانک ویا
فرانسوالوفورک، یاخود بر جراحک اوغلی اولدینی ویا والده سی ناتالینک
بر اولو چوجق طوغوروب بونک یرینه بر آلمان چوجنی اقامه ایدلدیکنی
روایت ایدیلیوردی. راهبلر پترونک دجال اولدینی سویلیورلر ایدی.
چارک غیوبتی ائسانسده درلو درلو افسانهلر اویدیرلمشدی: پترو تاجر
قیافنده اسوجده کزرنک بو مملکتک سحر باز قرالیچه سی کندیسنی
طانیش. ایکنه لی فیچییه قویدیرمش. فیچینک دکزه یووارلانمسی امر
ایتمش. بعضلرینه کوره بر استرهلچ چارک یرینه فیچییه کیره رک یتروی
قورتارمش؛ بعضلرینه نظر آ چار استقهولمده بر دیرکه باغلامش.

پترونک غیوبتی ائسانسده موسقووه ده اجرای حکومت ایدن هیئت
نیابت لهستان حدودینه درت آلا ی استرهلچ کوندرمشدی. بو عسکر
بر مناسترده محبوس اولان صوفیه ایله مناسبتده بولنمده ایدیلر. عسکره

خطاباً صوفیہ طرفدن یازلدینی محتمل اولان بر مکتوبده : « ایلریده
 دها فنا اوله حق . همان موسقووه اوزرینه یوریکیز . دها نه بکله یورسکنز ؟
 چاردن خبریوق ، دنیلیور ایدی . درت آلا ی موسقووه اوزرینه یوریدی
 و صوفیه عسکرک باشنه کچوب حکومتی ضبط ایلمسنی رجا ایتدی . عاصیلر
 آزاق قلعه سنده اجنیلرک ۳۰۰ استرهلچی اولدیرمش اولمردن ، صقاللرک
 تراش وتوتون ایچمکه مساعده ایدلمسندن . الخ شکایت ایدیورلرایدی . فقط
 اوزرلرینه کوندریلن عسا کر منتظمه ایله طویلره مقاومت ایده میهرک
 طاغیلدیلر . یوزالایسی آصیلدی ؛ دیکرلری موسقووه حبسخانه لرینه آتیلدی .
 پترو پرحدت موسقووه عودت ایتدی . جزای غیر کافی بولیور ،
 هیئت نیابتی کوشک طاورانمش اولمقله اتهام ایدیور ایدی . اونک نظرنده
 استرهلچلر هم اطاعتسز عسکر ، همده دائماً عصیانہ مهیا برسوری خلق
 ایدی . اخذ ثاره باشلامازدن اول ویردیکی بیوک بر ضیافنده صقاللرینی
 هنوز محافظه ایتمکده اولان ارکان دولتدن بعضلرینی بالذات تراش ایتدی
 و هیچ کیمسه نک حضورینه صقال وقفتان ایله چیقمامسنی امر ایلدی .
 حبسخانه لرده ۱۷۰۰ قدر استرهلچ واردی . پترو بونلری ایکی
 اوچ یوز کشیک قافله لرله میدان سیاسته کوندره رک قتل ایتدیردی .
 بونلرک باشلری بش آی قره ملینک مازغاللرنده آصیل قالدی . صوفیه نک
 حبس ایدلایکی حبسخانه نک پنجره لرینه عاصیلرک صفوقدن طونمش جسدلری
 تعلیق ایدلدی .

پترو آوروپایه کیمزدن اول زوجه سی اودوقسیان نفرت ایتمشدی .
 حال بوکه بوقادیندن براوغلی [ولی عهد آلکسی] اولمش ایدی . اودوقسیا ،
 چارک اقرباسی اسکی فکرده ، هر درلوتجده دشمن ایدیلر . اونک ایچون
 چاریچه بر مناستره حبس ایدلدی .

يدي سنه صكره [۱۷۰۵] اژدرخانه كي استرەليچلر عصيان ايتديلر .
بولر حقنده صوك درجه شدت كوسترلدي ونهايت استرەليچ اوجاني
بسبتون ميداندن قالديرلدي .

قازاقلر دخي پترونك حكومتندن ، « آلمان قانونلندن » ممنون
دكديلر . فقط پترو قازاق اردولريني احما ايتك ايسته ميور ایدی .
چونكه قازاقلر جنوب استپلرنده هنوز استعمار ايديله مين يرلري اشغال ،
مسلمانلره قارشى بيوك بر قوت تشكيل ، ايجابنده چارك اردوسنه پك چوق
سواري اعطا ايديورلردی . پترو دون ودينه پرقازاقلرينك عصيانلريني
بلا مرحت ياصديردي ايسهده اونلرك قوتندن استفاده مقصديله بعض
آرزولرينه مماش ايدرك جمله سني تحت اطاعته آلدی . استرەليچلر احما
ايدلمش ، قازاقلر تحت اطاعته آلمش اولديغدن آرتق پترونك يكي براردو ،
يكي بر دولت تأسيس ايتمنه بر مانع قالماشدي .

پترونك اصلاحات ويا اختراعاتندن هيچ بري بردنبره ،
پترونك اصلاحاتي بر جمله ده موقع تطبيقه قونماش ؛ همان دائما تدريجاً
ايش كورولمشدر . روسيه نك اداره مركزيه سي ، اداره ولاياتي ، اداره
بلديه سي ، تشكيلات اجتماعيه وعسكريه سي ، مكتبلى حقنده كي فرمانلر
يواش يواش ، پترونك بدايت سلطنتندن وفاته قدر كچن مدت ظرفنده
نشر ايدلمشدر .

پترو غربدن چوق شي آلدی . غربني آوروپانك تأسيساتي ، افكاريني ،
آدملريني ، اشيا سني ، حتی اداره عسكريه وملكيه تعيراتي اسكي روسيه يه
ادخاله مجبور اولدی . ممالك غربيه دن چاغيرديغي كيمسه لره امنيت ،
معاونت ، امتيازات ، سربستي دين ، كندی مملكتلري قانونلرينه كوره
حقلرنده معامله ايفاسي كي مساعدته بولنور ایدی . آوروپادن بري

وبجری ضابطان ، مهندس لر ، انشاآت بحریہ متخصص لر ، کمیجیلر ،
 مرنوع صنعتکار لر ، طبیلر ، مکتب معلم لر ، عالمز کتیردی . علومه ،
 حقوقه ، زراعتہ ، سنايعه متعلق پک چوق کتابلر ترجمہ ایتدیردی .
 فقط الی الابد غربیلرہ محتاج قالمق ایستہ میوردی . اونک ایچون یوزلرجه
 اجانبی مملکتہ دعوت ایدرکن آوروپاہ پک چوق روس کنجلی کوندردی .
 پترو ۱۷۰۰ سنہ سندنہ شمال سیاحتہ چیق دینی زمان دولتہ بر قاج
 ولایت دہا علاوہ سندن زیادہ بر آوروپا دکزی کنارندہ یراشمک طریقہ
 آرایور ایدی . واسع روسیہ نک بحر ابض ایلہ آزاق دکزندن ماعدہ
 ساحلی یوق ایدی . حال بوکہ بوایکی دکزندن برنجیسی سنہ نک قسم اعظمندہ
 یوز طوتیوردی . ایکنجیسی ایسہ دکزندن زیادہ صیغ بر کول ایدی .
 بناءً علیہ پترو ممالک مدنیہ ایلہ پیدای مناسبات ایچون « آوروپاہ بر پنجرہ
 آچمق » ایستہ یوردی . بوندن بشقہ روسلرجه مقدس عد ایدیلن موسقو وہ
 شہرینک مناسترلری ، استرہ لیچلری ، راسقو لنیق لری ، ہم محافظہ کار
 و ہم دہ دائمًا عصیانہ مہیا اہالیسی ایلہ افکار جدیدہ نک مرکز انتشاری
 دکل ، بر مرکز مخالفت وعصیان اولہ جغنی آکلامشدی .

پترو پایتخت اولمق اوزرہ انشا ایدہ جکی شہرک یرینی تعیین ایتشدی .
 بوراسی اینغریاسا حلدہ ، لادوغا و ونہ غا کوللرینک صولرینی دکزہ نقل
 ایدن نہ و انہرینک درت آغزی آرہ سندنہ کی یکر می قدر کوچک آطہ
 ایدی . نہ و ا بردن برہ طغیانیلہ آرہ صرہ صو آلتندہ قالان بوبردہ بر قاج
 بالقجی قلبہ سندن بشقہ برشی یوق ایدی . ۱۷۰۳ دہ اسوجیلردن ضبط
 ایدیلان اراضیدہ کائن (یعنی صاری) آطہ سندنہ پترو (سن پیہ روسن پون)
 قلعه سنی انشایہ باشلادی . [بوراسی الیوم پترسبورغک ایچ قلعہ سی ،
 مجرمین سیاسیہ حبس خانہ سی ، ایمپراطورلرک مقبرہ سیدر] . عسا کر

منتظمه دن ، قازاقلردن ، قالموقلردن ، اينغريا يرليلرندن ، روس كويليلرندن ٤٠٠٠٠ كشي ي بوراده طولادى . بدياه آلات وادوات مقضيه بولمديني ايجون بو آدم لر صوبالره ، عادتا طيرناقلي ره يري قازديلر ؛ حفرياتدن چقان طاشي ، طوپراعى قفتانلرينك اتكلرينه طولديره رق طاشيديلر . مسكن وارزاق فقدانندن طولايي بيكلرجه كيمسه لر قلف اولديلر . پتروانشا ات واعمالاته نظارت ايجون نهر ك صاغ ساحلنده ياپديرديني بر كوچك اخشاب خانه ده يرلشدي ؛ كه بو خانه اليوم موجوددر . يواش يواش نه وانك صاغ وصول ساحلدرنده يكي شهر ميدانه چيقدى . غرانيت ريختملر ياپيله رق نهر ك طغياني منع ايدلدى . ١٧٠٧ ده بر دفعه ده ٣٠٠٠٠ كويلي يكي پايتخته نقل اولدى . لزومي قدر ديوار جي تدارك ايده بيلمك ايجون پترس-بورغدن ماعدا يرلرده كار كير انشا آته مساعده ايدلمدى . بتون اغنيا بلده جديده ده ايكي قاتلي اولر ياپمغه مجبور طوتولديلر . يكي ليمانه كيرن بتون كيلر ك بر مقدار چاقيل طاشي كتير مدجه ساحله يناشملرينه مساعده ويرلدى . مع مافيه ١٧٠٥ ده پترسبورغ طغيان ايدت نهر ك صولرى آلتنده قالدى ؛ ١٧٢١ ده اويله بر طغيان ميا و قوعه كلدى ، كه بتون سوقاقلرده قايق ايله كزلدى ؛ آرقالسون چار بوغوله جق ايدى . صكره تكرار ايشه باشلاندى ؛ غرانيت ريختملر دها يوكسك ياپيلدى . پترو دوائر حكومتى آنجق دور سلطنتك صوكنه طوغرى پترسبورغه نقل ايده بيلدى .

بيوك پترو حكومت مركزيه تشكيلاتنده بيوك زادكاندن مركب اولان (دوما) مجلسنى القا ايتدى . ١٧١١ ده امور عدليه ، ماليه وعسكريه ايله مشغول بولمق واعضاسى بك محدود اولمق اوزره بر سناتو تشكيل ايدلى . صكره ، خارجيه ، خزينه ، مصارف ، تدقيق حسابات ، عدليه ، حربيه ، بحريه ، تجارت ، معادن واعمالا تخانه لر اموريله مشغول اولمق اوزره

ظہورِ ادارہٴ مرکزیہ وجودہ کتیردی . بو اداره لړك باشنه آوروپالیری ،
حتی اسوج اسرای حریبه سنی کتیردی .

ولایات اداره سنده اسکی وویووده لری ابقا ایتمله برابر امور عدلیه ،
مالیه و مملکیه بر بردن تفریق و آلمانیا شهر لرنده تطبیق ایدیلن بلدیہ
تشکیلاتی قبول ایتدی . نواحی تشکیلات قدیمه سنی بوزمدی .

شمدی یه قدر موسقووه بطریق لری پترویه صادق قالمقله برابر اجانبك
مملکتہ کلی ، صقاللړك تراش ایدلمسی کچی شیلره اعتراض ایتمکدن کری
طور مامش لردی . ۱۷۰۰ تاریخنده موسقووه بطریقك وفائی اوزرینه پترو
یکی بر بطریق انتخاب ایتیه لړك سینود مجلسنی تشکیل ایتدی . امور دینه نك
اداره سی بو مجلسه ویرلدی ؛ مجلسه حکومت طرفدن بر مدعی عمومی
تعیین ایدلدی . بو مجلس ره بانك تعلیم و تربیه سنه اعتنا ایلک صورتیه یکی
دولتک تاسسنه چوق یار دیم ایتدی .

پترو مناستر راهب و راهبه لرینك تکثر نفوسه مانع اولدقلرینی ،
مناستر لړك پك چوق املا که صاحب اولملری برضعف اقتصادی بولندیغی
بیان ایدرک بولرک اداره سی ایچون بر دائرهٴ مخصوصه تشکیل ، راهب
و راهبه لره معین تخصیصات اعطا ، املاک فضلہٴ وارداتی خسته خانه
و مکتبلرک اداره سنه تخصیص ایتدی . بالاخره دخی کشیشلرک آرتمنی
منع ایچون بر چوق تدابیر اتخاذ ایلدی .

پترو روسیه یه ممکن مرتبه چوق اجنبی جلب ایده بیللمک ایچون
مملکتده یرلشه جک اجانبه سربستی آیین حقنی تأمین ایتمشدی . سوزنده
طوردی . فقط جزویتلری طرد ، اجانبك کندی مذهب لرینی روسلر
آره سنده نشر و تعمیم ایللرینی منع ایتدی . پروتستانلی و سائر مذاهبی
قبول ایدن روسلری اعدام ایتدیرمکدن چکینمدی . پترو یهودیلره صوک

درجہ دشمن ایدی ؛ « مملکتدہ یہودی کورمکدن ایسہ مسلمان ویا بتپرست کورمکی ترجیح ایدم » دیر ایدی . اوزمان موسقووه چارلغندہ موسوی یوقدی . بوکونکی روس موسویلری لهستانک انقسامندن صکرہ بومملکتدہ پرلشمشردر .

چارک نظرندہ صاحب ملک اولان زادکان حکمدارہ خدمت ایله مکلف ایدیلر ؛ آنجق بو خدمت مقابلندہ اراضیہ صاحب وکویلیلر اوزرندہ زادکان حقوقنہ نائل اولہ بیلیرلر ایدی . ہراصلیزادہ اردودہ لاقل ایدی ، خدمات ملکیہدہ اون ، تجارت وصنایعدہ اون بش سنہ چالیشمغہ مجبور ایدی . چالیشق خصوصندہ زادکانہ نمونہ امثال اولان اولان پترو : « بیزانس ایمپراطورلغک عاقبتہ دوچار اولماق ایچون قوللرمزی قاووشدیروب اوتورمالی یز » دیر ایدی . جاہل ویا خدمتدن مستکف اولان اصیلزادہ فائدہسز ومضر بر مخلوق کی طرد ایدیلر ؛ اراضیہ صاحب اولق حقندن محروم براقیلیر ؛ حتی تاهل ایتسنہ بیلہ مساعده اولتماز ایدی .

پترواسکی سلسلہ مراتب اجتماعیہی میدانندن قالدیرہرق بالجلہ خدمات ملکیہ ، عسکریہ وبجریہی اون درت درجہیہ آیردی . ایلک سکز درجہیہ عائد خدمتہر کچلرک عنوان اصالتی اوغللرینہ انتقال ایدردی . دیگرلرینککی شخصلرینہ مخصوص ایدی .

پترو زادکانہ عائد مالکانہلرک اصول وراثتی حقندہ آلمانیاہ جاری اولان majorat اساسی قبول وتطبیق ایتدی . بوقاعدہ موجبہجہ پدر بتون مالکانہسنی بیوک اوغلنہ ویا اوغللری آرسندن انتخاب ایتدیکنہ ترک ایلیہ بیلردی . پترو قاعدہ مذکورہی تطبیق ایتکلہ اولا زادکان عائللرینک - مالکانہلرک بتون اولاد آرسندہ تقسیم ایدلمسندن طولای-

فقیر دوشملرینہ مانع اولمق ، ثانیاً کویلیلری زنکین واحتیاجدن وارسته بر اسیلزادهیه تابع بولندیرمق، ثالثاً میراث پدردن محروم اولان اولادک خدمت دولته رغبتلرینی تأمین ایتمک ایسته مشدی .

پترو بتون قوانین ونظاماتی حاوی بر دستور تنظیمنه دخی چالیشدی ایسه ده بوتشبنی اکاله وقت بوله مدی . یالکیز داینک مدیونی استیفای مطلوب ایدنجیه قدر زوجه وچو ققارلیه برلکده حبس ایده بیلیمک حقنی الفا و حقوق عمومیه دعوالرنده اشکنجه منع ایتدی .

پترونک اصلاحاتی پک چوق کیمسه لری چار علیهنه دوندیرمش ، دیگر طرفدن یوللر ، قیرلر حیدود چته لری وشهرلر خرسزودیلنجیلرله طولو بولنمش اولدیغندن چار قوه ضابطهیه اعتنا ایلدی . مرکز ولایاتده پولیس اداره لرندن بشقه صرف امنیت دولته متعلق مسائل ایله اشتغال ایدن ضابطه خضیه هیئتلری تشکیل ایتدی .

پترو کویلیلرک حالیده اصلاح ایتمک ایسته دی؛ لکن موفق اوله مدی . محاربات ، انشات ، اصلاحات سببیه چوق پارهیه محتاج اولدیغندن تکالیف عمومیه یی هرکون آرتدیرمقده ، ویرکولرک بار ثقیلی آتندم ایسه کویلیلر ازیلمکده ایدی . کویلینک هم چاره ، هم ده تابع اولدیغنی اسیلزادهیه قارشو مکلف بولندیغنی وظائفی ایفا ایده بیلیمسی ایچون حال اسارتدن تخلص ایدلمه مسی ، دمیرباش اشیا کی طوبراق ایله برلکده آلتوب صاتیلمسی لازم ایدی . اونک ایچون کویلیلر مالکانه لره کوندن کونه دها صیقی بر صورتده ربط ایدیلر . قاچان کویلیلر شدتله تعقیب اولندیلر . چار کویلیلرک طوبراقدن تفریقله صاتیلملرینی منع ایتدی ایسه ده بومنوعیته رعایت ایدلمدی .

پترو زمانه قدر یوکسک صنف قادینلرینک (تهره م) دنیلن حرم

دائرة لرنده قپانه رق ارککلره کورونمه ملری عادت ایدی . زوج و زوجہ بربرلرینی آنجق یوم ازدواجده کوره بیلیرلر ایدی . پترو ازدواجدن آلتی آی اول نشانلارنق مجبوریتنی ، بو مدت ظرفده نشانلیرک هر کون بربرلریله کوروشه بیلملری و آلتی آیک مرورنده ارکک ویا قادیکن نشاننی فسخ ایده بیلرسی اصولنی وضع ایتدی . اوزمانه قدر روسیه ده مجهول اولان تولدات ، مناکحات و وفیاتک قید و تسجیلی معامله سنی تطبیق ایلدی . حرم دائرة لرینی قالدیره رق قادیکن وارککلرک بربریه کوروشملرینی امر ایتدی ؛ غریبه اولدینی کبی سالون حیاتی تأسیسه چالیشدی . روسلر بوتجوداته خیلی مشکلات ایله آلیشه بیلدیلر .

اخلاق و عادات هنوز پک قبا ایدی . زادکان اولرنده مایمون و پاپاغانلرله برلکده یشایان مسخره لر ، جوجه لر ، دلیر ایله اککنمک عادتق جاری ایدی . زادکان اکثر بربرلریله یومروق یومروغه غوغا ایدرلردی . سناتو ، سینود و سائر مجلسلر اعضاسنت بیله مذاکره ائساننده دوکوشدکلری واقع اولوردی . حضورنده سجده ایدمک عادتق قالدیرمش اولان پترو بعضاً الک بیوک ارکان دولتی باستونله دوکمک مجبوریتنی حس ایدردی . اک فنا جهت بتون روس مأمورلرینک نفوذ مأموریتدن بالاسفاده معیتلرینه اذا ایتمکه ، اهالیدن هر وسیله ایله پاره آلمغه ، خزینہ دولتن اختلاسہ پک میال اولملری ایدی . پترو بوسوء استعمالاتی منع ایچون چوق شدت کوستردی .

پترو مصارف عظیمه نی تأمین ایده بیلمک ایچون تمغا رسمی ، طوز و توتون انحصاری ، اوزون صقال و قفتان ویرکوسی کبی برچوق یکی ویرکولر تأسیس ایتدی . حتی حماملری انحصار آلتنه آلدی ، تابوت صاییشنی مناسترلره تخصیص ایلدی .

پترو صنایع و تجارتہ صورت مخصوصہ دہ اعتنا ایدرک چوخہ، چوراب، مشین، بلکن بزی و سارہ ایچون اکی یوز قدر اعمالخانہ آچدی . معدنلرک ایشلہ دلمسی ایچون ممالک اجنبیہ دن مهندس لر جلب ایتدی . آلات زراعیہ یی اصلاحہ ، روسیہ دہ اوزوم ، دوت ، توتون یتشدیرلمسنہ ، قیون و صیغیرک اصلاح جنسنہ چالیشدی . صنایعک ترقیسنی تأمین ایتمک اوزرہ آغیر کمرک رسملری قویدی . لادوغا کولی واسطہ سیلہ وولغایی نہوا ایلہ برلشدیرمک ایچون قنالر آچدیردی . پترونک جلوسندہ روسیہ دہ آلتون و طونج مسکوکات یوقدی . بتون سکدر کموش ایدی . کموش روبہ لر عادتاً برکولچہ کی اہالی و تاجر طرفدن کیلیر ، پارچہ لانیردی . بعض برلردہ مشین مسکوکات بیلہ تداول ایتمکدہ ایدی . پترو اصول جدیدہ یہ توفیقاً طونج، کموش، آلتون مسکوکات ضرب و اعمال ایتدیردی . پترو اردوسنی ۲۱۰،۵۰۰ کشی یہ ابلاغ ، اخذ عسکر اصولنی اصلاح ، تحصیل ایچون آوروپایہ پک چوق ضابط اعزام ایتدی . انشاآت بحریہ یہ فوق العادہ اہمیت ویردیکندن ۱۷۲۵ دہ روسیہ نک بحر ابیض ایلہ بالطق دکزنندہ وقرہ دکزندہ کی دونمائی ۴۸ بیوک کمی ایلہ ۷۸۷ کوچک کمی یہ بالغ اولمشدی .

پترو اوزمانہ قدر خلقت عالمدن باشلایان روس تقویمنی اصلاح ایدرک تقویم رومی یی قبول ایتدی . روسجہ لسانی ایچون هولاندادہ یکی حروفات یاپدیردی ؛ بیوک شہرلردہ مطبعہ لر آچدی . صنایع نفیسہ ایلہ اشتغالی دخی اونو تہرق پترسبورغدہ بر رسم مکتبی تأسیس ایلدی . روسیہ نک تاریخ طبیعی ، تاریخ ، علم و فن نقطہ نظرندن تدقیقنی امر ایتدی . آسیا ایلہ آمریکا آردہ سندہ کی بوغاز حقندہ تدقیقاندہ بولنقی ایچون دانیا رقلی (بہرینغ) ی اقضای شرقہ کوندردی . پارس آقادہ میسی ایلہ مخبرہ دہ

بولنوردی. ۱۷۲۴ ده پتر بورغ افاده میسنی احداث ایلدی. بو آفاده مینک
وظیفه سی شاگرد یتیشدیرمک، برغزته چیقارمق و بالخاصه اجنبی کتابلرینی
ترجمه ایتدیرمک ایدی.

لهستان

۱۵۸۷ سنه سنده لهستان قراللغنه انتخاب اولنان دانیمارقه
سکیزموند وازا قرالی ژان وازانک اوغلی اوچنجی سکیزموند وازا جزویتلر
طرفندن تربیه ایدلمش متعصب بر قتولیک اولدینی ایچون پروتستانلر ایله
اورتودوکسلر علیهنده بر سیاست تعقیب ایتمش و بو سیاست اقتضاسینجه
آوستریا ایله اتفاق ایده رک روسیه یه دشمن اولمشدر.

سکیزموند لهستان تاجینی قبول ایتمکله اسوجده حق سلطنتدن فراغت
ایله مشدی. پدرینک وفاتی اوزرینه اسوج قرالی دخی اولدی ایسه ده
قتولیکلکه مربوطیتندن طولایی ظهور ایدن عصیان نتیجه سنده اسوجی
ترک ایتدی [۱۵۹۸]. فقط جبراً اسوج تحتنه چیقماق ایسته دیکندن
اسوج قرالی طقوزنجی شارل ایله حربیه باشلادی. بوصورتله باشلایان
محاربات یاریم عصردن فضله دوام ایده رک اسوج ایله لهستانی ضعیف
دوشوردی؛ بوندن ده روسیه مستفید اولدی.

اون بدنجی عصر ابتداسنده موسقووه حکومتی داخلنده ظهور
ایدن قاریشیققلردن استفاده ایتک املنه دوشن سکیزموند چارلق تاجینی
یاکندیسنه ویا اوغلی ولادیسلاوه آلمغه چالیشدی. فقط روسیه بخشنده
کوردیکمز وجهله موفق اوله مدی؛ رومانوف سلاله سی تحتنه چیقدی.

ہوندن صکرہ روسیہ چارلینک سیاستی بعض روس ولایاتی دہ الدہ
ایتمش اولان ، روسلرک استقلال ملیرینی واورتودوقسلنی تہدید ایلین
لہستانی مرنہ صورتہ اولورسہ اولسون ضعیف دوشورمکدن عبارت اولدی .
دولت عثمانیہ ایلہ لہستان حدودندہ برطرفدن قازاقلرک ، دیگر
طرفدن تاتارلرک تجاوزاتی دائماً سبب حرب اولہ بیلیر ایدی . ہوندن
بشقہ لہلر بغداد امارتی اوزرنده حق حمایہ ادعا سندن ایدیلر . آوستریانک
تشویقی اوزرینہ لہستان قرالی عثمانیلرلہ حربہ باشلادی . یاش جوارندہ ،
دینیستر کنارندہ محاربات وقوعہ کلدی [۱۶۲۰] . بعدہ سلطان عثمان
ثانی خوتینی محاصرہ ایتدی .

اسوجلیلرلہ حربہ دوام ایدہرک لیوونیانک ضیاعنہ سبب اولان ،
پروسیہ دوقہ لغنی براندہ بورغ الکتورینہ ویرمک صورتیلہ پروسیہ
قراللغک اسباب تأسسنی احضار ایدن ، آوستریانی قوتلندیرن ، موسقوہ
وہی ضعیف دوشورمکہ موفق اولہ میان سکیزموندک سیاست شخصیسہ
متعدد عصیانلرہ سبب اولدی ؛ قراللغک نفوذی بسبتون آزالدی .
سکیزمونددن صکرہ قراللغہ انتخاب ایدیلن اوغلی دردنجی ولادیسلاو
ویالادیسلاسک زمان حکومتی [۱۶۳۱ - ۱۶۴۸] اسوج وحتی موسقوہ
تختلرینہ ادعای حق ایلہ کجدی .

زائہ قازیمیر ؛ قازاقلر ، قازاقلر مدہش بر عصیان چیقارہ رق لہستانک
آتسینی تہلککہ دوشوردکلری صرمدہ وفات
لیہ روم وہنو ایدن ولادیسلاو کیرینہ برادری ژان قازیمیر
قرال انتخاب ایدلدی [۱۶۴۸] .

دینہ پرک ایکی ساحلندہ کی اوقراینالیلر لہ حاکمیتدن اصلا ممنون
دکل ایدیلر . قازاقلر ، یعنی یرلی عسکری صنفی « Pan پان » ر ، یعنی لہ

عسکری صنفنه خصم ایدیلر . لهستان عساكر معاونه صفتيله اردوسنده استخدام ایلدیکی قازاقلردن اوتهدن بری قورقمقده ایدی . اولری تحت اطاعتده طوتمق ایچون برچوق قلعه لر انشا ایتشدی . اوقراینا کویلیرینه کلنجه ؛ بونلرله زادكانك اسیرلری حکمنده ایدیلر . قازاقلرله کویلیرلر اورتودوقسلنی قالدرمغه چالیشان قاتولیک لهستانه قارشی خصوصتمده متفق ایدیلر . بتون غیرممنولر زاپوروغ قازاقلری وتاتارلرله اتفاق ایدرک خطمان عنواتی آلان بوغدان خیمیل نیتسکی Bogdan Khmielnitski نك اداره سی آلتنده برلشدیلر ؛ غالیچایه کیردیلر . قازاق وتاتارلر ۳۰۰,۰۰۰ دن فضله برقوت تشکیل ایتمکده ایدیلر . حرب برقاچ سنه سوردی . ۱۶۵۱ ده اون يدنجی عصرک اک بیوک محارباندن بری اولان بهره سته شقو Béréstechko محاربه سی وقوعه کلدی . طرفیندن اوچ یوز بیك کشینک اشتراك ایتدیکی بو میدان محاربه سی اوچ کون دوام ایدرک قازاقلرک مغلوبیتله نتیجه لندی . لهرلر کیمفی استرداد ایتدیلر . مع مافیله عصیان و حرب دوام ایلدی .

مختاریت اداره لرینی لهستانه قارشی مدافعه ایدمه یین قازاقلر نهایت روسیه نك حمایه سنه کیردیلر . خیمیل نیتسکی لهرلر ، موسقوفلر ، عثمانیلر وتاتارلر آره سنده بر مستقل دولت تأسیسنه موفق اوله ماز ؛ فقط قتولیک له زادكانك حاکمیت سیاسیه لری ، موسویلرک حاکمیت اقتصادیه لری آلتنده یشامقدن ایسه قازاقلری سربست براقه جنی شهه سز اولان دولت عثمانیه نك متبوعیتنی ویا اورتودوقس روسیه چارینک حمایه سنی ترجیح ایدمه یلیردی . ۱۶۵۴ ده قازاقلر روسیه یه تابع اولدیلر . بوندن صکره روسیه ایله لهستان آره سنده کی موازنه بوزولدی . روسلر آرتق لهرلرک موسقووه یه قدر ایلریله ملرندن قورقدقلری حالد کندیلری تجاوزه

باشلایہ بیلیرلرایدی . لہر قازاقلری مغلوب ایتکہ موفق اولدیلر . فقط بیاض روسیہده اسمولنسق ، لیتوآنیاده ویلنا شہرلرینی ترک ایتدیلر . مع مافیہ بو موفقیات اوزرینہ خمیہل نیتسکی چوق یشامدی . ہیکلی الیوم کیف شہری میدانلرندن برینی تزیین ایتکده در . خمیہل نیتسکی روسیہنک قوت وسطوتی تأمین ایتشدی .

لہستان جمہوریت قرالیہ سنی تہدید ایدن بو مخاطرم لره قارشی طورہ بیلکم ایچون قوتلی برادارہ مرکزیه ، . قوتلی بر تشکیلاتہ احتیاج وار ایدی . لہستان زادکانی بونی آکلامدیلر . قازاقلرلہ وقوعہ کلن محارباتک اک شدتلی زمانندہ بیلہ قرالہ تخصیصات اعطاسندن استکاف ایتدیلر ویادیت مجلسنک قبول ایتدیکی تخصیصات ویرمدیلر . پک چوق دفعہ لہ عسکری معاش آلہ مدیغنی بہانہ ایدہ رک میدان حربی ترک ایتدی . دیت مجلسلرنندہ آنارشی حکمفرما اولدی وبوقاریشیق زمانندہ « لیہ روم وہ تو Liberum veto » دنیلن اصول منحوس ایچہ یرلشدی .

۱۶۵۴دہ اسوج قرالیچہ سی قریستین شارل کوستاوه ترک حکومت ایتدیکی زمان ژان قازیمیر اسوج

اسوج در روسیہ ایلہ

محاربات

تاجنہ ادعای حق ایدہ رک حکمدار جدیدک جلوسنی پروتستو ایتدی . شارل کوستاوه ہم لہستانی ، ہم دہ لیتوآنیای استیلا ایلدی [۱۶۵۵] . ژان قازیمیر تبعہ سنک محبتی قازانہ مامشدی . لہستانک بیوک زادکانی اسوج قرالنک صرف ژان قازیمیرک شخصی علیہندہ حرب ایتدیکنہ اینانمش کبی کوروندیلر ؛ اسوجلیلرہ معاونت ایتدیلر . اسوج اردوسی وارشوویہ ، بعدہ قراقوویہ کیردی . ژان قازیمیر سیلزیایہ قاچدی .

لہ زادکاننک قسم اعظمی شارل کوستاوه قرال صفتیہ دکل ، حامی

صفیله عرض اطاعت ایتشاردی. فقط بو حامی لهلرک آرزو ایتدکری قوتسز، اهمیتسز بر حکمدار دکلدی. اسوج ضابطلری مملکتی یغما، پروتستان نفرلر قتولیک معبدلرینی تخریب ایدیورلر ایدی. اسوجلیلرک ظلمی نهایت بر عکس العمل حصوله کتیردی؛ لهلر عصیان ایتدیلر. ژان قازیمیر غالیچیا به کیردی؛ وارشوایی ضبطه موفق اولدی. فقط له میلس عسکری جسور اولقله برابر عدداً آز وتشکیلات منظمه دن محروم ایدی. شارل کوستاو براندبورغ الکتوری، بوغدان خمیهل نیتسکی، ترانسیلوانیا بکی راقوچی ایله بالاتفاق لهستانه هجوم ایتدی. لهستان بو قدر دشمندن کندینی قورتارمق ایچون آوستریا ایله اتفاقدن بشقه بر چاره بوله مدی. آوستریا لهستان ایله روسیه آره سنده عتد متارکبه توسط ایتدکن صکره اسوجلیلری قراقووی بی ترکه مجبور ایلدی. بعده لهستان قرالی پروسیه دوقه لغنک استقلالنی تصدیق ایدرک براندبورغ الکتوری ایله اتفاق ایتدی. اوندن صکره اسوجلیلرله حربه دوام ایدرک مظفر اولدی. فرانسه نك، آلمانیا ایمپراطورینك توسطیله (اولیوا) معاهده سی عقد ایدلی [۱۶۶۰].

لهستان قازاق مملکتلرینی تکرار اله کچیرمک املندن فارغ اولماشدی. ۱۶۵۸ سنه سنده قازاقلر روسیه دن آریله رق ینه لهستانه تابع اولدیلر. او قرایناده لهستانه تابع اولمق اوزره لیتوانیا طرزنده بر حکومت تشکل ایتدی. بو حکومتك انتخاب ایله تعیین اولنور بر رئیس، کندینه مخصوص بیوک مأمورلری بولنه جق، اورتودوکسلیق دین رسمی اوله جق ایدی.

بو صورت تسویه لهستان ایچون پک فائده لی ایدی. لکن روسیه اعتراض ایتدی؛ بری لیتوانیا به، دیگرى او قراینایه ایکی ارد

کوندردی . لہلہ روسلری کری یہ پوسکورتمکہ موفق اولدیلر . فقط نتیجہدہ قازاقلرک آردسندہ اختلاف ظہور ایتدی . دینہ پرک صاغ سا . حئلندہ کی قازاقلر لہستان قرالک ، صول ساحئلندہ کیلر موسقووه چارینک تح تحت تابعیتہ کیردیلر .

له کویلیلری زاکانک ظلم وتضیق آلتندہ صولک اغتسائات داضلہ درجہ سفات ایچندہ قالمشلر ایدی . کویایلرک بو درجہ پریشان اولدقلری برملاکت یوقدی . ژان قازیر سوء استعمالاتی ، مظالمی قالدیرمق ، اہالی یی قور تارمق ایستہدی . فقط نہ بوکا ، نہدہ دولتک تشکیلات اساسیہ سنی تعدیلہ موفق اولہمدی .

ژان قازیرک اوغلی یوق ایدی . وفات ایتدیکی زمان ہر قرالک اتخابندہ اولدینی کی مملکتک ینہ قاریشیلق ایچندہ قالہ جنی محقق ایدی . مملکتدہ روسیہ چارینی ، فرانسه ویا آوستریا پرنسپلرندن برینی قرال اتخاب ایتک ایستہن اوچ فرقہ موجود ایدی . ۱۶۶۱دہ ژان قازیر دیت مجلسندہ کنڈیسنہ بر خلف اتخابی مسئلہ سنی بالذات آچدی وبو مناسبتلہ ایراد ایلدیکی بر نطفہدہ لہستان تشکیلات اساسیہ سنک مملکتی انقراضہ طوغری سوروکلہ مکدہ اولدیغنی - بر عصر صکرہ وقوعہ کلن مقاسمہ لری کشف ایدرجہ سنہ - زادکانہ آکلاتمق ایستہدی . لیکن دیت مجلسنی ہیچ بر شیئہ قرار ویرہمدن طاغیلدی .

لہستان اجنبی استیلا سنی دفعہ موفق اولدقن صکرہ برقاچ سنہ محاربات داخلہ ایلہ خراب اولدی . بوندنک زیادہ روسلر استنادہ ایتدیلر . عقدایدیلن منارکہ موجبہ اسمولنسق ، سہوہریا ، چرنیغوف طرفلرینی ، دینہ پرک صول ساحئلندہ کی اوقرایانی ، کیف شہرینی آلدیلر [۱۶۶۷] . غربی اوقراینا خطمانی دوزوشقو دہا اول دولت عثمانیہ نک تحت تابعیتہ

کیرمشدی. ۱۶۶۷ده لهستان قوماندانلرندن ژان صوبیهسکی دوروشنقوی مغلوب ولهستانک متبوعیتنی تصدیقه مجبور ایتدی .

لهستانک دوچار اولدینی فلاکتلردن متأثر اولان ژان قازیمیر ترک حکومت ایدرک فرانسیه چکیلدکدن صکره دیت مجلسی میشل ویشنه-وه تسکی Michel Vichnévétski یی قرال انتخاب ایلدی [۱۶۶۹] . یکی قرال اوقرایناده جسیم مالکانه لره صاحب بیوک برعائله دن ایدی . اوقراینانک لهستاندن ایرلسی بو عائله نک ثروتی ، قدرتی اخلال ایتمشدی . اونک ایچون میشل ویشنه وه تسکینک هر شیدن اول قازاقلردن اخذناره چالیشه جنی شهبه سز ایدی .

قازاق رئیس دوروشنقو لهستان قرالنک مدعیاتنه عثمانیلرله حرب قارشى طوره بیلیمک ایچون تاتارلرله اتفاق ، دولت عثمانیه نک تابعیتنی قبول ایتمشدی . دولت عثمانیه لهستانه اعلان حرب ایتدی ، عثمانیلر پودولیا یه کیردیلر ؛ قامنیچه یی ضبط ایتدیلر ؛ لمبرغه قدر ایلریله دیلر . بوجاش معاهده سیله [۱۶۷۲] اوقراینا دولت عثمانیه طرفندن مالکانه طرزنده دوروشنقویه ویرلدى پودولیا و قامنیچه دولت عثمانیه ده قالدی . بوندن بشقه لهستان تضمینات حربیه ویردی و هر سنه پادشاهه ویرکو اعطاسنی تعهد ایتدی .

بو آغیر معاهده یی قبول ایتمش اولان لهر برمدت صکره کندیلریخی طولادیلر . شرائط معاهده یی ایفا ایتمک ایسته مدیلر . اعطاسی مشروط اولان ویرکویی ویرمدیلر . صوبیهسکی عثمانیلرله هجوم ایتدی . بساراباده ، خوتینده وقوعه ککن محاربه یی قازاندی [۱۶۷۳] . صوبیهسکی بو مظفرتی قازاندینی صروده قرال میشل ویشنه وه تسکی وفات ایتدی .

داخلاً اک وخیم قاریش قیقلر ایچنده قالان ، خارجاً
 زانہ صوبہ سکی مغلوب اولان لهستانک هر شیدن اول محارب برقراله
 احتیاجی وارایدی . زان صوبہ سکی شہرت عسکریہ سی قرالغہ انتخابی
 تأمین ایتدی .

اجدادی آرہ سندہ ماهر قوماندانلر بولنان بر عائلہ دن ۱۶۲۴ دە
 تولد ایتمش اولان صوبہ سکی یکر می بش سندن بری اسوجلیر ، قازاقلر ،
 تاتارلر ، عثمانلیرلہ وقوعہ کلن محارباتدہ تمیز ایتمشدی . زوجہ سی فرانسز
 پرنسسلرندن بری ایدی . کنج کلکندہ فرانسدہ بولنمشدی . بوسایہ دە
 قرالغہ انتخابی متعاقب فرانسدہ قرالی اون دردنجی لوئی ایلہ بر معاہدہ
 عقد ایتدی [۱۶۷۵] . بو معاہدہ موجبہ اون دردنجی لوئی لهستان
 قرالغہ تخصیصات اعطا ایدہ جک ، لهستان قرالی دە بوکا مقابل آوستریاہ
 عصیان ایتمش اولان بحارلرہ معاونت ایدہ جک ، براندبورغ الکتورینہ
 اعلان حرب ایدرک پروسیہ دوقہ لغی اوندن آلہ حق ایدی .

احوال مساعد ایدی . پروسیہ دوقہ لغی اہالیسنک بر قسمی لهستانہ
 طرفدار ایدی . براندبورغ الکتوری اسوج ایلہ حرب ایتکدہ ایدی .
 فقط صوبہ سکی فرصدن استفادہ ایدہ مدی . براندبورغہ هجوم ایتک ،
 غربی اروپا مسائل سیاسیہ سنہ اشتراک و مداخلہ ایلک فرصتی قاجیردی .
 صوبہ سکی یالکز عثمانلیرلہ قارشی وقوعہ کلن محارباتدہ اون دردنجی
 لوئینک مسلک خیر خواہانہ سندن مستفید اولدی . حرث صوبہ سکی
 جلوسندن صکرہ دخی دوام ایتکدہ ایدی . تاتارلر ۱۶۷۵ دە لمبرغ
 پیشکاہندہ مغلوب اولدیلر . ایرتسی سنہ صوبہ سکی (ژوراونا) دە
 عدد آفاق براردویہ مقاومت ایدہ بیلدی . فرانسدہ ک توسیطلہ ژوراوانادہ
 عقد ایدیلن معاہدہ موجبہ او قرائنانک ثلثانی پولونیایہ اعادہ ، اون

بیکی متجاوز اسیر تخلیه و تاتار لر لهستانه تجاوزدن منع اولندی . بودولیا مسئله سنک حلی آتییه براقیلدی .

مع مافیه صوبیه سکی اون دردنجی لوئی ایله الی نهایه خوش کچینمدی؛ برمدت صکره آوستریایه میل ایتدی . آوستریا عثمانلی استیلاسی تهدیدینه هر زمانکندن زیاده معروض بولندی ایچون لهستان ایله اتفاقه فرانسه دن زیاده محتاج ایدی . پاپالق مقامنک توسطی سایه سنده دولت عثمانیه یه قارشی صوبیه سکی ایله بر اتفاق معاهده سی عقد ایتدی . بو اتفاق و یانه یی و آوستریای عثمانلی استیلا سندن نصل قورتاردیغنی ، صکره صوبیه سکنک لئو بولدن نصل سومه معامله کوردیکی یوقاریده بیان ایتشدک .

صوبیه سکی و یانه یی قورتارمقله پک بیوک بر شان وظفره نائل اولدی ایسه ده لهستان بوندن ماده استفاده ایده مدی . بالعکس دولت عثمانیه ایله لهستان آره سنده کی حرب دوام ایتدی ؛ صوبیه سکی اسمولنسق و کیف شهرلرینی صورت قطعیده روسلره ترک ایدرک موسسقووه حکومتی ایله بر اتفاق عقدینه مجبور اولدی . فقط لهلر نه قامنیچه یی عثمانیلردن استرداد ایده بیلدیلر ، نه ده بغدادنه کیره بیلدیلر .

صوبیه سکنک سیاست خارجی ده کی موفقیتسزلکی مملکتک احوال داخلیه سندن ایلری کلیور ایدی . لهستانده اجنبی تفوذینک تحت تاثیرنده حرکت ایدن بر برلینه دشمن متعدد فرقه لر موجود ایدی . بو فرقه لر دیت مجلسنک مذاکراتنه بیهلله اجرای تاثیر ایدیورلر ایدی . آنارشی ایچنده بولتان پولونیا ده دره بکلردن هر بری کندی حسابنه بر سیاست تعقیب ایدیور ؛ هر ایستین و مقتدر اوله بیلن کیسه اداره اموریه اله آلور ایدی . قرال دیکر لرندن ده قوتلی اولان بر دره بکی ایدی .

قرالک سیاستی نہ اولورسه اولسون رقیب دره بکلرینک اعتراض و مخالفتلرینه معروض قالیردی. رقیبلرله اوغراشمغه مجبور اولان قرال هیچ بر زمان ملتک هیئت عمومیه سنه استناد ایدمه من ایدی. عمومی آنارشئی قرالک اللرینی باغلامشدی. بالخاصه لیتوآنیاده قرالک هیچ حکم و نفوذی یوق ایدی. صوبیه سکینک وقاتنی تعقیب ایدن سنه لر لهستان تاریخنک اک مؤلم واک فنا قسمنی تشکیل ایدر.

ایکنجی آوغوست
ژان صوبیه سکینک وقاتندن صکره لهستان تاجنه
ظهور ایدن نامزدلر آردسندہ صاقسونیا الکتوری
فره دریق آوغوست پاره قوتیلہ غلبہ ایدرک قرال انتخاب ایدلدی وایکنجی
آوغوست نامنی آلدی [۱۶۹۶]. آوستریا، روسیه و براندبورغ
آوغوستک انتخابنه چالیشمشلر ایدی.

ایکنجی آوغوست صاقسون اردوسیله یکی تبعه سنی تحت اطاعت و
انضباطه آلہ جفنی امید ایدیور ایدی. فقط صاقسونلر لهستانه داخل
اولنجه اوراسنی جبراً فتح ایدلمش بر مملکت کبی یغمايه، تخریبه باشلادیلر.
یکی قرالک حیثیت و اعتباری ایلک کونلرده مختل اولدی.

ایکنجی آوغوست قرالغه انتخاب اولنورکن قامنیچه شهرینی عثمانیلردن
آلمنی تمهد ایتمشدی. بوکا موفق اوله مدی. غالیچیاده جمع و تحشید
ایتدیکی عسکر مملکتی تخریبیدن بشقه بر شی یاپه مدی. دولت عثمانیه
قارلوفچه معاهده سنی عقدہ مجبور اولدینی زمان لهستان قامنیچه بی آلہ
بیلدی. بوندن صکره لیتوآنیاده تغلب ایتمش اولان بر بیوک عائله نک
ظلم و اعتشافی یوزندن بر محاربه داخله ظهور ایتدی.

بو محاربه داخله قوای ملتی بیهوده یره افنا ایتدیکی صرمده براند-
بورغ الکتوری فرمدریق روسیه قرالی اولمش ، بیوک پترو « اوروپایه
بر پنجره ، آجش ایدی . پولونیانک منفعتی روسیه نك ترقیاتنه مانع اولمق
ایچون اسوج ایله توحید حرکت ایتمک ایدی . حال بوکه ایکنجی آوغوست
بونک تمامیه ضدی بر سیاست تعقیب ایلدی . لیوونیای الحاق ایتمک ،
پترونک معاونتیه لهستانده قرالک قدرت حکومتی آرتدیرمق ایسته دی .
بو سیاستک نتایجی ایکنجی جلده کوره جکر .

شمذیلک شونی بیلیمک لازمدر ، که اسوج قرالی اون ایکنجی
شارل طرفندن خلع ایدیلن آوغوست روسیه جاری طرفندن قرالغه اعاده
اولندی . رقیب استانیسلاس له سچینسکی حامیسی اولان اسوج قرالیه
برابر سقوط ایتدی [۱۷۰۹] . اعاده حکومت ایدن آوغوست روسیه نك
لهستانه عائد اولان قسمی روسیه قرالنه ، صاموژیتی Samogitie ایله
بیاض روسیه یی روسیه چارینه ویرمک صورتیه باقی قاله جق لهستانده
ارنی وقوتلی بر قراللق تأسیسی ایچون ایکی حکمدارک معاونتی تأمین
ایلمکی دوشوندی .

فقط بیوک پترو عثمانلیره مغلوب وپروت معاهده سنی قبوله مجبور
اولدقدن صکره لهستان امورینه قاریشه مدی . آوغوست دخی تصوراتی
موقع اجرایه قویمق ایچون چارک معاونتدن محروم قالدی . مع مافیه
پروژه سنی تطبیق ایچون لهستانه صاقسون عسکرینی جلب ایتدی . نتیجه ده
بر محاربه داخله باشلادی . بودفعه قرال علیهنه عصیان ایدن لهلر بیوک

پتروڈن استمداد ابتدیلر۔ روسیہ اردوسی وولینیاہ کیردی ، چارک مأمور
 مخصوصی لهستان حکمداریله تبعهسی آره منده حکم اولدی ، صاقسون
 اردوسی لهستانی تخلیه ایتدی . لهستانک استقلال ملیسندن اثر قالمدی.
 روسیہ جاری ایسته دیکی شرائطی قبول ایتدیرمکه موفق اولدی. بوندن
 صکره لهستان انقراض تامی تاریخنه قدر ذلت وحقارت ایچنده یشادی .

صوك





